

# New Testament

Erzya Language

## Erzya - Bible - New Testament

Матфея	3	
Марка	99	
Луки	157	
Иоанна	267	
Деяния	341	
Иакова	440	
1-е Петра	451	
2-е Петра	463	
1-е Иоанна	470	
2-е Иоанна	481	
3-е Иоанна	483	
Иуда	485	
к Римлянам	488	
1-е Коринфянам	532	
2-е Коринфянам	574	
к Галатам	602	
к Ефесянам	618	
к Филиппийцам	633	
к Колоссянам	644	
1-е Фессалоникийцам	654	
2-е Фессалоникийцам	663	
1-е Тимофею	668	
2-е Тимофею	680	
к Титу	688	
к Филимону	694	
к Евреям	697	
Откровение	729	

# Erzya - Bible - New Testament

## Матвеень Коряс Евангелия

### Матфея 1

<sup>1</sup>Иисус Христосонь раськенъ лувозо: Иисус ульнесъ Давид инязоронть раськенъ поладыцякс, Давид — Авраамонь раськенъ поладыцякс. Вана Иисусонь покштянзо-бабанзо:

<sup>2</sup>Авраамсто саезь Давид инязоронть видьс эрясть: Авраам, Исак, Яков, Иуда лелянзо-ялаксонзо марто,

<sup>3</sup>Перес ды Зерах, конатненъ аваст ульнесъ Тамар, Есрон, Арам,

<sup>4</sup>Аминадав, Нахшон, Салмон,

<sup>5</sup>Боаз, конанъ авазо ульнесъ Рахав, Овид, конанъ авазо ульнесъ Рут, Иессей

<sup>6</sup>ды Давид инязорось. Давидстэ саезь Вавилон масторов панема шкас эрясть: Давид инязорось, Соломон, конанъ авазо васня ульнесъ Уриянь никс,

<sup>7</sup>Рехавеам, Авия, Аса,

<sup>8</sup>Иосафат, Иорам, Узия,

<sup>9</sup>Иотам, Ахаз, Эзекия,

<sup>10</sup>Манассе, Амон, Иосия,

<sup>11</sup>Иоаким, Екония лелянзо-ялаксонзо марто.

<sup>12</sup>Вавилонов панема шкасто саезь Иисусонь чачома шкас эрясть: Екония, Салатил, Зоровавель,

<sup>13</sup>Авиуд, Элиаким, Азур,

<sup>14</sup>Садок, Ахим, Элиуд,

<sup>15</sup>Элеазар, Матван, Яков,

<sup>16</sup>Иосиф, Мариянь мирдезэ. Мария чачтызе Иисусонь, конанень лиякс мерить Пазонь кучовт Идиця.

<sup>17</sup>Истя весемезэ Авраамсто саезь Давид видьс ютасть ломанень кемнилее пингеть, Давидстэ саезь Вавилонов панема шкаскак таго ютасть ломанень кемнилее пингеть. Вавилонов панемадо мейле Пазонь кучовт Идицянь чачома шкаскак истя жо ютасть ломанень кемнилее пингеть.

### **Иисус Христосонь чачомазо**

<sup>18</sup>Вана кода ульнесь Иисус Христосонь чачомазо: Иисусонь чачомадо икеле Сонзэ авазо Мария чиявтозель Иосифнень. Сынь пурнасть урвакстомо-венчамо. Теде икеле Мария чарькодсь: сон учи эйкакш, кона сьулмавсь потмозонзо Иневанькс Оймеялтонть вельде.

<sup>19</sup>Иосиф, кона аравтозель Мариянень мирдекс, ульнесь видечинь ды Коень топавтыця ломань. Сонзэ арасель мелезэ совавтомс Мариянь визьксчамас весе ломантнень сельме икеле, ды секскак сезиксэлизе чиямонть лиятненень апак яволявто.

<sup>20</sup>Зярдс сон тень арсизе, онозонзо лиссь Азоронть кучовт ангелэсь, кона мерсь тензэ: «Иосиф, Давид инязоронь цёра! Иля пеле саемс Мариянь эстеть никс. Эйкакшось, кона сьулмавсь сонзэ потсо, Иневанькс Оймеялтонть пельде.

<sup>21</sup>Сон чачты Цёра, конанень путт лем Иисус, эдь Сон идесы Эсензэ израилень раськенть пежетензэ-грехензэ эйстэ».

<sup>22</sup>Те весе истя теевсь вана мекс: эрявсь топавтовомс валтнэненень, конатнень Азорось икеле ёвтынзе пазмарицянтъ вельде:

<sup>23</sup> «Ванодо, тейтерь пекии ды чачты Цёра, ды путыть Тензэ лем Иммануэл», конань смустезэ: “Пазось минек марто”.

<sup>24</sup>Удомсто стямодо мейле Иосиф тейсь истя, кода тензэ мерсь Азоронть кучовт ангелэсь: сон саизе Мариянь эстензэ никс.

<sup>25</sup>Ансяк Иосиф эзь удо вакссонзо се шкас, зярс эзь чачо Мариянь Цёразо, васенце эйкакшозо. Иосиф Цёрантень путсь лем Иисус.

## Матфея 2

### Чилисема ёндонь содыцятне сюконить Иисуснэнь

<sup>1</sup>Иисус чачсь Иудеянь Вифлеем ошсо, зярдэ инязорокс ульнесь Ирод. Теде мейле зяряя шкань ютазь састь Ерусалимс чилисема ёндо тештень коряс содыцят ды кевкстсть:

<sup>2</sup>«Косо еврейтнень се Инязорось, кона ней чачсь? Минь неинек, кода Сонзэ тештезэ лиссь менельсэнтъ, ды сынек Эйдентень сюконямо».

<sup>3</sup>Теде марязь, Ирод инязорось ды мартонзо весе Ерусалимеськак талнозевсть.

<sup>4</sup>Секскак сон пурнынзе весе попонь покштнэнь ды Койс тонавтыцятнень ды кевкстинзе, козонь чачомаль Пазонь кучовт Идицянть.

<sup>5</sup>Сынь мерсть тензэ: «Иудеянь Вифлеем ошсо. Эдь истя теде уш сёрмадозель пазмарицянть вельде:

<sup>6</sup> “Тон, Иудань масторонь Вифлеем, допрок аволь меельцят Иудань лия покш оштнэде, эдь тонь эйстэ лиси Кирдиця, кона карми улеме Монь Израилень раськем Ветицякс-Ваныцякс”».

<sup>7</sup>Сестэ Ирод салава эстензэ тердинзе содыцятнень ды кевкстнизе пельдест, зярдэ лиссь те тештеть.

<sup>8</sup>Мейле Вифлеемев сынст кучомсто кармавтсь: «Азёдо ды кевкстникк весементь Эйкакшонть эйстэ. Зярдэ Сонзэ мусынк, моненьгак куля пачтядо: сестэ монгак молян сюконямо Тензэ».

<sup>9</sup>Сынь кунсолызь инязоронть ды тусть. Се тештеть, конань сынь неизь чилисема ёндо, таго мольсь сынст икеле. Зярдэ тештеть пачкодсь Эйкакшонть аштема тарканть вельксэс, лоткась.

<sup>10</sup>Тештенть неемстэ содыцятне седейшкава кенярдозевсть.



<sup>11</sup>Сынь совасть кудонтень, ды зярдю неизь Эйкакшонтъ Мария аванзо марто, пульзясть кумажа лангс ды сюконясть Эйдентень. Мейле таргизь сюпавчисэ пештязь горобиинест ды макссть Тензэ казнетъ: сырне, ладан ды смирна.

<sup>12</sup>Пазось онстост кардынзе содыцятнень Ироднэнь велявтомадо, секскак сынь лия киява велявтсть эсь масторозост.

### **Египетэв оргодема**

<sup>13</sup>Тештень коряс содыцятнень туемадо мейле Иосифнень онозонзо лиссь Азоронтъ ангел ды мерсь: «Ирод арси Эйкакшонтъ муевтемс ды маштовтомс. Секскак стяк, саик Эйкакшонтъ аванзо марто, оргодть Египетэв ды ульть тосо семс, зярс мон тетъ а мерян мекев велявтомадо».

<sup>14</sup>Иосиф сеске стясь, саизе Эйкакшонтъ аванзо марто ды ветъ тусь Египетэв.

<sup>15</sup>Тосо сон эрясь Иродонь куломас. Те весе истя теевсь секс, мекс эрявсь топавтовомс пазмарицянтъ вельде Азоронь ёвтавт валтнэнь: «Египетстэ Мон тердия Эсь Цёрам».

### **Вифлеемсэ эйкакштнэнь машнемась**

<sup>16</sup>Зярдю Ирод чарькодсь: тештень коряс содыцятне сонзэ манизь, сон пек азаргадсь ды кармавтсь Вифлеемсэ ды весе перьканзо таркатневаяк машнемс кавто иень ды седе вишкине цёрынетнень. Шканть сон аравтызе сень коряс, конань кевкстнизе содыцятнень пельде.

<sup>17</sup>Истя топавтовсть Еремия пазмарицянтъ вельде ёвтазь валтнэ:

<sup>18</sup> «Рама ошсо марявить авардемась, рангомась ды лайшемась вайгельть. Те Рахиль лайши эсь эйкакшонзо ды кодаяк а оймавтовилацеви, эдь сынь кулость».

### **Египетстэ велявтома**

<sup>19</sup>Иродонь куломадо мейле Иосифнень Египетсэ лиссь онозонзо Азоронтъ ангел

<sup>20</sup>ды мерсь: «Стяк, саик Эйкакшонтъ аванзо марто ды азё мекев Израилень масторов: Эйкакшонтъ оймензэ мельга пансицятне кулость».

<sup>21</sup>Иосиф стясь, саизе мартонзо Эйкакшонтъ, Сонзэ аванзо ды сыргась Израилень масторов.

<sup>22</sup>Ансяк Иосиф марясь: Иудеянь ёнкссо инязорокс озась тетянзо таркас Аркелай, Иродонь цёразо. Секс Иосиф пелезевсь тов велявтомадо. Онстонзо Пазонь ёвтавт превспутомадонть мейле сон тусь Галилея ёнксов

<sup>23</sup>ды кармась эрямо ошсо, конань лемезэль Назарет. Истя топавтовсь пазмарицятнень вельде Идицядо ёвтазесь: «Сонензэ кармить мереме Назаретэнь ломань».

### Матфея 3

#### Нававтыця-Лемдиця Иоанн — Паздо кулянь пачтиця

<sup>1</sup>Зярыя иень ютазь сась Нававтыця-Лемдиця Иоанн ды Иудеянь чаво модасо кармась ломантненень пачтямо Пазонь пельде кулянтъ:

<sup>2</sup>«Менельсэнтъ Инязорксчизэ сась малав! Секскак кадынк пежетенк !»

<sup>3</sup>Иоанн ульнесь се, конадо кортась Исайя пазмарицясь: «Чаво модасо маряви сеерицянь вайгель: “Анокстадо Азоронтень ки! Виделгавтодо Сонзэ туртов китнень-янтнэнь”».

<sup>4</sup>Иоанн оршазель верблюдонь понань оршамопельсэ ды карксазель кшнань каркссо. Ярсамопелекс тензэ ульнестъ пакся цирькунт ды идем мекшень медь.

<sup>5</sup>Сестэ сакшность тензэ ломанть Ерусалимстэ, весе Иудея ёнксстонть ды Иордан леентъ пельга таркатнестяк.

<sup>6</sup>Сынь видькстасть пежетест коряс, ды Иоанн нававтсь-лемдсь эйсэст Иордан лейсэ.

<sup>7</sup>Зярдю жо Иоанн неинзе ламо фарисейтнень ды саддукейтнень, конат састь тензэ пряст наавтомо, мерсь тенст: «Пупи гуень левкст! Кие тынк тонавтыдизь наавтоманть-лемдеманть вельде менемс Пазонь кежень малавгадыця пандомадонть?

<sup>8</sup>Эрямосонк невтнк Пазонтень велявтоманк.

<sup>9</sup>Илядо ладсе эсь прянк неть валтнэсэ: “Минь Авраамонь эйкакшт”. Эдь мерян тенк: Пазонтъ ули виезэ теемс неть кевтнестяк Авраамнень эйкакшт!

<sup>10</sup>Узересь уш кепедезь чувтнэнь юрост вельксэс: эрва чувтось, кона а канды паро умарь, ули керязь ды ёртозь толс.

<sup>11</sup>Пазонтень велявтоманк невтемга мон эйсэнк наавтан ведьсэ, а вана мельган сыцясь мондень седе пек виев: мон а маштован мик Сонзэ карсемапелень кандыцяккак. Сон наавттадызь Иневанькс Оймеялтсо ды толсо.

<sup>12</sup>Сонзэ кедьсэ понжавтома койме, конасо Сон ванськавтсы тинге пирензэ. Товзюронтъ пурнасы Эсензэ утомс, ды сюватнень пултасынзе амадстевикс толсо».

### **Иисусонь наавтомазо**

<sup>13</sup>Мейле Иисус сась Галилея ёндо Иордан чирес Иоаннонь кедьстэ прянзо наавтомо.

<sup>14</sup>Иоанн васняк мольсь каршо, истя кортазь: «Тонеть эряви монь наавтомс, а вана Тон монень сыть!»

<sup>15</sup>Иисус каршонзо мерсь: «Кадык ней ули истя. Миненек эряви теньсэ топавтомс педэ пес Пазонтъ видечинь мелензэ». Сестэ Иоанн тейсь Иисусонь вешеманзо коряс.

<sup>16</sup>Сеске наавтомадо мейле Иисус лиссь ведьстэнтъ, ды апак учо панжовсь Тензэ менелесь, ды Иоанн неизе Пазонь Оймеялтонть, кона валгсь гулька ладсо ды лоткась Сонзэ лангс.



<sup>17</sup>Менельстэнтъ марявсь вайгель: «Те Монь вечкевикс Цёрам, Сон Монь кенярксом».

## Матфея 4

### Идемевсесь снартни Иисусонь совавтомс пежетьс

<sup>1</sup>Теде мейле Оймеялтось ветизе Иисусонь чаво модас Идемевсентъ пельде Сонзэ снартневтеме-варчавтнеме.

<sup>2</sup>Тосо Иисус постовась ниленьгемень чить ды ниленьгемень веть. Ды вана, okayники, пек вачсь пекезэ.

<sup>3</sup>Сестэ Снартневтицясь сась ваксозонзо ды мерсь: «Бути Тон Пазонтъ Цёразо, эрьга кармавтыть неть кевтнень теевеме кшикс».

<sup>4</sup>Иисус мерсь каршонзо: «Сёрмадозь: “Аволь ансяк кши вийсэ эри ломанесь, истя жо эрьва валсонть, конань ёвты Пазось”».

<sup>5</sup>Сестэ Идемевсесь ветизе Иисусонь Пазонь кочкавт Ерусалим ошов ды стявтызе Сонзэ Пазонь кудонь тэкшос.

<sup>6</sup>Сон мерсь Иисуснэнь: «Бути Тон Пазонтъ Цёразо, кирнявт алов, эдь сёрмадозь: “Пазось кармавты Эсензэ ангелтнэненъ ванстомс Тонь. Сынъ кандтадызь Тонь кедест лангсо: илязо эшкеве пильгеть кевс”».

<sup>7</sup>Иисус мерсь тензэ: «Тосо истяк сёрмадозь: “Иля снартневтне-варчавтне Азорот, эсеть Пазот”».

<sup>8</sup>Теде мейле Идемевсесь ветизе Иисусонь пек сэрей пандо пряс, ды невтинзе Тензэ мода лангонь весе мастортнэнь сынст сюпавчисэст ды мазычисэст,

<sup>9</sup>ды мерсь Тензэ: «Весе тень Тонеть максса, пульзязь сюкониндерят монень».

<sup>10</sup>Сестэ Иисус мерсь тензэ: «Оргодть Монь эйстэ, Сатана! Эдь сёрмадозь: “Сюконякшнок Азоронтень, эсеть Пазонтень, ды важдотькак ансяк Сонзэ туртов”».

<sup>11</sup>Сестэ Идемевсесь кадызе Иисусонь. Сеске Иисуснэнь састь ангелт ды кармасть Тензэ лездамо.

### **Иисус ушоды Галилеясо Эсь важоманзо**

<sup>12</sup>Зярдэ Иисус марясь Нававтыця Иоаннонь пекстамо кудос озавтомадо, сестэ Сон тусь мекев Галилеяв.

<sup>13</sup>Сон уш эзь кадово Назаретс, тусь эрямо Капернаум ошов, кона ашти Галилеянь эрьке чиресэ, Завулон марто Нафталинь буетнень мода лангсо.

<sup>14</sup>Те истя теевсь вана мекс: эривсь топавтомс Исайя пазмарицянтъ ёвтавт валтнэненъ:

<sup>15</sup> «Тон, Завулононь мастор, Нафталинь мастор, кона ашти иневедев ки лангсо, Иордан лей томбальксэнь мастор, лия раськенсетненьгак Галилея!

<sup>16</sup>Тунь чоподасо эриця раськесь неи ине валдо. Нетненень, конат эрить куломань чопода масторсо, сияжды валдо».

<sup>17</sup>Се шкастонть саезь Иисус ушодсь пачтямо Эсь кулянзо: «Менельсэнтъ Инязорксчизэ сась малав. Секскак кадынк пежетенк!»

### **Васенце тонавнициятне**

<sup>18</sup>Галилеянь эрьке чирева ютамсто Иисус несъ кавто лелят-ялакст: Симононь, конанень мерить Петра, ды Андрей ялаксонзо. Сынь ульнесть калонь кундыцят ды кайсесть ведьс кундамопельть.

<sup>19</sup>Иисус мерсь тенст: «Адядо мартон — Мон тейтядызь ломанень кундсицякс».

<sup>20</sup>Сынь сеске кадызь кундамопелест ды тусть мартонзо.

<sup>21</sup>Седе тов ютамсто Иисус несъ лия кавто лелят-ялакст: Зеведеень цёратнень Яковонь ды Иоаннонь. Сынь Зеведей тетяст марто венчсэ витильть-петильть калонь кундамопелест. Иисус сынсткак тердинзе.

<sup>22</sup>Сыньгак сеске кадызь венчентъ ды тетяст ды тусть Иисус марто.

### Иисусонь важомазо ломантненень

<sup>23</sup>Иисус якась весе Галилеяванть, тонавтсь синагогатнесэ, пачтясь ломантненень паро кулянть Менельсэнтъ Инязорксчидензэ, шумбралгавтсь эйсэст эрва кодамо ормадо ды моцень арасьчиде.

<sup>24</sup>Иисусто кулясь срадсь весе Сирия ёнксонть келес. Кандтнесть-ветнестъ Тензэ весе сэредицятнень, эрва кодамо ормасо ды сэредемасо майсицятнень: апаро оймеялтсо колавтнэнь, кулсицятнень, катартнэнь. Иисус весень шумбралгавтнесь.

<sup>25</sup>Сонзэ мельга мольсть пек ламо ломанть Галилея ды Кемень ош ёндо, Ерусалимстэяк, Иудеястояк ды Иордан леенть томбальдеяк.

## Матфея 5

### Алуксонь уцяска

<sup>1</sup>Зярдэ Иисус несъ ламо ломанть, Сон кузьс пандо пряс ды озась. Тонавтницянзо промсть перьканзо,

<sup>2</sup>ды Сон кармась тонавтомост истямо валсо:

<sup>3</sup>«Уцяскавт сеть, конатне чарькодить эсь кажовчист Пазонтъ икеле, эдь сынст ули Менельсэнтъ Инязорксчист.

<sup>4</sup>Уцяскавт сеть, конат ризныть-авардить: Пазось сынст оймавтсынзе.

<sup>5</sup>Уцяскавт апокшкавтницятне: сынст кедь алов Пазось макссы масторлангонть.

<sup>6</sup>Уцяскавт сеть, конатненень Пазонь меленть топавтомась вачочинь ды симема самонь кондымо: Пазось сынст бажамонть топавтсы.

<sup>7</sup>Уцяскавт лиянень седеймарицятне: сыненсткак Пазось путы седеймарямо.

<sup>8</sup>Уцяскавт сеть, конатнень ванькс седеест: сынъ несызь Пазонтъ.

<sup>9</sup>Уцяскавт сеть, конат теить ладямо ломантнень ютксо: Пазось ловсынзе сынст Эсензэ эйкакшокс.

<sup>10</sup>Уцяскавт сеть, конатнень пансить Пазонь мелень топавтоманть кисэ: сынст ули Менельсэнтъ Инязорксчист.

<sup>11</sup>Уцяскавт ультядо тынь, зярдэ Монь кисэ тынк кармить покордамонк, пансеменк ды лангозонк кенгелезь эрьва кодамо апаро валонь кортамо.

<sup>12</sup>Кенярдодо ды эрьгеледе: менель лангсо тыненк те ули сюпавдожк сюпавсто пандозь. Истя пансесть пазмарицятненьгак, конат эрясть тынденк икеле».

### **Масторлангонь салось ды валдось**

<sup>13</sup>«Тынь — теке мода лангонь сал. Салось ёмавтындерясы танстензэ, сестэ кодаяк сон одов а тееви саловокс. Сон мезекскак маштовомо а карми, ансяк ёртома ушов, косо чалгсеви якиця ломанень пильге ало.

<sup>14</sup>Тынь — теке масторлангонь валдо. Пандо прясэ аштиця ошось кодаяк а кекшеви сельмеде.

<sup>15</sup>Кирвазтезь лампантькак а кекшнесызь кедьге алов, мекевланк сонзэ путнесызь лампань кирдема таркас, ды сон валдомты весе кудосотненень.

<sup>16</sup>Кадык тынк валдонккак ломантненень истя сияжды: кадык сынъ несызь тынк вадря тевенк ды шнасызь менелень Тетянк».

### **Иисус ды Моисеень Коесь**

<sup>17</sup>«Илядо арсе, келя, Мон сынъ Коентъ эли пазмарицянь сёрмадовкстнэнь полавтомо. Мекевланк, Мон сынъ сынст топавтомо, аволь полавтомо!

<sup>18</sup>Видестэ кортан тенк: зярс кармить аштеме менелесь ды масторось, Койстэнтъ натой ве кикскеяк эли вишкине тешкскеяк а ёми, зярс весе сон а топавтови.

<sup>19</sup>Секскак, кие колы куш вейкентъ, вельть вишкинентъ, кармавтовкстнэнь эйстэ ды лия ломантькак тенень тонавты, се Менельсэнтъ Инязорксчисэнтъ ловозь ули весемеде вишкинекс. Кие

сонсь топавтсы Коенть ды лия ломантькак тенень тонавты, се Менельсэнтъ Инязоркчисэнтъ ловозь ули инекс.

<sup>20</sup>Тенде Мон кортан тенк вана мекс: бути а карматадо Пазонь меленть топавтомо Койс тонавтыцятнеде ды фарисейтнеде пек седе парсте, сестэ Менельсэнтъ Инязоркчинтень а совавтодо».

#### **Кежде ды пелькстамодо**

<sup>21</sup>«Тынь содатадо, мезе кармавтозель кезэрень ломантненень: “Иля маштне” ды “Кие машты ломань, сень максома судс”.

<sup>22</sup>Мон вана кортан тенк: эрвась, кона стяко кежиявтни малавиксэнзэ лангс, судс таргама. Кие вана мери малавиксэнстэнь: “Тон чавола пря ломанят”, сень таргама Инепромксонь судс. Кие лиянень мери: “Тон Паздо потыцят”, сень ёртома тоначинь амадница толс.

<sup>23</sup>Секскак кандындерят тон алтарь лангс Пазонтень казне ды тосо лединдеряй мелезэть: тонь малавиксэть кирди лангозот кодамо-бути покоркс,

<sup>24</sup>— сестэ кадык казнеть тоско, алтаренть икеле, мольть ды васняк ладяк малавиксэть марто, мейле сак мекев ды кандык казнеть Пазонтень.

<sup>25</sup>Кияк судиндеряй мартот ды вети эйсэть судс, ладик тынк пелькстамонтъ мартонзо тов модемстэ, зярс ули шкат. Тень а теиндерясак, сестэ пелькстыцясь ветятанзат чумондомс судиянень, судиясь макстанзат пекстамо кудонь прывтонтень, ды тонь ёрттадызь пекстамо кудос.

<sup>26</sup>Видестэ кортан тетъ: тосто а лисеват се шкас, зярс а пандсак весементь меельце трёшникень пес».

#### **Ускурямодо ды явомадо**

<sup>27</sup>«Тынь марсинк кармавтовксонть, конасонть ёвтазель кезэрень ломантненень: “Иля ускуря”.

<sup>28</sup>Мон вана кортан тенк: эрвась, кие варшты лиянь ни лангс визьксэнь мель марто, се седейсэнзэ уш ускурясь мартонзо.

<sup>29</sup>Бути вить сельметь совавты эйсэть пежетьсь, таргик сонзэ ды ёртык! Седе паро теть ёмавтомс рунгонь вейке пелькс, аволь кода весе рунгот ули ёртозь тоначинь толс.

<sup>30</sup>Бути вить кедеть совавты эйсэть пежетьсь, керик сонзэ ды ёртык! Седе паро теть ёмавтомс рунгонь вейке пелькс, аволь кода весе рунгот ули ёртозь тоначинь толс.

<sup>31</sup>Кармавтозель истяк: “Кие явиндеряй нинзэ эйстэ, максозо тензэ явомадо конёв”.

<sup>32</sup>Мон вана кортан тенк: кие яви нинзэ эйстэ аволь усксевема тувталонь кувалт, се сонзэ аравтсы ускурямонь ки лангс. Кие урваксты явозенть лангс, сеяк ускури».

#### Пежетькстамодо

<sup>33</sup>«Тень эйстэяк тынь содатадо, мезе кармавтозель кезэрень ломантненень: “Иля колсе пежетькстазь алтамо” ды “Топавт сень, мезе Азоронть икеле пежетькстазь алтыть теемс”.

<sup>34</sup>Мон вана тенк кортан: тунь илядо пежетькста: менеленть эйсэяк — те Пазонть озамо тарказо,

<sup>35</sup>моданть эйсэяк — те Пазонть пильгень оймамо тарказо, Ерусалименть эйсэяк — те ине Инязоронть ошозо.

<sup>36</sup>Иля пежетькста мик эсь прят эйсэяк, эдь тонеть вейкеяк черь а тееви ашокс эли раужокс.

<sup>37</sup>Улезэ тынк валонк ансяк “эно”, бути алкукс меленк ёвтамс “эно”; эли ансяк “арась”, бути алкукс меленк ёвтамс “арась”. Мезе путови лиясь, се лисни Апаронть пельде».



### Кежень пандомадо

<sup>38</sup>«Тынь марсинк кармавтовоксонть, конасонть ёвтазель: “Сельмень кисэ — сельме, пеень кисэ — пей”.

<sup>39</sup>Мон вана кортан: кеж кежсэ илядо пандо. Бути кияк ришттянзат тонь вить чамаумарь ланга, велявтык тензэ омбоцентькак.

<sup>40</sup>Бути кияк арси суд вельде саемс кедьстэть алга панарот, максык тензэ ланга оршамопелетькак.

<sup>41</sup>Бути кияк тонь кармавттанзат мартонзо молеме ве вайгельбе, мольть мартонзо кавто.

<sup>42</sup>Кедьстэть вешицянть — макст. Иля велявто сень эйстэяк, кона арси кедьстэть саемс мезеяк долкс».

### Вечкеде душманонк

<sup>43</sup>«Тынь марсинк кармавтовоксонть, конасонть ёвтазель: “Вечкть малавиксэть, душманот лангс кеж кирдть”.

<sup>44</sup>Мон вана кортан тенк: вечкеде эсенк душмантнэнь, чанстядо-баславадо тынк сюдыцятнень, тееде паро тынк лангс кежень кирдицятненень ды ознодо сетнень кисэ, кить покордыть ды пансить эйсэнк.

<sup>45</sup>Ансяк те невьсы: тынь ультядо менелень Тетянк эйдекс. Эдь Сон максы чивалдо партнэненень ды зьянонь теицятненень, пиземеяк кучни кода видечисэтненень, истя авидечисэтнененьгак.

<sup>46</sup>Бути тынь карматадо вечкеме ансяк сетнень, конат тынк вечкить, мезень кисэ сестэ тынь учотадо Пазонть пельде казне? Натой каявксонь-налогонь пурныцятнеяк тейнить истя!

<sup>47</sup>Бути тынь шумбракстнетядо ансяк ялганк-оянк марто, мезе истямо пек паро теиде? Натой виде Пазонь асодыцятнеяк истя тейнить!

<sup>48</sup>Секскак, уледе истя пештязь парочисэ, кода пештязь парочисэ менелень Тетянк».

## Матфея 6

### Арасьчисэненъ лездамодо

<sup>1</sup>«Ванодо, илядо максне арасьчисэненъ лезкске ломанень сельме икеле, ансяк кода невтемань кисэ. Истя теиндерятадо, сестэ а ули тенк казне менелень Тетянк пельде.

<sup>2</sup>Секскак, зярдо тон лездат арасьчисэненъ, иля гайге теде прок баяга, кода тейнить чачонь полавтницятне синагогасо ды ошкужосо, ломанень пельде пряст шнавторга. Видестэ кортан тенк: истямо ладсо сыненст уш педэ пес питнесь пандозь.

<sup>3</sup>Зярдо тон максат лезкске арасьчисэненъ, сестэ кадык керш кедетькак а соды, мезе теи витесть,

<sup>4</sup>кадык тонъ лезкскесь тееви салава. Сестэ тонъ Тетясь, кона несы сеньгак, мезе тееви салава, пандсы тонъ питнеть неемга».

### Озномадо

<sup>5</sup>«Зярдо ознат, иля уле чачонь полавтницятнень кондямокс, конат вечкить синагогасо ды ульця улосо озномо, ломантненень пряст невтема. Видестэ кортан тенк: сыненст уш педэ пес питнесь пандозь.

<sup>6</sup>Тон, зярдо ознат, совак эсеть икельце кудос, пекстык кенкшенть ды ознок эсь а неявица Тетянтень. Сестэ тонъ Тетясь, кона несы сеньгак, мезе тееви салава, пандсы тетъ неемга.

<sup>7</sup>Озномсто чаво валт илядо лавга виде Пазонь а содыцятнень ладсо. Сынь арсить, бути ламо валсо ознат, седе куроку марятанзат Пазось.

<sup>8</sup>Илядо уле сынст кондямокс. Эдь Тетянк уш кедьстэнзэ вешемадонк икеле соды, мезе тенк эряви.

<sup>9</sup>Тынь ознодо вана истя: Менелень минек Тетянок! Иневаньксэкс улезэ Тонъ леметь.

<sup>10</sup>Сазо Тонъ Инязорксить. Топавтовост Тонъ мелеть-арсемат масторлангсожак, кода менельсэ.

<sup>11</sup>Максыкая миненек течи эрявикс кшинек-салонк.

<sup>12</sup>Нолдыть минек теевть пежетенек, кода миньгак нолдтнетяно минек икеле чумосотненень.

<sup>13</sup>Илямизь нолда снартнемас-варчавтнемас, мекевланк — менстямизь Апародонтъ, эдь Тонь ули Инязорксчись, виеськак, шнамоськак пингеде пингес. Аминь.

<sup>14</sup>Бути карматадо лия ломантненень нолдтнеме-простямо сынст чумост-тапавксоост, сестэ менелень Тетянк тынккак чумонк нолдасынзе-простясынзе.

<sup>15</sup>Бути а карматадо нолдтнеме лиятненень сынст чумост-тапавксоост, сестэ Тетянк тынксетненьгак а нолдасынзе».

#### Постовамодо

<sup>16</sup>«Истя жо, зярдю кирдтядо пост, илядо невте прянк нусманякс, кода чачонь полавтницятне. Сынть постонь кирдемаст весенень невтемань кисэ чамаст сумборьгавтнесызь. Видестэ кортан тенк: сыненст уш педес пес пандозь питнесь.

<sup>17</sup>А вана тон постонь кирдемстэ прят судрик, чаматкак шлик.

<sup>18</sup>Сестэ тонь постонь кирдемадо карми содамо ансяк а неявиця Тетят, аволь ломанть. Ды тонь Тетясь, кона несы сеньгак, мезе тееви салава, пандсы питнеть неемга».

#### Пазось ды сюпавчись

<sup>19</sup>«Илядо пурна эстенк сюпавчи масторлангсо, косо ки суксоськак сэви, чеменеськак кери, косо салыцятнеяк кудос совсить саламо.

<sup>20</sup>Мекевланк — пурнадо эстенк сюпавчи менель лангов, косо ки суксоськак а сэви, чеменеськак а кери, косо салыцятнеяк а совавить саламо.

<sup>21</sup>Эдь косо сюпавчинк, тосо карми улеме седеенккак.

<sup>22</sup>Сельметне рунгонть туртов валдонь максыцят. Секскак улиндеряйт сельметь шумбрат, сестэ весе рунготкак ули пештязь валдосо.

<sup>23</sup>Улиндеряйт сельметне сэредицят, сестэ весе рунготкак ули пештязь чоподасо. Истя, бути валдось, конась тонь эйсэ, ули чоподакс, сестэ кодамо покш тандавкс те чоподась!

<sup>24</sup>Кияк кавто азорнэнь а важодеви. Бути снартсы тень теемс, сестэ сон вейкенть карми вечкеме, омбоценть сельмесэ а нееме. Бути вейкенень карми савтомо, омбоцестэнтъ карми прязо велявтомо. Тыньгак ве шкасто а важодевтядо Пазонтень ды ярмактненень».

### **Пазонь кедь лангсо**

<sup>25</sup>«Секскак кортан тыненк: илядо мелявто эрямонк кисэ, мезде тенк ярсамс эли мезде симемс, ды рунгонк кисэяк, мезе тенк оршамс. Эдь эрямось — ярсамопельде питней ды рунгоськак — оршамопельде питней.

<sup>26</sup>Варштадо менелень нармунтнень лангс: сынъ а видить, а нуить, утомскак а пурныть. Ялатеке Менелень Тетянк сынст три-ваны. Арази тынь аволь седе питнейть нармунтнень коряс?

<sup>27</sup>Кинень тынк ютксто, пек мелявтозыгак, кувалгавтови эсь эрямозо куш ве кенерешкас?

<sup>28</sup>Ды оршамонь кисэ мекс мелявтомс? Варштадо паксянь цецятнень лангс, кода сынъ касыть: а штердить, а кодыть.

<sup>29</sup>Ялатеке кортан тенк: Соломон инязороськак, эсь сюпавчинь сияждомасонзо, истя эзь оршне, кода эрьвась сынст эйстэ.

<sup>30</sup>Бути Пазось истя мазыйстэ оршавты паксянь тикшенть, кона течи касы, ванды жо ули ёртозь каштомонь толс, сестэ, нама, Сон тынк седеяк парсте оршатадызь! Вай, кода аламо тынк кемеманк!

<sup>31</sup>Секскак, илядо мелявто: “Мезде миненек ярсамс?”, эли “Мезде симемс?”, эли “Мейсэ оршамс?”

<sup>32</sup>Тень эйстэ мелявтыть Паздо а содыцятне. Эдь менелень Тетянк соды: те весе тыненк эряви.

<sup>33</sup>Мекевланк — весемеде пек вешнеде Пазонь Инязорксчинть ды Сонзэ мелензэ топавтоманть, ды сестэ те весемеськак тыненк максови.

<sup>34</sup>Истя эно, тынь илядо мелявто вандынь чинть кисэ. Вандынь чинть сонсензэ мелявксонзо. Эрьва чинть сатыть эсь мелявксонзо».

## Матфея 7

### Илядо чумондо

<sup>1</sup>«Киньгак илядо судя, сестэ тынсенккак Пазось а судятадызь.

<sup>2</sup>Эдь кодамо судсо лиятнень судятадо, тынсенккак Пазось истямосо судятадызь. Кодамо онкссо онкстатадо, истямосо тыненккак онкстазь ули.

<sup>3</sup>Кода тон сардыненть несак малавиксэть сельместэ, бути эсеть сельместэ чочконтъ а редясак?

<sup>4</sup>Кода мереват малавиксэть туртов: “Эрьга, таргаса сельместэть сардыненть”, а вана теке шкастонть тонсеть сельмесэ чочко?

<sup>5</sup>Чачонь полавтниця! Таргик васняк эсеть сельместэ чочконтъ ды сестэ несак, кода таргамс малавиксэть сельместэ сардыненть.

<sup>6</sup>Пазнэнь алтазенть илядо максне пиненень, — пинетне каявить лангозонк ды сезнетядызь. Питней ведьэрьгеть илядо кайсе туво икелев, — тувотне шешксызь сынст пильгест алов».

### Вешедэ, вешнеде, вачкоеде

<sup>7</sup>«Вешедэ ды максозь ули тенк; вешнеде ды мутадо; вачкоеде ды панжить тенк.

<sup>8</sup>Эдь эрьва вешицянтенъ — максови; вешницясь — муи; вачкоицянтенъ — панжозь ули.

<sup>9</sup>Арази муеви тынк ютксто истямо ломань, конась, зярдэ цёразо веши кедьстэнзэ кши — максы тензэ кев?

<sup>10</sup>Эли зярдэ цёразо веши кал — максы тензэ гуй?

<sup>11</sup>Бути натой тыньгак, берянь ломанть, машттадо эсь эйкакшонк туртов вадря казнень макснеме, нама, менелень Тетянк седеяк максы вадря казнеть сетненень, кить вешить кедьстэнзэ!

<sup>12</sup>Тееде ломантнень туртов весемесэ истя, кода, тынк меленк коряс, эряви теемс тенст эсенк туртов. Теньсэ Моисеень Коенть ды пазмарицянь тонавтоматнень зэмест-смустест ».

### Теине орта

<sup>13</sup>«Совадо теине ортава. Ламот ютыть келей ортава ды шожда киява, конат ветить пингеде пингень куломас-ёмамос.

<sup>14</sup>Кодамо теине ортась ды стака се кись, конат ветить эрямос, ды ансяк аламотне мукшносызь сынст!»

### Чувтось содави умарьга

<sup>15</sup>«Ванстодо прянк кенгелиця пазмарицятнеде. Сынть тыненк сакшныть сэтьме реверкс, ансяк сынст потмост — азарсь верьгизэнь.

<sup>16</sup>Тынь сынст содасынк тевест кувалт. А кочксить кодоркс куракшсто винаумарть эли кирмалавсто инжирт.

<sup>17</sup>Истя, эрьва паро чувтось чачты паро умарть, ды берянь чувтось чачты амаштовикс умарть.

<sup>18</sup>Паро чувтонть берянь умарть а чачтовить, берянь чувтонтьгак паро умарть а чачтовить.

<sup>19</sup>Эрьва чувтонть, кона паро умарть а чачты, керясызь ды толс каясызь.

<sup>20</sup>Истя тевест кувалт тынь содасынк сынсткак.

<sup>21</sup>Аволь эрьвась, кона Монень мери: “Азоро, Азоро!” — сови Менельсэнтъ Инязорксчинть. Соби ансяк се, кона топавты менелень Тетянтъ мелензэ.



<sup>22</sup>Судонь чистэнтъ ламотне Монень мерить: “Азоро, Азоро! Эдь Тонь лемсэ минь ёвтинек Пазонь кулянтъ. Истя жо Тонь лемсэ ломантнестэ пансинек идемевстнень ды тейнинек ламо лия покш тевть”.

<sup>23</sup>Сестэ Мон видьстэ мерян сыненст: “Мон тынк зярдояк а содылидизь. Оргодеде Монь эйстэ, зыянонь тейницят!”»

### **Кавто кудоюрт**

<sup>24</sup>«Кие кунсолы неть Монь валтнэнь ды топавты эйсэст, се вейкетствяви превей ломань марто, кона путызе кудонзо кевень юр лангс.

<sup>25</sup>Тусь пиземе, лейтнеяк тусть ланга чудеде, варматнеяк пувасть ды вачкодевсть се кудонтъ эйс, ансяк сон эзь каладо, секс мекс путозель кевень юр лангс.

<sup>26</sup>А вана кие кунсолы неть Монь валтнэнь ды ялатеке а топавты эйсэст, се вейкетствяви превтеме ломань марто, кона путызе кудонзо чувар лангс.

<sup>27</sup>Тусь пиземе, лейтнеяк тусть ланга чудеде, варматнеяк пувасть ды вачкодевсть се кудонтъ эйс. Ды кудось допрок каладсь».

<sup>28</sup>Зярдэ Иисус прядынзе неть валтнэнь, ломантне дивсестъ Сонзэ тонавтомантень.

<sup>29</sup>Сон тонавтсь эйсэст кода се, конань ули азорксчизэ, аволь кода Койс тонавтыцятне ды фарисейтне.

## **Матфея 8**

### **Проказасо сэредицянтъ шумбралгавтомась**

<sup>1</sup>Зярдэ Иисус валгсь пандонтъ лангсто, мельганзо тусть пек ламо ломанть.

<sup>2</sup>Вана мольсь ваксозонзо проказа ормасо сэредиця, пульзясь икелензэ ды мерсь: «Азоро, улиндеряй мелеть, мон Тонеть ванськавтован».

<sup>3</sup>Иисус венстизе кедензэ, токизе сонзэ ды мерсь: «Ули мелем, ванськадт!» Сэредицясь сеске ванськадсь орманзо эйстэ.

<sup>4</sup>Иисус мерсь тензэ: «Вант, киненьгак теде иля ёвтне. Азё попнэнь ды ванкшновтык прят. Теде мейле кандт Пазонтень казне. Истя эряви теемс Моисеень Коень коряс. Теньсэ тон невьсак ломантненень эсь шумбралгадомат».

**Римень сядонь прявтонть важонзо шумбралгавтомась**

<sup>5</sup>Зярдэ Иисус совась Капернаум ошс, мольсь ваксозонзо Римень сядонь прявт ды энялдозь Тензэ

<sup>6</sup>мерсь: «Азоро! Кудосо монь важом токазы катар ормасо, мадезь ашти, вельть пек майси-пишти».

<sup>7</sup>Иисус мерсь тензэ: «Мон сан, шумбралгавтса сонзэ».

<sup>8</sup>Сядонь прявтось каршонзо мерсь: «Арась, Азоро, мон Тонь коряс истямо вишкине ломанян, виздян натой совавтомс Тонь эсень кудос. Ансяк ёвтак вал, ды важом нейке пички.

<sup>9</sup>Мон монськак прявтонь кедь ало аштиця ломанян, ды монь кедь алояк аштить ушмант. Зярдэ кармавтан вейкентень: “Азё!” — сон моли. Омбоцентень кортан: “Сак тей!” — сон сы, ды зярдэ эсь важонтень мерян: “Теик сень!” — сон тейсы».

<sup>10</sup>Неть валтнэнь марязь, Иисус пек дивазевсь ды мерсь мартонзо молицятненень: «Видестэ кортан тенк: истямо кемема зярс Мон эзинь вастне Израилень эрицятненень юткстояк.

<sup>11</sup>Кортан тенк: ламот сыть чилисема ёндо ды чивалгома ёндо ды ойсить Менельсэнтъ Инязорксчисэнзэ каванямонь столь экшс Авраам, Исак ды Яков покштятненень марто.

<sup>12</sup>А вана сеть, конатне ульнестъ аравтозь Инязорксчинтень, ёртозь улить ушов, чопода таркас, косо сын кармить авардеме ды пейсэст чикордомо».

<sup>13</sup>Мейле Иисус мерсь сядонь прявтонть: «Азё кудов, улезэ тетъ кемемат коряс». Важозо секе часстонть пичкась.

### Шумбралгавтнемат

<sup>14</sup>Зярдэ Иисус сась Петрань кудос, неIZE: сонзэ низанязо мадезель, теке палсь толсо.

<sup>15</sup>Иисус токизе аванть кедензэ, ды ормась кадызе сонзэ. Авась стясь ды кармась сынст каванямо.

<sup>16</sup>Кода чизэ чопотеть, ветясть Иисуснэнь идемевсень колавт ламо ломанть. Сон апаро оймаелтнэнь валсонзо панинзе, ды весе сэредицятнень шумбралгавтынзе.

<sup>17</sup>Истя топавтовсть Исайя пазмарицянтъ икелев ёвтавт валонзо: «Сон саинзе минек орманок Эсь лангозонзо ды менстимизь минек сэредьксэнек эйстэ».

### Адя мартон!

<sup>18</sup>Зярдэ Иисус неинзе перьканзо промозь ламо ломантнень, кармавтсь Эсь тонавтницянстэнь печтямс эрькенть омбоце пелев.

<sup>19</sup>Сестэ сась ваксонзо Койс вейке тонавтыця ды мерсь Тензэ: «Тонавтыця! Мон туян Тонь мельга, ков Тон илязат моле».

<sup>20</sup>Иисус каршонзо ёвтась: «Ривезтнень ды менель нармунтнень улить пизэст, Ломантнень Цёранть жо арась тарказо, козонь чиремтевлизе прянзо».

<sup>21</sup>Лиясь, кона ульнесь Сонзэ тонавтницякс, пшкадсь тензэ: «Азоро, нолдамак монь васняк кудов тетянь калмамо».

<sup>22</sup>Иисус каршонзо мерсь: «Адя Монь марто; кадык кулозтне эсь кулозест сынсь калмасызь».

### Иисус лоткавты давол

<sup>23</sup>Иисус озась венчентень, мартонзо озась тонавтницянзояк.

<sup>24</sup>Апак учо эрькенть лангсо кепететь пек виев давол. Венчесь саевиль ведьвелявкстнэнь алов, ансяк Иисус яла удось.

<sup>25</sup>Сестэ тонавтницятне мольсть ваксозонзо, стявтызь Сонзэ ды мерсть: «Азоро, идимизь минек, — эль ваятано!»

<sup>26</sup>Иисус каршост мерсь: «Мекс тынь истят пелицят? Вай, кодамо аламо тынк кемеманк!» Мейле Сон стясь, лоткавтынзе варматненьгак, ведьвелявкстнэньгак, ды теевсь пек сэтьме.

<sup>27</sup>Тонавтницятне абунгадозь кортасть: «Кие Те истямось, конань эйсэ варматнеяк, ведьвелявкстнэяк кунсолыть?»

### **Идемевсень колавтонь шумбралгавомась**

<sup>28</sup>Зярдэ Иисус сась эрькенть омбоце пелев, Гергесань масторс, вастызь Сонзэ идемевсень колавт кавто ломанть, конат лиссть калмосто. Сынъ вельть азаргадозельть, секс се кияванть яксемс киньгак а сатыль смелчизэ.

<sup>29</sup>Сеске сынъ серьгедсть: «Иисус, Пазонь Цёра, мезе Тонеть эряви минек пельде? Аравтозь шкадо икеле Тон сыть тезэ минек пиштевтеме?»

<sup>30</sup>Сынст эйстэ а васоло вановсь тувонь покш стада.

<sup>31</sup>Идемевстне энядсть Иисуснэнь: «Минь содатано: минек Тон паньсамизь. Кучомизь сестэ тувонь стаданть!»

<sup>32</sup>Сон мерсь тенст: «Азёдо». Сынъ лиссть неть ломантнестэ ды совасть стаданть потс. Сеске весе тувонь стадасть сэрей чирестэнтъ кирнявтнесь эрькес ды ваясь.

<sup>33</sup>Стада ваныцятне ношкстасть. Сынъ чийсть ошов, косо ёвтнизь весементь, мезе ульнесь ды мезе теевсь идемевсень колавтнэнь мартояк.

<sup>34</sup>Сестэ ошонь весе эрицятне лиссть Иисусонь каршо. Зярдэ сынъ неизь Сонзэ, пек энядсть Тензэ туемс сынст ёнкссто.

## **Матфея 9**

### Иисус шумбралгавтызе катаронть

<sup>1</sup>Тезде мейле Иисус озась венчес, печтизе мекев эрькенть ды сась ошонтень, косо эрясь.

<sup>2</sup>Тосо совавтсть Тензэ ацамо лангсо мадезь аштиця катар ломань. Сынст кемемаст неезь, Иисус мерсь сэредицянтень: «Эйдем, иля пеле! Нолдазь тонь пежететь».

<sup>3</sup>Сестэ зяря Койс тонавтыцят арсесть эсь пачкаст: «Те ломанесь Пазонтъ нарьги-покорды!»

<sup>4</sup>Иисус чарькодинзе сынст арсемаст, секс мерсь тенст: «Мекс тынк седейсэ истят апаро арсемат?»

<sup>5</sup>Мезесь седе шождыне меремс: “Нолдавить тонь пежететь” эли: “Стяк ды якак”?

<sup>6</sup>Истя тынь содадо, масторлангсо Ломантнень Цёранть ули азорксчизэ пежетень нолдамскак». Тезде мейле пшкадсь катардыцянтень: «Стяк, сайт ацамот ды азё кудов!»

<sup>7</sup>Се стясь ды тусь кудов.

<sup>8</sup>Тень неезь, ломантне дивасть, ды сынъ кармасть шнамо Пазонтъ, кона макссь ломантненень истямо азорксчи.

### Иисус тердизе Матвеень

<sup>9</sup>Ошто лисемстэ Иисус несъ каявксонь-налогонь пурнамо кудонтъ вакссо озадо аштиця ломань, конань лемезэль Матвей, ды мерсь тензэ: «Мольть Монь мельга». Сон стясь ды тусь мельганзо.

<sup>10</sup>Мейле Иисус ярсась Матвеень кудосо. Тозонь састь каявксонь ламо пурныцят, пежетев лия ломантькак, конатне ярсась Иисус ды тонавтницянзо марто.

<sup>11</sup>Тень неезь, фарисейтне мерсть тонавтницянтень: «Кода истя тынк тонавтыцянк каявксонь пурныця ды лия пежетев ломань марто вейсэ ярсы-сими!»

<sup>12</sup>Иисус маризе тень ды мерсь каршост: «Ормаменстиця эриви сэредицянень, аволь шумбра ломаннень.

<sup>13</sup>Азёдо, чарькодинк Пазонь Сёрмадовксонь неть валтнэнь смустест: «Монь мельс тукшны седеймарямонк, аволь Монень кандозь печкезь ракшань аноксонк». Секскак Мон сынь тердеме велявтомс Пазонтень пежетевтнень, аволь видечисэтнень».

#### **Постто кевкстемась**

<sup>14</sup>Сестэ састь Иисуснэнь Нававтыця Иоаннонь тонавтницянзо ды кевкстизь: «Мекс истя: минь ды фарисейтне сеедьстэ постоватано, а вана Тонь тонавтницят а постовить?»

<sup>15</sup>Иисус мерсь каршост: «Арази свадьбань инжетне мелявтокшныть-ризнэкшныть, зярс урвакстыцясь мартост? Сы шка, зярдю урвакстыцясь ули саезь юткстост, ды сестэ сыньгак кармить постовамо.

<sup>16</sup>Кияк ташто оршамос а панды апак озавто од коцтонь панкс. Эдь сестэ од панкось сезьсы таштонть, ды тееви седеяк покш варя.

<sup>17</sup>Истя од винаяк а кайсить ташто кедень кескавс. Бути истя теят, сестэ кескавоськак сезеви, винаськак валови. Арась, од вина кайсить од кедень кескавс, сестэ сынь кавонест ванстовить».

#### **Прявтонь тейтерь ды сэредиця ава**

<sup>18</sup>Зярс Иисус яла кортась тенст, сась Сонензэ тосонь вейке прявт, прась кумажа лангс ды мерсь Тензэ: «Монь тейтерем ансяк кулось. Ялатеке мольть, путыть кедеть лангозонзо, нама, сон вельми!»

<sup>19</sup>Иисус стясь, тусь мартонзо. Тонавтницянзояк мольсть мартонзо.

<sup>20</sup>Сестэ ве ава, кона пиштсь кемгавтово иеть верень чудемасо, мольсь Иисус удалов ды токизе ланга оршамонзо цёконть.

<sup>21</sup>Эдь авась арсесь эсь пачканзо: «Бути токаван куш Сонзэ оршамос — пичкан».



<sup>22</sup>Иисус велявтьсь, неIZE сонзэ ды мерсь: «Сазором, иля пеле! Кемемат шумбралгавтынзеть тонь». Авась секе шкастонть пичкась.

<sup>23</sup>Зярдэ Иисус сась прывтонть кудос, неинзе кулозенть велькссэ вешкемасо седицятнень ды шалныця-авардиця ломантнень

<sup>24</sup>ды мерсь тенст: «Лиседе тестэ! Тейтернесь эзь куло, сон улы». Сынъ кармасть пейдеме лангсонзо.

<sup>25</sup>Зярдэ ломантне ульнесть панезь, Иисус совась икельце кудос, саIZE тейтерненть кедте, ды тонась стясь.

<sup>26</sup>Теде кулясь сраговсь се ёнксонть келес.

#### **Кавто сокоронь шумбралгавтома**

<sup>27</sup>Зярдэ Иисус тусь тосто, мольсть мельганзо кавто сокорт, конат сеересть: «Иисус, Давидэнь Цёра, ульть седеймарицякс миненек!»

<sup>28</sup>Зярдэ Сон совась кудос, сестэ сокортнэ мольсть ваксозонзо, ды Иисус кевкстинзе сынст: «Тынъ кемтядо, Мон тенк лездан?» Сынъ мерсть Тензэ: «Эно, кемтяно, Азоро!»

<sup>29</sup>Сестэ Иисус токинзе сельмест ды мерсь: «Улезэ тенк кемеманк коряс!»

<sup>30</sup>Сынст сельмест кармасть нееме. Иисус казямосто кардынзе сынст: «Ванодо, киненьгак илядо ёвтне теде».

<sup>31</sup>Сынъ тосто тусть ды ялатеке ёвтнесть Иисусто весе се ёнксонть келес.

#### **Акортыцянь шумбралгавтома**

<sup>32</sup>Сокортнэнь туемадо мейле ветясть Иисуснэнь идемевсень колавт ломань, кона ульнесь а кортыця.

<sup>33</sup>Иисус панизе эйстэнзэ идемевсенть, ды а кортыця ломанесь кармасть кортамо. Весе дивсесть: «Истямо тев Израильсэ зярдояк арасель!»

<sup>34</sup>А вана фарисейтне тень каршо кортасть: «Сон идемевстнень прывтост вийсэ панси идемевсть».

### Иисусонь седеезэ маряты ломантнень кисэ

<sup>35</sup>Иисус якась весе оштнэва, весе велетнева, тонавтсь ломантнень тосонь синагогатнесэ, пачтясь Кенярксов куля Менельсэнтэ Инязорксчидензэ, шумбралгавтнесь эйсэст эрва кодамо ормадо ды моцень арасьчиде.

<sup>36</sup>Зярдэ Иисус неинзе пурнавозь ломантнень, седеезэ марятотсь кисэст: сынь ваньцявтомэ реве ладсо вийтемельть ды сравтнезельть.

<sup>37</sup>Сестэ Сон мерсь Эсензэ тонавтницятненень: «Сюрось чачсь ламо, ансяк нуицятнеде аламо.

<sup>38</sup>Секскак энялдодо нуемань Азоронтэ икеле, кучозо Эсензэ паксяв седе ламо важодицят».

## Матфея 10

### Иисусонь кемгавтово апостолонзо

<sup>1</sup>Иисус тердинзе Эстензэ кемгавтово тонавтницянзо, макссь тенст азорксчи пансемс аванькс оймеялтнэнь ды шумбралгавтнемс эрва кодамо ормадо ды моцень арасьчиде.

<sup>2</sup>Кемгавтово апостолтнэнь лемест истят: васенцесь Симон, конанень лиякс мерить Петра, ды Андрей сонзэ ялаксо, Зеведеень цёратне Яков ды Иоанн,

<sup>3</sup>Филип ды Бартоломей, Фома ды икелень каявксонь пурныцясь Матвей, Алфеень цёразо Яков, Леббей, конанень путсть лем Таддей,

<sup>4</sup>Симон Кананит ды Искарриотонь Иуда, кона мейле миизе Иисусонь.

### Ки лангс превс путомат

<sup>5</sup>Нетэ кемгавтовотнень Иисус кучинзе ды кармавтсь тенст: «Лия раськень ломаннень илядо яка, Самариянь ошоскак илядо сова.

<sup>6</sup>Азёдо васняк Израилень раськентень, кона стадасто кадовозь ревень кондямо.

<sup>7</sup>Якамсто пачтядо кулянтэ: “Менельсэнтэ Инязорксчизэ сась малав!”

<sup>8</sup>Сэредицятнень шумбралгавтодо, кулозтнень вельмевтнеде, проказасо сэредицятнень ванськавтнеде, идемевстнень панседе. Стяко максозь тенк, стяко тыньгак макснеде.

<sup>9</sup>Илядо сае мартонк ки лангов сырнеяк, сияяк, каркссо ярмакткак,

<sup>10</sup>кансткак, кавонст оршамопельтькак, карсемапельтькак, кедьнежеяк: эдь важдицянть ярсамопелесь максови важдеманзо кисэ.

<sup>11</sup>Кодамо ошос эли велес соватадо, васняк кевкстеде, кинь ули мелезэ нолдамс тынк эстензэ, ды эрядо кедьсэнзэ тосто туемазонк.

<sup>12</sup>Кудонтень совамсто шумбрактнеде, арседе тосо эрицятненень сэтъмелув.

<sup>13</sup>Бути эрицятне тынк парсте васттадызь, сестэ тынк сэтъмелувось сы тенст. Бути тынк парсте а васттадызь, сестэ мекев эстенк велявты тынк сэтъмелувось.

<sup>14</sup>Бути косо кияк тынк парсте а васттадызь, валонккак а кунсолосызь, сестэ се кудостонт эли ошстонт лиседе ды пильгестэнк мик пулентькак чукадинк.

<sup>15</sup>Видестэ кортан тенк: Пазонь судонь чистэнтэ Содом марто Гоморранень ули седе шождыне се ошонтэ коряс».

#### **Сы шкань пансемат**

<sup>16</sup>«Вана Мон кучан эйсэнк реве ладсо верьгиз юткс. Тень кувалма уледе гуень кондят ёжовт ды гулькань кондят чевтетъ-сэтъметь.

<sup>17</sup>Ванстодо прянк ломантнеде. Сынъ кармить эйсэнк судс таргсеме, синагогасояк кармить эйсэнк локшосо керямо.

<sup>18</sup>Монь кисэ ветятадызь прывтнэнь ды инязортнэнь икелев, ды истя тынь карматадо ёвтнеме Монь эйтэ сыненст ды лия раськень ломантненень.

<sup>19</sup>Зярдэ тынк ветятадызь судс, илядо мелявто сень кисэ, кода ды мезе тенк ёвтамс: се шкастонт максозь ули тенк, мезе ёвтамс.

<sup>20</sup>Секскак валтнэ, конатнень тынь ёвтасынк, улиць аволь тынк. Сынст макссынзе тенк Тетянк Оймайлтось, кона карми кортамо тынк вельде.

<sup>21</sup>Вейкест-вейкест кармить максомо куломас лелят-ялакст, тетят-цёрат. Эйкакштнэ стить тетяст-аваст каршо ды маштнесызь сынст.

<sup>22</sup>Монь лементь кисэ весеменень авечкевиксэкс ультядо. Ансяк кона цидярдь педь пес, се ванстови-идеви.

<sup>23</sup>Зярдь кармить мельганк пансеме ве ошсо, оргодеде омбоцес. Кемевтян эйсэнк: тынь а кенертядоак ёвтнеме Монь кулянтъ Израилень оштнэва, кода уш сы Ломантнень Цёрась.

<sup>24</sup>Тонавтницясь а эрси тонавтыцядонзо седе покш, кода важоськак — азородонзо.

<sup>25</sup>Тонавтницянтень саты, бути сон карми уleme эсь тонавтыцянзо кондямокс, важонтеньгак саты улемс эсь азоронзо кондямокс. Мериндеряйтъ кудазоронтень Вельзевул, сестэ седеяк беряньстэ кармить мереме сонзэ кудораськенстэнь!»

#### **Пеледе Паздо!**

<sup>26</sup>«Тень кувалма илядо пеле ломантнеде. Весе, мезесь ней кекшезь, лиси лангс, ды весе салавансеськак карми уleme содавиксэкс.

<sup>27</sup>Мезе кортан тенк чоподасо, сень ёвтнеде чи валдосо, ды мезе кортави пилезэнк тошказь, седе кудо лангсто сеереде.

<sup>28</sup>Илядо пеле ломантнеде, эдь сыненст куловтови ансяк рунгось, оймесь а куловтови. Седе пек пеледе Паздонть, конанень ёмавтови тоначинь толс рунгоськак, оймеськак.

<sup>29</sup>Весе содыть: вейке трёшникте рамавить кавто озят. Ялатеке Тетянк мельтеме вейкеяк эйстэст а пры мастор лангс.

<sup>30</sup>Тынк жо пря черенккак весе ловнозь.

<sup>31</sup>Секскак илядо пеле: тынь ялатеке весе озятнэде седе питнейтядо!»

### Христосто видькстамо

<sup>32</sup>«Эрванть, кие апак сёпо ломантнень икеле лови эсь прянзо Монь ломанекс, сень Монгак апак сёпо ловса менелень Тетянь икеле Эсень ломанекс.

<sup>33</sup>Кие жо ломантнень икеле велявты Монь эйстэ, сень эйстэ Монгак велявтан менелень Тетянь икеле.

<sup>34</sup>Илядо арсе: Мон сынь масторлангс ладямонь тееме. Аволь ладямо марто сынь — торо марто сынь.

<sup>35</sup>Мон сынь явомо цёранть тетястонзо, тейтеренть — авастонзо, урванть — ававтстонзо.

<sup>36</sup>Ятокс теевить ломанентень сонсензэ кудораськензэ.

<sup>37</sup>Кие Мондень пек вечксы эсь тетянзо эли аванзо, се Монень амаштовикс. Истя, кие Мондень пек вечксы цёранзо эли тейтерензэ, сеяк Монень а маштови мельга молицякс.

<sup>38</sup>Кие а сайсы эсь крёстонзо ды Монь мельга а моли, сеяк Монень а маштови.

<sup>39</sup>Кие снарты эрямонзо ванстомс, се ёмавтсы сонзэ, а вана кие Монь кисэ сонзэ ёмавтсы, се мусы».

<sup>40</sup>«Кие тынк парсте вастгадызь, се Моньгак парсте вастсамам. Кие Монь вастсамам, се Монь Кучицянтъкак вастсы.

<sup>41</sup>Кие васты пазмариця секс, мекс сон пазмариця, сененьгак пандови пазмарицянь питне. Кие васты видечинь ломаненть секс, мекс сон видечинь ломань, сененьгак пандови видечинь ломанень питне.

<sup>42</sup>Кие куш вейкенень, неть Монь вишкине-асодавикс мельга молицятнень эйстэ, максы кельме ведь кече ансяк сень кисэ, мекс сон Монь мельга молиця, кемеде Монень, се питнень пандомавтомо а кадови».

## Матфея 11

### Нававтыця Иоаннонь кучовт ломанензэ

<sup>1</sup>Зярдо Иисус прядынзе кемгавтово тонавтницянстэнь кармавтоматнень, седе мейле тусь тосто тонавтомо ды паро кулянь ёвтнеме те ёнксонь лия оштнэва.

<sup>2</sup>Зярдо Иоанн пекстамо кудосо аштемстэ марясь Христосонь тевтнеде, сестэ сон кучинзе кавто тонавтницянзо

<sup>3</sup>кевкстемс Сонзэ: «Паряк, Тон Се, конанень эряви самс эли миненек учомс лия?»

<sup>4</sup>Иисус каршост мерсь: «Азёдо ды ёвтадо Иоаннэнь, мезе мариде ды неиде:

<sup>5</sup>сокортнэ неить, аякицятне якить, проказасо сэредицятне ванськадыть, амарицятне марить, кулозтне вельмить, кажовтненень пачтяви Кенярксов куля.

<sup>6</sup>Уцяскав се, кие Монь кувалма а кавтолды!»

### Иисус ёвтни Нававтыця Иоанндо

<sup>7</sup>Кучовтнэнь туемадо мейле Иисус кармась ломантненень Иоанндо кортамо: «Мезе лангс ваномо тынь якиде чаво модав? Вармасо лымбакстниця нудей лангс? Нама, аволь.

<sup>8</sup>Мезень ваномо эно якиде? Паряк сюпав оршамосо оршазь ломанень? Арась, сюпав оршамонь кандтницятне эрить инязоронь кудова!

<sup>9</sup>Кинь ваномо эно якиде? Пазмарицянь? Виде, Иоанн пазмариця, ялатеке кортан тенк: сон пазмарицядо як покш.

<sup>10</sup>Сон се, конадо ёвтазь Пазонь Сёрмадовкссо: “Вана Тонь самодо икеле кучса Монсень кулянь кандыцам, сон анокстасы кинть Тонь туртов”.

<sup>11</sup>Видестэ мерян тенк: весе чачозтнень ютксо Нававтыця Иоанндо ине арасель, ялатеке сехте вишкинесь, кона Менельсэнтъ Инязорксчисэнтъ, сондензэ покш.

<sup>12</sup>Нававтыця Иоаннонь важоме шкастонть саезь ды те шкас Менельсэнтъ Инязорксчизэ виевстэ келейгали, ды сеть, кить путыть тенень виест, сайсызь сонзэ эстет.

<sup>13</sup>Весе пазмарицятнеяк, Моисеень Коеськак Иоаннонь шкас ёвтнестъ тень эйстэ.

<sup>14</sup>Улиндеряй меленк кемемс — кемеде: Иоанн — се Илиясь, конань самозо умок уш ульнесь аравтозь.

<sup>15</sup>Кинь улить мариця пилензэ, — кунсолозо!

<sup>16</sup>Ки марто вейкетстясынъ неень пингень ломантнень? Вана тенк истямо невтевокс: ошкужосо озадо аштить эйкакшт, конат пижнить лиятнень туртов:

<sup>17</sup>“Минь тынк туртов сединек нудейсэ, тынь жо эзиде киште. Минь тенк лайшинек, тынь эзиде аварде”.

<sup>18</sup>Сась Иоанн, кона сеедьстэ кирди пост, винадо а сими, — ды сынъ кортыть: “Сонзэ эйсэ идемевсь”.

<sup>19</sup>Сась Ломантнень Цёрась, ярсыяк, симияк, — ды сынъ кортыть: “Вана опкан кургось ды винанъ вечкицясь, каявксонъ пурныцянь ды лия пежетев ломанень ялгась!” Ялатеке Пазонь превейчинть невтить видекс ломантне, конат молить сонзэ киява».

### **Зыян аянкиця оштнэнь**

<sup>20</sup>Теде мейле Иисус кармась корямо сеть оштнэнь, конатнень эрицяст эзьт янксе пежетест кисэ. Эдь неть оштнэсэ Сон тейнинзе сехте ламо Эсензэ дивань-тамашанъ теვენзэ:

<sup>21</sup>«Зыян тетъ, Хоразин ош! Зыян тетъ, Бетсаида ош! Бути тамашатнень, конатне тыненк невтезельть, неевлизь Тир ды Сидон оштнэнь эрицятне, сынъ пежеттест янксеманъ невтемакс умок оршавольть ризнэманъ оршамот ды почодовлизь пряст куловсо.

<sup>22</sup>Ансяк кортан тенк: Пазонь судонь чистэнтъ Тир марто Сидононь эрицятненень ули тынденк шождыне.

<sup>23</sup>Ды тонгак, Капернаум ош, менель видьс кепедевезь, тоначинь потмакстома отьмас ёртозь улят! Улевельтькак тонь улыцятненень лангсо теезь тамашатне невтезь Содомсо, сон нейгак аштевель.

<sup>24</sup>Ансяк кортан тенк: Пазонь судонь чистэнтъ Содомнэнь ули тондетъ шождыне».

### **Тетясь ды Цёрась**

<sup>25</sup>Се шкастонть Иисус ознось: «Ѓван Теть сукпря, Тетяй, менелень ды масторонь Азоро! Сукпря Теть сень кисэ, мекс Тон кекшнить нень превейтнеде ды ёроковтнеде ды панжтнить сетненень, конат прок вишка эйкакшт.

<sup>26</sup>Алкукс, Тетяй, истямо ульнесь Тонь паро мелесь!

<sup>27</sup>Тетям максызе весементъ Монь кедь алов. Цёранть кияк аздасы Тетядонтъ башка, Тетянтъкак содасы ансяк Цёрась ды сеть, конатненень Цёранть мелезэ панжомс Сонзэ».

### **Садо Монень ды оймседе**

<sup>28</sup>«Садо Монень весе, конат сизестъ важодемадо ды стака канстонь кандомадо. Мон максан тенк оймамо.

<sup>29</sup>Саинк эсь лангозонк Монь азорксчинь ашконтъ ды тонавтнеде Монь эйтэ: Мон сэтьман, чевте седеян. Истя тынк ойментеньгак муеви оймамо.

<sup>30</sup>Монь азорксчинь ашком кандомс аволь стака, ды Монь максовт канстоськак шождыне!»

## **Матфея 12**



### Евреень оймсема чиде кевкстемась

<sup>1</sup>Весть оймсема чистэ Иисус ютась суро паксява. Сонзэ тонавтницятнень вачсть пекест, сынь кармасть суропрянь сезнеме ды ярсамо.

<sup>2</sup>Фарисейтне, тень неезь, мерсть Тензэ: «Вана Тонь тонавтницят теить сень, мезе а мереве теемс оймсема чистэ».

<sup>3</sup>Иисус мерсь каршост: «Арази тынь эзиде ловно седе, мезе тейсь Давид инязорось, зярдо сон ды сонзэ мартонзотнеяк вачомкшность?»

<sup>4</sup>Сон совась Пазонь кудос ды тосо ярсась Пазонть икеле путозь кшитнеде, конатнеде а меревиль ярсамс Давиднэнь ды мартонзосетненень, ансяк поптнэненень.

<sup>5</sup>Эли эзиде ловнокшно Койстэнтъ, кода поптнэ Пазонь кудосо оймсема чинть колсить эсь важомемасост ды ялатеке сынь тень кисэ а чумондовить?

<sup>6</sup>Мерян тенк: тесэ мезе-бути Пазонь кудодонтъкак покш.

<sup>7</sup>Пазонь Сёрмадовкссо ёвтазь: “Монь мельс тукшны седеймарямонк, аволь Монень кандозь печкезь ракшань аноксонк”. Чарькодевлинкак тынь тесэ ёвтазентъ алкуксонь смустензэ, сестэ аволиде судя чумовтомотнень.

<sup>8</sup>Эдь Ломантнень Цёрась оймсема чинть лангсоаяк азоро».

### Коське кедь ломань

<sup>9</sup>Иисус тусь тосто ды совась синагогас.

<sup>10</sup>Тосо ульнесь коське кедь цёра. Иисус лангс чумонь муемга фарисейтне кевкстизь: «Мереве-арась Коень коряс оймсема чистэ шумбралгавтнемс?»

<sup>11</sup>Сон мерсь каршост: «Бути киньгак юткстонк ули вейке ревезэ, ды сон оймсема чистэ пры латкс, арази сон ревензэ а каподьсы ды а таргасы тосто?»

<sup>12</sup>Нама, ломанесь реведе седе питней! Лисни, оймсема чистэяк меревитеемс паро».

<sup>13</sup>Сестэ Иисус мерсь цёрантень: «Венстик кедеть!» Сон венстизе, ды кедезэ шумбралгадсь, теевсь таго омбоценть кондямокс.

<sup>14</sup>Сестэ фарисейтне лиссть тосто, пурнасть промкс, кармасть вейсэ арсеме, кода маштомс Иисусонь.

#### **Пазонь кочкавт Важо**

Иисус кармасть содамо арсемадост ды тусь тосто.

<sup>15</sup>Мельганзо мольсть ламо ломанть. Сон шумбралгавтсь весе сэредицятнень

<sup>16</sup>ды кардась сынст Эйстэнзэ лиянень ёвтнемеде.

<sup>17</sup>Истя топавтовсть Исаяя пазмарицянтъ вельде ёвтавт Пазонь валтнэ:

<sup>18</sup> «Вана Монь кочкавт Важом, сон Монь вечкемам ды седей кенярксом. Мон пештяса Сонзэ Эсень Оймеялтсо, ды Сон ёвты весе раськетненень: сась Монь видестэ судямонь шкась.

<sup>19</sup>Сон а карми пелькстамо-спорямо, а карми пижнемеяк. А карми ульцясо верьга вайгельть кортамо.

<sup>20</sup>Сон мендявозь нудеентъ а синдьсы, ченгиця лампа сурентъ а мадстьсы. Сиземань апак сода Сон ветясы видечинть изнямос.

<sup>21</sup>Сонзэ лементъ лангс кармить нежедеме весе раськенъ ломантне».

#### **Иисус ды Вельзевул**

<sup>22</sup>Сестэ ветясть Иисуснэнь идемевсень колавт цёра, кона ульнесь сокор ды акортыця. Иисус шумбралгавтызе сонзэ, ды истя сокорось ды акортыцясь кармасть кортамо ды нееме.

<sup>23</sup>Весе ломантнень саинзе покш дивамо. Сынъ кармасть кевкстнеме вейкест-вейкест: «Паряк Сон Пазонь кучовт Идиця, Давидэнь Цёра?»

<sup>24</sup>Зярдэ фарисейтне тень маризь, мерсть: «Сон Вельзевулонь, идемевстнень прявтост, вийсэ панси идемевсть».

<sup>25</sup>Иисус содась сынст арсемадост ды мерсь тенст: «А ванстови мастороськак, кона явнови пельксэнь пелькс ды тюри эсь юткованзо. Истя жо эрьва ошоськак эли кудоськак, косо улить сёвномат ды пелькстамот, а кирдеви.

<sup>26</sup>Бути идемевсесь пани идемевсь, сестэ Сатанась тюри эсь юткованзо. Сестэ кодаяк а кирдеви сонзэ инязорксчизэ.

<sup>27</sup>Бути, кода тынь кортатадо, Мон идемевстнень пансян Вельзевулонь вийсэ, сестэ тынксетне кинь вийсэ пансить эйсэст? Сынст тевесткак невтить: тынк чумондоманк а виде.

<sup>28</sup>Мекевланк, бути Мон пансян идемевстнень Пазонь Оймеялтонь вийсэ, сестэ Пазонтэ Инязорксчизэ уш пачкодсь тенк.

<sup>29</sup>Кияк виев ломанень кудос а эцеви ды киненьгак сонзэ ули-парозо а нельгеви, бути васняк виевенть а сюлмсесы. Мейле ансяк сон саласы весе ули-паронзо.

<sup>30</sup>Кие аволь Монь кисэ, се Монь каршо, ды кие Монь марто а пурны, се ёртни-сравтни.

<sup>31</sup>Секскак кортан тенк: эрьва кодамо пежеть ды Пазонь сяддома-покордамо нолдави-протяви ломантненень, а вана Оймеялтонть лангс ёвтазь сяддома-покордамо валось нолдазь-протязь а ули.

<sup>32</sup>Бути кияк ёвты кодамояк сяддома вал Ломантнень Цёранть каршо, сестэ нолдазь ули тензэ. Бути кияк ёвты сяддома вал Иневанькс Оймеялтонть каршо, ялатеке нолдазь а ули тензэ, те пингестэнтъкак ды тона пингестэнтъкак».

### Чувто ды умарть

<sup>33</sup>«Паро умарь чувтось чачты паро умарть, берянь умарь чувтонть умарензэяк берянтъ. Чувтось содави умарензэ кувалт.

<sup>34</sup>Гуень левкст! Косто тынк кортамонк улить парокс, зярдо тынсь апартадо! Ломанентъ кургсто лисни се, мезде пештязь седеезэ.

<sup>35</sup>Паро ломанесь ливтни парочинь утомстонзо паро, берянь ломанесь зыянонь утомстонзо ливтни зыян.

<sup>36</sup>Мерян тенк: эрва аэрявикс валонть кисэ Пазонь судонь чистэ весенень сави кирдемс каршовал.

<sup>37</sup>Эсь валот кувалт чумовтомокс ловтадызь, эли эсь валот кувалт чумондтадызь».

#### **Иона пазмарицянтъ тешксэзэ**

<sup>38</sup>Сестэ Койс зярья тонавтыцят ды фарисейть мерсть Иисуснэнь: «Тонавтыця! Минек ули меленек Тонь пельде неемс тамашань тешкс».

<sup>39</sup>Сон мерсь каршост: «Кодат берянтъ ды Пазонтъ икеле авидеть неень пингень ломантне! Тынь вештядо тешкс, ансяк Иона пазмарицянтъ тешкстэнтъ башка кодамомяк лия тешкс тыненк максозь а ули.

<sup>40</sup>Кода Иона ульнесь покш кал потсо колмо чить ды колмо веть, истя Ломантнень Цёраськак ули моданть седейсэ колмо чить ды колмо веть.

<sup>41</sup>Ниневия ошонь ломантне стить Пазонь судс неень пингень ломантнень марто ды чумондсынзе сынст. Эдь Ниневиянь эрицянтне Ионань кулянтъ марямодо мейле велявтсть Пазонтень, а вана ней тынк икеле Се, кона Ионадомяк ине!

<sup>42</sup>Лембе ёнксонь инязоравась сти Пазонь судс неень пингень ломантнень марто ды чумондсынзе сынст. Эдь сон масторонь пестэ сакшнось Соломононь превейчинзэ кунсолосо. Ды вана ней тынк икеле Се, кона Соломондомяк ине!»

#### **Аванькс оймеялтонь велявтомась**

<sup>43</sup>«Зярдэ аванькс оймеялтось лиси ломаньстэнтъ, сон яки ведтеме таркава ды вешни эстензэ оймамо тарка, ансяк а муи.

<sup>44</sup>Сестэ мери: “Велявтан ташто кудозон, косто лисинь”. Самсто сон мусы сонзэ чавосто, тенсезь, пурназь-сэрнязь.

<sup>45</sup>Сестэ сон моли ды саи мартонзо лия сисем оймеялт, эстедензэяк кежейть, весе совить се ломанентъ потс ды кармить эрямо тосо. Ды теде

мейле се ломаненть ёжомарямозо карми улеме седеяк берянь икеленсенть коряс. Истя ули неень пингень берянь ломантнень мартояк».

### **Иисусонь авазо ды братонзо**

<sup>46</sup>Ломантнень марто Иисусонь кортамсто састь авазо ды братонзо. Сынъ аштеть ушосо, ды мелест ульнесь кортамс Сонзэ марто.

<sup>47</sup>Та-кие мерсь Иисуснэнь: «Вана Тонь ават ды братот ушосо аштить, Тонь марто кортневельть».

<sup>48</sup>Сон каршонзо мерсь: «Кие Монь авам, кить Монь братон?»

<sup>49</sup>Невтсь кедьсэнзэ тонавтницянзо лангс ды мерсь: «Вана Монь авам ды братон!»

<sup>50</sup>Кие топавты Монь менелень Тетянь мелензэ, се Монь братом, сазором ды авам».

## **Матфея 13**

### **Иисус ёвтни валвелявкст Менельсэнтъ Инязорксчидензэ**

<sup>1</sup>Секе чистэнтъ Иисус лиссь кудосто, тусь эрьке чирес ды тозо озась.

<sup>2</sup>Ваксозонзо промсть ламо ломанть. Тень кувалт Сонензэ савсь озамс венчес. Весе лиятне аштеть стядо эрькентъ чиресэ.

<sup>3</sup>Ды Иисус ламодо ёвтнесь тенст валвелявкссо.

### **Видицядо валвелявкс**

**Сон ёвтась:** «Вана видицясь лиссь видеме.

<sup>4</sup>Видемстэ конат-конат видьмекстнэ прасть ки чирес. Ливтясть нармунть ды кочксизь сынст.

<sup>5</sup>Лиятне прасть кевев таркас, косо модась аламошь, ды сынъ куроқ лиссть, секс мекс модась ульнесь аволь сэрей.

<sup>6</sup>Зярдэ чизэ кармась пидеме, сынъ пужсть ды коськсть, секс мекс юрост-корёност ульнестъ аволь кеметь.

<sup>7</sup>Лиятне прасьть кирмалав юткс; кассть кирмалавтнэ ды сынст лепштизь.

<sup>8</sup>Лиятне прасьть паро модас ды кандсть видьмекст: кона сядонь кирда, кона кодгеменень кирда, кона колоньгеменень кирда.

<sup>9</sup>Кинь улить мариця пилензэ — кунсолозо!»

### **Мекс Иисус корты валвелявкссо**

<sup>10</sup>Тонавтницянзо мольсть Иисус ваксс ды кевкстизь: «Мекс кортат тенст валвелявкссо?»

<sup>11</sup>Сон мерсь каршост: «Тыненк максозь чарькодемс Менельсэнтъ Инязоркчинзэ салавачитнень, а вана сынест апак максо.

<sup>12</sup>Эдь кинь ули, сенень седеяк ламо максови, ды сонзэ карми улеме пек ламо. Кинь вана арась, сень кедьстэ саеви сеяк, мезезэ ули.

<sup>13</sup>Секс кортангак тенст валвелявкссо: сынь ваньть ды ялатеке а неить, кунсолыть ды ялатеке а марить ды а чарькодить.

<sup>14</sup>Сынст лангсо топавтневить Исайя пазмарицянтъ вельде ёвтавт Пазонь валтнэ: “Карматадо пилесэнк кунсолома, ды а чарькодъсынк, сельмесэнк ваномо, ды а несынк.

<sup>15</sup>Нетъ ломантне калгодкстомтызь седеест, пилесткак потомдызь, сельместкак конизь, секс: иляст нее сельмесэст, иляст маря пилесэст, иляст чарькоде седейсэст, иляст велявто Монень ды Мон илинь шумбралгавто сынст”.

<sup>16</sup>А вана тынь кодат уцяскавт: сельменккак неить, пиленккак марить!

<sup>17</sup>Кемедэ Монень: ламо пазмарицянтнень ды видечисэнтнень ульнесь мелест неемс сень, мезе тынь нетядо, ансяк эзизь нее, ды марямс сень, мезе тынь марятадо, ансяк эзизь маря».

### **Видицядо валвелявксонтъ смустезэ**

<sup>18</sup>«Кунсолынк эно тынь, кода чарькодемс видицядо валвелявксонтъ.

<sup>19</sup>Зярдю кияк марясы кулянтъ Менельсэнтъ Инязорксчидензэ ды а чарькодъсы, сестэ сы Апарось ды саласы седейстэнзэ видезентъ. Ки чирес видезесь невти истямо ломанентъ.

<sup>20</sup>Кевев таркас видезесь невти сень, кие марясы кулянтъ ды сеске кецязь-эрьгедезь сайсы седеезэнзэ.

<sup>21</sup>Ансяк сонзэ юронзо-корёнонзо аволь кеметь, секскак сон ашти аволь кувать. Зярдю сы тензэ се кулянтъ кисэ кодамомяк стакачи эли пансема, сон сеске поты кемемастонть.

<sup>22</sup>Кирмалав юткс видезесь невти сень, кие марясы кулянтъ, а вана ансяк те пингень мелявкстнэ ды сюпавчис правтомась лепштысызь кулянтъ, ды сон кадови видьмекстэме.

<sup>23</sup>Паро модас видезесь невти сень, кие марясы кулянтъ ды чарькодъсы. Истямость канды видьмекст, кона сядонь кирда, кона кодгемениень кирда, кона колоньгемениень кирда».

#### Колы тикшеде валвелявкс

<sup>24</sup>Иисус ёвтнесь тенст лия валвелявкс: «Менельсэнтъ Инязорксчись моли истямо тев ёнов: ломанесь видизе эсь паксянзо паро видьмесэ.

<sup>25</sup>Веть, зярдю весе удость, сась сонзэ ятозо, видсь товзюронтъ юткова колы тикшетъ ды тусь.

<sup>26</sup>Зярдю лиссь товзюрось ды кармась прянь каямо, сестэ неявиць колы тикшетнеяк.

<sup>27</sup>Азоронтень састъ важонзо ды мерсть тензэ: “Чиряз, тон арази аволь паро видьмесэ видик паксят? Косто эно савестъ сонзэ эйс тикшетне?”

<sup>28</sup>Сон мерсь каршост: “Ятось тень теизе”. Важотне кевкстизь: “Ули мелеть, минь мольтяно, кочксынек сынст?”

<sup>29</sup>Сон мерсь тенст: “Арась, тикшетнень марто товзюротненьгак аволинк таргсе.

<sup>30</sup>Кадык нуемань самс кавонест касыть вейсэ. Нуемстэ мон мерян нуицятненень: васня пурнынк колы тикшетнень, сюлмсинк сынст пултс ды пултынк, ансяк мейле пурнынк товзюронтъ ды каинк утомозон”».

#### **Горчица видьмеде ды чапавтомадо валвелявкст**

<sup>31</sup>Иисус ёвтнесь тенст истямо валвелявкскаяк: «Менельсэнтъ Инязорксчизэ моли горчица видьме ёнов, конань ломанесь саизе ды видизе эсь паксязонзо.

<sup>32</sup>Сон весе видьметнеде сехте вишкине, а вана зярдо касы, тееви весе тикшетнеде покшокс, чувтонь кондямокс. Лангозонзо ливтить менелень нармунть ды натой тейнить пизэть тарадонзо потс».

<sup>33</sup>Иисус таго ёвтнесь тенст валвелявкс: «Менельсэнтъ Инязорксчизэ моли чапавтома ёнов, конань човоризе авась почтонь колмо парь марто, ды теде сыргась весе чапакось».

<sup>34</sup>Весе нетнень Иисус ёвтнинзе ломантненень валвелявкссо, ды валвелявкстома мезеяк эзь тонавто.

<sup>35</sup>Истя топавтовсть пазмарицянтъ вельде ёвтавт валтнэ: «Панжса кургом валвелявкссо ды ёвтнесынь, мезть ульнестъ кекшезь масторонтъ теевема шкасто саезь».

#### **Колы тикшеде валвелявксонтъ смустезэ**

<sup>36</sup>Мейле Иисус нолдынзе ломантненень ды совась кудос. Тонавтницянзо мольсть ваксозонзо ды мерсть Тензэ: «Панжик тенек, мезде ёвтни паксянь колы тикшеде валвелявксось?»

<sup>37</sup>Сон ёвтась каршост: «Паро видьмень видицясь — Ломантненень Цёрась,

<sup>38</sup>паксясь — мирэсь-масторось, паро видьмесь — те сеть, конатне ульнестъ аравтозь Инязорксчинтень, ды колы тикшетне — Апаронтъ ломантне.

<sup>39</sup>Сынст видиця ятось — Идемевсесь, нуема шкась — те пингентъ прядовомась, нуицятне — ангелтнэ.



<sup>40</sup>Кода колы тикшетнень пурнасызь ды толсо пултасызь, истя ули те пингенть прядовомстояк.

<sup>41</sup>Ломантнень Цёрась кучсынзе Эсь ангелэнзэ ды пурнасызь Сонзэ Инязорксчистэнтъ весе пежетъс совавтыцятнень ды зыянонь теицятнень.

<sup>42</sup>Каясызь сынст тоначинь гайни каштомос, косо сынъ кармить авардеме ды пейсэст чикордомо.

<sup>43</sup>Сестэ видечисэтне кармить сияждомо чи ладсо Тетяст Инязорксчисэнтъ. Кинь улить мариця пилензэ — кунсолозо!»

#### **Кекшезь сюпавчиде ды питней ведьэрьгеде валвелявкс**

<sup>44</sup>«Менельсэнтъ Инязорксчизэ моли истямо тев ёновгак: пиресэ ульнесь кекшезь сюпавчи, конань ве ломань муize ды таго кекшизе тоско. Эрьгедемадонть сон мольсь, миize весементь, мезезэ ульнесь, ды рамизе се пиренть.

<sup>45</sup>Менельсэнтъ Инязорксчизэ истя жо моли се тевенть ёнов: вейке ломань вешнесь мазый ведьэрьгеть.

<sup>46</sup>Вана сон мусь рамамс вейке пек питней ведьэрьге. Сон тусь, микшнизэ весементь, мезезэ ульнесь, ды рамизе сонзэ».

#### **Калонь кундамопельде валвелявкс**

<sup>47</sup>«Менельсэнтъ Инязорксчизэ истя жо моли истямо тев ёнов. Калонь кундыцятне эрькес каясть калонь кундамопель, козонь понгсть эрьва кодат калт.

<sup>48</sup>Зярдэ сон пешкедсь, таргизь сонзэ чирес, озасть: паро калтнэнь пурнызь кедьгева, берянтнень ёртызь.

<sup>49</sup>Истя ули те пингенть прядовомстояк: лисить ангелтнэ, явсызь апаро ломантнень видечисэтнень ютксто,

<sup>50</sup>ды каясызь апартнэнь тоначинь гайни каштомос. Тосо сынъ кармить авардеме ды пейсэст чикордомо».

<sup>51</sup>Иисус кевкстинзе тонавтницянзо: «Тынь весе тень чарькодинк?» Сынъ ёвтасть Тензэ: «Эно, чарькодинек!»

<sup>52</sup>Сон кортась тенст: «Лисни, Койс эрьва тонавтыцясь, кона тонавтозь Менельсэнтъ Инязорксчинтень, моли сюлав кудазор ёнов, кона ули-паронь ванстома таркастонзо таргси таштояк, одгак».

### **Иисус Назаретсэ**

<sup>53</sup>Зярдо Иисус прыдынзе неть валвелявкстнэнь ёвтнемаст, сестэ тусь тосто

<sup>54</sup>ды сась Эсь тиринь ошозонзо ды тосо синагогасо кармасть тонавтомо ломантнень. Сынъ, пек дивазь, кортасть: «Косто Сон сайнзе истямо превейчинть ды тамашань теема виенть?»

<sup>55</sup>Арази Сон аволь чапицянтъ цёрась? Арази Сонзэ аванзо лемезэ аволь Мария ды братонзо аволь Яков, Иосий, Симон ды Иуда?

<sup>56</sup>Арази весе сазоронзояк аволь тесэ, минек ютксо? Косто эно Тензэ саевсь те весемесь?»

<sup>57</sup>Истя сынст арасель мелест кемемс Сонензэ. Иисус мерсь тенст: «Пазмарицясь эрьва косо ловови, ансяк аволь чачома масторсонзо ды эсь кудосонзо».

<sup>58</sup>Ломантне эзть кеме Тензэ, секкак Сон эзь тее тосо ламо тамашат.

## **Матфея 14**

### **Нававтыця-Лемдиця Иоаннонь куломазо**

<sup>1</sup>Се шкане Ирод, Галилеянь тетрархось, марясь Иисусто

<sup>2</sup>ды мерсь эсензэ важодицятненень: «Те Нававтыця Иоанн. Сон кулозьстэ вельмесь, секкак сонзэ ули виезэ тейнемс истят тамашат».

<sup>3</sup>Зярдо-бути Ирод Иоаннонь кундакшнызе, тертякшнызе кшнинь рисьмесэ ды озавтокшнызе пекстамо кудос. Тень сон теекшнызе Филип лелянзо нинзэ Иродиадань кисэ,

<sup>4</sup>мекс Иоанн мерекшнесь тензэ: «Тонеть а меревн эрямс эсь лелять ни марто!»

<sup>5</sup>Ирод маштыксэлизе Иоаннонь, ансяк пельсь еврейтнеде, конат весе ловсть Иоаннонь пазмарицякс.

<sup>6</sup>Иродонь чачома чистэнзэ Иродиадань тейтерезэ киштсь инжетнень икеле. Те пек тусь Иродонь мельсь,

<sup>7</sup>секс сон божазь-пежетькстазь алтась тензэ максомс весемень, мезе илязо веше.

<sup>8</sup>Тейтересь аванзо кармавтомань коряс вешсь: «Максык монень нейке, ярсамопелень кандтнема лангсо, Нававтыця Иоаннонь прянзо».

<sup>9</sup>Инязорось нусмакадсь, ансяк инжетнень икеле максозь валонть кисэ мерсь максомс тейтерентень прянтъ.

<sup>10</sup>Ирод кучсь пекстамо кудов важо, кона керизе Иоаннонь прянзо.

<sup>11</sup>Кандызь прянтъ ярсамопелень кандтнема лангсо ды максызь тейтерентень, тона кандызе аванстэнь.

<sup>12</sup>Иоаннонь тонавтницянзо састъ, саизь сонзэ уловонть ды калмизь: мейле мольсть ёвтамо теде Иисуснэнь.

#### **Вете тѣжань андома**

<sup>13</sup>Зярдо Иисус марясь Иоаннонь куломадо, Сон тусь тосто венчсэ сэтьме таркав ськамонзо. Ломантне марясть Сонзэ туемадо ды сыргастъ оштнэстэ мельганзо ялго.

<sup>14</sup>Зярдо Иисус лиссь венчстэнтъ ды несъ ламо ломанть, марятотсь кисэст седеезэ ды Сон шумбралгавтынзе юткстост весе сэредицятнень.

<sup>15</sup>Сась чокшне, тонавтницянзо мольсть ваксозонзо ды мерсть: «Чизэ допрок чопотетсь, таркась тесэ чаво, — нолдыть ломантнень, кадык молить маласо велетнес ды рамить эстет мезеяк ярсамс».

<sup>16</sup>Иисус сестэ мерсь тенст: «Сыненст а мезть тукшномс. Андынк сынст тынсь!»

<sup>17</sup>Сынь мерсть каршонзо: «Минек марто тесэ мезеяк арась: ансяк вете кшить ды кавто калт».

<sup>18</sup>Сон кармавтсь тенст: «Кандынк сынст монень».

<sup>19</sup>Мейле Иисус мерсь ломантненень ойсемс луганар лангс, а вана Сонсь саинзе вете кшитнень ды кавто калтнэнь, варштась менельс, ёвтась сюкпря Пазонтень. Сон синдинзе кшитнень, максынзе тонавтницятненень, ды тонавтницятне явшизь ломантненень.

<sup>20</sup>Весе ярсасть пешкедемазост. Мейле тонавтницятне пурнасть кадовозь сускомотнеде кемгавтово пешксе куйметь.

<sup>21</sup>Ярсыцятнеде ульнесть, тейтерь аватнеде ды эйкакштнэде башка, вете тѣжашка.

#### Иисус юты ведь ланга

<sup>22</sup>Теде мейле сеске Иисус кармавтынзе тонавтницянзо озамо венчес, ды мерсь тенст Сондензэ икеле уемс эрькенть тона чирев. Сонсь кадовсь ломантнень нолдамо.

<sup>23</sup>Нолдамодост мейле кузь пандо лангс съкамонзо озномо. Сон чокшнень чоподаваяк яла кадновсь тоско съкамонзо.

<sup>24</sup>Се шкастонть венчесь эрькенть куншкасоль, каршо пувась виев варма, ды ведьвелявкстнэ чавсть венченть.

<sup>25</sup>Ашолгадама шкасто Иисус сыргась тонавтницятнень ёнов ведь ланга.

<sup>26</sup>Зярдс сынь неизь Сонзэ веденть ланга ютамсто, пелезевсть. «Те чопача!» — мерсть сынь ды кармасть тандадомадонтъ пижнеме.

<sup>27</sup>Иисус сеске ушодсь мартост кортамо: «Оймадо: те Мон, илядо пеле!»

<sup>28</sup>Петра мерсь каршонзо: «Азоро! Улиндерят алкукс те Тон, мерть монень Тонь ваксс ведь ланга молемадо».

<sup>29</sup>Сон мерсь тензэ: «Сак!» Сестэ Петра лиссь венчстэнтъ ды тусь ведь ланга Иисус ёнов.

<sup>30</sup>Ды ансяк зярдо сон маризе виев варманть, пек тандадсь ды кармась ваямо. Петра серьгедсь: «Азоро, идемак!»

<sup>31</sup>Иисус сеске венстизе кедензэ, каподизе сонзэ ды мерсь: «Вай, кодамо аламо тонь кемемат! Мекс кармить кавтолдомо?»

<sup>32</sup>Сынь кавонест озасть венчентень, ды вармась сеске лоткась.

<sup>33</sup>Секскак венчсэтне сюконясть Иисуснэнь ды мерсть: «Алкукс, Тон Пазонтъ Цёразо!»

### **Иисус шумбралгавты Геннисаретсэ**

<sup>34</sup>Сынь печтясть эркентъ омбоце пелев, састъ Геннисаретэнь модас.

<sup>35</sup>Тесэнь эрицятне содызь Иисусонь ды кучсть кулят Сонзэ самодо се ёнксонть келес. Сестэ сынь кандызь Тензэ весе сэредицяст

<sup>36</sup>ды энялдсть Тензэ, меревель токавомс куш Сонзэ оршамопелень цёкос. Ды весе, конат токавильть, пичкильть.

## **Матфея 15**

### **Покштятнень койтне-кирдатне**

<sup>1</sup>Сестэ Иисус ваксс састъ Ерусалимстэ Койс зярыя тонавтыцяст ды фарисейть ды кевкстсть:

<sup>2</sup>«Мекс Тонь тонавтницяст колсить минек покштянь койтнень-кирдатнень? Сынь ярсамодо икеле кедест, кода эряви, а шлякшносызь!»

<sup>3</sup>Сон каршост мерсь: «Мекс тынсь колсетядо Пазонь кармавтовксонть эсенк койтнень-кирдатнень кирдемаст кисэ?»

<sup>4</sup>Пазось мерсь: “Ловт ломанькс тетянь-авать”, ды “Кие покорды тетянзо эли аванзо, сенень кулома”.

<sup>5</sup>А вана тынь кортатадо, кие мериндеряй тетянстэнь эли аванстэнь: “Мезе тонеть максомаль, сень мон алтыя Пазонтень”,

<sup>6</sup>сестэ те ломанентень тетянзо ды аванзо ловомс а эряви. Истя тынь колсетядо Пазонь кармавтоксонть эсенк теевть койтнень-кирдатнень кирдемга.

<sup>7</sup>Чачонь полавтницят! Парсте тынк ланга Исайя пазмарицясь икелев ёвтась:

<sup>8</sup> “Нетъ ломантне малавгалить Монень валсост, ды ловить Эйсэнь кельсэст, ансяк седеест васоло аштить Монь эйстэ.

<sup>9</sup>Сынь стяко суюконить Монень, эдь сынь тонавтыть ломанень теевть кармавтокстнэненъ, теке Монсетненень!”»

#### **Мезе ломаненть теи аваньксэкс**

<sup>10</sup>Мейле Иисус тердинзе эстензэ ломантнень, кортась тенст: «Кунсолодо ды чарькодеде:

<sup>11</sup>Ломаненть аваньксэкс тейсы аволь се, мезе сови кургозонзо, а вана се, мезе лиси кургостонзо».

<sup>12</sup>Сестэ тонавтницянзо мольсть ваксозонзо ды ёвтась Тензэ: «Содат а содат, Тонь валот ацирьгавтызь фарисейтнень?»

<sup>13</sup>Сон каршост мерсь: «Эрва од путовкось, конань озавтызе аволь Монь менелень Тетям, ули таргазь юрнэк-корённэк.

<sup>14</sup>Илядо вано сынст лангс! Сынь сокоронь ветниця сокорт; сокоронть ветиндеряй лия сокор, сынь кавонест латкс прыть».

<sup>15</sup>Петра каршонзо пшкадсь: «Панжик тенек аваньксчиде валмеревксэнтъ смустензэ».

<sup>16</sup>Иисус мерсь тонавтницянстэнь: «Нать тыньгак те шкас истят а чарькодицят?

<sup>17</sup>Арази а чарькодтядо: весе, мезе кургова сови, пекес моли, венелев молемстэ ушов ёртови.

<sup>18</sup>А вана се, мезе лиси кургосто, се седейстэ лиси, ды те ломаненть теи аваньксэкс.

<sup>19</sup>Эдь ансяк седейстэ лисить апаро арсемат, ломанень маштомат, ускурямот, усксевемат, саламот, кенгелемат, сяддомат-покордамот.

<sup>20</sup>Весе те ломанень теи аваньксэкс. А вана кедень апак шля ярсамось ломанень аваньксэкс а тейсы».

### **Ханаан масторонь авань кемемазо**

<sup>21</sup>Иисус тусь тосто ды сась Тир ды Сидон оштнэнь перька таркатнес.

<sup>22</sup>Тесэ чийсь Тензэ се ёнкссонть эриця ханаанонь ава ды сеересь: «Азоро, Давидэнь Цёра, ульть седеймарикс тень! Монь тейтерем идемевсень колавт, пек пишти».

<sup>23</sup>Ансяк Иисус каршонзо ве валгак эзь ёвта. Сестэ тонавтницянзо мольсть Тензэ ды энялдсть: «Топавтык вешеманзо! Сон яки мельганок ды пек пижни».

<sup>24</sup>Иисус мерсь: «Мон кучозян ансяк Израилень раськентень, кона кадовозь ревень кондямо».

<sup>25</sup>Авась мольсь ваксозонзо, икелензэ прась кумажа лангс: «Азоро, лездак тень!»

<sup>26</sup>Иисус каршонзо мерсь: «Аволь вадря саемс кшинть эйкакшонь кедьстэ ды каямс киска левкснэнь».

<sup>27</sup>Авась мерсь: «Те истя, Азоро. Ансяк кискатнеяк ярсыть сеть паморькстнэде, конатне певерить азорост столь лангсто».

<sup>28</sup>Сестэ Иисус мерсь каршонзо: «Вай, ава, покш тонь кемемат! Улезэ теть мелеть коряс». Секе шкастонть пичкась сонзэ тейтерезэ.

### **Ниле тёжань андома**

<sup>29</sup>Иисус тусь тосто ды мольсь Галилеянь эрьке чирева. Ве таркасо Сон кузь пандо пряс ды озась.

<sup>30</sup>Ваксозонзо састь ламо ломанть, сынь мартост туизь чамордыцятнень, сокортнэнь, кедтеметнень-пильгевтеметнень, акортыцятнень ды ламо

лия сэредицятнень, конатнень путылизь Иисусонь пильгензэ ваксс. Сон сынст шумбралгавтнесь.

<sup>31</sup>Ломантне дивсесть, кода неизь акортыцятнень кортыцякс, кедтеметнень-пильгевтеметнень — виемезекс, чамортнэнь — якицякс, сокортнэнь — неицякс, ды شناсть Израилень Пазонтэ эйсэ.

<sup>32</sup>Иисус тердинзе тонавтницянзо ды кортась тенст: «Седеем сянгорды ломантнень кисэ. Сынэ натой колмо чить аштить Монэ вакссо, ярсамс тенст а мезде. Мелем арась нолдамс сынст вачо: авольть лавшомо ки лангсо».

<sup>33</sup>Тонавтницянзо мерсть тензэ: «Косто сайтяно минь тесэ, чаво таркасо, зяро ломанень андомс кшинть?»

<sup>34</sup>Иисус кевкстинзе: «Зяро тынк кшинк?» Сынэ ёвтась: «Сисем кшить ды зярыя калнэть».

<sup>35</sup>Иисус кармавтынзе ломантнень ойсеме мода лангс.

<sup>36</sup>Саинзе сисем кшитнень ды калтнэнь, ёвтась Пазонтень сукпря, синтринзе ды максынзе эсь тонавтницянстэнь, ды тонавтницятне явшизь ломантенень.

<sup>37</sup>Весэ ярсась пешкедемазост, кадовозь сускомотнеде пурнасть пешксе сисем кептереть.

<sup>38</sup>Ярсыцятнеде ульнесть, тейтерь аватнеде ды эйкакштнэде башка, ниле тэжат ломанть.

<sup>39</sup>Мейле Иисус нолдынзе ломантнень, озась венчес ды тусь Магдалань ёнксов.

## Матфея 16

### Тамашань тешксэнь вешема

<sup>1</sup>Иисуснэнь састь фарисейть ды саддукейть. Сынэ, Сонзэ снартнемань-варчавтнемань кисэ, вешть невтемс тенст менельстэ тамашань тешкс.



<sup>2</sup>Сон ёвтась каршост: «Чокшне тынь кортатадо: “Менелесь якстере — ванды ули маней”».

<sup>3</sup>Валскеяк кортатадо: “Менелесь чопода-якстере ды пелев — течи ули пиземе”. Чачонь полавтницят! Менелень чаманть явомо машттадо, а вана кодат шкань тешкстнэ, — те а явови тенк!

<sup>4</sup>Кодат берянтъ ды Пазонтъ икеле авидеть неень пингень ломантне! Тынь вештядо тешкс, ансяк Иона пазмарицянтъ тешкстэнтъ башка кодамояк лия тешкс тыненк максозь а ули». Тень ёвтамодо мейле Сон кадынзе сынст ды тусь тосто.

### **Саддукеень ды фарисеень чапавтомась**

<sup>5</sup>Зярдэ печтясть эрькентъ омбоце пелев, сестэ тонавтницянзо неизь: стувтсть мартост саемс кши.

<sup>6</sup>Иисус мерсь тенст: «Ванодо! Ванстодо прянк фарисеень ды саддукеень чапавтомадонть».

<sup>7</sup>А вана тонавтницятне эсь ютковаст кармасть кортнеме: «Сон истя корты миненек секс, мекс мартонок эзинек сае кши».

<sup>8</sup>Иисус теде содазь, мерсь тенст: «Вай, кодамо аламо тынк кемеманк! Мекс эсь юткованк кортнетядо кшинь араздентъ?»

<sup>9</sup>Арази тынь нейгак яла а чарькодтядо? Арази мельсэнккак а ашти, кода вете кшисэ вете тёжат пешкедсть? Зяро куйметь сускомотнеде пурныде?

<sup>10</sup>Эли, кода сисем кшисэ ниле тёжат пешкедсть? Зяро кептереть сестэ пурныде?

<sup>11</sup>Кода истя тынь а чарькодтядо, — Мон кортынть тенк аволь кшиде! А вана мезде: ванстодо прянк фарисеень ды саддукеень чапавтомадонть!»

<sup>12</sup>Ансяк сестэ тонавтницянзо чарькодсть: Сон кортась тенст ванстомс пряст фарисеень ды саддукеень тонавтомадонть, аволь кшинь чапавтомадонть.

**Петра Иисусонь лови Пазонь кучовт Идицякс**

<sup>13</sup>Зярдэ Иисус сась Филипень Кесария ёнксонть, Сон кевкстинзе тонавтницянзо: «Киекс ломантне ловить Монь, Ломантнень Цёранть?»

<sup>14</sup>Сынъ мерсть: «Веенст ловить Нававтыця Иоаннокс, омбонст Илиякс, лият Еремиякс эли кодамояк лия пазмарицякс».

<sup>15</sup>Иисус кевкстинзе сынст: «Вана тынь киекс Монь ловсамизь?»

<sup>16</sup>Симон Петра мерсь каршонзо: «Тон Пазонь кучовт Идицят, эри Пазонть Цёразо!»

<sup>17</sup>Сестэ Иисус мерсь тензэ: «Уцяскават тон, Ионань цёразо Симон! Тонеть тень панжизь аволь ломантне, а вана Монь менелень Тетям.

<sup>18</sup>Секскак теть мерян: Петра, тон кев, ды те кевенть лангс Мон путса Кемицянь курум, ды натой куломань-тоначинь вийтнеяк зярдояк сонзэ а изнясызь.

<sup>19</sup>Мон макссынъ тонеть Менельсэнтъ Инязорксчинзэ панжоматнень. Мезенть сьулмасак масторлангсо, се сьулмазь ули менель лангсоаяк, мезенть нолдасак масторлангсо, се нолдазь ули менель лангсоаяк».

<sup>20</sup>Сестэ Иисус кармавтсь тонавтницянстэнь киненьгак а ёвтнемс Сондензэ кода Иисусто, Пазонь кучовт Идицядо.

**Иисус икелев ёвты пиштемадонзо ды куломадонзо**

<sup>21</sup>Те шкастонть саезь Иисус кармась апак сёпо ёвтнеме Эсь тонавтницянстэнь, кода Сонензэ эряви модемс Ерусалимев ды тосо сави пек пиштемс прявтнэнь, попонь покштнэнь ды Койс тонавтыцятнень пельде. Сон карми улеме маштозь, ансяк мейле колмоце чистэ Сон кулозьстэ вельми.

<sup>22</sup>Петра тердизе Сонзэ ве ёнов, кармась каршонзо кортамо: «Паз аштезэ кисэть, Азоро! Истя илязо уле мартот!»

<sup>23</sup>Иисус велявтсь Петра ёнов ды мерсь тензэ: «Оргодть Монь вакссто, Сатана! Тон пупордьявтнят Эйсэнъ: тонь арсемат ломанень пельде, аволь Пазонь пельде».

<sup>24</sup>Сестэ Иисус мерсь тонавтницянтэнь: «Кинь ули мелезэ модемс Монь мельга, се стувтозо эсь прянзо, саезэ эсь крёстонзо ды молезэ мельган.

<sup>25</sup>Кинь ули мелезэ эсь эрямонзо ванстомс, се ёмавтсы сонзэ. Кие жо ёмавтсы эсь эрямонзо Монь кисэ, се мусы сонзэ.

<sup>26</sup>Кодамо лезэ ули ломанентень, бути сон сайсы эстензэ весе масторлангонть, теке марто вана эрямонзо ёмавтсы? Эли кодамо питне мейле максы ломанесь эсь эрямонзо идемань-рамамонь кисэ?

<sup>27</sup>Зярдо Ломантнень Цёрась сы Тетянзо максовт инекчисэнзэ ды Эсь ангелэнзэ марто, сестэ эрвантень панды питне тевензэ коряс.

<sup>28</sup>Видестэ кортан тенк: конат-конат тесэ аштицятнень эйтэ куломо а кенерить, кода несызь Ломантнень Цёранть самонзо Эсь инязоркчисэнзэ».

## Матфея 17

### Иисусонь лиякстомась

<sup>1</sup>Кото чинь ютазь, Иисус саинзе мартонзо Петрань, Яковонь ды сонзэ Иоанн ялаксонзо ды кустинзе сынст сэрей пандо пряс, косо ульнесть ськамоост.

<sup>2</sup>Тосо икелест Сон лиякстомсь: чамазо кармась сияждомо чи ладсо, оршамопелензэ теевсть цивтёрдыця ашокс.

<sup>3</sup>Апак учо лиссть тенст Моисей ды Илия, конат кортасть Иисус марто.

<sup>4</sup>Сестэ Петра мерсь Иисуснэнь: «Азоро! Кода паро миненек тесэ улемс! Улиндеряй мелеть, тейтяно тесэ колмо кудынетъ: вейкентъ Тонеть, вейкентъ Моисейнень, вейкентъ Илиянень».

<sup>5</sup>Зярс сон кортась, сась сияждыця пель ды вельтинзе сынст. Пеленть потсто марявсь вайгель: «Те Монь вечкевикс Цёрам, Монь седей кенярксом. Сонзэ кунсолодо!»

<sup>6</sup>Те вайгеленть марязь, тонавтницятне истя тандадсть, натой пракшность чамаст лангс.

<sup>7</sup>Иисус мольсь ваксозост, токинзе сынст ды мерсь: «Стядо, илядо пеле».

<sup>8</sup>Зярдс сынь кепедизь сельмест, Иисусто башка киньгак эзьт нее.

<sup>9</sup>Пандонтъ прясто валгомсто Иисус кармавтсь тенст: «Киненьгак илядо ёвтне неезденть Ломантнень Цёранть кулозьстэ вельмемазонзо».

<sup>10</sup>Сестэ тонавтницянзо кевкстизь сонзэ: «Мекс Койс тонавтыцятне кортыть, васняк эряви самс Илиянень?»

<sup>11</sup>Иисус мерсь каршост: «Те виде, Илиянень васняк эряви самс ды весементь аравтомс эсь тарказонзо.

<sup>12</sup>Ансяк кортан тенк: Илиясь уш сакшнось, ды ломантне эзизь сода сонзэ, тейсть мартонзо эсест мелест коряс. Истя Ломантнень Цёраськак карми сынст пельде кирдеме ламо пиштемат».

<sup>13</sup>Сестэ тонавтницянзо чарькодсть: Сон кортась тенст Нававтыця Иоанндо.

#### **Идемевсень колавт цёрынень шумбралгавтома**

<sup>14</sup>Кода сынь валгсть пурнавозь ломантнень ваксс, мольсь Иисуснэнь ве ломань ды суюконязь

<sup>15</sup>мерсь Тензэ: «Азоро! Ульть седеймарицякс монь цёрам туртов. Сон сэреди пракшны ормасо, пек пишти, кулси: сеedyстэ кайсеви толс эли ведьс.

<sup>16</sup>Мон тукшныя сонзэ Тонь тонавтницятненень, ансяк сон эзь шумбралгавтово тенст».

<sup>17</sup>Иисус мерсь: «Вай, неень пингень акемиця ды колазь ломанть! Зярс Монень эряви улемс тынк марто? Зярс Тень кирдемс коронк? Ветинк цёрыненть тей Монень!»

<sup>18</sup>Иисус кармавтызе идемевсенть лисеме, ды се лиссь сонзэ потсто. Эйкакшось сеске пичкась.

<sup>19</sup>Мейле тонавтницятне састь Иисус ваксс ськамоост ды кевкстизь: «Мекс миненек идемевсесь эзь паневе?»

<sup>20</sup>Иисус мерсь каршост: «Секс мекс тынк арась кемеманк. Алкукс кортан тенк: улевельгак тынк кемеманк куш горчица видьмешка, ды меревлидеяк те пандонтень айгемс тестэ тов — сон айгевель. Сестэ мезеяк аволь уле тенк атеевикс!

<sup>21</sup>Истят идемевстне паневить ансяк озномасо ды постонь кирдемасо».

#### **Иисус таго корты куломадонзо**

<sup>22</sup>Галилеясо улемстэст Иисус мерсь тонавтницянтэнь: «Ломантнень Цёрась ули максозь-миезь ломантнень кедь алов,

<sup>23</sup>конат маштсызь Сонзэ, ансяк мейле колмоце чистэ Сон кулозьстэ вельми». Тонавтницянтнень те пек нусмакавтынзе.

#### **Пазонь кудонень каявкс**

<sup>24</sup>Зярдэ Иисус ды тонавтницянзо велявтсть Капернаумс, Петра ваксс мольсть Пазонь кудонтъ туртов каявксонь пурныцят ды кевкстизь: «Паряк, тынк тонавтыцянк панды каявкс?»

<sup>25</sup>Сон ёвтась: «Нама, панды». Зярдэ Петра совась кудонтень, Иисус икельдизе кевкстемасо: «Кода тетъ маряви, Симон, масторлангонь инязортнэ кинь пельде сайтъ каявкст-пурнавкст: эсь ломанест пельде эли лия масторонь ломанень пельде?»

<sup>26</sup>Петра каршонзо ёвтась: «Лия масторонь ломанень пельде». Иисус мерсь тензэ: «Лисни: эсь ломанест олякстомтызь пандомадонть?»

<sup>27</sup>Ансяк а карматано кежест савтнеме. Секскак, азё эрьке чирес, каяк ульма. Васенце понгозь калонтъ саик, кургонзо панжик, ды муят тосто

сиянь ярмак. Саик сонзэ, максык тенст Пазонь кудонть туртов каявксокс Монь кисэ ды эсеть кисэ».

## Матфея 18

### Кие сехте ине?

<sup>1</sup>Зярыя шкань ютазь тонавтницятне мольсть Иисус ваксс, кевкстизь: «Кие весемеде покш Менельсэнтъ Инязоркчисэнтъ?»

<sup>2</sup>Сестэ Иисус тердсь эйкакш, аравтызе куншказост

<sup>3</sup>ды мерсь: «Видестэ мерян тенк: а лиякстоминдерятадо ды а улиндерятадо мелень-превень коряс эйкакшонь кондямокс, Менельсэнтъ Инязоркчинтень а соваптадо.

<sup>4</sup>Кие путсы эсь прянзо те эйкакшонть кондямокс вишкинекс-сэтьмекс, се Менельсэнтъ Инязоркчисэнтъ ули сехте покшокс.

<sup>5</sup>Кие саи эстензэ Монь лемем кисэ вейке истямо эйкакш, се Монь сайсамам.

<sup>6</sup>А вана кие совапты пежетьс куш вейкешка неть Монень кемиця вишкинетнень-асодавикстнэнь ютксто, сенень седе паро улель, поведевельтькак кирьгазонзо покш яжамо кев ды ваявтовлизьгак иневедень сэрей таркас.

<sup>7</sup>Зыян масторлангонтень, косо ламо эрьва кодат кундсемкат-килькшт, конат правтыть ломантнень пежетьс! Истят тевтне, нама, свал эрсить, а вана кодамо зыян се ломанентень, кона лиятнень правты пежетьс!

<sup>8</sup>Бути тонь кедеть эли пильгеть совапты эйсэть пежетьс, керик сонзэ ды ёртык! Ве кедтеме эли ве пильгевтеме пингеде пингень эрямонтень совамось ули теть седе паро, кавто кедь ды кавто пильге марто пингеде пингень толс ёртомадонть.

<sup>9</sup>Бути тонь сельметь совапты эйсэть пежетьс, таргик сонзэ ды ёртык! Ве сельме марто пингеде пингень эрямонтень совамось ули теть седе паро, кавто сельме марто тоначинь амадница толс ёртомадонть.

<sup>10</sup>Ванодо, вейкедеяк неть вишкинетнень эйстэ илядо велявто-безарде. Кемевтян эйсэнк: менель лангсо сынст ванстыця ангелэст свал аштить Монь менелень Тетянь чаманзо икеле».

#### **Ёмазь реведе валвелявкс**

<sup>11</sup>«Ломантнень Цёрась сась ёмазтнень вешнеме ды идеме.

<sup>12</sup>Кода тынь арсетядо: мезе карми тееме ломанесь, конань сядо ревестэнзэ вейкесь ёми? Нама, сон кадсынзе вейксэньгемень вейксэтнень ванома тарказост пандо лангс ды туи ёмазенть вешнеме.

<sup>13</sup>Муиндерясы сонзэ, кемеде тень: сонзэ кисэ карми седеяк пек эрьгелеме вейксэньгемень вейксэ апак ёмазтнень коряс.

<sup>14</sup>Истя менелень Тетянккак арась мелезэ ёмавтомс куш киньгак неть вишкинетнень эйстэ».

#### **Пежетень теиця кемиця ялга**

<sup>15</sup>«Теиндеряй малавиксэть тонь каршо пежеть, мольть тензэ ды эсь юткованк мерть теде сонензэ. Кунсолындерятанзат, сестэ тон муик эсь малавиксэть.

<sup>16</sup>А кунсолындерятанзат, сестэ сайть мартот вейке эли кавто лия ломанть, эдь Пазонь Сёрмадовкссо ёвтазь: “Кадык эрьва чумондомась ули кемекстазь кавто эли колмо неицянь-содыцянь валсо”.

<sup>17</sup>Сынсткак а кунсолындерясынзе, сестэ ёвтак тевдензэ кемицянь курос. Кемицянь куронтькак а кунсолындерясы, сестэ сон улезэ теть, теке Пазонь а содыця ломань эли каявксонь-налогонь пурныця.

<sup>18</sup>Видечи кортан тенк: мезе тынь сьулматадо масторлангсо, се ули сьулмазь менель лангсоаяк; мезе нолдатадо масторлангсо, се ули нолдазь менель лангсоаяк.

<sup>19</sup>Ды кортан тенк: бути масторлангсо тынк ютксто кавто ломанть ве мельсэ вешить мезеаяк, сестэ весе тень менелень Тетям макссы тенст.

<sup>20</sup>Эдь косо пурнавить куш кавто эли колмо ломанть Монь лементь кисэ — Монгак тосо улян сынст марто».

### Маштодо чумонь нолдамо-простямо

<sup>21</sup>Сестэ Петра мольсь Иисус ваксс ды мерсь тензэ: «Азоро! Бути малавиксэм яла сови пежетьс монь каршо, сестэ зяроксть монень эряви нолдамс пежетензэ? Натой сисемксть?»

<sup>22</sup>Иисус мерсь каршонзо: «Аволь ансяк сисемксть, а вана сизьгемень сисемксть.

<sup>23</sup>Менельсэнтэ Инязорксчизэ моли истямо тев ёнов: ульнесь инязор, кона арсесь вешемс пандомат эсензэ тевень ветия важотнень пельде.

<sup>24</sup>Зярдэ сон ушодсь пандовкстнэнь ловомо, ветясть тензэ ве важо, конанень эривсь тензэ пандомс кемень тѣжат талантт.

<sup>25</sup>Ансяк важонтень пандомс ульнесь а мейсэ, ды инязорось мерсь саезенть пандомга миёмс урекчис сонсензэ, нинзэ ды эйкакшонзо весе уликсчинзэ марто.

<sup>26</sup>Сестэ важось прась пильгезэнзэ, энялдозь тензэ кортась: “Инязор! Учок зяркак, весе тетя пандсынъ!”

<sup>27</sup>Инязорось ульсь седеймарикс се важонтень, олякстомтызе сонзэ ды пандомантькак нолдызе.

<sup>28</sup>Важось лиссь, вастызе лия важо ялганзо, конанень эривсь тензэ пандомс сядо динарт. Тона кундызе ялганзо кирьгадо, кармась эйсэнзэ повамо, сонсь кортась: “Велявтыть весе, мезе сайтъ!”

<sup>29</sup>Ялгазо, кумажа лангс празь, энялдсь тензэ: “Учок зяркак, весе тетя пандсынъ!”

<sup>30</sup>Ансяк тонань арасель мелезэ учомс. Сон мольсь ды пандовксонтъ велявтомазонзо озавтовтызе сонзэ пекстамо кудос.

<sup>31</sup>Тень неизь лия важо ялганзо, конатнень сайнзе покш мельсапаро. Сынъ мольсть ды ёвтнизь инязоронтень весементь, мезе теевсь.



<sup>32</sup>Сестэ инязорось тердизе те важонть ды мерсь тензэ: “Нулгодькс важо! Тонь энялдомат коряс мон весе пандовксот-долкот нолдыя.

<sup>33</sup>Арази аволь эряво тонетькак улемс истямо седеймарикс эсь важо ялгатень, кодамо седеймарямо мон путынь тонеть?”

<sup>34</sup>Инязорось пек кежиявтсь ды максызе сонзэ муцямс пекстамо кудос весе пандовксонть велявтомазонзо.

<sup>35</sup>Истямо ладсо Монь менелень Тетямгак теи тынк марто, а нолдындерясынк седейсэнк эсь малавиксэнк пежетензэ».

## Матфея 19

### Явомадо

<sup>1</sup>Зярдо Иисус прядынзе неть валтнэнь, сестэ Сон тусь Галилеясто ды сась Иудеянь масторс Иордан леенть омбоце пелев.

<sup>2</sup>Мельганзо мольсть ламо ломанть. Сон сынст шумбралгавтнесь тосо.

<sup>3</sup>Састь ваксозонзо фарисейть ды, Сонзэ снартнемань-варчавтнемань кисэ, кевкстизь: «Мери-арась Коесь цёрантень явомс нинзэ эйстэ эрва кодамо тувталонь коряс?»

<sup>4</sup>Иисус мерсь каршост: «Арази эзиде ловно Пазонь Сёрмадовксстонть: Инешкесь-Теицясь ушодовома шкасто теинзе цёрантькак ды авантькак.

<sup>5</sup>Седе тов Пазось корты: “Секскак цёрась кадсынзе тетянзо-аванзо, сюлмави нинзэ марто, ды сынь кавонест теевить вейке рунгокс”.

<sup>6</sup>Мейле кармить уleme аволь кавто, а вейке ломанькс. Лисни, мезенть Пазось вейс сюлмизе, сень ломанесь илязо явно».

<sup>7</sup>Фарисейтне кевкстизь сонзэ: «Мекс эно сестэ Моисей макссь кармавтома: максомс нинтень явомадо конёв ды явомс эйстэнзэ?»

<sup>8</sup>Иисус ёвтась каршост: «Моисей мерсь тенк явомс нинк эйстэ калгодо седеенк кувалма, ансяк васняк ульнесь аволь истя.

<sup>9</sup>Мон вана кортан тенк: кие яви нинзэ эйтэ аволь усксеема тувталонь кувалма ды урваксты лия лангс, се ускури. Кие урваксты явозенть лангс, сеяк ускури».

<sup>10</sup>Тонавтницянзо мерсть тензэ: «Бути те ули вейкине тувталокс, конань кувалт мирдесь яви нинзэ марто, сестэ седе паро а урвакстомскак».

<sup>11</sup>Иисус мерсь каршост: «Аволь эрвантень саевить превс неть валтнэ, ансяк сенень, кинень те максозь Пазонтъ пельде.

<sup>12</sup>Улить цёрат, конат чачить урвакстомо амаштовицякс, улить истяткак, конатнень урвакстомо амаштовицякс тейсызь лия ломанть, ды улить истяткак цёрат, конат а урвакстыть Менельсэнтъ Инязорксчинзэ кисэ. Кинень те саеви превс, кадык истя теияк».

#### **Иисус чансти-баслави эйкакшт**

<sup>13</sup>Сестэ Иисуснэнь ветясть эйкакшт, конатнень лангс вешсть путомс кедензэ ды озномс кисэст. А вана тонавтницянзо кардасть ветицятнень.

<sup>14</sup>Иисус кортась тонавтницянстэнь: «Нолдтнеде эйкакштнэнь Монень, илядо карда эйсэст, эдь истятнэнь ули Менельсэнтъ Инязорксчист».

<sup>15</sup>Иисус путынзе эйкакштнэнь лангс кедензэ ды мейле тусь тосто.

#### **Сюпавонь идевемадо**

<sup>16</sup>Весть Иисус ваксс сась ве ломань ды кевкстизе Сонзэ: «Паро тонавтыця, кодамо паро тев эряви теемс монень пингеде пингень эрямонтень совамга?»

<sup>17</sup>Сон мерсь тензэ: «Мекс тон Монень “паро” мерят? Паздо башка кияк парокс а эрси. Улиндеряй мелеть совамс пингеде пингень эрямос, эряк кармавтокстнэнь коряс».

<sup>18</sup>Сон кевкстсь: «Кодат кармавтокстнэнь коряс?» Иисус ёвтась: «Иля маштне, иля ускуря, иля сала, иля кенгеле,

<sup>19</sup>ловт ломанькс тетять-авать, вечкть малавиксэть кода эсь прят».

<sup>20</sup>Од ломанесь мерсь тензэ: «Весе тень мон топавтан од пингестэ саезь. Мезе эно зярс тень а саты?»

<sup>21</sup>Иисус мерсь тензэ: «Улиндеряй мелеть теевемс педэ пес Пазонь кунсолыцякс, сестэ азё, микшник весе ули-парот. Ярмактнень явшить пурныцятнень ланга. Сестэ карми улеме теть сюпавчи менель лангсо. Теде мейле сак ды мольть Монь мельга».

<sup>22</sup>Неть валтнэнь марязь, од ломанесь тусь нусмакадозь: эдь вельть ламоль сонзэ ули-парозо.

<sup>23</sup>Иисус мерсь тонавтницянстэнь: «Видестэ мерян тенк: стака сюпав ломаннень максомс прынзо Менельсэнтъ Инязорксчинтень!

<sup>24</sup>Таго мерян тенк: сюпав ломанентень пек стака совамс Пазонь Инязорксчинтень, седе шожда верблюдонтень салмуks варява ютамс».

<sup>25</sup>Тень марямсто тонавтницянзо пек дивазевсть ды мерсть: «Кинень эно сестэ идеви?»

<sup>26</sup>Иисус видьстэ варштась лангозост ды мерсь тенст: «Ломанентень те а тееви, а вана Пазонтень тееви весе».

<sup>27</sup>Сестэ Петра мерсь каршонзо: «Вана минь кадынек весементь ды туинек Тонь мельга. Мезе тень кисэ максови тенек?»

<sup>28</sup>Иисус мерсь тенст: «Кемеде Монень: зярдэ одкстоми весе масторлангось ды Ломантнень Цёрась озы Эсь инексчисэнзэ инязоронь тарканзо лангс, сестэ тыньгак, Монь мельга молицятне, озатадо азорксчинь кемгавтово таркатнень лангс ды карматадо улеме Израилень кемгавтово буетнень лангсо прявтокс-судиякс.

<sup>29</sup>Эрвась, кие Монь кисэ кадсы кудонзо, лелянзо-ялаксонзо, патянзо-сазоронзо, тетянзо-аванзо, нинзэ, эйкакшонзо эли паксянзо, сенень максови сядонь кирда, ды сон сови пингеде пингень эрямос.

<sup>30</sup>Ды ламот, конат те эрямосонтъ васенцеть, теевить меельцекс, а вана меельцетне — васенцекс».

## Матфея 20

### Винаумарькс пиресэ важодицядо валвелявкс

- <sup>1</sup>«Менельсэнтъ Инязорксчизэ моли истямо тев ёнов. Кудазорось лиссь валске ланга важонь сиведеме эсь винаумарькс пиресэнзэ важодеме.
- <sup>2</sup>Важотнень марто ладизе пандомс чинь важодемань кисэ вейке динар ды кучинзе винаумарькс пирезэнзэ.
- <sup>3</sup>Вейксэце чассто сон таго лиссь ошкужов, несъ тосто тевтеме аштиця лия ломанть.
- <sup>4</sup>Сон мерсь сетнененьгак: “Азёдо тыньгак важодеме монь пирев, зяро тенк сави — пандса”. Сеть тусть.
- <sup>5</sup>Таго азорось лиссь кемгавтовоце ды колмоце часстояк, теизе текень.
- <sup>6</sup>Ды уш ветеце чассто сон таго лиссь ошкужов ды сестэяк мусь тевтеме лия аштицят. Сетнененьгак кевкстинзе: “Мекс тынь чинь чоп аштетядо тесэ тевтеме?”
- <sup>7</sup>Сынь ёвтась каршонзо: “Минек кияк эзимизь сиведе”. Сон мерсь тенст: “Азёдо тыньгак важодеме монь винаумарькс пирев. Мезе тенк сави — пандса”.
- <sup>8</sup>Зярдосась чокшнесь, сестэ азорось мерсь кудонь тевень веттицянстэнь: “Тердить важотнень ды пандт тенст важодемань кисэ питне. Ушодык пандоманть меельцекс сиведезтнестэ, а вана прядык васенцекс сиведезтнесэ”.
- <sup>9</sup>Сась ветеце чассто сиведезтне, эрвантень пандсть вейке динар.
- <sup>10</sup>Васенцекс сиведезтне арсесть: сыненст пандыть седе ламо. Ансяк зярдосынь сась, сыненсткак макссть вейке динар.
- <sup>11</sup>Сонзэ саемстэ сынь кармасть азоронть лангс музгордеме:

<sup>12</sup>«Нетъ меельцетне важдождь ансяк ве час, минь кирдинек чинь псинть ды стаканть, а вана тон ялатеке пандыть тенст зняро жо, зяро миненек!»

<sup>13</sup>Кудазорось сынст эйстэ вейкенть каршо мерсь: «Ялгай! Мон а вадрякс тонь икеле эзинь лисе. Натъ аволь динардо тон сиведить важдодеме?»

<sup>14</sup>Саик тонсетенть ды азё. Монь мелем те меельцентеньгак пандомс зняро жо, зяро тонеть.

<sup>15</sup>Натъ монсень ярмак марто а тееван эсь мелень коряс? Эли тонь сельметь сявады монь вадрякс улеманть лангс?»»

<sup>16</sup>Ды Иисус истямо валсо прядызе кортамонзо: «Истя, меельцетне теевить васенцекс, а вана васенцетне — меельцекс. Ламо тердестнеде, ансяк аламо кочказтнеде».

#### **Иисус колмоцеде ёвты куломадонзо**

<sup>17</sup>Ерусалимев куземстэ Иисус тердинзе ве ёнов кемгавтово тонавтницянзо, модемстэ кортась тенст:

<sup>18</sup>«Вана минь мольтяно Ерусалимев, тосо Ломантнень Цёрась ули максозь попонь покштнэнь ды Койс тонавтыцятнень кедьс, конат Сонзэ судясызь куломас.

<sup>19</sup>Сынъ макссызь Сонзэ лия раськень ломантнень кедьс нарьгамс, локшосо керямс ды крёст лангс вачкодемс. Ансяк мейле колмоце чистэ Сон кулозьстэ вельми».

#### **Зеведеень нинзэ вешемазо**

<sup>20</sup>Мейле Иисус ваксс мольсь Зеведеень низэ кавто цёранзо марто. Авась сюконясь Иисуснэнь ды мезе-бути вешиксэль Сонзэ кедьстэ.

<sup>21</sup>Иисус кевкстизе: «Мезе тетъ эряви?» Сон мерсь тензэ: «Алтака нетъ монь кавто цёратненень озамс вейкентень Тонь вить кедь ёнов, омбоцентень керш кедь ёнов Тонь Инязорксчисэть».

<sup>22</sup>Иисус кортась цёратненень: «Аздатадо, мезе вештядо. Саты а саты нарденок симемс се пиштемань кеченть, конань Мон симан ды

нававтовомс се пиштемань нававтомасонтъ, конаньсэ Мон нававтован?» Сынъ мерсть тензэ: «Саты нарденек».

<sup>23</sup>Иисус мерсь тенст: «Монь пиштемань кеченть, нама, тынь симсынк ды нававтомасонтъкак, конаньсэ Мон нававтован, ультядо нававтозь, а вана вить ёнов ды керш ёнов озамонь максомась аволь Монь олясо. Нетъ таркатне максовить сетненень, кинень сынст анокстынзе Монь Тетям».

<sup>24</sup>Зярдэ тень маризь лия кемень тонавтницятне, сынъ пек ацирьгадсть кавонест лангс.

<sup>25</sup>Иисус весе сынст пурнынзе ды мерсь: «Тынь содатадо: весе раськень прявтнэ аштить азорокс эсест раськетнень лангсо, ине ветицятнеяк кирдить эйсэст кедест ало.

<sup>26</sup>Тынк ютксо истя илязо уле! Мекевланк: кинь мелезэ улемс тынк ютксо весемеде покшокс, се улезэ лиятненень важокс,

<sup>27</sup>кинь мелезэ улемс тынк ютксо васенцекус, се улезэ лиятненень урекс .

<sup>28</sup>Ломантнень Цёраськак сась аволь Эстензэ важодевтеме, мекевланк, Сонсь сась важодеме ды максомо Эсь эрямонзо весень идемаст-рамамоост кисэ».

#### **Кавто сокоронь шумбралгавтома**

<sup>29</sup>Зярдэ Иисус ды Сонзэ тонавтницянзо лисильть Ерихонсто, сынст мельга мольсть ламо ломанть.

<sup>30</sup>Тосо ки чиресэ озадо аштеть кавто сокорт. Сынъ марясть вакскаст Иисусонь ютамодо ды кармасть пижнеме: «Давидэнь Цёра, Азоро! Ульть седеймарикс миненек!»

<sup>31</sup>Ломантне кармавтсть эйсэст чатьмонеме, ансяк сынъ седейк пек пижнеть: «Давидэнь Цёра, Азоро! Ульть седеймарикс миненек!»

<sup>32</sup>Иисус лоткась, тердинзе сынст ды кевкстинзе: «Мезе меленк теевтемс Монь кедьстэ?»

<sup>33</sup>Сынь мерсть: «Азоро, меленек: кармаст нееме сельменек!»

<sup>34</sup>Иисусонь сянгордозевсь кисэст седеезэ ды сон токинзе сынст сельмест. Сокортнэ сеске кармасть нееме ды тусть Иисус мельга.

## Матфея 21

### Иисус ласте сови Ерусалимс

<sup>1</sup>Зярдэ Иисус тонавтницяно марто састь Ерусалим малав, сын пачкодсть Бетфагия велес, кона ашти Ойумарькс пандонть чиресэ. Иисус кучинзе икелев кавто тонавтницяно

<sup>2</sup>ды мерсь тенст: «Азёдо икеленк аштиця велентень. Тосо тынь сеске нетядо содозь авака осёл вашо марто. Юкстинк сонзэ ды ветинк сынст Монень.

<sup>3</sup>Кияк мериндеряй тенк мезеяк, сестэ ёвтадо: “Сынь эрывать Азоронтень, — Сон сеске сынст велявтсынзе”».

<sup>4</sup>Весе те истя теевсь вана мекс: эрятьсь топавтовомс валтнэненъ, конатненъ Азорось икеле ёвтынзе пазмариця вельде:

<sup>5</sup>«Ёвтадо Сион тейтерентень: Вана сы тетъ Инязорот! Сон сэтьме ды юты ласте од осёл лангсо, стака канстонъ ускицянтъ вашонзо лангсо».

<sup>6</sup>Тонавтницятне тусть ды тейсть истя, кода тенст мерсь Иисус.

<sup>7</sup>Ветясть авака осёл вашо марто, вельтизь лангост эсь оршамопельсэст, ды Иисус озась лангозост.

<sup>8</sup>Ламо ломанть ацнестъ эсь оршамопелест кинть ланга, лиятне керсестъ чувтосто тарадт ды ацнестъ эйсэст ки лангонть.

<sup>9</sup>Иисус икеле ды мельга молиция ломантне сеерестъ: «Осанна Давидэнь Цёранстэнь! Улезэ чанстязь-баславазь Азоронтъ лемсэ Сыцясь! Осанна Верепазонтень!»

<sup>10</sup>Зярдю Исус совась Ерусалимс, весе ошось шалнозевсь ды ломантне кевкстнеть: «Те кие?»

<sup>11</sup>«Те Исус, Галилеянь Назаретстэ пазмариця», — ёвтнеть мартонзо сазтне.

### **Исус Пазонь кудосо**

<sup>12</sup>Исус совась Пазонь кудонь пирявксонть потс ды панинзе тосто весе микшнициятнень-рамсициятнень. Сон сявордтнинзе ярмаконь полавтничиятнень столест ды гулькань микшнициятнень эземест.

<sup>13</sup>Сонсь кортась тенст: «Пазонь Сёрмадовкссонть ёвтазь: “Монь кудонтень кармить мереме ознома кудо”, а вана тынь теинк сонзэ салыциянь-маштничиянь пизэкс».

<sup>14</sup>Пазонь кудосонть мольсть ваксозонзо сокорт, ёколдыцят, — Сон сынст шумбралгавтынзе.

<sup>15</sup>Попонь покштнэ ды Койс тонавтыцятне пек кежиявтсть, кода неизь Сонзэ теевть тамашатнень ды эйкакштнэнь, конат сеереть Пазонь кудосонть: «Осанна Давидэнь Цёранстэнь!»,

<sup>16</sup>ды мерсть Исуснэнь: «Марясыть, мезть сынь пижнить?» Исус мерсь тенст: «Эно, марян! Арази тынь зярдояк эзиде ловно Пазонь Сёрмадовкссото: “Вишка ды потиця эйкакшонь кургсо Тон анокстыть Эстетъ ванькс шнамо”?»

<sup>17</sup>Исус кадынзе сынст тоско, лиссь ошстонть ды тусь Бетанияв, косо печтизе вентькак.

### **Исус ды инжир чувто**

<sup>18</sup>Валске, ошов велявтомсто, Исусонь вачсь пекезэ.

<sup>19</sup>Ки чирестэ сон несъ инжир чувто, мольсь ваксозонзо, ансяк лопадо башка мезеяк лангстонзо эзь муе. Сестэ Исус мерсь чувтонть: «Кадык зярдояк тонь лангсо а улить инжирт!» Инжир чувтось сеске коськсь.



<sup>20</sup>Зярдо тонавтницятне тень неизь, пек дивазевсть: «Мекс истя сеске инжир чувтось коськсь?»

<sup>21</sup>Иисус каршост мерсь: «Кемеде Монень: карминдеряй уleme кемеманк, ды а карминдерятадо кавтолдомо, сестэ тейсынк аволь ансяк сень, мезе Мон теинь инжир чувтонть марто. Мериндерятадо сестэ натой те пандонтень: “Кепедевть ды ёртовт иневедьс!” — истя улияк.

<sup>22</sup>Весе, мезе озномсто кемезь вештядо, максозь ули тенк».

### **Иисусонь азорксчиде кевкстемась**

<sup>23</sup>Зярдо Иисус таго совась Пазонь кудонь пирявксонть потс ды тосо кармась тонавтомо, мольсть ваксозонзо попонь покштнэ ды прявтнэ, кевкстизь: «Кодамо азорксчисэ теят Тон неть тевтнень? Кие максызе Теть те азорксчинть?»

<sup>24</sup>Иисус мерсь каршост: «Монгак максан тенк вейке кевкстема. Ёвтындерятадо Монень, Монгак ёвтаса тенк, кодамо азорксчисэ Мон теян неть тевтнень.

<sup>25</sup>Иоаннонь нававомась косто ульнесь? Менельстэ эли ломантнень пельде?» Сынь кортнесть эсь ютковаст истя: «Мериндерятано: “Менельстэ”, — Иисус кевкстьсамизь: “Мекс эно эзиде кеме тензэ?”

<sup>26</sup>Мериндерятано: “Ломантнень пельде”, — пельтяно ломантнеде, эдь Иоаннонь весе ловить пазмарицякс».

<sup>27</sup>Секс мерсть Иисусонь каршо: «А содатано». Сестэ Иисус сынст каршо мерсь: «Монгак а ёвтан тенк, кодамо азорксчисэ теян неть тевтнень».

### **Кавто цёрадо валвелявкс**

<sup>28</sup>Иисус поладызе кортамонзо: «Мезе ёвтатадо истямо тевенть кувалма? Ве ломаненть ульнесть кавто цёранзо. Сон мольсь васенценть ваксс ды мерсь: “Цёрам, азё течи важдоть винаумарькс пиресэ”.

<sup>29</sup>А вана се каршонзо мерсь: “А молян”. Ансяк мейле янксезевсь ды тусь винаумарькс пирев.

<sup>30</sup>Тетясь мольсь омбоценть ваксс ды ёвтызе текень. Се каршонзо мерсь: “Нама, тетяй, молян”. Ансяк сонсь эзь моле.

<sup>31</sup>Кона кавтост ютксто топавтызе тетяст мелензэ?» Сынъ мерсть Тензэ: «Васенцесь». Иисус мерсь тенст: «Кемеде Тень: каявксонь-налогонь пурныцятне ды ускуриця аватне тынденк икеле совить Пазонть Инязорксчинтень.

<sup>32</sup>Эдь Иоанн сакшнось видечинь кинь невтеме, а вана тынь эзиде кеме тензэ. Ансяк каявксонь пурныцятне ды ускуриця аватне кемсть тензэ. Тынь тынсь тень неинк ды ялатеке эзиде янксе ды эзиде кеме тензэ».

### **Винаумарькс пире мельга якицядо валвелявкс**

<sup>33</sup>Иисус яла кортась: «Кунсолодо лия валвелявкс: ульнесь вейке видиця-сокиця азор. Сон озавтсь винаумарькс пире, пиризе пирявтсо, эйзэнзэ чувсь винаумарень чемерямо латко, тейсь ванстома башня ды сиведсь пиренть мельга якицят. Сонсь тусь лия масторов.

<sup>34</sup>Зярдо сась винаумарень пурнамо шкась, сестэ сон кучинзе важонзо сиведезь якицятненень таликанзо кисэ.

<sup>35</sup>Сиведезь якицятне кундызь сонзэ важотнень, вейкенть ваткизь-киськедизь, омбоценть маштызь, колмоценть жо чавизь кевсэ.

<sup>36</sup>Азорось таго кучсь лия важот, васенцетнеде ламо. Сынст мартояк сынъ тейсть истя.

<sup>37</sup>Окойники сон кучизе эсензэ цёранзо, арсезь: “Паряк монъ цёранть эйтэ визделгадыть”.

<sup>38</sup>Ды зярдо винаумарь пирень мельга якицятне неизь цёранть, мерсть вейкест-вейкест туртов: “Те буень поладыцязо. Аядо, маштсынек сонзэ, ды сонензэ кадовикс весе ули-парось ули минек!”

<sup>39</sup>Сонзэ кундызь, винаумарь пирестэнтъ вырновтызь ды маштызь.

<sup>40</sup>Зярдо велявты пирень азорось, мезе теи неть сиведезь якицятнень марто?» — кевкстинзе Иисус.

<sup>41</sup>Сынъ мерсть каршонзо: «Нетъ лия ломанень пиштевицятнень сон макссынзе стака пиштемань куломас. А вана винаумарь пирес сиведи лия якицят, конат кармить максомо тензэ таликанзо аравтозь шкасто».

<sup>42</sup>Иисус мерсь тенст: «Арази тынь зярдожк эзиде ловно Пазонь Сёрмадовкссто: “Се кевесь, конань ёртызь кудонь теицятне, теевсь ужонь-уголонь кирдиця юр кевекс. Тень теизе Азорось, ды миненек сон неяви тамашак”?»

<sup>43</sup>Иисус кортась: «Секскак мерян тенк: саезь ули эйтэнк Пазонть Инязорксчизэ ды максозь ули се раськентень, кона карми кастомо сонзэ алкуксонь умарть.

<sup>44</sup>Эрвась, кие пры те кевенть лангс, томбави, ды кинь лангс кевесь пры, сень лепштысы».

<sup>45</sup>Зярдо попонь покштнэ ды фарисейтне кунсолость Иисусонь валвелявкстнэнь, сестэ сынъ чарькодсть: кортамось моли сынст кувалма.

<sup>46</sup>Сынст ульнесь мелест кундамс Иисусонь, ансяк пельсть ломантнеде. Весе Иисусонь ловсть пазмарицякс.

## Матфея 22

### Урвакстомань каванямодо валвелявкс

<sup>1</sup>Иисус таго кортась попонь покштнэненень ды фарисейтненень валвелявкссо:

<sup>2</sup>«Менельсэнтъ Инязорксчизэ моли вана кодамо тев ёнов: вейке инязор тейсь цёранзо туртов урвакстомань каванямот.

<sup>3</sup>Сон кучинзе важонзо пурнамс каванямос сетнень, конатнень тердинзе, ансяк сынст арасель мелест самс.

<sup>4</sup>Сон таго кучсь лия важот ды мерсь ёвтамс тердезтненень: “Вана монь каванямом уш анок. Букан ды андонь вазон печкезь, весе лияськак анок. Садо урвакстомань каванямос!”

<sup>5</sup>Тердезтне сонзэ тердеманзо лангс ялатеке эзть вано, ды эрьвась тейсь эсь тевензэ: вейкесь тусь эсь паксязонзо, омбоцесь микшнема кудозонзо.

<sup>6</sup>А вана лиятне кундызь сонзэ важотнень, нарьгизь сынст ды маштызь.

<sup>7</sup>Тень марязь, инязорось пек кежиявтсь. Сон кучинзе эсь ушманонзо, конат маштнизь чавицятнень ды пултызь ошост.

<sup>8</sup>Сестэ сон мерсь эсь важонстэнь: “Урвакстомань каванямось анок, ансяк тердезтне тезэнь эзть ладя.

<sup>9</sup>Секскак, азёдо покш ки лангс ды весень, кинь васттадо, тердинк каванямос”.

<sup>10</sup>Важотне лиссть ки лангс ды пурнызь весень, кинь вастсть: партнэньгак, берянтненьгак. Весе каванямо кудось пештявсь инжеде.

<sup>11</sup>Зярдэ инязорось совась инжетнень варштамо, несь юткстост аволь покшчинь оршамопельсэ ломань.

<sup>12</sup>Сон кевкстизе сонзэ: “Ялгай, кода истя тон сыть тей аволь покшчинь оршамопельсэ?” Се чатьмонсь.

<sup>13</sup>Сестэ инязорось мерсь важотненень: “Кедензэ-пильгензэ сьулмсинк, ёртынк тестэ ушов, чопода таркас, косо ломантне кармить авардеме ды пейсэст чикордомо”».

<sup>14</sup>Иисус прядызе ёвтнеманзо истямо валсо: «Тердезтнеде ламо, ансяк аламо кочказтнеде».

### **Кесарнень каявкс**

<sup>15</sup>Сестэ фарисейтне тусть ды вейсэ арсесть, кода Иисусонь кундамс вал лангсо.

<sup>16</sup>Сынь кучизь зяряя тонавтницяст Иродонь ломантнень марто Иисусонь кевкстеме: «Тонавтыця, минь содатано, Тон кортат ды теят видестэ ды видестэ тонавтат Пазонь кинтень, киненьгак савтомадо а арсят ды кодамояк ломань а яват.

<sup>17</sup>Ёвтака тенек сестэ, кода арсят: эряви-арась Римень кесарнень каявкс пандомс?»

<sup>18</sup>Иисус, нама, чарькодизе сынст ёжовчист ды мерсь тенст: «Чачонь полавтницят! Мекс снартнетядо-варчавтнетядо Эйсэнь?»

<sup>19</sup>Невтинк ярмаконтъ, конасо тынь каявкс пандтадо!» Сынъ кандсть Тензэ динар ярмак,

<sup>20</sup>ды Сон кевкстинзе сынст: «Кинь чамась ды лемесь сонзэ лангсо?»

<sup>21</sup>Сынъ мерсть каршонзо: «Кесарень». Сестэ Иисус мерсь тенст: «Лисни: максодо кесарнень кесаренсентъ, а вана Пазонтень — Пазонсентъ».

<sup>22</sup>Зярдю маризь неть валтнэнь, сынъ пек дивазевсть, кадызь Иисусонь ды тустъ.

#### **Кулозьстэ вельмемадо**

<sup>23</sup>Секе чистэнтъ Иисуснэнь састъ саддукейть, конат кулозьстэ вельмемантень а кемилить, ды кевкстизь Сонзэ:

<sup>24</sup>«Тонавтыця! Моисеень Койсэнтъ ёвтазь: “Бути цёрась, конань арасть эйкакшонзо, кулы, сестэ сонзэ ялаксозо урвакстозо нинзэ лангс ды сынъ чачтост эйкакш. Истя те эйкакшось ули ловозь кулозь лелянтъ эйкакшокс”.

<sup>25</sup>Вана истямо тев: эрясть минек ютксо сисем лелят-ялакст. Васенцесь урвакстозель. Сон кулось эйкакштомо. Ялаксозо урвакстсь нинзэ лангс.

<sup>26</sup>Истя теевсь омбоцентъ мартояк, колмоцентъкак ды весе сисемтнень марто.

<sup>27</sup>Весемеде мейле кулось ниськак.

<sup>28</sup>Сестэ, зярдю сынъ кулозьстэ вельмить, конанень неть сисемтнень эйтэ ули сон никс? Эдь сон эрвантень ульнесь никс».

<sup>29</sup>Иисус каршост мерсь: «Нама, тынк тапи-човори Сёрмадовкстнэнь ды Пазонь виентъ а содамось!

<sup>30</sup>Зярдо кулозтне вельмить, сестэ а урвакстнить, мирдененьгак а лиснить. Сынь кармить эрямо кода менельсэ Пазонь ангелтнэ.

<sup>31</sup>А вана кулозьстэ вельмеманть кувалма арази эзиде ловно, мезе тенк мерсь Пазось? Сон мерсь:

<sup>32</sup>“Мон Авраамонь Пазан, Исаконь Пазан ды Яковонь Пазан”. Лисни, Пазось эрицятнень Паз, аволь кулозтнень».

<sup>33</sup>Тень марязь ломантне дивсесть Иисусонь тонавтомантень.

#### **Сехте ине кармавтоксоь**

<sup>34</sup>Зярдо фарисейтне марязь, кода Иисус саддукейтнень кургост потомдынзе, сынь вейсэ мольсть Иисуснэнь.

<sup>35</sup>Сестэ юткост вейкесь, Койс тонавтыця, арсесь кундамс Иисусонь вал лангсо ды кевкстизе:

<sup>36</sup>«Тонавтыця! Койсэнтъ кона кармавтоксоь весемеде покш?»

<sup>37</sup>Иисус мерсь тензэ: «Вечкть Азоронтъ, эсь Пазот, весе седейсэть, весе оймесэть, весе превсэть-содавкссот».

<sup>38</sup>Те васенце ды весемеде покш кармавтоксоь.

<sup>39</sup>Омбоцеськак тень кондямо покш: “Вечкть малавиксэть кода эсь прят”.

<sup>40</sup>Нетъ кавто кармавтокстнэнь лангс нежедить весе Коеь ды пазмарицятнень тонавтомаськак».

#### **Давидэнь цёразо ды Давидэнь Азорозо**

<sup>41</sup>Зярдо фарисейтне ульнестъ яла Иисус вакссо, Сон кевкстинзе сынст:

<sup>42</sup>«Мезе тынь арсетядо Пазонь кучовт Идицядонть? Кинь цёракс Сон ули?» Сынь мерсть каршонзо: «Давидэнь цёракс».

<sup>43</sup>Иисус кевкстинзе: «Мекс эно Давид инязорось, Пазонь Оймеялтонть ветямонзо коряс, мери Тензэ — Азоро? Эдь Давид кортась:

<sup>44</sup> “Азорось мерсь монь Азоронтень: Озак Монь вить кедь ёнов, зярс Мон а тейсынъ Тонь душманот пильгеть путома таркак”.

<sup>45</sup>Истя эно, бути Давид мери Идицянтень Азоро, кода сестэ Сон ули тензэ цёракс?»

<sup>46</sup>Иисусонь каршо киненьгак вал эзь ёвтаво. Те чиденть мейле киньгак эзь сатно смелчизэ макснемс Иисуснэнь кодаткак кевкстемат.

## Матфея 23

### Прянь покшкавтнамадо

<sup>1</sup>Мейле Иисус кармась кортамо ломантненень ды тонавтицянтэнь:

<sup>2</sup>«Койс тонавтыцянтненень ды фарисейтненень ней максозь азорксчи панжомс Моисеень Коенть смустензэ.

<sup>3</sup>Секскак тынь, нама, кунсолодо сынст ды тееде истя, кода сынь мерить. Ансяк сынст тевест кувалт илядо тее, сынь сынсь а топавтыть сень, мезде кортыть.

<sup>4</sup>Сынь сюлмсить стака ды а кандовикс сталмот, конатненень путнесызь ломантненень лавтовост лангс, сынсь жо сурсост а сыржавтыть тенст лездамга.

<sup>5</sup>Весе тевест сынь теить ансяк ломанненень невтемга. Кодат покшт ды келейть Пазонь Сёрмадовкс марто коробкинет ды кодат кувакат оршамопельсэст цёкотне!

<sup>6</sup>Сынь вечкить каванямо кудосо васенце таркатнесэ ды синагогасо икеле таркатнесэ озадо аштеманть.

<sup>7</sup>Сынь истя жо вечксызь, зярдэ ошкужосо ломантне шумбракстнить мартост ды мерить тенст: “Тонавтыцям!”

<sup>8</sup>А вана тыненк кадык а мерить “тонавтыцям”. Эдь тынк ансяк вейке Тонавтыцянк — Христос, ды тынь весе ансяк кемиця ялгат.

<sup>9</sup>Киненьгак масторлангсо илядо мере лововикс лемсэ “тетя”. Эдь тынк ансяк вейке Тетянк, кона менель лангсо.

<sup>10</sup>Кадык а мерить тенк “превспутыця”. Эдь тынк ансяк вейке Превспутыцянк — Христос.

<sup>11</sup>Кие тынк ютксо сехте покшось, се улезяк лиятненень важокс.

<sup>12</sup>Эрвась, кие эсь прынзо покшкавтни, се ули валтозь алов, а вана кие эсь прынзо вишкиньгавтни, се ули кепедезь верев».

### **Иисус ливти лангс чачонь полавтницятнень**

<sup>13</sup>«Зыян тенк, Койс тонавтыцят ды фарисейть, чачонь полавтницят! Тынь пекстнетядо Менельсэнтъ Инязорксчинзэ кенкшентъ ломантнень чамаст икеле. Тынськак а соватадо, ды совамо бажицятненьгак а нолдатадо.

<sup>14</sup>Зыян тенк, Койс тонавтыцят ды фарисейть, чачонь полавтницят! Тынь довань кудотнень нельгтядо ды прынк невтемань кисэ кувать ознокшнотадо. Тень кисэ тынь седеяк стакасто судязь ультядо.

<sup>15</sup>Зыян тенк, Койс тонавтыцят ды фарисейть, чачонь полавтницят! Тынь ютасынк иневедентъ ды масторлангонть кемемазонк ве ломанень совавтомань кисэ. Зярдэ совавтови, тейсынк сонзэ тоначинь толс ёртома ломанекс, эстеденк кавксть седе берянекс.

<sup>16</sup>Зыян тенк, сокор ветицят! Тынь тонавттадо: “Кие божи-пежетьксты Пазонь кудонть эйсэ, сень кедьстэ а вешеве алтамонть топавтома, а вана кие божи-пежетьксты Пазонь кудонь сырнентъ эйсэ — се сюлмави эсь алтамонзо марто”.

<sup>17</sup>Вай, превтеме сокорт! Мезесь седе покш: сырнесь эли Пазонь кудось, конасонть сырнеськак алтави Пазонтень?

<sup>18</sup>Тынь таго тонавттадо: “Кие пежетьксты алтарентъ эйсэ — сень кедьстэ а вешеве алтавоксонть топавтома, а вана кие пежетьксты казненъ эйсэ, кона алтарентъ лангсо — се сюлмави эсь алтавоксонзо марто”.

<sup>19</sup>Вай, превтеме сокорт! Мезесь седе покш: казнесь эли алтаресь, конасонть казнеськак алтави Пазонтень?



<sup>20</sup>Секскак, кие пежетьксты алтаренть эйсэ, се пежетьксты алтаренть эйсэ ды весемесэнтъкак, мезе сонзэ лангсо.

<sup>21</sup>Ды кие пежетьксты Пазонь кудонтъ эйсэ, се пежетьксты Пазонтъ эйсэяк, Кие тосо эри.

<sup>22</sup>Кие пежетьксты менелентъ эйсэ, се пежетьксты Пазонтъ озамо таркантъ эйсэяк ды сеньсэяк, Кие озадо сонзэ лангсо.

<sup>23</sup>Зыян тенк, Койс тонавтыцят ды фарисейть, чачонь полавтницят! Тынь макстадо Пазонтень кеменце пельксэнтъ натой пиресэ видезь тикшестэяк: мятасто, копёрсто ды аниськасто. Ансяк вана тынь стувттадо Койстэнтъ седе эрявиксэнтъ: видечисэ эрямонтъ, седеймарямонтъ, Пазонтень кемемантъ. Нама, эряви теемс теньгак ды а стувтомс тонаньгак.

<sup>24</sup>Сокор ветицят! Тынь симемапельстэнк сеськентъ педятадо, ансяк верблюдонтъ нильнетядо!

<sup>25</sup>Зыян тенк, Койс тонавтыцят ды фарисейть, чачонь полавтницят! Тынь ванськавтнетядо кечень ды ваканонь ушо ёнкстнэнь, а вана потмост пешксетъ седе, мезентъ тынь сайнк салазь ды манчезь.

<sup>26</sup>Сокор фарисей! Ванськавтык васня кечентъ ды ваканонтъ потмо ёндо, сестэ сынъ улить ванькст ушо ёндояк.

<sup>27</sup>Зыян тенк, Койс тонавтыцят ды фарисейть, чачонь полавтницят! Тынь мольтядо ашосо артозь калмотне ёнов, конат неявить ушо ёндо мазыйкс, ансяк потмост пешксетъ кулозень ловажадо ды наксадыця уловдо.

<sup>28</sup>Истя тыньгак: лангс ваномс ломаннень неявтадо видечисэкс, а потмонк пешксетъ прянк парокс невтемань бажамосо ды зыянов тевсэ».

### **Иисус корты фарисейтнень чумодост**

<sup>29</sup>«Зыян тенк, Койс тонавтыцят ды фарисейть, чачонь полавтницят! Тынь стявтнетядо кевстэ теезь ледстнема тешкст пазмарицятнень калмост ланга ды мазылгавтнетядо видечисэнтнень калмолангост.

<sup>30</sup>Тынь кортатадо: “Бути минь эрявлинек покштятнень шкасто, минь аволинек уле мартост пазмарицятнень верест валомсто”.

<sup>31</sup>Истя вана тынь эсь прянк невтядо пазмарицянь маштницятнень цёракс.

<sup>32</sup>Эно седе товгак поладодо ды прядодо сестэ тетянк тевест!

<sup>33</sup>Тынь гуйть, пупи гуень левкст! Кодаяк а оргодевядо судямодо ды тоначинь толс понгомадо!

<sup>34</sup>Секскак кунсолодо: мон кучан тенк пазмарицят, ламонь содыцят ды тонавтыцят. Веенстнэнь тынь маштсынк эли крёст лангс вачкодъсынк, лиятнень карматадо чавомо синагогасонк ды пансемест ошсто ошс.

<sup>35</sup>Истя тынк лангс пры весе чумось видечисэтнень масторлангс валозь верест кисэ, чумовтомо Авелень верьстэ саезь Баракиянь Захария цёранзо верензэ видьс, конань тынь маштынк Пазонь кудонть ды икелензэ аштиця алтаренть ютксо.

<sup>36</sup>Алкукс кортан тенк: неень пингень ломантненень сави пандомс весе неть чумочитнень кисэ!»

### **Иисус ризны Ерусалимень кисэ**

<sup>37</sup>«Вай, Ерусалим, Ерусалим, тон маштнят пазмарицятнень ды кевсэ чавнат Пазонь кучовт кулянь кандыцятнень! Зяроксть Мон арсинь пурнамс тонь эйкакшот, кода нарвицькась пурны эсь сёлмонзо алов левксэнзэ, ансяк тонь мелеть арасель!

<sup>38</sup>Ды вана, тынк кудонк кадови чавокс.

<sup>39</sup>Кортан тенк: те чистэнтъ саезь Монь а несамизь се шкас, зярс а мертядо: “Улезэ чанстязь-баславазь Азоронть лемсэ Сыцясь!”»

## **Матфея 24**

### Пазонь кудонь калавтомась

<sup>1</sup>Зярдю Иисус лиссь Пазонь кудостонтъ ды туиксэль уш, мольсть Тензэ тонавтницянзо ды тердизь Сонзэ вейсэ ванкшномо Пазонь кудонь весе пирявкс потмонтъ.

<sup>2</sup>Иисус мерсь тенст: «Вантадо те мазычинть лангс? Кемеде тень: весе калавтозь ули, а кадови тезэнь натой кев лангс кевгак».

### Пингень прядовома тешкстнэ

<sup>3</sup>Зярдю Иисус озась Ойумарькс пандонтъ лангс, сестэ мольсть ваксозонзо тонавтницянзо съкамо ст ды кевкстизь: «Ёвтык тенек, зярдю те тееви? Ды кодамо тешксэнь коряс содави Тонь самот ды пингень прядовомазо?»

<sup>4</sup>Иисус мерсь каршост: «Ванодо, кияк аволидизь маня.

<sup>5</sup>Ламот сыть кекшезь Монь лементъ ало, мерить: “Мон — Пазонь кучовт Идицясь”, ды ламотнень ильведстьсызь-манясызь.

<sup>6</sup>Тынь марятадо маласо войнань гайть ды васоло войнадо кулят. Ванодо, илядо тандале: весе тенень эряви улемс, ансяк те зярс аволь песь.

<sup>7</sup>Раське кепедеви раськень каршо, мастор — масторонь каршо, улить вачо иеть, куломань ормат ды таркань-таркань модань сорномат.

<sup>8</sup>Весе неть майсематне ансяк теке чачтомань пиштематнень ушодкост.

<sup>9</sup>Сестэ тынк кармить макснеменк муцямос ды маштнемас. Весе раськень ломантненень ультядо авечкевиксэкс Монь лементъ кисэ.

<sup>10</sup>Сестэ ламотне потыть кемемастост, вейкест-вейкест эйсэ кармить микшнеме, вейкест-вейкест а вечкеме.

<sup>11</sup>Сыть ламо кенгелиця пазмарицят ды ламотнень ильведстьсызь.

<sup>12</sup>Зыянось пек ламолгады, ды секскак ламотнень седейсэ вечкемась лепами-мади.

<sup>13</sup>Кие жо весе тень цидярдсы педэ пес, се ванстови-идеви.

<sup>14</sup>Зярдэ Кенярксов кулясь Пазонть Инязорксчидензэ ёвтнезь ули масторлангонть келес весе раськетненень марямост кисэ, ансяк сестэ сы пингень песь».

### Сыця пиштематне

<sup>15</sup>«Зярдэ несынк иневанькс таркасонть путозь аваньксчинь нулгодьксэнтъ, конадэ кортась Даниил пазмарицясь — ловныцясь чарькодезэ! —

<sup>16</sup>сестэ сеть, конат Иудеясо, оргодест пандо лангов.

<sup>17</sup>Кие кудо лангсо — илязо валго кудос мезеньгак саеме.

<sup>18</sup>Кие паксясо, илязо велявто мекев кудов оршамонзо мельга.

<sup>19</sup>Кодамо стака ули сеть читнестэ пешкесэстненень ды потесэ эйкакшонь андыцятненень!

<sup>20</sup>Ознодо, илязо уле тынк оргодемась тельня эли оймсема чине.

<sup>21</sup>Эдь сестэ ули истямо стака пиштема, кодамо арасель пингентъ ушодовомсто течис, ды зярдояк а ули.

<sup>22</sup>Бути авольть уле аламолгавтозь сеть читне, сестэ кияк аволь ванстово. Ансяк кочказтненень кисэ сеть читне аламолгавтовить.

<sup>23</sup>Се шкастонть кияк мериндеряй тенк: “Вана тесэ Пазонь кучовт Идицясь” эли “Сон тосо”, — илядо кеме.

<sup>24</sup>Кармить само кенгели христост ды кенгели пазмарицят, конат теить покш дивань тешкст ды тамашат. Сынь снартыть натой Пазонь кочкавтнэньгак ильведстемс-манямс, бути те тееви тенст.

<sup>25</sup>Кирдинк мельсэнк, весе тень Мон ёвтыя тенк икелев.

<sup>26</sup>Истя, кияк мериндеряй тенк: “Оно, Сон чаво модасо”, — илядо моле тов, эли: “Оно, Сон кекшни се кудосонть”, — илядо кеме.

<sup>27</sup>Кода чилисема ёно ёндолонь верьгедемась валдомты чивалгома ёнксонтькак, истямо неявиксэкс ули Ломантненень Цёранть самозояк.

<sup>28</sup>Эдь кортави: косо кулозь ракшась, тов пуромить раужо варакатнеяк».

### **Ломантнень Цёранть самозо**

<sup>29</sup>«Курок неть стака пиштемань читнеде мейле чись чополгады, кованькак а карми максомо валдо, тештетнеяк прыть менельстэ, ды менелень вийтнеяк теить сорк.

<sup>30</sup>Сестэ менельстэ карми неявомо Ломантнень Цёранть самонь тешксээ. Ды весе масторлангонь раськетне кармить авардеме, зярдэ несызь Ломантнень Цёранть менелень пель лангсо самонзо покш вийсэнзэ ды иневалдосонзо.

<sup>31</sup>Покш торамонь виев гайть марто Сон кучсынзе Эсь ангелэнзэ масторонь ниле ёндо Эсензэ кочкавтнэнь пурнамо весе масторлангстонть педе пес».

<sup>32</sup>«Тонавтнеде чарькодеме инжир чувтонть коряс: зярдэ сонзэ тарадонзо чевтемить ды нолдыть лопат, сестэ содави — кизэсь маласо.

<sup>33</sup>Истя тесэяк, зярдэ тынь несынк весемень топавтоманть, сестэ чарькодтядо, — те шкась маласо, кенкш лангсо.

<sup>34</sup>Видестэ кортан тенк: неень пингень ломантне ёмамо а кенерить, кода весе те топавтови.

<sup>35</sup>Менелесь ды масторось ёмить, ансяк Монь валон а ёмить».

### **Чись ды часось а содавить**

<sup>36</sup>«Се чиденть ды частонть кияк а соды: менелень ангелтнэяк, — соды ансяк Монь Тетям ськамонзо.

<sup>37</sup>Кода ульнесь Ноень читнестэ, истя ули сестэяк, зярдэ сы Ломантнень Цёрась.

<sup>38</sup>Инечадыденть икеле ломантне ярснесть, симнесть, урвакстнесть ды лиснесть мирденень се чинть самс, зярдэ Ной совась иневенчентень.

<sup>39</sup>Сынь мезеяк эзь чарькоде-нее семс, зярс эзь са инечадысь ды эзинзе ёмавто весень. Истя ули сестэяк, зярдэ сы Ломантнень Цёрась.

<sup>40</sup>Сестэ паксясо важодиця кавто ломантнень эйстэ вейкесь ули саезь Пазонтень, омбоцесь кадозь.

<sup>41</sup>Ведьгевсэ яжавтыця кавто аватнень эйстэ вейкесь ули саезь Пазонтень, омбоцесь кадозь.

<sup>42</sup>Секскак уледе анокт, эдь а содасынк, кона шкастонть сы тынк Азорось.

<sup>43</sup>Тень тынь чарькодъсынк: содавольгак кудазорось, кона шкане веть сы салыця, сон аволь удо ды аволизе нолда сонзэ эцеме кудозонзо.

<sup>44</sup>Секскак, тыньгак уледе анокт: Ломантнень Цёрась сы се шкастонть, зярдо тынь Сонзэ а учотадоаяк».

#### **Кемевикс важо ды акемевикс важо**

<sup>45</sup>«Уледе истямокс, кодамо кемевикс ды превей важось, конань кудазорось туюмстэ путсы покшокс весе важонзо лангсо ды мери шкастонзо макснемс тенст ярсамопель.

<sup>46</sup>Уцяскав ули те важось, конань кудазорось, зярдо сы, несы истя теумстэ!

<sup>47</sup>Кемевтян эйсэнк: сестэ кудазорось путсы сонзэ весе ули-паронзо лангсо покшокс.

<sup>48</sup>Бути сон апаро важо, сестэ арсезеви: “Монь азором курок а сы”,

<sup>49</sup>ды карми чавомо лия важотнень, сонсь карми симиця ломань марто симеме-ярсамо.

<sup>50</sup>Ансяк кудазорозо сы се чистэнтэ, конастонть важось а учияк, ды се часстонть, конадонтэ а арсияк.

<sup>51</sup>Кудазорось сестэ куломс чавсы сонзэ ды ёртсы тов, косо чачонь полавтницятне. Тосо сон карми авардеме ды пейсэнзэ чикордомо».

## **Матфея 25**

### Свадьбань кемень тейтерде валвелявкс

- <sup>1</sup>«Се шкастонть Менельсэнтъ Инязоркчись карми молеме истямо тев ёнов: свадьбань кемень тейтерть саизь эсь лампаст ды лиссть урвакстыцянтъ вастомо.
- <sup>2</sup>Сынст ютксто вететне ульнестъ превейть, вететне превтеметь.
- <sup>3</sup>Превтеметне саизь лампаст, ансяк эзь сае мартост ой.
- <sup>4</sup>А вана превейтне лампаст марто сайсть кедьгесэ ойгак.
- <sup>5</sup>Урвакстыцясь курокто эзь саво, ды тейтертне весе нуваземсть ды матедевсть.
- <sup>6</sup>Пелеве шкане каятотсь вайгель: “Вана, урвакстыцясь сы, лиседе вастомонзо!”
- <sup>7</sup>Сестэ весе тейтертне стясть ды витнизь эсь толост.
- <sup>8</sup>Превтеметне мерсть превейтненень: “Максодо миненек эсь ойденк, толонок мадить”.
- <sup>9</sup>Превейтне мерсть каршост: “Арась, а макстано. Сестэ оесь а саты миненеккак ды тыненккак. Азёдо микшнициянень ды рамадо эстенк”.
- <sup>10</sup>Зярс сынъ якасть оень рамамо, сась урвакстыцясь. Тейтертне, конат вастомантень ульнестъ анокт, совасть мартонзо урвакстомань каванямонтень, ды кенкшесь мельгаст пекставсь.
- <sup>11</sup>Мейле састь лия вете тейтертнеяк ды мерсть: “Азоро, Азоро! Панжт тенек!”
- <sup>12</sup>Ансяк сон мерсь каршост: “Арась, а панжан. Мон тынк а содатадызь”.
- <sup>13</sup>Иисус прядызе ёвтнеманзо истямо валсо: «Секскак уледе анокт, эдь а содасынк чинтькак, часонтькак, зярдс сы Ломантнень Цёрась».

### Колмо важдо валвелявкс

- <sup>14</sup>«Се шкастонть карми улеме истямо ладсо: эрясь вейке ломань, кона лия масторов туемстэнзэ тердинзе эсь вагонзо ды кадызе лангозост эсь ули-паронзо.

<sup>15</sup>Вейкенень макссь вете талантт, омбоцентень — кавто, колмоцентень — вейке: эрвантень ёрокчинзэ коряс, ды сонсь сеске тусь.

<sup>16</sup>Се, конанень максозь вете талантт, мольсь, нолдынзе сынст тевс ды ламолгавтынзе сынст ветес.

<sup>17</sup>Истя кавто талантт мартоськак, ламолгавтынзе кавксть.

<sup>18</sup>А вана конанень максозь вейке, тусь, чувсь латкине ды кекшизе азоронть ярмаконзо.

<sup>19</sup>Ламо шкань ютазь велявтсь важотнень азорост ды кармась кедьстэст ярмактнеде кевкстнеме.

<sup>20</sup>Вете талантт мартось сась, кандсь лия вете талантт ды мерсь: “Азоро, тон монень вете талантт максыть, а вана мон лия вете талантт теинь эйстэст”.

<sup>21</sup>Азорось мерсь тензэ: “Алят, тон паро ды кемевикс важо! Аламо лангсо тон кемевиксэкс кадовить, ламо лангс путтан. Совак ды эрьгелек азорот марто вейсэ!”

<sup>22</sup>Истя сась кавто талантт мартоськак ды мерсь: “Азоро, тон максыть монень кавто талантт, а вана мон лия кавто талантт теинь эйстэст”.

<sup>23</sup>Азорось мерсь тензэ: “Алят, тон паро ды кемевикс важо! Аламо лангсо кемевиксэкс кадовить, ламо лангс путтан. Совак ды эрьгелек азорот марто вейсэ!”

<sup>24</sup>Сась ве талант мартоськак ды мерсь: “Азоро, мон содылия тонь казямо обуцят: тон нуят тосо, козо эзить виде, ды пурнат тува, кува эзить пeverде.

<sup>25</sup>Секскак мон пелезевинь ды кекшия мода потс тонь талантот. Вана, саик тонсетень”.

<sup>26</sup>Азорось мерсь каршонзо: “Вай, тон апаро ды нузякс важо! Тон содылить: мон нуян тосо, козо эзинь виде, ды пурнан тува, кува эзинь пeverде.



<sup>27</sup>Секскак, эряволь тетъ максомс монь ярмаком микшницянень-рамсицянень. Сестэ тон самодон мейле максовлить ярмакон ламолгавтозь.

<sup>28</sup>Нейке саинк кедьстэнзэ талантонть ды максынк сенень, конань кемень талантонзо!

<sup>29</sup>Эрвантень, кинь ули, сенень седеяк ламо максови, ды сонзэ карми улеме пек ламо. Кинь вана арась, сень кедьстэ саеви сеяк, мезезэ ули.

<sup>30</sup>А вана те амаштовикс важонтъ ёртынк ушов, чопода таркас, косо сон карми авардеме ды пейсэнзэ чикордомо”». Иисус ёвтызе тень ды серьгедсь: «Кинь улить мариця пилензэ — кунсолозо!»

#### **Ломантнень лангсо суд**

<sup>31</sup>«Зярдо Ломантнень Цёрась сы Эсь инексчисэнзэ ды мартонзо сыть весе ангелтнэ, сестэ Сон озы инязоронь тарканзо лангс.

<sup>32</sup>Икелензэ пурнасызь весе раськенъ ломантнень. Сон явсынзе сынст кавтов, кода ваныця явны реветь сеятнень эйстэ.

<sup>33</sup>Ды аравтсынзе реветнень вить кедь пелензэ, сеятнень — керш пелензэ.

<sup>34</sup>Сестэ Инязорось мери вить кедь пелесэтненень: “Садо тей, Тетянь чанствявтнэ! Совадо Инязорксчинтень, кона анокстазь тенк менеленть-масторонтъ теема шкасто.

<sup>35</sup>Эдь Мон ульнинь вачо, ды тынь андымизь Монь. Монь сакшнось симемам — тынь симдимизь Монь. Мон ульнинь кудовтомо — тынь Монь кудозонк нолдтнимизь;

<sup>36</sup>штапо ульнинь — тынь Монь оршимизь; сэрединь — тынь якиде мельган; пекстамо кудосо аштинь — тынь Монь содавтнимизь”.

<sup>37</sup>Сестэ видечисэтне кевкстьсызь сонзэ: “Азоро, зярдо минь Тонь неидизь вачокс ды андыдизь? Эли симемань самсто — симдидизь?

<sup>38</sup>Зярдó минь Тонь неидизь кудовтомокс — кудозонок нолдтнидизь эли штапосто — оршидизь?

<sup>39</sup>Зярдó Тонь неидизь сэредемстэ эли пекстамо кудосто ды содавтнидизь?”

<sup>40</sup>Сестэ Инязорось мери тенст: “Кемевтян эйсэнк: весе, мезе тынь теиде Монь неть вишка ды асодавикс кемиця ялгатнень эйстэ куш вейкенень, сень теинк Моненьгак”.

<sup>41</sup>Мейле Инязорось мери керш кедь пелесэтненень: “Азёдо Монь эйстэ, сюдозтне! Азёдо пингедэ пингень толонтень, кона анокстазь Идемевсентень ды сонзэ ангелтнэненень!

<sup>42</sup>Эдь Мон ульнинь вачо — тынь Монь эзимизь андо; Монь сакшнось симемам — тынь Монь эзимизь симде;

<sup>43</sup>Мон ульнинь кудовтомо — тынь Монь кудозонк эзимизь нолда; штапо ульнинь — тынь Монь эзимизь орша; сэрединь, пекстамо кудосо аштинь — тынь Монь эзимизь содавтне”.

<sup>44</sup>Сестэ кевкстьсызь сетнеяк: “Азоро, зярдó минь Тонь неидизь вачо, эли симемань сазь, эли кудовтомокс, эли штапо, эли сэредемстэ, эли пекстамо кудосо аштемстэ, ды эзинек лезда Теть?”

<sup>45</sup>Сестэ Инязорось мери каршост: “Кемевтян эйсэнк: весе, мезе тынь эзиде тее вейкененьгак неть вишка ды асодавикс ломантнень туртов, сень эзинк тее Моненьгак”.

<sup>46</sup>Ды сынь туить пингедэ пингень стака пиштемас, а вана видечисэтне — пингедэ пингень эрямос».

## Матфея 26

### Иисусонь каршо арсема

<sup>1</sup>Зярдó Иисус прядынзе весе неть кортамотнень, сестэ мерсь тонавтницянстэнь:

<sup>2</sup>«Кавто чинь ютазь, кода тынь содатадо, ули евреень Инечи. Ды Ломантнень Цёрась максозь ули вачкодемс крёст лангс».

<sup>3</sup>Секе чистэнтъ попонь покштнэ, Койс тонавтыцятне ды прявтнэ пурнавсть Кайафа попонь прявтонть кудос

<sup>4</sup>ды арсестъ ёжовчисэ кундамс Иисусонь ды маштомс.

<sup>5</sup>«Ансяк тень эряви теемс аволь покшчистэ, — кортасть сынъ, — иляст кепедеве ломантне».

### **Иисусонь вадемась**

<sup>6</sup>Зярдс Иисус ульнесь Бетаниясо Симононь кедьсэ, кона икеле сэредекшнесь проказа ормасо,

<sup>7</sup>мольсь тосо ваксозонзо ве ава. Сон кандсь алебастрань кедьгесэ тантей чине питней ой, конасонтъ валнызе ярсамсто Иисусонь прянзо.

<sup>8</sup>Тень неемстэ тонавтницянзо ацирьгалезь кортасть: «Мезекс истямо стяконь ёмсевтемась?»

<sup>9</sup>Те оесь миёмаль покш питнеде ды ярмактнень явшемаль пурныцяненъ!»

<sup>10</sup>Иисус, сынст ацирьгалемадонть содазь, мерсь тенст: «Мекс аванть мелензэ колсесынк? Сон Монень тейсь паро тев.

<sup>11</sup>Пурныцятне свал тынк марто, Мон жо аволь свал.

<sup>12</sup>Авась оень валомасонтъ анокстызе рунгом калмамос.

<sup>13</sup>Видестэ кортан тенк: весе масторлангсонть, косо ули ёвтнезь Кенярксов кулясь, тосо кундасызь те аванть лемензэ ды ёвтыть седеяк, мезе сон тейсь Монень».

### **Иуда тееви мицякс**

<sup>14</sup>Сестэ кемгавтово тонавтницятнень ютксто вейкесь, Иуда Искариот, мольсь попонь покштнэненъ

<sup>15</sup>ды мерсь: «Зяро макстадо монень, бути мон миса тенк Иисусонь?» Сынъ путсть тензэ колоньгемень сиянь ярмакт.

<sup>16</sup>Те шкастонть саезь Иуда кармась вешнеме ён шка сыненст Иисусонь миёмга.

#### **Инечинь ярсамонь анокстамо**

<sup>17</sup>Ламбамсто сукоронь покшчинь васенце чистэнтъ тонавтницянзо мольсть Иисус вакс ды кевкстизь: «Косо мерят анокстамс Теть инечинь ярсамонть?»

<sup>18</sup>Сон мерсь: «Азёдо ошов ве ломаннень ды мереди тензэ: “Тонавтыцясь корты: Монь шам сась малав. Тонь кедьсэ мелем ярсамс тонавтницян марто инечинь ярсамодо”».

<sup>19</sup>Тонавтницятне тейсть истя, кода тенст мерсь Иисус, ды анокстызь инечинь ярсамонть.

#### **Инечинь чокшнень ярсамо**

<sup>20</sup>Чокшне Иисус озась столь экшс кемгавтово тонавтницянзо марто.

<sup>21</sup>Ярсамсто Сон мерсь тенст: «Алкукс кортан тенк: вейкесь эйстэнк мисамам».

<sup>22</sup>Тонавтницянзо прасть покш ризксэс ды кармасть вейке-вейкест мельга кевкстнеме: «Азоро, те уш аволь мон?»

<sup>23</sup>Сон мерсь каршост: «Монь мисамам се ломанесь, кона Монь марто вейсэ навизе ваканс кшинть.

<sup>24</sup>Ломантнень Цёрась Эсь эрямо кинзэ прядсы истя, кода теде ёвтазь Пазонь Сёрмадовкссо. Ансяк кодамо зыян пры се ломаненть лангс, кона мисы Ломантнень Цёранть! Седе паро улелель, бути те ломанесь аволь чачояк».

<sup>25</sup>Сестэ миция Иудаськак кевкстизе сонзэ: «Тонавтыця, те уш аволь мон?» Иисус мерсь тензэ: «Тень ёвтык тонсь».

<sup>26</sup>Ярсамсто Иисус сайсь кши, чанстизе-баславизе, синтризе, ды тонавтницянзо ланга явшемстэ мерсь: «Саинк ды ярсадо, те Монь рунгом».

<sup>27</sup>Мейле сайсь кече, Пазонтень сукпрянь ёвтазь, максызе тенст ды мерсь: «Весе симеде эйстэнзэ:

<sup>28</sup>Те Монь вересь, Пазонтъ марто од вейсэнълувонь верь, кона валови весень пежетест нолдамонь кисэ.

<sup>29</sup>Кортан тенк: те шкадонть мейле Мон а карман симеме винаумарень винадо се чинть самс, зярдод карман симеме мартонк од винадо Монь Тетянь Инязорксчисэнтъ».

<sup>30</sup>Мейле сынъ моравтсть ды тустъ Ойумарькс пандо лангов.

### **Иисус ёвты Петрань прянь кайсемадо**

<sup>31</sup>Сестэ Иисус мерсь тенст: «Те вестэнтъ тынь весе потатадо Монь эйстэ, эдь Пазонь Сёрмадовкссо ёвтазь истя: “Мон маштса ваныцянтъ, ды стадань реветне срадыть”.

<sup>32</sup>Седе мейле, зярдод Мон улян кулозьстэ вельмевтезь, тынденк икеле молян Галилеяв».

<sup>33</sup>Петра мерсь каршонзо: «Кадык весе лиятне потыть эйстэть, мон истя зярдод а теян!»

<sup>34</sup>Иисус мерсь тензэ: «Видестэ кортан тетъ: те вестэнтъ атякшось а кенери моразевемеяк, кода тон колмоксть прят каясак Монь эйстэ».

<sup>35</sup>Петра мерсь тензэ: «Зярдод а каяса прям Эйстэдеть, куш куломс тень савозо марто!» Истя кортасть весе лия тонавтницятнеяк.

### **Иисус озны Гетсиманиясо**

<sup>36</sup>Сестэ Иисус тонавтницянзо марто пачкодсь ве таркас, конань лемезэ Гетсимания. Сон мерсь тонавтницянтэнь: «Аштеде тесэ, зярс Мон молян ды ознан тосо».

<sup>37</sup>Мартонзо саинзе Петрань ды кавонест Зеведеень цёратнень. Сонензэ прась ризкс ды седей сэредькс,

<sup>38</sup>ды Сон мерсь тенст: «Ойдем куломс ризны. Аштеде тесэ Монь марто, ды илядо удо».

<sup>39</sup>Сон тусь аламодо ве ёнов, прась сэрсьэнзэ мода лангс ды ознось: «Тетяй, улиндеряй те теевемашка, ютавтык те пиштемань кечень Монь вакска! Ансяк топавтовозо Тонь мелесь, аволь Монсесь».

<sup>40</sup>Иисус сась тонавтницянзо ваксс ды муинзе сынст удомсто. Сон мерсь Петранень: «Тынь Монь марто мик ве часкак апак удо эзиде кирдеве?»

<sup>41</sup>Илядо удо, ознодо, аволиде понго снартнемас-варчавтнемас. Тынк оймесь анок паронтень, ансяк обуцянк-коронк лавшо».

<sup>42</sup>Иисус таго тусь, омбоцеде ознось: «Тетяй, бути а ютавови Монь вакска те пиштемань кечесь, Монень апак симе, сестэ кадык топавтови Тонь мелесь!»

<sup>43</sup>Зярдо велявтьсь, таго стардынзе сынст удомсто: сельмест конявильть.

<sup>44</sup>Сон кадынзе сынст, таго тусь ды колмоцеде ознось секе валтнэсэ.

<sup>45</sup>Мейле сась тонавтницянзо ваксс ды мерсь тенст: «Тынь яла удотадо ды оймсетядо! Вана сась се шкась, зярдо Ломантнень Цёрась максозь ули пежетевень кедьс.

<sup>46</sup>Стядо, адядо! Вана Монь миицясь малазонок сась».

### **Иисусонь кундамозо**

<sup>47</sup>Иисусонь кортамо шкастонть сась Иуда, кемгавтовотнень ютксто вейкесь. Сонзэ марто састь попонь покштнэнь ды прявтнэнь пельде кучозь ламо ломанть торо ды цётмар марто.

<sup>48</sup>Иуда миицясь икелев кортась мартост тешкстэнтъ: «Конань мон паласа, се Сон, сайнк Сонзэ».

<sup>49</sup>Сон сеске мольсь Иисус ваксс ды мерсь: «Шумбрачи, тонавтыця!» — ды палызе Сонзэ.

<sup>50</sup>Иисус мерсь тензэ: «Ялгай, мекс тон сыть?» Сестэ лиятнеяк састь Иисус ваксс, каявсть лангозонзо ды кундызь Сонзэ.

<sup>51</sup>Сестэ вейкесь Иисус мартотнень ютксто таргизе торонзо, вачкодизе попонь прявтонь важонтъ ды керизе пилензэ.

<sup>52</sup>Иисус мерсь тензэ: «Путык торот кундозонзо! Эрвась, торонь кепедицясь, тородо кулыяк.

<sup>53</sup>Эли тон арсят, Монень а вешеве Тетянь кедьстэ лезкс? Сон сеске кучоволь кемгавтово ушмот ангелт ды седе ламояк!

<sup>54</sup>Ансяк кода сестэ топавтовить Пазонь Сёрмадовкстнэ истя улемадонть?»

<sup>55</sup>Мейле Иисус мерсь пурнавозь цёратненень: «Мекс тынь сыде Монь саеме торо ды цётмар марто, теке салыця-маштниця мельга? Эрва чистэ Мон озадолинь мартонк Пазонь кудосо, тонавтынь эйсэнк, ды тынь Монь эзимизь сае.

<sup>56</sup>Ансяк ней весе те истя теевсь пазмарицянь сёрмадовкстнэнь топавтомга». Сестэ весе тонавтницяно кадызь Сонзэ ды оргодсть.

#### **Инепромкось суди Иисусонь**

<sup>57</sup>Иисусонь кундыщятне саизь Сонзэ, ветизь Кайафа попонь прявтонть кудос. Тозонь уш пурнавсть Койс тонавтыщятне ды прявтнэ.

<sup>58</sup>Петра мольсь мельганзо ве ёно попонь прявтонь пирявтонть потс пачкодемс ды совась тозонь. Тосо сон озась ванстыщятнень юткс ваномо, мейсэ весе те прядови.

<sup>59</sup>Попонь покштнэ, прявтнэ ды весе Инепромкоськак вешнесть Иисусонь каршо кенгелема яволявкст сонзэ маштомга

<sup>60</sup>ды эзь мукшно, куш ламо сакшность кенгели яволявтыцят, ялатеке чумонзо эзь муе. Окойники састь кавто кенгели яволявтыцят

<sup>61</sup>ды мерсть: «Те ломанесь кортась: “Монень Пазонь кудось калавтови ды колмо чис одс стявтови”».

<sup>62</sup>Сестэ попонь прявтось стясь ды кевкстизе Иисусонь: «Мекс чатьмонят? Мекс мезеяк а ёвтат чумондомаст каршо?»

<sup>63</sup>Иисус ялатеке чатьмонсь. Таго попонь прявтось мерсь Тензэ: «Эри Пазонть сельмензэ икеле энядан тетъ: ёвтак видьстэ тенек: алкукс Тон — Пазонь кучовт Идицясь, Пазонь Цёрась?»

<sup>64</sup>Иисус мерсь тензэ: «Тень ёвтык тонсь. А вана Мон ёвтан тенк: куроку тынь несынк Ломантнень Цёранть Весемькирдинть вить ёно озадо аштемстэ ды менелень пельтнень лангсо самсто».

<sup>65</sup>Сестэ попонь прявтось сезизе оршамонзо ды серьгедсь: «Сон Пазонть эйсэ нарьги-покорды! Мезекс тенек лия яволявтыцятне? Вана ней тынсь маринк Пазонть лангсо нарьгамонзо!

<sup>66</sup>Кода арсетядо: мезе теемс мартонзо?» Сынть мерсть каршонзо: «Сон чумо ды секскак эряви маштомс».

<sup>67</sup>Теде мейле кармасть чамазонзо сельгенеме ды чавомонзо, лиятне кайсесь Тензэ чама ланга

<sup>68</sup>ды кортасть: «Содык, Пазонь кучовт Идиця, кие риштинзеть?»

#### **Петрань прянь кайсемазо**

<sup>69</sup>Петра аштесь озадо попонь прявтонь пирявтонть потсо, зярдомольсь ваксозонзо ве важо ава ды мерсь: «Тонгак ульнить Галилеянь Иисус марто».

<sup>70</sup>Сон весемь икеле каизе прянзо: «Аздан, мезть тон кортат».

<sup>71</sup>Орта ушов лисемстэ Петрань неизе лия важо ава, кона мерсь тосо аштицятненень: «Тяк ульнесь Назаретэнь Иисус марто».

<sup>72</sup>Сон таго каизе прянзо ды божазь-пежетькстазь мерсь: «Пежеть, мон а содаса те ломанень!»

<sup>73</sup>Аламо шкань ютазь тосо аштицятне мольсть Петранень ды мерсть: «Алкукс, тонгак сынст ютксто: кортавоксот кувалт содават!»

<sup>74</sup>Сестэ сон кармасть сюдомо ды божамо-пежетькстамо: «Мон аздаса те ломанень!» Сеске моразевсь атякш.



<sup>75</sup>Петрань мельс ледсть Иисусонь ёвтавт валтнэ: «Атякшось а кенери моразевемеяк, кода тон колмоксть прят каясак Монь эйстэ». Сон лиссь ушов ды кармась риксэ авардеме.

## Матфея 27

### Иисусонь максызь Пилатнэнь

<sup>1</sup>Валске марто промкссо весе попонь покштнэ ды раськень прывтнэ састь вейке мельс: маштомс Иисусонь.

<sup>2</sup>Сынь сьулмсизь Сонзэ, ветизь ды максызь Понтий Пилатонь, римень прывтонть, кедьс.

### Иудань янксемазо ды пезэ

<sup>3</sup>Зярдо Иуда миицясь кармась содамо Иисусонь маштомас судямодонтъ, сестэ сон янксезевсь, кандынзе колоньгемень сиянь ярмактнень попонь покштнэнень ды прывтнэнень,

<sup>4</sup>Истя мерезь: «Совинь пежетьс, мон миия чумовтомо веренть!» Сынь мерсть каршонзо: «Кодамо минек тевенек? Те тевесь тонь».

<sup>5</sup>Иуда ёртынзе ярмактнень Пазонь кудонь кияксос, лиссь ды повась.

<sup>6</sup>Попонь покштнэ пурнызь ярмактнень ды мерсть: «Нетъ ярмактне — верень питне, секскак Коень коряс а мереви путомс сынст Пазонь кудонь ярмак юткс».

<sup>7</sup>Вейсэ арсесть рамамс сынст лангс чакшонь тейницянь пакся, козонь калмсемс лия масторонь ломантнень.

<sup>8</sup>Тень кувалма се паксянтень течис мерить: Верь пакся.

<sup>9</sup>Истя топавтовсь Еремия пазмарицянтъ вельде ёвтазесь: «Сынь сайсть колоньгемень сиянь ярмакт, питне, конань Израилень ломантне путызь Сонзэ кисэ,

<sup>10</sup>ды рамасть кисэст чакшонь тейницянь мода, кода кармавтсь монень Азорось».

### Иисус Пилат икеле

**11**Те шкастонть Иисус аштесь римень прявтонть Пилат икеле, кона кевкстнесь Сонзэ: «Тон еврееень Инязорось?» Иисус мерсь тензэ: «Те тон истя кортат».

**12**Зярдэ попонь покштнэ ды прявтнэ чумондсть Эйсэнзэ, Сон каршост мезеяк эзь ёвта.

**13**Сестэ Пилат кевкстизе Иисусонь: «Нать а марят, зяро чумондомат лангозот таргасть?»

**14**Ансяк Сон эзь ёвта каршонзо валгак, ды тенень прявтось пек дивась.

### Иисусонь судизь куломас

**15**Римень прявтось коензэ-кирданзо коряс свал покшчинень нолдыль оляс пекстазтнень ютксто вейке, ломантнень вешемаст коряс.

**16**Се шкане ульнесь пекстазь Варавва, кона ульнесь пек содавикс.

**17**Зярдэ ломантне весе пурнавсть, Пилат кевкстинзе: «Кинь нолдавтомс меленк? Вараввань эли Иисусонь, конадо мерить Пазонь кучовт Идиця?»

**18**Сон содась: еврееень прявтнэ максызь Иисусонь сонзэ кедьс сельмест сявадомань кувалма.

**19**Сестэ, зярдэ Пилат аштесь судиянь таркасо, низэ кучсь тензэ вал: «Мезеяк иля тее те чумовтомо ломанентень: мон ютазь вене неинь Сонзэ эйстэ стака он, кона кармавтымим пек майсеме».

**20**Те шкастонть попонь покштнэ ды прявтнэ кортызь пурнавозтнень вешемс нолдамс оляс Вараввань, Иисусонь жо маштомс.

**21**Сестэ Пилат кевкстинзе сынст: «Кавтост ютксто конань мертядо нолдамс тенк?» Сынь рангасть: «Вараввань!»

**22**Пилат кевкстинзе: «Мезе сестэ монень теемс Иисус марто, конадо мерить Пазонь кучовт Идиця?» Сынь весе рангасть ве вайгельсэ: «Крёст лангс вачкодик!»

<sup>23</sup>Сон таго кевкстсь: «Эно кодамо зьянонтъ Сон тейсь?» Сынъ седеяк пек серьгедсть: «Крѣст лангс вачкодик!»

<sup>24</sup>Зярдэ Пилат неIZE: мезеяк а тееви, ансяк седеяк касы ломантнень шалномась, сестэ сон вешсь ведь, ломантнень икеле шлинзе кедензэ ды мерсь: «Мон а чуман Те Чумовтомо Ломанентъ верьсэ, а вана тынь тынсь ванодо».

<sup>25</sup>Весе ломантне серьгедсть каршонзо: «Сонзэ верезэ улезэ минек ды эйкакшонок лангсо!»

<sup>26</sup>Сестэ Пилат нолдызе тенст Вараввань, Иисусонь жо мерсь локшосо керямс ды максомс вачкодемс крѣст лангс.

#### **Ушманонь нарьгамотне**

<sup>27</sup>Мейле Пилатонь ушманонзо Иисусонь ветизь азоркудов, косо пурнавсть перьканзо весе ушмантнэ.

<sup>28</sup>Сынъ каявтызь лангстонзо оршамопелензэ ды оршавтсть лангозонзо якстере лангакаямо.

<sup>29</sup>Прязонзо путсть пуиця куракшонь тарадсто кодазь каштаз, вить кедезэнзэ макссть палка ды икелензэ кумажа лангс пульзязь, пеелезь шумбракстнестъ мартонзо: «Шумбра улезэ евреень Инязорось!»

<sup>30</sup>Мейле сынъ сельгенестъ лангозонзо, сайнестъ кедьстэнзэ палканть ды чавсть Эйсэнзэ пря ланга.

<sup>31</sup>Кода лангсонзо нарьгамодонтъ пешкедсть, каявтызь лангстонзо якстере оршамонтъ ды оршавтызь Эсь оршамопелензэ. Мейле ливтизь Сонзэ крѣст лангс вачкодемс.

#### **Иисусонь крѣст лангс вачкодемазо**

<sup>32</sup>Ошсто лисемстэ сынъ каршо вастызь киринеянь ломанентъ, конань лемезэ Симон, ды кармавтызь сонзэ Иисусонь крѣстонть кандомо.

<sup>33</sup>Састъ Голгофа лемсэ таркас, кона чарькодеви кода Пря ловажань тарка.

<sup>34</sup>Тосо макссть Иисуснэнь симемс сэпе марто човорязь чапамо вина. Сон ансяк варчизе — симеме эзь карма.

<sup>35</sup>Иисусонь вачкодизь крёст лангс, Сонзэ оршамонзо, жеребейсэ кайсема вельде, явизь эсь ютковаст

<sup>36</sup>ды мейле озасть ванстомонзо.

<sup>37</sup>Прянзо вельксэс путсть сёрмадовкс, конаньсэ ёвтазель Сонзэ чумозо: «Те Иисус — еврееень Инязоро».

<sup>38</sup>Мартонзо крёст лангс ульнесть вачкодезь кавто салыцят-маштницят: вейкесь — вить пелензэ, омбоцесь — керш пелензэ.

<sup>39</sup>Вакска ютыцятне, прят чаравтозь, згилясть лангсонзо:

<sup>40</sup>«Я-а, Пазонь кудонь калавтыця ды колмо чис одов стявтыця! Идик ней Эсь прят, бути Тон Пазонь Цёра! Валгт крёстонть лангсто!»

<sup>41</sup>Истя попонь покштнэяк, Койс тонавтыцятнень, прявтнэнь ды фарисейтнень марто згилязь кортасть:

<sup>42</sup>«Лиятнень идекшнесь, ансяк Эсь прязо Тензэ а идеви! Бути алкукс Сон Израилень Инязор, кадык ней валги крёстонть лангсто! Сестэ минь кемсынек Сонзэ!»

<sup>43</sup>Паз лангс кемсь; кадык Пазось ней идесыяк, бути ули Сонзэ мелезэ! Эдь Сон кортакшнось: «Мон Пазонь Цёра»».

<sup>44</sup>Истя жо Сонзэ лангсо згилясть салыцятне-маштницятнеяк, конат вачкодезельть мартонзо крёст лангс.

### **Иисусонь куломазо**

<sup>45</sup>Чинь куншкане весе масторонть келес теевкшнесь чопода, ды истя ульнесь колмо часонь перть.

<sup>46</sup>Колмоце часонть малав Иисус верьга вайгельть пижакадсь: «Элий, Элий! Лама сабактани?», конань смустезэ: «Пазом, Пазом! Мекс Монь кадымик?»

<sup>47</sup>Маласо зярыя аштицятне тень марямсто мерсть: «Сон Илиянь терди!»

<sup>48</sup>Вейкесь эйстэдест сеске ношкстась, сайсь ведьпанго, начтызе сонзэ чапамо винасо, пезнавтызе палка пес ды венстизе Иисуснэнь симемс.

<sup>49</sup>А вана лиятне кортасть: «Аштек, вансынек, сы-арась Илия идемензэ!»

<sup>50</sup>Иисус таго верьга вайгельть пижакадсь, ды оймезэ лиссь.

<sup>51</sup>Сестэ Пазонь кудосонть коцтонь пирявксось сезевсь кавтов, верде саезь алов. Мастороськак соракадсь, кевпандотнеяк лазновсть,

<sup>52</sup>калмотнеяк панжовсть ды ламо Пазонь ломантнень кулозь рунгост вельместь.

<sup>53</sup>Сынь лиссть калмотнестэ ды Иисусонь вельмемадо мейле совасть Пазонь иневанькс ошонтень, косто сынст неизь ламо ломанть.

<sup>54</sup>Зярдо сядонь прявтось ды ушмантнэ, конат мартонзо ванстсть Иисусонь, неизь моданть сорноманзо ды весементь, мезе тосо ульнесь, сестэ сынь пек тандадсть ды кортасть: «Алкукс, те ломанесь ульнесь Пазонть Цёразо!»

<sup>55</sup>Тосо ульнесть ламо ве ёндо ваныця аваткак, конат Иисус мельга ютасть Галилеясто ды лездасть Тензэ.

<sup>56</sup>Сынст ютксо ульнесть Магдалань Мария, Яков марто Иосиень аваст Мария ды Зеведеень цёратнень аваст.

#### **Иисусонь калмамозо**

<sup>57</sup>Зярдо чизэ чопотетсь, сась Иосиф, Ариматея ошонь сюпав ломань, кона сонськак ульнесь Иисусонь тонавтниця.

<sup>58</sup>Сон мольсь Пилатнэнь, вешизе Иисусонь уловонть. Пилат мерсь уловонть максомс.

<sup>59</sup>Иосиф саизе уловонть, тапаризе лияназонь ванькс коцтсо

<sup>60</sup>ды калмизе од калмозонзо, кона аволь умок чувозель кевпандос. Калмос совамо таркантень сон кевердсь покш кев ды тусь.

<sup>61</sup>А вана Магдалань Мария ды лия Марияськак аштесть озадо калмонть каршо.

### Калмонтъ ваксс путыть ванстыцят

<sup>62</sup>Омбоце чистэнтъ, те ульнесь оймсема чи, Пилатнэнь промсть попонь покштнэ ды фарисейтне

<sup>63</sup>ды кортасть тензэ: «Чиряз, мелезэнек ледсь: те манчицясь эрямо пингестэнзэ кортась вана кода: “Колмо чиде мейле Мон вельман”.

<sup>64</sup>Секскак тон кармавт пштистэ ванстомс калмонтъ колмо чинь перть. Алкукскак, илязо лисе истя: тонавтницянзо сыть веть, саласызь уловонзо ды мерить ломантненень: “Кулозьстэ вельмесь”. Те меельце манямось улевель васенцедентькак берянь».

<sup>65</sup>Пилат мерсь тенст: «Ванстыцят тенк макстано. Азёдо ды вансто до калмонтъ, кода эряви».

<sup>66</sup>Сынь тустъ ды кармасть ванстомо калмонтъ: кевентъ тешкстызь ды путсть ванстыцят.

## Матфея 28

### Иисус вельмесь!

<sup>1</sup>Оймсема чиде мейле, недлячистэнтъ ашолгадома шкане, састъ калмонтъ варштамо Магдалань Мария ды омбоце Марияськак.

<sup>2</sup>Ды апак учо теевсь модань покш сорнома: те истя Азоронтъ ангелэсь валгсь менельстэ. Сон сась калмонтень, сявордызе совамо таркастонтъ кевентъ ды озась лангозонзо.

<sup>3</sup>Сонзэ чачозо ёндолонь цитнемань кондямоль, оршамонзо ловонь кондят ашольть.

<sup>4</sup>Ванстыцятне эйстэнзэ истя тандадсть, натой кармасть сорномо ды прасть теке кулость.

<sup>5</sup>Ангелэсь мерсь аватненень: «Илядо пеле: мон содан — тынь вешнетядо крест лангс вачкодезь Иисусонь.

<sup>6</sup>Сон арась тесэ: Сон вельмесь, кода кортакшнось. Садо ванынк тарканть, косо Азорось ульнесь.

<sup>7</sup>Азёдо седе курок ды ёвтадо тонавтницянтэнь: “Сон вельмесь ды тынденк икеле моли Галилеяв. Тосо тынь несынк Сонзэ”. Кирдеде мельсэнк, мезе мон ёвтынть тыненк».

<sup>8</sup>Аватне капшазь лиссть калмостонтъ, тандадозь ды кенярдозь, чиезь ношкстасть Иисусонь тонавтницянтэнь ёвтамо.

<sup>9</sup>Зярдэ сынть мольсть Сонзэ тонавтницянтэнь ёвтамо, апак учо сынст вастынзе Сонсь Иисус ды мерсь: «Шумбрачи!» Сынть чийсть Тензэ, кутмордызь пильгензэ ды модас празь сюконясть Тензэ.

<sup>10</sup>Сестэ Иисус мерсь тенст: «Илядо пеле! Азёдо ды ёвтадо Монь малавикс ялгатненень: кадык молить Галилеяв, тосо сынть Монь несамизь».

#### **Ванстыцятнень ёвтамось**

<sup>11</sup>Аватнень туемадо мейле калмонь ванстыцятнень эйстэ зярыятне совасть ошонтень ды ёвтнестъ попонь покштнэненень весемеде, мезе ульнесь.

<sup>12</sup>Сетне пурнавсть прявтнэнь марто вейсэ ды тейсть ладямо. Сынть макссть ванстыцятнэненень ламо ярмакт

<sup>13</sup>ды мерсть: «Ёвтадо: “Веть, минек удома шкане, састъ тонавтницянтэнь ды салызь уловонзо”».

<sup>14</sup>Мариндеряй теде прявтось, минь сонзэ кортасынек, тынк чумонк арась, идетьядызь».

<sup>15</sup>Ванстыцятне саизь ярмактнень ды тейсть истя, кода тонавтозельть. Те ёвтнемась еврейтнень юткова истя келейстэ срадсь, натой течис эри.

#### **Иисусонь кармавтоманзо тонавтницянтэненень**

<sup>16</sup>Кевейкее тонавтницянтэне тустъ Галилеяв, пандо пряс, ков Иисус мерсь тенст молеме.

<sup>17</sup>Зярдэ неизь Сонзэ, сюконясть Тензэ, ансяк конат-конат эйстэст кавтолдсть.

<sup>18</sup>Иисус мольсь малазост ды кармась кортамо тенст: «Монень максозь весе азорксчись менель лангсоjak, масторлангсоjak.

<sup>19</sup>Секскак, азёдо ды тееде весе раськетнестэ Монень тонавтницят, нававтодо эйсэст Тетянтъ, Цёрантъ ды Иневанькс Оймаелтонть лемсэ

<sup>20</sup>ды тонавтынк сынст кирдеме весемень, мезе Мон тенк кармавтынъ. Ды содадо: Мон улян тынк марто свал, пингентъ прядовомс». Аминь.



## Матвеень Коряс Евангелия

### Марка 1

<sup>1</sup>Пазонь Цёрадонть, Иисус Христосто, Кенярксов кулясь ушодови истя,  
<sup>2</sup>кода сёрмадозь пазмарицятнень вельде: «Вана Тонь самодо икеле кучса Монсень кулянь кандыцам, сон анокстасы кинть Тонь туртов».

<sup>3</sup>«Чаво модасо маряви сеерицянь вайгель: Анокстадо Азоронтень ки! Виделгавтодо Сонзэ туртов китнень-янтнэнь!»

<sup>4</sup>Истя лисськак. Нававтыця-Лемдиця Иоанн ульнесь чаво мода лангсо. Сон тердсь ломантнень велявтомс Пазонтень ды нававтомс-лемдемс прянтъ пежетень нолдамонтъ кисэ.

<sup>5</sup>Сакшность тензэ ламо ломанть Иудеянь масторонтъ весе ёнкстнэстэ ды Ерусалимстэ. Сынъ видькстастъ пежетест коряс, ды Иоанн нававтсь-лемдсь весе эйсэст Иордан лейсэ.

<sup>6</sup>Иоанн оршазель верблюдонь понань оршамосо ды карксазель кшнань каркссо. Сон ярснесь паксянь цирькундо ды идем мекшень медте.

<sup>7</sup>Сон ёвтнесь: «Мельган Сыцясь мондень пек седе виев, мон а маштован, мик комазь, карсемастонзо кшна ведьметнень юкстицяккак.

<sup>8</sup>Мон тынк нававтынъ ведьсэ, Сон карми тынк нававтомо Иневанькс Оймеялтсо».

#### **Иисусонь нававтомась ды варчавтнемась-снартнемась**

<sup>9</sup>Нетъ читнестэ Иисус сась Галилеянь Назарет ошто ды нававтызе прянзо Иоаннонь кедьстэ Иордан лейсэ.

<sup>10</sup>Сонзэ ведьстэ лисемстэ Иоанн сеске неize, кода менелесь панжовсь ды Иневанькс Оймеялтось гулькакс валгсь Сонзэ лангс.

<sup>11</sup>Менельстэнтъ каятотсь вайгель: «Тон Монь вечкевикс Цёрам, Тон Монь кенярксом».

<sup>12</sup>Теде мейле Оймеялтось ветизе Иисусонь чаво модас.

<sup>13</sup>Сон ульнесь чаво модасонтъ идем ракша ютксо ниленьгемень чить. Тосо Сатанась снартнесь совавторомс Сонзэ пежетьс, ансяк ангелтнэ Иисуснэнь лездасть.

#### **Васень тонавтницятне**

<sup>14</sup>Иоаннонь пекстамодо мейле Иисус сась Галилеяв ды ёвтнесь весенень Кенярксов куля Пазонь Инязорксчиденть.

<sup>15</sup>Сон кортась: «Шкась топодсь, Пазонь Инязорксчись сась малав, – велявтодо пежетнеде ды кемеде Евангелиянтень».

<sup>16</sup>Галилеянь эрьке чирева ютамсто Иисус неинзе Симононь ды сонзэ ялаксонзо Андреень, конат ведьс ёртыльть калонь кундамопельть, эдь сынъ ульнестъ калонь кундыцят.

<sup>17</sup>Иисус мерсь тенст: «Адыдо мартон, – Мон тейтядызь ломанень кундсицякс».

<sup>18</sup>Сынъ нейке кадызь кундамопелест ды тустъ мартонзо.

<sup>19</sup>Аламошка таркань ютазь, Сон неинзе Яковонь ды Иоаннонь, Зеведеень цёратнень; сынъ аштыльть венчсэ, витильть-петильть калонь кундамопелест.

<sup>20</sup>Иисус сынсткак сеске тердинзе. Сынъ кадызь Зеведей тетяст сиведезь важотнень марто венчентень ды тустъ Иисус марто.

#### **Иисус Капернаумонь синагогасо**

<sup>21</sup>Сынъ састъ Капернаум ошов. Тосо Иисус оймсема чистэнтъ мольсь синагогас ды тонавтсь.

<sup>22</sup>Ломантне дивсестъ Сонзэ тонавтомантень. Сон тонавтсь эйсэст кода се, конань ули азорксчизэ, аволь кода Койс тонавтыцятне.

<sup>23</sup>Се шкастонтъ синагогасонтъ ульнесь аванькс оймайтсо кирдевезь ломань, сон серьгедсь:

<sup>24</sup>«Назаретэнь Иисус! Мезе Теть эряви минек эйстэ? Тон сыть минек ёмавтомо? Содатан, кият Тон: Тон Пазонтъ Иневаньксэзэ».

<sup>25</sup>Иисус кежейстэ кардызе аванькс оймеялтонть: «Чатьмонтъ! Лиссть эйстэнзэ!»

<sup>26</sup>Аванькс оймеялтось сорновтызе ломанентъ ды, верьга вайгельть пижакадозь, лиссь эйстэнзэ.

<sup>27</sup>Весе ломантне пек тандадсть, вейкест-вейкест кевкстнестъ: «Те мезе истя? Кодамо-бути од тонавтома? Сон аванькс оймеялтнэньгак кармавты Эсь азорксчинь вийсэнзэ, ды сынъ кунсолыть Эйсэнзэ».

<sup>28</sup>Ды теде мейле Иисусто кулясь курохсто тусь весе Галилеянь масторонтъ келес.

### **Иисус – ламонь шумбралгавтыця**

<sup>29</sup>Синагогастонтъ лисемадо мейле Иисус Яков ды Иоанн марто састъ Симононь ды Андреень кудос.

<sup>30</sup>Симононь низанязо сэредсь, теке палсь толсо, мадезель. Иисуснэнь сеске ёвтась эйстэдензэ.

<sup>31</sup>Сон мольсь ваксозонзо, саизе сонзэ кедте, лездась стямс. Ормась сеске кадызе, ды авась кармасть инжетнень каванямо.

<sup>32</sup>Чокшне, чинь валгомадо мейле, ломантне туизь Иисуснэнь весе сэредицятнень ды идемевсень колавтнэнь.

<sup>33</sup>Весе ошонь эрицятне промсть кенкш лангонтень.

<sup>34</sup>Иисус шумбралгавтсь эрьва кодамо ормасо пек ламо сэредицят. Ламо идемевстькак эйстэст пансь. Идемевстненень Сон эзь мере кортамс, эдь сынъ содасть: Сон Пазонь кучовт Идиця.

<sup>35</sup>Валске марто чоподава Иисус стясь ды лиссь ушов, тусь ськамонзо чаво таркас, тосо ознось.

<sup>36</sup>Симон лия тонавтницятнень марто кармасть вешнемензэ.

<sup>37</sup>Окойники муизь Сонзэ ды ёвтась Тензэ: «Весе Тонь вешнить».

<sup>38</sup>Иисус мерсь тенст: «Аядо маласо велетнес ды оштнэс: Монень тосокак те кулянтъ эряви ёвтнемс, – тень кисэ Мон сынъгак».

<sup>39</sup>Сон якась весе Галилеяванть ды ёвтнесь паро кулянтъ весе синагогатнесэ, пансесь ломантнестэ идемевстнень.

### **Проказасонть ванськавтомась**

<sup>40</sup>Сась ваксозонзо проказа ормасо вейке сэредиця, икелензэ пульзязь, знялдсь Иисуснэнь: «Улиндеряй мелеть, мон Тонеть ванськавтован».

<sup>41</sup>Иисусонь марятотсь кисэнзэ седеезэ, венстизе кедензэ, токадевсь эйзэнзэ, мерсь: «Ули мелем, ванськадт».

<sup>42</sup>Ансяк Сон истя мерсь, проказась сэредицянтъ сеске кадызе, ды ломанесь ванськадсь.

<sup>43</sup>Сэредицянтъ туемадо икеле, Иисус пек кармавтсь тензэ:

<sup>44</sup>«Вант, киненьгак теде мезтькак иля ёвтне. Азё попнэнь ды ванкшновтык прят. Теде мейле ванськадомат кисэ кандт Пазонтень казне. Истя эряви теемс Моисеень Коентъ коряс. Теньсэ тон невьтсак ломантненень эсь шумбралгадомат».

<sup>45</sup>Тона ансяк лиссь тосто ды кармась весенень ёвтнеме ды сравтнеме кулянтъ эсь ванськадомадонзо. Тень кувалма Иисус натой ошонтеньгак ломанень сельме икельга а совиль. Сон кадовкшнось ошонтъ ушосо, ломантеме таркасо. Ды тезэньгак сакшность Тензэ ломанть эрва ёндо.

## **Марка 2**

### **Катардыцянь шумбралгавтомась**

<sup>1</sup>Зярья чинь ютазь, Иисус таго сась Капернаумс. Кулясь кудов Сонзэ велявтомадо куроцсто срадсь ошканть.

<sup>2</sup>Курок пурнавсть истя ламо ломанть, натой кудонтъ потсож, ушосож эзь кадово тарка. Сон кортась тенст Кенярксов кулядонть.

<sup>3</sup>Те шкастонть ниле ломанть кандсть Тензэ катар ормасо сэредиця.

<sup>4</sup>Ламо ломантнень улемадо сынъ Иисусонь малав эзь ютаво, секс кузсть кудонтъ лангс, штавтызь вельтявксонть, тейсть варя Иисусонь

аштема тарканть коряс ды мадезь аштиця сэредицянтъ ацамонек-мезнек верде нолдызь Сонзэ икелев.

<sup>5</sup>Зярдо Иисус неIZE сынст кемемаст, Сон мерсь сэредицянтень: «Эйдем, нолдазь тонь пежететь».

<sup>6</sup>Сесэ ульнестъ озадо зяряя Койс тонавтыцят, конат арсестъ эськаст:

<sup>7</sup>«Мекс Сон истя Пазонтъ нарьги-покорды? Кинень, Паздонтъ башка, нолдавить пежетне?»

<sup>8</sup>Иисус оймесэнзэ марясь, мезде сынъ арсить, ды мерсь тенст: «Мекс тынь истя эсь седейсэнк арсетядо?»

<sup>9</sup>Мезесь седе шождыне, меремс катардыцянтень : “Нолдавить тонь пежететь”, эли меремс: “Стяк, саик ацамот, ды якak”?

<sup>10</sup>Истя тынь созадо, масторлангсо Ломантнень Цёранть ули азорксчизэ пежетень нолдамскак». Теде мейле пшкадсь катардыцянтень:

<sup>11</sup>«Кортан тетъ: стяк, сайтъ ацамот ды азё кудов».

<sup>12</sup>Вана цёрась сеске стясь, саинзе ацамонзо, тусь весень сельме икеле. Секс весе пек дивсестъ, شناсть Пазонтъ, кортасть: «Минь пингезэнек истямо эзинек некшне!»

### Иисус тердизе Левинь

<sup>13</sup>Иисус таго лиссь эрьке чирес. Ламо ломанть састъ мельганзо, ды Сон тонавтсь эйсэст.

<sup>14</sup>Ки ланга ютамсто Сон неIZE Левинь, Алфеень цёранзо, кона аштесь озадо каявксонь пурнамо кудонтъ вакссо. Иисус мерсь тензэ: «Мольть Монь мельга». Се стясь ды тусь мельганзо.

<sup>15</sup>Мейле Иисус ярсась Левинь кудосо. Столь эхшэ Сонзэ ды тонавтницянзо марто аштестъ каявксонь ламо пурныцяткак ды пежетев лия ломантькак. Сонзэ свал ульнестъ мельганзо ламо молицят.

<sup>16</sup>Койс тонавтыцятне ды фарисейтне неIZь Иисусонь каявксонь пурныця ды пежетев ломань марто ярсамсто. Сестэ сынъ мерсть

тонавтницянтэнь: «Кода истя Сон ярсы-сими каявксонь пурныця ды лия пезетев ломань марто вейсэ?»

<sup>17</sup>Тень марязь, Иисус мерсь тенст: «Ормаменстиця эряви сэредицянень, аволь шумбра ломаннень. Мон сынь тердеме велявтомс Пазонтень пезетевтнень, аволь видечисэтнень».

**Постонь кирдемадо ды оймсема чиде кевкстематне**

<sup>18</sup>Иоаннонь тонавтницянтне ды фарисеенсетнеяк постовасть. Ламот сакшность Иисуснэнь ды кевкстность: «Мекс Иоаннонь ды фарисеень тонавтницянтне постовать, теке шкастонть Тонь тонавтницянт пост а кирдить?»

<sup>19</sup>Иисус мерсь тенст: «Нать кирдеви пост свадьбань инжетненень, зярс урвакстыцясь мартост? Зярдост мартост урвакстыцясь, сестэ сынь а постовавить.

<sup>20</sup>Сы шка, зярдост урвакстыцясь ули саезь юткост, сестэ, сеть читнестэ, сыньгак кармить постовамо.

<sup>21</sup>Кияк ташто оршамос а панды апак озавто од коцтонь панкс, – истямо панксось сезьсы таштонть, ды тееви седеяк покш варя.

<sup>22</sup>Од винаяк кияк а кайси ташто кедень кескавс. Бути истя теят, сестэ винась сезьсы кеденть, винаськак, кескавоськак ёмить. Секскак од винась эряви каямс од кедень кескавс».

<sup>23</sup>Весть савсь Иисуснэнь оймсема чистэ ютамс суро паксява. Сонзэ тонавтницянтне ки ланга модемстэ кармасть сезнеме суропрят.

<sup>24</sup>Фарисейтне кевкстизь Сонзэ: «Вант, мекс сынь оймсема чине теить сень, мезе а мереве теемс те чистэнтэ?»

<sup>25</sup>Сон кевкстинзе сынст: «Тынь нать зярдояк эзиде ловно седе, мезе тейсь Давид инязорось, зярдост сон ды сонзэ мартонзотнеяк вачомкшность, арасель ярсамопелест?»

<sup>26</sup>Сон Авиатар попонь прявтонть пингестэ совась Пазонь кудос ды ярсась тосо Пазонтэ икелев путозь кшитнеде ды макссь

мартонзотнененьгак, куш сындет, попто башка, киненьгак а меревиль ярсамс».

<sup>27</sup>Мейле мерсь тенст: «Оймсема чись теезь ломанень кисэ, аволь ломанесь оймсема чинь кисэ.

<sup>28</sup>Тень кувалма Ломантнень Цёрась оймсема чинть лангсоjak азоро».

### Марка 3

#### Иисус оймсема чистэ шумбралгавты коське кедь ломань

<sup>1</sup>Иисус таго сась синагогав. Тосо ульнесь цёра, конань кедезэ коськезель.

<sup>2</sup>Фарисейтне тосо пек вансть Иисус мельга, шумбралгавтсы-арась цёранть оймсема чистэ. Сынъ вешнесть Сонзэ чумондомань тувтал.

<sup>3</sup>Сон мерсь коське кедь ломанентень: «Стяк ды арак икелев».

<sup>4</sup>Мейле кевкстинзе: «Мезе теема оймсема чине, паро эли берянь? Идемс эрямонтъ эли ёмавтомс?» Сынъ чатьмонсть.

<sup>5</sup>Сестэ Сон кежевстэ варштась лангзост, пек ризнэзевсь калгодо седеест кувалт ды мерсь се ломанентень: «Венстик кедеть». Сон венстизе, ды кедезэ теевсь таго шумбракс, омбоцентъ кондямокс.

<sup>6</sup>Тосто лисемадо мейле, фарисейтне вейсэ Иродонь ломантнень марто сеске пурнасть промкс, кармасть арсеме, кода маштомс Иисусонь.

#### Иисусто кулясь келейстэ сралн

<sup>7</sup>Иисус тусь эсь тонавтницянзо марто эрьке чирес. Мельганзо мольсть ламо ломанть Галилеясто, Иудеясто,

<sup>8</sup>Ерусалимстэ, Идумеясто ды Иордан леень тона пельдеяк, натой Тир марто Сидононь ёнкстнэстэяк. Кулясь сонзэ тевтнеде срадсь эрьва кува, ламо ломантне пертьпельде ютасть тензэ.

<sup>9-10</sup>Сон ламотнень се чистэнтъ шумбракс теинзе, секс сэредицятне ансяк сонзэ эйс токадевемань кисэ пек эцестъ ёнонзо. Сон мерсь

тонавтнициянстэнь кирдемс аноксто тензэ венченть сень кисэ, иляст карма ломантне ваксозонзо пек эцеме.

<sup>11</sup>Аванькс оймеялтнэяк, сонзэ неезь, пракшность икелензэ ды пижнесть: «Тон Пазонтъ Цёразо!»

<sup>12</sup>Иисус эйсэст кежевстэ кардась, иляст ёвтне, кие сон.

#### **Иисус кочки кемгавтово апостолт**

<sup>13</sup>Мейле Иисус кузь пандо пряс, тердинзе Эстензэ кочказь кемгавтовотнень. Сынть тусть мартонзо.

<sup>14</sup>Сон путынзе неть кемгавтовотнень улемс свал мартонзо, кучнемс сынст Кенярксов кулянтъ ёвтнеме

<sup>15</sup>ды максомс тенст азорксчи шумбралгавтнемс ормадо ды пансемс идемевстнень.

<sup>16</sup>Вана неть кемгавтовотнень лемест: Симон, конанень Иисус путсь лем Петра,

<sup>17</sup>Зеведеень Яков ды Иоанн ялаксо, – сыненст Сон путсь лем Боанергес, лиякс: Пурьгинень зэртъ цёрат, –

<sup>18</sup>Андрей, Филип, Бартоломей, Матвей, Фома, Алфеень цёразо Яков, Таддей, Симон Кананит

<sup>19</sup>ды Искаротонь Иуда, кона мейле миизе Иисусонь.

#### **Иисусонь чумондыть Сатанань виень тевс нолдамосо**

<sup>20</sup>Зярдэ Иисус ды тонавтнициятне састь кудов, тозо таго промсть ламо ломанть, секс Сонензэ тонавтнициянзо марто натой ярсамскак а зярдоль.

<sup>21</sup>Кода теде марясть малавикс инеськензэ, састь тов Иисусонь саеме. Сынть кортасть, Сон, натъ, превстэ лиссь.

<sup>22</sup>Вана Ерусалимстэ сазь Койс тонавтыциятне кортасть: «Сонзэ эйсэ Вельзевул, Сон идемевстнень прявтост вийсэ панси идемевсть».



<sup>23</sup>Сестэ Иисус сынст тердинзе Эстензэ ды кортась тенст валвелявкссо: «Кода истя Сатанантень паневе эсь прязо?»

<sup>24</sup>Вана мастороськак а ванстови, явовиндеряй пельксэнь пелькс ды тюрьгадындеряй эсь юткованзо.

<sup>25</sup>Кудораськеськак, конасонтъ свал шкань пелькстамот, а ванстови.

<sup>26</sup>Истя Сатанаськак стиндеряй эсензэ каршо ды виезэ явовиндеряй кавтов, кодаяк сестэ сон а кирдеви, сонензэ сась пе.

<sup>27</sup>Кияк виев ломанень кудоскак а эцеви ды киненьгак сонзэ ули-парозо а нельгеви, бути васняк виевентъ а сьулмсесы. Мейле ансяк сон саласы весе ули-паронзо.

<sup>28</sup>Видестэ кортан тенк: эрва кодамо пежетть ды Пазонь сяддомат-покордамот, кода ансяк авольть сяддо-покорда, нолдавить ломантненень.

<sup>29</sup>Бути вана кияк ёвты сяддома-покордамо вал Пазонь Оймеялтонть лангс, сень пежетесь зярдояк а нолдави. Се ломанентъ лангс кадови пингеде пингень чумондома».

<sup>30</sup>Сон истя мерсь тенст секс, мекс сынъ кортасть, келя Сонзэ потсо аванькс оймеялт.

### **Иисусонь авазо ды братонзо**

<sup>31</sup>Тов састъ Иисусонь авазо, братонзо. Кудонтень эзьт соваво, кучсть Сонзэ тердеме.

<sup>32</sup>Сонзэ перька озадо аштеть ломанть, сынъ ёвтасть Тензэ: «Вана Тонь ават, братот ды сазорот ушосо вешнить Эйсэть».

<sup>33</sup>Сон мерсь каршост: «Кие Монень ава, кить Монень братт?»

<sup>34</sup>Сестэ варштась перьканзо озадо аштицятненень лангс, мерсь: «Вана Монь авам ды братон!»

<sup>35</sup>Кие топавты Пазонтъ мелензэ, се Монь братом, сазором ды авам».

## Марка 4

### Валвелявкс паксянь видицядо

<sup>1</sup>Иисус таго кармась тонавтомо эрьке чиресэ. Ваксозонзо промсть истя ламо ломанть, Сонензэ савсь натоу венчес озамс, уемс аламодо ве ёнов, аштемс эрькесэнтъ. Весе ломантне аштеть эрькентъ чиресэ.

<sup>2</sup>Сон тонавтсь эйсэст ламос валвелявкссо. Тонавтомсто кортась тенст:

<sup>3</sup>«Кунсолодо: вана видицясь лиссь видеде.

<sup>4</sup>Видемстэ лиссь истя: конат-конат видьмекстнэ прасьтэ ки чирес. Ливтясть нармунть ды кочксизь сынст.

<sup>5</sup>Лиятне прасьтэ кевев таркас, косо модась аламошь, ды сынъ куроку лиссть, секс мекс модась ульнесь аволь сэрей.

<sup>6</sup>Зярдэ чизэ кармась пидеме, сестэ сынъ пужсть ды коськсть, секс мекс юрост-корёност ульнестъ аволь кеметь.

<sup>7</sup>Лиятне прасьтэ кирмалав юткс; кассть кирмалавтнэ ды сынст лепштизь, секскак видьмекст сынъ эзьтэ максо.

<sup>8</sup>Лиятне прасьтэ паро модас, сеть лиссть, кассть ды макссть видьмекст: кона колоньгеменень кирда, кона кодгеменень кирда, кона сядонь кирда».

<sup>9</sup>Теде мейле мерсь: «Кинь улишь мариця пилензэ – кунсолозо!»

### Видицядо валвелявксонть смустезэ

<sup>10</sup>Зярдэ ломантне тосто тукшность, кемгавтовотне ды лия тонавтницянозэ кевкстизь Иисусонь те валвелявксонть смусттензэ.

<sup>11</sup>Сон мерсь тенст: «Тыненк максозь чарькодемс Пазонь Инязорксчинть салавачись, ансяк ве ёнотненень весемесь ёвтневи валвелявкссо.

<sup>12</sup> Вана секс сынъ ванозь вануть ды ялатеке а неить, кунсолозь кунсолыть ды ялатеке а чарькодить. Пазонтеньгак а велявтыть, ды пежетесткак а нолдавить».

<sup>13</sup>Мейле кевкстинзе сынст: «Арази тыньгак а чарькодъсынк те валвелявксонть смустензэ? Кода эно чарькодъсынк весе лия валвелявкстнэнь?

<sup>14</sup>Видицясь види вал.

<sup>15</sup>Улить ломанть, конат молитъ ки чирес видеэнтъ ёнов. Сынъ ансяк марясызь валонть, сы тенст Сатанась ды саласы седеэзэст видеэнтъ.

<sup>16</sup>Лиятне, кода видеэсь кевев таркас: неть ломантне марясызь валонть, сеске кенярдозь сайсызь седеэзэст.

<sup>17</sup>Ансяк юрост-корёност аволь кеметь, секкак сынъ аштить аволь кувать. Зярдэ сы тенст се валонть кисэ кодамояк стакачи эли пансема, сынъ сеске потыть кемемастост.

<sup>18</sup>Лиятне, кода кирмалав юткс видеэсь: сынъ марясызь валонть,

<sup>19</sup>Ансяк те пингень мелявкстнэ, сюпавчис правтомась ды лия арсематне совить эйзэст ды лепштысызь валонть, ды сон видьмекст а канды.

<sup>20</sup>Улить ломанть, конат молитъ паро модас видеэнтъ ёнов: сынъ валонть марясызь, сайсызь ды видьмекст кандыть, – кона колоньгеменень кирда, кона кодгеменень кирда, кона сядонь кирда».

#### **Валонь видестэ чарькодема**

<sup>21</sup>Мейле Иисус кевкстинзе: «Лампинентъ натъ совайтнесызь кудос кедьге алов эли удома эзем алов путомань кисэ? Мекевланк, сонзэ путнесызь лампань кирдема таркас.

<sup>22</sup>Эдь мезеяк арась истямо салавань, конась аволь лисе лангс, ды мезеяк арась истямо кекшезь, конась аволь тееве содавиксэкс.

<sup>23</sup>Кинь улить мариця пилензэ – кунсолозо!»

<sup>24</sup>Таго кортась тенст: «Мезе марятадо – кирдинк мельсэнк! Кодамо онкссо онкстатадо, истямосо тыненккак онкстазь ули, мик седе ламояк максови тенк, кить кунсолыть.

<sup>25</sup>Кинь ули, сенень седеяк ламо максови, кинь вана арась, сень кедьстэ саеви сеяк, мезезэ ули».

### **Видьмекстэ**

<sup>26</sup>Таго Иисус мерсь: «Пазонть Инязорксчизэ моли истямо тев ёнов. Ломанесь видсь пакся.

<sup>27</sup>Веть сон улы, од чинь ушодовомсто сти. Видьмекстнэ лисить ды касыть, ломанесь а содыяк, кода весе те тееви.

<sup>28</sup>Эдь модась сонсь касты: тееви лисевкс, мейле пря каи, прясь пешкеди видьмекстэ.

<sup>29</sup>Зярдо сюрось кенери, ломанесь сеске кучи тарваз марто важот, сась нуема ланго».

### **Горчица видьмеде**

<sup>30</sup>Иисус таго поладсь: «Мезе марто вейкетстясынек Пазонь Инязорксчинть? Эли кодамо валвелявкссо сонзэ ёвтносынек?

<sup>31</sup>Сон горчица видьмень кондямо, кона модас видементэнзэ весе мода лангонь лия видьметнеде сехте вишкине.

<sup>32</sup>Зярдо сон касы, весе тикшетнеде покшокс тееви, нолды келейстэ тарадт, ды сонзэ рацяня тарадонзо потс менелень нармунтне натой пизэть тейнить».

<sup>33</sup>Ламо истямо валвелявкссо Иисус пачтась ломантненень Пазонь валонть. Сон кортась зяро, зяро тенст чарькодевсь.

<sup>34</sup>Валвелявкстомо Иисус мезеяк эзь тонавто. Зярдо кадовильть ськамошт тонавтницянзо марто, Сон панжилинзе тенст валвелявкстнэнь смустест.

### **Иисус лоткавты давол**

<sup>35</sup>Теке чинть чокшне Иисус мерсь тонавтницянстэнь: «Печтятано эрькенть омбоце пелев».

<sup>36</sup>Сынь нолдызь ломантнень, озасть венчентень, конасоль Иисус, ды сыргасть эркенть чирестэ. Мартост ульнесть лия венчткак.

<sup>37</sup>Кепететсь виев давол, ведьвелявкстнэ чавовсть венчентень, ведесь кармась совамо эйзэнзэ.

<sup>38</sup>Иисус те шкастонть венченть песэ удось, прялонзо ульнесть прялкске. Тонавтницянзо пувтызь Сонзэ: «Тонавтыця, Тонеть нать ялатеке, минь эль ёматано?»

<sup>39</sup>Сон стясь, варманть кардызе, эркентень мерсь: «Лоткак! Сэтьмелгадт!» Секе шкастонть вармась оймась, ды теевсь пек сэтьме.

<sup>40</sup>Мейле Сон мерсь тенст: «Мекс тынь истят пелицят? Мекс тынк арась кемеманк?»

<sup>41</sup>Тонавтницянзо пек тандадозь вейкест-вейкест туртов кортасть: «Те кие Сон истямось, конань натой вармаськак, ведьвелявкстнэяк кунсолыть?»

## Марка 5

### Иисус шумбралгавты аванькс оймеялтсо колазь ломань

<sup>1</sup>Састь сынень эркенть омбоце пелев, Гадарань масторс.

<sup>2</sup>Зярдо Иисус лиссь венчстэнтень, Сонзэ сеске вастызе калмосто лисезь ломань, кона колазель аванькс оймеялтсо.

<sup>3-4</sup>Сон эрясь калмова, ды кшнинь тертьсэяк киненьгак а кирдевить, ламоксть сонзэ сюлмсекшнизь кедьга-пильгева кшнинь рисьмесэ ды тертьсэ, сон сынст сезнилинзе ды туиль. Киненьгак сон а оймавтовиль.

<sup>5</sup>Чинек-венек сон азгондсь пандо юткова ды калмова, пижнесь пиже-ожо вайгельсэ, прянзо-пильгензэ порксась кевсэ.

<sup>6</sup>Зярдо сон васолдо неизе Иисусонь, чийсь Эйзэнзэ ды прась икелензэ кумажа лангс.

<sup>7</sup>Мейле, верьга вайгельть пижакадозь, мерсь: «Иисус, Верепазонь Цёра! Мезе Тонеть эряви монь пельде? Энялдан, Пазонть кисэ – иля пиштейте эйсэнь!»

<sup>8</sup>Иисус эдь мерькшнесь тензэ икеле: «Аванькс оймеялт, лиссть те ломаненть эйстэ!»

<sup>9</sup>Мейле кевкстизе сонзэ: «Кода тонь леметь?» Сон каршозонзо мерсь: «Монь лемем Легион, лиякс, минь ламонек».

<sup>10</sup>Таго сон пек энялдсь Иисуснэнь, аволинзе пане сынст те масторстонть.

<sup>11</sup>Сесэ, пандо чиресэ, вановсь тувонь покш стада.

<sup>12</sup>Весе аванькс оймеялтнэ Иисуснэнь энялдозь кортасть: «Кучомизь минек тувотнес, минь соватано эйзэст».

<sup>13</sup>Иисус эзь моле каршо. Аванькс оймеялтнэ лиссть ломаньстэнтъ ды совасть тувотнес. Ды стаданек сеске сэрей чирестэнтъ кирнявтнестъ эрькес, весе ваясть эйзэнзэ, эйстэдест ульнестъ кавтошка тёжат.

<sup>14</sup>Тувонь ваньцятне тосто тустъ чиезь, ёвтнестъ теевездентъ пертьпельксэнь оштнэва ды велетневаяк. Ломантне састъ теевезентъ ваномо.

<sup>15</sup>Сынь мольсть Иисус ваксс, неизь идемевсьсэ кирдевезь ломаненть, конань эйсэ икеле ульнестъ ламо аванькс оймеялтнэ. Сон ней аштесь озадо, оршазь, паро превсэ, ды сынь тандадсть.

<sup>16</sup>Неицятне ёвтнестъ сыненст, кода весе ульнесь идемевсьсэ кирдевезентъ ды тувотнень марто.

<sup>17</sup>Сестэ сынь кармасть энялдомо Иисусонь икеле, туевель Сон сынст ёнкссто.

<sup>18</sup>Иисусонь венчес озамсто, ломанесь, конась икеле кирдевезель идемевсьсэ, энялдсь Тензэ кадомс сонзэяк мартонзо.

<sup>19</sup>Иисус сонзэ эзизе сае. Сон мерсь тензэ: «Азё кудов тонсетненень, ды ёвтник тенст, кодат ине тевть тейсь тетъ Азорось, кодамо седеймарицякс ульсь тонеть».

<sup>20</sup>Сон тусь ды кармась ёвтнеме таркаванть, конанень мерильть Кемень ошт, мезе мартонзо тейсь Иисус. Ды весе дивсестъ.

**Тейтернень вельмевтемась ды сэредиця авань шумбралгавтомась**

<sup>21</sup>Зярдэ Иисус мекев печтясь венчсэнтъ эрькентъ омбоце пелев, ваксозонзо промсть пек ламо ломанть. Сон аштесь эрьке чиресэнтъ.

<sup>22</sup>Вана сась Тензэ синагогань прявтнэнь эйстэ вейкесь, лемезэ Яир, неIZE Сонзэ, прась пильгезэнзэ,

<sup>23</sup>Пек энялдозевсь: «Монь тейтернем кулома лангсо, сак, путыть лангозонзо кедеть, шумбралгавтык, илязо куло».

<sup>24</sup>Иисус тусь мартонзо. Мельганзо мольсть ламо ломанть, пек эцестъ малазонзо.

<sup>25</sup>Ютксо ст ульнесь ве ава, кона кемгавтово иеть сэредиль верень чудемасо.

<sup>26</sup>Сон ламо майсесь ормаменстицятнень эйстэ, ютавтызе весе ули-паронзо. Ансяк кодамояк менькс сон эзь муе, мекевланк, теевиль тензэ седеяк берянь.

<sup>27</sup>Сон марясь кортамот Иисусто, мольсь ломантнень юткова Сонзэ удалов ды токизе Сонзэ оршамонзо.

<sup>28</sup>Авась эськанзо кортась: «Токиндеряса куш Сонзэ оршамонзо, мон пичкан».

<sup>29</sup>Сеске лоткась эйстэнзэ верень молемась, весе рунгосонзо марясь: сон шумбралгавтозь.

<sup>30</sup>Иисус сеске маризе Эсь эйстэнзэ виень лисеманть, велявтсь ломантнень ютксо ды кевкстинзе: «Кие токизе Монь оршамом?»

<sup>31</sup>Тонавтницянзо мерсть Тензэ: «Несак, зяро ломанть эцитъ перькат, Тон жо кевкстнят: “Кие Монь токимим?”»

<sup>32</sup>Иисус сельмесэнзэ пертьпельга яла вешнесь сень, кие Сонзэ токизе.

<sup>33</sup>Авась, кона содась, мезе мартонзо теевсь, тандадозь ды сорнозь мольсь ваксозонзо, прась пильгезэнзэ ды ёвтнизэ Тензэ весементъ истя, кода ульнесь.

<sup>34</sup>Иисус мерсь тензэ: «Сазором! Кемемат шумбралгавтынзеть тонь, азё седейоймамо марто, эсеть ормадот ульть менстезь».

<sup>35</sup>Зярдэ Иисус кортась аванть марто, састъ синагогань прявтонть кудосто зярыя ломанть, ёвтась тензэ: «Тейтернетъ уш кулось, мезекс сыргавтсак тонавтыцянтъ?»

<sup>36</sup>Иисус, ёвтазентъ лангс апак вано, мерсь синагогань прявтонть: «Иля пеле, ансяк кемть».

<sup>37</sup>Сон эзь мере киненьгак мартонзо молемадо, Петрадо, Яковдо ды Иоанндо, Яковонь ялакстонзо, башка.

<sup>38</sup>Зярдэ сынъ пачкодсть синагогань прявтонть кудонзо ваксс, Иисус неинзе лужакадозь аштицятнень ды авардицятнень.

<sup>39</sup>Сон совась кудонтень, кевкстсь: «Мейс лужакадыде ды авардтядо? Тейтернесь эзь куло, сон улы».

<sup>40</sup>Кармасть лангсонзо пеедеме. Сон кудостонтъ весень панинзе, саинзе мартонзо тейтернентъ тетянзо-аванзо, колмо тонавтницянзо, совась икельце кудос, косо ульнесь тейтернесь.

<sup>41</sup>Сон саизе тейтернентъ кедте, мерсь тензэ: «Талита кум!» Тень смустезэ: “Тейтерне, тонеть кортан: стяк!”

<sup>42</sup>Тейтернесь сеске стясь, кармась якамо. Сон ульнесь кемгавтово иесэ. Весе дивастъ покш дивамосо.

<sup>43</sup>Иисус пек кармавтсь тенст, киненьгак теде а ёвтемс, ды мерсь андомс тейтернентъ.



## Марка 6

### Назаретэнь эрицятне а вастыть Иисусонь

<sup>1</sup>Иисус тонавтницянзо марто тусь тосто ды велявтсь Эсь тиринь ошозонзо.

<sup>2</sup>Зярдо сась оймсема чись, Сон кармась синагогасо ломантнень тонавтомо. Ламот Сонзэ кунсолыцятне дивазь кортасть: «Косто Сонзэ эйс те саевсь? Мезень истямо превейчи максозь Тензэ? Кода истят тамашатне тейневить Сонзэ кедьсэ?

<sup>3</sup>Арази Сон аволь чапиця, Мариянь цёра, Яковонь, Иосиень, Иудань ды Симононь брат? Арази Сонзэ сазоронзо аволь тесэ, минек ютксо?» Истя сынст арасель мелест кемемс Сонензэ.

<sup>4</sup>Иисус кортась тенст: «Пазмарицясь ловови эрва косо, ансяк аволь эсь чачома ошонзо, инеськензэ ютксо ды эсь кудосонзо».

<sup>5</sup>Тень кувалма Сонензэ эзь тееве тосо ве тамашаяк. Сон шумбралгавтсь ансяк зярыя сэредиця ломанть, путнинзе лангозост кедензэ.

<sup>6</sup>Иисус дивась сынст акемемаст лангс. Мейле Сон якась перька велетнева ды тонавтсь.

### Иисус кучи кемгавтово апостолт

<sup>7</sup>Иисус тердинзе Эстензэ кемгавтово тонавтницянзо, кармась кучнеме сынст кавтонь-кавтонь ды макссь тенст азорксчи пансемс аванькс оймеялтнэнь.

<sup>8</sup>Сон эзь мере саемадо тенст ки лангов кедьнежеде башка мезеяк лия: кшияк, кансткак, каркссо ярмакткак.

<sup>9</sup>Мерсь карсемс сандалят ды оршамс веенст оршамот.

<sup>10</sup>Сон кортась тенст: «Бути косяк соватадо кудос, туемезэнк кадоводо тоско.

<sup>11</sup>Кие тынк парсте а вастындерятадызь ды а кунсолындерятадызь, тосто лиседе ды пильгестэнк мик пулентькак чукадинк. Кадык те ули сынст

чумост невтемакс. Видестэ кортан тенк: Пазонь судонь чистэнтъ Содом марто Гоморранень ули седе шождыне се ошонтъ коряс».

<sup>12</sup>Тонавтницянзо тустъ ды ёвтнестъ: весе ломантненень эряви велявтомс Пазонтень.

<sup>13</sup>Пансестъ ламо идемевстъ, ламо сэредицят елейсэ ваднезь тейстъ сынст шумбракс.

### Нававтыця Иоаннонь куломазо

<sup>14</sup>Ирод инязорось марясь Иисусто, конань лемесь теевсь парсте содавиксэкс, ды мерсь: «Те Нававтыця Иоанн кулозьстэ вельмесь, секскак сонзэ ули виезэ тейнемс истят тамашат».

<sup>15</sup>Лиятне кортасть: «Те, келя, Илия». Конат-конат кортасть: «Те вана пазмариця эли вейкешка кезэрень пазмарицятненень кондыамо».

<sup>16</sup>Ирод, Иисусто тень марязь, мерсь: «Те Иоанн, конань прянзо мон керявтыя, сон кулозьстэ вельмесь».

<sup>17</sup>Ирод икеле кундавтызе ды пекставтызе Иоаннонь пекстамо кудос Филип лелянзо нинзэ Иродиадань кисэ, конань саизе сон никс.

<sup>18</sup>Тень кувалма Иоанн кортакшнось Ироднэнь: «Тонеть а мереви эрямс эсь лелять ни марто».

<sup>19</sup>Тень кисэ Иродиада кежиявтсь Иоанн лангс ды ульнесь мелезэ маштомс сонзэ, ансяк сонензэ те эзь тееве.

<sup>20</sup>Ирод пельсь Иоанндо сень содазь: Иоанн ломанесь Пазонтъ икеле виде ды иневанькс ойме. Ирод ванстсь эйсэнзэ ды покш мельсэ кунсолыль Иоаннонь тонавтоматненень, конатненень коряс тейсь ламо.

<sup>21</sup>Вана, okayники, Иродиаданень прась истямо ён чи. Ирод эсь чачома чистэнзэ тейсь каванямо князтненень-чирязтнэненень, ушмодейтненень, Галилеянь содавикс ломантненень.

<sup>22</sup>Тозонь совась ды киштьс Иродиадань тейтерезэ, те пек тусь Иродонь ды мартонзо симицятнень-ярсыцятнень мельскак. Инязорось мерсь тейтерентень: «Вешть пельдень, мезе мелеть, – ды максса тетъ».

<sup>23</sup>Ды божась-пежетъкстась икелензэ: «Мезе илязат веше, весе максса тетъ, натой пелензэ монсень масторонть».

<sup>24</sup>Тейтересь лиссь ды кевкстизе аванзо: «Мезе монень вешема?» Се мерсь: «Вешик Нававтыця Иоаннонь прянзо».

<sup>25</sup>Сон сеске, капшазь, тусь инязоронтень ды вешсь: «Монь мелем, – максык тень нейке ярсамопелень кандтнема лангсо Нававтыця Иоаннонь прянзо».

<sup>26</sup>Инязорось нусмакадсь, ансяк максозь валонть ды инжетнень кисэ савсь топавтомс сонзэ меленть.

<sup>27</sup>Ирод сеске кучсь ушман ды кармавтсь кандомс Иоаннонь прянзо.

<sup>28</sup>Се мольсь пекстамо кудов, керизе тонань прянтъ, кандызе прянтъ ярсамопелень кандтнема лангсо ды максызе тейтерентень, тейтересь сонзэ максызе аванстэнь.

<sup>29</sup>Зярдэ теде марясть Иоаннонь тонавтницяно, мольсть, саизь сонзэ уловонзо ды калмизь.

**Вете тѣжат ярсавсть вете кшисэ ды кавто калсо**

<sup>30</sup>Апостолтнэ велявтсть Иисуснэнь ды ёвтнестъ Тензэ, мезе тейсть, мезес тонавтсть ломантнень.

<sup>31</sup>Сон мерсь тенст: «Адядо, туйтяно сэтьме таркав ды тосо тынь аламодо оймсетядо». Эдь тесэ ульнестъ ламо сыцят ды туицят, сынст натой ярсамс шкасткак арасель.

<sup>32</sup>Секс сынъ съкамоств венчсэ тустъ сэтьме таркав.

<sup>33</sup>Ломантне неизь, кода сынъ тустъ ды ламот содызь сынст. Ломантне чийсть мельгаст весе оштнэстэ эрьке чиреванть, састъ тозонь сындест икеле ды пурнавсть Иисусонь перька.

<sup>34</sup>Зярдо Иисус лиссь чирентень ды несъ ламо ломанть, седеезэ марятотсь кисэст: сынъ ульнестъ ваныцявтомо ревень кондят. Сестэ Сон кармась эйсэст ламос тонавтомо.

<sup>35</sup>Шкась мольсь чокшне малав, тонавтницянзо шаштсть ваксозонзо, мерсть: «Таркась чаво, шкась талай.

<sup>36</sup>Нолдыть сынст, кадык молить перька оштнэс ды велетнес ды рамить эстет кши, эдь сынст арась мезесткак ярсамс».

<sup>37</sup>Сон каршост мерсь: «Тынсь максодо тенст ярсамс». Сынъ кевктсть: «Паряк, тенек модемс, рамамс кавтосядт динаронь питне кши ды максомс сыненст ярсамс?»

<sup>38</sup>Сон кевктсь: «Зяро тынк кшинк? Азёдо ванынк». Сынъ ваномудо мейле мерсть: «Вете кшинек ды кавто калонок».

<sup>39</sup>Сестэ Иисус мерсь тенст весень озавтнемс пиже луганар лангс куронь-куронь.

<sup>40</sup>Сынъ ойсестъ куросо сядонь-сядо, ведьгеменень-ведьгемень.

<sup>41</sup>Сон саинзе вете кшитнень ды кавто калтнэнь, варштась менельс, ёвтась сукпря Пазонтень, синтринзе кшитнень, макснинзе тонавтницянстэнь явшемс ломантнень ланга. Кавто калтнэнькак явшинзе весенень.

<sup>42</sup>Весе ярсасть пешкедемазост.

<sup>43</sup>Кадовозь кши сускомотнеде ды калтнэдеяк пурнасть кемгавтово пешксе куйметь.

<sup>44</sup>Кшиде ярсыця цёратнеде ульнестъ ветешка тёжат.

### **Иисус юты ведь ланга**

<sup>45</sup>Тедэ мейле сеске Иисус кармавтынзе тонавтницянзо озамо венчес ды мерсь тенст Сондензэ икеле уемс эрькентъ тона чирев, Бетсаидав, Сонсь кадовсь ломантнень нолдамо.

<sup>46</sup>Нолдынзе сынст ды тусь пандо пряс озномо.

<sup>47</sup>Чополгадсь, тонавнициятнень венчест эрьке куншкасоль, Иисус мода лангсо съкамонзоль.

<sup>48</sup>Сон неизе, сыненст стака миледемс – пувась каршо варма. Ашолгадама ёнов Сон сась тенст ведь ланга ды ютавь вакскаст.

<sup>49</sup>Зярдс сынь неизь Сонзэ ведьга модемстэ, арсесть, те чопача, ды пижакадсть.

<sup>50</sup>Эдь весе Сонзэ неизь ды пек тандадсть. Иисус сеске кармась мартост кортамо: «Оймадо! Те Мон, илядо пеле».

<sup>51</sup>Сон озась ваксозост венчентень, ды вармась лоткась. Тонавнициятне пек абунгадсть.

<sup>52</sup>Зярс сынь кшитнень марто тамашантькак смустензэ эзизь чарькоде, ды седеесткак яла эзть панжовкшно.

<sup>53</sup>Зярдс сынь печтизь эрькенть, сась Геннисаретэнь модас, лоткасть эрьке чирентень.

<sup>54</sup>Ансяк сынь лиссть венчстэнтъ, тосонь ломантне сеске содызь Иисусонь.

<sup>55</sup>Сынь куроцто чийнизь весе перька таркатнень, ёвтнесть Иисусонь самодо, ды ансяк марильть, косо Сон, ацамонек-мезнек кандылизь Тензэ сэредицятнень.

<sup>56</sup>Ков Сон аволь са: велес, ошс, велинес – эрьва косо ломантне кандылизь сэредицяст ошонь кужос ды энялдыльть Иисуснэнь, меревель токавомс куш Сонзэ оршамопелень цёкос. Весе, конатне токавильть Эйзэнзэ, пичкильть.

## Марка 7

### Пазонь кармавтокстнэ ды ломанень койтне-кирдатне

<sup>1</sup>Фарисейтне ды конат-конат Койс тонавтыцятне сась Ерусалимстэ ды пурнавсть Иисусонь перька.

- <sup>2</sup>Сынь неизь, кода конат-конат Сонзэ тонавтницятнень ютксто ярснить аванькс кедьсэ эли кедень апак шля, ды мурнись-коризь тень кисэ.
- <sup>3</sup>Тевесь сеньсэ, фарисейтне ды весе лия еврейтне, покштянь койтнень-кирдатнень кирдезь, а озыльть ярсамо ваньксстэ кедест апак шля.
- <sup>4</sup>Базарсто кандозь ярсамопельдентькак апак шля а ярснить. Ламо лия койтькак сынь топавтнесть, кода ваканонь, кечень ды пижестэ теезь лия кирдемапелень ды озамотаркань шлякшноманть.
- <sup>5</sup>Фарисейтне Койс тонавтыцятнень марто кевкстизь Иисусонь: «Мекс Тонь тонавтницятне минек покштянь койтнень-кирдатнень а ванстыть, ярснить кедень апак шлякшно?»
- <sup>6</sup>Иисус мерсь каршост: «Парсте тынк ланга, чачонь полавтницят, Исайя пазмарицясь икелев ёвтась, кода сёрмадозь: “Неть ломантне валсост ловить Эйсэнть, ансяк седеест васоло аштить Монь эйтэ».
- <sup>7</sup>Сынь стяко суюконить Монень, эдь сынь тонавтыть ломанень теевть кармавтокстнэнень, теке Монсетненень”.
- <sup>8</sup>Тынь кадынк Пазонь кармавтоксонть, кирдядо ансяк ломанень теевть койтнень-кирдатнень, кода ваканонь, кечень шлякшномат ды лияткак ламо тень кондят тейнетядо».
- <sup>9</sup>Сон поладсь тенст: «Тынь маштадо колсто полавтомо Пазонь кармавтоксонть эсенк теевть койсэ-кирдасо!»
- <sup>10</sup>Моисей ёвтызе тенк: “Ловт ломанькс тетячь-авать”, ды “Кие покорды тетянзо эли аванзо, сенень кулома”.
- <sup>11</sup>А вана тынь кортатадо, кие мериндеряй тетянстэнь эли аванстэнь: “Мезе тонь туртов эряволь максомс монь пельде – се корбан, лиякс меремс, – Пазнэнь максыя”.
- <sup>12</sup>Истя теньсэ тынь а мертядо ломантненень мезеяк теемс эсь тетяст-аваст туртов.

<sup>13</sup>Вана истя тынь Пазонь валонть полавтнесынк тынсенк теевть койсэ-кирдасо ды лияткак ламо тень кондят тейнетядо».

#### **Ванькс ды аванькс**

<sup>14</sup>Иисус тердинзе весе ломантнень, кортась тенст: «Кунсолодо Монь эйсэ весе ды чарькодеде.

<sup>15</sup>Мезеяк истямо, кона сови ломаненть потс ушосто, аваньксэкс а тейсы сонзэ; аваньксэкс тейсы сонзэ се, мезе лиси ломаненть эйстэ.

<sup>16</sup>Кинь улить мариця пилензэ, – кунсолозо».

<sup>17</sup>Зярдо Иисус ломантнень ваксто совась кудос, тонавтницянзо кевкстизь Сонзэ те валвелявксонть смусттензэ.

<sup>18</sup>Сон мерсь тенст: «Нать тыньгак истят а чарькодицят! Нать а чарькодтядо: мезе ушосто сови ломаненть потс, сенень сон кодаяк аваньксэкс а тееви?

<sup>19</sup>Се сови аволь седеезэнзэ, сови пекезэнзэ, косто мейле ёртови ушов». Теньсэ Иисус яволявтызе весе ярсамопеленть ваньксэкс.

<sup>20</sup>Иисус поладсь: «Мезе ломаненть эйстэ лиси, ансяк се аваньксэкс ломаненть теи.

<sup>21</sup>Эдь потсто, ломаненть седейстэ, тукшныть апаро арсемат, ускурямот-усксевемат, ломанень маштомат,

<sup>22</sup>саламот, сюпавчис правтомат, кежть, манчема, визькс тевть, сельмень сявадома, сяддомат-покордамот, эсь прянь верьга кандома, пеляскалема-ормазкалема.

<sup>23</sup>Весе неть зыянтнэ потсто лисить ды теить ломаненть аваньксэкс».

#### **Лия раськень авань кемемась**

<sup>24</sup>Галилеясто Иисус тусь Тир ды Сидон ошонь модатнес. Тосо Сон лоткась ве кудос, ды мелезэ ульнесь, кияк илязо сода Сонзэ самодо. Ансяк те Сонензэ эзь кекшеве.

**25-26**Эйстэнзэ марясь ве ава, конань тейтерезэ кирдевсь аванькс оймеялтсо. Авась сась ды прась Иисусонь пильгес, энялдсь Тензэ панемс тейтерензэ эйстэ идемевсенть. Се авась ульнесь аволь еврееень, чачозель Сирофиникиясо.

**27**Иисус мерсь тензэ: «Васняк эрявить андомс эйкакштнэ, – аволь вадря саемс кшинть эйкакшонь кедьстэ ды каямс киска левкснэнь».

**28**Авась каршонзо мерсь: «Те виде, Азоро, ансяк кискатнеяк ярсыть столь ало эйкакшонь правтовт паморькстнэде».

**29**Иисус мерсь тензэ: «Те валот кисэ азё седейоймамо марто; идемевсесь лиссь тейтереть эйстэ».

**30**Авась сась кудов, неи: тейтерезэ мадезь тарка лангсо, идемевсесь кадызе сонзэ.

#### **Амарицянь ды акортыцянь шумбралгавтомась**

**31**Иисус тусь Тир ды Сидон ошонь модатнестэ ды таго мольсь Кемень ошонь модатнень трокс Галилеянь эрькенть ёнов.

**32**Тосо ветясть Тензэ амариця ды кундатозь кель ломань, энялдсть Иисуснэнь путомс лангозонзо кедензэ.

**33**Иисус саизе сонзэ ломантнеде ве ёнов, путынзе суронзо пилезэнзэ, сельгсь ды токизе келензэ.

**34**Мейле варштась менельс, стакасто укстась ды мерсь: «Эффата», тень смустезэ: “Панжовт”.

**35**Сеске панжтотсть сонзэ пилензэ, ды менсь келезэ, кармась ваньксстэ кортамо.

**36**Иисус кардынзе сынст теде ёвтнамадо. Ансяк, кода Сон а кардыль, сынсь седеяк пек ёвтнильть.

**37**Сынь пек дивсесть ды кортасть: «Весемесь, мезенть Сон теи, пек паро: натой амарицятненьгак теи марицякс, акортыцятненьгак – кортыцякс».



## Марка 8

### Ниле тѣжань андома

<sup>1</sup>Нетъ читнестэ, зярдэ промсть вельть ламо ломанть, ды а мезде ульнесь сыненст ярсамс, Иисус тердинзе эстензэ тонавтницянзо ды мерсь тенст:

<sup>2</sup>«Сеедем сянгорды ломантнень кисэ. Сынь натоў колмо чить аштить Монь вакссо, ярсамс тенст а мезде.

<sup>3</sup>Нолдындерясынъ вачодо кудов, лавшомить ки лангсо, конат-конат эйтэст васолдо састь».

<sup>4</sup>Тонавтницянзо кортасть каршонзо: «Кие тесэ, чаво таркасо, сынст андомс муи кшить?»

<sup>5</sup>Сон кевкстинзе сынст: «Зяро тынк кшинк?» Сынь мерсть: «Сисем».

<sup>6</sup>Иисус кармавтынзе ломантнень ойсеме мода лангс. Саинзе сисем кшитнень, ёвтась Пазонтень сюкпря, синтринзе ды максынзе эсь тонавтницянстэнь явшемс. Сынь явшизь ломантненень.

<sup>7</sup>Ульнестъ сынст зярыя вишкине калнэсткак. Иисус чанстинзе-баславинзе, сынсткак мерсь явшемадо.

<sup>8</sup>Ломантне ярсасть пешкедемазост, кадовозь сускомотнеде пурнасть сисем кептереть.

<sup>9</sup>Ярсыцятнеде ульнестъ тосо нилешка тѣжа. Иисус нолдынзе ломантнень.

<sup>10</sup>Сонсь сеске тонавтницянзо марто озась венчес ды тусь Далманутанъ ёнксов.

### Иисусонь пельде тешксэнь вешема

<sup>11</sup>Тосо Иисуснэнь састь фарисейтне, кармасть мартонзо пелькстамо ды Сонзэ снартнемань-варчавтнемань кисэ вешть невтемс менельстэ тамашанъ тешкс.

<sup>12</sup>Сон, кувакасто укстазь, мерсь: «Мезень кисэ неень пингень ломантне вешить тешкс? Видестэ мерян тенк, сыненст тешкс максозь а ули».

<sup>13</sup>Сон кадынзе сынст тоско, таго озась венчес ды тусь эрькенть омбоце чирев.

### **Иродонь ды фарисеень чапавтомась**

<sup>14</sup>Тонавтницянзо стувтсть мартост саемс кши, венчсэнтъ ульнесь мартост ансяк вейке сукоро.

<sup>15</sup>Иисус кармавтсь тенст: «Ванодо, ванстодо прянк фарисеень ды Иродонь чапавтомадонть».

<sup>16</sup>Тонавтницятне кортасть теде эсь ютковаст: «Улема, те ёвтазь секс, мекс минек марто арась кши?»

<sup>17</sup>Иисус содась, мезде сынъ кортасть, мерсь тенст: «Мекс кортнетядо кшинь аразденть? Арази тынь нейгак яла а чарькодтядо ды а нетядо? Арази кевензазь яла седеенк?»

<sup>18</sup>Сельме мартояк а нетядо? Пиле мартояк а марятадо? Натъ мельсэнккак а ашти:

<sup>19</sup>Зярдонь Мон вете кшитъ синтринь вете тѣжанень, зяро пешксе куйметъ тынь пурныде кадовозь сускомотнеде?» Ёвтасть тензэ: «Кемгавтово».

<sup>20</sup>«Зярдонь сисем кшисэ ниле тѣжат андынъ, зяро кептереть тынь пурныде кадовозь сускомотнеде?» Мерсть: «Сисем».

<sup>21</sup>«Кода эно тынь а чарькодтядо?» – Иисус таго кевкстинзе.

### **Бетсаидасо сокоронь шумбралгавтомась**

<sup>22</sup>Сынъ састъ Бетсаидас. Тосо ветясть Иисуснэнь сокор, энялдсть путомс лангозонзо кедензэ.

<sup>23</sup>Иисус сокоронть саизе кедте, ливтизе сонзэ велестэнтъ, сельгинзе сельмензэ, путынзе лангозонзо кедензэ, кевкстизе сонзэ: «Неят-арась мезеяк?»

<sup>24</sup>Сон варштась ды мерсь: «Неян ломанть, конат теке чувтт, ансяк сынъ ютыть».

<sup>25</sup>Иисус таго путынзе кедензэ сельмензэ лангс, ды кармавтсь тензэ варштамс. Сон пичкась, кармасть весень ваньксстэ нееме.

<sup>26</sup>Мейле Иисус кучизе сонзэ кудов, кармавтсь: «Велентень иля совсе ды киненьгак велесэ теде иля ёвтне».

### **Петрань видькстамозо**

<sup>27</sup>Иисус тусь тонавтницянзо марто Филипень Кесариянь перька велетнес. Ки лангсо Сон кевкстинзе Эсь тонавтницянзо: «Киекс ловить Монь эйсэ ломантне?»

<sup>28</sup>Сынь мерсть каршозонзо: «Веенст Нававыця Иоаннокс, омбонст Илиякс, лият пазмарицятнень эйстэ вейкекс».

<sup>29</sup>Сон кевкстинзе сынст: «Вана тынь киекс Монь ловсамизь?» Петра мерсь каршозонзо: «Тон Пазонь кучовт Идицят».

<sup>30</sup>Сестэ Сон кардынзе сынст, киненьгак теде ёвтнемадо.

### **Иисус ёвты икелев пиштемадонзо ды вельмемадонзо**

<sup>31</sup>Мейле Иисус кармасть тонавтомо эйсэст, кода Ломантнень Цёрантень ламо сави пиштемс. Прявтнэ, попонь покштнэ, Койс тонавтыцятне велявтыть Эйстэнзэ. Сон карми улеме маштозь, ансяк мейле колмоце чистэ Сон кулозьстэ вельми.

<sup>32</sup>Теде Сон видьстэ ёвтнесь. Сестэ Петра тердизе Сонзэ ве ёнов, кармасть каршонзо кортамо.

<sup>33</sup>Иисус велявтсь ды варштась тонавтницятнень лангс, Петрань кардазь, мерсь: «Оргодть Монь вакссто, Сатана! Тонь арсемат ломанень пельде, аволь Пазонь пельде».

<sup>34</sup>Мейле тердинзе ломантнень тонавтницянзо марто, мерсь тенст: «Кинь ули мелезэ модемс Монь мельга, се стувтозо эсь прянзо, саезэ эсь крёстонзо ды молезэ мельган».

<sup>35</sup>Кинь ули мелезэ эсь эрямонзо ванстомс, се ёмавтсы сонзэ. Кие жо ёмавтсы эсь эрямонзо Монь ды Евангелиянтъ кисэ, се ванстсы сонзэ.

<sup>36</sup>Кодамо лезэ ули ломанентень, бути сон сайсы эстензэ весе масторлангонть, теке марто вана эрямонзо ёмавтсы?

<sup>37</sup>Эли кодамо питне мейле максы ломанесь эсь эрямонзо идемань-рамамонь кисэ?

<sup>38</sup>Визделгадындеряй кияк Монь эйстэ ды Монь валтнэде неть авидечисэтнень ды пежетев неень пингень ломантнень икеле, седе визделгады Ломантнень Цёраськак, зярдэ Сон сы Эсь Тетянзо инекчисэ иневанькс ангелтнэнь марто».

## Марка 9

<sup>1</sup>Иисус мерсь тенст: «Видестэ кортан тенк: конат-конат тесэ аштицятнень эйстэ куломо а кенерить, кода несызь Пазонь Инязоркщинь самонть весе вийсэнзэ».

### Иисусонь лиякстомась

<sup>2</sup>Кото чинь ютазь Иисус саинзе мартонзо Петрань, Яковонь ды Иоаннонь, кустинзе сынст сэрей пандо пряс, косо ульнесть ськамоост. Тосо икелест Сон лиякстомсь.

<sup>3</sup>Оршамопелензэ теевсть кувтолдыцякс, пек ашокс, теке лов, конат масторлангсо кодамояк ашолгавтыцяненень истя а ашолгавтовить.

<sup>4</sup>Лиссть тенст Илия марто Моисейть, конат кортасть Иисус марто.

<sup>5</sup>Сестэ Петра мерсь Иисуснэнь: «Тонавтыця! Кода паро миненек тесэ улемс. Эрьга, тейтяно колмо кудынеть: вейкенть Тонеть, вейкенть Моисейнень, вейкенть Илиянень».

<sup>6</sup>Эдь сон сонськак эзь сода, мезть кортамс, эдь сын пек тандадозельть.

<sup>7</sup>Лиссь пель, вельтинзе сынст, ды пеленть потсто каятотсь вайгель: «Те Монь вечкевикс Цёрам, кунсолодо Сонзэ».

<sup>8</sup>Тонавтницятне сеске варштасть пертьпельга, киньгак ваксстост, Иисусто башка, эзьтэ нее.

<sup>9</sup>Пандонтъ прясто валгомсто Иисус кармавтсь тенст: «Киненьгак илядо ёвтне неездентъ Ломантнень Цёрантъ кулозьстэ вельмемазонзо».

<sup>10</sup>Сынь Иисусонь валтнэнь кирдсть мельсэст, ды эсь ютковаст кортнестъ, мезе те кулозьстэ вельмемась.

<sup>11</sup>Мейле тонавтницянзо кевкстизь сонзэ: «Мекс Койс тонавтыцятне кортыть, васняк эряви самс Илиянень?»

<sup>12</sup>Сон мерсь каршост: «Те виде, Илиянень васняк эряви самс ды весементъ аравтомс эсь тарказонзо. Ломантнень Цёрантень, кода сёрмадозь Сонзэ эйстэ, ламо сави пиштемс ды кирдемс нарьгамот.

<sup>13</sup>Ансяк кортан тенк: Илиясь сакшнось, ды ломантне тейсть мартонзо эсест мелест коряс, кода ёвтазельгак пазмарицятнень вельде».

**Аванькс оймеялтсо колазь цёрынень шумбралгавтомась**

<sup>14</sup>Мейле Иисус сась лия тонавтницянзо ваксс, несъ перькаст ламо ломанть ды Койс тонавтыцят, конат пелькстасть мартост.

<sup>15</sup>Иисусонь неезь, весе ломантне дивазь капшазевсть каршозонзо, шумбракстнестъ мартонзо.

<sup>16</sup>Сон кевкстинзе Койс тонавтыцятнень: «Мезень кувалма тесэ пелькстамось?»

<sup>17</sup>Ломантнень ютксто вейкесь мерсь каршонзо: «Тонавтыця, мон ветякшныя Теть цёрам, сонзэ эйсэ аванькс оймеялт, кона теизе акортыцякс.

<sup>18</sup>Косто а кундасы сонзэ, ёртсы масторов, сон карми човонь нолдамо, пейсэнзэ чикордомо, весе чувтоми мик. Мон вешинь Тонь тонавтыцятнень пельде панемс аванькс оймеялтонть, ансяк эзь паневе тенст».

<sup>19</sup>Сон мерсь каршозонзо: «Вай, неень пингень акемиця ломанть! Зярс Монень эряви улемс тынк марто? Зярс Тень кирдемс коронк? Ветинк цёрынентъ Монень».

<sup>20</sup>Ветизь сонзэ Иисуснэнь. Аванькс оймеялтсо колазесь ансяк неизе Сонзэ, оймеялтось сеске цёрыненть рестедизе: сон прась масторов, кеверькшнесь ды пансь човт.

<sup>21</sup>Иисус кевкстизе тетязо: «Умок-аволь истямокс теевсь?» Сон ёвтась: «Эйкакш пингестэ.

<sup>22</sup>Сонзэ ёмавтомань кисэ аванькс оймеялтось ламоксть кайсизе толскак, натой ведьскак. Бути саты виеть мезеяк теемс, ульть седеймарикс, лездак тенек».

<sup>23</sup>Иисус мерсь тензэ: «Бути саты виеть теемс»? «Весемесь тееви сенень, кие кеми».

<sup>24</sup>Эйкакшонтъ тетязо сеске сельведь марто серьгедсь: «Кеман, Азоро! Лездак монь кемеманть виензамо!»

<sup>25</sup>Зярдо Иисус несъ, промить седеяк ламо ломанть, кардызе аванькс оймеялтонть, мерсь: «Тон акортыцякс ды амарицякс теиця оймеялт! Кортан тетъ: лиссть эйстэнзэ ды икелепелев зярдояк иля совсе эйзэнзэ».

<sup>26</sup>Оймеялтось серьгедезь, цёрыненть пек сорновтозь, лиссь. Цёрынесь теевсь теке кулозекс, ламот мик кортасть, сон кулось.

<sup>27</sup>Иисус саизе кедте, кепедизе сонзэ, ды сон стясь.

<sup>28</sup>Мейле, зярдо Иисус совась кудос, ды кадовсь тонавтницянзо марто съкамонзо, сынъ кевкстизь Сонзэ: «Мекс миненек оймеялтось эзь паневе?»

<sup>29</sup>Сон ёвтась тенст: «Истямо оймеялтось кодаяк лиякс а паневи, ансяк озномасо ды постонь кирдемасо».

<sup>30</sup>Иисус ды тонавтницянзо кадызь те тарканть ды тустъ Галилеянь трокс. Сонзэ ульнесь мелезэ, кияк теде аволь сода,

<sup>31</sup>эдь Сонензэ эрявсь тонавомс тонавтницянзо. Сон кортась тенст: «Ломантнень Цёрась ули максозь-миезь ломантнень кедь алов,

маштсызь Сонзэ, ды маштомадо мейле колмоце чистэ Сон кулозьстэ вельми».

<sup>32</sup>Ансяк сынъ эзизь чарькоде неть валтнэнь смустест, кевкстнемензэ жо пельсть.

#### **Кие весемеде покш?**

<sup>33</sup>Иисус сась Капернаум ошс. Зярдэ Сон ульнесь тонавтницянзо марто кудосо, кевкстинзе сынст: «Мезде тынь ки лангсо эсь юткованк кортыде?»

<sup>34</sup>Сынъ чатьмонсть: ки лангсо сынъ эсь ютковаст пелькстасть – кие эйтэст весемеде покшось.

<sup>35</sup>Иисус озась, тердинзе кемгавтовонест, мерсь тенст: «Кинь мелезэ покшокс улемс, се улезэ весемеде вишкине ды весенень урекс».

<sup>36</sup>Мейле Иисус сайсь эйкакш, аравтызе тонавтницянзо куншкас, кутмордызе ды кортась тенст:

<sup>37</sup>«Кие саи эстензэ Монь лемем кисэ вейке истямо эйкакш, се Монь сайсамам. Кие Монь сайсамам, се аволь ансяк Монь, Куцицямгак сайсы».

#### **Кие аволь минек каршо, се минек кисэ**

<sup>38</sup>Иоанн каршонзо мерсь: «Тонавтыця! Минь неинек ломань, кона Тонь лемсэ идемевсть панси, ансяк сонсь мартонок а яки. Минь кардынек сонзэ, мекс сон минек марто а яки».

<sup>39</sup>Иисус мерсь: «Илинк карда сонзэ: кие Монь лемсэ тамашат теи, сенень Мондень берянь вал а ёвтави.

<sup>40</sup>Кие аволь тынк каршо, се тынк кисэ.

<sup>41</sup>Кемеде Монень: кие максы тенк ведь кече секс, мекс тынь Христосонь, се питнень пандомавтомо а кадови.

<sup>42</sup>А вана кие соавты пежетьс куш вейкешка неть Монень кемиця вишкинетнень-асодавикстнэнь ютксто, сенень седе паро улель, поведельть кирьгазонзо яжамо покш кев ды ёртовлизь иневедьс.

<sup>43</sup>Бути тонь кедеть соавты эйсэть пежетьс, керик сонзэ. Ве кедтеме пингеде пингень эрямонтень совамось ули теть седе паро, кавто кедь марто тоначинь амадница толс ёртомадонть,

<sup>44</sup>косо сынст сэви суксосткак а кулыть ды толоськак а мадни.

<sup>45</sup>Бути тонь пильгеть соавты эйсэть пежетьс, керик сонзэ. Ёколдозь пингеде пингень эрямонтень совамось ули теть седе паро, кавто пильге марто тоначинь амадница толс ёртомадонть,

<sup>46</sup>косо сынст сэви суксосткак а кулыть ды толоськак а мадни.

<sup>47</sup>Бути тонь сельметь соавты эйсэть пежетьс, таргик сонзэ. Ве сельме марто Пазонь Инязорксчинтень совамось ули теть седе паро, кавто сельме марто тоначинь амадница толс ёртомадонть,

<sup>48</sup>косо сынст сэви суксосткак а кулыть ды толоськак а мадни.

<sup>49</sup>Эрвась салтови толонь пачк ютазь ды эрва аноксоськак салтови салсо.

<sup>50</sup>Салось лезэв, ёмавтындерясы вана сон растонзо, сестэ кода тейсак одов саловокс? Ванстынк эсенк эйсэ салонть ды эрядо ялгакчисэ эсь юткованк».

## Марка 10

### Иисус корты урвакстомадо ды явомадо

<sup>1</sup>Иисус тусь тосто ды сась Иудеянь масторс Иордан леенть омбоце пелев. Таго промсть Тензэ пек ламо ломанть, ды Сон, кода свал, кармась сынст тонавтомо.

<sup>2</sup>Мольсть ваксозонзо фарисейть, мелест ульнесь Сонзэ снартнемс-варчавтнемс, кевкстизь: «Мереви-арась мирдентень явомс нинзэ эйстэ?»



<sup>3</sup>Сонгак кевкстинзе сынст: «Кодамо теде кармавтокск кадсь тенк Моисей?»

<sup>4</sup>Сынь ёвтасть: «Моисей мерсь сёрмадомс явомадо конёв ды явомс эйстэнзэ».

<sup>5</sup>Иисус кортась каршост: «Калгодо седеенк кувалма сон сёрмадызе тенк те кармавтоксконтъ.

<sup>6</sup>Пазось менельтнень-мастортнэнь теемстэ теинзе цёрантькак ды авантькак.

<sup>7</sup>Секскак цёрась кадсынзе тетянзо-аванзо,

<sup>8</sup>сюлмави нинзэ марто, ды сынь кавонест теевить вейке рунгокс. Мейле кармить улеме аволь кавто, а вейке ломанькс.

<sup>9</sup>Лисни, мезенть Пазось вейс сюлмизе, сень ломанесь илязо явно».

<sup>10</sup>Кудосо аштемстэ тонавтницяно таго кевкстизь Сонзэ тень кувалма.

<sup>11</sup>Сон кортась тенст: «Кие яви нинзэ эйстэ ды урваксты лия лангс, се ускури эсь нинзэ икеле.

<sup>12</sup>Истя ниськак, явиндеряй мирдензэ эйстэ ды лисиндеряй лиянень, ускури».

### **Иисус баслави-чансти эйкакшт**

<sup>13</sup>Кандтнестъ-ветнестъ Иисуснэнь эйкакшт, конатнень лангс вешсть путомс кедензэ. Тонавтницяно сынст кардасть.

<sup>14</sup>Тень неезь, Иисус кежиявтсь ды мерсь тенст: «Мереде эйкакштнэненъ сакшномс Монень, илядо карда эйсэст, эдь истятнэнь ули Пазонь Инязоркскист.

<sup>15</sup>Видестэ кортан тенк: “Кие Пазонь Инязоркскинть а вастсы эйкакш ладсо, се тозонь а совави”».

<sup>16</sup>Мейле Иисус озавтынзе эйкакштнэнь элезэнзэ, путынзе лангозост кедензэ ды чанстинзе-баславинзе.

### Сюпав ломань

<sup>17</sup>Иисусонь ки лангов сыргамстонзо мольсь ваксозонзо ве ломань, прась икелензэ кумажа лангс, кевкстизе Сонзэ: «Паро тонавтыця! Мезе монень теемс пингеде пингень эрямонтень совамга?»

<sup>18</sup>Иисус мерсь тензэ: «Мейс тон Монень “паро” мерят? Паздо башка кияк парокс а эрси.

<sup>19</sup>Тон, нама, кармавтокстнэнь содасыть: иля ускура, иля маштне, иля сала, иля кенгеле, иля манче, ловт ломанькс тетять-авать».

<sup>20</sup>Сон ёвтась каршозонзо: «Тонавтыця, весе тень мон топавтан од пингестэ саезь».

<sup>21</sup>Иисус вечкезь варштась лангозонзо ды мерсь тензэ: «Тонеть вейке ансяк а саты: азё, весе, мезеть ули, микшник. Ярмактнень явшить пурныцятнень ланга. Сестэ карми улеме теть сюпавчи менель лангсо. Теде мейле сак, саик эсь крёстот ды мольть Монь мельга».

<sup>22</sup>Неть валтнэде нусмакадсь ломаненть чамазо, ды сон мелявтозь тусь ве ёнов: эдь вельть ламоль сонзэ ули-парозо.

<sup>23</sup>Иисус варштась пертьпельга ды мерсь тонавтницянстэнь: «Вай, кодамо стака сюпавтненень совамс Пазонь Инязорксчинтень»

<sup>24</sup>Тонавтницянзо дивасть Сонзэ валтнэненень. Иисус таго мерсь каршозост: «Эйденъ, пек стака сюпавчи лангс кемицятненень максомс пряст Пазонь Инязорксчинтень!»

<sup>25</sup>Сюпав ломанентень пек стака совамс Пазонь Инязорксчинтень, седе шожда верблюдонть салмуks варява ютамс».

<sup>26</sup>Сынь седеяк дивасть ды кевкстнестъ вейкест-вейкест: «Кинень эно сестэ идеви?»

<sup>27</sup>Иисус варштась лангозост, мерсь тенст: «Ломанентень те а тееви, тееви Пазонтень, эдь Пазонтень тееви весе».

### Тонавтницятненень питнень пандома

<sup>28</sup>Сестэ Петра кармась Тензэ кортамо: «Вана, минь кадынек весементь ды туинек Тонь мельга».

<sup>29</sup>Иисус каршонзо мерсь: «Видестэ кортан тенк: кие Монь кисэ ды Евангелиянть кисэ кадызе кудонзо, лелянзо-ялаксонзо, патянзо-сазоронзо, тетянзо-аванзо, нинзэ, эйкакшонзо, паксянзо,

<sup>30</sup>сенень максови сядонь кирда: ней, теке шкастонть, кудот, лелят-ялакст, патят-сазорт, тетят-ават, эйкакшт, паксят, теке марто майсемат-пансемат ды икелепелень шкастонть пингедэ пингень эрямо.

<sup>31</sup>Ды ламот, конат те эрямосонть васенцеть, теевить меельцекс, а вана меельцетне – васенцекс».

### **Иисус корты эсензэ куломадо**

<sup>32</sup>Сынь кузсть кинть ланга Ерусалимев, Иисус мольсь сынст икеле, тонавтницятне ульнесть талакадозь ды мольсть Сонзэ мельга пелезь. Сон таго тердинзе кемгавтово тонавтницянзо, кармась тенст ёвтнеме седе, мезе мартонзо карми улеме:

<sup>33</sup>«Вана минь мольтяно Ерусалимев, тосо Ломантнень Цёрась ули максозь попонь покштнэнь ды Койс тонавтыцятнень кедьс, конат Сонзэ судясызь куломас, макссызь Сонзэ лия раськень ломанень кедьс.

<sup>34</sup>Сынь кармить Сонзэ нарьгамо, локшосо керямо, сельгенеме, ды маштсызь Сонзэ. Ансяк мейле колмоце чистэ Сон кулозьстэ вельми».

<sup>35</sup>Яков марто Иоанн, Зеведеень цёратне, састь Иисуснэнь ды мерсть: «Тонавтыця! Минек ули меленек: теевлик тенек сень, мезе кедьстэть вештяно».

<sup>36</sup>«Мезе меленк теевтемс тенк Монь кедьстэ?» – кевкстинзе Иисус.

<sup>37</sup>«Мерть озамс вейкенень эйстэнек эсь инексчисэть вить кедь ёнозот, омбоценень – керш кедь ёнозот», – кортасть сын Тензэ.

<sup>38</sup>Иисус кортась тенст: «Аздатадо, мезе вештядо. Саты а саты нарденк симемс се пиштемань кеченть, конань Мон симан, ды нававтовомс се пиштемань нававтомасонтъ, конаньсэ Мон нававтован?»

<sup>39</sup>Сынь ёвтась: «Саты нарденек». Сестэ Иисус поладсь тенст: «Кеченть, конань Мон симан, карматадо симеме, ды нававтомасонтъкак, конаньсэ Мон нававтован, ультядо нававтозь.

<sup>40</sup>Ансяк вить ёнов ды керш ёнов озамонь максомась аволь Монь олясо. Неть таркатне максовить сетненень, кинень сынь анокстазь».

<sup>41</sup>Зярдэ тень маризь лия кемень тонавтницятне, сынь пек ацирьгадсть Яков марто Иоанн лангс.

<sup>42</sup>Иисус тердинзе сынст кемгавтовонест ды мерсь: «Тынь содатадо: неть, конат лововить раськень прявтокс, аштить азорокс эсест раськетнень лангсо, ине ветицятнеяк кирдить эйсэст кедест ало.

<sup>43</sup>Тынк ютксо вана истя илязо уле: кинь мелезэ улемс тынк ютксо весемеде покшокс, се улезэ лиятненень важокс.

<sup>44</sup>Кинь мелезэ улемс тынк ютксо васенцекс, се улезэ весенень урекс.

<sup>45</sup>Ломантнень Цёраськак сась аволь Эстензэ важодевтеме, мекевланк Сонсь сась важдеме ды максомо Эсь эрямонзо весень идемаст-рамамоост кисэ».

#### **Иисус шумбралгавтызе сокор Бартимеень**

<sup>46</sup>Иисус эсь тонавтницянзо марто састь Ерихон ошс. Зярдэ Сон лисиль Ерихонсто тонавтницянзо ды ламо ломантнень марто, ки чиресэ аштесь озадо Тимеень цёразо, сокор пурныцясь Бартимей.

<sup>47</sup>Сон марясь, те ютыцясь Назаретэнь Иисус, ды кармась пижнеме: «Давидэнь Цёра, Иисус! Ульть седеймарикс монень!»

<sup>48</sup>Ламо ломанть кармавтсть эйсэнзэ чатьмонеме, ансяк сон яла седеяк пек пижнесь: «Давидэнь Цёра! Ульть седеймарикс монень!»

<sup>49</sup>Иисус лоткась ды мерсь: «Тердинк сонзэ». Тердизь сокоронть, мерить тензэ: «Иля пеле, стяк, Сон терди эйсэть».

<sup>50</sup>Сон каизе-ёртызе ланга оршамонзо, стясь ды мольсь Иисуснэнь.

<sup>51</sup>Иисус кевкстизе: «Мезе мелеть теевтемс Монь кедьстэ?» Сокорось мерсь Тензэ: «Тонавтыця, теить неицякс сельмень!»

<sup>52</sup>Иисус мерсь тензэ: «Азё, кемемат шумбралгавтынзеть тонь». Сон сеске кармасть нееме ды тусь кияванть Иисус мельга.

## Марка 11

### Иисусонь Ерусалимс совамозо

<sup>1</sup>Зярдосынь пачкодсть Ерусалим малас, Бетфагия марто Бетаниянь велетнес, конат сравтовсть Ойумарькс пандонть чирева, Иисус кучинзе кавто тонавтницянзо икелев,

<sup>2</sup>кармавть тенст: «Азёдо велентень, кона икеленк, ды эйзэнзэ совамсто сеске мутадо содозь осёлонь вашо, конань лангс кияк зярс эзь ойсе. Юкстинк сонзэ, ветинк тей».

<sup>3</sup>Кияк тенк мериндеряй: «Мезе истя тейтядо?» – ёвтадо: «Сон эряви Азоронтень, ды сонзэ сеске мекев велявтсызь».

<sup>4</sup>Сынь тусть, муизь орта ушосо содозь вашонть, юкстизь сонзэ.

<sup>5</sup>Конат-конат сесэ аштицятнеде кевкстизь сынст: «Мезе истя тейтядо, мейс вашонть юкстинк?»

<sup>6</sup>Сынь ёвтасть истя, кода кармавтынзе Иисус. Сетне нолдызь сынст.

<sup>7</sup>Ветизь вашонть Иисуснэнь ды каизь лангозонзо эсь оршамопелест. Иисус озась лангозонзо ласте.

<sup>8</sup>Ламот ацнесть эсь оршамопелест Иисусонь кинть ланга, конат-конат керсесть чувтосто тарадт ды ацнесть эйсэст кинть ланга.

<sup>9</sup>Икелест молицятне ды удалост ютыцятне сеересть: «Осанна! Улезэ чанствязь-баславазь Азоронть лемсэ Сыцясь!»

<sup>10</sup>Улезэ чанстязь-баславазь Давидэнь, минек тетянок, Азоронтъ лемсэ сыця инязорксчись! Осанна Верепазонтень!»

<sup>11</sup>Иисус сась Ерусалимс ды совась Пазонь кудос, тосо весементь ванызе; шкась уш ульнесь сундерьгадома малав, секс Сон тусь кемгавтовотнень марто Бетанияв.

**Иисус панинзе Пазонь кудосто микшнициятнень-рамсициятнень**

<sup>12</sup>Омбоце чистэнтъ, зярдо лиссть Бетаниясто, Иисусонь вачсь пекезэ.

<sup>13</sup>Ве ёндо несъ лопава инжир чувто, тусь ёнонзо варштамо, улить-арастъ лангсонзо инжирт. Малазонзо сазь, лопадо башка мезеяк лангстонзо эзь муе: инжирэнь шкась зярс эзь сакшно.

<sup>14</sup>Иисус мерсь чувтонть: «Кадык пингезэть тонь лангсто кияк а ярсы инжирдэть». Тень маризь тонавтнициянзояк.

<sup>15</sup>Сынь таго састь Ерусалимев. Иисус совась Пазонь кудонь пирявксонть потс ды кармасть тосто микшнициятнень-рамсициятнень панеме. Сон ярмаконь полавтнициятнень столест, гулькань микшнициятнень эземест сявордтнинзе

<sup>16</sup>ды эзь мере киненьгак кандомс мезеяк Пазонь кудонь пирявкс потмонть трокс.

<sup>17</sup>Сон тонавтсь эйсэст: «Арази апак сёрмадо: “Монь кудонтень кармить мереме весе раськетнень ознома кудо”? Тынь вана теинк сонзэ салыцянь-маштницянь пизэкс».

<sup>18</sup>Тень маризь попонь покштнэ ды Койс тонавтыцятне, сынь вешнестъ, кода маштомс Иисусонь, ансяк пельсть Эйтэнзэ: эдь Сонзэ тонавтомазо совась ломантнень седей ёжос.

<sup>19</sup>Зярдо чизэ чопотетсь, Сон лиссь ошстонть.

**Коськезь инжир чувто**

<sup>20</sup>Валске, вакска ютамсто, неизь: инжир чувтось ундокснэк-мезнек коськсь.

<sup>21</sup>Петрань мелезэнзэ ледсь, мезе ульнесь икеле, ды мерсь Иисуснэнь: «Тонавтыця, вантая! Чувтось, конань Тон сюдык, коськсь».

<sup>22</sup>Иисус тень каршо мерсь тенст:

<sup>23</sup>«Кемедэ Пазонтень. Алкукс кортан тенк: бути кияк мери те пандонтень: “Кепедевть ды ёртовт иневедьс”, ды седейсэнзэ а карми кавтолдомо, – мекевланк, кемезеви: те тееви сонзэ валонзо коряс – сестэ се улияк тензэ.

<sup>24</sup>Тень кувалма мерян тенк: весе, мезе вештядо ознозь, кемедэ: те максозь ули тенк – ды се улияк тенк.

<sup>25</sup>Зярдэ ознотадо ды киньгак лангс мезеяк берянь седейсэнк кирдтядо, нолдынк-простинк сынст. Сестэ менельсэ Тетянккак нолдасынзе-простясынзе тенк чумонк-тапавксонк.

<sup>26</sup>Бути а нолдасынк, менельсэ Тетянккак а нолдасынзе тынк чумонк-тапавксонк».

#### **Евреень поптнэ кевкстнить Иисусонь Сонзэ азорксчиденть**

<sup>27</sup>Сынь таго састь Ерусалимс. Зярдэ Иисус ульнесь Пазонь кудонь пирявксонть потсо, мольсть ваксозонзо попонь покштнэ, Койс тонавтыцятне ды прявтнэ.

<sup>28</sup>Сынь кевкстизь Сонзэ: «Кодамо азоркчисэ теят Тон неть тевтнень? Кие максызе Теть азоркчинть истя теемс?»

<sup>29-30</sup>Иисус каршост мерсь: «Монгак максан тенк вейке кевкстема, ёвтадо Тень: Иоаннонь нававторась менельстэ ульнесь эли ломантнень пельде? Кода арсетядо? Сестэ Монгак ёвтан тенк, кудамо азоркчисэ теян неть тевтнень».

<sup>31</sup>Сынь кортнесть эсь ютковаст: «Мериндерятано: “Менельстэ”, сестэ Иисус кевкстьсамизь: “Мекс эно эзиде кеме тензэ?”

<sup>32</sup>Мериндерятано: “Ломантнень пельде”». – сынь пельсть ломантнеде: Иоаннонь весе ловсть алкуксонь пазмарицякс.

<sup>33</sup>Секс мерсть Иисусонь каршо: «А содатано». Сестэ Иисус сынст каршо мерсь: «Монгак а ёвтан тенк, кодамо азорксчисэ теян неть тевтнень».

## Марка 12

### Ломанде, кона максызе винаумарькс пирензэ сиведезнень

<sup>1</sup>Иисус кармась кортамо тенст валвелявкссо: «Ве ломань озавтсь винаумарькс пире, пиризе пирявтсо, чувсь умарень чемерямо латко, тейсь ванстома башня ды сиведсь пиренть мельга якицят. Сонсь тусь лия масторов.

<sup>2</sup>Сась умарень кенерема шка, сон кучизе важонзо винаумарь пирень мельга якицятнень кедьстэ умарень таликанзо саеме.

<sup>3</sup>Сынь сонзэ кундызь, чавизь ды кучизь мекев чавонь кедть.

<sup>4</sup>Таго азорось кучсь тенст лия важо, сынь сеньгак прянзо порксызь кевсэ ды нарьгазь нолдызь.

<sup>5</sup>Сон таго лията кучсь, сень маштызь. Лия кучозтнень марто тейсть истя жо: конань чавизь, конань маштызь.

<sup>6</sup>Сонзэ кадовсь ансяк вечкема вейкине цёразо. Меельце пелев сонзэяк кучизе тенст, арсезь: “Паряк монь цёранть эйстэ визделгадыть”.

<sup>7</sup>Пиренть мельга якицятне мерсть вейкест-вейкест туртов: “Те буень поладыцязо, аядо, маштсынек сонзэ, сестэ сонензэ кадовиця ули-парось ули миненек”.

<sup>8</sup>Сонзэ кундызь, маштызь, винаумарь пирестэнтэ уловонзо ушов ёртызь.

<sup>9</sup>Мезе теи тенст пирень азорось? Сон сы, маштсынзе винаумарькс мельга якицятнень ды пиренть макссы лиянень.

<sup>10</sup>Арази тынь эзинк ловно тень Сёрмадовксстонть: “Се кевесь, конань ёртызь кудонь теицятне, теевсь ужонь-уголонь кирдиця юр кевекс.

<sup>11</sup>Тень теизе Азорось, ды миненек сон неяви тамашак”?»



<sup>12</sup>Сынь чарькодсть: те валвелявксонтъ Иисус ёвтнизе сынdest. Секс сынъ вешнестъ, кода Сонзэ кундамс, ансяк пельсть ломантнеде. Мейле кадызь Сонзэ ды тустъ.

#### **Кесарнень каявкс**

<sup>13</sup>Сынь кучизь конат-конат фарисейтнень ды Иродонь ломантнень Иисусонь вал лангсо кундамо.

<sup>14</sup>Сеть састъ тензэ, кортыть: «Тонавтыця, минь содатано, Тон кортат ды теят видестэ, киненьгак савтомадо а арсят ды кодамояк ломань а яват. Тон видестэ тонавтат Пазонь кинтень. Ёвтака, эряви-арась Римень кесарнень каявкс пандомс? Эряви миненек пандомс сонзэ эли а эряви?»

<sup>15</sup>Иисус пачк несъ сынст аванькс седеест, мерсь тенст: «Мекс снартнетядо-варчавтнетядо Эйсэнь? Кандодо Тень динар ярмак, ванса».

<sup>16</sup>Сынь кандсть, Сон кевкстинзе: «Кинь чамась ды лемесь сонзэ лангсо?» Сынь мерсть Тензэ: «Кесарень».

<sup>17</sup>Иисус каршост мерсь: «Максодо кесарнень кесаренсентъ, а вана Пазонтень – Пазонсентъ». Весе тустъ неть валтнэнь лангсо дивсезь.

#### **Урвакстомадо ды кулозьстэ вельмемадо**

<sup>18</sup>Састъ Иисуснэнь зяряя саддукейтъ, конат кулозьстэ вельмемантень а кемильть, ды кевкстизь Сонзэ:

<sup>19</sup>«Тонавтыця, Моисей сёрмадсь миненек Койсэнтъ: “Бути урвакстозь ломанесь кулы эйкакштомо ды кадови низэ, сестэ кулозентъ ялаксо саезэ эстензэ те нинть полакс, ды сынъ чачтост эйкакш. Истя те эйкакшось ули ловозь кулозь лелянтъ эйкакшокс”.

<sup>20</sup>Ульнестъ сисем лелят-ялакст. Васенцесь урвакстсь ды кулось, эйкакшт эзь кадо.

<sup>21</sup>Нинзэ саизе омбоцесь, сонгак кулось, эйкакшт эзь кадо; колмоцентъ мартояк истя теевсь.

<sup>22</sup>Истя сайнизь сонзэ никс весе сисемнест, ансяк кияк эйкакшт эзь кадо. Весемеде мейле кулось ниськак.

<sup>23</sup>Сестэ, зярдо сынъ кулозьстэ вельмить, конанень эйстэст ули сон никс? Эдь сон весе сисемнест туртов ульнесь никс».

<sup>24</sup>Иисус каршост мерсь: «Нама, тынк тапи-човори Сёрмадовкстнэнь ды Пазонь виенть а содамось!

<sup>25</sup>Зярдо кулозьстэ вельмить, а кармить урвакстнемаяк, мирденень лиснемаяк. Вельмезтне кармить эрямо кода менельсэ ангелтнэ.

<sup>26</sup>Тынь, нама, содатадо кулозьстэ вельмемадо. Арази тынь эзинк ловно пальця куракштонтъ Моисеень книгасто ёвтнеманть? Тосо Пазось мерсь Моисейнень: “Мон Авраамонь Пазан, Исаконь Пазан ды Яковонь Пазан”.

<sup>27</sup>Лисни, Пазось эрицятнень Паз, аволь кулозтнень. Ванан, тынь пек тапавтадо-човорявтадо».

#### **Сехте покш кармавтовоксось**

<sup>28</sup>Койс тонавтыцятнестэ вейкесь маризе сынст пелькстамост ды каршост Иисусонь валонь парсте ёвтамонтъ, мольсь ваксозонзо ды кевкстизе Сонзэ: «Конась весе кармавтовокстнэнь эйстэ сехте эрявиксэсь?»

<sup>29</sup>Иисус мерсь каршонзо: «Весе кармавтовокстнэнь эйстэ сехте эрявиксэсь вана те: “Кунсолок, Израиль! Азорось, минек Пазось – вейкине Азорось.

<sup>30</sup>Вечкть Азоронтъ, эсь Пазот, весе седейсэть, весе оймесэть, весе превсэть-содавксот, весе вийсэть”. Те васенце кармавтовоксось!

<sup>31</sup>Омбоце кармавтовоксось сонзэ кондямо: “Вечкть малавиксэть, кода эсь прят”. Лия нетнеде башка седе покш кармавтовокс арась».

<sup>32</sup>Койс тонавтыцясь мерсь Иисуснэнь: «Те вадрясто ёвтазь, Тонавтыця! Тон видестэ мерить: Пазось вейкине, ды Сондензэ башка лия паз арась.

<sup>33</sup>Сонзэ вечкемс весе седейсэ, весе превсэ, весе оймесэ, весе вийсэ ды малавиксэтькак вечкемс, кода эсь прят, те пултамонь анокстнэдеяк ды Пазнэнь лия казнетнедеяк седе ламо».

<sup>34</sup>Иисус неIZE превейстэ каршонзо валонь ёвтамонтэ ды мерсь тензэ: «Тон Пазонь Инязорксчидентэ аволь васолат». Теде мейле киньгак эзь сато смелчизэ макснемс Тензэ кевкстемат.

<sup>35</sup>Пазонь кудосо тонавтомсто Иисус мерсь: «Кода истя Койс тонавтоцятне кортыть: Пазонь кучовт Идицясь – Давидэнь цёра?»

<sup>36</sup>Ансяк сонсь Давид Пазонь Оймеялтонть ветямонзо коряс ёвтась: «Азорось мерсь монь Азоронтень: Озак Монь вить кедь ёнов, зярс Мон а тейсынэ Тонь душманот пильгеть путома таркак».

<sup>37</sup>Сонсь Давид мери Тензэ Азоро. Кода сестэ Сон ули тензэ цёракс?» Ламо ломантне мельспаросо кунсолость эйсэнзэ.

<sup>38</sup>Тонавтомсто Иисус кортась тенст: «Ванстодо прянк Койс тонавтоцятнеде. Сынэ вечксызь кувака оршамосо якамонтэ ды ошкужосо мартост шумбрактнеманть,

<sup>39</sup>синагогасо – икеле таркатнесэ озадо аштеманть, каванямо кудосо – васенце таркатнес озамонтэ.

<sup>40</sup>Сынэ нельгить доватненэ кудост, ды прят невтемань кисэ кувать озныть. Истятнэ седеяк стакасто судязь улить!»

#### **Довань максовкс**

<sup>41</sup>Мейле Иисус озась ярмаконь кирдемканть каршо ды вансь, кода ломантне каясть ярмактненэ. Ламо сюпавтне кайсестэ ламонь-ламонь.

<sup>42</sup>Сась ве кажов дова авине ды каясь пижень кавто ярмаккеть, весемезэ ве трёшник.

<sup>43</sup>Иисус тердинзе эсь тонавтоцятнэ, мерсь тенст: «Видестэ кортан тенк: те кажов довась каясь ярмаконь кирдемкас сехте ламо весе путыцятненэ эйстэ.

<sup>44</sup>Весе каясть ламочидест, сон вана каясь арасьчидензэ ды максызе весе, мезезэ ульнесь, мейсэ тензэ эрямаль».

## Марка 13

### Пингень прядовама тешкстнэ

<sup>1</sup>Пазонь кудостонть лисемстэ тонавтницянзо ютксто вейкесь кецязь мерсь Иисуснэнь: «Тонавтыця, вантая, кодат парт кевтне, кодат покшт кудотне!»

<sup>2</sup>Иисус каршонзо мерсь: «Несыть неть покш мазый кудотнень? Весе калавтозь улить, а кадови эйстэст кев лангс кевгак».

<sup>3</sup>Зярдо Сон озадо аштесь Ойумарькс пандонтъ лангсо Пазонь кудонтъ каршо, сестэ Петра, Яков, Иоанн ды Андрей, конат кадовсть мартонзо ськамо, кевкстизь Сонзэ:

<sup>4</sup>«Ёвтак тенек, зярдо те ули, ды кодамо тешксэнь коряс содави весе тень топавтомась?»

<sup>5</sup>Иисус каршост кармась кортамо: «Ванодо, кияк аволидизь маня.

<sup>6</sup>Ламот сыть кекшезь Монь лементъ ало ды кармить прят ёвтамо: “Те Мон”. Сынь ламонь ильведстьсызь-манясызь.

<sup>7</sup>Зярдо марятадо маласо войнань гайть ды васоло войнадо кулят, илядо тандале, – тенень эряви улемс, ансяк те зярс аволь песь.

<sup>8</sup>Раське кепедеви раськень каршо, мастор – масторонь каршо. Таркань-таркань улить модань сорномат, сыть вачо иеть ды шалномат-талномат. Неть майсематне ансяк теке чачтомань пиштематнень ушодксост.

<sup>9</sup>Тынь ванодо эсь мельганк, – тынк ветятадызь судс, синагогатнесэ кармить чавомонк. Монь кисэ тыненк сави стямс прявтнэнь ды инязортнэнь икелев ды ёвтнемс сыненст Мондень.

<sup>10</sup>Ансяк васня эряви ёвтнемс весе раськетнень ланга Кенярксов кулянть.

<sup>11</sup>Зярдэ тынк макстадызь прывтнэнь кедьс, илядо мелявто икелев ды илядо арсе, мезть тенк кортамс. Ёвтынк сеть валтнэнь, конат тенк те шкастонть максовить. Эдь кортыцякс ули Пазонь Оймаеялтось, аволь тынь.

<sup>12</sup>Лелясь макссы-мийсы куломас ялаксонзо, тетясь – эйкакшонзо, эйкакштнэ стить тетяст-аваст каршо ды кармить макснеме сынст куломас.

<sup>13</sup>Монь лементь кисэ весеменень ультядо а вечкевиксэкс, кие жо весе тень цидярдсы педэ пес, се ванстови-идеви.

<sup>14</sup>Зярдэ несынк аваньксчинь нулгодьксэнтъ, конадэ кортась Даниил пазмарицясь, аштицякс тосо, косо сонензэ а улемаль – ловныцясь чарькодезэ! – сестэ сеть, конат Иудеясо, оргодест пандо лангов.

<sup>15</sup>Кие тондавсь кудо лангс, се илязо валго алов, илязо сова эсь кудозонзо мезеньгак саеме.

<sup>16</sup>Кие паксясо, илязо велявто мекев кудов оршамонзо кисэ.

<sup>17</sup>Кодамо стака ули сеть читнестэ пешксесэтненень ды потесэ эйкакшонь потицятненень!

<sup>18</sup>Ознодо, илязо уле тынк оргодемась тельня.

<sup>19</sup>Сеть читнестэ ули истямо пиштема, кодамо арасель теевеманть ушодомсто, зярдэ Пазось теинзе менельтнень-мастортнэнь, ды натой течинь чис ды зярдояк а ули.

<sup>20</sup>Бути Азорось аволинзе аламогавто неть читнень, сестэ кияк аволь ванстово. Ансяк сетнень кисэ, конатнень Сонсь кочкинзе, аламогавтынзе сеть читнень.

<sup>21</sup>Сестэ кияк мериндеряй тенк: “Вана тесэ Пазонь кучовт Идицясь!” эли: “Вана тосо Сон!” – илядо кеме.

<sup>22</sup>Се шкастонть кармить само кенгели христост ды кенгели пазмарицят, конат теить покш дивань тешкст ды тамашат. Сынъ снартыть натой Пазонь кочкавтнэньгак ильведстемс-манямс, бути те тееви тенст.

<sup>23</sup>Вансто до прянк. Вана Мон весемень ёвтыя тенк икелев.

<sup>24</sup>Сеть читнестэ, те пиштемадонть мейле, чись чополгады, кованьскак а карми максомо валдо,

<sup>25</sup>тештетнеяк прыть менельстэ, менелень вийтнеяк теить сорк.

<sup>26</sup>Сестэ несызь Ломантнень Цёранть пель лангсо самонзо покш вийсэнзэ ды иневалдосонзо.

<sup>27</sup>Сестэ Сон кучсынзе ангелтнэнь, пурнасынзе Сонсензэ кочкавтнэнь масторонь ниле ёндо, моданть чирестэ – менелень чирес.

<sup>28</sup>Тонавтнеде чарькодеме инжир чувтонть коряс: зярдо сонзэ тарадонзо чевтемить ды нолдыть лопат, сестэ содави – кизэсь маласо.

<sup>29</sup>Истя тесэяк, зярдо тынь несынк тень топавтоманть, сестэ чарькодтядо – те шкась маласо, кенкш лангсо.

<sup>30</sup>Видестэ кортан тенк: неень пингень ломантне ёмамо а кенерить, кода весе те топавтови.

<sup>31</sup>Менелесь ды масторось ёмить, ансяк Монь валон а ёмить».

#### **Чись ды часось а содавить**

<sup>32</sup>«Се чиденть эли частонть кияк а соды: менелень ангелтнэяк, Цёраськак, ансяк Тетясь.

<sup>33</sup>Ванодо, уледе анокт ды ознодо: а содатадо, зярдо сы те шкась.

<sup>34</sup>Те шканть самось моли истямо тев ёнов: ломанесь ки лангс туемстэ кудонзо кадсы эсь важонзо кедь лангс ды эрвантень максы тев; орта лангсо аштицантеньгак мери ванстомодо.

<sup>35</sup>Секскак ванодо, уледе анокт, эдь а содатадо, зярдо сы кудазорось: чокшне ланга, эли пелеве шкане, эли атякш морамо шкане, эли валске ланга.

<sup>36</sup>Апак учо самсто сон илядызь стардо тынк удомсто.

<sup>37</sup>Мезть ней тыненк кортан – тень весенень кортан: илядо удо, уледе анокт».

## Марка 14

### Евреень поптнэ арсить маштомс Иисусонь

<sup>1</sup>Кавто чинь ютазь улемаль евреень Инечинтень ды Ламбамсто сукоронь покшчинтень. Попонь покштнэ ды Койс тонавтыцятне вешнеть, кода Иисусонь ёжовчисэ кундамс ды маштомс.

<sup>2</sup>Сынь кортасть: «Ансяк тень эряви теемс аволь покшчистэ, иляст кепете ломантне».

<sup>3</sup>Зярдо Иисус ульнесь Бетаниясо ды ярсась Симононь кедьсэ, кона икеле сэредекшнесь проказа ормасо, тов сась ве ава алебастрась кедьге марто, конаньсэ ульнесь нардонь ванькс ды пек питней ой. Сон кедьгенть порксызе ды валызе оенть Иисусонь прява.

<sup>4</sup>Конат-конат тосо ацирьгалезь кортасть эсь ютковаст: «Мезекс истя ёмсевтемс оенть?»

<sup>5</sup>Сонзэ миемаль колмосядт динардо, ярмактнень явшемальть пурныцяненъ». Ды пек покордасть аванть.

<sup>6</sup>Ансяк Иисус мерсь: «Кадынк сонзэ, мекс мелензэ колсесынк? Сон Монень паро тев тейсь.

<sup>7</sup>Пурныцятне свал тынк марто, зярдо меленк ули, паро тейтядо тенст, Мон жо аволь свал.

<sup>8</sup>Сон тейсь, мезе тензэ теевсь: Монь рунгом икелев анокстызе калмамс те ваднемасонтъ.

<sup>9</sup>Видестэ кортан тенк: весе масторлангсонть, косо ули ёвтнезь Кенярков кулясь, тосо кундасызь те аванть лемензэ ды ёвтыть седеяк, мезе сон тейсь Монень».

<sup>10</sup>Сестэ Иуда Искарот, кемгавтово тонавтницятнень ютксто вейкесь, мольсь попонь покштнэнень Иисусонь миеме.

<sup>11</sup>Теде марязь, попонь покштнэ кецясть ды алтасть тензэ ярмакт. Сон теде мейле вешнесь Иисусонь миемань ён шка.

### **Инечинь чокшнень ярсамо**

<sup>12</sup>Ламбамсто сюкоронь покшчинь васенце чистэнтъ, зярдо печксильть инечинь вирез , тонавтницянзо кевкстизь Иисусонь: «Косо мелеть ярсамс инечинь ярсамодонтъ? Минь мольтяно, анокстатано».

<sup>13</sup>Сон кучинзе тонавтницянзо ютксто кавтотнень ды кармавтсь тенст: «Азёдо ошов, тосо каршозонк понги кукшинсэ ведень кандыця цёра, моледе мельганзо.

<sup>14</sup>Козонь сон сови, мереди се кудонь азоронтень: “Тонавтыцясь кевкстни: косо нупалесь , конаньсэ Монень тонавтницян марто ярсамс инечинь ярсамодонтъ?”

<sup>15</sup>Сон невти тенк вере нупаль, покш, ацазь ды анокстазь. Тосо анокстадож инечинь ярсамо».

<sup>16</sup>Тонавтницянзо тустъ, совасть ошонтень, ды весе теевсь истя, кода тенст ёвтась Иисус. Сынъ тосо анокстасть инечинь ярсамо.

<sup>17</sup>Чокшне Иисус сась тов кемгавтово тонавтницянзо марто.

<sup>18</sup>Ярсамсто Сон мерсь: «Алкукс кортан тенк: вейкесь эйтэнк, Монь марто ярсыцясь, мисамам».

<sup>19</sup>Сынъ кармасть ризнэме, вейкест-вейкест мельга Тензэ кортамо: «Нама, те аволь мон?», лияськак: «Нама, те аволь мон?»

<sup>20</sup>Сон мерсь каршост: «Те ули кемгавтовостонк вейкесь, се, конась ней Монь марто ваканс кши навси.

<sup>21</sup>Ломантнень Цёрась Эсь эрямо кинзэ прядсы истя, кода теде ёвтазь Пазонь Сёрмадовкссо. Ансяк кодамо зыян пры се ломанентъ лангс,



кона мисы Ломантнень Цёранть! Седе паро улелель, бути те ломанесь аволь чачояк».

<sup>22</sup>Сынст ярсамсто Иисус сайсь кши, чанстизе-баславизе, синтризе ды максызе тонавтницянтэнь, мерсь: «Саинк ды ярсадо, те Монь рунгом».

<sup>23</sup>Мейле сайсь кече, Пазонтень сюкпрянь ёвтазь, максызе тенст. Сынъ весе симсть эйстэнзэ.

<sup>24</sup>Сон мерсь тенст: «Те Монь вересь, Пазонтъ марто од вейсэнълувонь верь, кона валови весень кисэ.

<sup>25</sup>Видестэ кортан тенк: Мон а карман симеме винаумарень винадо се чинть самс, зярдю карман симеме од винадо Пазонь Инязорксчисэнтъ».

<sup>26</sup>Мейле сынъ моравтсть ды тустъ Ойумарькс пандонтъ лангов.

<sup>27</sup>Тесэ Иисус мерсь тенст: «Те вестэнтъ тынь весе потатадо Монь эйстэ, эдь Пазонь Сёрмадовкссо ёвтазь истя: “Мон маштса ваныцянтъ ды реветне срадыть”.

<sup>28</sup>Седе мейле, зярдю Мон улян кулозьстэ вельмевтезь, тынденк икеле молян Галилеяв».

<sup>29</sup>Петра мерсь Тензэ: «Кадык весе лиятне потыть Тонь эйстэ, мон ялатеке а потан».

<sup>30</sup>Иисус мерсь тензэ: «Видестэ кортан тетъ: течи, те вестэнтъ, атякшось кавксть а кенери моразевемеяк, кода тон колмоксть прят каясак Монь эйстэ».

<sup>31</sup>Петра кемекстазь кортась: «Зярдюяк а каяса прям Эйстэдетъ, куш куломс тень савозо мартот!» Истя кортасть весе лиятнеяк.

### **Иисус озны Гетсиманиясо**

<sup>32</sup>Састъ Гетсимания лемсэ таркас, Иисус мерсь эсь тонавтницянтэнь: «Аштеде тесэ, Мон молян озномо».

<sup>33</sup>Сон саинзе мартонзо Петрань, Яковонь ды Иоаннонь, кармась тандалеме ды талномо-ризнеме.

- <sup>34</sup>Сон мерсь тенст: «Ойдем куломс ризны. Аштеде тесэ ды илядо удо».
- <sup>35</sup>Сон тусь аламодо ве ёнов, прась мода лангс ды ознось: «Улиндеряй те теевемашка, кадык юты те часось Монь вакска».
- <sup>36</sup>Сон кортась: «Абба, Тетяй! Тонеть весе тееви; ютавтык те пиштемань кеченть Монь вакска, ансяк кадык ули Тонь мелеть коряс, аволь Монь мелем коряс».
- <sup>37</sup>Мейле Сон велявтьсь, муинзе сынст удомсто. Сон мерсь Петранень: «Симон, тон удат? Ве часкак эзить кирдеве апак удо?»
- <sup>38</sup>Илядо удо, ознодо, аволиде понго снартнемас-варчавтнемас. Тынк оймесь анок паронтень, ансяк обуцянк-коронк лавшо».
- <sup>39</sup>Сон таго тусь, ознось секе озномасонтъ.
- <sup>40</sup>Зярдю велявтьсь, таго стардынзе сынст удомсто: сельмест конявильть. Сынъ эзьт сода, мезть каршонзо кортамс.
- <sup>41</sup>Сась колмоцеде, мерсь тенст: «Тынь яла удотадо ды оймсетядо? Саты! Сась шкась ды Ломантнень Цёрась максозь ули пежетевень кедьс.
- <sup>42</sup>Стядо, аядо! Вана Монь мииясь малазонок сась».

### **Иисусонь кундызь**

- <sup>43</sup>Сеске, Сонзэ кортамсто, сась Иуда, кемгавтовотнень ютксто вейкесь. Сонзэ марто састь попонь покштнэнь, Койс тонавтыцятнень ды прявтнэнь пельде кучозь ламо ломанть торо ды цётмар марто.
- <sup>44</sup>Сонзэ мииясь икелев кортась мартост тешкстэнтъ: «Конань мон паласа, се Сон – сайнк Сонзэ ды ветинк кеместэ ванстоць».
- <sup>45</sup>Зярдю Иуда сась тов, сон видьстэ мольсь Иисус ваксс ды мерсь: «Шумбрачи, тонавтыця!» Ды палызе Сонзэ.
- <sup>46</sup>Сетне каявсть лангозонзо ды кундызь Сонзэ.
- <sup>47</sup>Сесэ аштицятнень ютксто вейкесь таргизе торонзо, вачкодизе попонь прявтонь важонтъ ды керизе пилензэ.

<sup>48</sup>Сестэ Иисус мерсь тенст: «Мекс тынь сыде Монь саеме торо ды цётмар марто, теке салыця-маштниця мельга?»

<sup>49</sup>Эрва чистэ Мон мартонк ульнинь, Пазонь кудосо тонавтынь, ды тынь Монь эзимизь сае. Истя эно, топавтовост Сёрмадовкстнэ».

<sup>50</sup>Сестэ весе тонавтницятне кадызь Сонзэ ды оргодсть.

<sup>51</sup>Ве од ломань, конань штапо рунгозо вельтязель лияназ коцтонь оршамосо, мольсь мельганзо. Ушмантнэ кундызь сонзэ.

<sup>52</sup>Сон кадызе те оршамонтъ ды штапо оргодсь кедьстэст.

### **Иисус Инепромкс икеле**

<sup>53</sup>Ветизь Иисусонь попонь прявтонть. Промсть тозонь весе попонь покштнэ, прявтнэ ды Койс тонавтыцятне.

<sup>54</sup>Петра мольсь мельганзо васоло ве ёно, совась попонь прявтонь пиявтонть потс овсе кудонзо малас ды тосо ванстыцятнень марто озась толбандя вакс эжнеме.

<sup>55</sup>Попонь покштнэ ды весе Инепромксось вешнеть Иисусонь лангс невтевкст сонзэ маштомань тувталонь муемга, ансяк истямо тувтал эзть мукшно.

<sup>56</sup>Сонзэ лангс ламот кенгелеть, ансяк сынст невтевкстнэ ульнеть асатышкат, мольсть карадо каршо.

<sup>57</sup>Мейле муевсть окойники зярья кенгели яволявтыцят, конат кортасть:

<sup>58</sup>«Минь маринек, кода Сон кортась: “Мон калавтса Пазонь кудонтъ, конань теизь ломантне, колмо чинь ютазь стявтан лия, ломанень лезкстэме”».

<sup>59</sup>Ансяк истят невтевкстнэяк мольсть карадо каршо.

<sup>60</sup>Сестэ куншкас стясь попонь прявтось ды кевкстизе Иисусонь: «Мекс чатьмонят? Мекс мезеяк а ёвтат чумондомаст каршо?»

<sup>61</sup>Сон чатьмонсь, валгак эзь ёвта. Попонь прявтось таго кевкстизе Сонзэ: «Алкукс Тон Пазонь кучовт Идицясь, Шназь-чанствязь Пазонть Цёразо?»»

<sup>62</sup>Иисус мерсь: «Те – Мон! Тыньгак несынк Ломантнень Цёранть Весемькирдинть вить ёно озадо аштемстэ ды менелень пельтнень лангсо самсто».

<sup>63</sup>Сестэ попонь прявтось раздинзе эсь оршамонзо, мерсь: «Мезекс тенек лия яволявтыцятне?»

<sup>64</sup>Маринк Пазонть лангсо Сонзэ нарьгамонзо? Мезе тень кувалт ёвтатадо?» Весе чумондызь Сонзэ куломас.

<sup>65</sup>Сестэ конат-конат кармасть сельгенеме лангозонзо, сьулмсизь сельмензэ, вачкоость Эйсэнзэ, кортасть: «Содык, кие эшкинзеть?!» Ванстыцятнеяк чавсть Эйсэнзэ чама ланга.

#### **Иисусто Петрань прянь каямозо**

<sup>66</sup>Петра яла ульнесь пирявтонть потсо, зярдю ютась ваксканзо попонь прявтонь ве важо ава.

<sup>67</sup>Неизе Петрань толбандянтъ вакссо эжнемстэ, пштистэ варштась лангозонзо, мерсь: «Тонгак ульнить Назаретэнь ломанентъ марто, те Иисусонтъ марто».

<sup>68</sup>Петра прянзо каязь мерсь: «Мон мезеяк аздан, а чарькодьянгат, мезде тон кортат». Мейле ютась пирявтонть потс совамо тарканть малав ды атякшось моразевсь.

<sup>69</sup>Се важо авась сонзэ неизе одов, кармасть сесэ аштицятненень кортамо: «Теяк сынст ютксто».

<sup>70</sup>Сон таго каизе прянзо. Аламо шкань ютазь, сесэ аштицятне таго кармасть кортамо Петранень: «Тон алкукс сынст ютксто, тонгат Галилеянь эрицят. Кортавксоткак истямо жо».

<sup>71</sup>Сон кармась сюдомо ды божамо-пежетькстамо: «Мон аздаса те ломаненть, конадо тынь кортатадо!»

<sup>72</sup>Сеске атякшось моразевсь, уш омбоцеде. Петрань мельс сестэ ансяк ледсть Иисусонь ёвтавт валтнэ: «Атякшось кавксть а кенери моразевемейк, кода тон колмоксть прят каясак Монь эйтэ». Сон кармась риксэ авардеме.

## Марка 15

### Иисус Пилат икеле

<sup>1</sup>Валске марто сеске попонь покштнэ, прявтнэ, Койс тонавтыцятне ды Инепромксонь весе лиятнеяк пурнавсть вейс ды састь ве мельс: сынь сьулмсизь Иисусонь, ветизь ды максызь Пилатнэнь.

<sup>2</sup>Пилат кевкстизе Иисусонь: «Тон еврееень Инязорось?» Сон каршошонзо мерсь: «Те тон истя кортат».

<sup>3</sup>Попонь покштнэ Иисус лангс таргсесть ламо чумондомат.

<sup>4</sup>Секс Пилат таго Сонзэ кевкстизе: «Мекс мезеяк каршо а ёвтат? Неят, зяро чумот Тонь лангс невтить».

<sup>5</sup>Иисус тень каршоаяк мезеяк эзь ёвта. Пилат натой дивась.

### Варавва олякстомтозь – Иисус судязь

<sup>6</sup>Ломантнень вешемаст коряс эрва покшчинень Пилат нолдыль пекстатнеде вейке.

<sup>7</sup>Сестэ пекстазельть ялганзо марто Варавва – сынь масторонь прявтнэнь каршо вейсэ кепедеземстэ маштсть ломань.

<sup>8</sup>Ломантне састь ды кармасть вешеме Пилатонь кедьстэ сень, мезе сон свал тейниль тенст.

<sup>9</sup>Сон кевкстинзе: «Ули меленк, нолдаса тенк еврееень Инязоронть?»

<sup>10</sup>Сон секс истя мерсь, содась, попонь покштнэ максызь Иисусонь сонзэ кедьс сельмест сьвадомань кувалма.

<sup>11</sup>Попонь покштнэ ломантнень абунгавтсть, седе паро Иисусонь таркас вешемс Вараввань.

<sup>12</sup>Пилат таго кевкстсь: «Мезе сестэ монень теемс сень марто, конанень тынь мертядо еврееень Инязоро?»

<sup>13</sup>Сынь каршозонзо серьгедсть: «Крёст лангс вачкодик Сонзэ!»

<sup>14</sup>Пилат кевкстинзе: «Эно кодамо зыянонть Сон тейсь?» Сынь седеяк пек сеереть: «Крёст лангс Сонзэ!»

<sup>15</sup>Сестэ Пилат, ломантнень мелест топавтомга, нолдызе тенст Вараввань, Иисусонь жо мерсь локшосо керямс ды максомс вачкодемс крёст лангс.

#### **Ушмантнэнь нарьгамост**

<sup>16</sup>Ушмантнэ совавтызь Иисусонь азоркудонь пирявкс потмонтень, лиякс преторияс, ды пурнызь весе лия ушмантнэнь.

<sup>17</sup>Лангозонзо оршавсть якстере оршамо, прызонзо путсть пупиця куракшонь тарадсто кодазь каштаз

<sup>18</sup>ды кармасть мартонзо нарьгазь шумбракстнеме: «Шумбра улезэ еврееень Инязорось!»

<sup>19</sup>Чавсть Эйсэнзэ пря ланга палкасо, сельгенеть лангозонзо, икелензэ пракшность пульзядо, сюконякшность Тензэ.

<sup>20</sup>Кода лангсонзо нарьгамодонть пешкедсть, каявтызь лангстонзо якстере оршамонть ды оршавтызь Эсь оршамопелензэ. Мейле ливтизь Сонзэ крёст лангс вачкодемс.

#### **Иисусонь крёст лангс вачкодемазо**

<sup>21</sup>Ки лангсо сынь вастсть вакскаст ютыця киринеянь ломанень, Симоонь, Александр марто Руфонь тетяст, кона сыль паксясто. Ушмантнэ кармавтызь сонзэ крёстонь кандомо.

<sup>22</sup>Иисусонь ветизь таркантень, конань лемезэ Голгофа, смустезэ «Пря ловажань тарка».

<sup>23</sup>Макснесть Тензэ симемс смирна марто човорязь вина, ансяк Сон эзь симе эйстэнзэ.

<sup>24</sup>Иисусонь крест лангс вачкодизь, ды ушмантнэ, жеребейсэ каязь, явизь эсь ютковаст Сонзэ оршамонзо, кинень мезе саты.

<sup>25</sup>Шказо ульнесь валскень вейксэ част, зярдо Сонзэ вачкодизь крест лангс.

<sup>26</sup>Велькссэнзэ сёрмадозель Сонзэ чумозо: «Евреень Инязоро».

<sup>27</sup>Мартонзо крест лангс вачкодсть кавто салыцят-маштницят, вейкень вить пелензэ, омбоценть керш пелензэ.

<sup>28</sup>Истя топавтовсь Сёрмадовкось, косо ёвтазель: «Зыянонь теиця юткскак Сонзэ совавтсызь».

<sup>29</sup>Вакска ютыцятне, пряст чаравтозь, згилясть лангсонзо: «Я-а! Пазонь кудонь калавтыця ды колмо чис одов стявтыця!»

<sup>30</sup>Идик ней Эсь прят, валгт крестонтъ лангсто!»

<sup>31</sup>Истя попонь покштнэяк Койс тонавтыцятнень марто, згилязь, кортасть вейкест-вейкест марто: «Лиятнень идекшнесь, ансяк Эсь прязо Тензэ а идеви.

<sup>32</sup>Кадык ней Израилень Инязорось, Пазонь кучовт Идицясь, валги крестонтъ лангсто! Зярдо минь несынек тень, сестэ карматано кемеме Тензэ». Мартонзо крест лангс вачкодезтнеяк згилясть лангсонзо.

### **Иисусонь куломазо**

<sup>33</sup>Чинь куншкане весе масторонтъ келес теевсь чопода, ды истя ульсь колмо часонь перть.

<sup>34</sup>Колмоце чассто Иисус верьга вайгельть пижакадсь: «Элой! Элой! Лама сабактани?» Смуствезэ: “Пазом! Пазом! Мекс Монь кадымик?”

<sup>35</sup>Маласо зярыя аштицятне тень маризь, кортасть: «Кунсолодоя, Сон Илиянь терди».

<sup>36</sup>Вана вейке чийсь, начтсь чапамо винасо ведьпанго, пезнавтызе палка пес ды венстизе Иисуснэнь симемс. «Аштеде, вансынек, сы-арась Илия крёст лангсто валгстомонзо», – мерсь сон.

<sup>37</sup>Иисус пек пижакадсь, ды лиссь оймезэ.

<sup>38</sup>Се шкастонть Пазонь кудосо коцтонь пирявксось сезевсь кавтов верде саезь алов.

<sup>39</sup>Сядонь прявтось, кона аштесь каршозонзо, неизе, кода истя пижакадомадонть мейле лиссь оймезэ, ды мерсь: «Алкукс, те ломанесь ульнесь Пазонь Цёра!»

<sup>40</sup>Сесэ ульнесть ве ёндо ваныця аваткак. Сынст ютксо ульнесь Магдалань Мария, веженсь Яковонь ды Иосиень аваст Мария ды Саломия.

<sup>41</sup>Сынь Иисусонь Галилеясо улемстэяк мартонзольть ды лездасть Тензэ. Ульнесть сесэ ламо лия аваткак, конат састь мартонзо Ерусалимс.

### **Иисусонь калмамозо**

<sup>42</sup>Чизэ чопотетсь. Те чись ульнесь пеця, оймсема чинь анокстамо чи.

<sup>43</sup>Секс сась Ариматея ошонь Иосиф, кона ульнесь Инепромксонь пек лововикс ломань, кона сонськак учось Пазонь Инязорксчинть. Сон апак пеле совась Пилатнэнь ды вешизе Иисусонь уловонть.

<sup>44</sup>Пилат дивась Иисусонь куруксто куломантень, тердизе сядонь прявтонть, кевкстизе сонзэ: «Арази Сон кенерсь куломо?»

<sup>45</sup>Ды зярдо сядонь прявтось кемекстызе Сонзэ куломанть, Пилат мерсь максомс уловонть Иосифнень.

<sup>46</sup>Иосиф рамась лияназонь коцт, валгстызе уловонть крёстонть лангсто, тапаризе сонзэ коцтсонть ды путызе калмос, кона чувозель кевпандос. Калмос совамо таркантень Иосиф кевердсь кев.



<sup>47</sup>Магдалань Мария ды Иосиень авазо Мария вансть ды неизь, козонь Сонзэ путызь.

## Марка 16

### Иисусонь кулозьстэ вельмемазо

<sup>1</sup>Оймсема чинть ютамодо мейле Магдалань Мария, Яковонь авазо Мария ды Саломия рамасть тантей чине ойт Иисусонь уловонт ваднемс.

<sup>2</sup>Недлечистэнтъ, чинь лисема шкане, сын сыргаст калмонзо лангс.

<sup>3</sup>Ютамсто кортасть эсь ютковаст: «Кие сявордсы тенек кевенть калмонтень совамо таркастонть?»

<sup>4</sup>Зярдс пачкодсть калмонтень, неизь: кевесь, те ульнесь вельть покш кев, айгезель совамо таркастонть.

<sup>5</sup>Сын совасть калмонтень ды несть вит пеле озадо аштиця од цёра, конань лангсо ульнесь ашо кувака оршамот. Сын пек тандадсть.

<sup>6</sup>Цёрась мерсь тенст: «Илядо пеле. Тынь вешнетядо Назаретэнь Иисусонь, кона вачкодезель крест лангс. Сон вельмесь, тесэ арась. Вана таркась, козонь Сон путозель.

<sup>7</sup>Азёдо, нейке ёвтадо тонавтницянтэнь ды Петраненьгак истя: Сон тынденк икеле моли Галилеяв, тосо тынь несынккак Сонзэ, кода теде Сонсь тенк ёвтакшнось».

<sup>8</sup>Сын лиссть, сорнозь ды талнозь, чиезь тусть калмонтэ эйстэ, тандадомадонть киненьгак мезеяк эзть ёвта.

### Кулозьстэ вельмезь Иисус марто вастома

<sup>9</sup>Иисус вельмесь кулозьстэ недлечинь валске. Васняк Сон прянзо невтизе Магдалань Мариянень, конаньстэ панекшнесь сисем идемевсть.

<sup>10</sup>Мария тусь ды ёвтась сетненень, конат яксекшнест Иисус марто ды конат ней авардсть ды мелявтсть.

<sup>11</sup>Сынь кодаяк ээть кемезеве, зярдю марясть, келя Иисус эри, ды Мария неIZE Сонзэ.

<sup>12</sup>Теде мейле Иисус невтIZE прынзо лия чачосо эйстэст кавтотненень, конат ютыльть велев.

<sup>13</sup>Сетне велявтсть ды ёвтнестъ лия тонавтницятненень, ялатеке сыненсткак ээть кеме.

<sup>14</sup>Меельце пелев Иисус невтIZE прынзо кевейкее тонавтницянстэнь, зярдю сынь ярсылть. Сон сялгавтнинзе сынст акемамаст ды калгодо седеест кисэ, мекс сынь ээть кеме кулозьстэ вельмемадо мейле Сонзэ неицятненень.

<sup>15</sup>Сон мерсь тенст: «Азёдо весе масторлангонть келес, эрва ломанентень ёвтнеде Кенярксов кулянтъ.

<sup>16</sup>Се, кие кеми ды ули нававтозь, идеви; кие а кеми, се судязь ули.

<sup>17</sup>Кемицятненень кармить тейневеме истят тешкст: Монь лемсэ кармить пансеме идемевсть, кортазевить од кельсэ.

<sup>18</sup>Сынь кармить кедьсэ гуень сайнеме, ды симиндеряйтъ кодамояк куловтома ядто – берянь тенст а тееви; кармить путнеме кедест сэредиця лангс, сеть шумбралгадыть».

<sup>19</sup>Тонавтницятненень марто истя кортамодонть мейле Азорось ульсь кепедезь менельс ды озась Пазонть вить ёнов.

<sup>20</sup>Тонавтницянзо тустъ ды эрва косо пачтясть паро кулянтъ. Азорось важдось сынст марто ды кемекстась валост мельгаст молиця тамашань тешкссэ. Аминь.

## Лукань Коряс Евангелия

### Луки 1

<sup>1</sup>Ламот уш кармасть сёрмалеме ёвтнемат сеть тевтнеде, конат топавтовсть минек ютксо.

<sup>2</sup>Нетъ тевтнеде минь карминек содамо сеть ломантнень пельде, конат ушодовомстост ульнестъ сынст неицякс ды теде мейле теевсть Пазонь валонь пачтицякс.

<sup>3</sup>Секс моненьгак сась мель весе тень, ушодкссто саезь, домкасто вешнезь ды чарькодезь, сёрмадомс мельга мельцек тонеть, вечкевикс Теофил.

<sup>4</sup>Те седеяк пек кемекстасы эйсэть се тонавтомань видечинть, конанень тонавтозят.

#### **Икелев ёвтамось Нававтыця-Лемдиця Иоаннонь чачомадо**

<sup>5</sup>Сеть шкатнестэ, зярдо Иудеянь инязорокс ульнесь Ирод, тосо эрясь Захария попось. Сон ульнесь Авиянь чиполасто. Захария ды сонзэ низэ Елизавета лиссть Арононь буестэ-раськестэ.

<sup>6</sup>Сынь кавонест эрясть Пазонть икеле видечинь коряс ды топавтсть седейшкава Азоронть весе кармавтовкстнэнь ды меревкстнэнь.

<sup>7</sup>Сынст арасельть эйкакшост: Елизавета ульнесь а чачтница, ды иесткак ламольть.

<sup>8</sup>Ды вана вестъ, зярдо сась Захариянсетнень чиполаст, Захария, кода поп, важдось Пазонть икеле.

<sup>9</sup>Поптнэнь юткова важдемань тевтнень явомсто Захариянень сатотсь совамс Азоронь кудонтень ды теемс ладансо сувтамо алтарь лангсо.

<sup>10</sup>Те сувтамо шкастонть ламо ломанть озность ушосо, Пазонь кудонь пирявксонть потсо.

<sup>11</sup>Апак учо Захариянь икелев лиссь Азоронть ангелзэ, кона аштесь вить ёно сувтамо алтаренть эйстэ.

- <sup>12</sup>Зярдо Захария неIZE анґелэнтъ, сон абунґадсь ды пек тандадсь.
- <sup>13</sup>Анґелэсь мерсь тензэ: «Иля пеле, Захария, тонь озномат марязь: Елизавета, тонь нись, чачты тетъ цёра, ды тон путт тензэ Иоанн лем.
- <sup>14</sup>Сон тонь туртов карми улеме кенярксокс ды уцяскакс, ды ламот кармить кецямо сонзэ чачомантень.
- <sup>15</sup>Эдь сон карми улеме ине ломанькс Азоронтъ икеле, зярдож а карми симеме винадо ды лия кеме симемапельде. Сон уш аванзо пекесэ пештяви Иневанькс Оймеялтсо.
- <sup>16</sup>Иоанн велявтсынзе ламо Израилень ломантнень Азоронтень, сынст Пазонтень.
- <sup>17</sup>Сон сы Азородонтъ икеле, пештязь истямо жо оймеялтонь вийсэ, кода Илия. Иоанн велявтсынзе тетятнень седеест эйкакштнэнь ёнов, ды ломантне, конат те шкас эзь кунсоло Пазонтъ, уставить арсеме, кода видечинь коряс эрицят. Истя сон анокстасы раськентъ Азоронь самонтень».
- <sup>18</sup>Захария кевкстизе анґелэнтъ: «Косто монень содамс: те видечи эли аволь? Мон сырян, ды нинтькак ламо иензэ».
- <sup>19</sup>Анґелэсь ёвтась каршонзо: «Мон – Гавриил, Пазонтъ икеле аштицятнестэ вейкесь. Мон кучозян тонь марто кортамо ды тонеть те кенярксов кулянтъ пачтямо.
- <sup>20</sup>Нейке тонь кундаты келеть ды кармат улеме акортыцякс се шкас, зярс весе ёвтасесь а топавтови. Истя лиси тонь марто монь валтнэс акемемат кисэ. Монь валтнэ топавтовить эсь шкастост».
- <sup>21</sup>Те шкастонть ломантне учость Захариянь ды дивсестъ, мекс сон истя кувать а лиси Пазонь кудостонтъ.
- <sup>22</sup>Зярдо Захария лиссь, сонзэ кундатозель келезэ, ды ломантне чарькодсть: сон несъ тосо неявкс. Захария пачтизе эсь мелентъ ломантненень кедьсэ невтнезь ды кадовсь акортыцякс.

<sup>23</sup>Пазонть икеле Захариянь важодема читне прядовсть, ды сон сась кудов.

<sup>24</sup>Куроксто Елизавета низэ пекиясь ды вете ковт эзь лисне ломань юткс.

<sup>25</sup>Сон кортась: «Тень теизе монь туртов Азорось! Монь лангс варштазь, Сон саизе монь лангсто покордамонть, конань кирдинь ломантнень пельде».

### **Иисусонь чачомадо икелев ёвтамось**

<sup>26</sup>Елизаветань пекиямондонть мейле котоце ковонть ютамсто Пазось кучизе Гавриил ангелэнтъ Галилеянь Назарет ошов,

<sup>27</sup>Мария тейтерентень. Мария ульнесь чиявтозь Давидэнь буень Иосифнень.

<sup>28</sup>Ангелэсь сась Мариянень ды мерсь: «Шумбрачи тетъ, Пазонь чанствявт-баслававт ава! Азорось мартот, тон весемеде пек чанствязт-баславазят аватнень ютксто!»

<sup>29</sup>Ангелэнтъ неемстэ ды сонзэ валтнэде Мария таймаскадсь ды мейле арсизе те шумбрактнеманть смустензэ.

<sup>30</sup>Ангелэсь поладсь седе тов: «Иля пеле, Мария, Пазось макссь тетъ ине чансть!»

<sup>31</sup>Вана тон пекият, чачтат Цёра ды путат Тензэ лем – Иисус.

<sup>32</sup>Сон карми улеме инекс-покшокс, ды Сонензэ кармить мереме Верепазонь Цёра. Ды Паз Азорось макссы Сонензэ Давид покштянтъ инязоронь тарканть.

<sup>33</sup>Сон карми улеме пингедэ пингес инязорокс весе Яковонь буентъ, Израилень раськентъ, лангсо, ды Сонзэ Инязорксчинтень зярдояк а ули пе».

<sup>34</sup>Мария кевкстизе ангелэнтъ: «Кода те топавтови, бути мон аволь мирде экшсан?»

<sup>35</sup>Ангелэсь тень каршо кортась: «Иневанькс Оймеялтось валги тонь вельксэс, ды Верепазонь виесь копачатанзат тонь. Секскак Эйкакшонтень, конань чачтсак, кармить мереме Иневанькс ды Пазонь Цёра.

<sup>36</sup>Содак: тонь патят, Елизавета, кадык сыреяк, ялатеке пекиясь цёрасо. Весе ловсть сонзэ ачачтницякс, ней сон уш котоце ков пешксесэ.

<sup>37</sup>Эдь Пазонть туртов арась мезеяк атеевикс».

<sup>38</sup>«Мон Азоронть урезэ», – мерсь Мария, – «кадык весе лиси монь марто истя, кода тон мерить». Те марто ангелэсь тусь Мариянь эйстэ.

### **Мария моли Елизаветань варштамо**

<sup>39</sup>Зярыя чинь ютазь, Мария пурнась ды капшазь сыргась ошов, кона аштесь пандов таркань Иудея масторсо.

<sup>40</sup>Сон совась Захариянь кудос ды шумбракстнесь Елизавета марто.

<sup>41</sup>Зярдэ Елизавета маризе Мариянь шумбракстнеманть, сонзэ потсо эйдесь либоргадсь, ды Елизавета пештявсь Иневанькс Оймеялтсо.

<sup>42</sup>Елизавета серьгедевсь: «Тон весемедэ пек чанстязят-баславазят аватнень ютксто! Чанстязь тонь Эйдеськак, конань кандтнят потсот!

<sup>43</sup>Монень сась монь Азоронть авазо! Мезень кисэ монень прась истямо уцяска?!

<sup>44</sup>Теке шкастонть, зярдэ тонь шумбракстнемань вайгелесь пачкодсь монь пилес, эйдесь монь потсо кенярдомадонть либоргадсь.

<sup>45</sup>Тонеть алтазесь топавтови! Секскак уцяскават тон, Азоронь валтнэс кемицясь!»

<sup>46</sup>Мария тень каршо мерсь: «Монь седеем шны ды инелгавты Азоронть,

<sup>47</sup>ды ойдем кенярды Паздонть, монь Идицядонть!

<sup>48</sup>Пазось велявтызе вановтонзо монь лангс, асодавикс ды анеявикс урензэ лангс. Те чистэ саезь весе пингень ломантне кармить монь ловомо уцяскавкс:

<sup>49</sup>весемеде Виевесь тейсь монь туртов истят ине тевть! Сонзэ лемезэ иневанькс весементь велькссэ!

<sup>50</sup>Сон макссы эсь седеймарямонзо мелензэ ваныцятненень пингед пингес.

<sup>51</sup>Пазонь виев кедесь теи ине тевть: Сон сравтни сетнень, кинь оймест пештязь каштанчинь мельсэ ды превсэ.

<sup>52</sup>Сон правтни прявтнэнь азорксчинь таркастост, ды верев кепеди асодавикстнэнь ды анеявикстнэнь.

<sup>53</sup>Сон пешти арасьчисэ эрицятнень парочисэ; сюпавтнэнь пани чавонь кедть.

<sup>54</sup>Пазось лезды Израилень раськентень, эсензэ важонтень, мельсэ кирди ды топавты седеймарямонтъ

<sup>55</sup>Авраамнень ды сонзэ эйкакштнэненень пингед пингес, кода Сон алтакшнось минек покштятненень».

<sup>56</sup>Мария эрьсь Елизаветань кедьсэ колмошка ковт ды велявтьсэ эсензэ кудов.

#### **Нававыця-Лемдиця Иоаннонь чачомазо**

<sup>57</sup>Елизаветань сась чачтомань шказо, ды сон чачтсь цёра.

<sup>58</sup>Шабранзо ды раськензэ марясть седе, кодамо ине седеймарямо путсь Азорось Елизаветанень, ды кенярдсть вейсэ сонзэ марто.

<sup>59</sup>Кавксоце чистэнтъ сынъ пуромсть эйкакшонтень тееме цёрынень киськепень керявтома ды арсестъ путомс тензэ Захария тетянзо лементъ.

<sup>60</sup>Елизавета, эйкакшонтъ авазо, тень каршо мерсь: «Арась, истя а ули, путтано сонензэ лем – Иоанн».

<sup>61</sup>Пурнавозтне кортасть Елизаветанень: «Тонь раськетъ ютксо арась Иоанн лем марто ломань!»

<sup>62</sup>Ды кедьсэ невтнезь, кевкстнестъ эйдень тетянтъ, кодамо лем путоволь сон.

<sup>63</sup>Захария вешсь лазнэ ды сёрмадсь лангозонзо: «Эйкакшонтъ лемезэ – Иоанн». Ды весе талакадсть.

<sup>64</sup>Ды сеске теде мейле Захариянь панжовсть турванзо ды кортазевсь келезэ; сон кармась кортамо ды Пазонтъ шнамо-чанстямо.

<sup>65</sup>Весе перькаст эрицятнень копачинзе тандадома ды пелема. Те кулясь срадсь весе пандо лангонь Иудеяванть.

<sup>66</sup>Весе, кие теде марясь, эсь пачкаст арсестъ ды кортнестъ: «Кикс карми уleme те эйдесь?» Эдь Азоронтъ виесь ульнесь мартонзо.

### Захария шны Пазонтъ

<sup>67</sup>Захария, Иоаннонь тетясь, пештявсь Иневанькс Оймеялтсо ды кортазевсь пазмарицякс:

<sup>68</sup>«Улезэ шназь-чанствязь Азорось, Израилень Пазось, конась сы ды олякстомтсы Эсензэ раськентъ.

<sup>69</sup>Сон кучи миненек виевдеяк виев Идиця, кона лиси Давид важонзо буестэ.

<sup>70</sup>Теде Сон алтакшнось Эсензэ пазмарицятнень вельде, конат эрясть ламо иеть теде икеле.

<sup>71</sup>Идицясь олякстомтсамизь эсенек яттнэде ды минек лангс кежень кирдицятнень кедест алдо.

<sup>72</sup>Сон топавты Эсь седеймарямонзо, кона алтазель минек покштятненень. Сон мельсэ кирди Эсь алтавксонзо, иневанькс вейсэнълувонтъ

<sup>73</sup>ды кеме валонтъ, конань Пазось максызе минек Авраам покштятнень:

<sup>74</sup>Пазось олякстомтсамизь вардонок лепштямонтъ эйстэ.



<sup>75</sup>Ней минь карматано апак пеле Сонзэ мелензэ топавтомо, прянек-седейнек Пазонтень максозь ды Сонзэ сельме икеле видечинь коряс эрязь, весе эсенек эрямонтъ перть.

<sup>76</sup>Ды тон, эйдине, кармат кандтлеме Верепазонь пазмарицянь лем. Тон кармат молеме Азоронтъ икеле ды анокстамо Сонензэ вадря ки.

<sup>77</sup>Сонзэ ломантненень тон максат чарькодема идемадо, конась ашти пежетест нолдамосо.

<sup>78</sup>Минек Пазось, пештязь вечкемасо ды седеймарямосо, кучсь миненек менельстэ Чилисема,

<sup>79</sup>кона максы валдо чоподасо ды куломань сулейсэ эрицятненень, аравтсамизь минек седейоймамонь ки лангс».

<sup>80</sup>Эйдесь кассь-кепететсь, ды виевгалесь сонзэ оймезэ. Сон эрясь чаво мода лангсо семс, зярс эзь са шказо лисемс Израилень раськентъ икелев.

## Луки 2

### Иисусонь чачомазо

<sup>1</sup>Се шкастонть лиссь Римень Август кесарентъ истямо кармавтовоксо: каявксонь пандомань ютавтомга сёрмалемс весе масторонь эрицятненень.

<sup>2</sup>Те ульнесь васенце сёрмалемась, ды ютавтозель, зярдю Сириянь прявтокс ульнесь Квириний.

<sup>3</sup>Секскак эрвась тусь эсь раськентъ ошов прянь сёрмадстома.

<sup>4</sup>Иосифкак сыргась Галилеянь Назарет ошсто Иудеяв, Давидэнь чачома ошов, конанень мерильть Вифлеем. Иосиф лисезель Давидэнь буестэ-раськестэ.

<sup>5</sup>Сон сыргась прянь сёрмадстома Мария марто, кона ульнесь сонензэ чиязь никс ды учось эйде.

<sup>6</sup>Зярдо сынъ ульнестъ Вифлеемсэ, сась Мариянь чачтома шказо.

<sup>7</sup>Сон чачтызе Цёранзо, васенце эйкакшонзо, тапардызе Сонзэ ды путызе ракшань андома таркас секс, мекс инжень кудосо сынст туртов тарка эзь муеве.

### Ревень ваныцятне ды ангелтнэ

<sup>8</sup>Вифлеемде аволь васоло ульнестъ паксясо ремень ваныцят, конатне те вестэнтъ вансть эсест ревест.

<sup>9</sup>Апак учо сынст икелев лиссь Азоронь ангелэсь, ды Азоронь иневалдось валдомтынзе сынст. Ваныцятне пек тандадсть.

<sup>10</sup>Ангелэсь сыненст мери: «Илядо пеле. Мон сынъ ёвтамо тыненк кенярксов куля, кона карми уleme покш кенярксокс весе ломантненень.

<sup>11</sup>Течи Давидэнь ошсо чачсь тынк туртов Идиця. Сон Христос, Азорось, Пазонь кучовт Идицясь!

<sup>12</sup>Вана тенк тешкс: тынь мусынк Эйдентъ тапардазь, ракшань андома таркасто».

<sup>13</sup>Апак учо те ангелэнтъ ваксс састъ менелень ламо лия ангелт, конат вейсэ кармасть ёвтнеме шнамо валт Пазонтень:

<sup>14</sup> «Шнамо Верепазонтень менельсэ ды улезэ сэтъмелув мода лангсо, ломантненень ютксо паро арсема-мель!»

<sup>15</sup>Зярдо ангелтнэ тустъ эйтэст ды кепедевсть менельс, ремень ваныцятне кортасть эсь ютковаст: «Мольтяно Вифлеемев ды вансынек, мезе тосо лиссь, мезде миненек яволятсь Азорось».

<sup>16</sup>Сынъ капшазь сыргастъ тов ды муизь Мариянь, Иосифень ды Эйдентъ, конась путозель ракшань андома таркас.

<sup>17</sup>Зярдо ремень ваныцятне неизъ тень, сынъ ёвтнизь, мезе сыненст кортась ангелэсь Эйдедентъ.

<sup>18</sup>Ды весе кунсолицятне дивасть тенень, мезде ёвтнесть ревень ваньцятне.

<sup>19</sup>Мария жо весементь ванстсь эсензэ седейсэ ды свал арсесь теде.

<sup>20</sup>Ревень ваньцятне велявтсть эсь тарказост, шназь ды инелгавтозь Пазонтъ сень кисэ, мезе сынъ марясть ды несть. Весемесь ульнесь алкукс истя, кода сыненст ёвтазель.

<sup>21</sup>Кавксо чинь ютазь чачомадо мейле эрявсь теемс Эйдентень цёрынень киськепень керявтома, ды Сонензэ путсть Иисус лем. Те лементь ёвтызе ангелэсь сестэ, зярдэ Сон арасель аванзо пекесэяк.

### Иисусонь кандызь Пазонь кудос

<sup>22</sup>Се чинть сазь, зярдэ Моисеень Коень коряс эрявсь сыненст ванськадомс, Мария ды Иосиф сыргасть Ерусалимев аравтомс Эйденть Азоронтъ сельме икелев.

<sup>23</sup>Эдь Азоронь Коесь кармавты: «Эрва васень чачовт цёра эйкакшось улезэ алтазь Азоронтень».

<sup>24</sup>Теке марто сыненст эрявсь Пазонтень кандомс аноксокс “кавто идем гулькат эли кудонь кавто од гулькат”, кода ёвтазель Азоронь Койсэнтъ.

<sup>25</sup>Те шкастонть Ерусалимсэ эрясь ломань, конань лемезэ Симеон. Сон ульнесь Пазонь мелень ваньця ды виде коень ломань, кона учось Пазонтъ пельде идема Израилентъ туртов, ды конань эйсэ ульнесь Иневанькс Оймеялт.

<sup>26</sup>Иневанькс Оймеялтось икелев пачтякшнось Симеоннэнь: сон а кулы се шкас, зярс а несы Азоронь кучовт Идицянтъ.

<sup>27</sup>Оймеялтонть тердеманзо коряс сон сась Пазонь кудов. Се шкастонть тетятне-аватне тов кандызь Иисус Эйденть теемс сонзэ лангсо сень, мезе кармавтозель Коень коряс.

<sup>28</sup>Симеон саизе Эйденть кедь лангс ды ёвтась сукпря Пазонтень:

<sup>29</sup> «Весемь Кирдиця! Кода Тон алтакшныть, ней Тон, седеень оймавтозь, нолдасамак эрямостонтъ монь, Эсеть уреть.

<sup>30</sup>Эдь монь сельметне неизь Тонь кучовт Идицянтъ,

<sup>31</sup>конань Тон анокстык невтемс весе раськетненень;

<sup>32</sup>валдонть, кона валдомты весе раськетнень, иневалдонть, кона сияжды Тонсеть Израилень раськентень».

<sup>33</sup>Иосиф ды Мария дивсестъ тенень, мезде кортась Симеон сынст Эйдест эйтэ.

<sup>34</sup>Мейле Симеон чанстинзе-баславинзе сынст ды мерсь Мариянень, Эйденъ авантень: «Те Эйдесь карми улеме ламотнень туртов Израильсэ прамонь ды кепедевемань тувталокс. Те Эйдесь максозь Пазонь мелень невтицякс, конань каршо стить ламотне.

<sup>35</sup>Теньсэ панжовить ламонь салавань арсемаст. Ды прок пшти пеель юты тоньгак седееть пачк».

<sup>36</sup>Тосо те шкане ульнесь Анна пазмарицясь, Пенуилэнь тейтерезэ Асирэнь буестэ-раськестэ. Сон пек сырель. Анна од тейтерькс лиссь мирденень ды эрясь сисем иеть мирдензэ марто,

<sup>37</sup>кадовсь довакс, ды ней тензэль кавксоньгемень ниле иеть. Анна зярдо як эзь тукшно Пазонь кудосто, тосо ульнесь чинек-венек, постовазь ды ознозь вансь Пазонь мелентъ.

<sup>38</sup>Те шкане Аннаяк мольсь малазост, ёвтась сюкпря Пазонтень ды кармась ёвтнеме Иисусто весенень, конат учость Пазонтъ пельде Ерусалиментъ туртов олякстомтома.

### **Назаретэв велявтомась**

<sup>39</sup>Зярдо Иосиф ды Мария теизь весементъ истя, кода кармавтсь Азоронь Коесь, сынъ велявтсть Галилеяв, эсест Назарет ошов.

<sup>40</sup>Эйдесь кассь-кепететсь, кемекстась оймевийсэ ды пештявсь превсэ, ды Пазонь седей лембесь ульнесь Сонзэ лангсо.

### Иисусонь эйкакшчизэ

<sup>41</sup>Эрва иестэ, евреень Инечистэ, Иисусонь тетязно-аванзо яксесть Ерусалимев.

<sup>42</sup>Зярдо Иисуснэнь топодсть кемгавтово иеть, сынь, кода свал, таго сыргасть Инечис Ерусалимев.

<sup>43</sup>Покшчинть прядовомадо мейле тетязо ды авазо сыргасть кудов. Иисус жо кадовсь Ерусалимс. Иосиф ды Мария кадовоманть эзизь нее.

<sup>44</sup>Сынь арсесть: паряк, Иисус моли лиятнень марто. Истя сынь мольсть чинь-чоп. Модемстэ Иисусонь вешнесть эсь раськетнень ды содавикстнэнь юткова.

<sup>45</sup>Ды зярдо Сон тенст эзь муеве, велявтсть Ерусалимев Эйкакшонть вешнеме.

<sup>46</sup>Ансяк колмо чинь ютазь сынь муизь Сонзэ Пазонь кудосто. Сон озадолъ тонавтыщятнень ютксо, кунсолось сынст ды макснесь сыненст кевкстемат.

<sup>47</sup>Весе Сонзэ кунсолыщятне дивсесть, кода Сон весементь чарькоди ды кодат превейть максы каршо валт.

<sup>48</sup>Сонзэ неезь, тетятне-аватне абунгадсть. Авазо кевкстизе Сонзэ: «Цёрам, мезе Тон истя теить минек марто? Тонь тетят ды мон пек мелявтозь вешнинек Эйсэть».

<sup>49</sup>«Мезекс тынь Монь вешниде?» – кевкстизе Иисус. – «Арази тынь а содылиде: Монень эряви улемс Монь Тетянь кудосо?»

<sup>50</sup>Иосиф ды Мария эзизь чарькоде Сонзэ валтнэнь смустест.

<sup>51</sup>Иисус велявтсь сынст марто Назаретэв ды ульнесь сынст кунсолыця цёракс. Авазо весе тень ванстызе седей потмакссонзо.

<sup>52</sup>Иисус кассь-кепететсь, пурнась превть, Сонзэ вечксть ломантнеяк, Пазоськак.

## Луки 3

### Нававтыця Иоаннонь тонавтомазо

<sup>1</sup>Тиберий кесаренть шкасто, азорксчинзэ кеветееце иестэнтъ, Понтий Пилат ульнесь прявтокс Иудеясо. Ирод те шкане ульнесь тетрархокс Галилеясо, Филип сонзэ лелязо – тетрархокс Итуриясо ды Траконитэнь масторсо, Лисаний жо – тетрархокс Авилениясо.

<sup>2</sup>Зярдэ попонь прявтокс ульнесь Аннас ды Кайафа – се иестэнтъ Пазось пачтизе эсь валонзо Иоаннэнь, Захариянь цёрантень, кона эрясь чаво мода лангсо.

<sup>3</sup>Теде мейле Иоанн тусь якамо Иордан леенть перька мастортнэва ды тердсь ломантнень велявтомс Пазонтень ды нававтомс-лемдемс прянтъ пежетень нолдамонтъ кисэ.

<sup>4</sup>Лиссь истя, кода сёрмадозель Исаяя пазмарицянтъ книгасонзо: «Чаво модасо маряви сеерицянь вайгель: Анокстадо Азоронтень ки! Виделгавтодо Сонзэ туртов китнень-янтнэнь!»

<sup>5</sup>Эрва лушмось пештявозо, эрва пандось ды марось алкиньгадост. Кичкере китне витевест, лутков-латков янтнэ валакадост.

<sup>6</sup>Ды эрва ломанесь несы идеманть, конань макссы Пазось!»

<sup>7</sup>Пек ламо ломанть сакшность Иоаннэнь ды вешсть нававтомс пряст. Сыненст сон кортась: «Пупи гуень левкст! Кие тынк тонавтыдизь нававтоманть-лемдеманть вельде менемс Пазонь кежень малавгадыця пандомадонть?»

<sup>8</sup>Эрямосонк невтинк Пазонтень велявтоманк, илядо ладсе эсь прянк неть валтнэсэ: “Минь Авраамонь эйкакшт”. Эдь мерян тенк: Пазонтъ ули виезэ теемс неть кевтнестэяк Авраамнень эйкакшт.

<sup>9</sup>Узересь уш кепедезь чувтнэнь юрост вельксэс: эрва чувтось, кона а канды паро умарь, ули керязь ды ёртозь толс».

<sup>10</sup>«Мезе эно миненек теемс?» – кевкстнесть перьканзо аштицятне.

<sup>11</sup>Иоанн каршост кортась: «Эрвась, конань улить кавто панаронзо, вейкенть кадык макссы сенень, конань арась вейкеяк. Се, конань ули ярсамопелезэ, кадык явсы лиянтъ марто».

<sup>12</sup>Сакшность пряст наавтомо каявксонь пурныцятнеяк ды кевкстнесть: «Тонавтыця, мезе миненек теемс?»

<sup>13</sup>Тень каршо сон кортась: «Ломантнень пельде илядо пурна путозdentь ламо».

<sup>14</sup>Мейле кевкстнесть сонзэ таго-зяро ушманткак: «Миненек эно мезе теемс?» Иоанн тень каршо кортась: «Ломантнень пельде илядо нельге ярмакт вийсэяк эли а виде чумондомасояк, ды кадык топоди меленк се питнесэнтъ, конань тыненк пандыть важдеманк кисэ».

<sup>15</sup>Те шкастонть весе ломантне учость ды седейгаст арсестъ Иоанндо: «Паряк, сон Пазонь кучовт Идиця?»

<sup>16</sup>Тень каршо Иоанн кортась сынест: «Мон навантан тынк эйсэ ведьсэ, курок сы мондень пек седе виевесь, мон а маштован мик карсемастонзо кшна ведьметнень юкстицяккак. Сон карми тынк наавтомо Иневанькс Оймеялтсо ды толсо.

<sup>17</sup>Сонзэ кедьсэ понжавтома койме, конасо Сон ванськавтсы тинге пирензэ. Товзюронтъ пурнасы Эсензэ утомс, ды сюватнень пултасынзе амадстевикс толсо».

<sup>18</sup>Истямо ды ламо лия превспутома валсо Иоанн кортась ломантненень ды пачтясь седейзэст Кенярксов кулянтъ.

<sup>19</sup>Иоанн ливтсь лангс Иродоньгак, Галилеянь прявтонть, весе зыянов тевензэ кисэ ды Иродиада марто эрямонть кисэ. Эдь Иродиада ульнесь Иродонь лелянзо никс.

<sup>20</sup>Сестэ Ирод, весе апаро тевтнеде башка, Иоанноньгак пекстызе.

### Иисусонь нававтомась

<sup>21</sup>Ламо ломантне нававтсть пряст Иоаннонь кедьстэ. Иисускак ульнесь нававтозь. Нававтомадо мейле, Иисусонь озномсто, панжовсь менелесь,

<sup>22</sup>ды Иисус лангс валгсь Иневанькс Оймеялтось, кона неявсь гулькань кондямокс. Ды менельстэ каятотсь вайгель: «Тон Монь вечкевикс Цёрам, Тон Монь кенярксом!»

### Иисусонь буенть юрозо

<sup>23</sup>Иисуснэнь ульнесть колоньгеменьшка иеть, зярдэ Сон ушодызе Эсензэ тевензэ. Сон – кода весе арсесть – ульнесь Иосифень цёракс. Иосиф ульнесь Илиянь цёракс,

<sup>24</sup>Илия – Маттатонь цёракс. Маттат – Левинь цёракс, Леви – Мелкинь цёракс, Мелки – Яннаень цёракс, Яннай – Иосифень цёракс.

<sup>25</sup>Иосиф – Маттитянь цёракс, Маттитя – Амосонь цёракс, Амос – Наумонь цёракс, Наум – Еслинь цёракс, Если – Наггеень цёракс.

<sup>26</sup>Наггей – Махатонь цёракс, Махат – Маттитянь цёракс, Маттитя – Симеень цёракс, Симей – Иосекень цёракс, Иосек – Иодань цёракс.

<sup>27</sup>Иода – Иохананонь цёракс, Иоханан – Рисаень цёракс, Рисай – Зоровавелень цёракс, Зоровавель – Салатилэнь цёракс, Салатил – Нириень цёракс.

<sup>28</sup>Нирий – Мелкинь цёракс, Мелки – Аддиень цёракс, Аддий – Косамонь цёракс, Косам – Елмадамонь цёракс, Елмадам – Ирэнь цёракс.

<sup>29</sup>Ир – Иосиень цёракс, Иосий – Элиезерэнь цёракс, Элиезер – Иоримень цёракс, Иорим – Маттатонь цёракс, Маттат – Левинь цёракс.



<sup>30</sup>Леви – Симеонь цёракс, Симеон – Иудань цёракс, Иуда – Иосифень цёракс, Иосиф – Ионамонь цёракс, Ионам – Элиакимень цёракс.

<sup>31</sup>Элиаким – Мелеань цёракс, Мелеа – Меннань цёракс, Менна – Маттатань цёракс, Маттата – Натанонь цёракс, Натан – Давидэнь цёракс.

<sup>32</sup>Давид – Иессеень цёракс, Иессей – Овидэнь цёракс, Овид – Боазонь цёракс, Боаз – Салмань цёракс, Салма – Нахассонь цёракс.

<sup>33</sup>Нахассон – Аминадавонь цёракс, Аминадав – Арамонь цёракс, Арам – Есрононь цёракс, Есрон – Пересэнь цёракс, Перес – Иудань цёракс.

<sup>34</sup>Иуда – Яковонь цёракс, Яков – Исаконь цёракс, Исак – Авраамонь цёракс, Авраам – Терахонь цёракс, Терах – Нахоронь цёракс.

<sup>35</sup>Нахор – Серугонь цёракс, Серуг – Рагавань цёракс, Рагав – Пелекень цёракс, Пелек – Эберэнь цёракс, Эбер – Салиень цёракс.

<sup>36</sup>Салий – Кенанонь цёракс, Кенан – Арпаксадонь цёракс, Арпаксад – Симень цёракс, Сим – Ноень цёракс, Ной – Лемекень цёракс.

<sup>37</sup>Лемек – Матусалонь цёракс, Матусал – Еноконь цёракс, Енок – Яредэнь цёракс, Яред – Махалалелэнь цёракс, Махалалел – Кенанонь цёракс.

<sup>38</sup>Кенан – Эносонь цёракс, Энос – Сетэнь цёракс, Сет – Адамонь цёракс, Адам ульнесь Пазонь цёракс.

## Луки 4

### Идемевсесь снарты совавтомс пежетьс Иисусонь

<sup>1</sup>Иневанькс Оймеялтсо пештязь, Иисус велявтсь мекев Иордан леенть вакссто. Оймеялтось ветизе Сонзэ чаво модав.

<sup>2</sup>Тосо ниленьгемень чить Идемевсесь снартнесь совавтомс Сонзэ пежетьс. Весе те шкастонть Иисус мездеяк эзь ярса ды зярдю те шкась ютась, Иисусонь пек вачсь пекезэ.

<sup>3</sup>Сестэ Идемевсесь мерсь Иисуснэнь: «Бути Тон Пазонтъ Цёразо, мерть те кевентень велявтомс кшикс».

<sup>4</sup>Иисус каршонзо мерсь: «Сёрмадозь: “Аволь ансяк кши вийсэ эри ломанесь, ансяк Пазонь эрва валсо”».

<sup>5</sup>Идемевсесь ветизе Иисусонь сэрей пандо пряс ды сельгень прамс невтнзе Тензэ мода лангонь весе мастортнэнь

<sup>6</sup>ды кортась Иисуснэнь: «Мон макссынъ Тонеть весе сынст сюпавчист ды сынст лангсо азорксчинть. Сон максозь монь кедь алов, ды монь ули вием максомс сонзэ кинень мелем.

<sup>7</sup>Бути сюконят монень, те весемесь карми улеме Тонь».

<sup>8</sup>Иисус каршонзо кортась: «Оргодть Монь эйстэ, Сатана. Сёрмадозь: “Сюконякшнок Азоронтень, эсеть Пазонтень, ды важдтькак ансяк Сонзэ туртов”».

<sup>9</sup>Теде мейле Идемевсесь ветизе Иисусонь Ерусалимев, стявтызе Пазонь кудонь тэкшос ды мерсь: «Бути Тон Пазонтъ Цёразо, кирнявт тестэ алов,

<sup>10</sup>эдъ сёрмадозь: “Пазось кармавты Эсензэ ангелтнэненъ ванстомс Тонь.

<sup>11</sup>Сынъ кандтадызь Тонь кедест лангсо: илязо эшкеве пильгеть кевс”».

<sup>12</sup>Иисус мерсь каршонзо: «Ёвтазь истяк: “Иля снартневтне-варчавтне Азорот, эсеть Пазот”».

<sup>13</sup>Весе неть снартнематненъ-варчавтнематненъ прядозь, Идемевсесь кадызе Иисусонь лия шкань самс.

### Назаретэнь синагогасо

<sup>14</sup>Ды Иисус, пештязь Оймеялтонь вийсэ, велявтсь Галилеяв. Сонзэ эйстэ кулятне сралесть пертьпельга.

<sup>15</sup>Иисус тонавтсь синагогатнесэ, ды весе шнасть Сонзэ.

<sup>16</sup>Иисус сась Назаретэв, косо Сон кассь-кепететсь, ды оймсема чистэ, кода свал, мольсь синагогав. Тосо Сон лиссь кунсолыцятнень икелев Пазонь Сёрмадовкстнэнь ловномо.

<sup>17</sup>Сонензэ максызь Исайя пазмарицянь книганть, конань панжозь, Сон муизе тарканть, косо сёрмадозель:

<sup>18</sup> «Азоронь Оймеялтось Моньсэнь, эдь Сон вадимим-кочкимим монь. Сон кучимим яволявтомо Кенярксов куля пайстомотненень. Сон кучимим шумбралгавтомо каладозь седейтнень, ёвтамо пекстазтненень олячиде, сокортнэненень валдочиде. Сон кучимим лепштязтнень оляс нолдамо

<sup>19</sup>ды ёвтамо: сась Азоронь седеймарямонь шкась!»

<sup>20</sup>Иисус пекстызе книганть, максызе мекев синагоганть мельга якицянтень ды озась тонавтыцянтень таркас. Синагогасо аштицятнень вановтост лоткасть Сонзэ лангс.

<sup>21</sup>Ды Сон кармась кортамо тенст: «Течи, зярдо тынь кунсолыде неть валтнэнь, теевсь-топавтовсь те Сёрмадовксошь».

<sup>22</sup>Весе шнасть Иисусонь ды дивсесть сеть чанстев валтнэненень, конатнень Сон ёвтынзе. Ялатеке кортасть: «Сон жо ансяк Иосифень цёра!?»

<sup>23</sup>Иисус кортасть тенст: «Тынь, нама, мертядо Монень валмеревксэнь валтнэсэ: “Ормаменстиця, шумбралгавтык Эсь прят!” ды: “Тейть тиринь ошсонтькак сень, мезенть, кода минь маринек, Тон теекшник Капернаум ошсо”».

<sup>24</sup>Ды Сон поладсь: «Видестэ ёвтан тенк: кодамояк пазмариця а ловови эсензэ тиринь масторсо.

<sup>25</sup>Кемедэ монень: Илия пазмарицянь шкатнестэ, зярдо колмо пель марто иеть арасель пиземе, ды весе масторсонть ульнесь покш, стака вачочи, Израильсэ ульнесть ламо доват.

<sup>26</sup>Ялатеке, Пазось Илиянь киненьгак эйстэст эзизе кучо. Илия кучозель ансяк Сидон масторонь Сарепта ошонь довантень.

<sup>27</sup>Истя жо Елисей пазмарицянь шкасто Израильсэ ульнесть проказа ормасо ламо сэредицят, ансяк кияк сынст эйстэ эзь ульне шумбралгавтозь-ванськавтозь сыявкстнэде. Ванськавтозель ансяк Наэман, Сириянь ломанесь».

<sup>28</sup>Тень марязь, синагогасо весе кунсолыцятнень састь кежест.

<sup>29</sup>Сынь кирнявтнесть таркастост ды панизь Иисусонь ош ушов, ветизь сэрей пандо пряс, конань лангсо аштесь Назарет ошост, ды ёртыксэлизь Сонзэ тосто алов.

<sup>30</sup>Ансяк Иисус ютась ломантнень юткова ды тусь эсь кияванзо.

#### Капернаумонь синагогасо

<sup>31</sup>Иисус сась Галилеянь Капернаум ошов ды оймсема чистэ тонавтсь тосонь эрицятнень.

<sup>32</sup>Весе дивсесть Сонзэ тонавтомантень, эдь Сонзэ валтнэсэ ульнесь Пазонь вий.

<sup>33</sup>Се шкастонть синагогасонтъ ульнесь идемевсень аванькс оймеялтсо колазь ломань. Сон верьга вайгельть рангстась:

<sup>34</sup>«Ва-а-й! Назаретэнь Иисус! Мезе тетъ эряви минек эйстэ? Тон сыть минек ёмавтомо? Содатан, кият Тон: Тон Пазонтъ Иневаньксэзэ!»

<sup>35</sup>Иисус кежейстэ кардызе аванькс оймеялтонть: «Чатьмонтъ! Лиссть эйстэнзэ!» Аванькс оймеялтось ёртызе ломаненть масторов синагогантъ куншкас ды, зыянонь апак тее, лиссь эйстэнзэ.

<sup>36</sup>Весе дивсесть ды кортасть вейкест-вейкест туртов: «Кодат нетъ валтнэ?! Сон эсь азоркчинь вийсэнзэ кармавты аванькс оймеялтнэненгак лисемс ломантнестэ – ды сынъ лисить».

<sup>37</sup>Теде мейле Иисусто кулясь срадсь пертьпельга.

### Иисус шумбралгавты ламо сэредицят

<sup>38</sup>Иисус тусь синагогасто ды совась Симононь кудос. Те шкастонть Симононь низанязо сэредсь, теке палсь толсо. Сынь энялдсть Иисуснэнь лездамс сэредицянть.

<sup>39</sup>Иисус мольсь ваксозонзо, комась вельксээнзэ ды кардызе паломанть. Ормась кадызе аванть. Сон нейке жо стясь ды кармась инжетнень каванямо.

<sup>40</sup>Чивалгома шкасто ломантне, кинь ульнесть кудосост эрва кодамо ормасо сэредицят, ветизь ды кандызь сынст Иисусонь икелев. Сон путнесь кедензэ эрва сэредицянть лангс ды теньсэ шумбралгавтнесь сынст.

<sup>41</sup>Ламо ломантнень эйтэ теке шкастонть лиссть идемевстнеяк, верьга вайгельть пижнезь: «Тон – Пазонь кучовт Идицясь, Пазонть Цёразо!» Ансяк Иисус идемевстнень кардась ды мерсь тенст чатьмонемс седе, мезде сынь содасть: Иисус – Пазонь кучовт Идиця.

### Иисус ёвты Кенярков куля Иудеясо

<sup>42</sup>Валске марто Иисус лиссь ошто ды тусь чаво таркас. Ломантне кармась вешнемензэ, ды зярдо муизь, снартнесть Сонзэ кирдемс юткостост туемадонть.

<sup>43</sup>Ансяк Иисус мерсь тенст: «Монень эряви ёвтнемс Кенярков куля Пазонь Инязорксчиденть лия оштнэваяк, эдь Мон тень туртов кучозянгак».

<sup>44</sup>Ды Сон седе товгак пачтясь паро кулянтъ Галилеянь синагогатнева.

## Луки 5

### Иисус пурны Эсензэ перька васень тонавтницят

- <sup>1</sup>Весть Иисус аштесь Геннисарет эрьке чиресэ. Пазонь валонть марьямонзо кисэ ломантне эцесть малазонзо.
- <sup>2</sup>Иисус несъ ведь чирестэ кавто венчт. Калонь кундыцятне лиссть венчстэ ды ёрвалесть алтымаст .
- <sup>3</sup>Иисус совась вейке венчентень, конась ульнесь Симононь, ды мерсь сонензэ аламодо уемс эрьке чирестэнтъ. Теде мейле Иисус, венчсэнтъ озадо аштезь, кармасть тосто ломантнень тонавтомо.
- <sup>4</sup>Зярдэ Иисус прядызе тонавтоманзо, мерсь Симоннэнь: «Уйть седе домка таркав ды каинк алтыманк калонь кундамга».
- <sup>5</sup>Симон каршонзо мерсь: «Тонавтыця, минь вень перть важодинек, ансяк мезеяк эзинек кунда. Ялатеке мон таго нолдасынь алтыматнень, Тон меремат кунсолось».
- <sup>6</sup>Сынь истя тейстькак ды кундасть зняро калт, мик алтыматне кармасть сезневеме.
- <sup>7</sup>Сынь, кедьсэ аволязь, тердизь лездамо лия венчстэ ялгатнень. Сетне уйсть ваксозост ды пряс пештизь калсо кавонест венчтнень. Венчтне мик кармасть ваямо.
- <sup>8</sup>Тень неезь, Симон-Петра прась Иисусонь икелев кумажа лангс ды знялдозевсь: «Кадомак, Азором, эдь мон пежетеван!»
- <sup>9</sup>Истя ламо кундазь калтнэде Симон ды сонзэ лия ялганзо абунгадсть ды тандадсть.
- <sup>10</sup>Истя жо тандадсть Яков ды Иоанн, Зеведеень цёранзо, конат кундсесть калт Симон марто вейсэ. Иисус мерсь Симоннэнь: «Иля пеле, те чистэнтъ саезь тон кармат улеме Монень ломанень ветиякс, аволь калонь кундсицякс».
- <sup>11</sup>Сынь таргизь венчтнень эрьке чирентень, кадызь весементь ды тусть Иисус мельга.

### Проказа ормасо сэредицянтъ ванськавтомась

<sup>12</sup>Иисус кодамо-бути ошсо вастсь ломань, кона прямо пильгс вельтязель проказа ормасо. Зярдс сон неIZE Иисусонь, пульзясь икелензэ, сюконясь модас ды кармась энялдомо: «Азорс, улиндеряй мелеть, мон Тонеть ванськавтован!»

<sup>13</sup>Иисус венстизе кедензэ, токизе сонзэ ды мерсь: «Ули мелем. Ванськадт!» Ормась нейке жо кадзызе сэредицянтъ.

<sup>14</sup>Иисус кармавтсь тензэ: «Вант, киненьгак теде иля ёвтне. Азё попнэнь ды ванкшновтык прят. Теде мейле ванськадомат кисэ кандт Пазонтень казне. Истя эряви теемс Моисеень Коень коряс. Теньсэ тон невтсьак ломантненень эсь шумбралгадомат».

<sup>15</sup>Седеяк келейстэ сралесь Иисусто кулясь. Ламодояк ламо ломанть пурнавкшность Сонзэ перька – Сонзэ кунсолосо ды шумбралгалеме эсест орматнеде.

<sup>16</sup>Иисус жо сеедьстэ тукшнось чаво таркав ды тосо ознокшнось.

### Капернаум ошсо катардыцянь шумбралгавтомась

<sup>17</sup>Весть, зярдс Иисус тонавтсь, пуромозтнень ютксс Сонзэ кунсолость фарисейтькак ды Койс тонавтыцяткак, конат састь Галилеянь ды Иудеянь весе велетнестэ ды Ерусалимстэяк. Азоронь виесь ульнесь Иисусонь эйсэ, секскак Сон шумбралгавтсь сэредицянтнень.

<sup>18</sup>Зяряя цёрат ацамо лангсо кандсть Сонензэ мадезь ломань, кона сэредсь катар ормасо . Совавтыксэлизь сэредицянтъ кудос ды пуктыксэлизь Иисусонь икелев.

<sup>19</sup>Ансяк кудосонтъ ульнестъ пек ламо ломанть, секскак кандыцятне тов эзть соваво. Сынъ кузсть кудонтъ лангс, калавтызь черепицянь вельтявксонтъ ды варяванть нолдызь сэредицянтъ ацамонек-мезнек ломантнень юткс, Иисусонь икелев.

<sup>20</sup>Зярдо Иисус неIZE сынст кемемаст, Сон мерсь сэредицантень: «Оям, нолдазь тонь пежететь».

<sup>21</sup>Фарисейтне ды Койс тонавтыцятне арсезевсть: «Кие те истямось? Мекс Сон истя Пазонтъ нарьги-покорды? Кинень, Паздонть башка, нолдавить пежетне?»

<sup>22</sup>Иисус, сынст мельтнень содазь, кевкстинзе: «Мезекс тынь кирдтядо седейсэнк истят арсематнень?»

<sup>23</sup>Мезесь седе шождыне меремс: “Нолдазь тонь пежететь”, эли “Стяк ды якак”?

<sup>24</sup>Истя тынь содадо, масторлангсо Ломантнень Цёранть ули азорксчизэ пежетень нолдамскак». Теде мейле пшкадсь катардыцантень: «Кортан тетъ: стяк, сайтъ ацамот ды азё кудов!»

<sup>25</sup>Весень сельме икеле сэредицясь сеске стясь, саинзе ацамонзо ды тусь кудов, Пазонтъ шназь.

<sup>26</sup>Покш абунгадома саинзе весень, сынъ шнасть Пазонтъ ды тандадомань пачк кортасть: «Течи минь неинек акемевикс тевть!»

### Иисус тердизе Левинь

<sup>27</sup>Теде мейле Иисус тусь ды неIZE каявксонь пурныцанть Левинь. Сон озадолъ каявксонь пурнамо кудонтъ вакссо. Иисус мерсь тензэ: «Мольть Монь мельга!»

<sup>28</sup>Леви стясь, весементъ кадызе ды тусь мельганзо.

<sup>29</sup>Мейле Леви эсензэ кудосо анокстась Иисусонь туртов покш каванямо. Тосо ульнестъ каявксонь ламо пурныцят ды лия инжетъкак. Сынъ весе вейсэ ярсастъ-симстъ.

<sup>30</sup>Койс тонавтыцятне ды фарисейтне кежиявтозь кортасть Иисусонь тонавтницянстэнь: «Кода истя тынь каявксонь пурныця марто ды лия пежетев ломань марто вейсэ ярстадо-симтядо?!»



<sup>31</sup>Иисус мерсь каршост: «Ормаменстиця эряви сэредицяненъ, аволь шумбра ломанненъ.

<sup>32</sup>Мон сынъ тердеме велявтомс Пазонтень пежетевтненъ, аволь видечисэтненъ».

### **Постонь кирдемадо кевкстема**

<sup>33</sup>Иисусонь кевкстизь: «Мекс Иоаннонь ды фарисейтненъ тонавтницяст сеедьстэ постовить ды озныть, Тонсетне жо ансяк ярсыть ды симить?!»

<sup>34</sup>Иисус мерсь тень каршо: «Арази кармавтовить постонь кирдеме свадьбань инжетне, зярс урвакстыцясь мартост?

<sup>35</sup>Сы шка, зярдю урвакстыцясь ули саезь юткстост, сестэ, сеть читнестэ, сыньгак кармить постовамо».

<sup>36</sup>Ды Иисус ёвтнесь сыненст валвелявкс: «Кияк ташто оршамос а панды коцтонь панкс, кона сезезь од оршамосто. Бути истя теят, сестэ колави од оршамоськак ды од коцтонь панксоь а лади таштонтьгак.

<sup>37</sup>Од винаяк кияк а кайси ташто кедень кескавс . Бути истя теят, сестэ винась сезнесынзе кедень кескавтненъ ды чуди масторов, кескавтнеяк ёмить.

<sup>38</sup>Секскак од винанть эряви каямс од кедень кескавтнес. Сестэ ванстови теяк, тонаяк.

<sup>39</sup>Ды киньгак, кона симнесь ташто винадо, а ули мелезэ симемс одто. Сон корты: “Таштось седе вадря”».

## **Луки 6**

### **Иисусонь тонавтницятне сезнить сюрюпрят оймсема чистэ**

<sup>1</sup>Васенце оймсема чистэ Инечинь омбоце чидентъ мейле савсь Иисуснэнь ютамс тонавтницянзо марто суро паксява. Сонзэ тонавтницятне кармасть сезнеме сюрюпрят, мерькамо сынст коморсост ды ярсамо сюродонтъ.

<sup>2</sup>Кой-конат фарисейтнеде кевкстизь сынст: «Кода истя тынь оймсема чистэ тейтядо сень, мезе а мереве теемс те чистэнтъ?!»

<sup>3</sup>Иисус мерсь сынст каршо: «Тынь, натъ, эзиде ловно седе, мезе тейсь Давид инязорось, зярдэ сон ды сонзэ мартонзотнеяк вачомкшность?»

<sup>4</sup>Сон совась Пазонь кудос, сайнзе Пазонтъ икелев путозь кшитнень ды ярсась, куш неть кшитнеде, попто башка, киненьгак а меревиль ярсамс. Давид макссь те кшидентъ сетнененьгак, конат ульнестъ сонзэ марто».

<sup>5</sup>Мейле Иисус поладсь: «Ломантнень Цёрась оймсема чинть лангсоjak азоро!»

### Коське кедь ломань

<sup>6</sup>Лия оймсема чистэ Иисус сась синагогав ды тонавтсь. Тосо ульнестъ цёра, конань вить кедезэ коськезель.

<sup>7</sup>Койс тонавтыцятне ды фарисейтне вешнестъ тувтал Иисусонь чумондомс. Секскак сынъ пштистэ вансть Иисус мельга: шумбралгавты-арась Сон оймсема чистэ?

<sup>8</sup>Иисус, сынст арсематнень содазь, мерсь коське кедь ломанентень: «Стяк ды листь куншкав». Тонась стясь ды лиссь куншкав.

<sup>9</sup>Сестэ Иисус мерсь мельганзо ваньцятненень: «Мон кевкстнян тынк, мезе мереве теемс оймсема чистэ? Паро эли берянь? Идемс ломанень эрямонтъ эли ёмавтомс? Сынъ жо чатьмонсть».

<sup>10</sup>Сон варштась пертьпельга весень лангс ды мерсь коське кедентень: «Венстик кедеть». Се венстизе, ды кедезэ теевсь шумбракс, омбоцентъ кондямокс.

<sup>11</sup>Тень неезь, Койс тонавтыцятне ды фарисейтне азаргадсть ды кармасть эсь уютковаст кортнеме-арсеме, кодамо зыян теемс Иисуснэнь.

### Кемгавтово апостолт

<sup>12</sup>Нетъ читнестэ Иисус мольсь пандо лангс озномо ды ютавтызе тосо весе венть, Пазнэнь ознозь.

<sup>13</sup>Чинь лисема шкасто Сон тердинзе Эсензэ тонавтницятнень, кочкась юткстост кемгавтово ды путынзе апостолокс.

<sup>14</sup>Вана сынст лемест: Симон, конанень Иисус путсь лем – Петра; Андрей, Симононь ялаксо; Яков, Иоанн, Филип, Бартоломей,

<sup>15</sup>Матвей, Фома, Алфеень Яков, Симон, конанень мерильть Зилот,

<sup>16</sup>Яковонь Иуда ды Искариотонь Иуда, кона мейле миизе Иисусонь.

### Иисус шумбралгавты ды тонавты ломанть

<sup>17</sup>Иисус валгсь апостолтнэнь марто пандонть прясто ды лоткась валаня таркас. Тосо пурнавозельть ламо Сонзэ тонавтницянзо ды ламо лия ломанть весе Иудеястонть, Ерусалимстэ ды иневедь чирень Тирэнь ды Сидононь оштнэстэ.

<sup>18</sup>Сынь састь Иисусонь кунсолOMO ды эсь ормадост шумбралгадомо. Иисус шумбралгавтынзе сетненьгак, конат майсесть аванькс оймеялтнэде.

<sup>19</sup>Эрвась перьканзо аштицятнеде бажась токамс Иисусонь, секс мекс Сонзэ эйстэ мольсь вий, конась шумбралгавтсь весень.

<sup>20</sup>Иисус варштась тонавтницятнень лангс ды кармась кортамо: «Уцяскавтадо тынь, конатне чарькодить эсь кажовчист Пазонть икеле, эдь тынк ули Пазонь Инязорксчинк.

<sup>21</sup>Уцяскавтадо тынь, течинь вачотне: Пазось тынк андтадызь. Уцяскавтадо тынь, течинь авардицятне: тынь карматадо кенярдозь пейдеме.

<sup>22</sup>Уцяскавтадо тынь, зярдэ Ломантнень Цёранть кувалма тынк лангс кирдить кеж, зярдэ тынк панить ломантне эсест ютксто ды покордыть, зярдэ тынк лементькак нулгодстить.

<sup>23</sup>Се чистэнтъ кецядо ды мик верев кирнявтнеде кенярдомадонть: менель лангсо тыненк те ули сюпавдо як сюпавсто пандозь! Кода ней теить тынк марто неть ломантне, истя сынст покштятне як тейнест пазмарицятнень марто.

<sup>24</sup>Тыненк жо, сюпавтненень, карми улеме покш зыян, эдь тыненк уш педэ пес максозель эсь уцясканк.

<sup>25</sup>Покш зыян сы тыненк, неень шкань пешксечисэ эрицятненень: тынь карматадо эрямо вачочисэ. Покш зыян тыненк, ней пейдицятненень: тынь карматадо ризнэме ды авардеме!

<sup>26</sup>Покш зыян карми улеме тыненк, зярдэ весе тынк шныть! Истя жо сынст покштятне як шнасть кенгелиця пазмарицятнень».

#### **Вечкеде эсенк душмантнэнь**

<sup>27</sup>«Тыненк жо, кить Монь кунсолыть, кортан: вечкеде эсенк душмантнэнь, тееде паро сетненень, конат тынк лангс кирдить кеж.

<sup>28</sup>Чанстядо сетнень, конат сюдыть эйсэнк, ды ознодо сетнень кисэ, конат тынк покордыть.

<sup>29</sup>Бути кие риштятанзат чамаумарь ланга, – аравтык омбоцентькак. Ланга оршамопелень нельгицянтень максык алга панароткак.

<sup>30</sup>Эрвантень, кие тонь кедьстэ веши, макст. Ды бути кие сайсы мезентькак тонь кедьстэ, иля веше мекев.

<sup>31</sup>Тееде ломантнень туртов ансяк сень, мезе тынк меленк коряс, эряви теемс тенст эсенк туртов.

<sup>32</sup>Бути тынь вечксынк ансяк сетнень, конат вечктядызь тынк, сестэ мейсэ тынк питнейчись?! Эдь пежетев ломантнеяк вечкить эсест вечкицятнень.

<sup>33</sup>Бути тейтядо паро ансяк тыненк паронь теицятненень, сестэ мейсэ тынк питнейчись?! Пежетев ломантнеяк истя тейнить.

<sup>34</sup>Бути тынь макснетядо мезе-бути долкс ансяк сетненень, конатнень пельде учотадо мекев пандома, сестэ мейсэ тынк питнейчись?! Эдь пежетевтнеяк макснить долкс вейкест-вейкест туртов, зярд содыть: мекев пандсызь максозенть питнензэ.

<sup>35</sup>Тынь тееде мекевланк: вечкеде эсенк душмантнэнь, тееде паро, макснеде долкс сень, мезе вешить, ды илядо учо мекев пандома. Сестэ тыненк ули сюпавдояк сюпавсто пандозь ды тынь алкукс ультядо эйдекс Верепазонтень, конась чевте седей паронь стувтыцятнень туртовгак ды зыянонь теицятнень туртовгак.

<sup>36</sup>Уледе истямо седеймарицякс, кодамо седеймариця тынк Тетясь».

### Илядо судя лиятнень

<sup>37</sup>«Илядо судя лиятнень – ды тынккак Пазось а судятадызь. Илядо чумондо киньгак – ды тынккак Сон а чумондтадызь. Олякстомтодо чумосто – ды Сонгак тынк чумосто олякстомтадызь.

<sup>38</sup>Максодо – ды тыненккак максови Пазонь пельде пешксе онкссо: эцезь, матразь ды пряс пештязь онкссо Сон каи тынк панар элезэнк. Кодамо онкссо онкстатадо, истямосо тыненккак онкстазь ули».

<sup>39</sup>Иисус ёвтнесь сыненст истямо валвелявкс: «Арази ветяви сокоронтень сокорось? Кавонест, нать, а прыть латкс?

<sup>40</sup>Тонавтницясь а эрси тонавтыцядонзо седе покш. Ансяк тонавтнеманть прядозь, сон ули тонавтыцянзо кондямокс.

<sup>41</sup>Кода тон сардыненть несак малавиксэть сельместэ, бути эсеть сельместэ чочконтъ а редясак?

<sup>42</sup>Эли, кода мерят эсеть малавиксэть туртов: “Седейбельксэм, эрга таргаса сельместэть сардыненть”, бути а редясак чочконтъ эсеть сельместэ? Чачонь полавтниця! Таргик васняк эсеть сельместэ чочконтъ, ды сестэ несак, кода таргамс малавиксэть сельместэ сардыненть».

### **Чувто ды умарть**

<sup>43</sup>«А эрси паро чувто, кона максоволь берянь умарть, ды а эрси берянь чувто, кона максоволь паро умарть.

<sup>44</sup>Эрва чувтось содави умарензэ кувалт. Эдь кодоркс куракшто а кочксить инжирт ды пурьгине палакссто а сезнекшнить винаумарть.

<sup>45</sup>Вадря ломанесь эсензэ седей потмонь сюпавчистэнтъ ливтни паро; берянь ломанесь эсензэ седей потсто ливтни апаро. Мезде ломанентъ пештязь седеезэ, се лисни сонзэ кургстояк».

### **Кудонь кавто путыцят**

<sup>46</sup>«Мекс тынь мертядо монень: “Азоро! Азоро!” – ды ялатеке а тейтядо сень, мезес Мон кармавтан эйсэнк?

<sup>47</sup>Ёвтаса тенк, кинь ёнов моли эрвась, кона сакшны Монень, кунсолы Монь валон ды топавты эйсэст.

<sup>48</sup>Сон моли кудонь путыця ёнов, кона кудонь теемстэ чувсь домка латко ды путызе кудонзо кевень юронть лангс. Секскак, зярдэ сыргась чудиведесь ды эшкевсь те кудонтень, сон эзь сявордово: кудось путозель кев лангс.

<sup>49</sup>Кона жо кунсолы Монь валтнэнь ды ялатеке а топавты эйсэст, моли истямо ломань ёнов, кона пугызе кудонзо юртомо, видьстэ мода лангс. Ды зярдо чудиведесь эшкевсь те кудонтень, сон сеске допрок каладсь».

## Луки 7

### Иисус ды римень сядонь прявтось

<sup>1</sup>Теде мейле, зярдо Иисус ёвтызе кунсолыцятненень весементь, мезде арсесь ёвтамс, Сон велявтсь Капернаум ошов.

<sup>2</sup>Те шкастонть тосо вейке сядонь прявтонь важозо пек сэредсь. Сон ульнесь кулома лангсо. Сядонь прявтось те важонтть пек вечксь ды вантсь.

<sup>3</sup>Зярдо сядонь прявтось марясь Иисусто, сон кучинзе Иисуснэнь евренень прявтнэнь энялдома марто: самс ды идемс важонтть куломадо.

<sup>4</sup>Сынь састь Иисуснэнь ды кармасть псистэ энялдомо Сонзэ икеле: «Те сядонь прявтось паро ломань ды секскак, инеськетть, лездак тензэ!

<sup>5</sup>Сон вечксы минек раськентть ды мик тейсь минек туртов синагога».

<sup>6</sup>Иисус сыргась мартост. Зярдо Иисус ульнесь аволь васоло кудонтть эйстэ, сядонь прявтось кучинзе оязо ёвтамо тензэ: «Азором, иля майсе. Мон Тонь коряс истямо вишкине ломанян: виздян натой совавторс Тонь эсень кудос.

<sup>7</sup>Мон а маштован Тонь икеле аштицякс, секскак мон монсь эзинь са Тонетть. Ансяк ёвтак вал, ды пички монь важом.

<sup>8</sup>Мон монськак прявтонь кедь ало аштиця ломанян, ды монь кедь алояк аштить ушмант. Зярдо кармавтан вейкентень: “Азё!” – сон моли. Омбоцентень кортан: “Сак тей!” – сон сы, ды зярдо эсь важонтень мерян: “Теик сень!” – сон тейсь».

<sup>9</sup>Нетть валтнэнь марязь, Иисус пек дивазевсь, велявтсь мельганзо молиця ломантненень пелев ды мерсь: «Ёвтан тенк: истямо кемема зярс Мон эзинь вастне Израилень ломантненень юткстояк».

<sup>10</sup>Зярдю кучозтне мурдасть мекев кудов, сынъ неизъ важонтъ шумбракс.

### Наин ошсо довань цёрантъ вельмевтемазо

<sup>11</sup>Аламо шканъ ютазь Иисус сыргась Наин ошов. Сонзэ марто мольсть ламот тонавтницянзо ды ламо лия ломантъ.

<sup>12</sup>Зярдю Сон пачкодсь ошонъ ортантъ видьс, ошстонть ливтильть калмамо кулозь ломанъ. Те кулозесь ульнесь дова аванъ вейкине цёра. Авантъ марто ошто мольсть ламо ломантъ.

<sup>13</sup>Зярдю Азорось неизе кулозентъ аванзо, седеезэ ризнэзевсь кисэнзэ, ды Сон мерсь тензэ: «Иля аварде!»

<sup>14</sup>Мейле Иисус мольсь кулозентъ малас ды токинзе кандолазтнэнь. Кандыцятне лоткасть, ды Иисус мерсь: «Цёрам, тонеть кортан: стяк!»

<sup>15</sup>Кулозесь озась ды кармась кортамо. Иисус сонзэ мекев максызе аванстэнь.

<sup>16</sup>Весе ломантнень копачинзе тандадома, сынъ шнасть Пазонтъ истямо валсо: «Вана минек юткс сась ине пазмариця! Пазось сась Эсензэ раськентень лездамо!»

<sup>17</sup>Те кулясь Иисусто срадсь весе Иудеявантъ ды перьканзояк.

### Нававтыця-Лемдиця Иоаннонь кучозтне

<sup>18</sup>Зярдю Иоаннонь тонавтницятне ёвтнизь тензэ весементъ, мезе Иисус тейсь,

<sup>19</sup>Иоанн тердинзе кавтотнень сынст эйстэ ды кучинзе Иисуснэнь истямо кевкстема марто: «Тон – Се, конанень эряви самс, эли миненек учомс лия?»

<sup>20</sup>Кучозтне састъ Иисуснэнь ды кортасть: «Нававтыця Иоаннось кучимизь минек Тонь кевкстеме: “Тон – Се, конанень эряви самс, эли миненек учомс лия?”»



<sup>21</sup>Те шкане Иисус ламонь шумбралгавтсь ормадо ды сэредемадо ды ламосто пансесь апаро оймайтт; ламо сокортнэнень велявтсь чивалдо.

<sup>22</sup>Ды секскак Иисус кучозтненень мерсь: «Азёдо ды ёвтадо Иоаннэнь, мезе тынь неиде ды мариде: сокортнэ неить, аякицятне якить, проказасо сэредицятне ванськадыть, амарицятне марить, кулозтне вельмить, кажовтненень пачтяви Кенярксов куля.

<sup>23</sup>Уцяскав се, кие Монь кувалма а кавтолды!»

<sup>24</sup>Зярдо Иоаннонь кучозтне тусть, Иисус кармась ёвтнеме ломантненень Иоанндо: «Мезе лангс ваномо тынь якиде чаво модав? Вармасо лымбакстница нудей лангс?

<sup>25</sup>Мезень ваномо эно якиде? Паряк сюпав оршамосо оршазь ломанень? Сеть, конат оршазь питнейстэ ды эрить сюпавсто, – сеть эрить инязоронь кудова.

<sup>26</sup>Кинь ваномо эно якиде? Пазмарицянь? Виде, Иоанн пазмариця, ялатеке кортан тенк: сон пазмарицядож покш.

<sup>27</sup>Сон се, конадонтъ ульнесь сёрмадозь: “Вана Тонь самодо икеле кучса Монсень кулянь кандыцам, сон анокстасы кинть Тонь туртов”.

<sup>28</sup>Кортан тыненк: весе чачозтненень ютксо арась вейкеяк пазмариця, кона улевель Нававтыця Иоанндо инекс. Ялатеке сехте вишкинесь, кона Пазонтъ Инязоркчисэнтъ, сондензэ покш».

<sup>29</sup>Ды весе сонзэ кунсолыця ломантне, мик каявксонь пурныцятнеяк, ловизь видекс Пазонь меленть-арсеманть ды секс нававтовызь пряст Иоаннонь кедьстэ.

<sup>30</sup>Фарисейтне ды Койс тонавтыцятне жо тусть Пазонь меленть каршо ды эзть карма Иоаннонь кедьстэ пряст нававтомо.

<sup>31</sup>Сестэ Азорось мерсь: «Ки марто вейкетстямс Монень неень пингень ломантненень? Кинь ёнов сынь молить?

<sup>32</sup>Сынь прок ошкужосо озадо аштиця эйкакшт, конат вейкест-вейкест туртов сеерить: “Минь тынк туртов сединек нудейсэ, тынь жо эзиде киште. Минь тенк лайшинек, тынь эзиде аварде!”

<sup>33</sup>Вана сась Нававтыця Иоанн, кшидеяк а ярсы, винадож а сими – ды тынь кортатадо: “Сонзэ эйсэ идемевсь”.

<sup>34</sup>Сестэ сась Ломантнень Цёрась, ярсыяк ды симияк – ды тынь ялатеке кортатадо: “Вана опкан кургось ды винань вечкицясь, каявксонь пурныцянь ды лия пежетев ломанень ялгась!”

<sup>35</sup>Ялатеке Пазонь превейчинть невтить видекс весе ломантне, конат молить сонзэ киява».

#### Фарисей ды пежетев ава

<sup>36</sup>Фарисейтнень эйстэ вейкесь тердизе Иисусонь эстензэ ярсамо. Иисус совась се ломаненть кудос ды озась столь экшс.

<sup>37</sup>Те ошсонть эрясь усксевиця ава. Зярдс сон марясь Иисусонь ярсамодонть фарисеень кудосонть, сон сась тов ды кандсь тантей чине ой марто алебастрень кедьге.

<sup>38</sup>Сон арась Иисусонь пильгензэ пес ды кармась авардеме. Сельведензэ валность Иисусонь пильгензэ. Авась эсензэ прячертнесэ кармась нардтнеме Иисусонь пильгтнень, палсесь сынст ды ваднесь эйсэст тантей чине ойсэ.

<sup>39</sup>Тень неезь, фарисеесь, кона тердизе Иисусонь, арсезевсь: «Улевельгак те ломанесь алкуксонь пазмариця, сестэ Сон содаволь, кодамо те авась, кона Сонзэ токши. Те авась – усксевиця».

<sup>40</sup>Иисус велявтсь фарисеенть ёнов ды мерсь тензэ: «Симон, Мон тонеть мезе-бути ёвтавлинь». Симон тень каршо пшкадсь: «Ёвтак, тонавтыця».

<sup>41</sup>«Весть кавто цёрат сайсть ярмаконь максницянь кедьстэ долкс ярмакт, – ушодсь Иисус. – Вейкесь эйстэст саекшнесь кедьстэнзэ ветесядт динарт, омбоцесь – ведьгемень.

<sup>42</sup>Конаньгак саицятнень эйстэ арасель мейсэ пандомс, ды максыцясь кавонест туртов нолдынзе пандовксост. Ёвтак: конась, тонь койсэ, карми седе пек вечкеме максыцянтъ?»

<sup>43</sup>Симон тень каршо ёвтась: «Арсян се, конанень ульнесь нолдазь седе покш пандовксось». «Видестэ тон арсят», – мерсь Иисус.

<sup>44</sup>Седе мейле Иисус велявтсь аванть ёнов ды мерсь Симоннэнь: «Тон несак те аванть? Зярдэ Мон сынь тонь кудос, тон ведьгак эзить максо пильгень шлямс, авась жо Монь пильгень валнынзе сельведьсэнзэ ды нардтнинзе прячерьсэнзэ.

<sup>45</sup>Тон эзимик пала Монь вастомсто, авась жо а лоткси Монь пильгень палсемедэ совамодон мейле те шкас.

<sup>46</sup>Тон Монь прям натой эзик ваде ойсэ, сон жо Монь пильгень ваднинзе тантей чине ойсэ.

<sup>47</sup>Мон ёвтаса теть, мекс истя: те аванть ламо пежетензэ нолдазь, ды секскак сон Монь пек вечксамам. Конань жо аламо пежетензэ нолдазь, сень вечкемазояк а покш».

<sup>48</sup>Мейле Иисус мерсь авантень: «Тонь пежететь нолдазь».

<sup>49</sup>Сестэ весе лия инжетне эсь пачкаст арсезевсть: «Кие те истямось, конась пежетненьгак нолды?»

<sup>50</sup>Иисус жо мерсь авантень: «Тонь кемемат идинзеть. Азё седейоймамо марто».

## Луки 8

### Иисус мельга молиця аватне

<sup>1</sup>Тёде мейле Иисус яксесь ошсто ошс, велестэ велес ды пачтясь ломантнень туртов Кенярксов куля Пазонть Инязорксчидензэ. Сонзэ марто ульнесь кемгавтово тонавтницят

<sup>2</sup>ды зяро-бути ават, конатнень Сон шумбралгавтынзе ормадо ды ванськавтынзе апаро оймеялтнэнь эйстэ. Ютксост ульнесь Магдала ошсто Мария, конаньстэ Иисус пансь сисем идемевсть,

<sup>3</sup>Иоанна, конань Куза мирдезэ ульнесь Ирод инязоронь кудоветицякс, Сусанна ды ламо лия ават, конат лездасть Иисуснэнь ды Сонзэ тонавтницятненень эсест ули-паросо.

### Видицядо валвелявкс

<sup>4</sup>Зярдэ пурнавсть Иисусонь перька ламо ломанть, конат састь пертьпельде, Сон ёвтнесь сыненст истямо валвелявкс:

<sup>5</sup>«Вана видицясь лиссь видеме. Зярдэ сон видсь, конат-конат видьмекстнэ прасть ки чирес. Тосо сынст чалгсизь ломанть ды кочксизь нармунть.

<sup>6</sup>Лиятне прасть кевев модас, куруксто лиссть ды куруксто коськсть: эзь сато летькесь.

<sup>7</sup>Лиятне прасть кирмалав пулос, лисевкстнэнь марто кассть кирмалавтнэяк ды лепштизь сынст.

<sup>8</sup>Лиятне прасть паро модас, кассть ды кандсть видьмекст, натой видежденть сядодо ламо». Те валвелявксонть прядозь, Иисус серьгедсь: «Кинь улить мариця пилензэ – кунсолозо!»

### Валвелявксонть смустезэ

<sup>9</sup>Тонавтницятне кевкстизь Иисусонь, кода чарькодемс те валвелявксонть.

<sup>10</sup>Иисус ёвтась каршост: «Тыненк максозь чарькодемс Пазонь Инязорксчинзэ салавачитнень. Лиятнень марто жо Мон кортан валвелявкссо. Кадык сынъ “ваныть ды ялатеке а неить, кунсолыть ды ялатеке а чарькодить”.

<sup>11</sup>Те валвелявксонть смустезэ истямо: видьмекстнэ – Пазонь вал.

<sup>12</sup>Ки чирес видезесь невти сетнень, конат кунсолыть валонть, ды мейле тенст сы Идемевсесь ды саласы седейстэст видезь валонть сень кисэ: иляст кемезеве сынъ ды иляст уле идезь.

<sup>13</sup>Кевпандо лангс видезесь невти сетнень, конат марясызь валонть ды сеске кенярдозь сайсызь сонзэ седеезэст. Ялатеке неть ломантнень арась кемема юрост, сынъ кемить ансяк аламо шкас. Зярдо сы кодамояк снартнема-варчавтнема, сынъ потыть кемемастонть.

<sup>14</sup>Кирмалав пулос празь видьмекстнэ невтить сетнень, конат марясызь валонть, ансяк шкань ютазь эрва чинь мелявкстнэ, сюпавчись ды тантей эрямось-аштемась лепштысызь валонть, ды сынъ а раштыть.

<sup>15</sup>Паро мода лангс видезесь невти сетнень, конат марясызь валонть, кеместэ кирдить сонзэ ванькс ды чевте седейсэст ды цидярдомасо кандыть видьмекст». Тень ёвтамодо мейле Сон мерсь: «Кинь улишь мариця пилензэ – кунсолозо!»

#### **Кода алкукс кунсоломс валонть**

<sup>16</sup>«Кияк лампанть а кирвазтнесы кедьге алов эли удома эзем алов путомань кисэ. Мекевланк, сонзэ путнесызь лампань кирдема таркас, ды кадык весе, кить совить, неить валдонть.

<sup>17</sup>Эдь арась истямо кекшевкс, конась аволь муеве, ды арась истямо салавань тев, конась аволь тееве содавиксэкс ды аволь лисе лангс.

<sup>18</sup>Секскак арседе сень лангсо, кода тынь кунсолотадо. Эдь кинь ули, сенень седеяк ламо максови, кинь вана арась, сень кедьстэ саеви сеяк, мезесь маряви сонензэ эсензэкс».

### Иисусонь алкуксонь кудораськензэ – Сонзэ тонавтницянзо

<sup>19</sup>Весть Иисуснэнь састь авазо ды братонзо, арсесть вастовомс мартонзо. Ансяк Сонзэ малас сынъ эзь ютаво: Иисусонь перька ульнесть пек ламо ломанть.

<sup>20</sup>Иисуснэнь ёвтасть: «Ават ды братот аштить ушосо, сынъ Тонь неевлидизь».

<sup>21</sup>Иисус тень каршо мерсь: «Монь авам ды братон сетне, конат кунсолыть Пазонь вал ды топавтыть сонзэ».

### Иисус лоткавты давол

<sup>22</sup>Весть Иисус тонавтницянзо марто озась венчес ды мерсь тенст: «Печтясынек эрькенть». Сынъ сыргасть,

<sup>23</sup>ды уемстэ Иисус матедевсь. Апак учо эрькенть лангс каявсь покш давол, венчесь кармась пешкедеме ведте, секс тонавтницятне пельсть ваямодо.

<sup>24</sup>Сынъ пувтызь Иисусонь ды сеересть: «Тонавтыця, тонавтыця, эль ваятано!» Сон стясь, кардынзе варманть ды ведьвелявкстнэнь. Даволось оймась, теевсь сэтьме.

<sup>25</sup>«Косо кемеманк?» – кевкстинзе Иисус тонавтницятнень. Сынъ, тандадозь ды абунгадозь кевкстнесть вейкест-вейкест: «Кие те ломанесь? Сон карды мик вармантькак, ведентькак, ды сынъ кунсолыть Эйсэнзэ!»

### Идемевсень колавт ломанень шумбралгавтомась

<sup>26</sup>Мейле сынъ пачкодсть Гадарань масторс, кона ашти Галилеянтъ каршо.

<sup>27</sup>Зярдэ Иисус лиссь венчстэнтъ эрьке чирентень, каршонзо вастовсь ошсто сыця цёра ломань, кона колазель идемевстнесэ. Сонзэ лангсо умок арасель оршамопель, ды эрясь сон аволь кудосо – калмова.

<sup>28</sup>Иисусонь неемстэ сон рангозь прась кумажа лангс икелензэ ды верьга вайгельть пижакадсь: «Иисус, Верепазонь Цёра! Мезе Тонеть эряви монь пельде? Энялдан икелеть, иля пиштефте эйсэнь!»

<sup>29</sup>Сон кортась истя секс, мекс Иисус кармавтызе аванькс оймеялтонть лисемс эйстэнзэ. Те ломанесь уш кувать кирдевсь идемевсентъ виензэ ало. Пиштяканть кедензэ ламоксть сьулмсекшнлизь кшнинь рисьмесэ, пильгензэяк кершакшнлизь кшнинь тертьсэ – истя лепштиксэлизь азарьксчинзэ. Ялатеке неть сьулмотнень сон сезнилинзе, ды идемевсесь пансь сонзэ ломантеме таркав.

<sup>30</sup>Иисус поладызе кортамонтъ ды кевкстизе сонзэ: «Кода тонь леметь?» Сон каршонзо мерсь: «Монь лемем Легион», эдь сонзэ потс совазельть ламодояк ламо идемевсть.

<sup>31</sup>Идемевстне кармасть энялдомо Иисусонь икеле: «Илямизь пане тоначинь потмакстома отьмас».

<sup>32</sup>А васоло, пандо чиресэ, вановсь тувонь покш стада. Идемевстне кармасть энялдомо Иисусонь икеле: «Мерть миненек совамс тувотнес». Иисус мерсь совамодо.

<sup>33</sup>Сестэ идемевстне лиссть ломаньстэнтъ ды совасть тувотнес. Стадась сеске сэрей чирестэнтъ кирнявтсь эрькес ды ваясь эйзэнзэ.

<sup>34</sup>Тень неезь, тувонь ваныцятне чиезь тусть тосто ды ёвтнизь неезентъ ошканть ды маласо велетнева.

<sup>35</sup>Ломантне лиссть ваномо сень, мезе теевсь. Ды зярдэ сынь мольсть Иисусонь ваксс, неизь ломанентъ, конань потсто лиссть идемевстне. Сон озадоль Иисусонь пильге песэнзэ, оршазь ды паро превсэ. Ломантне пек тандадсть.

<sup>36</sup>Неицятне ёвтнизь сыненст, кода пичкась идемевсьсэ колазесь.

<sup>37</sup>Сестэ весе Гадарань эрицятне виев тандадомадонть кармасть энялдомо Иисусонь икеле, туевель Сон неть таркатнестэ. Иисус озась венчентень ды сыргиксэль тов, косто сась.

<sup>38</sup>Се ломанесь, конань потсто лиссть идемевстне, энялдсь модемс Иисусонь марто. Иисус кучизе сонзэ истямо валсо:

<sup>39</sup>«Велявт эсеть кудов ды весенень ёвтнек, кодамо ине тев тейсь тонь туртов Пазось». Те ломанесь тусь ды весе ошонтень ёвтнесь, мезе тейсь сонзэ туртов Иисус.

**Яирэнь тейтерень вельмевтемась ды сэредиця авань шумбралгавтомась**

<sup>40</sup>Ломантне умок учость Иисусонь, ды зярдо Иисус велявтсь мекев эрькенть омбоце пелев, весе вастызь Сонзэ кенярдозь.

<sup>41</sup>Вана Иисуснэнь сась синагогань прявтось, лемезэ Яир. Сон прась Иисусонь пильгс ды энялдсь: «Инеськеть, сак монь кудос!

<sup>42</sup>Монь вейкине эйкакшом, кемгавтовошка иесэ тейтернем, кулома лангсо!» Иисус сыргась мартонзо. Тов модемстэ ломантне пек эцесть Иисусонь малас.

<sup>43</sup>Ломантнень ютксо ульнесь ава, кона кемгавтово иеть сэредиль верень чудемасо. Авась весе ули-паронзо ютавтыве ормаменстицятнень лангс. Ялатеке сон киненьгак эзь шумбралгавтово.

<sup>44</sup>Авась сась Иисус удалов ды токизе Сонзэ ланга оршамонзо цёконтъ. Сеске лоткась эйстэнзэ верень чудемась.

<sup>45</sup>Иисус кевкстсь: «Кие Монь токимим?» Кияк эзь ёвта пря, Петра ды Иисус мартогне мерсть: «Тонавтыця, Тонь перька ламо ломанть ды весе эцить Эйзэть эрьва ёндо. Тон жо кевкстнят: “Кие Монь токимим?”»

<sup>46</sup>Иисус ялатеке мерсь: «Кие-бути Монь токимим. Мон мария, кода Эйстэнь лиссь вием».



<sup>47</sup>Тень марязь, авась чарькодсь: сон эзь кекшеве Иисусто. Секскак сорнозь сон лиссь Иисусонь икелев, прась кумажа лангс ды весе ломантнень икеле ёвтась Сонензэ, кодамо тувталонь коряс токизе Иисусонь ды кода сеске пичкась.

<sup>48</sup>Иисус мерсь тензэ: «Сазором, иля пеле! Кемемат шумбралгавтынзеть тонь. Азё седейоймамо марто».

<sup>49</sup>Зярдэ Иисус кортась аванть марто, сась синагогань прявтонть кудосто ёвтыця ды мерсь: «Тейтернеть кулось, иляк уш сыргавтне Тонавтыцянтъ».

<sup>50</sup>Ёвтазенть марязь, Иисус мерсь Яирнэнь: «Иля пеле, ансяк кемть, ды тейтернесь вельми».

<sup>51</sup>Зярдэ сынь пачкодсть прявтонть кудос, Иисус Петрадо, Иоанндо, Яковдо ды тейтернеть тетядонзо-авадонзо башка киненьгак эзь мере мартонзо совамс.

<sup>52</sup>Кудосонть весе ломантне авардсть ды лайшесть тейтернеть кисэ. «Илядо аварде», – мерсь Иисус, – «сон эзь куло, сон улы».

<sup>53</sup>Тейтернесь кулось, сынь теде содасть, секскак кармасть пейдеме Иисусонь лангсо.

<sup>54</sup>Иисус кудостонть весень панинзе, саизе тейтернеть кедте ды серьгедсь: «Тейтерне, стяк!»

<sup>55</sup>Тейтернентень велявтсь оймесь, ды сон нейке стясь. Иисус кармавтсь сонзэ андомс.

<sup>56</sup>Тейтернеть тетятне-аватне пек талакадсть. Иисус кармавтсь сыненст киненьгак а ёвтнемс теде, мезе лиссь.

## Луки 9

### Иисус кучи тонавтомо кемгавтово апостолт

<sup>1</sup>Иисус тердинзе Эстензэ кемгавтово тонавтницянзо, макссь тенст вий ды азорксчи ломаньстэ идемевсень пансеме ды эрва кодамо ормань менстямо.

<sup>2</sup>Сон кучинзе сынст ёвтнеме Пазонь Инязорксчиденть ды сэредицятнень шумбралгавтомо

<sup>3</sup>ды мерсь тенст: «Илядо сае ки лангов мезеяк: кедьнежеяк, кансткак, кшияк, ярмакткак, оршамонь полавксткак.

<sup>4</sup>Кодамо кудос соватадо, тосо эрядо се шкас, зярс а тутадо те ошстонть.

<sup>5</sup>Косо тынк парсте а васттадызь, те ошстонть лиседе ды чукадинк пильгестэнк мик пулентькак. Кадык те ули сынст чумост невтемакс».

<sup>6</sup>Ды тонавтницятне тусть яксеме велестэ велес, эрва кува Кенярксов кулянть ёвтнезь ды сэредицянть шумбралгавтнезь.

<sup>7</sup>Весе неть Иисусонь тевтнеде кулятне пачкодсть Иродонь, Галилеянь тетрархонть, пилес. Сон абунгадсь: веенст кортасть, келя, те Иоанн вельмесь кулозьстэ,

<sup>8</sup>омбонст – Илия валгсь менельстэ, колмонст – вельмесь кезэренъ пазмарицятнестэ вейкесь.

<sup>9</sup>Ирод арсесь: «Мон монсь керявтыя Иоаннонь прянзо, кие эно те ломанесь, конадонть монень ёвтнить истят ёвтнемат?» Ды секскак сон пек неиксэлизе Иисусонь.

### Иисус анды вете тёжат ломанть

<sup>10</sup>Апостолтнэ велявтсть Иисуснэнь ды ёвтнестъ Тензэ весемеде, мезе сынъ тейнестъ. Сестэ Иисус саинзе сынст Эсензэ марто ды сынъ тустъ Бетсаида ошонть эйстэ аволь васов, сэтьме таркав.

<sup>11</sup>Ламо ломанть марясть Иисусонь туемадонть ды сыргастъ Сонзэ мельга. Иисус седейшкава вастынзе сынст, кортнесь мартост Пазонь

Инязорксчидентъ ды шумбралгавтынзе сетнень, конат вешсть шумбрачи.

<sup>12</sup>Чись ульнесь валгома лангсо. Кемгавтово тонавтницятне мольсть Иисусонь малас ды мерсть: «Мерть ломантненень, кадык сынъ туить перька велень кудотнева ярсамопелень ды удома таркань вешнеме, эдь минь тесэ чаво таркасо».

<sup>13</sup>Иисус кармавтсь тенст: «Тынь тынсь максодо тенст ярсамопель!» Тонавтницянзо тень каршо мерсть: «Минек ансяк вете кшинек ды кавто калонек. Паряк, миненек модемс ды рамамс весе неть ломантнень туртов ярсамопель?»

<sup>14</sup>Цёра ломантнеде тосо ульнесь ветешка тёжа. Иисус мерсь тонавтницянстэнь: «Ойсевтинк куронь-куронь, ведьгеменень-ведьгеменень».

<sup>15</sup>Тонавтницятне истя тейстькак ды весень ойсевтизь.

<sup>16</sup>Сестэ Иисус саинзе вете кшитнень ды кавто калтнэнь, варштась менельс, ёвтась сукпря Пазонтень, синтринзе ды макснинзе тонавтницянстэнь явшемс ломантнень ланга.

<sup>17</sup>Весе ярсасть ды пешкедсть. Кадовозь сускомотнеде тонавтницянзо пурнасть кемгавтово куйметь.

**Петра яволявты Иисусонь Пазонь кучовт Идицякс ды Иисус икелев ёвты  
Эсензэ пиштематнеде ды куломадо**

<sup>18</sup>Весть, зярдо Иисус ознось сэтьме таркасо ды мартонзо ульнесь ансяк тонавтницянзо, Сон кевкстинзе сынст: «Киекс ловить Монь эйсэ ломантне?»

<sup>19</sup>Сынъ мерсть каршонзо: «Веенст ловить Тонь Нававтыця Иоаннокс, омбонст – Илиякс, лият кортыть – вельмесь кезэрень пазмарицятнестэ вейкесь».

<sup>20</sup>Иисус одов кевкстинзе сынст: «Вана тынь киекс Монь ловсамизь?»  
Петра мерсь каршонзо: «Тон Христосат, Пазонь кучовт Идицят».

<sup>21</sup>Сестэ Иисус пек кармавтсь тенст киненьгак теде а ёвтнемс.

<sup>22</sup>Ды поладсь: «Ломантнень Цёрантень ламо сави пиштемс. Прявтнэ, попонь покштнэ, Койс тонавтыцятне велявтыть Эйстэнзэ. Сон карми улеме маштозь, ансяк мейле колмоце чистэ Сон кулозьстэ вельми».

<sup>23</sup>Мейле Иисус мерсь весенень: «Кинь ули мелезэ модемс Монь мельга, се стувтозо эсь прянзо, саезэ эсь крёстонзо ды молезэ мельган.

<sup>24</sup>Кинь ули мелезэ эсь эрямонзо ванстомс, се ёмавтсы сонзэ. Кие жо ёмавтсы эсь эрямонзо Монь кисэ, се вантсы сонзэ.

<sup>25</sup>Кодамо лезэ ули ломанентень, бути сон сайсы эстензэ весе масторлангонть ды бути теке марто теи эстензэ кулома эли мик оймень ёмамо!

<sup>26</sup>Бути кияк визделгады Монь эйстэ ды Монь валтнэде, сень эйстэ визделгады Ломантнень Цёраськак, зярдэ Сон сы Эсь инексчинь сияждомасо, Эсь Тетянзо ды иневанькс ангелтнэнь иневалдосо.

<sup>27</sup>Видечи ёвтан тенк: конат-конат тесэ аштицятнень эйстэ а кулыть, кода несызь Пазонь Инязорксчинь самонть».

### Иисусонь лиякстомась

<sup>28</sup>Кавксошка чинь ютазь теде мейле, кода Иисус ёвтась теде, Сон саинзе мартонзо Петрань, Иоаннонь ды Яковонь ды кузь мартоост пандо пряс озномо.

<sup>29</sup>Ознома шкастонть Иисусонь чама чачозо лиякстомсь, оршамопелензэ теевсть цивтёрдыця ашокс.

<sup>30-31</sup>Апак учо Сонзэ вакс лиссть кавто ломанть: Моисей ды Илия ды кармасть кортнеме Иисус марто. Сынст перькаяк ульнесь иневалдонь

сияждомась. Сынъ кортнестъ Иисусонъ эрямонъ прядовомадонть, конась топавтови Ерусалимсэ.

<sup>32</sup>Се шкане Петра ды сонзэ ялгатне кеместэ матедевсть. Зярдс сыргозсть, сынъ неизъ Иисусонъ иневалдонъ сияждомасо ды Сонзэ марто аштиця кавто цёратнень.

<sup>33</sup>Зярдс цёратне туиксэльтъ Иисусонъ эйстэ, Петра мерсь: «Тонавтыця, кода паро миненек тесэ улемс. Эрьга, тейтяно колмо кудынетъ: вейкентъ Тонетъ, вейкентъ Моисейнень, вейкентъ Илиянень». Те шкастонть Петра сонськак эзь сода, мезде кортась.

<sup>34</sup>Петрань эзь прядово кортамозо, кода сась пель ды вельтинзе сынст. Тонавтницятне пек тандадсть, зярдс кекшевсть пелентъ эйсэ.

<sup>35</sup>Пелентъ потсто каятотсь вайгель: «Те Монь вечкевикс Цёрам. Кунсолодо Сонзэ!»

<sup>36</sup>Зярдс вайгелесь чатьмонеzewсь, тонавтницятне неизъ Иисусонъ таго ськамонзо. Сень, мезе несть тонавтницятне, сынъ се шкастонть киненьгак эзизь ёвтне ды кирдсть эсест потсо.

### **Апаро оймеялтсо колавт цёрынень шумбралгавтомась**

<sup>37</sup>Омбоце чистэнтъ, зярдс сынъ валгсть пандо прясто, Иисусонъ вастызь ламо ломанть.

<sup>38</sup>Апак учо кие-бути ломантнень ютксто серьгедсь: «Тонавтыця, знялдан икелеть: лездак монь цёрынем туртов! Сон монь вейкине эйдем!

<sup>39</sup>Сонзэ лангс сеедьстэ кайсеви апаро оймеялтось: цёрынесь апак учо пижакали. Оймеялтось рестей эйсэнзэ мода лангс, эйдесь пани човт, ды оймеялтось сонзэ кадсы ансяк сестэ, зярдс овсе машты эйдентъ виезэ.

<sup>40</sup>Мон энялдынъ Тонъ тонавтницят икеле панемс те оймеялтонть, сыненст жо сон эзь паневе».

<sup>41</sup>Иисус мерсь каршонзо: «Вай, неень пингень акемиця ды колазь ломанть! Зярс Монень эряви улемс тынк марто ды кирдемс коронк?! Ветик тей цёрынькат».

<sup>42</sup>Мик зярдю молиль цёрынесь Иисусонь малас, идемевсесь рестедизе сонзэ: цёрынесь прась мода лангс ды пуворявозь кеверезевсь. Иисус кардызе аванькс оймеялтонть, шумбралгавтызе цёрыньканть ды максызе мекев тетянстэнь.

<sup>43</sup>Весе ломантне абунгадозельть Пазонь истямо вийденть ды инексчиденть.

### **Иисус таго корты Эсензэ куломадо**

**Зярдю** весе ломантне дивсестъ Иисусонь тевтненень, Сон мерсь Эсензэ тонавтницянзо туртов:

<sup>44</sup>«Кунсолодо Монь ды мельсэнк кирдинк сень, мезе Мон тенк ёвтан: Ломантнень Цёрась ули максозь-миезь ломантнень кедь алов».

<sup>45</sup>Ансяк сынъ эзизь чарькоде Иисусонь валтнэнь смустест: сон кекшезель эйтэст, ды секскак сынъ Сонзэ кортамонзо эзизь чарькоде, ды кевкстемс Сонзэ сынъ пельсть.

### **Кие весемеде покш?**

<sup>46</sup>Тонавтницятнень ютксо лиссь пелькстамо: кие сынст ютксо весемеде покшось.

<sup>47</sup>Сынст седей мельтнень чарькодезь, Иисус сайсь эйкакш, аравтызе сонзэ Эсензэ ваксс

<sup>48</sup>ды кортась тенст: «Кие сайсы эстензэ Монь лемем кисэ те эйкакшонтъ, се Монь сайсамам. Кие Монь сайсамам, се Кучицямгак сайсы. Кие весемеде вишкине тынк ютксо, – се алкуксокс весемеде покш».

#### **Кие аволь тынк каршо, се тынк кисэ**

<sup>49</sup>Сестэ Иоанн мерсь Иисуснэнь: «Тонавтыця! Минь неинек ломань, кона Тонь лемсэ идемевсть панси. Минь кардынек сонзэ, мекс сон минек марто а яки».

<sup>50</sup>Иисус мерсь каршонзо: «Илинк карда сонзэ: кие аволь тынк каршо, се тынк кисэ».

#### **Самариянь веле**

<sup>51</sup>Зярдэ малавгадсь Иисусонь менель лангов кепедевема шкась, Сон апак кавтолдо сайсь мель модемс Ерусалимев.

<sup>52</sup>Эсензэ эйстэ седе икеле Иисус кучсь ёвтыцят, конат мольсть Самариянь вейке велес анокстамо весементъ, мезе эрявсь Сонзэ самонтъ туртов.

<sup>53</sup>Ансяк велень эрицятне Иисусонь эзизь совавто тозо секс, мекс мольсь Сон Ерусалимев.

<sup>54</sup>Тень неезь, Сонзэ тонавтницятне, Яков ды Иоанн, кевктсть: «Азоро, бути ули мелеть, минь мертяно: валгозо менельстэ толось ды кадык весень маштсынзе кода тейсь Илия?»

<sup>55</sup>Иисус велявтсь сынст ёнов, лоткавтынзе ды мерсь: «Тынь а содатадо, кодамо оймеялтонь тынь.

<sup>56</sup>Эдь Ломантнень Цёрась сась ломантнень оймest идеме, аволь ёмавтомо». Ды сестэ сынъ тустъ лия велев.

### Иисусонь мельга

<sup>57</sup>Модемстэ сынъ вастсть ломань, кона мерсь Иисуснэнь: «Азоро, мон туян Тонь мельга, ков Тон илязат моле».

<sup>58</sup>Иисус каршонзо мерсь: «Ривезтнень ды менель нармунтнень улить пизэст, Ломантнень Цёранть жо арась тарказо, козонь чиремтевлize прянзо».

<sup>59</sup>Лия ломанентень Иисус мерсь: «Мольть Монь марто». Тонась мерсь: «Азоро, нолдамак монь васняк кудов тетянь калмамо».

<sup>60</sup>Иисус каршонзо мерсь: «Кадык кулозтне эсь кулозест сынсь калмасызь. Тон жо мольть ды ёвтнек Кенярксов кулянтъ Пазонь Инязорксчиденть».

<sup>61</sup>Таго вейке ломань мерсь Иисуснэнь: «Мон молян Тонь марто, Азоро! Ансяк мерть монень васняк модемс кудов ды ёвтамс туемань вал малавиксэнъ туртов».

<sup>62</sup>Иисус мерсь каршонзо: «Кона путызе кедензэ сока лангс ды ялатеке ванкшны удалов, се а маштови Пазонь Инязорксчинть туртов».

## Луки 10

### Иисус кучи сизьгемень тонавтницят

<sup>1</sup>Тёде мейле Азорось кочкась сизьгемень лия тонавтницят ды кучинзе сынст кавтонь-кавтонь Эсензэ эйстэ седе икеле эрва кодамо ошка ды велева, ков Сонсь пурнась молеме.

<sup>2</sup>Сон мерсь сыненст: «Сюорось чачсь ламо, ансяк нуицятнеде аламо. Секскак энялдодо нуемань Азоронтъ икеле, кучозо Эсензэ паксяв седе ламо важодицят.

<sup>3</sup>Азёдо! Ванодо: Мон кучан эйсэнк, кода вирезтнэнь верьгиз юткс.

<sup>4</sup>Илядо сае ки лангов мезеяк: ярмакткак, кансткак, омбонст карсемапельтькак, ды киява модемстэ илядо лотксе ки мартояк шумбракстнеме.



<sup>5</sup>Зярдэ соватадо киньгак кудос, васняк шумбракстнемстэ арседе эрицятненень сэтьмелув.

<sup>6</sup>Бути те кудосонтэ эри ломань, кона анок эрямс сэтьмелувсо, сестэ тынк сэтьмелувось кадови сонзэ марто. Бути эри тосо аволь истямо ломань, сестэ тынк сэтьмелувось велявты мекев эстенк.

<sup>7</sup>Эрядо те кудосонтэ, ярасадо ды симеде весемеде, мезде тынк тосо иляст каваня. Эдь важодицянтень пандыть важомеданзо кисэ. Кудосто кудос илядо яксе.

<sup>8</sup>Зярдэ тынь соватадо ошс ды тынк тосо вастгадызь, ярасадо теде, мезде эйсэнк каванить.

<sup>9</sup>Шумбралгавтодо сэредицятненень, конат тосо улить, ды ёвтнеде весенень: “Пазонь Инязорксчись сась тынк малав”.

<sup>10</sup>Бути соватадо кодамояк ошов ды тынк тосо а вастгадызь, лиседе сонзэ кужотнес ды ютамсто кортадо:

<sup>11</sup>“Минь сорновтсынек пильгестэнек тынк ошонь пулентькак, кадовозо сон эсенк марто! Ялатеке содадо: Пазонь Инязорксчись сась тынк малав”.

<sup>12</sup>Мерян тенк: Пазонь судонь чистэнтэ натой Содомонь эрицятненень ули седе шождыне се ошонь эрицятненень коряс».

### **Зыян а янсиця Галилеянь оштнэнень**

<sup>13</sup>«Зыян тетэ, Хоразин ош! Зыян тетэ, Бетсаида ош! Бути тамашатненень, конатне тыненк невтезельть, неевлизь Тир ды Сидон оштнэненень эрицятне, сынэ пежеттест янксемань невтемакс умок оршавольть ризнэмань оршамот ды аштевельть озадо кулов лангсо.

<sup>14</sup>Секскак тынденк шождыне карми улеме судямонь чистэнтэ Тирэнь ды Сидонь эрицятненень.

<sup>15</sup>Ды тонгак, Капернаум ош, менель видьс кепедевезь, тоначинь потмакстома отьмас ёртозь улят!

<sup>16</sup>Се, кие кунсолы тынк, кунсолы Моньгак ды кие тынк каршо моли, се моли Монь каршояк. Содадо! Кие Монь каршо моли, се моли Монь Кучицянтъ каршояк».

### **Сизьгемень тонавтницятнень мекев самось**

<sup>17</sup>Сизьгемень тонавтницятне мекев састь Иисуснэнь, кенярдозь кортасть: «Азоро! Мик идемевстнеяк теить минек мереманть коряс, зярдю минь кармавтано сынст Тонь лементь кундазь».

<sup>18</sup>Иисус каршост кортась: «Мон неия, кода Сатанась ёндолкс прась менель лангсто.

<sup>19</sup>Истя, Мон максынь тыненк вий пильгесэ тапамс гуйтнень, скорпионтнэнь ды максынь азорксчи Душманонь весе виенть лангсо. Секскак кодамояк зыян тыненк а ули тень кисэ.

<sup>20</sup>Ансяк аволь сенень кенярдодо, мекс аванькс оймеялтнэ тынк кунсолыть. Кенярдодо вана тенень: тынк леменк сёрмадозь менель лангсо!»

### **Иисусонь кенярксозо**

<sup>21</sup>Те шкастонть Иисус кенярдозевсь оймеялтсо ды мерсь: «Ёвтан Теть сюкпря, Тетяй, менелень ды масторонь Азоро! Сюкпря Теть сень кисэ, мекс Тон сёпить нень превейтнеде ды ёроковтнеде ды панжить сетненень, конат прок вишка эйкакшт. Алкукс, Тетяй, истямо ульнесь Тонь паро мелесь!»

<sup>22</sup>Иисус велявтсь тонавтницянзо ёнов ды ёвтась: «Тетям максызе весементь Монь кедь алов, ды ансяк Сон ськамонзо алкукс содасы Эсь Цёранзо. Тетянтъкак содасы ансяк Цёрась ды сеть, конатненень Цёранть мелезэ панжомс Сонзэ».

<sup>23</sup>Мейле Иисус велятсь Эсензэ тонавтницятнень ёнов ды пшкадсь ансяк сыненст: «Уцяскавт сельметне, конат неить сень, мезе нетядо тынь!»

<sup>24</sup>Эдь кортан тыненк: ламо пазмарицянь ды инязоронь ульнесь мелест неемс сень, мезе тынь нетядо, ансяк эзизь нее ды марямс сень, мезе тынь марятадо, ансяк эзизь маря».

### Самариянь чевте седей ломанде валвелявкс

<sup>25</sup>Вейкесь Койс тонавтыцятнестэ лиссь икелев, снартневтиксэлизе-варчавтниксэлизе Иисусонь ды секскак кевкстизе: «Тонавтыця, мезе монень теемс пингеде пингень эрямос совамга?»

<sup>26</sup>Иисус каршонзо мерсь: «Койсэнтъ мезе сёрмадозь? Мезе тон тосто ловнат?»

<sup>27</sup>Тонась каршонзо мерсь: «Вечкть Азоронтъ, эсь Пазот, весе седейсэть, весе оймесэть, весе вийсэть, весе превсэть-содавкссот. Вечкть малавиксэть, кода эсь прят».

<sup>28</sup>Иисус мерсь тензэ: «Видестэ тон кортыть. Тейть истя ды соват эрямос».

<sup>29</sup>Ялатеке Койс тонавтыцясь невтиксэлизе эсь прянзо виде оймекс ды кевкстизе Иисусонь: «Кие эно монь малавиксэм?»

<sup>30</sup>Тень каршо Иисус ёвтась тензэ: «Ве ломань ютась Ерусалимстэ Ерихонов. Модемстэ каявсть лангозонзо нельгицят. Сынъ нельгизь сонзэ кедьстэ весементь, мик оршамопелензэяк, тапсизь сонзэ ды пельскулозекс кадызь, сынсь жо тусть.

<sup>31</sup>Лиссь истя, те кияванть савсь ютамс вейке попнэнь. Сон неизе пайстомонть ды кинть омбоце ёнга ютась ваксканзо.

<sup>32</sup>Истя тейсь левинсеськак: те таркантень пачкодезь, сон неизе пайстомонть – ды истя жо кинть омбоце ёнга ютась ваксканзо.

<sup>33</sup>Савсь ютамс те кияванть Самариянь вейке эрицянтьгак. Зярдосон пачкодсь се тарканть ды неизе пиштяканть, нейке ризнэевсь седеезэ.

<sup>34</sup>Сон мольсь ваксозонзо, аржонзо винасо ды ойсэ ваднинзе, тапаринзе. Мейле озавтызе эсензэ осёлонзо лангс, ускIZE инжень кудос ды тосо якась мельганзо.

<sup>35</sup>Омбоце чистэнтъ, туюмстэ, сон таргась кавто динарт, максынзе инжень кудонь азоронтень ды мерсь тензэ: «Якак мельганзо, ды ютавтындерят седе ламо ярмакт, мон мекев самсто макссынть тетъ».

<sup>36</sup>Кие неть колмотнестэ ульнесь, тонь койсэ, алкуксонь малавиксэкс пиштяканть, кона понгонесь нельгицятненень?»

<sup>37</sup>Койс тонавтыцясь мерсь каршонзо: «Се, конась путсь тензэ седеймарямо». Сестэ Иисус мерсь тензэ: «Азё, ды тонгак истя тейнек».

### Марта ды Мария

<sup>38</sup>Седе тов ютамсто Иисус тонавтнициянзо марто пачкодсть вейке велес. Тосо тердизе Сонзэ инжекс эсензэ кудос ава, конань лемезэ Марта.

<sup>39</sup>Сонзэ ульнесь сазорозо, Мария. Мария озась Иисусонь пильге пес ды кунсолось сень, мезде Сон кортась.

<sup>40</sup>Марта капшазь анокстась покш каванямо инжетнень туртов. Сон аламос лоткась Иисусонь вакс ды кевкстизе Сонзэ: «Азоро, натъ, Тонеть ялатеке, мекс монь сазором съкамон кадымим весе тевтнень тееме? Сестэ мерть тензэ, кадык лезды монень».

<sup>41</sup>Иисус мерсь каршонзо: «Марта, Марта! Тон ламодо мелявтат ды майсят.

<sup>42</sup>Эрвиксэсь ансяк вейке. Мария кочкизе эстензэ сех паро таликанть, конась а саеви кедьстэнзэ киненьгак».

## Луки 11

## Озномадо

<sup>1</sup>Весть Иисус ознось ве таркасо. Зярдо Сон прядызе озноманзо, тонавтницятнень эйстэ вейкесь энялдозевсь икелензэ: «Азоро, Тонгак тонавтомизь минек озномо, эдь Иоанн тонавтынзе эсензэ тонавтницянзо».

<sup>2</sup>Иисус мерсь тенст: «Ознодо вана истя: Менелень минек Тетянок, иневаньксэкс улезэ Тонь леметь! Сазо Тонь Инязорксчить, топавтовост Тонь мелеть-арсемат масторлангсоjak, кода менельсэ!

<sup>3</sup>Макст миненек эрва чистэ эрявикс кши-сал.

<sup>4</sup>Нолдыть минек теевть пежетенек, эдь миньгак нолдтнетяно минек икеле чумосотненень. Илямизь нолда снартнемас-варчавтнемас, мекевланк – менсямизь Апародонтъ».

<sup>5-6</sup>Мейле Иисус мерсь сыненст: «Мерьсынек, кинь-бути тынк эйстэ ули ялгазо, ды вана тон сыть сонензэ пелевене ды кортат: “Ялгай, монень апак учо совась вакска ютамсто оям, андомс сонзэ а мезде. Секскак вешан кедьстэть колмо кшить, конатнень мейле пандсынть тетъ”.

<sup>7</sup>Ялгась мери тетъ кудосто: “Илямак талновто. Монь кенкшем пекстазь, ды монськак эйкакшон марто удома таркасан. Секскак а стяван тонеть кшинь максомо”.

<sup>8</sup>Кортан тенк: бути сон натой ялгаксчинь кисэ а сти ды а максы кши, сонензэ ялатеке стяма ды максома тонеть весементь, мезе эряви, бути стардозь, апак пота кармат вешеме.

<sup>9</sup>Секскак Мон кортан тыненк: вешеде ды максозь ули тенк; вешнеде ды мутадо; вачкоеде ды панжить тенк.

<sup>10</sup>Эдь эрва вешицянтень – максови; вешницясь – муи; вачкоицянтень – панжозь ули.

<sup>11</sup>Арази муеви тынк ютксто истямо тетя, конась, зярдо цёразо веши кедьстэнзэ кши – максы сонензэ кев, эли зярдо цёразо веши кал – калонь таркас максы сонензэ гуй?

<sup>12</sup>Эли бути цёразо веши ал – арази тетясь максы сонензэ пуиця шанжав?

<sup>13</sup>Бути натой тыньгак, берянь ломанть, машттадо эсь эйкакшонк туртов вадря казненъ макснеме, нама, менелень Тетянк седеяк максы Иневанъкс Оймеялтонть сетненень, кить вешить кедьстэнзэ».

### **Виесь максозь Иисуснэнь Пазонть пельде**

<sup>14</sup>Весть Иисус пансь ве ломаньстэ идемевсь, кона тейсь те ломаненть акортыцякс. Зярдэ идемевсесь лиссь, а кортыця ломанесь кармась кортамо. Перька аштицятне дивсесть.

<sup>15</sup>Ансяк конат-конат кортнесть: «Иисус Вельзевулонь, идемевстненъ прявтост, вийсэ панси идемевсть».

<sup>16</sup>Лиятненъ ульнесть мелест снартнемс-варчавтнемс Иисусонь, ды секскак вешсть Сонзэ пельде менельстэ тамашань тешкс.

<sup>17</sup>Иисус жо содыль сынст мельдест ды мерсь: «Вана мастороськак а ванстови, бути ушодовить эйсэнзэ тюремат, ды кудоськак калады, бути тосо свал ютыть сёвномат-пелькстамот.

<sup>18</sup>Бути Сатанаськак сти тюреме эсензэ каршо, арази сестэ сонензэ кирдеви инязорксчизэ? Тынь ялатеке кортнетядо: мон, келя, пансян идемевстненъ Вельзевулонь вийсэ.

<sup>19</sup>Бути Мон идемевстненъ пансян Вельзевулонь вийсэ, сестэ тынк сетне кинь вийсэ пансить эйсэст? Сынст тевесткак невтить: тынк чумондоманк а виде.

<sup>20</sup>Мекевланк, бути Мон пансян идемевстненъ Пазонь вийсэ, сестэ Пазонть Инязорксчизэ уш пачкодсь тенк.

<sup>21</sup>Зярдэ виев ломань вадря кедьёнкс марто вансты эсензэ кудонзо, сестэ сонзэ ули-парозо ванстови.

<sup>22</sup>Зярдэ жо кодамояк седе виев каяви сонзэ лангс ды изнясы, сестэ сон нельгсынзе весе кедьёнксонзо, конатнень лангс сон кемсь, сайсы ды явсы ули-паронзо.

<sup>23</sup>Кие аволь Монь кисэ, се Монь каршо, ды кие Монь марто а пурны, се ёртни-ёмавтни».

#### **Аванькс оймеялтонть мекев самозо**

<sup>24</sup>«Зярдэ аванькс оймеялтось лиси ломаньстэнтъ, сон яки ведтеме таркава, ды вешни эстензэ оймамо тарка, ансяк а муи. Сестэ мери: “Велявтан ташто кудозон, косто лисинь”.

<sup>25</sup>Самсто сон мусы сонзэ тенсезь ды пурназь-сэрнязь.

<sup>26</sup>Сестэ сон моли ды саи мартонзо лия сисем оймеялт, эстедензэяк кежейть, весе совить се ломанентъ потс ды кармить эрямо тосо. Ды теде мейле се ломанентъ ёжомарямозо карми улеме седеяк берянь икеленсентъ коряс».

#### **Алкуксонь уцяска**

<sup>27</sup>Зярдэ Иисус теде кортась, ломантнень ютксто вейке ава серьгедсь тензэ: «Уцяскав те авась, конась пекесэнзэ кандтнинзеть ды потесэ андынзеть Тонь!»

<sup>28</sup>Иисус тень каршо мерсь: «Седеяк уцяскавт сеть, конат марить ды топавтыть Пазонь валонтъ!»

#### **Ломантне вешить тешкс**

<sup>29</sup>Ломантнеде кармасть пурнавомо ламодояк ламо, ды Иисус кортась: «Кодат берянтъ неень пингень ломантне! Сынъ вешить тешкс, ансяк Иона пазмарицянтъ тешкстэнтъ башка кодамояк лия тешкс сыненст максозь а ули.

<sup>30</sup>Кода Иона ульнесь тешксэкс Ниневиань эрицятнень туртов, истя Ломантнень Цёраськак карми уleme тешксэкс неень пингень эрицятнень туртов.

<sup>31</sup>Лембе ёнксонь инязоравась сти Пазонь судс неень пингень ломантнень марто ды чумондсынзе сынст. Эдь сон масторонь пестэ сакшнось Соломононь превейчинзэ кунсолосо. Ды вана ней тынк икеле Се, кона Соломондоак ине!

<sup>32</sup>Ниневия ошонь ломантне стить Пазонь судс неень пингень ломантнень марто ды чумондсынзе сынст. Эдь Ниневиань эрицятне Ионань кулянть марямодо мейле велявтсть Пазонтень, ды вана ней тынк икеле Се, кона Ионадоак ине».

#### **Сельмесь – ломаненть туртов валдонь максыця**

<sup>33</sup>«Кияк кирвазтезь лампанть а кекшсы каськас эли кедьге алов. Мекевланк, путсы лампань кирдема таркас, кадык весе совицятне неить валдонть.

<sup>34</sup>Тонь сельмесь – рунгот туртов валдонь максыця. Секскак улиндеряй тонь сельмесь шумбра, сестэ весе рунготкак ули пештязь валдосо. Улиндеряйт сельметне сэредицят, сестэ рунготкак ули пештязь чоподасо.

<sup>35</sup>Секскак вант: валдось, конась тонь эйсэ, илязо уле чоподакс!

<sup>36</sup>Улиндеряй тонь рунгось пештязь валдосо ды а улиндеряй тоньсэть кодамояк чоподачи, сестэ тонь рунгось прясто пильгес валдомгады, кода лампась эсензэ валдосо валдомтовлинзеть тонь».

#### **Иисус тарги лангс фарисейтнень ды Койс тонавтыцятнень**

<sup>37</sup>Зярдо Иисус прядызе кортамонзо, вейке фарисей тердизе Сонзэ эстензэ ярсамо. Иисус сась ды озась столь экшс.



<sup>38</sup>Фарисеесь дивазевсь, зярдо неIZE, мекс Сон ярсамодо икеле эзинзе шля кедензэ.

<sup>39</sup>Ансяк Азорось мерсь сонензэ: «Вана тынь, фарисейтне, ванськавтнетядо кечень ды ваканонь ушо ёнкстнэнь, тынсенк потмонк эцезь апештевемадо ды зьяндо.

<sup>40</sup>Превтеметь! Арази аволь Се, кона теIZE ушо ёнксонть, Се теIZE потмо ёнксонтькак?

<sup>41</sup>Явшеде кажовтненень сень, мезенк ули вакантнэсэ, сестэ весемесь карми улеме ванькс тынк туртов.

<sup>42</sup>Зьян тенк, фарисейть! Тынь пандтадо Пазонтень кеменце пелькс натой мята ды копёр тикшестэ ды пирень лия эмежстэяк. Ансяк тынь стувтынк вечкемс Пазонтъ ды эрямс видечисэ! Нама, эряви теемс теньгак ды а стувтомс тонаньгак.

<sup>43</sup>Зьян тенк, фарисейть! Тынь вечктядо синагогасо икельце таркатнесэ озадо аштеманть, ошкужосо мартонк шумбракстнеманть.

<sup>44</sup>Зьян тенк, Койс тонавтыцяты ды фарисейть, чачонь полавтницят! Тынь прок апак тешкста калмот, конатнень ланга якить ломанть ды а содыть сынст улемадост».

<sup>45</sup>Сестэ Койс тонавтыцятнень эйстэ вейкесь мерсь: «Тонавтыця, те кортамосонть Тон минеккак покордат!»

<sup>46</sup>Иисус каршонзо мерсь: «Тыненккак, Койс тонавтыцяты, зьян! Тынь вачкатадо ломантнень лангс а кандовикс сталмот, тынсь жо сурсояк а лыкаватадо неть сталмотнень кандомост.

<sup>47</sup>Зьян тенк! Тынь стявтнетядо пазмарицятнень калмост ланга кевстэ теезь ледстнема тешкст. Неть пазмарицятнень кить маштнекшнызь? Тынк покштянк!

<sup>48</sup>Теньсэ тынь тынсь невтядо, кода шнатадо эсенк покштятнень тевест: покштятне маштнесь пазмарицятнень, тынь стявтнетядо сынст калмост ланга ледстнема тешкст.

<sup>49</sup>Секскак Пазонь Превейчись корты: “Кучан сынест пазмарицят ды апостолт, ансяк сынст эйстэ веенстнэнь маштнесызь, омбонстнэнь паньсызь”.

<sup>50</sup>Теньстэ лисни: тыненк, неень пингень ломантнень, пандома весе пазмарицятнень верест кисэ, кона валозель менель-масторонь теемастонзо саезь:

<sup>51</sup>Авелень верьстэ саезь Захариянь верьс, кона маштозель Пазонь кудонть ды икелензэ аштиця алтаренть ютксо. Алкуккак, кортан тенк: неень пингень ломантнень кедьстэ пандовтови пазмарицятнень валозь верест.

<sup>52</sup>Зыян тенк, Койс тонавтыцят! Тынь салынк содамочис кенкшень панжоманть. Тынськак тов эзиде сова ды сетненьгак, кить тов совиксэльт, эзинк нолда».

<sup>53</sup>Зярдэ Иисус кортась сынест тень, кежейгадозь фарисейтне ды Койс тонавтыцятне кармасть педсеме Сонензэ ламо кевкстема марто.

<sup>54</sup>Сынь пштистэ кунсолость Иисусонь эрва валонть ды снартнесь кундамс Сонзэ вал лангсо чумондомс Сонзэ.

## Луки 12

### Иисус кармавты а улемс фарисейтнень кондямокс

<sup>1</sup>Те шкане Иисусонь перька пурнавсть ламо тѣжат ломанть. Сынь мик лепштысть вейкест-вейкест. Иисус васняк пшкадсь Эсензэ тонавтницятнень: «Вансто до прянк фарисеень чапавтомадонть, лиякс меремс, чачонь полавтнемадонть .

<sup>2</sup>Весе, мезесь ней кекшезь, лиси лангс, ды весе салавансеськак карми улеме содавиксэкс.

<sup>3</sup>Секскак, весе, мезде тынь кортатадо чоподасо, ули марязь чи валдосо. Ды мезде тошкатадо пилестэ пилес кудо потсо, ули серьгедезь кудо лангсто».

<sup>4</sup>«Кортан тенк, Эсень оятненень: илядо пеле сеть ломантнеде, конат маштсызь тынк рунгонк. Эдь теде мейле тынк туртов а тееви седе покш зыян.

<sup>5</sup>Мон ёвтан тенк, киде пелемс: пеледе Седе, конань ули азорксчизэ рунгонь маштомскак ды тоначинь толс ёртомскак. Кортан тенк, вана киде пеледе.

<sup>6</sup>Арази а кавто трёшникте микшнить вете озязтнэнь? Тень лангс апак вано, Пазось вейкеньгак сынст эйстэ эзизе стувто.

<sup>7</sup>Натой тынк пря черенккак весе ловнозь. Секс илядо пеле. Тынь ялатеке весе озязтнэде седе питнейтядо!»

### **Апак сёпо ёвтнеде Исусто**

<sup>8</sup>«Кортан тенк: эрвась, кие апак сёпо ломантнень икеле лови эсь прянзо Монь ломанекс, сень Монгак, Ломантнень Цёрась, апак сёпо ловса Пазонь ангелтнэнь икеле Эсень ломанекс.

<sup>9</sup>Кие жо ломантнень икеле велявты Монь эйстэ, сень эйстэ Монгак велявтан Пазонь ангелтнэнь икеле.

<sup>10</sup>Эрванть, кие ёвты сядома-покордамо вал Ломантнень Цёранть лангс, чумозо нолдави. А вана кие ёвты сядома-покордамо вал Иневанькс Оймеялтонть лангс, сень чумозо нолдазь а ули.

<sup>11</sup>Ды зярдо ветятадызь тынк синагогас, прявтнэнь ды азортнэнь икелев, илядо мелявто, кода ванстомс эсь прянк эли мезе кортамс.

<sup>12</sup>Эдь Иневанькс Оймеялтось те шкане тонавттадызь, мезе эряви тыненк кортамс».

### Превтеме сюпавдо валвелявкс

<sup>13</sup>Та-кие пурнавозь ломантнень ютксто мерсь Иисуснэнь: «Тонавтыця, мерть монь лелянь туртов, кадык сон явсы юткованок тетянь-авань кадовт ули-паронть».

<sup>14</sup>Иисус ацирьгадозь мерсь каршонзо: «Арази кияк путымим Монь улемс тыненк судиякс эли ули-паронь явицякс?»

<sup>15</sup>Седе тов Сон поладсь весемень туртов: «Ванодо, ванстодо прянк эрьва кодамо апештевемадо. Ломанень эрямость а онкстави ули-паронь сюпавчисэ, зяро сонзэ эйстэ илязо уле».

<sup>16</sup>Ды ёвтнесь Иисус тенст валвелявкс: «Вейке сюпав ломаненть чачсь паксясо ламо сюрозо.

<sup>17</sup>Се ломанесь эсь пачканзо арсесь: “Мезе монень теемс? А козонь монень пурнамс сюронть”.

<sup>18</sup>Ды сестэ сон мерсь эстензэ: “Вана мезе теян: яжасынь утомон, теян седе покшт, пурнаса тозонь весе сюрот ды весе ули-паром.

<sup>19</sup>Сестэ мерян эстенъ: ней тон уцяскават! Эрьва кодамо ули-парот саты ламо иес. Оймсек, ярсак, симть ды кецяк!”

<sup>20</sup>Ансяк Пазось мерсь тензэ: “Превтеме! Те вестэнтъ сайса ойметъ тонъ эйстэ. Кинень сестэ кадови се, мезе тон пурныть?”

<sup>21</sup>Истя эрси эрьванть марто, кие ансяк эстензэ ташты сюпавчить ды конась теке марто Пазонтъ сельме икеле а ули сюпавкс».

### Пазонь Инязорксчинть ловодо веседе инекс

<sup>22</sup>Мейле Иисус мерсь Эсензэ тонавтницятненень: «Секскак кортан тыненк: илядо мелявто эрямонк кисэ, мезде тенк ярсамс, ды рунгонк кисэяк, мезе тенк оршамс.

<sup>23</sup>Эдь эрямость – ярсамопельде питней, ды рунгоськак – оршамопельде питней.

- <sup>24</sup>Варштадо кренчтнень лангс: сынъ а видить, а нуить, арасть сынст утомост, потмарост, ды Пазось ялатеке сынст анды. Ламодо тынь седе питнейть неть нармунтнеде!
- <sup>25</sup>Кинень тынк ютксто, пек мелявтозь, кувалгавтови эсь эрямозо куш ве кенерешкас?
- <sup>26</sup>Секскак, бути тыненк а тееви те аламошкаськак, мезть мелявттадо лиядонть?
- <sup>27</sup>Варштадо паксянь цецятнень лангс, кода сынъ касыть: а штердить, а кодыть. Ялатеке кортан тенк: Соломон инязороськак эсь сюпавчинь сияждомасонзо истя эзь оршне, кода эрьвась сынст эйтэ.
- <sup>28</sup>Бути Пазось истя мазыйстэ оршавты тикше, конась течи касы паксясо, ванды жо ули ёртозь каштомонь толс, арази Сон тынк седеяк парсте а оршатадызь. Вай, кодамо аламо тынк кемеманк!
- <sup>29</sup>Секскак, илядо вешне, илядо мелявто мезде тыненк ярсамс эли мезде симемс.
- <sup>30</sup>Тень эйтэ мелявтыть весе масторлангонь Паздо а содыцятне. Тынк Тетясь жо соды: те весе тыненк эряви.
- <sup>31</sup>Весемеде пек вешнеде Пазонь Инязорксчинть, ды сестэ те весемеськак тыненк максови.
- <sup>32</sup>Ломанень вишкине гуртке, иля пеле! Эдь Тетянк ули паро мелезэ максомс тенк Инязорксчинть.
- <sup>33</sup>Микшнеде эсенк ули-паронк ды макснеде кажовтненень. Анокстадо эстенк эрямо партъ, конат а каладыть. Менельсэ таштадо истямо сюпавчи, кона а прядовкшны. Менельсэ те ули-паронтень салыцяськак а сови, тосо ки сукстнэяк сонзэ а сэвить-а колсить.
- <sup>34</sup>Эдь косо тынк сюпавчинк, тосо карми улеме седеенккак».

### Кудазоронть учиця важо

**35** «Уледе свал анокт важоме: ожанк улест илештязь ды толонк свал палозо.

**36** Уледе, кода важот, конат учить эсест азоронть кудов самонзо урьвакстомань-венчамонь каванямосто: сынъ анокт нейке панжомс азоронтень, зярдс сон сы ды вачкоди кенкшес.

**37** Уцяскавт сеть важотне, конатнень кудонь азорось самстонзо стардсынзе а удыцякс. Видестэ тенк кортан: сестэ азорось сонськак орши эрва чинь оршамопельть, озавтсынзе важотнень столь экшс ды карми сонсь каванямост.

**38** Неть важотненень, паряк, сави учомс пелевес, натой пелеведе мейлес. Сынъ алкуксокс уцяскавт, зярдс сы азорось ды стардсынзе сынст а удыцякс!

**39** Мельсэ кирдеде: содавольгак кудазорось, кона шкане сы салыця, сон аволь удо ды аволизе нолда сонзэ эцеме кудозонзо.

**40** Тыньгак уледе анокт: Ломантнень Цёрась сы се шкастонть, зярдс тынь Сонзэ а учотадоаяк».

**41** Петра кевкстизе Иисусонь: «Азоро, тон ёвтнят те валвелявксонть весемеде эли ансяк минденек?»

**42** Азорось тень каршо мерсь: «Уледе истямокс, кода кемевикс ды превей кудоветиця, конань кудазорось туемстэ путсы покшокс весе важотнень лангсо ды кармавты тензэ эрявикс шкасто явшемс сынест алтазь ярсамопеленть.

**43** Уцяскав ули те важось, конань кудазорось, зярдс сы, несы истя теемстэ.

**44** Видечи ёвтан тенк: сестэ кудазорось путсы сонзэ весе ули-паронзо лангсо покшокс.

<sup>45</sup>Бути жо важось арсезеви: “Монь азором а курок сы”, ды карми чавомо лия важотнень, ярсамо ды иредемас винадо симеме,

<sup>46</sup>Истямо важонь азорось сы се чистэнтъ, конастонть важось а учи, ды се часстонть, конадонтъ а арсияк. Кудазорось сестэ куломс чавсы сонзэ ды ёртсы сонзэ а кемевикстнэнь юткс.

<sup>47</sup>Важось, кона содасы азоронь мелентъ, ансяк а аноксты ды а снартыяк топавтомо те мелентъ, ули пек чавозь.

<sup>48</sup>Бути важось эзь сода азоронь мельдентъ, ды тейсь мезе-бути истямо, мезень кисэ чавомаль, сестэ сон карми улеме чавозь седе аволь пек. Кинень ламо максозь, сень пельде ламо вешитькак, кинь лангс пек кемить, сень пельде седеяк ламо кевкститъкак».

#### **Иисусонь кувалма сёвномат-пелькстамот**

<sup>49</sup>«Мон сынъ мода лангс толонь кирвазтеме, ды Монь пек покш мелем: седе курок кирвазезэ сон!

<sup>50</sup>Монень сави ютамс майсемань сэрей ведентъ трокс. Ды зярс а ютави те пиштемань кись, седеем карми палозь паломо!

<sup>51</sup>Тынь, паряк, арсетядо, Мон сынъ масторлангс ладямонь кандомо? Арась! Аволь ладямонь – явомань!

<sup>52</sup>Те чистэнтъ саезь, бути кудосонтъ вете ломанть, сынъгак явить: колмотне кепедевить кавтотнень каршо, ды кавтотне – колмотнень каршо.

<sup>53</sup>Тетясь кепедеви цёранзо каршо, ды цёраськак – тетянзо каршо; авась кепедеви тейтерензэ каршо, ды тейтереськак – аванзо каршо; ававтось кепедеви урьванзо каршо, ды урьваськак – ававтонзо каршо».

### Шкань тешкст

<sup>54</sup>Седе мейле Иисус мерсь ломантненень: «Зярдо тынь нетядо чивалгомасто кепедевица пель, тынь нейке мертядо: туи пиземе. Ды алкуксккак, пиземесь туи.

<sup>55</sup>Ды зярдо лембе ёнкссто пуви варма, тынь мертядо: карми пси. Истя эрсияк.

<sup>56</sup>Чачонь полавтницят! Модань ды менелень тешкстнэнь кувалт тыненк содави венельксэнь ёжось, мекс эно тынь а содасынк неень шкань тешкстнэнь смустест?

<sup>57</sup>Мекс тынь тынсь а мусынк, мейсэ видечись?

<sup>58</sup>Зярдо кияк чумондтанзат ды карми ветямот судямо кудос, тов молемстэ снартнек прядомс теवंть вейсэнь лувсо. Бути теят лиякс – сон ветятанзат судиянтень, се макстанзат ванстыцянтень ды каятадызь пекстамо кудос.

<sup>59</sup>Кемть Монень: тосто а лисеват се шкас, зярс а пандсак весементь меельце трёшникень пес».

## Луки 13

### Велявтынк эсенк седеенк Пазонтень

<sup>1</sup>Иисусонь кунсолыцянтень ютксо ульнесть ломанть, конат ёвтнизь Сонензэ, кода Пилат Пазонь кудосо маштынзе Галилеянь эрицянтень. Секскак сынст верест човорявь Пазонтень кандозь аноксокс печкезь ракшатнень верест марто.

<sup>2</sup>Иисус тень каршо мерсь: «Тынь, паряк, арсетядо: неть Галилеянь эрицятне ульнесть весе Галилеянь лия эрицятнеде пежетевть, ды секскак истямоль куломаст?

<sup>3</sup>Арась, кортан тенк. Бути тынь Пазонтень а велявттадо, истя жо весе ёматадо.



<sup>4</sup>Паряк, сеть кемгавксово ломантне, конатнень лангс сяворсь Силоам башнясь ды маштынзе сынст, ульнесь пежетевдежк пежетевть Ерусалимень эрицятнень ютксто?

<sup>5</sup>Арась, кортан тенк. Бути тынь Пазонтень а велявттадо, истя жо весе ёматадо».

#### **Валвелявкс лезэнь а кандыця чувтодо**

<sup>6</sup>Сестэ ёвтнесь Иисус истямо валвелявкс: «Вейке ломанень пиресэ озавтозель инжир чувто. Весть азорось мольсь варштамо, улить-арасть лангсонзо инжирт; инжирт арасельть.

<sup>7</sup>Сестэ сон мерсь пиренть мельга якицятень: “Колмоце ие мон сакшнан те чувтонть лангсто инжирэнь варштамо ды те шкас вейкеяк эзинь нее. Керик сонзэ, мейс сонензэ лезэвтеме потямс мода виенть?”

<sup>8</sup>“Азоро”, – мерсь каршонзо пиренть мельга якицясь, – “кадык кадови чувтось таго вейке иес. Мон сонзэ моданзо кавшакавтса ды навозыявтса.

<sup>9</sup>Паряк сы иестэ кармить улеме инжирт, бути а кармить – сестэ керясак”».

#### **Иисус шумбралгавты ава ломань оймсема чистэ**

<sup>10</sup>Весть оймсема чистэ Иисус тонавтсь синагогасо.

<sup>11</sup>Тосо ульнесь ава, конань кемгавксово иеть майсевтсь ормань оймеялтось. Авась ульнесь мендявозь ды овсе эзь витеве.

<sup>12</sup>Кода Иисус сонзэ неизе, тердизе Эсензэ малав ды мерсь тензэ: «Ава ломань! Тон олякстомтозят эсеть ормадот».

<sup>13</sup>Иисус путызе сонзэ лангс кедензэ, ды авась сеске виемсь, кармась Пазонтень шнамо.

<sup>14</sup>Синагогань прявтось кеждясь сень кисэ, мекс Иисус шумбралгавтызе аванть оймсема чистэ ды кармасть кортамо перька аштиця ломантненень: «Важодемась туртов максозь кото чить. Сакшнодо шумбралгалеме неть читнестэ, аволь оймсема чистэ».

<sup>15</sup>Тень каршо Азорось мерсь тензэ: «Чачонь полавтница! Нать эрьвась эйтэнк оймсема чистэяк а нолдтни кардазсто буканзо эли осёлонзо ды а ветни эйсэст симдеме?»

<sup>16</sup>Арази Авраамонь те тейтерентькак, конань Сатанась тертякшнызе кемгавксово иес, а нолдамаль тертьстэнтэ оймсема чистэ?!»

<sup>17</sup>Тень марямодо мейле Иисусонь каршо молицятне весе визделгадсть. Весе лиятне кенярдсть Иисусонь теевть тамашань тевтненень.

#### **Горчица видьмеде ды чапавтомадо валвелявкст**

<sup>18</sup>Сестэ Иисус кевкстсь: «Мезе ёнов моли Пазонь Инязоркчись ды мезе марто Монень вейкетсямс сонзэ?»

<sup>19</sup>Сон моли горчица видьме ёнов, конань ломанесь саице ды видизе эсензэ пирес. Видьмесь кассь ды теевсь сэрей чувтокс, ды менель нармунтне кармасть тейнеме тарадозонзо пизэть».

<sup>20</sup>Иисус таго кевкстсь: «Мезе марто Монень вейкетсямс Пазонь Инязоркчинть?»

<sup>21</sup>Сон кода чапавтома, конань човоризе авась почтонь колмо парь марто ды теде сыргась весе чапаксось».

#### **Теине орта**

<sup>22</sup>Иисус мольсь оштнэнь ды велетнень трокс Ерусалимев. Модемстэ Сон тонавтсь весе ломантненень.

<sup>23</sup>Кие-бути кевкстизе Сонзэ: «Азоро, арази ансяк аламотне улить идезь?» Тень каршо Иисус мерсь:

<sup>24</sup>«Весе виенк путынк теине ортава совамонтень. Кемеде Монень, ламотне кармить снартнеме совамо тов, ансяк а совавить.

<sup>25</sup>Сы шка, зярдо кудазорось сти ды пекстасы кенкшензэ, ды теде мейле тынь ушосто карматадо вачкоеме кенкшезэнзэ ды энялдомо: “Азоро, Азоро, панжт тенек!” Сон каршонк мери: “Мон а содатадызь тынк ды а содан, костонтядо”.

<sup>26</sup>Сестэ карматадо ёвтнеме: “Минь Тонь марто ярснинек ды симнинек. Тон тонавтыть минек ошонь ды велень пуромома таркатнесэ”.

<sup>27</sup>Сон каршонк мери: “Кортан тенк: Мон а содатадызь тынк ды а содан, костонтядо. Оргодеде Монь эйстэ, весе зыянонь тейницят!”

<sup>28</sup>Зярдо тынь несынк Авраамонь, Исаконь, Яковонь ды весе пазмарицятнень Пазонь Инязоркчисэнтъ, сестэ тынь карматадо авардеме ды пейсэнк чикордомо. Эдь тынь ушосотадо, тосто панезтядо.

<sup>29</sup>Чилисема ды чивалгома ёндо, кельме ды лембе ёндо ломантне сыть ды ойсить Пазонь Инязоркчисэнтъ каванямонь столь экшс.

<sup>30</sup>Ды ламотне, конат течи меельцеть, сестэ кармить улеме васенцекс, ды ламотне, конат течи васенцеть, сестэ кармить улеме меельцекс».

### **Иисус аварди Ерусалименть кисэ**

<sup>31</sup>Те чистэнтъ Иисусонь малав састь зяро-бути фарисейть ды мерсть: «Тук неть таркатнестэ: Ирод пурны маштомот».

<sup>32</sup>Иисус каршост мерсь: «Азёдо ды ёвтадо те ривезентень: “Мон карман идемевстнень пансеме ды ломантнень шумбралгавтомо течи, ванды, ды ансяк колмоце чистэ Мон прядса эсь тевем”.

<sup>33</sup>Ансяк течияк, вандыак ды меельце чистэнтъкак Монень сави поладомс Эсень кинть, эдь арась истямо пазмариця, конась куловоль аволь Ерусалим ошо.

<sup>34</sup>Вай, Ерусалим, Ерусалим, тон маштнят пазмарицятнень ды кевсэ чавнат Пазонь кучовт кулянь кандыцятнень! Зяроксть Мон арсинь пурнамс тонь эйкакшот, кода нарвицькась пурны эсь сёлмонзо алов левксэнзэ, ансяк тонь мелеть арасель!

<sup>35</sup>Ды вана, тынк кудонк кадови чавокс. Кортан тенк: тынь Монь а несамизь семс, зярс а мертядо: “Улезэ чанствязь-баславазь Азоронть лемсэ Сыцясь!”»

## Луки 14

### Фарисеень кудосо

<sup>1</sup>Весть оймсема чистэ Иисус тердезель ярсамо вейке прявтокс аштиця фарисеень кудос. Весе, кить тосо ульнесь, пштицэ вансть Иисусонь прянь ветямонтъ мельга.

<sup>2</sup>Иисусонь каршо озадоль сэредиця ломань, конань весе рунгозо ульнесь таргозезь.

<sup>3</sup>Иисус кевкстинзе фарисейтнень ды Койс тонавтыцятнень: «Мери а мери Коесь шумбралгавтомс оймсема чистэ?»

<sup>4</sup>Сынь каштмольсть. Сестэ Иисус токизе сэредицянтъ, шумбралгавтызе сонзэ ды нолдызе.

<sup>5</sup>Мейле Иисус кевкстсь: «Бути тынк осёлонк эли, паряк, тынк буканк пры лисьмас, натъ тынь нейке жо а таргасынк сонзэ тосто, бути те тевесь лиссь натой оймсема чистэак?»

<sup>6</sup>Тень каршо сыненст ёвтамс ульнесь а мезе.

### Иля лово эсь прят ломанде сэрейкс

<sup>7</sup>Иисус неIZE, кода инжетне снартнесь озамс столь экшс паро таркатнева. Сестэ Сон ёвтнесь сыненст истямо валвелявкс:

<sup>8</sup>«Зярдэ тонь тердядызь урвакстомань каванямос, иля снартне озамо икельце таркатнес. Сындеряй тондетъ содавикс инже,

<sup>9</sup>сестэ азорось, кона тердинзеть тоньгак ды тердизе мельгат сыцянтъкак, сы малазот ды мери: “Озавтык тарказот те ломаненть”. Ды сестэ тонеть сави стямс ды визьксчамасо озамс весемеде берянь таркантень.

<sup>10</sup>Зярдэ жо тон тердезят инжекс, сак тов ды озак весемеде берянь таркас. Сестэ азорось сы малазот ды мери: “Оям, озак седе паро таркас”. Сестэ тон касат весе инжетнень сельме икеле.

<sup>11</sup>Эрвась, кона сонсь эсь прянзо кепеди, ули алкинъгавтозь; кона эсь прянзо алкинъгавты, ули кепедезь».

<sup>12</sup>Теде мейле Иисус мерсь кудазоронтень: «Зярдэ тят чинь эли чокшнень ярсамо, иля терде эсеть ялгат, лелят-ялаксот, роднят-раськеть ды сюпав шабрат, сень лангс кемезь: сынъгак мейле тердевлидизь тонь ды пандовлизь тонеть каванямонтъ.

<sup>13</sup>Арась, тон тердть каванямос арасьчисэ эрицят, кедтеметь-пильгевтеметь, ёколдыцят ды сокорт.

<sup>14</sup>Сыненст а мейсэ пандомс тонь паронтъ. Секскак улят уцяскав. Эдь тонеть мекев пандови парось се чистэнтъ, зярдэ вельмевтевить Пазонь виде коень ломантне».

#### **Ине каванямодо валвелявкс**

<sup>15</sup>Тень марязь, кие-бути инжетнеде мерсь Иисуснэнь: «Уцяскав се, кона ули каванязь Пазонь Инязорксчисэнтъ».

<sup>16</sup>Иисус тень каршо мерсь сонензэ: «Вейке ломань анокстась покш каванямо ды тердсь ламо инжетъ.

<sup>17</sup>Зярдэ сась столь экшс озамонь шкась, сон кучизе важонзо тердезтненень ёвтамо: “Садо, эдь весе анок”.

<sup>18</sup>Ансяк весе тердестне ве мельсэ кармасть вешнеме тувтал а молемантень. Васенцесь мерсь: “Мон раминь мода, монень эряви модемс варштамонзо, энялдан икелеть, нолдык чумом”.

<sup>19</sup>Омбоцесь мерсь: “Мон раминь кемень букат ды молян варштасынь тевсэ. Энялдан икелеть, нолдык чумом”.

<sup>20</sup>Колмоцесь мерсь: “Мон ансяк урвакстынь ды секскак а молеван”.

<sup>21</sup>Важось мекев сась, весе нень ёвтнинзе азоронтень. Сестэ кудазорось кежень пачк мерсь важонтень: “Азё седе куруксто, ютак ошонь весе пуромома таркатнева ды куротнева-юткакштнева ды ветить тей арасьчисэ эрицятнень, кедтеметнень-пильгевтеметнень, сокортнэнь ды ёколдыцятнень”.

<sup>22</sup>Важось сась ды мерсь: “Азоро, теинь истя, кода мерить. Ялатеке столенть экшсэ кадовсть таркат”.

<sup>23</sup>Азорось таго кармавтсь важонтень: “Азё велень китнева ды пирявкстнэнь кувалт, кармавтыть весемень само ды кадык пешкеди кудом ломанде.

<sup>24</sup>Ёвтан тенк: икелев тердестнеде кияк а озы монь столь экшс! Эдь ламо тердестнеде, ансяк аламо кочказтнеде”».

### **Кодамокс улезэ Иисусонь тонавтницясь**

<sup>25</sup>Иисус таго тусь эсь кияванзо, Сонзэ мельга мольсть ламо ломанть, ды Сон кортась тенст:

<sup>26</sup>«Бути сы Монень та-кие, кона Мондень пек вечксынзе эсь тетянзо, аванзо, нинзэ, эйкакшонзо, лелянзо-ялаксонзо, патянзо-сазоронзо ды мик эсензэ эрямонзо, се а маштови Монь тонавтницякс.

<sup>27</sup>Кие а канды эсь крёстонзо ды а моли Монь мельга, се а маштови Монь тонавтницякс.

<sup>28</sup>Мерьсынек, та-кие тынк эйстэ арси путомс сэрей кудо. Мезе тынь тейтядо васенцекс? Паряк, озатадо ды ловносынк, сатыть а сатыть ярмаконк кудонь прядоманть туртов?

<sup>29</sup>Лиякс, зярдю путсы сон кудюоронть ды а прядсы кудонь путоманть, сестэ весе ломантне кармить лангсонзо пеедькшнеме

<sup>30</sup>ды кортнеме: “Вана уставась кудонь путомо, кудонь прядомась жо а неяви”.

<sup>31</sup>Инязороськак, зярдю сырги тюреме лия инязоронь каршо, нать васняк а озы ды а арсесы эсь пачканзо: саты а саты виезэ эсензэ кемень тѣжат ушмантнэнь марто изнямс лия инязоронь комсь тѣжат ушмантнэнь?

<sup>32</sup>Виесь а сатындеряй, сестэ инязорось кучи ёвтыцят сыненст ды веши сэтьмелув, зярс душмантнэ васолот.

<sup>33</sup>Истя тыньгак: бути а кадсынк весементь, мезенк ули, сестэ кияк тынк эйстэ Монень тонавтницякс а маштови.

<sup>34</sup>Салось – лезэв; бути ёмавтсы сон танстензэ, сестэ кода тейсак сонзэ одов саловокс?

<sup>35</sup>Модань паролгавтомскак сон а маштови, шукшпряскак а туи, ды кадови ансяк ёртомс сонзэ. Кинь улить мариця пилензэ – кунсолосо!»

## Луки 15

### Ёмазь реведе ды ёмавтозь ярмакто валвелявкст

<sup>1</sup>Иисусонь перька пуромкшность кунсоломонзо налогонь-каявксонь пурныцятне ды лия пежетев ломантне.

<sup>2</sup>Фарисейтне ды Койс тонавтыцятне музгордсть: «Те ломанесь тейневи ялгакс ды ярсняк пежетевтнень марто».

<sup>3</sup>Сестэ Иисус ёвтнесь тенст истямо валвелявкс:

<sup>4</sup>«Мерьсынек, тынк эйстэ кинь-бути улить сядо ревензэ, ды вейкесь эйстэст ёмась. Мезе карми тееме азорось? Сон кадсынзе

вейксэньгемень вейксэтнень ванорма таркас ды карми ёмазенть вешнеме се шкас, зярс сонзэ а мусы.

<sup>5</sup>Зярдэ мусы, сайсы покш кеняркс марто эсензэ лавтовонзо лангс

<sup>6</sup>ды кудов самодо мейле тердъсынзе весе ялганзо, шабранзо ды мери тенст: “Кенярдодо мартон, мон муия ёмазь ревом!”

<sup>7</sup>Ёвтан тенк: менель лангсоjak истя эрси. Тосо, нама, кецить вейксэньгемень вейксэ видекойсэ эрицятненень, конатненень, келя, а эряви эрямонтъ полавтома. Ансяк седеяк покш кеняркс ули сестэ, зярдэ вейке пежетев ломань велявтови Пазонтъ пелев.

<sup>8</sup>Мерьсынек, кодамо-бути авань ульнестъ кемень сиянь ярмаконзо, ды вейкентъ эйстэст ёмавтызе. Натъ сон а кирвазти тол, а карми кудонь тенсеме ды вадрясто вешнеме, зярс а мусы?

<sup>9</sup>Ды зярдэ сон мусы, тердъсынзе ава ялганзо, шабра аватнень ды мери тенст: “Кенярдодо монь марто: мон муия ёмазь ярмаком”.

<sup>10</sup>Мерян тыненк: Пазонь ангелтнэjak истя жо кецить, зярдэ велявты Пазонтъ пелев вейке пежетев ломань!»

### **Валвелявкс тетядо ды ёмазь цёрадо**

<sup>11</sup>Иисус поладсь: «Вейке ломанентъ ульнестъ кавто цёранзо.

<sup>12</sup>Веженсесь мерсь тетянстэнь: “Тетяй, максык монень кудонь-чинь пельксэм”. Тетясь явизе кавтост юткова кудонь-чинь ули-паронтъ.

<sup>13</sup>Зярыя чинь ютазь, веженсь цёрась микшнлизе эсензэ ули-паронь пельксэнтъ, пурнась-сэрнясь ды тусь васоло масторов. Сон ветясь тосо нулгодъкс ломанень эрямо кой, ды секскак ёмавтнизе весе ули-паронзо.

<sup>14</sup>Ды зярдэ сон весе ули-паронтъ нолдызе варма мельга, сась се масторонтень покш вачочи, ды цёраськак кармась пек майсеме-пиштеме.



<sup>15</sup>Цёрась мольсь се масторонь вейке эрицянтень, ды тона сиведизе сонзэ тувонь ваномо эсензэ паксясо.

<sup>16</sup>Сон покш мельспаросо пештявлизе пекензэ тувонь андомс кувтёлдо, ансяк сеньгак тензэ кияк эзь максне.

<sup>17</sup>Сестэ, эсь эрямонь чарькодезь, цёрась арсезевсь: “Зяро сиведезь ломанть тетянь кедьсэ, ды весе сынь ярсыть кшиде пекень пештемазост, мон вана тесэ эль кулан вачодо!

<sup>18</sup>Туян тестэ, молян эсень тетянень ды мерян: Тетяй, мон чуман Менельсэнтъ икеле ды тонь икелеяк.

<sup>19</sup>Ней мон тонь цёракскак ловомс а маштован, саемак куш сиведезь ломанеть юткс”.

<sup>20</sup>Ды сон седе курок тусь эсензэ тетянстэнь. Цёранть васолдо неезь, тетянзо седеесь ризнэзевсь. Тетясь чийсь каршонзо, кутмордызе ды кармась палсемензэ.

<sup>21</sup>Цёрась мерсь: “Тетяй, мон чуман Менельсэнтъ икеле ды тонь икелеяк. Ней мон тонь цёракскак ловомс а маштован”.

<sup>22</sup>Тетясь мерсь эсензэ вожотненень: “Кандодо тей сехте паро оршамопельть ды оршавтынк сонзэ. Тонгодо суркс сурозонзо ды карсемапельть – пильгезэнзэ.

<sup>23</sup>Ветядо парсте андозь ваз, печкинк: карматано ярсамо ды весёлгалеме!

<sup>24</sup>Эдь те монь цёрась кулокшнось – ней вельмесь, ёмакшнось – ды муевсь”. Ды кармасть сынь кецямо ды эрьгелеме.

<sup>25</sup>Покш цёразо те шкане ульнесь паксясо. Зярдонь сон кармась пачкодеме кудов, марясь сядямонь, морамонь ды киштемань вайгельть.

<sup>26</sup>Сон тердсь вейке важо ды кевкстизе сонзэ: “Те тосо мезе?”

<sup>27</sup>Тона ёвтась: “Тонь ялаксот сась, тетят печкевтсь парсте андозь ваз, эдь цёрась велявтсь тетянстэнь шумбракс”.

<sup>28</sup>Покш цёрась кежиявтсь ды кудовгак а совиксэль. Сестэ тетязо лиссь ды кармась икелензэ энялдомо.

<sup>29</sup>Цёрась мерсь тетянстэнь: “Мон зяро иеть важдян тонеть теке уре, ды зярдояк вейкеяк меремат трокс эзинь аракшно. Ялатеке монь туртов тон эзить мере печкемс сея левкскеяк ялгань марто весёлгалеманть туртов!

<sup>30</sup>Зярдю вана сась те тонь цёрась, кона ули-паронзо ёмавтызе-юводизе усксевиця аватнень марто, тон сонензэ печкевтить парсте андозь ваз!”

<sup>31</sup>Сестэ тетязь мерсь: “Цёрам, тон свал монь марто, ды весе, мезем ули, те тонь.

<sup>32</sup>Ней вана миненек эряви кецямс ды эрьгелемс тенень: тонь ялаксот кулокшнось – ней вельмесь, ёмакшнось – ды муевсь!”»

## Луки 16

### Кудонь а виде ветицядо валвелявкс

<sup>1</sup>Иисус ёвтнесь Эсензэ тонавтницятненень: «Вейке сюпав ломаненть ульнесь кудоветицязо, конань ланга ёвтнесь азоронтень, келя, ветицясь ёмавтни-юводи азоронь ули-паронтень.

<sup>2</sup>Азорось тердизе сонзэ ды кевкстизе: “Мезе мон марсян тонь эйстэ? Ёвтник, кода ветят монь кудонь тевтнень. Тон седе тов а маштоват улемс кудоветицякс”.

<sup>3</sup>Ветицясь арсезевсь: “Мезе монень ней теемс? Азором пани монь важдема таркастон. Модань чувомс арась вием, кши сускомонь вешеме виздян.

<sup>4</sup>Ней содан, мезе теемс, зярдю тестэ паньсамизь, лият саевлимизь кудозост”.

<sup>5</sup>Ды сон кармась тердтнемест вейкень-вейкень азоронтень кедьстэ долкс саицятнень. Васенценть сон кевкстизе: “Зяро тонь пельде пандома монь азоронтень?”

<sup>6</sup>Се мерсь: “Сядодо ламо ойсэ пештязь парть”. Кудоветицясь мерсь тензэ: “Вана тонь сёрмадовт конёв панксот. Озак ды куроксто сёрмадт од: ведьгемень”.

<sup>7</sup>Омбоценть кевкстизе: “Зяро тонь пельде пандома?” Се мерсь: “Сядо кескавт товзюросо”. Кудоветицясь тень лангс мерсь: “Саик тонь сёрмадовт конёв панксонть ды сёрмадт: кавксоньгемень”.

<sup>8</sup>Ды азорось шнызе кудонь а виде ветицянь истя ёжовсто тееманть кисэ. Ды алкуксккак, Пазонь ломантнень коряс Пазнэнь акемицятне седе парсте чарькодъсызь вейсэнь тевстэ эсест туртов лезэнтъ.

<sup>9</sup>Кортан тенк: ютавтодо те колазь масторлангонь ярмактнень эстенк ялгань-оянь пурнамга. Ды зяро ёмить ярмактнень питнест, совавттадызь пингеде пингень кудонтень.

<sup>10</sup>Кие кемевикс вишкине тевсэ, се кемевикс покшсоjak. Кие а кемевикс вишкине тевсэ, се а кемевикс покшсоjak.

<sup>11</sup>Ды бути эзиде ульне кемевиксэкс а виде сюпавчисэ, сестэ алкуксонь сюпавчинтькак кияк а макссы тыненк.

<sup>12</sup>Ды бути эзиде ульне кемевиксэкс лиянь сюпавчисэ, сестэ эсь сюпавчинтькак кияк а макссы тыненк.

<sup>13</sup>Кодамоjak важо кавто азорнэнь а важодеви. Бути снартсы тень теемс, сестэ сон вейкенть карми вечкеме, омбоценть сельмесэ а нееме. Бути вейкенень карми савтомо, омбоцестэнтъ карми прынзо велявтомо. Тыньгак ве шкасто а важодевтядо Пазонтень ды ярмактненень!»

### Пазонь Коесь а сорновтови

<sup>14</sup>Тень маризь фарисейтне. Сынъ вечксть ярмакт ды секскак пеедькшнестъ Иисусонь лангсо.

<sup>15</sup>Ансяк Иисус мерсь тенст: «Тынь парсте содатадо, кода ломантнень икеле невтемс эсь прянк видестэ эрицякс, Пазось жо содасынзе тынк седеенк. Сень, мезе шныть ломантне, тень Пазось лови нулгодьксэкс.

<sup>16</sup>Коень ды пазмарицятнень шкась ульнесь Нававтыця-Лемдиця Иоаннонь видьс. Ней вана ёвтневи Кенярксов куля Пазонь Инязорксчиде ды тов понгоманть кисэ весе путыть покш вий.

<sup>17</sup>Зярдояк а ёми Коень вейкеяк тешкс! Седе куруксто ёмить менелесь ды модась!

<sup>18</sup>Эрвась, кона яви нинзэ эйстэ ды урваксты лия лангс, се ускури; ды эрвась, кона урваксты мирдестэ явозенть лангс, ускури».

#### **Сюпавдо ды Лазарде валвелявкс**

<sup>19</sup>«Эрясь вейке сюпав ломань, оршазель прок инязор, пек питней оршамопельсэ. Чистэ чис тейниль покш каванямот.

<sup>20</sup>Эрясь кажов ломаньгак, лемезэ Лазарь, кона ёртозель сюпавонть ортанзо икелев. Сонзэ рунгозо сыявкс потсоль.

<sup>21</sup>Лазарь арсесь пештеме пекензэ паморькстнэде, конат пeverькшнесть сюпавонь столенть лангсто. Кискат сакшность ваксозонзо ды нолсесть сыявксонзо.

<sup>22</sup>Кулось кажовось, ангелтнэ кандызь оймензэ Авраамонь кедь лангс. Кулось сюпавоськак, ды калмизь сонзэ.

<sup>23</sup>Тоначисэ, косо пиштсь сюпавось, варштась сон верев ды неизе васолдо Авраам покштянтъ, конань мештес нежедезель Лазарь.

<sup>24</sup>Сюпавось серьгедсь: “Авраам тетяй! Чевтемтик седееть монь туртов, кучик Лазарень сур прянзо ведьсэ начтомо ды монь келем экшендямо. Мон пьян-палан те толсонть!”

<sup>25</sup>Авраам мерсь тензэ: “Эйдем! Ледстик мелезэть, кода тонеть максозель эсеть парось эрямстот, Лазарнень максозель ансяк беряньс. Секскак ней сонзэ тесэ лацить-оймавтыть, тон жо майсьят-пиштят.

<sup>26</sup>Ды теде башка, тынк ды минек юткова юты потмакстома латко. Бути киньгак ули мелезэ ютамс тестэ тыненк – сон а ютави, истя тостояк миненек те отьманть трокс кияк а ютави”.

<sup>27</sup>Сюпавось поладсь: “Мон энядан икелеть, тетяй, сестэ кучик Лазарень монь тетянь кудов.

<sup>28</sup>Тосо монь улить вете лелян-ялаксон, кадык кармавты тенст: иляст понго сынгак те пиштемань таркантень”.

<sup>29</sup>Авраам мерсь тензэ: “Сынст ули Моисеест ды пазмарицяст. Кадык кунсолыть эйсэст”.

<sup>30</sup>Ды мерсь сюпавось: “Арась, Авраам тетяй! Савольдеряй монь лелятненень-ялакстнэнь кияк кулозтнень эйстэ, сестэ сынь полавтовлизь эрямост”.

<sup>31</sup>Тень каршо Авраам мерсь: “Бути Моисеень ды пазмарицятнень а кунсолыть, сестэ кулозтнень ютксто вельмезеськак а кармавтсынзе кемеме”».

## Луки 17

### Пежете ды кемемадо тонавтома

<sup>1</sup>Сестэ Иисус мерсь Эсензэ тонавтницятнень: «Манявкстнэ, конат ветить ломантнень пежетьс, свал сыть. Ансяк покш зыян ули сенень, конань вельде сынь сыть!

<sup>2</sup>Кие совавты пежетьс куш вейкешка неть вишкинетнень-асодавикстнэнь ютксто, сенень улель седь паро, бути кирьгазонзо поведельть покш яжамо кев ды ёртовлизь иневедьс!

<sup>3</sup>Ды секскак ванодо, ванстынк прянк! Бути сови пежетьс тонь каршо малавиксэть, ёвтык тензэ эсь пежетензэ, ды бути сон карми янксеме, нолдыть чумонзо.

<sup>4</sup>Бути сон сисемксть чинтень пежетьс сови тонь каршо ды сисемксть чистэнтъ янкси икелеть, нолдыть чумонзо».

<sup>5</sup>Апостолтнэ вешсть Азоронтъ кедьстэ: «Виевгавтык кемеманок!»

<sup>6</sup>Азорось каршост мерсь: «Улиндеряй тынк кемеманк куш горчица видьмешка, тынь меревлиде те покш чувтонть: “Таргик эсь прят юрнэк-мезнек ды озавтык иневедьс”, – сон кунсолонлидизь».

#### Уледе вадря важокс

<sup>7</sup>«Мерьсынек, ули тынк важонк, кона соки мода эли ваны реветь. Зярдон сон сы паксясто, арази мертядо тензэ: “Совак ды курокто озак столь экшс?”

<sup>8</sup>Арась, тынь сонензэ мертядо: “Анокстак монень ярсамопель, карксык рунгот ды монь ярсамо-симема шкасто якак мельган. Тонсь ярсамо-симеме кармат мейле”.

<sup>9</sup>Арази тынь ёвтатадо важонтень сюкпря сень тееманть кисэ, мезесь тензэ кармавтозель? Истя а арсян.

<sup>10</sup>Истя тыньгак, зярдон тейсынк весементь, мезе тенк кармавтозель, ёвтадо: “Минь ансяк уреть, конат теизь кармавтонть ды а учить сень кисэ кодамояк сюкпря”».

#### Проказасо кемень сэредицятнень шумбралгавтомаст

<sup>11</sup>Ерусалимев молемстэ Иисус ютась Самария ды Галилея мастортнэнь юткова.

<sup>12</sup>Вейке велинес совамсто Иисусонь каршо понгсть проказа ормасо сэредиця кемень ломанть. Сынь лоткасть ве ёнов

- <sup>13</sup>ды серьгедсть: «Иисус, Тонавтыця, ульть миненек седеймарицякс!»
- <sup>14</sup>Зярдо Иисус сынст неинзе, Сон мерсь: «Азёдо, невтинк прянк поптнэнень». Ды тов модемстэ сэредицятне ормадост ванськадсть.
- <sup>15</sup>Вейкесь юткстост, зярдо маризе эсь прянзо шумбракс, велявтсь мекев ды кармась верьга вайгельть Пазонтъ шнамо.
- <sup>16</sup>Сон прась Иисусонь пильгс ды, модас сюконязь, ёвтась Тензэ покш сукпря. Те ломанесь ульнесь Самариянь эриця.
- <sup>17</sup>Иисус кевкстизе: «Нать а кемеңест ванськадсть? Косот лия вейксэтне?»
- <sup>18</sup>Мекс ансяк те, лия раськень ломанесь, велявтсь Пазонтъ шнамо?»
- <sup>19</sup>Ды мерсь Иисус те ломанентень: «Стяк ды азё, кемемат шумбралгавтынзеть тонь».

### **Зярдо сы Пазонь Инязоркчись?**

- <sup>20</sup>Весть фарисейтне кевкстизь Иисусонь: «Зярдо сы Пазонь Инязоркчись?» Сон каршост ёвтась: «Пазонь Инязоркчись сы аволь кодамояк неявикс тешкс марто.
- <sup>21</sup>Секскак кияк а мереви: “Сон вана тесэ!” эли “Сон тосо!” Ванодо: Пазонь Инязоркчись тынк эйсэ».
- <sup>22</sup>Мейле Иисус мерсь Эсензэ тонавтницянзо туртов: «Вана сы истямо шка, зярдо сы тыненк покш мель неемс куш ве чис Ломантнень Цёранть, ансяк а несынк.
- <sup>23</sup>Ды зярдо мерить тенк: “Сон вана тесэ!” эли “Сон тосо”, аштеде таркасонк, илядо капша чиеме кортыцятнень мельга.
- <sup>24</sup>Кода ёндолонь кивчкадемасть валдомты менеленть пестэ пес, истя карми неявомо Ломантнень Цёраськак само чистэнзэ.
- <sup>25</sup>Ансяк васняк Сонензэ сави ютамс ламо пиштема, ды неень пингень ломантне велявтсызь седеест эйстэнзэ.

<sup>26</sup>Кода ульнесь Ноень читнестэ, истя карми Ломантнень Цёранть читнестэяк.

<sup>27</sup>Ломантне ярснесть, симнесть, урвакстнесть ды лиснесть мирденень се чинть самс, зярдю Ной совась иневенчес. Мейле сыргась инечадысь, конась весень ваявтынзе.

<sup>28</sup>Карми улеме истя, кода ульнесь Лотонь шкатнестэ: весе ярснесть, симнесть, рамсесть, микшнесть, виднесть, тейнесть кудот.

<sup>29</sup>Ансяк се чистэнтъ, зярдю Лот тусь Содом ошстонть, менельстэ пиземекс прась тол ды палыкандал, конась маштынзе весе эрицятнень.

<sup>30</sup>Истя карми улеме те шкастонтькак, зярдю мекев сы Ломантнень Цёрась.

<sup>31</sup>Се чистэнтъ, кие стардови кудо лангс ды ули-парозо кадови кудо потс, илязо валгоне парочинть кисэ. Кие стардови паксяс, илязо велявтне мекев кудов.

<sup>32</sup>Мельсэ кирдеде Лотонь нинть!

<sup>33</sup>Кие снарты ванстомс эсь эрямонзо, се ёмавтсы сонзэ. Кие ёмавтсы эсь эрямонзо, се вантсы сонзэ.

<sup>34</sup>Видестэ тенк кортан: те вестэнтъ кавто ломантне кармить удомо ве тарка лангсо – вейкесь эйстэст карми улеме саезь Пазонтень, омбоцесь – кадозь.

<sup>35</sup>Кавто ават вейсэ кармить товонь яжавтомо. Вейкесь эйстэст ули саезь Пазонтень, омбоцесь – кадозь.

<sup>36</sup>Кавто цёрат кармить улеме паксясо: вейкесь эйстэст карми саезь Пазонтень, омбоцесь – кадозь».

<sup>37</sup>Ды тонавтницятне кевкстизь Иисусонь: «Азоро, косо те весе карми улеме?» «Косо кулозь ракшась, тов пуромить раужо варакатнеяк», – валмеревкссэ каршост мерсь Иисус.



## Луки 18

### Валвелявкс довадо ды а виде судиядо

<sup>1</sup>Иисус невтиксэлизе тонавтницятненень, кода эряви свал озномс ды а нолдтнемс прянтъ. Секскак ёвтнесь тенст истямо валвелявкс:

<sup>2</sup>«Вейке ошсо эрясь судия, конась эзь визде ломанде, эзь пеле Паздоjak.

<sup>3</sup>Секе ошсонть эрясь дова, конась свал сакшнось сонензэ ды эняддсь: “Идемак монь зыянонь теицядонть!”

<sup>4</sup>Судиянтъ кувать арасель мелезэ идемс аванть. Ды ансяк мейле сон эстензэ мерсь: “Кадык Паздоjak мон а пелян, ломандеjak а виздян,

<sup>5</sup>ялатеке те довась налкставтымим. Секс мон лездан тензэ, лиякс – сонзэ нернемась паньсамам калмос”».

<sup>6</sup>Ды Азорось мерсь: «Марятадо, мезде корты а виде судиясь?

<sup>7</sup>Нать Пазось мезеjak а теи Эсензэ кочкавтнэнь идемаст туртов, конат чинек-венек эняддыть икелензэ? Арази Пазось кармавтсынзе сынст учомо?

<sup>8</sup>Кортан тенк: Сон куроцсто идесынзе Эсензэ кочкавтнэнь! Ялатеке зярдо мекев сы Ломантненъ Цёрась, муеви а муеви Тензэ масторлангсо алкуксонь кемемась?»

### Фарисейде ды каявксонь пурныцядо валвелявкс

<sup>9</sup>Иисус ёвтнесь истямо валвелявкс сетненень, конат кемсть-нежедсть эсь видечист лангс ды лия ломантненъ мезекскак эзизь путне:

<sup>10</sup>«Кавто ломанть совасть Пазонь кудос озномо. Вейкесь – фарисей, омбоцесь – каявксонь пурныця.

<sup>11</sup>Фарисеесь стясь ды ознось эсь пачканзо истя: “Пазом! Сюкпря Теть сень кисэ, мекс мон а истяман, кодат лия ломантне: салыцят, кенгелицят, ускурицят, эли кодамо те вакссон аштиця каявксонь-налогонь пурныцясь.

<sup>12</sup>Мон постован кавксть недлязонзо, максан Тонеть кеменце пельксэнтъ весеместэ, мезе монень макснить ломантне”.

<sup>13</sup>Каявксонь пурныцясь аштесь ве ёно, сельмензэяк виздсь кепедемс менельс, ды, мештьс кедень вачкоезь, кортась: “Пазом! Ультъ седеймарицякс монень, пежетев ломанентень!”

<sup>14</sup>Ёвтан тенк: те ломанесь тусь кудов седе вишкине чумо марто фарисеентъ коряс. Эдь эрьвась, кона сонсь кепеди эсь прязно, се ули валгстозь; кона валгсты эсь прязно, се ули кепедезь».

### **Иисус ды эйкакшт**

<sup>15</sup>Иисуснэнь кандтнестъ-ветнестъ вишкине эйкакшткак, конатнень лангс вешть путомс кедензэ. Тень неезь, тонавтницятне кармасть кардамоост.

<sup>16</sup>Иисус тердинзе эйкакштнэнь Эсензэ икелев ды мерсь: «Мереде эйкакштнэненъ сакшномс Монень, илядо карда эйсэст, эдь истятнэнь ули Пазонь Инязорксчист.

<sup>17</sup>Видестэ кортан тенк: кие Пазонь Инязорксчинть а вастсы эйкакш ладсо, се тозонь а совави».

### **Сюпав ломанесь кевкстни Иисусонь**

<sup>18</sup>Вейке прывтось кевкстизе Иисусонь: «Паро тонавтыця! Мезе монень теемс пингедэ пингень эрямонтень совамга?»

<sup>19</sup>Иисус каршонзо мерсь: «Мейс тон Монень “паро” мерят? Паздо башка кияк парокс а эрси.

<sup>20</sup>Тон, нама, кармавтокстнэнь содасыть: иля ускуря, иля маштне, иля сала, иля кенгеле, ловт ломанькс тетять-авать».

<sup>21</sup>Прявт ломанесь каршонзо мерсь: «Весе тень мон топавтан од пингестэ саезь».

<sup>22</sup>Тень марязь, Иисус мерсь тензэ: «Тонеть вейке ансяк а сатны: азё, весементь, мезеть ули, микшник. Ярмактнень явшить пурныцятнень ланга. Сестэ карми улеме тетть сьупавчи менель лангсо. Теде мейле сак ды мольть Монь мельга».

<sup>23</sup>Нетъ валтнэде нусмакадсь прявт ломанесь, эдь сон ульнесь пек сьупав.

<sup>24</sup>Иисус неизе, кода сон нусмакадсь, ды мерсь: «Вай, кодамо стака сьупавтненень максомс пряст Пазонь Инязорксчинтень!»

<sup>25</sup>Сьупав ломанентень пек стака совамс Пазонь Инязорксчинтень, седе шожда верблюдонтень салмуks варява ютамс!»

<sup>26</sup>Сеть, конат тень маризь, кевкстизь Иисусонь: «Кие энэ сестэ идеви?»

<sup>27</sup>Иисус тень каршо мерсь тенст: «Мезе а тееви ломанентень, се тееви Пазонтень».

<sup>28</sup>Сестэ Петра мерсь сонензэ: «Вана минь кадынек весементь ды туинек Тонь мельга».

<sup>29</sup>Иисус каршонзо мерсь: «Видестэ кортан тенк: кие Пазонь Инязорксчинть кисэ кадызе кудонзо, тетянзо-аванзо, лелянзо-ялаксонзо, патянзо-сазоронзо, нинзэ эли эйкакшонзо,

<sup>30</sup>сенень мекев максови ламодояк седе ламоксть неень шкасто, ды сыця шкастонть – пингеде пингень эрямо».

### **Иисус колмоцеде икелев корты Эсензэ куломадо ды вельмемадо**

<sup>31</sup>Иисус тердинзе ве ёнов кемгавтово тонавтнициянзо ды мерсь тенст: «Вана минь мольтяно Ерусалимев ды тосо топавтови се, мезде сёрмадозь Ломантнень Цёрадонть пазмарицятнень книгатнесэ.

<sup>32</sup>Сонзэ макссызь лия раськенъ ломантнень кедьс, конат кармить Сонзэ покордамо, сельгенеме ды лангсонзо згилямо,

<sup>33</sup>кармить локшосо чавомонзо ды теде мейле маштсызь Сонзэ. Ансяк колмоце чистэ Сон кулозьстэ вельми».

<sup>34</sup>Тонавтницятне тень эйстэ мезеяк эзть чарькоде. Иисусонь кортамонь смустесь ульнесь тонавтницятнень туртов пекстазь ды сынъ эзть чарькоде, мезде теньсэ арсесь ёвтамо Иисус.

### **Иисус шумбралгавты сокоронтъ**

<sup>35</sup>Иисус пачкодсь Ерихон ошонтъ малас. Те шкане ки чиресэ озадолъ сокор пурныця ды вешсь лезкске.

<sup>36</sup>Сон марясь, ваксканзо ютыть ламо ломанть ды кевкстсь: «Мезе те истямось?»

<sup>37</sup>Сокоронтень ёвтасть: «Те юты Назаретэнь Иисус».

<sup>38</sup>Сестэ сокорось серьгедсь: «Иисус, Давидэнь Цёра! Ульть седеймарицякс монень!»

<sup>39</sup>Икеле молицятне кармавтсть эйсэнзэ чатьмонеме, ансяк сон яла седейк пек пижнесь: «Давидэнь Цёра! Ульть седеймарицякс монень!»

<sup>40</sup>Иисус лоткась ды мерсь: «Ветинк те ломанентъ Монь икелев». Зярдсокорось сась икелензэ, Иисус кевкстизе:

<sup>41</sup>«Мезе мелеть теевтемс Монь кедьстэ?» Сокорось мерсь: «Азоро, теить неицякс сельмень!»

<sup>42</sup>Иисус мерсь тензэ: «Кармак нееме! Кемемат шумбралгавтынзеть тонь!»

<sup>43</sup>Сокорось нейке кармасть нееме ды Пазонтъ шназь тусь Иисус мельга. Зярдсоломантне тень неизь, сынъ весе кецясть ды шнасть Пазонтъ.

## **Луки 19**

### **Закей**

<sup>1</sup>Мейле Иисус совась Ерихон ошс ды ютась сонзэ трокс.

<sup>2</sup>Тосо ульнесь пек сюпав ломань, каявксонь-налогонь пурныцянь прявт, лемезэ Закей.

<sup>3</sup>Закеень ульнесь покш мелезэ неемс Иисусонь, ваномс, кодамо Сон. Ансяк Закей алкинель, ды секскак Иисус эзь неяво тензэ ломантнень ютксто.

<sup>4</sup>Сестэ сон икельдинзе ломантнень ды кузьс ки чиресэ касыця вирень инжир чувтонть пряс, конань вакса сави ютамс Иисуснэнь.

<sup>5</sup>Зярдэ Иисус пачкодсь те таркантень, Сон варштась верев ды мерсь тензэ: «Закей, валгт седе куроксто! Монень улема течи тонь кудосо».

<sup>6</sup>Закей куроксто валгсь ды кенярдозь вастызе Иисусонь кода инжень.

<sup>7</sup>Зярдэ весе ломантне неизь тень, сынь кармасть музгордеме: «Вай, Иисус совась инжекс пежетев ломаннень!»

<sup>8</sup>Закей стясь ды мерсь Азоронтень: «Азоро! Мон нейке явшеса пеле ули-паром кажовтненень, ды бути манязь сайнь седе ламо киньгак кедьстэ, сенень нилексть велявтса!»

<sup>9</sup>Иисус мерсь сонензэ: «Течи идема сась те кудонь эрицятненень, эдь Закейгак – Авраамонь раськенень ломантнень ютксто вейкесь.

<sup>10</sup>Ломантнень Цёрась саськак ёмазтнень вешнеме ды идеме».

### **Максозь ярмакто валвелявкс**

<sup>11</sup>Ломантненень, конат тень кунсолость, Иисус ёвтнесь валвелявкс. Те шкане Сон ульнесь Ерусалименть маласо, ды ламот учость Пазонь Инязорксчинть курок самонзо.

<sup>12</sup>Секс Иисус поладызе ёвтамонзо: «Вейке содавикс раськенень ломань сыргась туеме васоло масторов, теевемс тосо инязорокс ды теде мейле мекев самс.

<sup>13</sup>Ансяк туемадо икеле сон тердинзе кемень важонзо ды макссь эрвантень вейке сырнень ярмак ды мерсь: “Нолдынк неть ярмактнень тевс монь мекев самозон”.

<sup>14</sup>Те масторонь эрицятне эзьт вечке сонзэ ды кучсть мельганзо зярыя ломанть, конат ёвтызь весе эрицятнень мелест: “Арась меленек неемс те ломаненть эсенек инязорокс!”

<sup>15</sup>Ялатеке инязорокс сонзэ путызь, ды зярдо сась мекев, кармавтсь тердемс эстензэ сеть важотнень, конатненень максозельть ярмактне, ды кевкстинзе сынст, кода ды зяроксть эрьвась кастынзе сынст питнест.

<sup>16</sup>Васенце важось сась инязоронтъ икелев ды ёвтась: “Азоро, тонь сырнень ярмакось кассь монь кедьсэ кеменьксть!”

<sup>17</sup>“Алят, – шнызе сонзэ азорось, – тон паро важо. Тон ульнить кемевиксэкс вишка тевсэ ды секскак максан тетъ кемень ошт ды путтан тонь сынст лангсо прявтокс”.

<sup>18</sup>Сась омбоце важось ды мерсь: “Азоро, тонь сырнень ярмакось кассь монь кедьсэ ветексть!”

<sup>19</sup>Азорось каршонзо мерсь: “Максан кедеть алов вете ошт”.

<sup>20</sup>Мейле сась колмоце важось ды мерсь: “Азоро, вана тонь сырнень ярмакось, мон сонзэ тапардакшныя пачине потс ды ванстыя.

<sup>21</sup>Мон пелинь тондетъ, эдь тон калгодо седей ломанесь. Тон саят тосто, козо эзить путне, ды нуят сень, мезе эзить видне”.

<sup>22</sup>Азорось сестэ мерсь: “Тон – апаро важо! Эсетъ кургонь валсот карман тонь судямо. Тон содылить: мон калгодо седей ломанян, саян тосто, козо эзинь путне, ды нуян сень, мезе эзинь видне.

<sup>23</sup>Мекс эно тон эзик максо монь ярмаконтъ полавтнема таркас? Сестэ самодон мейле мон мекев саевлия ламолгадозь те ярмаконтъ”.

<sup>24</sup>Инязорось мерсь эсензэ ломантненень: “Саинк кедьстэнзэ сырнень ярмаконтъ ды максынк сенень, конань кемень ярмаконзо”.

<sup>25</sup>Сынь мерсть тензэ: “Азоро, сонзэ уш улить кемень ярмаконзо!”

<sup>26</sup>“Кортан тенк”, – мерсь инязорось, – “эрьвантень, кинь ули, сенень седеяк ламо максови, кинь вана арась, сень кедьстэ саеви сеяк, мезезэ ули.

<sup>27</sup>Монь ятнэнь жо, конатнень арасель мелест путомс монь инязорокс, ветинк тей ды маштынк монь сельме икеле”».

### Ерусалимс Иисусонь совамозо

<sup>28</sup>Те валвелявксонтъ ёвтнемадо мейле Иисус поладызе Ерусалимев молеманть.

<sup>29</sup>Зярдо Сон пачкодсь Бетфагия ды Бетания велетнень малас, конат сраговсть Ойумарькс пандонтъ чирева, Сон кучинзе икелев кавто тонавтницянзо

<sup>30</sup>ды кармавтсь тенст: «Азёдо велентень, кона икеленк, ды эйзэнзэ совамсто сеске мутадо содозь осёлонь вашо, конань лангс зярс кияк эзь ойсе. Юксинк сонзэ ды ветинк тей.

<sup>31</sup>Бути кияк тынк кевкстыдызь: “Мезекс юксетядо сонзэ?” – мереди истя: “Сон эряви Азоронтень”».

<sup>32</sup>Кучозтне тустъ ды весементъ муизь истя, кода Иисус сынест мерсь.

<sup>33</sup>Зярдо тонавтницятне юксетъ вашонтъ, вашонь азортнэ кевкстизь сынт: «Мезекс юксетядо вашонтъ?»

<sup>34</sup>Сынь тень каршо мерсть: «Сон эряви Азоронтень».

<sup>35</sup>Иисуснэнь ветизь вашонтъ, ацызь лангозонзо эсь оршамопелест ды Иисусонь озавтызь вашонтъ лангс ласте.

<sup>36</sup>Ды зярдо Сон мольсь ласте, ламот ацнестъ эсь оршамопелест кинть ланга.

<sup>37</sup>Сынь пачкодсть се таркантень, косто кись туи алов Ойумарькс пандостонтъ, ды весе тонавтницятне кармасть кецязь верьга вайгельть шнамо Пазонтъ неть дивань тевтнень кисэ, конатнень сынь некшнизь:

<sup>38</sup> «Улезэ чанстязь-баславазь Инязорось, Азоронтъ лемсэ Сыцясь! Кадык ули сэтьме лув менельсэ, шнамо Верепазонтень!»

<sup>39</sup> Ломантнень ютксто кой-конат фарисейтне мерсть Иисуснэнь: «Тонавтыця, лоткавтыть Эсетъ тонавтницят!»

<sup>40</sup> Иисус каршозост мерсь: «Кортан тенк: бути сынъ чатьмонезевить, сестэ кевтне кармить сеереме».

<sup>41</sup> Зярдэ Иисус сась седе малав Ерусалиментень ды неизе сонзэ, Сон аварьгадсь ошонь уцяскадонть

<sup>42</sup> ды мерсь: «Вай, Ерусалим! Бути тонгак течи чарькодевлитъ, мейсэ тонь оймамось-идемась! Ансяк ней те кекшезь тонь сельметнень эйтэ.

<sup>43</sup> Эдь сыть тонь туртов истят чить, зярдэ яттнэ чувить перькат латкт, пирятадызь ды каявить лангозот эрва ёндо.

<sup>44</sup> Сынъ юрс калавттадызь тонь, чавносызь тонь эрицят, а кадыть тонь эйтэ кев лангсо кевгак, секс мекс тон эзик чарькоде те шканть, зярдэ Пазось сакшнось тонь идеме».

### **Иисус Пазонь кудосо**

<sup>45</sup> Мейле Иисус совась Пазонь кудонь пирявксонтъ потс ды кармась тосто микшницятнень-рамсицятнень пансеме.

<sup>46</sup> Сон мерсь сыненст: «Пазонь Сёрмадовкссонтъ ёвтазь: “Монь кудонтень кармить мереме ознома кудо”. Тынь вана теинк сонзэ салыцянь-маштницянь пизэкс!»

<sup>47</sup> Иисус эрва чистэ тонавтсь Пазонь кудосо. Попонь покштнэ, Койс тонавтыцятне ды раськень прявтнэ вешнестъ тувтал маштомс Сонзэ.

<sup>48</sup> Ансяк те сыненст кодаяк эзь тееве, эдь весе ломантне свал ульнестъ перьканзо ды кунсолость Сонзэ эрва валонзо.

## **Луки 20**



### Иисусонь азорксчиденть кевкстематне

<sup>1</sup>Ды вана ве чистэ, зярдо Иисус тонавтсь Пазонь кудонь пирявксонтъ потсо ды ёвтнесь Кенярксов Куля, Сонзэ перька пурнавсть попонь покштнэ, Койс тонавтыцятне, прявтнэ

<sup>2</sup>ды кевкстизь: «Ёвтак миненек, кодамо азорксчисэ теят Тон неть тевтнень ды кие максызе Теть те азорксчинть?»

<sup>3</sup>Иисус тень каршо мерсь: «Монгак максан тенк вейке кевкстема. Ёвтадо Монень,

<sup>4</sup>Иоаннонь нававторась менельстэ ульнесь эли ломантнень пельде?»

<sup>5</sup>Сынь эсь ютковаст кармасть кортнеме: «Бути мертяно: “Менельстэ”, сестэ Сон кевкстьсамизь: “Мекс эно эзиде кеме тензэ?”

<sup>6</sup>Бути мертяно: “Ломантнень пельде”, сестэ весе ломантне кармить лангозонок ёртнеме кевсэ, эдь сынь весе превсэ-седейсэ Иоаннонь ловить пазмарицякс».

<sup>7</sup>Секскак мерсть Иисусонь каршо: «А содатано, косто».

<sup>8</sup>Сестэ Иисус сынст каршо мерсь: «Монгак а ёвтан тенк, кодамо азорксчисэ теян неть тевтнень».

### Винаумарькс пире мельга якицядо валвелявкс

<sup>9</sup>Тезде мейле Иисус ёвтнесь ломантненень истямо валвелявкс: «Вейке ломань озавтсь винаумарькс пире ды сиведсь пиренть мельга якицят. Сонсь тусь куватень шкас лия масторов.

<sup>10</sup>Ды вана сась умарень пурнамо шкась. Азорось кучизе важонзо винаумарь пирень мельга якицятнень кедьстэ саемс эсензэ таликанзо. Пиренть мельга якицятне важонтъ кундызь, чавизь ды чавонь кедть кучизь мекев.

<sup>11</sup>Азорось таго кучсь тенст лия важо. Ансяк сынь сеньгак чавизь ды визьксчамасо панизь чавонь кедть.

<sup>12</sup>Азорось кучсь колмоце важо. Сынть теньгак верьс чавизь ды вырновтызь винаумарь пирестэнтъ.

<sup>13</sup>Сестэ азорось арсезевсь: “Мезе монень теемс? Кучса тов эсень вечкема цёрам. Паряк, сонзэ неезь, эйстэнзэ визделгадыть”.

<sup>14</sup>Зярдэ винаумарь пирень мельга якицятне неизь цёрантъ, сынть мерсть эсь ютковасть: “Те – буень поладыцязо. Адядо маштсынек сонзэ, сестэ сонензэ кадовикс ули-парось ули минек”.

<sup>15</sup>Сынть тулкадизь сонзэ пирестэнтъ ды маштызь. Мезе ней теи мартост пирень азорось?

<sup>16</sup>Сон сы, маштсынзе неть винаумарькс мельга якицятнень ды пирентъ макссы лиянень». Кунсолыцятне серьгедсть: «Арась! Арась! А улемс тенень!»

<sup>17</sup>Иисус пштистэ варштась лангозост ды мерсь: «Мезде эно кортыть неть Пазонь Сёрмадовксонь валтнэ: “Се кевесь, конань ёртызь кудонь теицятне, теевсь ужонь-уголонь кирдиця юр кевекс”?

<sup>18</sup>Эрвась, кие пры те кевентъ лангс, порксави, ды кинь лангс кевесь пры, сень лепштысь».

<sup>19</sup>Койс тонавтыцятне ды попонь покштнэ чарькодсть: те валвелаяксонтъ Иисус ёвтнизэ сындест. Секскак сынть нейке арсестъ каподемс Сонзэ, ансяк пельсть ломантнеде.

### **Кесарнень каявксто**

<sup>20</sup>Секскак сынть кармасть Иисусонь мельга салава ваномо ды кучнестъ Сонензэ таго-зяро ломантъ, конат пряст невтсть ванькс седеекс, алкуксокс жо арсестъ кундамс Иисусонь вал лангсо ды теде мейле максомс Сонзэ римень прявтонть кедензэ ды судьямонзо алов.

<sup>21</sup>Нетъ ломантне кевкстизь Иисусонь: «Тонавтыця, минь содатано: Тон кортат ды тонават видестэ, кодамояк ломань а яват, Пазонь кинтень тонават видестэ.

<sup>22</sup>Ёвтак, эряви-арась миненек Римень кесарнень каявкс пандомс?»

<sup>23</sup>Сынст зыянов мелест чарькодезь, Иисус мерсь каршост: «Мекс варчавтнетядо-терявтнетядо Эйсэнь?

<sup>24</sup>Невтеде Монень динар ярмак. Те кинь чамась ды кинь лемесь ярмаконтъ лангсо?» Сынъ мерсть Тензэ: «Кесарентъ».

<sup>25</sup>Иисус каршост мерсь: «Сестэ макснедеяк кесарнень кесаренсентъ, Пазонтень – Пазонсентъ».

<sup>26</sup>Иисус сынест ломантнень икеле вал лангсо эзь кундаво. Сынъ дивазевсть Сонзэ каршо валонтень ды каштмольсть.

### Вельмемадо

<sup>27</sup>Иисуснэнь састъ зярыя саддукейть, конат кулозьстэ вельмемантень а кемильть, ды кевкстизь Сонзэ:

<sup>28</sup>«Тонавтыця, Моисей сёрмадсь тенек Койсэнтъ: “Бути урвакстозь ломанесь кулы эйкакштомо ды кадови низэ, сестэ кулозентъ ялаксозо саезэ эстензэ те нинть полакс, ды сынъ чачтост эйкакш. Истя те эйкакшось ули ловозь кулозь лелянтъ эйкакшокс”.

<sup>29</sup>Ды вана эрясть-аштестъ сисем лелят-ялакст. Васенцесь урвакстсь ды кулось, эйкакш эзь кадо.

<sup>30</sup>Нинть саизе омбоцесь. Омбоцеськак кулось эйкакштомо.

<sup>31</sup>Мейле колмоцесь саизе никс теке аванть. Ды седе тов истя лиснесь меельце ялакстнэнь мартояк. Весе сисемнест кулость эйкакшонь апак кадо.

<sup>32</sup>Меельцекс кулось ниськак.

<sup>33</sup>Сестэ, зярдо сынъ кулозьстэ вельмить, конанень эйтэст ули сон никс? Эдь сон весе сисемнест туртов ульнесь никс».

<sup>34</sup>Иисус тень каршо ёвтась: «Те шкань эрямосонтъ ломантне урвакстнить ды лиснить мирденень.

<sup>35</sup>Ансяк сетне, конатненень Пазось кази кулозьстэ вельмема, сыця шкань эрямосонтъ а кармить урвакстнеме ды мирденень лиснеме.

<sup>36</sup>Ды сынъ зярдоак а кулыть, улить ангелэнь кондямокс. Сынъ Пазонь эйкакшт, эдь Пазось вельмевтинзе кулозьстэ.

<sup>37</sup>Кулозтнень вельмемаст алкукскак ули, теде кортась сонсь Моисейгак пальця куракшто ёвтнемасонтъ. Тосо сон кортась: Азорось – те Авраамонь Пазозо, Исаконь Пазозо ды Яковонь Пазозо.

<sup>38</sup>Пазось аволь кулозтнень Пазост, Сон эрицятнень Пазост. Сонзэ туртов кулозтнеяк, эрицятнеяк – эрицят».

<sup>39</sup>Койс тонавтыцятнестэ конат-конат каршонзо мерсть: «Тон вадрясто ёвтыть, тонавтыця!»

<sup>40</sup>Теде мейле сынъ пелезевсть максомс Иисуснэнь лия кевкстемат.

### **Христос – Давидэнь цёра?**

**Мейле Иисус кевкстсь:**

<sup>41</sup>«Мекс ломантне истя кортыть: Пазонь кучовт Идицясь – Давидэнь цёра?

<sup>42</sup>Эдь сонсь Давид корты Псалтирьсэ: “Азорось мерсь монь Азоронтень: озак Монь вить кедь ёнов,

<sup>43</sup>зярс Мон а тейсынъ Тонь душманот пильгеть путома таркакс”.

<sup>44</sup>Теньсэ неяви: Давид мери Сонензэ Азоро. Кода эно Сон ули Давиднэнь цёракс?»

<sup>45</sup>Весе кунсолость Иисусонь, ды Сон кортась тонавтницянзо туртов:

<sup>46</sup>«Вансто до прянк Койс тонавтыцятнеде: сынъ вечксызь кувака оршамосо якамонть ды ошкужосо мартост шумбракстнеманть. Сынъ вечксызь синагогасо икеле таркатнесэ озадо аштеманть, каванямо кудосо – васенце таркатнес озамонть.

<sup>47</sup>Сынъ нельгить доватненъ кудост ды прят невтеманъ кисэ кувать озныть. Истятнэ седеяк стакасто судязь улить».

## Луки 21

### Довань максовкс

<sup>1</sup>Иисус вансь ярмаконъ кирдемканть ёнов ды несъ, кода сюпавтне кайсестъ тов эсест казнест.

<sup>2</sup>Сон несъ кажов дова авиняк, кона каясь пижень кавто ярмаккеть.

<sup>3</sup>«Видестэ кортан тенк, – мерсь Иисус, – те кажов довась каясь сехте ламо весе каицятнеде.

<sup>4</sup>Эдь весе сынъ каясть Пазонтень ламочидест, довась вана каясь арасьчидензэ ды максызе весементъ, мейсэ тензэ эрямаль».

### Пазонь кудонть каладомась

<sup>5</sup>Перька аштиця ломантне кортазевсть Пазонь кудодонть: кодамо мазый кевстэ сон теезь ды кодат питней казнеть сонзэ мазылгавтыть. Тень кувалт Иисус мерсь:

<sup>6</sup>«Сы истямо шка, зярдэ весеместэнтъ, мезе тесэ тынь ней нетядо, а кадови кев лангс кевгак, весе ули калавтозь».

### Васень тешкст

<sup>7</sup>Иисусонь тонавтницянзо кевкстнестъ: «Тонавтыця, ёвтак тенек, зярдэ те тееви? Ды кодамо тешксэнь коряс содави весе тень топавтомась?»

<sup>8</sup>Сон тень каршо мерсь: «Ванодо, кияк аволидизь маня, эдь ламот сыть кекшезь Монь лементь ало ды кармить пряст ёвтамо: “Те Мон” эли “Шкась сась”. Илядо моле сынст мельга!

<sup>9</sup>Зярдю марятадо кулят войнадо ды ломантнень кепедевемадо, илядо тандале. Тенень эряви улемс васняк, ансяк те – зярс аволь песь».

<sup>10</sup>Мейле Иисус поладынзе валонзо: «Раське кепедеви раськень каршо, мастор – масторонь каршо.

<sup>11</sup>Таркань-таркань улить модань покш сорномат, сыть вачо иеть ды куломань ормат, менельсэнтъ кармить неявомо а чарькодевикс ды тандавтыця ине тешкст.

<sup>12</sup>Нетъ зыянтнэнь самодост икеле тынк каршо кепедьсызь кедест ды кармить пансеменк. Тынк ветятадызь судямс синагогав ды ёрттадызь пекстамо кудос, стявттадызь инязортнэнь ды лия ветицятнень икелев Монь лементь кисэ.

<sup>13</sup>Сестэ тынк туртов сы шка кортамс Мондень.

<sup>14</sup>Кеместэ мельсэ кирдеде: икелепелев илядо арсе, кодамо валсо идемс эсь прянтъ.

<sup>15</sup>Мон максан тыненк истят валт ды превть, конатнень каршо а кортазевеи ды а цидярды вейкеяк тынк каршо молицятнеде.

<sup>16</sup>Натой тетянк-аванк, лелянк-ялаксонк, роднянк-раськенк ды ялганк-оянк тынк макстадызь судямс прявтнэненъ. Ды конань-конань тынк эйстэ маштсызь.

<sup>17</sup>Монь лементь кисэ весеменень ультядо авечкевиксэкс.

<sup>18</sup>Ансяк тынк прясто черыгак а пры.

<sup>19</sup>Цидярдодо – ды идесынк эсенк ойменк пингеде пингень эрямос».

### Ерусалимень калавтомась

<sup>20</sup>«Зярдо нетядо Ерусалименьть перька ушмот, сестэ содадо: малавгадсь сонзэ калавтомань шкась.

<sup>21</sup>Сестэ сеть, конат Иудеясо, оргодест пандо лангов, кие Ерусалимсэ, – оргодезэ тосто; кие ош маласо велетнесэ – ошов илязо сова.

<sup>22</sup>Эдь састь кежень пандома читне ды топавтови весемесь, мезде ёвтазель Пазонь Сёрмадовкстнэсэ.

<sup>23</sup>Кодамо стака ули сеть читнестэ пешксесэтненень ды потесэ эйкакшонь потицятненень! Эдь те масторонть учи виев майсема, неть Израилень ломантнень лангс валги Пазонь кежесь!

<sup>24</sup>Веенст ломантне кулыть тородо, омбонстнэнь паньсызь полонс эрва кодамо лия масторга. Ерусалимесь карми улеме чалгсезь лия раськетнесэ сеть шкатнес, зярс а прядови сынст шкаст».

### Ломантнень Цёранть самось

<sup>25</sup>«Гандавтыця тешкст кармить неявомо тештнень, чинть ды ковонть лангсо. Мода лангсо раськетне кармить майсеме ды сорномо азарсь иневедень зэрнемадонть.

<sup>26</sup>Ломантне теевить пельскулозекс мода лангс сыця зыянтнэде ды сынст эйстэ тандадомадонть. Эдь менелень вийтнеяк теить сорк.

<sup>27</sup>Сестэ несызь, кода Ломантнень Цёрась сы пель лангсо эсь покш вийсэнзэ ды иневалдосонзо.

<sup>28</sup>Зярдо те весе карми топавтовомо, тынь виемтинк рунгонк ды кепединк прянк – идеманк маласо!»

<sup>29</sup>Ды ёвтнесь Иисус сыненст истямо валвелявкс: «Варштадо инжир чувтонть лангс ды весе лия чувтнэнь лангс.

<sup>30</sup>Зярдо сынь кармить пургондамо, тынь тынсь, тень неезь, чарькодтядо: кизэсь маласо.

<sup>31</sup>Истя тесэяк: зярдо тынь несынк тень топавтоманть, сестэ чарькодтядо – Пазонь Инязорксчись маласо.

<sup>32</sup>Видестэ кортан тенк: неень пингень ломантне ёмамо а кенерить, кода весе те топавтови.

<sup>33</sup>Менелесь ды масторось ёмить, ансяк Монь валон а ёмить».

### Уледе анокт!

<sup>34</sup>«Ванодо эсь мельганк: илядо сокоргавто эсь седеенк прясто пильгс совазь тантей ярсамос, иредемас ды эрва чинь мелявксос. Сестэ те чись а сы тенк апак учо,

<sup>35</sup>прок калонь кундамонь алтыма. Се чись стардсынзе весе мода лангсо эрицятнень.

<sup>36</sup>Уледе свал анокт ды ознодо, кадык саты виенк шумбрасто ютамс весе неть сыця зыянтнэнь пачк ды арамс Ломантнень Цёранть сельмензэ икелев».

<sup>37</sup>Чить Иисус тонавтыль Пазонь кудосо, чокшне тукшныль ошто Ойумарькс пандонтъ лангс ды ютавтыль тосо венть.

<sup>38</sup>Ламо ломантне валске ланга сакшность Пазонь кудонтень Сонзэ кунсолосо.

## Луки 22

### Прявтнэ арсить Иисусонь маштомо

<sup>1</sup>Малавгадсь Ламбамсто сукоронь покшчись, конанень истя жо мерить евренень Инечи.

<sup>2</sup>Попонь покштнэ ды Койс тонавтыцятне пельсть ломантнень эйстэ. Секскак вешнесть, кода маштомс Иисусонь.

<sup>3</sup>Ды вана Сатанась совась Иудас, конанень мерильть Искарот. Сон ульнесь кемгавтово тонавтницятнень ютксто вейкесь.



<sup>4</sup>Сон сась попонь покштнэнень ды Пазонь кудонь ванстыця прявтнэнень. Сынъ эсь ютковаст кортнестъ ды прасть ве лувс теде, кода Иуда макссы кедезэст Иисусонь.

<sup>5</sup>Весе сынъ кенярдозевсть ды алтасть Иуданень ярмакт.

<sup>6</sup>Иуда макссь вал ды кармасть вешнеме ён шка ломантнеде салава миёмс сыненст Иисусонь.

### **Евреень Инечинть ярсамопелень анокстамось**

<sup>7</sup>Сась Ламбамсто сюкоронь покшчинь се чись, зярдо эрявсь печкемс инечинь вирез.

<sup>8</sup>Иисус кучинзе Петрань ды Иоаннонь ды кармавтсь тенст: «Азёдо, анокстадо минек туртов инечинь ярсамо».

<sup>9</sup>Сынъ кевкстизь Сонзэ: «Косо мерят миненек анокстамс?»

<sup>10</sup>Иисус мерсь тенст: «Вана, ошс совамсто каршонк понги кукшинсэ ведень кандыця цёра. Моледе мельганзо кудонтень, козонь сон сови.

<sup>11</sup>Мереде кудонь азоронтень: “Тонавтыцясь кевкстни тонь, косо нупалесь, конаньсэ Монень тонавтницян марто ярсамс инечинь ярсамодонтъ?”

<sup>12</sup>Сон невти тенк вере нупаль, покш, ацазь; тосо анокстадоаяк».

<sup>13</sup>Тонавтницятне тустъ, ды весемесь лиссь истя, кода мерекшнесь тенст Иисус. Сынъ аноктасть инечинь ярсамо.

### **Чокшнень ярсамось**

<sup>14</sup>Зярдо весе аноколь, Иисус озась столь эшс, ды Сонзэ марто кемгавтово апостолтнэяк.

<sup>15</sup>Сон мерсь тенст: «Вай, Монь ульнесь покш мелем ярсамс мартонк те инечинь ярсамодонтъ пиштемадон-майсемадон икеле!

<sup>16</sup>Эдь кортан тенк: теде мейле Мон а карман ярснеме инечинь ярсамопельде се шкас, зярс а топавтови сонзэ смустезэ Пазонь Инязорксчисэнтъ».

<sup>17</sup>Иисус саизе кечентъ ды, Пазонтень сюзпрянь ёвтазь, мерсь: «Саинк сонзэ ды явшинк эсенк юткова.

<sup>18</sup>Кортан тенк: теде мейле Мон а карман симеме винаумарень винадо се шкас, зярс а сы Пазонь Инязорксчись».

<sup>19</sup>Сон сайсь кши, таго ёвтась Пазонтень сюзпря, синтризе ды явшизе кшинть апостолтнэнь ланга истямо вал марто: «Те – Монь рунгом, кона тынк кисэ максови. Истя тейнеде мелезэнк Монь ледстнемга».

<sup>20</sup>Чокшнень ярсамодонтъ мейле Иисус саизе кечентъ ды мерсь: «Те кечесь – Пазонтъ марто од вейсэнълув. Сон кемекстави Монь верьсэ, кона валови тынк кисэ.

<sup>21</sup>Ды вана ней Монь миицянтъ кедеськак Монь кедентъ марто аштить вейке столь лангсо!

<sup>22</sup>Нама, Ломантнень Цёрась туи эрямостонтъ истя, кода ёвтазель икеле, ансяк кодамо зыян пры се ломанентъ лангс, кона Сонзэ мисы!»

<sup>23</sup>Тонавтницятне кармасть кевкстнеме вейкест-вейкест, кие сынст ютксто истямось, кона тень тейсы.

#### **Кие весемеде покш?**

<sup>24</sup>Мейле тонавтницятне ютковаст спорязевсть: кие сынст эйстэ весемеде покшось.

<sup>25</sup>Сестэ Иисус кортась тенст: «Инязортнэ аштить азорокс эсест раськетнень лангсо, прявтнэ кармавтыть ловомо эсь пряст паронь теицякс.

<sup>26</sup>Тынк ютксо илязо уле истя. Мекевланк, тынк ютксо весемеде покшось улезэ прок весемеде вишкине, ды се, кона прявт, улезэ прок важо.

<sup>27</sup>Конась кавтотнень ютксто седе покшось: столь эшсэ аштицясь эли мельганзо якицясь? Нама, столь эшсэ аштицясь! Ялатеке мон тынк ютксо прок мельганк якиця!

<sup>28</sup>Ансяк тынь цидярдыде мартон ютамо весе Монь стакачитнень пачк.

<sup>29</sup>Ды секскак Мон максан тыненк Инязорксчи, кода Монь Тетям максызе сонзэ Монень.

<sup>30</sup>Сестэ тынь карматадо Монь Инязорксчисэнтъ ярсамо-симеме Монь столь эшсэ ды карматадо улеме Израилень кемгавтово буетнень лангсо прявтокс-судиякс».

### Иисусонь ёвтамозо Петрадо

<sup>31</sup>Ды Азорось мерсь: «Симон, Симон! Вант! Сатанантень максозель варчавтомс тынк: сувтнемс тынк, кода товзюронтъ.

<sup>32</sup>Ялатеке Мон ознынъ тонь кисэ, Симон, кемемат а ёмавтомантъ кисэ. Ды мейле, зярдю мекев велявтат Монень, кемекстак эсеть малавикстнэнь кемемаст».

<sup>33</sup>Петра каршонзо мерсь: «Азоро! Тонь марто мон анокан молеме натой пекстамо кудос ды куломаскак!»

<sup>34</sup>Иисус мерсь: «Кортан тетъ, Петра, течи атякшось а кенери моразевемеяк, кода тон колмоксть тейсак прят Монь асодыцякс».

<sup>35</sup>Иисус кевкстинзе тонавтницянзо: «Зярдю Мон тынк кучнидизь ярмактомо, кансттомо, карсемапельтеме, ульнекшнесь мезеньгак арасьчинк?» «Арасель», – ёвтасть сынъ тень каршо.

<sup>36</sup>«Ансяк ней, бути улить ярмаконк, саинк сынст, саеде кансткак, ды бути тынк арась торонк, миинк ланга оршамонк ды рамадо торо.

<sup>37</sup>Кортан тенк: мезе ёвтазель Монь эйтэ: “Сонзэ ловить зыянонь теицякс” – те Сёрмадовксось куроку топавтови. Ды весе Монь эйтэ ёвтазесь ней топавтови».

<sup>38</sup>«Азоро! – кортасть тонавтницятне, – вана тесэ кавто торонок». Иисус мерсь каршозост: «Саты теде!»

### **Иисус озны Ойумарькс пандонтъ лангсо**

<sup>39</sup>Иисус лиссь ошсто ды, кода свал, мольсь Ойумарькс пандонтень. Сонзэ мельга мольсть тонавтницянзояк.

<sup>40</sup>Тов сазь, Сон мерсь сыненст: «Ознодо, аволиде понго снартнемас-варчавтнемас».

<sup>41</sup>Сонсь тусь тонавтницятнеде колоньгеменьшка эскельксэнь тарка ве пелев, прась кумажа лангс ды ознось:

<sup>42</sup>«Тетяй, улиндеряй мелеть, саик те пиштемань кеченть Монь кедьстэ! Ансяк топавтовозо Тонь мелеть, аволь Монсесь».

<sup>43</sup>Те шкане валгсь менельстэ Сонензэ ангел ды кемекстась Сонзэ оймензэ.

<sup>44</sup>Седей сэредьксэнтъ пачк Иисус седеяк пек ознось. Ливезезэ, прок верень петнявкст, поцердсь мода лангс.

<sup>45</sup>Озномадо мейле Иисус стясь, сась тонавтницянзо ваксс ды муинзе сынст удыцякс, ризкссэ нусмакавтозекс.

<sup>46</sup>«Мекс тынь удотадо? Стядо ды ознодо, аволиде понго снартнемас-варчавтнемас!» – пшкадсь Сон.

### **Иисусонь кундамозо**

<sup>47</sup>Зярдо Сон теде кортась, малазост састъ ламо ломанть, конатнень ветясь Иуда, кемгавтовотнень ютксто вейкесь. Сон шаштсь Иисусонь ваксс паламонзо. Эдь сон икелев кортась мартост тешкстэнтъ: «Конань мон паласа, се Сон».

<sup>48</sup>Иисус кевкстизе: «Иуда, паламосо, натъ, мият Ломантнень Цёранть?»

<sup>49</sup>Сестэ тонавтницятне, конат ульнесть Иисусонь перька, чарькодизь, ков моли тевесь, ды мерсть Тензэ: «Азоро! Паряк, нолдамс тевс торотнень?»

<sup>50</sup>Ды вейкесь эйстэст риштize попонь прявтонь важонть ды керизе вить пилензэ.

<sup>51</sup>«Саты, лоткадо!» – пшкадсь Иисус. Ды токизе важонь пиленть, тона шумбралгадсь.

<sup>52</sup>Мейле Иисус мерсь попонь покштнэнень, Пазонь кудонь ванстыцянь ды раськенъ прявтнэнень, конат састь Сонзэ кундамо: «Мекс тынь сыде Монь саеме торо ды цётмар марто теке салыця-маштница мельга?

<sup>53</sup>Эрва чистэ Мон мартонк ульнинъ Пазонь кудосо, мекс сестэ тынь эзимизь токше? Ней вана тынк шкась, чопода виень азоркчись!»

<sup>54</sup>Сынь сьулмсизь Иисусонь ды ветизь Сонзэ попонь прявтонь кудос. Васоло ве ёно, мольсь мельгаст Петра.

<sup>55</sup>Кудонь пирявксонть куншкасо кирвазтсть толбандя. Пурнавозтне ойсесть сонзэ перька. Петраяк озась сынст юткс.

<sup>56</sup>Толонь валдосонть неize Петранъ ве важо ава. Сон пштистэ варштась лангозонзо ды мерсь: «Те ломанеськак ульнесь Сонзэ марто».

<sup>57</sup>Петра каize прянзо Сонзэ эйстэ ды мерсь аванть: «Арась! А содаса мон Сонзэ!»

<sup>58</sup>Аламо шканъ ютазь лия ломанъ неize Петранъ ды мерсь: «Тонгак сынст ютксто». «Арась, ялгай!» – мерсь Петра.

<sup>59</sup>Часошканъ ютазь таго кие-бути кармась кортамо: «Алкукс, те ломанеськак ульнесь Сонзэ марто, эдь сон Галилеянь эриця».

<sup>60</sup>Петра тень каршо мерсь: «А содан, ялгай, мезде тон кортат!» Петра эзизе прядо кортамонзояк, кода моразевсь атякшось.

<sup>61</sup>Сестэ Азорось велявтсь Петрань ёнов ды варштась лангозонзо. Петрань мельс ледсть Азоронь валтнэ: «Атякшось а кенери моразевемеяк, кода тон колмоксть прят каясак Монь эйтэ».

<sup>62</sup>Петра лиссь ушов ды кармась риксэ авардеме.

<sup>63</sup>Иисусонь ванстыцятне кармасть пеедькшнеме Сонзэ лангсо ды чавомонзо.

<sup>64</sup>Сынь сюлмизь Иисусонь сельмензэ, чавсть Сонзэ чама ланга ды вешть пельдензэ: «Икелепелев содыця! Ёвтык, кие Тонь риштинзеть?»

<sup>65</sup>Ды ёртнесть лангозонзо ламо лия покордамот.

### Иисус Инепромксонтъ икеле

<sup>66</sup>Валске марто, чинть лисемстэ, раськень прывтнэ, попонь покштнэ ды Койс тонавтыцятне пурнавсть Инепромксос. Сынст икелев ветизь Иисусонь.

<sup>67</sup>«Улиндерят Тон Пазонь кучовт Идицясь, ёвтак теде миненек», – вешть пельдензэ. Иисус каршост мерсь: «Бути Мон ёвтан тыненк, тынь а кемсамизь.

<sup>68</sup>Бути Мон карман кевкстнеменк, тынь а ёвтатадо каршо вал Монень ды а нолдасамизь.

<sup>69</sup>Течинь чистэ саезь Ломантнень Цёрась карми озадо аштеме Весемькирди Пазонтъ вить ёно».

<sup>70</sup>Сестэ сынь весе рангстазевсть: «Тон – Пазонь Цёра?!» Сон каршост мерсь: «Те тынь истя кортатадо».

<sup>71</sup>Сестэ сынь кортнесть: «Мезекс миненек лият та-кодат кемекстамот? Минь эсь пилесэнек маринек тень Сонзэ кургсто».

## Луки 23

### Иисус Пилатонь икеле

- <sup>1</sup>Сестэ весе сынст промксось стясь ды ветизе Иисусонь Пилатонь икелев.
- <sup>2</sup>Тосо кармасть сынь чумондомо Сонзэ: «Минь чарькодинек: те ломанесь аравты минек раськенть а виде ки лангс, кармавты а пандомс каявкс Римень кесарентень ды яволявты Эсь прянзо Пазонь кучовт Идицякс, лиякс меремс, Инязорокс».
- <sup>3</sup>«Тон – еврееень Инязорось?» – кевкстизе Сонзэ Пилат. Иисус каршонзо мерсь: «Те тон истя кортат».
- <sup>4</sup>Сестэ Пилат мерсь попонь покштнэнень ды весе ломантненень: «Мон кодамояк чумо те ломаньстэнтъ а неян».
- <sup>5</sup>Сынь ялатеке аштеть эсест валост лангсо: «Эсензэ тонавтомасонтъ Сон азаргавты ломантненень Иудеянь келес. Ушодсь Сон Галилеясто ды ней вана сась тейгак».

### Иисус Иродонь икеле

- <sup>6</sup>Галилеядо марязь, Пилат кевкстсь: «Арази Сон Галилеянь эриця?»
- <sup>7</sup>Зярдэ Пилат кармасть содамо: Иисус се масторстонть, кона максозь Иродонь кедь алов, кучизе Иисусонь Ироднэнь. Неть читнестэ Иродгак ульнесь Ерусалимсэ.
- <sup>8</sup>Иисусонь неезь, Ирод пек кецязевсь: сон умок неиксэлизе Иисусонь. Сон ламо марсесь Эйстэнзэ ды пек учось неемс Сонзэ пельде кодамояк тамаша.
- <sup>9</sup>Ирод макснесь Иисуснэнь ламо кевкстемат, ансяк Сон каршонзо мезеяк эзь ёвта.
- <sup>10</sup>Попонь покштнэ ды Койс тонавтыцятне, конат ульнестъ тосо, кежейстэ кармасть Иисусонь чумондомо.

<sup>11</sup>Ирод эсензэ ушмантнэнь марто покорясь Иисусонь ды нарьгась Сонзэ лангсо. Сон оршавтсь Иисусонь лангс инязоронь оршамот ды кучизе Сонзэ мекев Пилатнэнь.

<sup>12</sup>Ирод ды Пилат те шкас кирдсть кеж вейкест-вейкест лангс, те чистэнтъ саезь жо теевсть оякс.

### Иисуснэнь – кулома

<sup>13</sup>Сестэ Пилат пурнынзе попонь покштнэнь, прявтнэнь ды весе ломантнэнь.

<sup>14</sup>Сон мерсь тенст: «Тынь ветинк монень те ломанентъ, кона, валонк коряс, аравты раськентъ авиде ки лангс. Вана тынк сельме икеле мон кевкстния ды эзия муе те ломанентъ чумонзо мейсэяк, мейсэ тынь Сонзэ чумондтадо.

<sup>15</sup>Иродгак эзь муе кодамояк чумо, эдь мон кучокшныя Сонзэ тензэ. Кода нетядо, Сон эзь тее мезеяк истямо, конань кисэ Сон судямаль куломас.

<sup>16</sup>Секс мон кармаван чавомс Сонзэ локшосо, мейле – нолдаса».

<sup>17</sup>Раськентъ мелензэ коряс еврееень эрва Инечинтень Пилатнэнь эривсь нолдамс пекстатнэнь эйстэ вейкенъ.

<sup>18</sup>Ансяк весе пуромозтне ве вайгельсэ кармасть рангомо: «Кулома Сонензэ! Нолдык миненек Вараввань!»

<sup>19</sup>Варавва пекстазель ошсо ломантнэнь кепедевтемаст кисэ ды ломанень маштомань кисэ.

<sup>20</sup>Пилат арсесь олякстомтомс Иисусонь, секс таго кортазевсь пуромозтнэнь марто.

<sup>21</sup>Ансяк сынъ рангсть каршонзо: «Крёст лангс, крёст лангс вачкодик Сонзэ!»



<sup>22</sup>Колмоцеде пшкадсь тенст Пилат: «Эно кодамо зыянонтъ Сон тейсь? Мон а неян Сонзэ эйстэ истямо чумо, конань кисэ саволь куловтомс. Секс мон кармавтан чавомс Сонзэ локшосо, мейле – нолдаса».

<sup>23</sup>Ялатеке сынъ верьга вайгельть пижнестъ ды вешсть вачкодемс Иисусонь крёст лангс. Сынст ды попонь покштнэнь сеерематне okayники изнизь Пилатонь мелентъ.

<sup>24</sup>Ды Пилат теизе сень, мезентъ вешсть.

<sup>25</sup>Сон олякстомтызе сыненст сень, кона пекстазель масторонь прявтнэнь каршо кепедевемантъ кисэ ды ломанень маштомантъ кисэ – сень, конань кисэ вешсть. Иисусонь марто Пилат тейсь истя, кода вешсть ломантне.

### Крёст лангс вачкодема

<sup>26</sup>Зярдю Иисусонь ветясть крёст лангс вачкодема таркантень, ушмантнэ лоткавтызь кодамо-бути Симононь, киринеянь ломанентъ, кона те шкане сыль паксясто, ды кармавтызь сонзэ Иисус мельга крёстонь кандомо.

<sup>27</sup>Иисусонь мельга мольсть ламо ломантъ, конатнень ютксо ульнестъ аваткак. Сынъ авардсть ды лайшестъ Сонзэ кисэ.

<sup>28</sup>Сынст пелев велявтозь, Иисус мерсь: «Ерусалимень ават! Илядо аварде Монь кисэ! Авардеде эсенк ды эйкакшонк кисэ!»

<sup>29</sup>Эдь сы истямо шка, зярдю кармить кортамо: “Уцяскавт а чачтницятне, эйкакштомотне ды зярдояк потесэ а андыцятне!”

<sup>30</sup>Сестэ ломантне кармить вешеме пандтнэнь: “Прадо минек лангс!” – ды шушмотнень: “Вельтямизь минек!”

<sup>31</sup>Бути пиже чувтонть марто теить истя беряньстэ, сестэ седеяк берянь ули коське чувтонть марто!»

<sup>32</sup>Иисус марто вейсэ ветясть крёст лангс эскесэ вачкодемс зыянонь теиця кавто ломантькак.

<sup>33</sup>Зярдс сынь пачкодсть се тарканть, конанень мерильть Пряловажа, тосо вачкодизь Иисусонь крёст лангс. Зыянонь теицятненьгак вачкодизь: вейкенть Иисусонь эйстэ вить пелев, омбоценть – керш пелев.

<sup>34</sup>Иисус мерсь: «Тетяй! Нолдыть пежетест: эдь сынь а содыть, мезе теить». Ушмантнэ, жеребейсэ каязь, явшизь эсь ютковаст Иисусонь оршамонзо.

<sup>35</sup>Ломантне аштеть ды вансть. Сынст марто прывтнэяк вансть ды згилясть Сонзэ лангсо истямо валсо: «Те ломанесь идесь лиятнень! Кадык ней идесы Эсь прянзо, бути Сон Пазонь кучовт Идиця, Пазонь кочкавт!»

<sup>36</sup>Ушмантнэяк нарьгасть Иисусонь лангсо: сынь шаштнесть малазонзо, макнесть Тензэ чапамо вина

<sup>37</sup>ды кортасть: «Бути Тон евреень Инязоро, идик ней Эсь прят!»

<sup>38</sup>Иисусонь велькссэ сёрмадозель грекень, римень ды евреень кельсэ: «Те евреень Инязоро».

<sup>39</sup>Вейкесь эскесэ вачкодезь зыянонь теицятнестэ згилясь Иисусонь лангсо: «Бути Тон Пазонь кучовт Идицят, сестэ идик Эсь прят ды минеккак идимизь!»

<sup>40</sup>Омбоцесь кардась васенценть: «Нать тон Паздо а пелят? Тон тонськак истя жо крёст лангсат!»

<sup>41</sup>Минь судязтяно видестэ, секс истя пандтано эсь тевенек кисэ. А те ломанесь мезе теись беряненть?»

<sup>42</sup>Ды сон пшкадсь Иисуснэнь: «Азоро, монь ледстямак, зярдс сат Инязорксчизэть».

<sup>43</sup>Иисус тень каршо мерсь: «Алкукс кортан тетъ: те чистэнтъ саезь кармат улеме Монъ марто райсэ».

### Иисусонь куломазо

<sup>44-45</sup>Ульнесь чинь куншка, зярдо апак учо чись кекшсь. Весе масторось копачавсь чоподасо, ды истя ульнесь колмо часонь перть. Пазонь кудосо коцтонь пирявксось сезевсь куншкава кавтов,

<sup>46</sup>ды Иисус серьгедсь виев вайгельсэ: «Тетяй! Тонь кедьс максса Мон Эсень оймем!» Ды неть валтнэнь марто лиссь Иисусонь оймезэ.

<sup>47</sup>Зярдо сядонь прявтось тень неIZE, сон ёвтась шнамо вал Пазонтень ды мерсь: «Алкукскак Те Ломанесь ульнесь а чумо!»

<sup>48</sup>Ломантне, конат тов пурнавкшность ваномо, весе тень неемадо мейле мелявтозь рукштяестъ кедьсэст, сралестъ эсест кудова.

<sup>49</sup>Сетне, конат содылизь Иисусонь, аштестъ ве пеле ды вансть весементъ лангс. Сынст ютксо ульнестъ аватнеяк, конат састъ мартонзо Галилеясто.

### Иисусонь калмамозо

<sup>50</sup>Инепромксонь важодицятнень ютксо ульнесь Иосиф лемсэ ломань, кона ульнесь виде ды чевте седей.

<sup>51</sup>Сон эзь шна сень, мезе арсекшнесь ды теекшнесь Инепромксось. Иосиф чачозель еврееень Ариматея ошсо ды учось Пазонь Инязорксчинть.

<sup>52</sup>Иосиф сась Пилатнэнь ды вешизе Иисусонь уловонть.

<sup>53</sup>Сон валгстызе уловонть крётстонть, тапардызе лияназонь коцтсо ды путызе пандс керязь калмос, козо те шкас киньгак эзть калмсе.

<sup>54</sup>Те ульнесь пеця, оймсема чинь анокстамо чи. Оймсема чись эль-эль устави.

<sup>55</sup>Галилеясто Иисус марто сыця аватне мольсть Иосиф мельга ды весементь неизь: калмонтъ ды кода калмизь Сонзэ уловонтъ.

<sup>56</sup>Кудов сазь, сынъ анокстастъ тантейстэ качадыця ойтъ ды калмамо коень лия ваднемат. Оймсема чистэ аватне оймсестъ, кода кармавтсь Коесь.

## Луки 24

### Вельмема

<sup>1</sup>Недлечистэнтъ, чи лисемстэ, аватне састъ калмонтень эсест анокставт тантейстэ качадыця ойтнень марто. Зярыя лияткак састъ мартоост.

<sup>2</sup>Вана сынъ неить: калмонь пекстыця кевесь сявордозь ве ёнов.

<sup>3</sup>Сынъ совасть калмонтень, ансяк Иисусонь уловонтъ эзизь муе.

<sup>4</sup>Аватне аштестъ талакадозь, ды апак учо сынст икелев лиссть кавто цёрат, оршазь сияждыця оршамосо.

<sup>5</sup>Тандадомадонть аватне нолдызь вановтоост модантень, цёратне мерсть тенст: «Мекс тынь вешнетядо Эрицянтъ кулозтнень ютксто?

<sup>6</sup>Сон тесэ арась. Сон вельмесъ! Мельс ледстинк сень, мезде Сон кортнесъ тенк Галилеясо улемстэ:

<sup>7</sup>“Истя эрявсь теевемс: Ломантнень Цёрась максови пежетев ломантнень кедьс, вачкодеви крёст лангс ды колмоце чистэ кулозьстэ вельми”».

<sup>8</sup>Сестэ Иисусонь неть валтнэ ледсть аватнень мельс.

<sup>9</sup>Калмонтъ лангсто самодо мейле сынъ ёвтнизь тень кевейкее апостолтнэненъ ды весе лия тонавтницятнэненъгак.

<sup>10</sup>Нетъ аватне ульнестъ Магдалань Мария, Иоанна, Мария – Яковонь авазо. Лия аватнеяк, конат ульнестъ сынст марто, ёвтнестъ апостолтнэненъ текень.

<sup>11</sup>Ялатеке апостолтнэ сыненст эзь кеме. Сын арсесть: неть ёвтнематне – чаво валт.

<sup>12</sup>Ансяк Петра сеске стясь ды чиезь тусь калмонтень. Сон комась ды неинзе тосто ансяк тапарямо коцтнэнь. Сон велявть мекев ды пек дивсесь весе теевезентень.

### Эммаусов молемстэ

<sup>13</sup>Секе чистэнтъ Иисусонь кавто тонавтницянзо тустъ Эммаус велинес, кона ульнесь Ерусалимде кемгавтовошка вайгельбень тарка.

<sup>14</sup>Молемстэ сын кортнестъ эсь ютковаст меельце чинь тевтнеде.

<sup>15</sup>Зярдэ сын истя кортнестъ ды пелькстнестъ эсь ютковаст, сасынзе сынст Сонсь Иисус ды мольсь мартост вейсэ.

<sup>16</sup>Ансяк тонавтницятне Сонзэ эзизь сода: те шкане сынст сельмест прок сокорольть.

<sup>17</sup>Иисус кевкстинзе тонавтницянзо: «Мезде тынь ютамсто кортатадо эсь юткованк ды мекс тынь истят нусманят?»

<sup>18</sup>Вейкесь эйтэст, конань лемезэ Клеопа, мерсь каршонзо: «Паряк, Тон ансяк Ерусалимев сыцятнестэ а содат, мезе тосо теевсь неть читнестэ?»

<sup>19</sup>Иисус кевкстинзе сынст: «Мезе эно?» Тонавтницятне каршонзо ёвтасть: «Се, мезе лиссь Назаретэнь Иисус марто, кона ульнесь пазмарицякс, виевель тевсэ ды валсо Пазонтъ икеле ды весе раськентъ икеле.

<sup>20</sup>Ансяк минек попонь покштнэ ды прявтнэ максызь Сонзэ куломас, вачкодизь крёст лангс.

<sup>21</sup>Минь кемезевкшнинек: Сон – Се, кона олякстомтсы Израиленть. Теке марто течи вана колмоце чи, зярдэ те весе теевсь,

<sup>22</sup>ды ней вана конат-конат минсенек аватнестэяк талакавтымизь. Сын чи лисемстэ якасть калмонтень,

<sup>23</sup>ансяк эзизь муе Сонзэ уловонть. Зярдю састь тосто, ёвтнесть, келя, сыненст састь ангелт, конат мерсть: Иисус вельмесь.

<sup>24</sup>Мейле мольсть кой-конат минек ялгатнестэ калмонтень ды неизь весементь истя, кода кортасть аватне, ансяк Сонзэ Эсензэ эзизь нее».

<sup>25</sup>Сестэ Иисус мерсь тенст: «Вай, кодат тынь ачарькодицят! Нать тынк кельме седейтненень истя стака кемемс весементень, мезде кортасть кезэрень пазмарицятне!

<sup>26</sup>Арази а истя Пазонь кучовт Идицянть эрявсь пиштемс ды истя Эсензэ иневалдонть совамс?»

<sup>27</sup>Ды Сон кармасть тенст ёвтнеме, кода весе пазмарицятне, Моисейстэ саезь, кортасть Эйстэнзэ весе Сёрмадовкстнэсэ.

<sup>28</sup>Истя сынь пачкодсть се велинентень, ков мольсть. Иисус невтсь пря седе тов молицякс.

<sup>29</sup>Тонавтницятне лоткавтызь энялдозь: «Кадовт мартонок, эдь чизэ велявтсь чоподема ёнов». Сестэ Сон совась кудос ды кадовсь мартоост.

<sup>30</sup>Сынст марто чокшнень ярсамсто Сон сайсь кши, Пазнэнь сукпрянь ёвтазь, синдизе ды максызе тенст.

<sup>31</sup>Те шкастонть сынст сельмест прок панжовсть – сынь содызь Сонзэ, ансяк Иисус сынст икельде сеске ёматотсь.

<sup>32</sup>Сестэ тонавтницятне кармасть кевкстнеме вейкест-вейкест эйсэ: «Арази эзь либордо минек седеенек, зярдю киява ютамсто Сон кортнесь минек марто, зярдю панжсь миненек Сёрмадовкстнэнь смустень?!»

<sup>33</sup>Сынь сеске стясть ды велявтсть Ерусалимев, муизь кевейкее апостолтнэнь, конат пуромсть вейсэ лия тонавтницятнень марто.

<sup>34</sup>Пуромозтне кармасть ёвтнеме сыцятненень: «Азорось алкуксккак вельмесь! Сон невтисе прянзо Симоннэнь!»

<sup>35</sup>Мейле кавтотне ёвтнизь, мезе мартост лиссь ки лангсо ды кода сынъ содызь Иисусонь, зярдо Сон синтресь кшинть.

### **Иисус невтизе прянзо тонавтницятненень**

<sup>36</sup>Сынъ эзизь прядо кортнемаст, зярдо Иисус Сонсь апак учо лиссь икелест ды мерсь: «Седейоймамо тенк!»

<sup>37</sup>Тонавтницятне талакадсть ды чувтомсть. Сынъ арсесть: те чопача.

<sup>38</sup>Иисус поладызе кортамонзо: «Мекс тандадыде? Мекс тынк седеенк пешкедсть кавтолдомасо?»

<sup>39</sup>Варштадо Монь кедень ды Монь пильгень лангс: те – Мон Монсь. Токшимизь Монь ды несынк, эдь чопачанть арасть сывелезэ ды ловажанзо. Кода нетядо, Монь улить».

<sup>40</sup>Нетъ валтнэнь ёвтамсто, Сон невтинзе тенст кедензэ ды пильгензэ.

<sup>41</sup>Тонавтницятне кеняркстонть кодаяк эзь кемеве ды дивсесть. Сестэ Сон кевкстинзе сынст: «Ули тынк тесэ кодамояк ярсамопель?»

<sup>42</sup>Сынъ кандсть Сонензэ рестазь калонь сускомо ды керяз медь.

<sup>43</sup>Сон саизе ды сэвизе икелест.

<sup>44</sup>Мейле Иисус мерсь тенст: «Вана кодамо Монь валтнэнь смустесь, мезде Мон кортнинь тынк марто, зярдо ульнинь ютксонк. Весементень, мезе сёрмадозель Монь эйтэ Моисеень Койсэнтъ, пазмарицянь книгатнесэ ды Псалтирьсэ, топавтовомаль».

<sup>45</sup>Мейле Иисус лездась тенст чарькодемс Сёрмадовкстнэнь смустенть.

<sup>46</sup>Сон кортась тенст: «Истя сёрмадозь: Пазонь кучовт Идицянтень эрявсь пиштемс ды вельмемс кулозьстэ колмоце чистэ.

<sup>47</sup>Ды Сонзэ лементь пельде весе раськетнень эряви тердемс Пазонтень велявтомас – пежетест нолдамга. Ушододо Ерусалимстэ!

<sup>48</sup>Тынь весемень тень неицят-содыцят.

<sup>49</sup>Мон нейке кучан тенк сень, мезе алтась Монь Тетям. Тынь кадово до Ерусалим ошс, зярс а валги лангозонк Верепазонь вий».

<sup>50</sup>Мейле Иисус ливтинзе сынст ошто ды ютась мартост Бетания веленть видьс, кепединзе Эсензэ кедензэ ды чанстинзе-баславинзе сынст.

<sup>51</sup>Ды зярдю Сон чанстясь эйсэст, Сонсь кармась явовомо эйстэст ды кепедеведе менель лангов.

<sup>52</sup>Тонавтницятне модас сюконясть Сонензэ ды мурдасть покш кеняркс марто Ерусалимев.

<sup>53</sup>Сынь свал ульнесть Пазонь кудосо ды شناсть-чанстясть Пазонть. Аминь.



## Иоаннонь Коряс Евангелия

### Иоанна 1

<sup>1</sup>Васняк ульнесь Вал, ды Валось ульнесь Пазонтъ марто, ды Валось ульнесь Паз.

<sup>2</sup>Сон ульнесь васняк Пазонтъ марто.

<sup>3</sup>Весе теевсь Сонзэ вельде, Сонтемензэ эзь тееве мезеяк, мезесь ульнесь теезь.

<sup>4</sup>Сонзэ эйсэ ульнесь эрямо, ды эрямось ульнесь ломантненень валдокс.

<sup>5</sup>Валдось чоподасонтъ вандолды, ды чоподась эзизе вельтя сонзэ.

<sup>6</sup>Ульнесь ломань, Пазонтъ кучовтозо, лемезэ Иоанн.

<sup>7</sup>Сон сась яволявтомо, Валдодонтъ ёвтнеме. Кадык весе кармить кемеме Валдонть сонзэ вельде.

<sup>8</sup>Сонсь эзь ульне валдокс, ансяк кучозель се Валдодонтъ яволявтнеме.

<sup>9</sup> Ульнесь алкуксонь Валдо, кона валдомгавты эрва ломанень, кона сы масторлангов.

<sup>10</sup>Сон ульнесь масторлангсо, кона теевськак Сонзэ вельде, ансяк масторлангонь ломантне Сонзэ эзизь сода.

<sup>11</sup>Сон сась Эсь ломаненстэнь, ансяк Эсензэтне Сонзэ эзизь васто седейсэст.

<sup>12</sup>Сетненень, конат кармасть седейсэст вастомонзо, Сонзэ лемс кемицятненень, Сон макссь оля арамс Пазонь эйкакшокс,

<sup>13</sup>эйкакшокс, конат чачсть Пазонтъ эйстэ, аволь ломань раськестэ, аволь ломань вийстэ, аволь мирдень мелень коряс.

<sup>14</sup>Валось теевсь ломанекс, эрясь ютксонок, чанстте ды видечиде пешксе. Минь неинек Сонзэ инексчинзэ, се инексчинть, кона максозь Тензэ Тетянтъ пельде, кода вейкине Цёранстэнь.

<sup>15</sup>Иоанн яволятсь Сонзэ эйтэ истя сеерезь: «Те Се, конадо мон кортынь: мельган сыцясь мондень ине, эдь Сон ульнесь мондень икеле».

<sup>16</sup> Сонзэ чанстень пешксечинть эйтэ весенень миненек максозь чанстямо лангс таго чанстямо.

<sup>17</sup>Коезь максозель Моисей вельде, чанстесь ды видечись састь Иисус Христос вельде.

<sup>18</sup>Пазонтэ эзизе нее кияк зярдояк. Сонзэ панжизе вейкине Цёразо, кона свал эри Тетянтэ марто.

#### **Нававтыця-Лемдиця Иоаннонь яволявтомазо**

<sup>19</sup>Вана кода ёвтась-яволятсь Иоанн, зярдэ еврееень прывтнэ кучсть Ерусалимстэ попт ды левинсетнень кевкстемензэ: «Кият тон?»

<sup>20</sup>Сон яволятсь ды апак сёпо ёвтась: «Мон аволь Пазонь кучовт Идиця».

<sup>21</sup>Кевкстизь сонзэ: «Кият эно? Тон Илия?» Сон мерсь: «Аволь». «Се пазмарицясь?» Сон каршост мерсь: «Аволь».

<sup>22</sup>Кевкстизь таго сонзэ: «Кият эно? Мезе кучицянок туртов ёвтатано, мезе тон ёвтат Эсеть эйтэ?»

<sup>23</sup>Сон мерсь: «Мон “чаво модасо сеерицянь вайгелян: виделгавтынк Азоронтэ туртов кинть”, кода мерсь Исаяя пазмарицясь».

<sup>24</sup>Кучозтне ульнесть фарисейтнестэ.

<sup>25</sup>Сынь кевкстизь сонзэ: «Мейс эно навават-лемдят, бути тон аволь Пазонь кучовт Идицят, аволь Илияткак, аволь се пазмарицяськак?»

<sup>26</sup>Иоанн каршост мерсь: «Мон нававан ведьсэ, ансяк тынк ютксо ашти Се, конань тынь а содасынк.

<sup>27</sup>Сон мельган сыцясь, кона ульнесь мондень икелеяк, ды мон а маштован мик Сонзэ карсемастонзо кшна ведьметнень юкстицяккак».

<sup>28</sup>Те тевесь ульнесь Вифаварасо, Иордан леентэ тона чиресэ, косо нававтсь Иоанн.

### Пазонь Вирезэсь

<sup>29</sup>Омбоце чистэнтъ неIZE Иоанн сонзэ пелев молиця Иисусонь ды мерсь: «Ванодоя, Те Пазонь Вирезэсь, кона допрок сайсы масторлангонь пежетентъ!

<sup>30</sup>Сон Се, конадо мон меринь: “Мельган сы цёра, кона мондень ине, эдь Сон ульнесь мондень икеле”.

<sup>31</sup>Мон а содылия Сонзэ, ансяк Израилентень Сонзэ невтемань-содавтомань кисэ мон сын нававтомо ведьсэ».

<sup>32</sup>Ды Иоанн кемекстынзе эсь валонзо, истя кортазь: «Мон неия Оймеялтонть, зярдон Сон гулька ладсон валгсь менельстэ ды аштесь велькссэнзэ;

<sup>33</sup>мон а содылия Сонзэ. Ансяк кие монь кучимим ведьсэ наавтомо, мерсь тень: “Кинь лангс несак Оймеялтонть валгоманзон ды велькссэнзэ аштеманзон, Се кармияк наавтомо Иневанькс Оймеялтсон”.

<sup>34</sup>Мон тень неия ды, кода неицязон, яволяван: Те – Пазонть Цёразон».

### Иисусонь васенце тонавтницяно

<sup>35</sup>Омбоце чистэ Иоанн кавтон тонавтницяно марто ульнесь тосон.

<sup>36</sup>Иоанн неIZE вакска ютыця Иисусонь ды мерсь: «Ванодоя, Те Пазонь Вирезэсь».

<sup>37</sup>Нетъ валтнэнь марязь, кавонест тонавтницянтне тустъ Иисус мельга.

<sup>38</sup>Иисус велявтсь ды неинзе сынст мельганзон ютамодо, кевкстинзе: «Мезе тенк эряви?» Сынъ каршошонзон мерсть: «Равви, – лиякс меремс, тонавтыця, – косо Тон эрят?»

<sup>39</sup>Сон кортась тенст: «Моледе мельган ды несынк». Шказон ульнесь чи куншкань нилешка част. Сынъ мольсть ды неизь, косо Сон эри, ды ульнесь кедьсэнзэ чинь-чоп.

<sup>40</sup>Вейкесь кавтотнень эйстэ, конат Иоаннонь пельде марязь Иисустон ды тустъ Сонзэ мельга, ульнесь Андрей, Симон Петрань ялаксозон.

<sup>41</sup>Сон сеске вешнизе Симон лелянзо ды мерсь тензэ: «Минь муинек Мессиянтъ», лиякс, Христосонтъ.

<sup>42</sup>Андрей ветизе Симононь Иисуснэнь. Иисус, лангозонзо варштазь, мерсь: «Тон Симонат, Ионань цёразо; тонеть кармить мереме Кефа», лиякс “кев”, Петра.

#### **Иисус тердинзе Филипень ды Натанаилэнь**

<sup>43</sup>Омбоце чистэнтъ Иисус сайсь мель модемс Галилеяв. Сон вастызе Филипень ды мерсь тензэ: «Мольть мельган».

<sup>44</sup>Филип ульнесь Бетсаидасто, Андреень ды Петрань марто ве ошсто.

<sup>45</sup>Филип муизе Натанаилэнь ды ёвтась тензэ: «Минь муинек Сень, конадо Койсэнтъ сёрмадсь Моисей ды конадо сёрмадсть пазмарицятнеяк, – Иисусонь, Иосифень цёранзо, кона Назаретстэ».

<sup>46</sup>Натанаил мерсь тензэ: «Арази эрсекшни Назаретстэ мезеяк паро?» Филип мери тензэ: «Азё ды ваньк».

<sup>47</sup>Иисус неIZE малазонзо сыця Натанаилэнь ды мерсь сонзэ эйстэ: «Вана алкуксонь израилень ломань, конань эйсэ арась манчема».

<sup>48</sup>Натанаил мерсь Тензэ: «Косто Тон монь содасамак?» Иисус каршошонзо мерсь: «Филипень тердемадо икеле, зярдэ ульнить инжир чувто ало, Мон неитинь».

<sup>49</sup>Сестэ Натанаил мерсь Тензэ: «Равви! Тон – Пазонь Цёрат, Тон – Израилень Инязорат».

<sup>50</sup>Иисус ёвтась сонензэ тень каршо: «Тон кемат сень кувалт, мекс Мон меринь тетъ: “Мон неитинь инжир чувто ало”. Седе ламо кармат нееме».

<sup>51</sup>Ды поладынзе валонзо: «Алкукс, алкукс кортан тенк: те чистэнтъ саезь тынь карматадо нееме панжовозь менелентъ ды Пазонь ангелтнэнь, конатне кармить кузнеме-валгонеме Ломантнень Цёрантень».

## Иоанна 2

### Канасо урвакстомань ютавтома

- <sup>1</sup>Колмоце чистэнтъ Галилеянь Кана ошсо тешкстасть урвакстомачи. Иисусонь авазояк тосоль.
- <sup>2</sup>Тов тердезель Иисускак тонавтницянзо марто.
- <sup>3</sup>Лиссь истя: винась прядовсь каванямо шкастонть. Сестэ Иисусонь авазо мерсь Тензэ: «Сынст винаст арась».
- <sup>4</sup>Иисус каршонзо ёвтась: «Вай, авай! Мекс Монень мелявтомс теде? Монь шкам зярс эзь са».
- <sup>5</sup>Авазо мерсь важотненень: «Тееде сень, мезе Сон мери тенк».
- <sup>6</sup>Тосо ульнестъ веднень кевень кото кедьгеть, конат эрявильть еврееень ванськавтома коень-кирдань коряс, эрвась кавто-колмо онксонь кельгемашкаль.
- <sup>7</sup>Иисус мерсь важотненень: «Пештинк кедьгетнень ведте». Сынъ пештизь пряс.
- <sup>8</sup>Сестэ Сон мерсь тенст: «Ней амольдядо тосто ды кандодо каванямонь ветицанть». Сынъ истя тейстькак.
- <sup>9</sup>Ветицясь варчизе ведентъ, кона теевсь винакс. Сон эзь сода, косто те винась, содасть ансяк важотне, ведень амолицятне. Сестэ ветицясь тердизе урвакстыця цёранть
- <sup>10</sup>ды мерсь тензэ: «Эрва ломанесь васняк максокшны седе паро вина, зярдо жо инжетне симевить, сестэ седе беряненъ. Тон вана седе паро винанть ванстык те шкас».
- <sup>11</sup>Истя Иисус Галилеянь Кана ошсо теизе Эсензэ васенце тамашанзо-диванзо. Тень вельде Сон невтизе Эсь инекчинзэ, ды тонавтницянзо кармасть кемеме Тензэ.

<sup>12</sup>Тезде мейле Иисус тусь аванзо, братонзо ды тонавтницянзо марто Капернаум ошов. Тосо сынъ эрясть зярыя чить.

### **Пазонь кудонь ванськавтома**

<sup>13</sup>Малавгалесь евреень Инечись, секс Иисус сась Ерусалимев.

<sup>14</sup>Сон неи: Пазонь кудонь пирявксонть потсо микшнить букат, реветь ды гулькат, озадо аштить ярмаконь полавтницят.

<sup>15</sup>Сон тейсь пикстэ локшо ды весень панинзе Пазонь кудонь пирявксонть потсто: реветненьгак, букатненьгак, ярмаконь полавтницятнень ярмакост сравтнинзе, столест сявордтнинзе.

<sup>16</sup>Гулькань микшницятненень мерсь: «Саинк весе тень тестэ! Тетянь кудонзо илядо тейне микшнема-рамсема кудокс».

<sup>17</sup>Се шкане тонавтницянзо ледстизь, мезе сёрмадозель Пазонь пельде Сёрмадовкссонть: «Пиёмась-паломась Тонь кудот кисэ сэви Эйсэнь».

<sup>18</sup>Сестэ евреень прявтнэ кевкстизь Сонзэ: «Кие Теть максызе азорксчинть истя тейнемс? Кодамо тамашасо невтсак тень миненек?»

<sup>19</sup>Иисус тень каршо мерсь тенст: «Яжинк те Пазонь кудонть, Мон колмо чис одов сонзэ стявтса».

<sup>20</sup>Еврейтне тень каршо мерсть: «Те Пазонь кудось теезель ниленьгемень кото иень перть, а вана Тон колмо чис арсят сонзэ стявтомс?»

<sup>21</sup>Ансяк Пазонь кудось, конадо кортась Иисус, ульнесь Сонзэ рунгозо.

<sup>22</sup>Зярдо Сон вельмесь кулозьстэ, тонавтницянзо мельс ледсь те кортамось, ды сынъ кармасть кемеме Сёрмадовксонтень ды сенень, мезде кортась Иисус.

### **Иисус содасынзе весень**

<sup>23</sup>Зярдо Сон ульнесь Ерусалимсэ Инечинь ютавтомсто, ламот кармасть кемеме Тензэ, секс мекс сынъ неизь Сонзэ теевть тамашатнень.

<sup>24</sup>Ансяк Сонсь Иисус Эсь прынзо ломантненень эзизе панжо, эдь Сон сынст содылинзе весень.

<sup>25</sup>Сонензэ эзь эрявкшно ёвтниця седе, мезе ули ломаненть эйсэ, эдь Сонсь содась, мезе ули эрванть седейсэ.

## Иоанна 3

### Иисус ды Никодим

<sup>1</sup>Фарисейтнень ютксо ульнесь вейке ломань, лемезэль Никодим, евреень прявтнэстэ вейкесь.

<sup>2</sup>Сон сась Иисуснэнь веть ды мерсь тензэ: «Равви! Минь содатано, Тон тонавтыця, кона сась Пазонть пельде; истят тамашат, кодат Тон тейнят, киненьгак а теевить, а улиндеряй мартонзо Пазось».

<sup>3</sup>Иисус тень каршо мерсь тензэ: «Алкукс, алкукс кортан теть: кие а чачи верде, сенень а нееви Пазонь Инязорксчись».

<sup>4</sup>Никодим мерсь Тензэ: «Кода сыре ломанесь одов чачови? Арази сон омбоцеде совави аванзо потс ды чачтови?»

<sup>5</sup>Иисус каршонзо ёвтась: «Алкукс, алкукс кортан теть: кие а чачи веденть ды Оймеялтонтъ пельде, се а совави Пазонь Инязорксчинтень.

<sup>6</sup>Ломаньстэ чачозесь – те ломань, Оймеялтсто чачозесь – те оймеялт.

<sup>7</sup>Иля дивсе сенень, мезе Мон ёвтынть теть: верде тенк чачома.

<sup>8</sup>Вармась пуви, кува мелезэ, увтонзояк марясак, ансяк а содат, косто сы ды ков туи: истя жо эрси эрванть марто, кие чачозь Оймеялтонтъ эйстэ».

<sup>9</sup>Никодим кевкстизе Сонзэ: «Кода истя те эрси?»

<sup>10</sup>Иисус тень каршо ёвтась тензэ: «Тон Израилень тонавтыцясь, ды тень вана а чарькодъсак?»

<sup>11</sup>Алкукс, алкукс кортан теть: минь кортатано седе, мезде содатано, ёвтнетянояк седе, мезе неинек; ансяк тынь минек ёвтнеманок а сайтядо мельс.

<sup>12</sup>Мон ёвтнян тенк мода лангонь тевтнеде, тынь а кемтядо. Арази кемезевтядо, карминдерян кортамо менеленсетнеде?

<sup>13</sup>Кияк эзь кузекшне менельс, ансяк Се, кона менельстэ валгсь, менельсэ эриця Ломантнень Цёрась.

<sup>14</sup>Кода Моисей кепедизе чаво модасо пижестэ теезь гуенть, истя жо кепедевема Ломантнень Цёрантеньгак сень кисэ,

<sup>15</sup>эрвась, кона кеми Сонзэ эйс, илязо ёма, мекевланк улезэ тензэ пингеде пингень эрямо.

<sup>16</sup>Эдь Пазось истя вечкилизе масторлангонть, мик максызе Эсензэ вейкине тиринь Цёранзо тень кисэ: эрвась, кона кеми Сонзэ эйс, илязо ёма, мекевланк улезэ тензэ пингеде пингень эрямо.

<sup>17</sup>Эдь Пазось кучизе Эсь Цёранзо масторлангов аволь судонь тееме – кучизе вельдензэ масторлангонть идеме.

<sup>18</sup>Сонзэ эйс кемицясь а карми улеме судязь, акемицясь вана уш судязь сень кис, мекс эзь кеме Пазонь вейкине Цёрантень.

<sup>19</sup>Судось ашти вана мейсэ: валдось сась масторлангов, ялатеке чоподась ломантненень вечкевсь валдодонть пек, эдь сынст тевест ульнесть зыяновт.

<sup>20</sup>Ды эрвась, кона теи берянь, а вечксы валдонть ды а моли валдос, пели зыянов тевензэ лангс лисемадост.

<sup>21</sup>Видечинь коряс теицясь моли валдос невтеме эсь тевензэ, конат теезь Пазонтъ коряс».

### **Иисус ды Иоанн Нававтыця**

<sup>22</sup>Теде мейле сась Иисус Эсь тонавтницянзо марто Иудеянь масторс, эрясь тосо мартост зярья шка ды нававтсь-лемдсь.

<sup>23</sup>Иоаннгак нававтсь Айнонсо, Салим маласо, тосо ведесь покшоль. Ломантне сыльть тензэ пряст нававтомо.

<sup>24</sup>Иоанн зярс апаколь пекста тюрьмас.



<sup>25</sup>Весть Иоаннонь тонавтницянзо ды еврейтнень ютксо лиссь пелькстамо ванськавтовома койтнеде-кирдатнеде.

<sup>26</sup>Тонавтницятне сестэ састь Иоаннэнь ды мерсть тензэ: «Равви! Се, кона ульнесь мартот Иорданонь тона чиресэ ды конань эйстэ тон ёвтнить-яволявтнить, Сонсь ней нававты, ды весе молить Тензэ».

<sup>27</sup>Иоанн мерсь каршост: «Мезеяк ломанентень эстензэ а саеви, а улиндеряй максозь тензэ менельстэ.

<sup>28</sup>Тынь тынсь тень неицят-марицят, мезенть мон ёвтыя: мон аволь Пазонь кучовт Идиця, мон кучозян Сондензэ икеле.

<sup>29</sup>Се урвакстыцясь, кинь экшс чиясть тейтерь. Урвакстыцянтъ ялгазо вакссонзо аштемстэ ды эйсэнзэ кунсолост эрьгелезь эрьгели, зярдю марясы урвакстыцянтъ вайгелензэ. Монь кенярксоськак, кона ней топавтовсь, истямо жо.

<sup>30</sup>Сонензэ касома, монень вишкалгадома».

### **Верде Сыцясь**

<sup>31</sup>«Се, кона сы верде, – весемеде покш улияк; мода лангонсесь – модань улияк, кортыяк мода лангонь тевтнеде. Се, кона менельстэ сы, – весемеде покш.

<sup>32</sup>Мезе Сон несъ ды марясь, седе ёвтни, ансяк кияк мельс а саи Сонзэ валонзо.

<sup>33</sup>Се, кона Сонзэ валонзо эсь мельс сайсынзе, теньсэ кемекстасы Пазонтъ видечинзэ.

<sup>34</sup>Эдь Се, конань кучизе Пазось, корты Пазонь валт, ды Пазось апак онкста максы Эсь Оймеялтонзо.

<sup>35</sup>Тетясь вечксы Цёранзо ды весементь максызе Сонзэ кедьс.

<sup>36</sup>Цёрантъ эйс кемицянтъ ули пингеде пингень эрямозо. Кие Цёрантъ а кунсолы, се а несъ эрямонтъ, ды Пазонь кежесь ули лангсонзо».

## Иоанна 4

### Иисус корты самариянь ава марто

<sup>1-2</sup>Фарисейтненень пачкодсь куля, келя Иисус Иоанндо ламо мельга молицят пурны ды нававты, – куш Иисус Сонсь а нававтыль, нававтсть ансяк тонавтницянзо. Зярдो Иисус марясь теде,

<sup>3</sup>Сон кадызе Иудеянтъ ды таго тусь Галилеяв.

<sup>4</sup>Сонензэ эрявкшнось ютамс Самариянь трокс.

<sup>5</sup>Вана Сон сась Самариянь Сикарь ошс, кона аштесь а васоло се умадонть, конань Яков таго-зярдо макснизе эсь цёранстэнь, Иосифнень.

<sup>6</sup>Тосо ульнесь Яковонь лисьмазо. Иисус ки лангонь сиземадонть озась те лисьманть ваксс. Шкась ульнесь чинь куншка.

<sup>7</sup>Самариянь вейке ава сась лисьманть лангс ведь мельга. Иисус пшкадсь тензэ: «Макст Монень симемс».

<sup>8</sup>Тонавтницянзо те шкастонть тукшность ошов ярсамопелень рамамо.

<sup>9</sup>Самариянь авась кевкстизе: «Кода Тон, еврей, монь, самариянь авань, кедьстэ симемс вешат?» Тевесь сеньсэ, Иудеянь ды Самариянь ломантне а вейсэнгалить.

<sup>10</sup>Иисус тень каршо мерсь тензэ: «Содындерявлить Пазонь казнедентъ ды седе, кие веши кедьстэть симемс, тон тонсь вешевлить кедьстэнзэ, ды Сон максоволь тетъ эрямонь максыця ведь».

<sup>11</sup>Авась мери Тензэ: «Парочи! Тонеть амольдымкак а мейсэ, лисьмаськак сэрей. Косто жо Тонеть саеви эрямонь максыця ведесь?»

<sup>12</sup>Арази Тон минек Яков тетядонок покшат, кона максызе тенек те лисьманть, ды симиль ведтензэ сонськак, симильть эйкакшонзояк, ракшанзояк?»

<sup>13</sup>Иисус мерсь сонензэ тень каршо: «Эрванть, кона симнекшни те ведтенть, сень таго симемазо сы.

<sup>14</sup>Кие сими ведтенть, конань Мон максса тензэ, сень пингедэ пингес симемазо а сы. Ведесь, конань Мон максса тензэ, тееви эйсэнзэ пингедэ пингень эрямос чудиця лисьмапрыхс».

<sup>15</sup>Авась мери Тензэ: «Парочи! Макст монень те ведтенть, симемам а сакшномга ды тезэнь ведь мельга а якамга».

<sup>16</sup>Иисус мери тензэ: «Азё, тердик мирдеть ды садо тей».

<sup>17</sup>Авась мерсь тень каршо: «Монь арась мирдем». Иисус мерсь тензэ: «Видестэ ёвтыть, тонь арась мирдеть.

<sup>18</sup>Тонь ульнесть вете мирдеть, ды се, кона марто ней эрят, аволь мирдеть. Тень видестэ тон ёвтык».

<sup>19</sup>Авась мери Тензэ: «Парочи! Неса, Тон пазмарицят.

<sup>20</sup>Минек покштяноккак сюконякшныльть те пандонтъ лангсо. Тынь, еврейтне, кортатадо, келя миненек эряви сюконякшномс Пазонтень Ерусалимсэ».

<sup>21</sup>Иисус мери тензэ: «Кемть Монень, ава, сы шка, зярдэ аволь те пандонтъ лангсоаяк, аволь Ерусалимсэаяк карматадо сюконякшномо Тетянтень.

<sup>22</sup>Тынь, самариянсетне, а содатадо, кинень сюконякшнотадо. Минь, еврейтне, содатано, кинень сюконякшнотано, эдь масторлангонь идемась сы еврейтнень эйстэ.

<sup>23</sup>Ялатеке сы шка, ды сон уш сась, зярдэ алкуксонь сюконицят кармить Тетянтень сюконякшномо Оймеялтонь ды видечинь коряс. Истят сюконицят Тетясь вешник Эстензэ.

<sup>24</sup>Пазось – Оймеялт, Тензэ сюконицятнененькак Оймеялтонь ды видечинь коряс сюконякшнома».

<sup>25</sup>Авась корты Тензэ: «Содан, куро́к сы Мессия, конадо мерить Христос, а вана зя́рдо Сон сы, ёвтнесы тенек весементь».

<sup>26</sup>Иисус мери тензэ: «Те Мон, ко́на корты мартот».

<sup>27</sup>Те шкане Иисусонь тона́втниця́нзо састь мекев ды дивазевсть ава марто Сонзэ кортнемантень. Ансяк кияк эзь кевксте: «Мезе Тонеть эряви пельдензэ?» эли: «Мезде кортат мартонзо?»

<sup>28</sup>Сестэ авась кадызе ведень кандома кедьгензэ, мольсь ошов ды мерсь ломантненень:

<sup>29</sup>«Азёдо, ваньнк ломанень, конась ёвтызе тень весементь, мезе мон теинь: паряк, Сон Пазонь кучовт Идиця?»

<sup>30</sup>Сынь лиссть ошстонть ды тусть Сонензэ.

<sup>31</sup>Се шкане тона́втниця́нзо энялдозь кортасть Тензэ: «Равви, мездеяк ярсак».

<sup>32</sup>Сон мерсь тенст: «Монь ули истямо ярсамопелем, конань тынь а содасынк».

<sup>33</sup>Сестэ тона́втниця́тне кармасть кортамо эсь ютковаст: «Паряк кияк кандсь Тензэ ярсамс?»

<sup>34</sup>Иисус мери тенст: «Монь ярсамопелем – топа́втомс Монь Кучиця́нтъ мелензэ, прыдомс Сонзэ максовт теветь».

<sup>35</sup>Нать тынк арась истямо валмеревкс: “Видьсак ды ниле ково́нь ютазь нусак”? Мон жо кортан тенк: панжинк сельменк ды варштадо паксятнень лангс, сынь ашолгадсть, кенерсть нуемс.

<sup>36</sup>Нуиця́нтень уш ней пандови питне ды сон пурны урожай пингеде пингень эрямос. Секс видицяськак, нуицяськак вейсэ кенярдкшномо кармить.

<sup>37</sup>Тень кувалма виде валмеревксэсь: “Вейкесь види, лиясь нуи”.

<sup>38</sup>Мон тынк кучидизь сень нуеме, мезес тынь вий эзиде путо: лият важдсть, тынь пурнынк сынст урожаест».

<sup>39</sup>Самариянь се ошстонть ламот кармасть кемеме Тензэ аванть валонзо кувалт, кона ёвтнесь-яволявтнесь: «Иисус ёвтызе монень весементь, мезе зярд-бути мон теинь».

<sup>40</sup>Секскак, зярд састь Сонензэ самариянь ломанть, сынъ энялдсть икелензэ зярскак улемс кедьсэст. Сон ульнесь тосо кавто чить.

<sup>41</sup>Сестэ седеяк ламот кармасть кемеме Сонензэ валонзо кувалт

<sup>42</sup>ды кортасть се аванть: «Ней аволь тонь валот кувалт кемтяно. Минсь маринек ды карминек содамо, те ломанесь – алкукс, масторлангонь Идиця, Христос».

#### **Инязоронтень важдицянтъ цёранзо шумбралавтома**

<sup>43</sup>Кавто чинь ютазь Иисус лиссь тосто ды тусь Галилеяв.

<sup>44</sup>Иисус Сонсь ёвтась: пазмарицянтъ а ловить чачи масторсонзо.

<sup>45</sup>Ялатеке, зярд Сон сась Галилеяв, Галилеянь ломантне паро мельсэ вастызь Сонзэ: сынъ неизь весементь, мезе Сон тейсь Ерусалимсэ Инечинь покшчистэнтъ, эдь сынъгак ульнесь тосо.

<sup>46</sup>Истя Иисус таго сась Галилеянь Кана ошов, косо ведентъ теекшнize винакс. Тосо ульнесь инязоронтень вейке важдиця, конань сэредиця цёразо Капернаумсоль.

<sup>47</sup>Сон марясь Иудеясто Галилеяв Иисусонь самодо, мольсь Тензэ ды энялдсь икелензэ: «Сак Капернаумов ды шумбралгавтык цёрам, кона кулома лангсо».

<sup>48</sup>Иисус мерсь тензэ: «Тынь, ломантне, зярдояк а карматадо кемеме, а неиндерятадо дивань тешкст ды тамашань тевть».

<sup>49</sup>Инязоронь важдицясь мерсь Тензэ: «Азором! Сак, зярс эзь куло цёрам».

<sup>50</sup>Иисус мерсь: «Азё, цёрат карми эрямо». Сон кемезевсь Иисусонь валтнэнень ды тусь.

<sup>51</sup>Кудов модемстэ сонзэ вастызь важонзо, ёвтасть: «Цёрат шумбра».

<sup>52</sup>Сон кевкстинзе сынст: «Кодамо шкасто вадрялгась ёжозо?» Сонензэ мерсть: «Исяк чинь куншкань васенце чассто псись кадызе сонзэ».

<sup>53</sup>Тень кувалма тетясь чарькодсь: те ульнесь се часстонть, конастонть Иисус мерсь тензэ: «Цёрат карми эрямо». Ды кармась кемеме сонськак, весе кудосонзотнеяк.

<sup>54</sup>Те омбоце дивань тешксэнтъ Иисус теизе сестэ, зярдю мекев сась Иудеясто Галилеяв.

## Иоанна 5

### Иисус шумбралгавты ломань Ветезда экшелямо таркасо

<sup>1</sup>Теде мейле ульнесь еврееень покшчи, ды Иисус сась Ерусалимев.

<sup>2</sup>Ерусалимсэ, Ревень ортатнень вакссо, ули экшелямо тарка, лемезэ евреекс Ветезда, конань перька ульнесь вете галереят.

<sup>3</sup>Сынст эзга мадезь аштеть пек ламо сэредицят: сокорт, чаморт, катардыцят, конат учнеть ведентъ чарамонзо.

<sup>4</sup>Азоронь ангел шкань-шкань валгиль экшелямо таркантень ды чаравтылизе ведентъ. Кие васенцекс совиль ведентень чаракавтомадо мейле, се пичкиль, кодамо ормасо аволь сэреде.

<sup>5</sup>Тосо ульнесь ломань, кона сэредсь колоньгемень кавксо иеть.

<sup>6</sup>Иисус сонзэ мадезь аштемстэ неезь ды содазь: сон сэреди уш ламо иень перть, кевкстизе сонзэ: «Ули мелеть пичкамс?»

<sup>7</sup>Сэредицясь пшкадсь каршонзо: «Парочи, монь арась ломанем, кона валтовлимим экшелямо таркантень, кода ведесь чаракады. Ансяк зярдю мон пачкодян, лия уш валги мондень икеле».

<sup>8</sup>Иисус мерсь тензэ: «Стяк, сайт ацамот ды якак».

<sup>9</sup>Сон сеске шумбралгадсь, саинзе ацамонзо ды тусь. Те ульнесь оймсема чистэ.

<sup>10</sup>Секс еврееень прявтнэ мерсть шумбралгадозентень: «Течи оймсема чи, Коесь а мери теть ацамонь кандтнемадо».

<sup>11</sup>Сон ёвтась каршост: «Кие монь шумбралгавтымим, се тень мерськак: “Саить ацамот ды якак”».

<sup>12</sup>Сонзэ кевкстизь: «Кие Сон истямось, кона мерсь теть: “Саить ацамот ды якак”?»

<sup>13</sup>Шумбралгавтозесь сонськак эзь сода, кие Сон, эдь Иисус ёматотсь ломантнень юткс, конат ульнесть се таркасонть.

<sup>14</sup>Мейле Иисус сонзэ вастызе Пазонь кудонь пирявкс потсо ды мерсь тензэ: «Вана, тон ней шумбрат. Седе тов иля совсе пежетьс, аволь лисе мартот мезеяк седе берянь».

<sup>15</sup>Те ломанесь мольсь ды ёвтась еврееень прявтнэненень: сонзэ шумбралгавтызе Иисус.

<sup>16</sup>Еврейтне кармасть панеме Иисусонь ды вешнесть маштомс Сонзэ сень кисэ, мекс Сон тейнесь истят тевть оймсема чистэ.

<sup>17</sup>Иисус кортась тенст: «Монь Тетям свал тевть тейни ды Монгак истя тейнян».

<sup>18</sup>Сестэ еврейтне седеяк пек кармасть бажамо маштомс Иисусонь. Эдь Сон колсесь аволь ансяк оймсема чинть, мик Пазонтькак ёвтызе Эсензэ Тетякс ды истямо ладсо Эсь прянзо теизе Пазонть марто вейкетькс.

### **Пазонь Цёранть виезэ**

<sup>19</sup>Тень каршо Иисус мерсь: «Алкукс, алкукс кортан тенк: Цёрантень Эсь пельдензэ мезеяк а тееви, а неиндерясы, мезе теи Тетязо. Мезенть тейсы Тетясь, сень Цёразояк тейсы.

<sup>20</sup>Эдь Тетясь вечксы Цёранть ды невтни Тензэ весементь, мезе Сонсь теи. Сон невити Тензэ нетнедеяк покш тевть, истят, конатнень лангс тынь карматадо дивсеме.

<sup>21</sup>Кода Тетясь вельмевтни кулозтнень ды максы тенст эрямо, истя Цёраськак максы эрямо, кинень ули мелезэ.

<sup>22</sup>Эдь Тетясь судгак киненьгак а теи, весе судонтъ максызе Цёранстэнь сень кисэ:

<sup>23</sup>кадык весе ловсызь Цёрантькак истя, кода ловить Тетянтъ. Кие а лови Цёранть, се а лови Тетянтъкак, кона Сонзэ кучизе.

<sup>24</sup>Алкукс, алкукс, кортан тенк: кие Монь валом кунсолы ды Монь Кучицянть кеми, сенень ули пингеде пингень эрямо. Сонензэ судскак а сама – сон уш ютась куломасто эрямос.

<sup>25</sup>Алкукс, алкукс, кортан тенк: сы шка, ды уш саськак, зярдю кулозтне марясызь Пазонь Цёранть вайгелензэ. Ды сетне, конат марясызь, вельмить.

<sup>26</sup>Кода Тетянтъ Эсензэ эйсэ ули эрямо, истя жо Цёрасонзояк ули эрямо, конань максызе Тензэ Тетясь.

<sup>27</sup>Ды Сон макссь Тензэ азорксчи теемс судгак, эдь Сон – Ломантнень Цёра.

<sup>28</sup>Илядо дивсе тенень: сы шка, зярдю весе кулозтне марясызь Пазонь Цёранть вайгелензэ.

<sup>29</sup>Сынь лисить калмосто: паронь теицятне вельмить эрямо, беряненъ теицятне – судонь кирдеме.

<sup>30</sup>Монень мезеяк а тееви Эсь пельдень. Кода марян, истя судян, ды Монь судось виде, эдь Мон а вешнян Эсень мель – вешнян Монь кучиця Тетянтъ мелензэ».

#### **Иисусто ёвтнематне-кемекстамотне**

<sup>31</sup>«Ёвтниндерян Монсь Эсень ланга, Монь ёвтнемам ули аволь виде.



<sup>32</sup>Ули лия, кона Монь эйтэ ёвтни, ды Мон содан, виде се ёвтнемась, конаньсэ Сон Мондень корты.

<sup>33</sup>Тынь кучниде ломанть Иоаннэнь, ды сонгак ульнесь видечиденть ёвтницякс.

<sup>34</sup>Ялатеке Монень а эрявить ломанень пельде ёвтнемат-кемекстамот, кортан тень ансяк идевеманк кисэ.

<sup>35</sup>Иоанн ульнесь прок лампа, пальця ды вандолдыця, ды тынк ульнесь меленк зяркак кецнемс сонзэ валдосонзо.

<sup>36</sup>Монь ули лия кемекстамом, кона Иоаннонь кемекстамодонть кемевикс: те тевтне, конатнень Тетям максынзе Тень топавтомс. Неть тевтне, конатнень Мон топавтан, сынсь ёвтнить Мондень кода Тетянь кучовтонзо эйтэ.

<sup>37</sup>Мондень ёвтнесь Сонсь Тетямгак, кона кучимим. Тынь Сонзэ вайгелензэ зярдояк эзинк марсе, чаманзояк эзинк некшне.

<sup>38</sup>Тынь истя жо а ванстадо Сонзэ валонзо эсенк седейсэ, эдь тынь а кемтядо Сенень, кинь Сон кучизе.

<sup>39</sup>Тынь тонавтнетядо Пазонь пельде Сёрмадовкстнэнь, эдь тынь арсетядо сынст вельде пачкодемс пингеде пингень эрямос. Ансяк сыньгак ёвтнить Монь эйтэ.

<sup>40</sup>Ялатеке тынк арась меленк самс Монень, кинь вельде максоволь тенк эрямо.

<sup>41</sup>Монень а эряви шнамо ломанень пельде.

<sup>42</sup>Мон тынк содатадызь: тынк седейсэнк Пазонтень вечкема арась.

<sup>43</sup>Мон сынь Монь Тетянь лемсэ, тынь ялатеке а васттадо Монь. Сындеряй лия эсь лемсэнзэ, сень парсте вастсынк.

<sup>44</sup>Кода кемезевтядо Монень, зярдо вейке вейкень пельде шнамот сайтядо, ансяк а вешнетядо се шнамонтъ, кона вейкине Пазонтъ пельде?

<sup>45</sup>Илядо арсе седе: Мон карман чумондомонк Тетянтъ икеле. Ули тенк чумондыця, Моисей, конань лангс тынь умок нежедтядо.

<sup>46</sup>Кемевлидеяк Моисейнень, сестэ кемевлиде Моненьгак, эдь сон сёрмадсь Мондень.

<sup>47</sup>А кеминдерятадо сонзэ сёрмадомантень, кода сестэ кемезевтядо Монь валозон?»

## Иоанна 6

### Иисус анды вете тѣжат

<sup>1</sup>Тѣде мейле Иисус тусь Галилеянь, лиякс Тивериадань, эрькентъ томбалев.

<sup>2</sup>Ламо ломанть тусть мельганзо, эдь сынъ неизь тамашатнень, конатнень Сон тейнесь сэредицятнень шумбралгавтнезь.

<sup>3</sup>Иисус кузсь пандо пряс ды тосо озась тонавтницянзо марто.

<sup>4</sup>Малавгалесь еврееень Инечинь шкась.

<sup>5</sup>Зярдэ Иисус кепединзе сельмензэ ды неинзе сонзэ пелев молиця ламо ломантнень, кевкстизе Филипень: «Косто сынст андомга рамамс тенек кши?»

<sup>6</sup>Ансяк Сон ёвтыве тень Филипень варчавтнеманзо кисэ; эдь Сонсь уш содась, мезе карми тееме.

<sup>7</sup>Филип тень каршо мерсь Иисуснэнь: «Бути эрьвантень ансяк аламнень-аламнень максомс, сестэ сыненст кавтосядт динаронь питнесэ кшиськак а саты».

<sup>8</sup>Сестэ тонавтницянзо ютксто лиясь, Андрей, Симон Петрань ялаксозо, мерсь Тензэ:

<sup>9</sup>«Тесэ вейке цѣрыненъ улить шужонъ вете кшинзэ ды кавто калнэнзэ. Ансяк зяронень те мезе?»

<sup>10</sup>Иисус мерсь: «Ойсевтинк ломантнень». Се таркась ульнесь пек тикшев ды весе ойсесь тикшень лангс. Тосо ульнесь цёра ломантнеде ветешка тёжат.

<sup>11</sup>Иисус саинзе кшитнень ды, Пазонтень сюкпрянь ёвтазь, явшинзе тонавтницятненень, тонавтницятне явшесь озадотненень. Истя Сон явинзе калнэтненьгак, ды эрвась сайсь кинь зяро мелезэ.

<sup>12</sup>Кода пешкедсть, Иисус мерсь Эсензэ тонавтницятненень: «Пурнынк кадовикс сускомотнень, мезеяк илязо ёма».

<sup>13</sup>Пурнызь ды пештясть кемгавтово куйметь сускомотнесэ, конат кадовсть шужонь вете кшитнестэ ярсыцятнеде мейле.

<sup>14</sup>Сестэ ломантне, Иисусонь теевть тамашанть неезь, мерсть: «Те алкукс се пазмарицясь, конанень сама масторлангов».

<sup>15</sup>Иисус кармасть содамо ломантнень арсемадост: сынст ульнесь мелест самс, каподемс Сонзэ ды теемс инязорокс. Секс Сон таго тусь пандо пряв съкамонзо.

### Иисус юты ведь ланга

<sup>16</sup>Зярдс сась чокшнесь, Иисусонь тонавтницянзо валгсть эрькенть чирес,

<sup>17</sup>озасть венчес ды тусть эрькенть трокс Капернаумов. Уш чопотетсь, Иисус яла эзь сакшно ваксозост.

<sup>18</sup>Пувась виев варма, эрькесь лымбакстнесь.

<sup>19</sup>Зярдс сынь уйсть ветешка эли котошка вайгельбеть, сестэ неизь Иисусонь веденть ланга ютамсто ды венчест малас пачкодемстэ. Сынь тандадсть.

<sup>20</sup>Сон мерсь тенст: «Те Мон, илядо пеле».

<sup>21</sup>Тонавтницятне саиксэлизь Сонзэ венчес, ансяк венчесь сеске пачкодсь се чирентень, ков сынь уйсть.

### Эрямонь кши

<sup>22</sup>Омбоце чистэнтъ ломантне, конат аштеть эркентъ те пеле, неизъ: тосо ульнесъ ансяк вейке венч, ков озасть Сонзэ тонавтницянзо, лия арасель. Иисус жо тонавтницянзо марто венчентень эзь ойсе, тонавтницятне тустъ съкамоост.

<sup>23</sup>Те шкастонть састъ Тивериадасто лия венчт се тарканть малас, косо Азорось ёвтась сюкпря Пазонтень ды косо кшиде андынзе ломантнень.

<sup>24</sup>Зярдэ ломантне неизъ: арась тесэ Иисускак, тонавтницянзояк, сестэ сынъ ойсестъ венчкаст ды тустъ Капернаумов Иисусонь вешнеме.

<sup>25</sup>Зярдэ муизъ Иисусонь эркентъ тона пельде, кевкстизъ Сонзэ: «Равви, зярдэ Тон тезэнь сыть?»

<sup>26</sup>Иисус мерсь каршост: «Алкукс, алкукс кортан тенк: тынь вешнетядо Монь аволь секс, мекс неиде тамашат, а вана секс, мекс ярсыде кшиде ды пешкедиде.

<sup>27</sup>Правтодо аволь наксадыця-колиця ярсамопель мельга, мекевланк, се ярсамопелентъ мельга, кона зярдояк а наксады ды кона максы пингедэ пингень эрямо. Те ярсамопелентъ кази тенк Ломантнень Цёрась, эдъ Сонзэ лангс Тетя Пазось путызе эсь кемекстамо тешксэнзэ».

<sup>28</sup>Сестэ сынъ кевкстизъ Сонзэ: «Мезе тенек теемс Пазонь тевтнень топавтомга?»

<sup>29</sup>Иисус тень каршо мерсь тенст: «Кемеде Сенень, конань Сон кучизе. Те улиак Пазонь тев».

<sup>30</sup>Тень лангс мерсть Тензэ: «Кодамо Тон теят дивань тешкс, конань неезь минь кемезевлинек Теть? Мезе Тон теят?»

<sup>31</sup>Минек покштянок ярсасть чаво модасо ярсамопельде, конанень мерсть манна. Тень эйстэ сёрмадозь истя: “Сон макссь тенст ярсамс кши менельстэ”».

<sup>32</sup>Иисус мерсь тенст: «Алкукс, алкукс кортан тенк: аволь Моисей максызе тенк кшинть менельстэ – Монь Тетям максы тенк алкуксонь кши менельстэ.

<sup>33</sup>Эдь Пазонь кшись се, кона валги менельстэ ды максы масторлангонтень эрямо».

<sup>34</sup>Сынь мерсть Тензэ: «Парочи! Макснек тенек свал истямо кши».

<sup>35</sup>Иисус мерсь тенст: «Мон – эрямонь кшиян. Монень сыцясь а вачоми, Монь эйс кемицянтъ симемазо а сы зярдояк.

<sup>36</sup>Ансяк кода Мон уш кортынть тенк: тынь Монь неимизь ды ялатеке а кемтядо.

<sup>37</sup>Весе, кинь максы Тень Тетясь, Монень сыть, ды Монень сыцянтъ зярдояк а паньса.

<sup>38</sup>Эдь Мон валгинь менельстэ аволь Эсь мелень – Монь кучиця Тетянтъ мелензэ топавтомо.

<sup>39</sup>А вана Монь кучиця Тетянтъ мелезэ истямо: сетнень эйстэ, конатнень Сон Монень максынзе, киньгак Тень а ёмавтомс, весень вельмевтемс меельце чистэнтъ.

<sup>40</sup>Эдь Монь Кучицянтъ мелезэ се: эрвантень, кона несы Цёранть ды кеми Сонзэ эйс, улевель пингеде пингень эрямо, ды Мон сонзэ вельмевтьса меельце чистэнтъ».

<sup>41</sup>Еврейтне музгордсть лангозонзо сень кисэ, мекс Сон мерсь: «Мон се кшись, кона валгсь менельстэ».

<sup>42</sup>Сынь кортасть: «Нать те аволь Иисус, Иосифень цёразо, конань тетянзояк, аванзояк минь содасынек? Кода эно ней Сон корты: “Мон валгинь менельстэ”?»

<sup>43</sup>Иисус мерсь сыненст тень каршо: «Илядо музгорде эсь юткованк.

<sup>44</sup>Кияк Монень а сави, а ветиндерясы Тетясь, кона Монь кучимим, ды Мон сонзэ вельмевтьса меельце чистэнтъ.

<sup>45</sup>Пазмарицятнень вельде сёрмадозь: “Весемь тонавтсынзе Пазось”.  
Эрвась, кие кунсолы Тетянь ды тонавтни пельдензэ, сы Монень.

<sup>46</sup>Кияк Тетянтэ эзизе нее, Пазонтэ пельде Сыцядонть башка: ансяк Сон  
неизе Тетянтэ.

<sup>47</sup>Алкукс, алкукс, кортан тенк: кие кеми Монь эйс, сенень ули пингеде  
пингень эрямо.

<sup>48</sup>Мон эрямонь кшиян.

<sup>49</sup>Тынк покштянк ярсать маннадо чаво модасо, ялатеке кулсесь.

<sup>50</sup>Кшись, кона валги менельстэ, истямо: эйстэнзэ ярсыцясь зярдояк а  
кулы.

<sup>51</sup>Мон эрямонь кшись, кона валгсь менельстэ. Те кшидентэ ярсыцясь  
карми эрямо пингеде пингес. Кшись, конань Мон максса – Монь  
рунгом. Ды Мон максса сонзэ масторлангонтэ эрямонзо кисэ».

<sup>52</sup>Сестэ еврейтне пелькстазевсть эсь ютковаст: «Кода Сонензэ Эсь  
рунгозо максови миненек ярсамс?»

<sup>53</sup>Иисус мерсь тенст: «Алкукс, алкукс кортан тенк: а карминдерятадо  
ярсамо Ломантнень Цёранть рунгодонзо ды симеме Сонзэ вердензэ, а  
ули эйсэнк эрямо.

<sup>54</sup>Рунгодон ярсыцянтень ды вердень симицянтень максови пингеде  
пингень эрямо, ды Мон вельмевтьса сонзэ меельце чистэнтэ.

<sup>55</sup>Эдь Монь рунгом – алкукс ярсамопель, ды Монь верем – алкукс  
симемапель.

<sup>56</sup>Рунгодон ярсыцясь ды вердень симицясь эри-ашти Монь эйсэ, Монгак  
сонзэ эйсан.

<sup>57</sup>Монь кучимим эриця Тетясь, ды кода Мон эрян Тетянтэ вельде, истя  
Мондень ярсыцяськак карми эрямо Монь вельде.

<sup>58</sup>Те улияк кшись, кона валгсь менельстэ. Те аволь се манна кшись, конадо ярсась тынк покштянк ды ялатеке кулсесь. А вана те кшиденть ярсыцясь карми эрямо пингеде пингес».

<sup>59</sup>Теде кортась Иисус синагогасо тонавтомсто, Капернаумсо.

### **Тонавтницятне кадыть Иисусонь**

<sup>60</sup>Тень марязь ламот Сонзэ тонавтницятнестэ кортасть: «Кодамо стака тонавтомась! Кинень сон саеви мельс-превс?»

<sup>61</sup>Иисус, Эсь потмованзо содазь, мезе лангс музгордить тонавтницянзо, мерсь тенст: «Нать те кавтолдовты кемеманк?»

<sup>62</sup>Мезе жо ули сестэ, неиндерясынк Ломантнень Цёранть тов кепедедемстэ, косо Сон ульнесь икеле?»

<sup>63</sup>Эрицякс теи Пазонь Оймеялтось, ломанень виесь теньсэ а лезды. Валтнэ, конатнень Мон кортан тенк, оймеялт ды эрямо.

<sup>64</sup>Ансяк улить тынк ютксо акемицяткак». Иисус уш икелев содыль, кить акемицятне, кие мисы Сонзэ.

<sup>65</sup>Иисус мерсь: «Сень кисэ Мон кортыньгак тенк: кияк а сави Монень, а улиндеряй те максозь тензэ Монь Тетянь пельде».

<sup>66</sup>Те шкастонть саезь, ламот Сонзэ мельга молицятнеде явсть эйстэнзэ ды уш эзьт яка мартонзо.

<sup>67</sup>Сестэ Иисус мерсь кемгавтовотненень: «Паряк тынккак меленк туемс Монь эйстэ?»

<sup>68</sup>Симон Петра мерсь каршонзо: «Азором! Кинень эно миненек модемс? Тонь улить пингеде пингень эрямонь валот,

<sup>69</sup>ды минь кемтяно ды содатано: Тон – Пазонь кучовт Идицят, эри Пазонть Цёразо».

<sup>70</sup>Иисус мерсь тенст: «Мон Монсь кочкидизь тынк, кемгавтовотнень. Ялатеке вейкесь эйстэнк – идемевсь».

<sup>71</sup>Те кортась Сон Иудадо, Симон Искаротонь цёрадонзо, кона ульнесь кемгавтовотнестэ вейкекс. Эдь сон арсесь миёмс Иисусонь.

## Иоанна 7

### Иисус сы Ерусалимев покшчис

<sup>1</sup>Тёде мейле Иисус якась Галилеява, Сонзэ арасель мелезэ якамс Иудеява, эдь еврееень прявтнэ вешнесть шка маштомс Сонзэ.

<sup>2</sup>Малавгалесь еврееень тарад латынень стявтнема покшчись.

<sup>3</sup>Сестэ Сонзэ братонзо мерсть Тензэ: «Тонеть эряви туемс тестэ ды молемс Иудеяв, кадык Тонь тонавтнициятнеяк несызь тевтнень, конатнень таят.

<sup>4</sup>Кияк а тейни мезеяк салава, улиндеряй мелезэ теевемс содавиксэкс. Бути Тон тейнят истят тевть, невтик Эсь прят мирэнтень-масторонтень».

<sup>5</sup>Эдь Сонзэ братонзояк эзь кеме Тензэ.

<sup>6</sup>Тень каршо Иисус мерсь сыненст: «Монь шкам зярс эзь са, тыненк жо свал шка.

<sup>7</sup>Тынк лангс масторлангонь ломантненень а сави кирдемс кеж, Монь вана а вечксамизь, мекс Мон сынст берянь тевтнеде яволявтнян.

<sup>8</sup>Тынь азёдо те покшчинтень, Мон тов а молян, Монь шкам зярс эзь са».

<sup>9</sup>Сон тень ёвтызе сыненст ды кадовсь Галилеяс.

<sup>10</sup>Зярдэ братонзо састь покшчинтень, сестэ Иисускак сась тов, ансяк аволь неявиксстэ, салава ладсо.

<sup>11</sup>Еврееень прявтнэ вешнесть Эйсэнзэ покшчинть ютавтомсто ды кортасть: «Косо Сон?»

<sup>12</sup>Ламо тошксемат ульнесть Иисусонь кувалт ломантнень ютксо. Веенст кортасть: «Сон паро ломанесь», лият кортасть: «Аволь, Сон манчи ломантнень».



<sup>13</sup>Теке марто кияк марямга эзь корта Эйстэнзэ, пельсть евреень прявтнэде.

<sup>14</sup>Зярдю уш ульнесь покшчинь куншка, Иисус совась Пазонь кудос ды кармась тонавтомо.

<sup>15</sup>Евреень прявтнэ дивсесть ды кевкстнесть: «Косто Сон апак тонавтне содасынзе Пазонь пельде Сёрмадовкстнэнь?»

<sup>16</sup>Иисус каршост мерсь: «Монь тонавтомась аволь Монсень – Монь Кучицянтъ.

<sup>17</sup>Кие бажи Сонзэ меленть топавтомс, се карми содамо те тонавтомадонть: Пазонтъ пельде сон, эли Мон Эсень пельде кортан.

<sup>18</sup>Сонсь эсензэ пельде кортыцясь вешни шнамот эстензэ. Кие вешни шнамо Эсь Кучицянтэнь, се алкуксонь, арась авидечи Сонзэ эйсэ.

<sup>19</sup>Арази Моисей эзь максо тенк Кой? Ансяк кияк эйстэнк Коентъ коряс а теи. Мезень кисэ жо арсетядо Монь маштомс?»

<sup>20</sup>Ломантне каршонзо мерсть: «Паряк, идемевсь Эйсэть? Кие арси Тонь маштомс?»

<sup>21</sup>Иисус, Эсь валонзо поладозь, мерсь тенст: «Вейке тамаша Мон теинь оймсема чистэ, ды весе тынь дивсетядо.

<sup>22</sup>Моисей макссь тенк цёрань киськепень керявтома, куш сон аволь Моисеень пельдеяк, сон ине покштятнень пельде. Ды тынь оймсема чистэяк тейнетядо керявтома цёра эйкакштнэненъ.

<sup>23</sup>Бути, Моисеень Коентъ а коламга, цёра эйкакшось оймсема чистэяк керявтови, – монь лангс мейс ацирьгалетядо сень кисэ, мекс Мон весе ломаненть шумбралгавтыя оймсема чистэ?

<sup>24</sup>Илядо судя лангс ванозь, судядо видечинь судсо».

### **Иисус Пазонь кучовт Идиця эли аволь?**

<sup>25</sup>Конат-конат ерусалименсетнестэ кортасть: «Арази Сон аволь се, конань вешнить маштомс?»

<sup>26</sup>Вана, Сон корты апак кекшне, ды мезеяк а мерить каршонзо. Паряк, прявтнэ кармасть содамо: Сон алкукс Пазонь кучовт Идиця?

<sup>27</sup>Минь жо содасынек Сонзэ, костонь Сон. Зярдо сы Пазонь кучовт Идицясь, кияк а карми содамо, косто Сон сась».

<sup>28</sup>Сестэ Иисус Пазонь кудосонтъ тонавтомсто марявиксстэ яволятсь: «Вана, тынь содасамизь Монь, мик содатадо, костонян?! Мон сын аволь Эсень пельде, Монь кучимим Се, кона алкуксонь. Ансяк тынь Сонзэ а содасынк.

<sup>29</sup>Мон содаса Сонзэ, эдь Мон Сонзэ пельде, Сон кучимимгак Монь».

<sup>30</sup>Сестэ ульнесь мелест кундамс Сонзэ, ансяк кияк эзь кепеде каршонзонзо кедь, эдь яла эзь сакшно Сонзэ шказо.

<sup>31</sup>Ломантнестэ ламот кемезевсть Сонензэ ды кортасть: «Зярдо сы Пазонь кучовт Идицясь, арази Сон теи седе ламо тамашат, зяро Те тейсь?»

### **Еврейтне арсить кундамс Иисусонь**

<sup>32</sup>Зярдо фарисейтне маризь ломантнень ютксо Иисусто истят кортамотнень, сестэ сын ды попонь покштнэ кучсть Пазонь кудонь ванстыцят Сонзэ кундамо.

<sup>33</sup>Иисус мерсь тенст: «А куватьс кадовсь улемс Монень тынк марто. Курок Мон туян Сенень, кие Монь кучимим.

<sup>34</sup>Карматадо Монь вешнеме, а мусамизь. Косо улян Мон, тов тынь а савтадо».

<sup>35</sup>Сестэ еврееень прявтнэ кортасть эсь ютковасть: «Ков Сонзэ мелезэ туемс истя, натой миненек Сон а муевияк? Паряк, Сон арси туемс минек ломантнень, конат эрить гректнень ютксо, ды тонавтомс гректнень?

<sup>36</sup>Мезде кортыть неть валтнэ, конатнень Сон ёвтынзе: “Карматадо Монь вешнеме, а мусамизь” ды “Косо улян Мон, тов тынь а савтадо”?»

### Эрямо ведень лейть

<sup>37</sup>Покшчинь меельце сехте ине чистэнтъ Иисус стясь ды марявиксстэ мерсь: «Кинь симемазо сась, се сазо Монень ды симезэ.

<sup>38</sup>Кие кеми Монень, кода ёвтазь Пазонь пельде Сёрмадовкссонтъ, сень эйстэ кармить чудеме эрямо ведень лейть».

<sup>39</sup>Тень Сон ёвтызе Оймеялтонть эйстэ, кона карми улеме максозь Сонензэ кемицятненень. Ансяк Иневанькс Оймеялтошь сынст лангсо яла арасель, секс мекс Иисус яла эзь ульне кепедезь инекчис.

### Иисусто эрва кодат мельтне

<sup>40</sup>Нетъ валтнэнь марязь, ломантнестэ ламот мерсть: «Сон алкукс се пазмарицясь».

<sup>41</sup>Омбонстнэ кортасть: «Те – Пазонь кучовт Идиця». Лият кортасть: «Галилеясто Пазонь кучовт Идицясь, нама, а сы!

<sup>42</sup>Эли апаколь ёвта Пазонь пельде Сёрмадовкссо: Пазонь кучовт Идицясь сы Давид инязоронтъ раськестэ ды Вифлеем велестэ, секе таркастонть, косто ульнесь Давид?»

<sup>43</sup>Истя лиссть Сонзэ кувалма ломантнень ютксо явновомат-пелькстамот.

<sup>44</sup>Конатнень-конатнень ульнесь мелест кундамс Сонзэ, ансяк киненьгак эзь кепедеве лангозонзо кедь.

### Евреень прявтнэ а кемить Иисуснэнь

<sup>45</sup>Зярдо Пазонь кудонь ванстыцятне састь мекев попонь покштнэненень ды фарисейтненень, сетне кевкстизь сынст: «Мекс эзинк ветя Сонзэ?»

<sup>46</sup>Пазонь кудонь ванстыцятне каршост мерсть: «Зярдо як вейкеяк ломань эзь корта истя, кода Те ломанесь».

<sup>47</sup>Фарисейтне мерсть тенст: «Арази тыньгак максынк прынк манямс?»

<sup>48</sup>Нать кияк прявтнэнь эли фарисейтнень эйстэ кемезевсь Сонзэ эйс?

<sup>49</sup>А вана неть истяконь ломантне а содасызь Коенть: сынъ весе сюдозь-эрдекстазь».

<sup>50</sup>Никодим, фарисейтнестэ вейкесь, кона веть сакшнось Иисуснэнь, кевкстинзе сынст:

<sup>51</sup>«Тееви-арась минек Коень коряс суд ломанентень, икелев Сонзэ апак кунсоло ды апак сода, мезе Сон тейсь?»

<sup>52</sup>Тень каршо мерсть тензэ: «Тонгак, паряк, Галилеясто? Тонавтнек Пазонь пельде Сёрмадовкстнэнь ды несак: Галилеясто пазмариця а сы».

<sup>53</sup>Весе сралесть эсь кудоваст.

## Иоанна 8

### Ускуриця аванть лангс ливтемазо

<sup>1</sup>Иисус жо тусь Ойумарькс пандо пряв.

<sup>2</sup>Ашолгадама шкасто Сон таго сась Пазонь кудонь пирявксонть потс, ды весе ломантне мольсть Тензэ. Сон озась ды кармасть тонавтомост.

<sup>3</sup>Тесэ Койс тонавтыцятне ды фарисейтне ветясть Тензэ ава, кона кундазель ускурямсто, стявтызь сонзэ куншкас

<sup>4</sup>ды мерсть Иисуснэнь: «Тонавтыця! Те авась кундазь ускурямсто.

<sup>5</sup>Моисей Койсэнтъ кармавтсь тенек чавномс истятнэнь кевсэ, а вана Тон мезть мерят?»

<sup>6</sup>Сынъ кортасть тень Сонзэ снартнеманзо-варчавтнеманзо кисэ, мейсэяк кундамс Сонзэ ды чумондомс. Иисус жо комась ды сёрмадсь сурсонзо моданть лангс лангозост мелень апак яво.

<sup>7</sup>Ансяк сынъ ялатеке апак лотксе кевкстнесть Сонзэ. Сестэ Сон кепедизе прянзо ды мерсь тенст: «Кие эйстэнк пежеттеме, се васенцекс ёртозо лангозонзо кев».

<sup>8</sup>Ды Сон таго, комадонь прят, сёрмадсь моданть лангс.

<sup>9</sup>Сынь, тень марязь, ды оймеёжосост чумондозь, кармасть тукшномо вейке омбоце мельга, васенцекс тусть сехте сыретне. Кадовсь ансяк Иисус ды куншкас аравтозь авась.

<sup>10</sup>Иисус кепедизе прянзо ды авадонть башка киньгак апак нее мерсь тензэ: «Ава, косо тонь чумондыцятне? Кияк тонь эзинзеть чумондо?»

<sup>11</sup>Сон каршонзо мерсь: «Кияк, парочи!» Иисус мерсь тензэ: «Монгак тонь а чумондтан. Азё ды икелепелев пежетьс иля совсе».

### **Иисус – масторлангонть валдозо**

<sup>12</sup>Иисус таго кортась ломантненень: «Мон – масторлангонть валдозо. Кие моли Монь мельга, се а карми якамо чоподасо, сень карми улеме эрямонь валдозо».

<sup>13</sup>Сестэ фарисейтне мерсть тензэ: «Тон Тонсь Эсеть эйстэ ёвтнят, секс Тонь валот а видетьь».

<sup>14</sup>Иисус тень каршо мерсь сыненст: «Бути Мон Монськак Эстедень ёвтнян, ялатеке Монь валон алкуксонь, эдь Мон содан, косто сынь ды ков Мон молян. Тынь жо а содатадо, косто Мон ды ков молян».

<sup>15</sup>Тынь судонть тейтядо лангс ванозь. Мон суд а теян киненьгак.

<sup>16</sup>Теиндерянгак Мон суд, Монь судом виде, эдь Мон аволь съкамон – Монь марто Тетям, Монь Кучицясь.

<sup>17</sup>Тынк Коенть эйсэяк сёрмадозь: кавто ломаненть вейкетьстэ ёвтамось ловови видекс.

<sup>18</sup>Мон Монсь яволявтнян Эсень эйстэ, ды яволявтни Монь эйстэ Тетямгак, Монь Кучицясь».

<sup>19</sup>Сынь кевкстизь Сонзэ: «Косо тонь Тетят?» Иисус тень каршо мерсь: «Тынь а содасамизь Моньгак, Тетяньгак. Бути содавлимизь Монь, сестэ содавлинк Тетяньгак».

<sup>20</sup>Нетъ валтнэнь кортась Иисус ярмаконь каямо горобиянтъ вакссо, Пазонь кудосо тонавтомо, ды кияк Сонзэ эзизе кунда, секс мекс Сонзэ шказо яла эзь сакшно.

**Ков Мон молян, тов тынь а савтадо**

<sup>21</sup>Иисус таго мерсь тенст: «Мон туян. Тынь карматадо Монь вешнеме, ансяк кулсетядо пежетенк потс. Ков Мон молян, тов тынь а савтадо».

<sup>22</sup>Тесэ еврееень прявтиэ кортасть: «Арази Сон Сонсь пурны Эсь прянзо маштомо, улема, секс корты: “Ков Мон молян, тов тынь а савтадо”?»

<sup>23</sup>Сон мерсь тенст: «Тынь тестэ, модалангстонть, кона ало, Мон жо сынъ верде. Тынь те масторлангонть эйстэ, Мон аволь те масторлангонть эйстэ.

<sup>24</sup>Секс Мон мериньгак тенк: тынь кулсетядо пежетенк потс. А кеминдерятадо, Мон улян, кие Мон улян, кулсетядо пежетенк потс».

<sup>25</sup>Сестэ кевкстизь Сонзэ: «Кият эно Тон?» Иисус мерсь тенст: «Мон – ушодома шкасто Улицясь, кода кортангак тенк.

<sup>26</sup>Монь улить ламо кортамон ды судямо валон тынк эйстэ. Ансяк Монь Кучицясь виде, ды Мон, мезе маринь Сонзэ пельде, сень кортангак тыненк, масторлангонсетненень».

<sup>27</sup>Сон кортась тенст менелень Тетянзо эйстэ, ансяк сынъ эзизь чарькоде.

<sup>28</sup>Сестэ Иисус мерсь тенст: «Кода кепедьсынк Ломантнень Цёранть, сестэ чарькодтядо, Мон улян, кие Мон улян, ды мезеяк а теян Эсень пельде, ансяк мезес Тетям тонавтымим, сень кортангак.

<sup>29</sup>Монь Кучицясь мартон. Сон эзимим кадо съкамон, эдь Мон свал теян сень, мезе тукшны Сонзэ мельс».

<sup>30</sup>Зярдо Иисус кортась тень, ламот кемезевсть Сонензэ.

### Видечись тынк олякстомтадызь

<sup>31</sup>Сестэ Иисус мерсь еврейтненень, конат кемезевсть Сонзэ эйс: «Кирдевиндерятадо Монь валсон, сестэ тынь алкукс Монь тонавтницян,

<sup>32</sup>тынь чарькодъсынк видечинть, ды видечись тынк олякстомтадызь».

<sup>33</sup>Сынь каршонзо мерсть: «Минь Авраамонь раськень-буень поладыцят, минь эзинек ульне урекс киненьгак зярдояк. Кода эно Тон кортат: минь ультяно олякчисэ?»

<sup>34</sup>Иисус мерсь тенст: «Алкукс, алкукс кортан тенк: эрвась, кона пежетьс сови, пежетенть урезэ.

<sup>35</sup>Ансяк уресь а эри кудосо пингезэнзэ; цёрась жо эри тосо пингезэнзэ.

<sup>36</sup>Истя, ливтиндерятадызь Цёрась урексчистэ, алкукс олячисэ ультядо.

<sup>37</sup>Содаса, тынь Авраамонь буень поладыцят. Ялатеке вешнетядо Монь маштоман, секс мекс Монь тонавтомам а превс а седейс а саеви тенк.

<sup>38</sup>Мон кортан седе, мезе неинь Тетянь кедьсэ; тыньгак тейтядо сень, мезе неиде эсь тетянк кедьсэ».

### Тынк тетянк – Идемевсь

<sup>39</sup>Еврейтне мерсть Иисуснэнь тень каршо: «Минек тетянок – Авраам». Сон мерсь тенст: «Улевлидеяк Авраамонь эйкакшт, теевлиде Авраамонь тевть.

<sup>40</sup>Ней вана саиде мель маштомс Монь, ломаненть, кона тыненк ёвтни видечи, се видечинть, конань Мон мария Пазонтъ пельде. Авраам истя эзь тейне.

<sup>41</sup>Тынь тейнетядо эсь тетянк тевензэ». Тень лангс мерсть Сонензэ: «Минь аволь ускурявксонь чачовттано; минек вейке тетянок, Пазось».

<sup>42</sup>Иисус мерсь тенст: «Улевельгак Пазось тынк тетянк, вечкевлимизь Монь, эдь Мон Пазонтъ пельде лисинь ды сынь. Мон аволь Эсень пельде сынь – Пазось кучимим Монь.

<sup>43</sup>Мекс тынь а чарькодтядо, мезе Мон кортан тенк? Секс мекс тынк арась меленк кунсолломс Монь валон.

<sup>44</sup>Тынь – тетяка левкст, Идемевсень эйкакшт, тынь бажатадо эсенк тетянтъ мелензэ топавтомо. Сон свал ульнесь ломань маштница ды эзь кирдеве видечисэнтъ, эдь арась сонзэ эйсэ видечи. Зярдю кенгели, сон теке ведьсэ кал, эдь сон кенгелиця ды кенгелемантъ тетязо.

<sup>45</sup>Мон жо кортан видечи, секскак тынь а кемтядо Монень.

<sup>46</sup>Арази киненьгак эйстэнк Мон чумондован пежетентъ кисэ? Бути Мон кортан видечи, мекс тынь а кемтядо Монень?

<sup>47</sup>Кие Пазонтъ пельде, се кунсолы Пазонь валтнэнь. Тынь аволь Пазонтъ пельде, секс а кунсолотадо».

#### **Мон ульнинь Авраамдо икеле**

<sup>48</sup>Тень лангс еврейтне мерсть Иисуснэнь: «Арази минек валоннок аволь видеть: Тон – самариянь ломанят ды Тонь эйсэ идемевсь?»

<sup>49</sup>Иисус мерсь: «Монь эйсэ идемевсь арась. Мон Эсень Тетянтъ лован, ансяк тынь вана позорятадо Монь.

<sup>50</sup>Мон а вешнян Эстенъ шнамо: ули Лия, кона вешни ды видестэ суди.

<sup>51</sup>Алкукс, алкукс кортан тенк: кие топавтсы Монь валом, се а кулы пингеде пингес».

<sup>52</sup>Еврейтне мерсть Тензэ: «Ней чарькодинек, Тонь эйсэ идемевсь. Авраамгак кулось, пазмарицятнеяк, а вана Тон кортат: “Кие топавтсы Монь валом, се а кулы пингеде пингес”.

<sup>53</sup>Нать Тон седе ине Авраам тетядонок, кона кулось? Пазмарицятнеяк кулось. Тон жо мезекс Эсь прят ловат?»

<sup>54</sup>Иисус каршост мерсь: «Бути Мон Монсь инелгавтневлия-шнавлия Эсь прям, те мезекскак аволь аште. Ней жо Монь инелгавтни Тетям, конань эйтэ тынь кортатадо, келя Сон тынк Пазонк.



<sup>55</sup>Тынь а содасынк Сонзэ, Мон жо содаса. Мериндерян, а содаса, сестэ улян тынк кондымо кенгелицякс. Ансяк Мон содаса Сонзэ ды валонзояк топавтан.

<sup>56</sup>Авраам тетянк кенярдкшнось сенень: сонензэ сави неемс Монь чинть. Сон неIZE ды кецясь».

<sup>57</sup>Тень лангс еврейтне мерсть Тензэ: «Тонеть арасть оштё ведьгемень иетькак, ды Тон неик Авраамонь?»

<sup>58</sup>Иисус мерсь тенст: «Алкукс, алкукс кортан тенк: Авраамонь чачомадо икеле Мон уш ульнинь».

<sup>59</sup>Сестэ сынь сайсть кевть ды ёртыксэлизь Сонзэ лангс. Ансяк Иисус лиссь Пазонь кудостонтъ, ютась ютковаст седе тов ды ёматотсь.

## Иоанна 9

### Иисус шумбралгавты сокорсто чачозентъ

<sup>1</sup>Ютамсто Иисус несъ ломань, сокор чачома шкастонзо.

<sup>2</sup>Тонавтницянзо кевкстизь Сонзэ: «Равви, мекс сон сокорсто чачсь? Кие совась пежетъс: сонсь эли тетянзо-аванзо?»

<sup>3</sup>Иисус каршост мерсь: «Аволь сонзэ, аволь тетянзо-аванзо пежетнесэ тевесь. Сон чачсь сокорокс, сонзэ лангсо Пазонь тевтнень невтемаст кисэ.

<sup>4</sup>Монень эряви теемс Монь Кучицянтъ тевензэ, зярс чи. Сы ве, сестэ киненьгак мезеяк а тееви.

<sup>5</sup>Зярс Мон масторлангсан, Мон – масторлангонь ломантненень валдо».

<sup>6</sup>Тень мерезь, Сон сельгсь мода лангс, сельгевксэнтъ эйстэ тейсь рудазнэ, те рудазнэсэнтъ ваднинзе сокоронтъ сельмензэ

<sup>7</sup>ды мерсь тензэ: «Азё, шляк Силоам экшелямо таркасонть». – Силоам валонтъ смустезэ: кучовт. – Сон мольсь, шлясь ды сась мекев неицякс.

<sup>8</sup>Шабратне ды сетне, конат сонзэ некшнизь икеле сокорокс, кевкстность вейкест-вейкест: «Те аволь се, кона озадо аштиль ды лезкске вешиль?»

<sup>9</sup>Веенст кортасть: «Те сон». Лият: «Аволь, ансяк сонзэ ёнов молиця». Сонсь жо кортась: «Те мон».

<sup>10</sup>Сестэ сынь кевкстность сонзэ: «Кода панжовсть тонь сельметь?»

<sup>11</sup>Сон мерсь тень каршо: «Ломань, конанень мерить Иисус, тейсь рудазнэ, ваднинзе сельмень ды мерсь тень: “Азё Силоам экшелямо таркантень ды шляк”. Мон молинь, шлинь ды карминь нееме».

<sup>12</sup>Сестэ кевкстизь сонзэ: «Косо Сон?» Сон каршост мерсь: «А содан».

#### **Фарисейтне вешнить шумбралгавомань тувталтнэнь**

<sup>13</sup>Ветизь те икелень сокоронть фарисейтненень.

<sup>14</sup>Се чись, зярдо Иисус теизе рудазнэнь ды панжинзе тензэ сельметненень, ульнесь оймсема чи.

<sup>15</sup>Фарисейтнеяк кевкстизь, кода сон кармась нееме. Сон мерсь тенст: «Рудазнэ путсь Сон сельмень лангс, мон шлинь ды вана неян».

<sup>16</sup>Сестэ фарисейтненень ютксто конат-конат кортасть: «Ломанесь, кона оймсема чи а лови, аволь Пазонтъ пельде». Лият кортасть: «Кода теевить пезетев ломанненень истят тамашат?» Ды ульнест ютковаст явновомат-пелькстамот.

<sup>17</sup>Таго мерить сокоронтень: «Тон мезть мерят Сондензэ, эдь Сон панжинзе сельметь?» Сон мерсь: «Те пазмариця».

<sup>18</sup>Ялатеке еврееень прявтнэ эзь кеме сенень, будто сон сокороль ды теевсь неицякс. Сестэ тердизь неицякс теевезенть тетянзо-аванзо

<sup>19</sup>ды кевкстизь сынст: «Те тынк цёрась, конадо тынь кортатадо, келя, сон чачсь сокорсто? Кода эно ней сон ней?»

<sup>20</sup>Тетянзо-аванзо мерсть тень каршо: «Минь содатано, те – цёранок, ды сон чачсь сокорсто».

<sup>21</sup>Кода ней неи, а содатано, ды кие панжинзе сельмензэ, минь а содатано: сонськак уш покш, эсензэ кевкстинк, кадык сонсь эстедензэ ёвты».

<sup>22</sup>Тетянзо-аванзо пельсть евреень прывтнэде, секс истя кортасть. Эдь еврейтне прасть истямо мельс: кие Иисусонь ловсы Пазонь кучовт Идицякс, сень допрок панемс синагогасто.

<sup>23</sup>Секс тетянзо-аванзо мерстькак: «Сонсь уш покш, эсензэ кевкстинк».

<sup>24</sup>Истя омбоцеде тердизь ломаненть, кона сокорок, ды мерсть тензэ: «Макст Пазонтъ икеле вал видестэ кортамодо. Минь содатано, Се Ломанесь пежетев».

<sup>25</sup>Сон тень каршо мерсь тенст: «Пежетев, аволь пежетев Сон, а содан. Ансяк вейке содан: мон ульнинь сокор, ней вана неян».

<sup>26</sup>Сестэ сонзэ таго кевкстизь: «Мезе тейсь Сон мартот? Кода панжинзе сельметь?»

<sup>27</sup>Сон каршост мерсь: «Мон уш ёвтынть тенк, тынь эзиде кунсоло. Мейс эно таго саиде мель марямс тень? Паряк тынккак меленк теевемс Сонзэ тонавтницякс?»

<sup>28</sup>Сынь покордызь сонзэ ды мерсть: «Тон – Те ломаненть тонавтницязо, минь жо Моисеень тонавтницязо.

<sup>29</sup>Минь содатано, Моисей марто кортась Пазось, тень жо а содасынеккак, костонь сон».

<sup>30</sup>Ломанесь каршост мерсь: «Те дивавтыяк эйсэнь: тынь а содатадо, костонь Сон, ялатеке Сон панжинзе монь сельмень.

<sup>31</sup>Ды минь содатано, пежетевтнень Пазось а кунсолы, ансяк кие Пазонтъ лови ды теи Сонзэ мелензэ кувалт, сень Пазось кунсолы.

<sup>32</sup>Пингезэнзэ эзь марявкшно, кие панжоволь сокорсто чачозень сельметь.

<sup>33</sup>Аволь улеяк Сон Пазонтъ пельде, мезеяк Тензэ истямо аволь тееве».

<sup>34</sup>Сынь тень каршо мерсть тензэ: «Пежеть потсо тон весе чачить, ды вана терявтнят минек тонавтомо?» Ды панизь сонзэ тосто.

### Седеень сокорчи

<sup>35</sup>Зярдэ Иисус марясь шумбралгавтозенть панемадо, Сон муизе ды мерсь тензэ: «Кемат-арась Пазонь Цёранть эйс?»

<sup>36</sup>Сон каршонзо мерсь: «Кие Сон, парочи? Ёвтык монень, ды сестэ мон карман кемеме Тензэ».

<sup>37</sup>Иисус мерсь тензэ: «Тон уш неик Сонзэ, Сон ней мартот корты».

<sup>38</sup>«Кемаң, Азором!» – мерсь сон ды суюконясь Тензэ.

<sup>39</sup>Иисус мерсь: «Судонь кисэ Мон сынь те масторлангонтень: сокортнэ теевельть неицякс, а вана неицятне – сокорокс».

<sup>40</sup>Тень марязь, кой-кить фарисейтнестэ, конат ульнесть мартонзо, мерсть Тензэ: «Нать миньгак сокортано?»

<sup>41</sup>Иисус мерсь тенст: «Улевлидеяк сокорт, пежетенк авольть уле. Ней, зярдэ тынь кортатадо, келя, нетядо, пежетесь кадови лангсонк».

## Иоанна 10

### Паро ваныця

<sup>1</sup>«Алкукс, алкукс кортан тенк: кие сови ревень кардазс аволь ортава, эци лия таркава, се – салыця ды нельгиця.

<sup>2</sup>Ортава совицясь – реветнень ваныцяст.

<sup>3</sup>Сонензэ орта ванстыцяськак панжи, реветнеяк сонзэ вайгелензэ кунсолыть. Сон лемсэст эсь ревензэ терди ды сынст кардазсто ливти.

<sup>4</sup>Зярдэ ливтьсынзе эсь ревензэ, Сонсь юты икелест. Реветне молить мельганзо, эдь содасызь вайгелензэ.

<sup>5</sup>Лия мельга сынь а молить, оргодить эйстэнзэ, эдь а содасызь лиянтъ вайгелензэ».

<sup>6</sup>Иисус ёвтнize тенст те валвелявксонтъ, ансяк сынъ эзть чарькоде, мезде Сон кортась сынест.

<sup>7</sup>Истя Иисус таго мерсь тенст: «Алкукс, алкукс кортан тенк: Мон реветненень ортан.

<sup>8</sup>Весе, кить сакшность Мондень икеле, салыцят ды нельгицят, ды реветне эзизь кунсоло сынст.

<sup>9</sup>Мон ортан: кие сови Эзган – ванстови. Сон совияк, лисияк, луганаргак муи.

<sup>10</sup>Салыцясь сакшны ансяк саламо, маштомо ды ёмавтомо. Мон сынъ эрямонь максомо ды максомс сонзэ велькса, ланга чудиякс.

<sup>11</sup>Мон паро ваныцян: паро ваныцясь эсь эрямонзо путы ревензэ кисэ.

<sup>12</sup>Сиведезесь, кона аволь ваныця ды конань реветне аволь эсензэ, зярдю неи самсто верьгиз, кадсынзе реветнень ды оргоди. Верьгизэсь салсесынзе реветнень, сравтнесынзе.

<sup>13</sup>Сиведезесь оргоди, эдь сон ансяк сиведезь, реветнень кисэ а мелявтыяк.

<sup>14</sup>Мон паро ваныцян, Мон Эсенсетнень содасынь, Монсенсетнеяк Монь содасамизь,

<sup>15</sup>истямо ладсо кода Тетясь Монь содасамам, ды Монгак содаса Тетянтъ. Мон эрямом путан реветнень кисэ.

<sup>16</sup>Монь улить лияткак ревень, конат аволь те кардазонь, сетненьгак тень ветяма. Сынъгак кармить кунсолосома вайгелем, ды карми улеме вейке стада ды вейке ваныця.

<sup>17</sup>Секс Тетясь Монь вечксамам, мекс Мон эрямом максан, мекев сонзэ саемга.

<sup>18</sup>Киненьгак сон а нельгеви Монь кедьстэ, Мон Эсь мельсэнъ сонзэ максан. Монь ули азорксчим сонзэ максомс ды ули азорксчим мекев сонзэ саемс. Те кармавтомантъ максызе Монень Тетям».

<sup>19</sup>Нетъ валтнэнь кувалма таго лиссть еврейтнень ютксо явновомат-пелькстамот.

<sup>20</sup>Ламот эйтэст кортасть: «Идемевсь Эйсэнзэ, Сон превстэ лиссь. Мезть кунсолотадо Сонзэ?»

<sup>21</sup>Лият кортасть: «Нетъ валтнэ аволь ломанень, конань эйсэ идемевсь. Арази идемевснень панжовить сокоронь сельметь?»

### **Еврейтне а кемить Иисуснэнь**

<sup>22</sup>Сась телесь, ды Ерусалимсэ ульнестъ Пазонь кудонь одс ванськавомань покшчитне.

<sup>23</sup>Иисус якась Пазонь кудонь пирявт потмова, Соломононь галереяванть.

<sup>24</sup>Тесэ еврейтне промсть перьканзо ды кортасть Тензэ: «Кувать а кувать Тон кармат кирдеменек ачарькодемасо? Улиндерят Тон Пазонь кучовт Идиця, ёвтак тенек видьстэ».

<sup>25</sup>Иисус мерсь тенст: «Мон ёвтнинь тенк, ансяк тынь а кемтядо. Тевтне, конатнень Мон теян Тетянь лемсэ, сынсь невтить, киян Мон.

<sup>26</sup>Ялатеке тынь а кемтядо, секс мекс тынь аволь Монь стадань реветнестэ, кода Мон тенк меринь.

<sup>27</sup>Монь реветне кунсолыть вайгелем, Монгак содасынь сынст, сыньгак молить Монь мельга.

<sup>28</sup>Мон максан тенст пингедэ пингень эрямо, ды сынь а ёмить пингедэ пингес. Кияк сынст а саласынзе Монь кедьстэ.

<sup>29</sup>Тетям, кона максынзе сынст Монень, весемеде покш. Сынь киненьгак а саевить Тетянь кедьстэ.

<sup>30</sup>Мон ды Тетясь – вейкеттяно».

<sup>31</sup>Сестэ еврейтне таго сайсть кедезэст кевть Сонзэ чавомс.

<sup>32</sup>Иисус мерсь тенст: «Мон теинь тынк сельме икеле ламо паро тевть, конат Тетянь пельде. Кона теवंть кисэ арсетядо чавомс Монь кевсэ?»

<sup>33</sup>Еврейтне мерсть Сонензэ тень каршо: «Аволь паро тевень кисэ меленек чавомс Тонь кевсэ – Пазонтъ лангсо нарьгамот-покордамот кисэ ды мейс Тон, ломань, Эсь прят теят Пазокс».

<sup>34</sup>Иисус мерсь тенст: «Арази апак сёрмадо тынк Койсэнтъ: “Мон меринь: тынь пазтадо”?»

<sup>35</sup>Бути Пазось мерсь пазт сетненень, конатненень максозель Пазонь валось, – ды Пазонь пельде Сёрмадовкось корты ансяк видечи, –

<sup>36</sup>мейс сестэ Монень, конань Тетясь алтызе Эстензэ ды кучизе масторлангов, тынь кортатадо: “Пазонтъ лангсо нарьгат”, зярдо Мон мерян: “Мон – Пазонь Цёран”?»

<sup>37</sup>Бути Мон а теян Тетянь тевензэ, илядо кеме Монень.

<sup>38</sup>Теиндерян сынст, сестэ кемеде Монь тевтненень, бути Монень а кемтядо. Сестэ тынь чарькодъсынк ды карматадо кемеме: Тетясь Монь эйсэ, Монгак Тетянтъ эйсэ».

<sup>39</sup>Сестэ таго арсестъ кундамс Сонзэ, ансяк Иисус тусь кедест алдо.

<sup>40</sup>Иисус таго тусь Иордан леень тона пелев, се таркантень, косо икеле нававтыль Иоанн, ды кадовсь тоско.

<sup>41</sup>Ламот сакшность Иисуснэнь. Сынъ кортасть: «Иоанн эзь тее кодамояк тамаша. Ансяк весемесь се, мезе ёвтась Сондензэ, видель».

<sup>42</sup>Ды ламот тосо кемезевсть Иисуснэнь.

## Иоанна 11

### Лазарень куломась

<sup>1</sup>Сэредиль ве ломань, лемезэ Лазарь. Сон ульнесь Бетания велестэ, косо зрясь Мария Марта патянзо марто.

<sup>2</sup>Мария, конань Лазарь ялаксозо сэредиль, ульнесь се, кона Азоронтъ ваднизе тантей чине ойсэ ды Сонзэ пильгензэ нардтнинзе эсь прячерьсэнзэ.

- <sup>3</sup>Сазортнэ пачтясть Иисуснэнь: «Азоро! Се, конань Тон вечксак, сэреди».
- <sup>4</sup>Тень марязь, Сон мерсь: «Те сэредемась аволь куломас – Пазонь шнамос. Тень вельде шнави-инелгавтови Пазонь Цёрась».
- <sup>5</sup>Иисус вечкилизе Мартань, сазоронзояк ды Лазареньгак.
- <sup>6</sup>Зярдо марясь Лазарень сэредемадо, сестяк кавто чить кадновсь се таркасонть, косо ульнесь.
- <sup>7</sup>Мейле Иисус мерсь тонавтницянстэнь: «Мольтяно мекев Иудеяв».
- <sup>8</sup>Тонавтницятне мерсть Тензэ: «Равви, а умок еврейтне чавиксэлидизь кевсэ, ды Тон таго молят тов?»
- <sup>9</sup>Иисус ёвтась: «Эли аволь кемгавтово част чисэнь? Кие яки чить, се а пупордькшни, эдь сон несы те масторлангонть валдонзо.
- <sup>10</sup>Кие яки веть, се пупордькшни, сонзэ арась валдозо».
- <sup>11</sup>Тень ёвтазь, Сон поладсь: «Лазарь ялганок матедевсь, Мон молян сонзэ пувтамо».
- <sup>12</sup>Тонавтницянзо мерсть: «Азоро! Бути сон матедевсь, сестэ шумбралгады».
- <sup>13</sup>Иисус жо кортась куломадонзо, ансяк сынь арсесть, Сон корты удомас матедевемадо.
- <sup>14</sup>Сестэ Иисус ёвтась тенст видьстэ: «Лазарь кулось».
- <sup>15</sup>Ды кенярдкшнан кисэнк, мекс Мон араселинь тосо: ней тынь седе пек кемевезевтядо. Адядо эно сонензэ».
- <sup>16</sup>Сестэ Фома, конань ульнесь лия лемезэ Кавтаське, мерсь лия тонавтницятненень: «Мольтяно миньгак ды кулотано сонзэ марто!»
- Иисус – вельмема ды эрямо**
- <sup>17</sup>Зярдо Иисус сась, Лазарень уловозо уш ниле чить кода калмсоль.
- <sup>18</sup>Бетаниясь ульнесь Ерусалим маласо, колмошка вайгельбень туро,



<sup>19</sup>ды Иудеясто ламот састь Мартанень ды Мариянень ды оймавтсть сынст ялаксот куломанзо кувалма.

<sup>20</sup>Марта, кода марясь Иисусонь самодо, сыргась каршонзо, Мария кадовсь кудос.

<sup>21</sup>Марта мерсь Иисуснэнь: «Азоро! Улиндерявлить Тон тесэ, аволь куло ялаксом.

<sup>22</sup>Ансяк содан, мезе илязат веше Пазонть кедьстэ, Сон нейгак Теть максы».

<sup>23</sup>Иисус мерсь тензэ: «Тонь ялаксот вельми».

<sup>24</sup>Марта мерсь Тензэ: «Содан, вельми вельмемане, меельце чистэнтъ».

<sup>25</sup>Иисус ёвтась тензэ: «Мон – вельмемась ды эрямось. Монь эйс кемицясь кулындеряйгак, ялатеке карми эрямо.

<sup>26</sup>Эрвась, кие эри ды кеми Монь эйс, а кулы пингедэ пингес. Кемат-арась тенень?»

<sup>27</sup>Сон мерсь Тензэ: «Эно, Азоро! Мон кеман: Тон Пазонь кучовт Идицят, Пазонь Цёра, конанень эрявсь самс масторлангов».

### **Иисус аварди**

<sup>28</sup>Тень мерезь, Марта мольсь, тердизе Мариянь, эсь сазоронзо, ды салава тензэ ёвтась: «Тонавтыцясь тесэ ды терди тонь».

<sup>29</sup>Се, кода ансяк маризе тень, капшазь стясь ды тусь Сонензэ.

<sup>30</sup>Иисус зярс эзь совакшно велентень, яла ульнесь се таркасонть, косо Сонзэ вастызе Марта.

<sup>31</sup>Еврейтне, конат Мария марто кудосольть ды оймавтсть сонзэ, зярдю неизь, кода Мария капшазь стясь ды лиссь, сыргасть мельганзо. Сынь арсесть, сон тусь калмонть лангс авардеме.

<sup>32</sup>Мария, кода сась тозонь, косоль Иисус, ды зярдю неизе Сонзэ, прась пильгезэнзэ ды мерсь Тензэ: «Азоро! Улиндерявлить Тон тесэ, аволь куло ялаксом».

<sup>33</sup>Иисус, кода неIZE сонзэ ды мартонзо сазь еврейтненьгак авардемадо, Сонськак ризнэзевсь, ды талнозевсь седеезэ,

<sup>34</sup>ды кевкстинзе: «Козонь тынь путынк сонзэ?» «Адя ды Тонсь несак, Азоро», – мерсть сынь.

<sup>35</sup>Иисусонь тусть сельведензэ.

<sup>36</sup>Сестэ еврейтне кортасть эсь ютковасть: «Вантая, кода Сон вечкилизе сонзэ!»

<sup>37</sup>Конат-конат эйтэст кортасть: «Арази Те, кона сокоронть сельмензэ панжинзе, Лазареньгак аволизе вансто куломадо?»

### **Иисус вельмевтьсы Лазарень**

<sup>38</sup>Иисус, таго Эськанзо ризнэзь, мольсь калмонть ваксс. Те ульнесь кевботмар, совамо таркасонзо путозель кев.

<sup>39</sup>Иисус мерсь: «Саинк кевенть». Кулозенть патязо, Марта, мерсь Тензэ: «Азоро, тосо уш стака чине, эдь ниле чить, кода сон калмосо».

<sup>40</sup>Иисус мерсь: «Арази эзинь мере Мон теть: кеминдерят, несак Пазонь инексчинть?»

<sup>41</sup>Сестэ саизь кевенть калмонть лангсто, косо ульнесь кулозесь. Иисус варштась менельс ды мерсь: «Тетяй! Сюкпрят Теть, Тон маримик Монь.

<sup>42</sup>Мон содан, Тон свал Монь марясамак, ансяк ёвтыя тень ломантнень кисэ, конат аштить тесэ, кемевтемаст кисэ, те Тон кучимик Монь».

<sup>43</sup>Тень мерезь, Сон серьгедсь верьга вайгельсэ: «Лазарь! Листь ушов!»

<sup>44</sup>Кулозесь лиссь, кедьга-пильгева тапарязь калмамонь тапарямотнесэ, чамазояк сюлмазель пацясо. Иисус мерсь тенст: «Олякстомтынк сонзэ, кадык яки».

### **Евреень прявнэ арсить маштомс Иисусонь**

<sup>45</sup>Сестэ еврейтнестэ ламот, конат састь Мариянь содавтомо, ды неизь, мезе тейсь Иисус, кармасть кемеме Тензэ.

<sup>46</sup>А вана конат-конат эйтэст мольсть фарисейтненень ды ёвтасть тенст, мезе тейсь Иисус.

<sup>47</sup>Сестэ попонь покштнэ ды фарисейтне пурнасть Инепромкс ды кортасть: «Мезе тенек теемс? Те ломанесь ламо тамашат тейни.

<sup>48</sup>Бути кадсынек Сонзэ истяк, весе кармить кемеме Тензэ, ды сыть рименсетне, истожасызь Пазонь кудоноккак, раськенеккак».

<sup>49</sup>Вейкесь эйтэст, Каиафа, кона ульнесь се иестэнтъ попонь прявтокс, мерсь тенст: «Тынь мезеяк а содатадо,

<sup>50</sup>ды а чарькодтядожк: вейке ломанень куломась раськентъ кисэ ули миненек седе паро весе раськентъ куломадо».

<sup>51</sup>Тень сон ёвтызе аволь эсь пельдензэ. Сон, кода те иень попонь прявт, икелев ёвтызе Иисусонь куломанзо раськентъ кисэ,

<sup>52</sup>ды аволь ансяк те раськентъ кисэ, Пазонтъ весе сравтнезь эйкакшонзо вейс пурнамо ст кисэяк.

<sup>53</sup>Те чистэнтъ саезь, сынъ састъ мельс маштомс Иисусонь.

<sup>54</sup>Секс Иисус эзь якак еврейтненень сельме икельга. Сон тусь тосто чаво мода маласо таркантень, ошс, конань лемезэ Эфраим, ды тозонь кадовкшнось тонавтницянзо марто.

<sup>55</sup>Малавгалесь еврееень Инечись, ды ламот састъ весе масторстонтъ Ерусалимев Инечиде икеле коень-кирдань коряс ванськавтовомо.

<sup>56</sup>Сестэ сынъ вешнестъ Иисусонь, ды Пазонь кудонтъ пирявкс потсо аштемстэ кортасть эсь ютковаст: «Кода тынь арсетядо? Сы а сы Сон покшчив?»

<sup>57</sup>Попонь покштнэ ды фарисейтне кармавтсть: кие карми содамо, косо Иисус, кадык яволявты, ды сестэ сынъ кундасызь Сонзэ.

## Иоанна 12

### **Иисусонь ваднемась Бетаниясо**

<sup>1</sup>Инециденть кото чиде икеле сась Иисус Бетанияв, косо эрясь Лазарь, конань Сон кулозьстэ вельмевтизе.

<sup>2</sup>Тосо анокстась Тензэ каванямо. Марта каванясь, Лазарь ульнесь Иисус марто озадотнень ютксо.

<sup>3</sup>Мария сайсь фунт ванькс нардонь пек питней ой, ваднинзе Иисусонь пильгензэ ды нардтнинзе сынст эсь прячерьсэнзэ. Кудось пешкедсь оенть тантей чинесэ.

<sup>4</sup>Сестэ Иисусонь тонавтницятнестэ вейкесь, Иуда, Симон Искариотонь цёразо, кона мейле миизе Сонзэ, мерсь:

<sup>5</sup>«Мекс а миемаль те оенть колмосядт динардо ды ярмактнень а явшемальть пурныцяненъ?»

<sup>6</sup>Ансяк тень меризе сон аволь секс, мекс мелявтсь пурныцятнень кисэ. Сон сонсь салыцяль: кедьсэнзэль ярмаконь кирдемкась, ды сон сайниль тосто ярмактнень эстензэяк.

<sup>7</sup>Иисус мерсь: «Кадык аванть, сон ванстсь те оенть Монь калмамо чинтень.

<sup>8</sup>Пурныцятне свал тынк марто, Мон жо аволь свал».

### **Попонь покштнэ арсить маштомс Лазареньгак**

<sup>9</sup>Еврейтнестэ ламот марясть, келя, Иисус Бетаниясо, ды састь тов аволь ансяк Иисусонь кисэ, Лазарень неемгаяк, конань Сон вельмевтизе кулозьстэ.

<sup>10</sup>Попонь покштнэ сайсть мель Лазареньгак маштомс,

<sup>11</sup>эдь сонзэ кувалма еврейтнестэ ламот явсть сынст эйстэ ды кармасть кемеме Иисуснэнь.

### **Иисусонь кенярксов совамось Ерусалимев**

<sup>12</sup>Омбоце чистэнтъ ламо ломанть, конат састь Инечив, марясть Иисусонь Ерусалимев ютамондо.

<sup>13</sup>Сынь сайсть пальмань тарадт, лиссть Сонзэ каршо ды сеересть: «Осанна! Улезэ чанстязь-баславазы Азоронть лемсэ Сыцясь, Израилень Инязорось!»

<sup>14</sup>Иисус мусь од осёл, озась лангозонзо, кода теде сёрмадозель:

<sup>15</sup> «Иля пеле, Сион тейтерь! Вана, тонь Инязорот сы од осёл лангсо озадо».

<sup>16</sup>Сонзэ тонавтницяно васня тень эзизь чарькоде. Ансяк мейле, зярдо Иисус ульнесь кепедезь инекчис, ледсь мелезэст, те истя Сонзэ эйстэ ёвтазель Сёрмадовкссо, ды ломантне тень теизыгак Сонензэ.

<sup>17</sup>Ламот, конат ульнесть Иисус марто, зярдо Сон тердизе Лазарень калмостонть ды вельмевтизе сонзэ кулозьстэ, ёвтнесть тень эйстэ.

<sup>18</sup>Секскак истя Сонзэ вастызь ломантне. Сынь марясть Сонзэ теевть те тамашадонть.

<sup>19</sup>Фарисейтне кортасть эсь ютковаст: «Нетядо, тевенек жо тунь а молить? Весе масторлангось моли Сонзэ мельга».

#### **Иисус корты Эсь куломадонзо**

<sup>20</sup>Сетнень ютксо, конат састь Ерусалимев покшчистэ озномо, ульнесть зярыя гректькак.

<sup>21</sup>Сынь састь Филип ваксс, кона ульнесь Галилеянь Бетсаидасто, ды знялдозь кортасть: «Парочи, меленек неемс Иисусонь!»

<sup>22</sup>Филип мольсь ды ёвтась теде Андрейнень; сестэ кавонест мольсть ды ёвтасть тень эйстэ Иисуснень.

<sup>23</sup>Иисус каршост мерсь: «Пазонть шказо сась невтемс Ломантнень Цёранть алкуксонь инексчинзэ.

<sup>24</sup>Алкукс, алкукс кортан тенк: а кулындеряй товзюронь видьмесь, кона прась модас, кадови съкамнензэ; кулындеряй, канды ламо видьметь.

<sup>25</sup>Кие вечксы эсь эрямонзо, се ёмавтсы сонзэ. Кие те масторлангсонть эсь эрямонзо а вечксы, се сонзэ ванстсы пингеде пингень эрямонтень.

<sup>26</sup>Кие Монень важоди, Монь мельга молезэ. Косо Мон, тосо Монь важомгак карми уleme, ды Тетямгак ловсы сень, кие Монень важоди.

<sup>27</sup>Ней Монь седеем покш ризнэмасо: мезе Тень меремс? Тетяй, идемак те часстонть! Ансяк те часонтъ кисэ Мон сынъгак.

<sup>28</sup>Тетяй! Инекс теик Эсь леметь». Сестэ каятотсь менельстэ вайгель: «Инекс теия, тагояк карман инекс темензэ!»

<sup>29</sup>Ломантне, конат тосо аштеть, маризь тень ды кортасть: «Те пурьгине», лиятне кортасть: «Ангел кортась мартонзо».

<sup>30</sup>Иисус тень лангс мерсь: «Аволь Монь туртов ульнесь те вайгелесь – ломантнень туртов.

<sup>31</sup>Ней судонь шка те масторлангонтень, ней те мирэнтъ-масторонтъ апаро прявтось панезь ули тестэ.

<sup>32</sup>Зярдо Мон кепедезь улян моданть лангсто, весень тердьсынъ-ветясынъ Эстенъ».

<sup>33</sup>Тень Сон кортась чарькодеманы макснезь, кодамо куломасо Сон кулы.

<sup>34</sup>Ломантне мерсть Иисуснэнь: «Минек Коенек тонавты, келя, Пазонь кучовт Идицясь эри-ашти певтеме. Кода эно Тон кортат: “Ломантнень Цёрантень кепедевема”? Кие те Ломантнень Цёрась?»

<sup>35</sup>Сестэ Сон мерсь тенст: «Оштё аламошкас валдось мартонк. Якадо, зярс валдось ули, сестэ чоподась а копачатадызь тынк. Чоподава якицясь а соды, ков моли.

<sup>36</sup>Зярс валдось мартонк, кемеде валдонтень, сестэ ультядо валдонтень эйкакшокс». Тень ёвтазь, Иисус тусь эйстэст ды ёматотсь.

#### **Еврейтне а кемить Иисуснэнь**

<sup>37</sup>Куш тейсь Сон ламо тамашат сынст сельме икеле, сынъ ялатеке эзьт кеме Сонензэ.

<sup>38</sup>Истя топодсть Исайя пазмарицянтъ валонзо: «Азором! Кие кемезевсь сенень, мезе марясь минек пельде? Кинень Азорось невтизе Эсь виензэ?»

<sup>39</sup>Сынь эзь кемезеве эсест вийсэ, кода теде лия таркасо кортаськак Исайя:

<sup>40</sup>«Сон сокоргавтынзе сельмест, кевензавтынзе седеест, секс: иляст нее сельмесэст, иляст чарькоде седейсэст, иляст велявто Монень ды Мон илинь шумбралгавто сынст».

<sup>41</sup>Исайя ёвтызе тень, зярдс сон неIZE Иисусонь инексчинзэ ды кортась Сонзэ эйстэ.

<sup>42</sup>Мезе лангскак апак вано, евренень прявтнэстэяк ламот кемезевсть Иисуснэнь, ансяк фарисейтнень икеле марямга теде эзь корта: пельсть синагогасто панемадост.

<sup>43</sup>Пазонтъ пельде шнамондонтъ пек вечкевсь сыненст ломанень пельде шнамось.

#### **Иисусонь валось – судия**

<sup>44</sup>Иисус верьга вайгельть кортась: «Монень кемицясь аволь ансяк Монень кеми – Монь Кучицянтеньгак;

<sup>45</sup>Монь неицясь – неи Монь Кучицянтъкак.

<sup>46</sup>Мон валдо, кона сась масторлангс. Эрвась, кона кеми Монь эйс, чоподас а кадови.

<sup>47</sup>Кие марясынзе Монь валон ды а кеми, Мон суд а теян сонензэ. Мон сын масторлангонтъ идеме, аволь масторлангонтъ судямо.

<sup>48</sup>Кие поты Монь эйстэ ды а лови Монь валтнэнь, сень ули судиязо: валось, конань Мон ёвтыя, карми судямо сонзэ меельце чистэнтъ.

<sup>49</sup>Эдь Мон кортан аволь Эсь пельдень, Тетясь, кона Монь кучимим, Сонсь макссь Тень кармавтовкс, мезе ёвтамс ды мезе кортамс.

<sup>50</sup>Мон содан: Сонзэ кармавтовоксоь максы пингеде пингень эрямо. Секс, мезе Мон кортан, кортан истя, кода кармавтсь Тетям».

## Иоанна 13

### Иисус шли тонавтницятнень пильгест

<sup>1</sup>Ульнесь Инечиде икелень чи. Иисус содась: сась масторлангонь кадома, Тетянстэнь туема шказо. Сон вечкилинзе масторлангонь мельга молициянзо певтеме вечкемасо, ды тень Сон невтизе педе пес.

<sup>2</sup>Иисус ды Сонзэ тонавтнициянзо пурнавсть чокшнень ярсамос. Идемевсесь уш путызе Иудань, Симон Искариотонь цёранзо, седейс Иисусонь миема меленть.

<sup>3</sup>Иисус содась: Тетясь весементь максызе Сонзэ кедьс, Сон Пазонтъ пельде сась ды ней Пазонтень моли.

<sup>4</sup>Секс Сон стясь ярсамсто, каизе ланга оршамонзо, карксась нардамо пацясо.

<sup>5</sup>Мейле каясь ведь шлямо кедьгес, кармасть шлямо тонавтницятнень пильгест, нардтнемест нардамо пацясо, конаньсэ карксазель.

<sup>6</sup>Зярдо Иисус пачкодсь Симон Петра ваксс, се кевкстизе Сонзэ: «Азоро! Натъ Тонетъ шлякшномс монь пильгень?»

<sup>7</sup>Иисус тень каршо мерсь тензэ: «Ней тон а чарькодят, мезе Мон теян, чарькодьсак мейле».

<sup>8</sup>Петра серьгедсь тень каршо: «Зярдояк Тон а шлясыть монь пильгень!» Иисус мерсь: «Бути Мон а шлятан тонь, сестэ тонь мезетькак Монь марто а ули вейсэнъ».

<sup>9</sup>Симон Петра мерсь Тензэ: «Азоро! Сестэ шлить аволь ансяк пильгень, кеденьгак ды прямгак».

<sup>10</sup>Иисус мерсь: «Шлязентень эряви ансяк пильгензэ шлямс, эдь сон весе ванькс. Тынь ванькстадо, ансяк аволь весе».



<sup>11</sup>Сон содылизе Эсь миицяно, секс мерськак: «Аволь весе тынь ванькстадо».

<sup>12</sup>Зярдю Иисус шлинзе пильгест ды оршинзе ланга оршамонзо, таго озась ярсамо ды кевкстинзе: «Чарькодтядо а чарькодтядо, мезе Мон тенк теинь?»

<sup>13</sup>Тынь мертядо Монень Тонавтыця ды Азоро, ды видестэ кортатадо, эдь Мон алкуксккак Сон.

<sup>14</sup>Истя, бути Мон, Азоронк ды Тонавтыцянк, шлинь пильгенк, тыненккак эряви шлякшномс пильгенк вейкенк-вейкенк туртов.

<sup>15</sup>Мон максынь тенк невтевкс. Тыненккак эряви тейнемс сень, мезе Мон тыненк теинь.

<sup>16</sup>Алкукс, алкукс кортан тенк: важось азородонзо а седе покш, кучозеськак а седе покш кучицяно эйстэ.

<sup>17</sup>Бути тынь тень содасынк, уцяскавт ультядо, зярдю карматадо истя тейнеме».

<sup>18</sup>«Аволь весемеденк кортан: Мон содаса, кодат сеть ломантне, конатнень кочкинь. Ансяк Пазонь пельде Сёрмадовксонтень эряви топавтовомс: “Монь марто кшиде ярсыцясь кепедизе Монь лангс кочкарянзо”.

<sup>19</sup>Ёвтнян тенк теде ней, топавтомадонзо икеле, зярдю топавтови, тынь кемевлиде: Мон улян, кие Мон улян.

<sup>20</sup>Алкукс, алкукс кортан тенк: кие парсте васты Монь кучовтонть, се Моньгак парсте васты, ды кие васты Монь, се васты Монь Кучицянтъкак».

### **Иисус ёвты миицяно**

<sup>21</sup>Тень мерезь, Иисус седеень покш ризнэмасо яволявтсь: «Алкукс, алкукс кортан тенк, вейкесь эйстэнк мисамам».

<sup>22</sup>Сестэ тонавтницятне кармасть ванкшномо вейке-вейкест лангс, апак чарькоде, киде Сон корты.

<sup>23</sup>Сонзэ тонавтницятнестэ вейкесь, се, конань Иисус вечкилизе, озадолъ Иисус вакссо.

<sup>24</sup>Сонензэ Симон Петра аволдась, келя, тона кевкстевлизе, кие се, конадо Иисус корты.

<sup>25</sup>Сон, Иисусонь мештес чиремезь, кевкстизе: «Азоро, кие те?»

<sup>26</sup>Иисус мерсь каршонзо: «Се, кинень Мон максан кши сускомо, конань наваса ваканс». Мейле навизе кши сускомонть ды максызе Иуданень, Симон Искаротонь цёранстэнь.

<sup>27</sup>Те сускомонть саемадо мейле совась Иудань эйс Сатанась. Сестэ Иисус мерсь тензэ: «Мезе арсить тееме, тейть седе курок».

<sup>28</sup>Озадо аштицятнень эйстэ кияк эзь чарькоде, мейс Иисус истя мерсь тензэ.

<sup>29</sup>Иудань кедьсэль ярмаконь кирдемкась, секс тонавтницятнестэ конат-конат арсесть: Иисус мерсь тензэ рамамс, мезе миненек эряви покшчинтень, эли максомс мезеяк кажовнень.

<sup>30</sup>Иуда сэвизе кши сускомонть ды сеске жо лиссь. Ульнесь ве.

#### **Од кармавток**

<sup>31</sup>Зярдо Иуда лиссь, Иисус мерсь: «Ней невтеви Ломантнень Цёранть инексчизэ, Пазонтъ инексчизэяк невтеви Сонзэ эйсэ.

<sup>32</sup>Зярдо Пазонтъ инексчизэ невтеви Сонзэ эйсэ, сестэ Пазоськак невтьсы Эсензэ эйсэ Цёранть инексчинзэ ды курок сонзэ невтьсы.

<sup>33</sup>Эйденъ, аволь кувать кадовсь Монень мартонк улемс. Карматадо Монь вешнеме, ды кода Мон икеле уш ёвтынъ еврееень прявтнэненъ: ков Мон молян, тов тынь а савтадо, тыненккак истя жо кортан ней.

<sup>34</sup>Мон максан тенк од кармавток: вечкеде вейкенк-вейкенк эйсэ! Кода Мон тынк вечктядызь, истя тыньгак вечкеде вейкенк-вейкенк эйсэ.

<sup>35</sup>Карминдерятадо вейкенк-вейкенк эйсэ вечкеме, тень кувалма весе кармить содамонк: тынь Монь тонавтницятадо».

#### **Иисус икелев ёвты Петрань прянь кайсемадо**

<sup>36</sup>Симон Петра кевкстизе Иисусонь: «Азоро, ков Тон молят?» Иисус каршонзо мерсь: «Ков Мон молян, тон ней тов а молеват мельган, мейле молят Монь мельга».

<sup>37</sup>Петра мерсь Тензэ: «Азоро, мекс мон ней а молеван Тонь мельга? Мон эрямом путса Тонь кисэ».

<sup>38</sup>Иисус тень каршо мерсь тензэ: «Эрямот Монь кисэ путсак? Алкукс, алкукс кортан теть: атякшось а кенери моразевемеяк, кода тон колмоксть прят каясак Монь эйстэ».

### **Иоанна 14**

#### **Тетянтень кись – Иисус**

<sup>1</sup>«Илязо талакале седеенк: кемеде Пазонтень, моненьгак кемеде.

<sup>2</sup>Монь Тетянь кудосо эрямо таркатнеде ламо. Улевельгак а истя, Монь ёвтавлинь тенк: Мон молян тенк таркань анокстамо.

<sup>3</sup>Кода молян, анокстаса тенк тарканть, сестэ таго сан ды сайтядызь Эстенъ. Косо Мон, тыненккак тосо улема.

<sup>4</sup>Ков Мон молян, тынь содатадо, кинтькак тов содасынк».

<sup>5</sup>Фома мерсь Тензэ: «Азоро, а содатано, ков молят. Кода эно тенек содави тов кись?»

<sup>6</sup>Иисус мерсь тензэ: «Мон – ки, видечи ды эрямо. Кияк а сави Тетянтень лиякс, кода ансяк Монь вельде.

<sup>7</sup>Бути содавлимизь Монь, сестэ содаблинк Монь Тетяньгак. Ней тынь уш содасынк Сонзэ ды неинк Сонзэ».

<sup>8</sup>Филип мерсь Тензэ: «Азоро, невтик тенек Тетянтъ, ды саты минек туртов».

<sup>9</sup>Иисус мерсь тензэ: «Зяро шка Мон тынк марто, ды тон Монь а содасамак, Филип? Кие неимим Монь – неIZE Тетянь. Мекс эно тон кортат: “Невтик тенек Тетянь”?»

<sup>10</sup>Арази тон а кемат, Мон Тетянь эйсэ, Тетяськак Монь эйсэ? Валтнэнь, конатнень Мон кортан тенк, кортан аволь Эсень пельде – те Тетясь, кона Монь эйсэ, тевензэ теи.

<sup>11</sup>Кемеде Монь валтнэненень: Мон Тетянь эйсэ, Тетяськак Монь эйсэ. Бути а кемтядо тенень валон кувалт, сестэ кемеде Монь тевень кувалт.

<sup>12</sup>Алкукс, алкукс кортан тенк: Монь эйс кемицясь карми тееме сеть тевтнень, конатнень теян Мон. Ды сон теи нетнедеяк седе покш тевть, эдь Мон Тетяненень велявтан.

<sup>13</sup>Бути мезе вештядо Тетянь пельде Монь лемсэ, сень тейса: тенъсэ невтеви Тетянь инексчизэ Цёранть вельде.

<sup>14</sup>Бути мезе вештядо Монь лемсэ, Мон сень тейса».

#### **Иневанькс Оймеялтоь сы Лездыцякс**

<sup>15</sup>«Бути вечксамизь Монь, сестэ карматадо кирдеме Монь кармавтокстнэнь.

<sup>16</sup>Мон энялдан Тетянь икеле, ды Сон максы тенк лия Лездыця, кона карми улеме тынк марто пингеде пингес.

<sup>17</sup>Те – видечинь Оймеялтоь, кона масторлангонь ламот ломантненень а саеви, эдь сынъ а несызь Сонзэ, ды а содасызьгак. Тынь вана содасынк Сонзэ, эдь Сон тынк марто ды эйсэнк улияк.

<sup>18</sup>Мон а кадтадызь урозокс; сан мекев тенк.

<sup>19</sup>Оштё аламнешка, ды масторлангось Монь уш а несамам. Тынь вана Монь несамизь, эдь Мон эрян, секс тыньгак карматадо эрямо.

<sup>20</sup>Се чистэнтъ тынь карматадо содамо: Мон Тетянь эйсэ, тынь Монь эйсэтядо, Монгак тынк эйсэ.

<sup>21</sup>Кинь улить Монь кармавтокстнэ, ды кие сынст кирди, се Монь вечксамам. Кие Монь вечксамам, сень карми вечкемензэ Монь Тетям. Монгак карман вечкемензэ ды панжса тензэ Эсь прям».

<sup>22</sup>Иуда, аволь Искаротось, мери Тензэ: «Азоро, мезе те, Тонь мелеть Эсь прят панжомс ансяк миненек, аволь масторлангонь весе ломантненень?»

<sup>23</sup>Тень каршо Иисус мерсь тензэ: «Кие Монь вечксамам, се карми тееме Монь тонавтоманть коряс. Тетям карми сонзэ вечкемензэ, ды минь сатано тензэ ды карматано эрямо мартонзо.

<sup>24</sup>Кие Монь а вечксамам, се а теи Монь тонавтоманть коряс. Тонавтомась, конань тынь марятадо, Тетянтъ, кона кучимим Монь, аволь Монсень.

<sup>25</sup>Весе тень Мон ёвтыя тенк, зярс тынк мартан.

<sup>26</sup>Лездыцясь, Иневанькс Оймеялтось, конань Тетям кучсы Монь лемсэ, весемес тынк тонавттадызь. Сон ледстясы мелезэнк весементъ, мезе Мон кортынь тенк.

<sup>27</sup>Седейоймамо кадан тенк, Монсень седейоймамом максса тенк: аволь истя максан тенк, кода масторлангось максы. Илязо талакале тынк седеенк ды илязо тандале.

<sup>28</sup>Тынь мариде, мезе Мон меринь тенк: “Туян эйтэнк ды мекев сан тенк”. Бути тынь вечкевлимизь Монь, тынь кенярдозевлиде, мекс Мон меринь, молян Тетянтень, эдь Тетям Мондень ине.

<sup>29</sup>Вана Мон теде ёвтынь тенк ней, топавтомадонзо икеле. Сестэ тынь карматадо кемеме, зярдое те топавтови.

<sup>30</sup>Аламошка тень кадовсь кортамс мартонк, эдь сы те мирэнтъ-масторонть апаро прявтось. Монь лангсо сонзэ виезэ арась.

<sup>31</sup>Ансяк масторлангонтень эряви содамс: Мон вечкса Тетянь ды Мон весементь теянгак истя, кода кармавтсь Тень Тетям. Стядо, тутано тестэ».

## Иоанна 15

### Иисус – алкуксонь винаумарькс

<sup>1</sup>«Мон – алкуксонь винаумарьксан, Монь Тетям – винаумарень пирязоро.

<sup>2</sup>Монь лангсто эрьва тарадонтъ, кона винаумартъ а канды, Сон керясы. Эрьванть, кона канды винаумартъ, ванськавтсы, седе ламо умарень кандомга.

<sup>3</sup>Тынь уш ванськавтозтядо валонтъ вельде, конань Мон ёвтыя тенк.

<sup>4</sup>Эрядо-аштеде Монь эйсэ, Монгак эрян-аштян тынк эйсэ. Кода тарадонтень сонстензэ а раштавить винаумартъ, а аштиндеряй винаумарькс лангсо, истя тыненккак эсь пельденк мезеяк а тееви, а аштиндерятадо Монь эйсэ.

<sup>5</sup>Мон винаумарькс, тынь тарадт. Кие эри-ашти Монь эйсэ, ды кинь эйсэ Мон эрян-аштян, се рашты ламо винаумартъ, эдь Монтемень тыненк мезеяк а тееви.

<sup>6</sup>Кие а эри-ашти Монь эйсэ, се тарад ладсо ули ёртозь ве ёнов ды коськи. Истят тарадтнэнь пурныть, кайсить толс, ды сынь палыть.

<sup>7</sup>Бути эрятадо-аштетядо Монь эйсэ ды Монь валонгак эрить-аштитъ тынк эйсэ, сестэ вешедэ, мезе меленк, ды карми улеме тенк.

<sup>8</sup>Тень вельде невтеви Тетянь инексчизэ, кандындерятадо ламо эмежть ды улиндерятадо Монь тонавтницякс.

<sup>9</sup>Кода Тетясь Монь вечксамам, истя Монгак тынк вечктядызь. Эрядо-аштеде Монь вечкемасо.

<sup>10</sup>Топавтындерясынк Монь кармавтоксон, карматадо эрямо-аштеме Монь вечкемасо, кода Монгак топавтан Тетянь кармавтоксонзо ды эрян-аштян Сонзэ вечкемасо.

<sup>11</sup>Весемень тень Мон ёвтыя тенк сень кисэ: Монь кеняркось улевель тынк эйсэ ды кеняркось пряс пештевлидизь тынк.

<sup>12</sup>Монь кармавтоксом истямо: вечкеде вейкенк-вейкенк эйсэ, кода Мон вечктядызь тынк.

<sup>13</sup>Зярдю кияк путсы эрямонзо эсь ялганзо кисэ, теде покш вечкема арась.

<sup>14</sup>Тынь Монь ялган сестэ, зярдю тейтядо сень, мезе Мон кармаван тенк.

<sup>15</sup>Мон ней уш а мерян тенк важот, эдь важось а соды, мезе теи азоро. Мон мерян тенк ялгат, эдь Мон весементь ёвтыя тенк, мезе маринь Тетянь пельде.

<sup>16</sup>Аволь тынь Монь кочкимизь, Мон тынк кочкидизь ды аравтыдизь молеме ды эмежень кандомо, истямо эмежень, кона зярдюк а ёми. Сестэ весе, мезе вештядо Тетянь пельде Монь лемсэ, Сон максы тенк.

<sup>17</sup>Вана тень кармаван тенк: вечкеде вейкенк-вейкенк эйсэ».

#### **Масторлангось а вечксынзе Иисус мельга молицятнень**

<sup>18</sup>«Бути масторлангось тынк а вечктядызь, сестэ кирдеде мельсэнк, Монь тынденк икеле а вечкилимим.

<sup>19</sup>Бути тынь улевлиде масторлангонт пельде, сестэ масторлангось вечкевлинзе эсензэтнень. Кода тынь аволь масторлангонт пельде, а вана Мон тынк кочкидизь масторлангсто, секс масторлангось а вечктядызь.

<sup>20</sup>Мельсэнк кирдинк валонт, конань Мон ёвтыя тенк: важось азородонзо а седе покш. Бути Монь пансесть, кармить пансеме тынккак. Бути Монь валом кирдизь, тынк валонткак кармить кирдемензэ.

<sup>21</sup>Весе тень тейсызь тенк Монь лемем кисэ, эдь сынъ а содасызь Монь Кучицянтъ.

<sup>22</sup>Бути Мон аволинь са ды аволинь корта тенст, сестэ авольть уле сынст пежетест. Ней жо сыненст а каяви вал эсь пежетест кисэ.

<sup>23</sup>Кие Монь а вечксамам, се Монь Тетяньгак а вечксы.

<sup>24</sup>Бути Мон аволинь тее сынст ютксо тевть, кодат кияк лия эзь тейнекшне, сестэ аволь уле пежетест. Ней жо сынъ неизь Монь тевеньгак ды эзь карма вечкеме Моньгак, Тетяньгак.

<sup>25</sup>Тень эйсэ топавтови валось, кона сёрмадозель сынст Койсэнтъ: “Стяко Монь а вечкилимизь”.

<sup>26</sup>Зярдо сы Лездыцясь, конань Мон кучса тенк Тетянь пельде, видечинь Оймеялтось, кона Тетянь пельде лиси, сестэ Сон карми яволявтнеме Мондень.

<sup>27</sup>Тыньгак карматадо Мондень яволявтнеме: эдь тынь ушодома шкасто саезь ульниде Монь марто».

## Иоанна 16

<sup>1</sup>«Тень Мон ёвтыя тенк сень кисэ: мезеяк аволизе кавтолдовто кемеманк.

<sup>2</sup>Тынк пантядызь синагогатнестэ. Сакшны мик шка, зярдо эрьвась, кона тынк эйсэ маштни, карми арсеме, теньсэ сон Пазонтень важоди.

<sup>3</sup>Истя кармить тейнеме мартонк секс, мекс а содасамизь Тетяньгак, Моньгак.

<sup>4</sup>Ды Мон тень тыненк икелев ёвтыя, зярдо сы се шкась, мелезэнк ледствялинка, мезе Мон теде ёвтнилинъ тенк».

### Оймеялтонъ теевкстнэ

«Мон икеле эзинъ кортакшно теде, эдь Мон ульнинъ мартонк.



<sup>5</sup>Ней вана молян Монь Кучицянть, ды кияк эйстэнк а кевкстни Эйсэнъ, ков молян.

<sup>6</sup>Тень кувалма, мезе Мон ёвтынъ тыненк, ризкстэ пештявсь тынк седеенк.

<sup>7</sup>Ансяк Мон кортан тенк видечи: Монь туемась ули тыненк седе паро. А туиндерян Мон, сестэ Лездыцясь а сы тенк; бути туян, кучса Сонзэ тенк.

<sup>8</sup>Зярдэ жо Сон сы, сестэ невтьсынзе масторлангонь ломантненень, кода авидестэ сынъ арсить пежетентъ эйстэ, видечинть ды судонь тееманть эйстэ.

<sup>9</sup>Пежетесь сеньсэ: сынъ а кемить Монень.

<sup>10</sup>Видечись невтеви сеньсэ: Мон молян Монь Тетяненъ, ды тынь уш а несамизь Монь.

<sup>11</sup>Судось сеньсэ: те мирэнтъ-масторонть апаро прявтось судязь.

<sup>12</sup>Монь ули лия ламо ёвтамом тенк, ансяк ней а саты тынк виенк чарькодемс сонзэ.

<sup>13</sup>Кода сы видечинъ Оймеялтось, сестэ Сон тонавттадызь весе видечинтень: эдь аволь Эсь пельдензэ карми кортамо, Сон карми кортамо, мезе мари, ды ёвтасы тенк сеньгак, мезе карми улеме.

<sup>14</sup>Сон Монь инелгавтсамам-шнасамам, эдь Сон Монсентъ эйстэ саи ды тыненк панжсы.

<sup>15</sup>Весе, мезе ули Тетянь, се Монь. Секс Мон мериньгак: Оймеялтось Монсентъ эйстэ саи ды тыненк панжсы».

#### **Тонавтницятнень ризксэсь велявты кенярксокс**

<sup>16</sup>«Курок тынь уш а несамизь Монь, – ды таго курок тынь несамизь Монь, эдь Мон молян Тетянтень».

<sup>17</sup>Тесэ конат-конат Сонзэ тонавтницянзо эйстэ мерсть вейкест-вейкест туртов: «Мезе те истямось, зярдэ Сон корты тенек: “Курок тынь а

несамизь Монь, ды таго куро́к тынь несамизь Монь” ды: “Мон молян Тетяне́нь”?»

<sup>18</sup>Истя сынь кортнесть: «Мезе те истямось, зярдó Сон корты: “куро́к”? А содатано, мезде корты».

<sup>19</sup>Иисус чарькодсь, мезде сынст мелест кевкстемс Сонзэ, ды мерсь тенст: «Теде а теде кевкстнетядо тынь вейкенк-вейкенк эйсэ, мекс Мон меринь: “Куро́к тынь а несамизь Монь, ды таго куро́к тынь несамизь Монь”?»

<sup>20</sup>Алкукс, алкукс кортан тенк: тынь карматадо авардеме ды лайшеме, масторлангонь ломантне жо кенярдозевить. Тынь карматадо ризнэме, ансяк тынк ризксэнк велявты кенярдомакс.

<sup>21</sup>Авась кирди пиштемат-сэредькст, зярдó сы чачтома шказо. Зярдó чачтсы эйденть, сестэ сон кенярдомадонть стувтсынзе пиштематнень, эдь ломань чачсь масторлангс.

<sup>22</sup>Истя тыньгак ней ризнэтядо. Ялатеке Мон тынк нетядызь таго, ды кенярдозеви седеенк, ды кенярдоманк киненьгак а нельгеви тынк кедьстэ.

<sup>23</sup>Се чистэнтъ тынь а кевкстьсамизь Монь мездеяк. Алкукс, алкукс кортан тенк: мезе вештядо Тетянь пельде Монь лемсэ, максы тенк.

<sup>24</sup>Течис тынь мезеяк эзиде веше Монь лемсэ. Вешедэ ды Тетям максы тенк, ды тынь пештевтядо пряс кеняркссо».

#### **Иисус изнизе масторлангонть**

<sup>25</sup>«Те шкас Мон кортынь тенк валвелявкссо, ансяк сакшны шка, зярдó Мон а карман кортамо тенк валвелявкссо, видьстэ тенк ёвтан Тетядон.

<sup>26</sup>Се чистэнтъ карматадо вешеме Сонзэ пельде Монь лемсэ, ды сестэ Мон уш а карман кортамо: Мон энялдан Тетяне́нь тынк кисэ.

<sup>27</sup>Эдь Сонсь Тетясь тынк вечктядызь секс, мекс тынь вечксамизь Монь ды кемтядо: Мон сынь Пазонтъ пельде.

<sup>28</sup>Мон туинь Тетянтъ кедьстэ ды сынъ масторлангов; ней таго кадса масторлангонть, молян Тетянтень».

<sup>29</sup>Тонавтницянзо мерсть Тензэ: «Ней жо Тон видьстэ кортат, валвелявкс кодамояк а ёвтнят.

<sup>30</sup>Ней чарькодтяно, Тон весементь икелевгак содасак, ломантнень кевкстнемаст Тонеть а эривить. Тень коряс кемтяно: Тон сыть Пазонтъ пельде».

<sup>31</sup>Иисус каршост мерсь: «Ней кемтядо?

<sup>32</sup>Вана сакшны шка, ды сась уш, зярдо тынь сравтневтядо эрьвась эсь пелев, ды Монь кадсамизь съкамон. Ансяк Мон аволь съкамон, Монь марто Тетям.

<sup>33</sup>Тень Мон ёвтыя тыненк сень кисэ: улезэ тенк Монь эйсэ седейоймамо. Масторлангсонть карматадо кирдеме пиштемат, ансяк уледе кеметь-виевть! Мон изния масторлангонть».

## Иоанна 17

### Иисусонь озномазо

<sup>1</sup>Нетъ валтнэде мейле Иисус кепединзе сельмензэ менельс ды мерсь: «Тетяй! Сась шкась: невтик Цёрать инексчинзэ, Цёраткак невтезэ Тонь инексчить.

<sup>2</sup>Эдь Тон максыть Цёрать кедь алов весе ломантнень сень кисэ: максоволь Сон пингеде пингень эрямо весеменень, кинь Тон максыть Сонензэ.

<sup>3</sup>Пингеде пингень эрямось – те содамс Тонь, вейкине алкуксонь Пазонтъ, ды Тонь кучовт Иисус Христосонь.

<sup>4</sup>Мон невтия Тонь инексчить мода лангсо, прядыя теветь, конань Тон максык Монень топавтомс.

<sup>5</sup>Ней, Тетяй, Тонсетъ вакссо таго максык Монень се инексчинть, кона Монь ульнесь Тонь кедьсэ менеленть-масторонть теемадонзо икеле.

<sup>6</sup>Мон теия содавиксэкс Тонь леметь ломантненень, конатненень Тон Монень максыть масторлангстонть. Сынь ульнестъ Тонь, ды Тон сынст максыть Монень, ды сынъ кирдизъ Тонь валот.

<sup>7</sup>Ней сынъ чарькодизъ: весе, мезе Тон максыть Монень, Тонь пельде.

<sup>8</sup>Валтнэнь, конатненень Тон максыть Монень, Мон максынь сыненст, ды сынъ саизъ. Сыненст чарькодевсь видестэ: те Мон сынъ Тонь пельде; ды кармасть кемеме: те Тон кучимик Монь.

<sup>9</sup>Мон сынст кисэ ознан: аволь масторлангонь весе ломантненень кисэ ознан, ансяк сетненень кисэ, конатненень Тон максыть Монень, эдь сынъ Тонь.

<sup>10</sup>Весе Монсетне – Тонь, Тонсетне – Монь, ды Монь инексчим невтеви сынст вельде.

<sup>11</sup>Мон ней уш аволь масторлангсан, Мон Тонеть молян, сынъ жо масторлангсот. Иневанькс Тетяй, ванстыть Эсь лемсэть сынст, конатненень Тон максыть Монень, сыненст вейкекс улемга, кода миньгак Тонь марто ультяно вейкекс.

<sup>12</sup>Зярдэ Мон ульнинь мартост масторлангсо, Мон ванстылинь Тонь лемсэть сетненень, конатненень Тон максыть Монень. Мон сынст ванстынь, ды кияк сынст эйстэ эзь ёма, ёмась ансяк се, конанень ёмамаль. Истя топавтовсь Сёрмадовксось.

<sup>13</sup>Ней вана Тонеть молян. Ды Мон тень кортан, зярс яла масторлангсан: кадык Монь кеняркось пряс пештясынзе сынст.

<sup>14</sup>Мон максыя тенст Тонь валот, ды масторлангонтень сынъ кармасть уleme авечкевиксэкс. Эдь сынъ аволь масторлангонтъ пельде, кода Монгак аволь масторлангонтъ пельде.

<sup>15</sup>Мон ознан аволь масторлангсто сынст саемадо, ансяк Тон ванстовлитель сынст зыянонтъ эйстэ.

<sup>16</sup>Сынь аволь масторлангонть пельде, кода Монгак аволь масторлангонть пельде.

<sup>17</sup>Алтыть сынст Эстетъ Тонь видечинть вельде: Тонь валот – видечись.

<sup>18</sup>Кода Тон Монь кучимик масторлангов, истя Монгак сынст кучинь масторлангов.

<sup>19</sup>Сынст кисэ Мон алтан Эсь прям Тонеть секс: кадык сыньгак видечинть вельде кармить улеме алтазь Тонеть.

<sup>20</sup>Аволь ансяк сынст кисэ ознан, ознан сетнень кисэяк, конат кармить кемеме Монень сынст валост кувалт.

<sup>21</sup>Мон ознан: улест весе вейкекс. Кода Тон, Тетяй, Монь эйсат, ды Мон Тонь эйсан, истя сыньгак Минек эйсэ улест вейкекс, – кадык кемезеви масторлангось: те Тон кучимик Монь.

<sup>22</sup>Инексчинть, конань Тон максык Монень, Мон максыя сыненст: сынст вейкекс улемга, кода миньгак ультяно вейкекс.

<sup>23</sup>Зярдэ Мон сынст эйсан, ды Тон Монь эйсат, сестэ сыньгак допрок улить вейкекс. Истя масторлангось карми содамо: те Тон кучимик Монь, ды Тонеть вечкевсть сынь, кода вечкевинь Мон.

<sup>24</sup>Тетяй! Монь мелем: сетне, конатнень Тон максыть Монень, улевельть мартон тосо, косан Монгак. Кадык сынь несызь Монь инексчим, конань Тон максык Монень, секс мекс Тон вечксамак Монь уш се шкастонть саезь, зярдэ менельтне-мастортнэ апакольть тее.

<sup>25</sup>Видечинь Тетя! Масторлангось Тонь а содтанзат. Мон свал содылитинь Тонь, ды нетнеяк кармасть содамо: те Тон кучимик Монь.

<sup>26</sup>Мон панжия тенст Тонь леметь, ды яла карман панжомонзо сень кисэ: кадык те вечкемась, конаньсэ Тон вечксамак, улезэ сынст эйсэяк ды Монгак улезан сынст эйсэ».

## Иоанна 18

### Иисусонь миёмась ды кундамось

<sup>1</sup>Тень мерезь, Иисус лиссь тонавтницянзо марто Кедрон чудикерьксэнтъ тона пелев, косо ульнесь ойумарькс пире. Иисус ды тонавтницянзо совастъ пирентень.

<sup>2</sup>Иуда, Сонзэ миицязо, те таркантъ содылизе, эдь Иисус тонавтницянзо марто сеедьстэ тозонь пурнавкшность.

<sup>3</sup>Иудаяк сась тов зяря ушман ды Пазонь кудонь ванстыця марто, конатнень толнэк-мезнек ды кедьёнкснэк кучизь попонь покштнэ ды фарисейтне.

<sup>4</sup>Иисус содась весемедентъ, мезе карми улеме мартонзо, лиссь каршост ды кевкстинзе: «Кинь вешнетядо?»

<sup>5</sup>Сынь мерсть Тензэ: «Назаретэнь Иисусонь». Иисус ёвтась тенст: «Те Мон». Сынст марто аштесь Иудаяк, Сонзэ миицязо.

<sup>6</sup>Кода Иисус мерсь тенст: «Те Мон», – сынь потазевсть удалов ды пракшность мода лангс.

<sup>7</sup>Сон таго кевкстинзе: «Кинь вешнетядо?» Сынь мерсть: «Назаретэнь Иисусонь».

<sup>8</sup>Иисус каршост мерсь: «Мон ёвтынъ тенк, те Мон. Бути тынь вешнетядо Монь, нолдынк лиятнень, кадык туить».

<sup>9</sup>Истя топавтовсть Сонзэ валонзо: «Сетнень эйтэ, конатнень Тон максыть Монень, Мон киньгак эзинь ёмавто».

<sup>10</sup>Симон Петра, конань ульнесь торозо, таргизе сонзэ, вачкодизе попонь прявтонъ важонтъ ды керизе сонзэ вить пилензэ. Важонтъ лемезэль Малкос.

<sup>11</sup>Иисус мерсь Петранень: «Тонгик торонтъ кундозонзо. Арази Монень Тетянь максовт пиштемань кечентъ а симема?»

### Иисусонь ветизь Анназнэнь

<sup>12</sup>Сестэ ушмантнэ ды сынст прявтось, ды еврееень Пазонь кудонь ванстыцятне саизь Иисусонь, сюлмсизь

<sup>13</sup>ды ветизь Сонзэ васняк Анназнэнь. Аннас – Каиафань, се иень попонь прявтонть, ватазоль.

<sup>14</sup>Те ульнесь се Каиафась, кона макссь еврейтненень превть: ули седе паро, бути вейке ломань кулы весе раськенть кисэ.

#### **Петра кайси прянзо Иисус эйстэ**

<sup>15</sup>Иисус мельга мольсть Симон Петра ды оштё вейке тонавтниця. Те тонавтницянтъ попонь прявтось содылизе, ды секс сон совась Иисус марто попонь прявтонть пирявтонзо потс.

<sup>16</sup>Петра жо аштесь ортатнень вакссо ушосо. Мейле те тонавтницясь, конань попонь прявтось содылизе, лиссь, кортась орта ванстыця важаванть марто ды совавтызе Петрань.

<sup>17</sup>Тесэ важо авась мерсь Петранень: «Арази тон аволь Се Ломанентъ тонавтницянзо ютксто?» Сон мерсь: «Аволь».

<sup>18</sup>Якшамоль. Важотне ды Пазонь кудонь ванстыцятне кирвазтсть толбандя, аштестъ вакссонзо ды эжнестъ. Петраж аштесь мартост ды эжнестъ.

#### **Попонь прявтось кевкстни-чумонды Иисусонь**

<sup>19</sup>Попонь прявтось кевкстизе Иисусонь Сонзэ тонавтницятнеде ды тонавтомадонзо.

<sup>20</sup>Иисус мерсь тензэ: «Мон свал кортынъ ломантненень марямга. Мон свал тонавтынъ синагогасо ды Пазонь кудосо, ков свал пурнавкшныть еврейтне, салава мезтькак эзинь корта.

<sup>21</sup>Мезть Монь кевкстнят? Марицятнень кевкститъ, мезть Мон кортынъ тенст. Сынъ жо содыть, мезть Мон кортынъ».

<sup>22</sup>Кода Иисус меризе тень, Пазонь кудонь ванстыцятнестэ вейкесь, кона аштесь маласо, вачкодизе Сонзэ чама ланга ды мерсь: «Истя Тон кортат попонь прывтонть каршо?»

<sup>23</sup>Иисус ёвтась тензэ: «Бути Мон меринь беряньстэ, невтик, мезе берянесь. Бути валом виде, мекс тон чават Монь?»

<sup>24</sup>Сестэ Аннас сюлмсезь кучизе Сонзэ Каиафа попонь прывтонть.

<sup>25</sup>Симон Петра жо яла аштесь толбандянть вакссо ды эжнесь. Тесэ кевкстизь сонзэ: «Арази аволь Сонзэ тонавтницятнестэ тонгак?» Сон каизе прянзо ды мерсь: «Аволь».

#### **Петра таго кайси прянзо**

<sup>26</sup>Попонь прывтонть вожотнестэ вейкесь, сень роднязо-раськезэ, конань Петра керизе пилензэ, кевкстизе Петрань: «Арази аволь тонь неитинь Иисус марто ойумарькс пирестэ?»

<sup>27</sup>Петра таго каизе прянзо, ды сеске моразевсь атякш.

#### **Иисус Пилат икеле**

<sup>28</sup>Каиафань кедьстэ Иисусонь ветизь Пилатонь азоркудос. Ульнесь валске. Еврейтне эзть сова азоркудонть сень кувалт: а прамс аваньксчис инечинь ярсамодонть икеле.

<sup>29</sup>Пилат лиссь тенст ды кевкстинзе: «Мейсэ чумондтадо Те Ломанень?»

<sup>30</sup>Тень каршо сын мерсть тензэ: «Аволь улеяк Сон зыянонь теиця, минь Сонзэ аволинек ветя теть».

<sup>31</sup>Пилат мерсь тенст: «Саинк Сонзэ тынсь ды эсь Коенк коряс тееде Тензэ суд». Еврейтне ёвтасть каршонзо: «Миненек а мереви маштомс ломань».

<sup>32</sup>Истя топодсть Иисусонь валонзо, конатнень Сон ёвтынзе, зярдю макнесь чарькодема, кодамо куломасо Сон кулы.



<sup>33</sup>Сестэ Пилат таго совась азоркудос, тердизе Иисусонь ды кевкстизе Сонзэ: «Тон еврееень Инязорат?»

<sup>34</sup>Иисус мерсь тензэ: «Эсь пельдеть тон кортат тень, эли лият истя ёвтасть теть Мондень?»

<sup>35</sup>Пилат мерсь каршонзо: «Арази мон евреян? Эсеть раськеть ды попонь покштнэ Тонь максыдизь монень. Мезе Тон теить?»

<sup>36</sup>Иисус мерсь: «Монь инязоркским аволь те масторлангонть пельде. Улевельгак Монь инязоркским те масторлангонть пельде, сестэ Монь важотне стявольть тюреме Монь кисэ ды аволимизь максо Монь еврейтненень. Ансяк Монь инязоркским аволь тестэ».

<sup>37</sup>Сестэ Пилат кевкстизе Сонзэ: «Истя эно Тон Инязорат?» Иисус каршонзо мерсь: «Тон тонсь кортат, Мон Инязоран. Мон чачинь ды сынь масторлангов видечиденть ёвтнеме. Эрвась, кие видечинть пельде, кунсолы Монь вайгелем».

<sup>38</sup>Пилат кевкстизе: «Мезе видечись?»

### **Иисусонь судить куломас**

Тень ёвтазь, сон таго лиссь еврейтненень ды мерсь тенст: «Мон кодамомяк чумо а мукшнан Сонзэ эйстэ.

<sup>39</sup>Тынк ули коенк-кирданк, конань коряс эрва Инечистэ мон нолдтнян тенк вейке пекстазь ломань. Ули меленк, нолдаса тенк еврееень Инязоронть?»

<sup>40</sup>Сестэ таго весе пижакадсть: «Аволь Сонзэ! Нолдык Вараввань!» Варавва жо ульнесь тюриця-нельгиця.

## **Иоанна 19**

### **Глава 19**

<sup>1</sup>Сестэ Пилат мерсь саемс Иисусонь ды керямс локшосо.

<sup>2</sup>Ушмантнэ прязонзо путсть пупиця куракшонь тарадсто кодазь каштаз ды лангозонзо оршавсть якстере оршамо.

- <sup>3</sup>Сынь сеересть: «Шумбра улезэ еврееень Инязорось!» – ды вачкоесть чама ланга.
- <sup>4</sup>Пилат таго лиссь ды мерсь еврейтненень: «Вана ней мон Сонзэ ливтьса тыненк. Содадо: мон Сонзэ эйстэ кодамояк чумо а мукшнан».
- <sup>5</sup>Сестэ лиссь Иисус пупиця куракшонь каштазсо ды якстере оршамосо. Пилат мерсь тенст: «Ванодо, ломанесь!»
- <sup>6</sup>Кода Сонзэ неизь попонь покштнэ ды Пазонь кудонь ванстыцятне, кармасть пижнеме: «Вачкодик, вачкодик Сонзэ крест лангс!» Пилат мерсь тенст: «Саинк Сонзэ тынсь ды вачкодинк, мон чумо Эйстэнзэ а мукшнан».
- <sup>7</sup>Еврейтне каршонзо ёвтасть: «Минек ули Коенек, ды Коенть коряс Сонензэ кулома, эдь Сон теизе Эсь прянзо Пазонь Цёракс».
- <sup>8</sup>Те валонть марязь, Пилат седеяк пелезевсь,
- <sup>9</sup>ды таго совась азоркудонтень, ды кевкстизе Иисусонь: «Костонят Тон?» Ансяк Иисус тень каршо чатьмонсь.
- <sup>10</sup>Пилат мерсь Тензэ: «Монь каршо чатьмонят? Тон содат а содат, монь ули азорксчим вачкодевтемс Тонь крест лангс, ды монь ули азорксчим нолдамскак Тонь?»
- <sup>11</sup>Иисус тень каршо мерсь: «Тонь аволь уле Монь лангсо кодамояк азорксчить, бути аволь уле теть максозь те азорксчись верде. Тень кисэ седе ламо пежетесь сень лангсо, кие Монь максымим тонеть».
- <sup>12</sup>Тень марязь, Пилат терявтнесь нолдамс Иисусонь, ансяк еврейтне яла пижнесть: «Нолдындерясак Сонзэ, тон аволь ялга кесарентень. Эрвась, кие эсь прянзо теи инязорокс, моли кесаренть каршо».
- <sup>13</sup>Неть валтнэнь марязь, Пилат ливтизе Иисусонь ушов ды озась судиянь эземс, таркантень, конадонтень мерить Кевацавкс, евреекс Гаввата.

<sup>14</sup>Те ульнесь Инечинь анокстамо чи, пеця, шказоль чинь куншка малав. Пилат мерсь еврейтненень: «Вана тынк Инязоронк!»

<sup>15</sup>Ансяк сынь пижакадсть: «Саик, саик, вачкодик Сонзэ крѣст лангс!» Пилат кевкстинзе: «Тынк Инязоронк вачкодевтѣса?» Попонь покштнэ мерсть: «Минек арась инязоронок кесарде башка».

<sup>16</sup>Сестэ Пилат, окоѣники, Иисусонь максызе тенст крѣст лангс вачкодемс.

### **Иисусонь крѣст лангс вачкодемазо**

**Ушмантнэ саизь Иисусонь ды тусть мартонзо.**

<sup>17</sup>Иисус кандсь Эсь крѣстонзо ды лиссь се таркантень, конадонтъ мерить Пря ловажань тарка, евреекс Голгофа.

<sup>18</sup>Тесэ Сонзэ вачкодизь крѣст лангс, мартонзо вачкодсть кавто лияткак, вейкесь – ве пеле ды омбось лия пеле, куншказост Иисусонь.

<sup>19</sup>Пилат теевтсь сѣрмалазгак, путовтызе крѣстонть лангс. Тосо сѣрмадозель: «Назаретэнь Иисус, еврееень Инязоро».

<sup>20</sup>Те сѣрмалазонть ловность еврейтнестэ ламот, эдь таркась, косо вачкодезель Иисус, ошонтъ маласоль. Сѣрмадовксось теезель колмо кельсэ: еврееень, грекенъ ды латынень.

<sup>21</sup>Еврееень попонь покштнэ мерсть Пилатнэнь: «Иля сѣрмадо: “Еврееень Инязоро”. Сѣрмадт: Те Ломанесь кортась: “Мон еврееень Инязоро”».

<sup>22</sup>Пилат мерсь: «Мезенть сѣрмадыя, сень сѣрмадыя».

<sup>23</sup>Ушмантнэ, кода Иисусонь вачкодизь крѣст лангс, саизь Сонзэ оршамопелензэ ды явизь нилев, эрѣва ушманонтень пелькс. Сынъ саизь хитононтъкак, кона ульнесь ставкстому, верде алов весе кодазь.

<sup>24</sup>Ушмантнэ мерсть вейкест-вейкест туртов: «А карматамо сезнемензэ, каясынек жеребейсэ, кинень саты». Истя топавтовсь Пазонь пельде Сѣрмадовкссо ёвтазесь: «Явизь Монь оршамопелень эсь ютковаст, ды Монь оршамон каизь жеребейсэ». Истя тейстькак ушмантнэ.

<sup>25</sup>Иисусонь крёстонзо вакссо аштеть Сонзэ авазо, аванзо сазорозо, Клеопань низэ Мария ды Магдалань Мария.

<sup>26</sup>Иисус, кода неIZE аванзо ды вакссонзо аштиця тонавтницянзо, конань Сон вечкилизе, мерсь аванстэнь: «Авай, те ней тонь цёрат».

<sup>27</sup>Мейле Сон мерсь тонавтницянстэнь: «Вана тонь ават». Теде мейле те тонавтницясь саIZE Иисусонь аванзо эрямо эстензэ кудов.

### Иисусонь куломазо

<sup>28</sup>Иисус ней содась: весемесь уш топавтовсь. Сестэ лиссь истя, кода ёвтазель Сёрмадовкссонть. Сон мерсь: «Симемам пек сась».

<sup>29</sup>Тесэ аштеть чапамо винадо пешксе кедьге. Ушмантнэ начтасть чапамо винасонть ведьпанго, пезнавтызь иссопонь тарад пес ды кепедизь Сонзэ турвас.

<sup>30</sup>Зярдо Иисус варчизе чапамо винанть, мерсь: «Топавтовсь!» – нолдызе прянзо ды оймезэ лиссь.

<sup>31</sup>Чись ульнесь пеця, оймсема чинтень анокстамо чи. Еврейтнень арасель мелест кадомс уловтнень крёст лангс оймсема чис, ды те оймсема чись ульнесь покшчи. Секс еврейтне энялдсть Пилатнэнь поркснемс вачкодезтнень пильге ловажаст ды валтнемс сынст крёст лангсто.

<sup>32</sup>Сестэ састь ушмант, порксызь пильге ловажанзо вейкенть, мейле омбоцентькак, конат вачкодезельть Иисус марто.

<sup>33</sup>Зярдо састь Иисус ваксс, сынь неIZE, Сон ульнесь уш кулозь ды пильге ловажанзо эзизь порксаяк.

<sup>34</sup>Ансяк вейкесь ушмантнэстэ сялгсо лазызе Сонзэ боканзо, ды сеске тосто тусь верь ды ведь.

<sup>35</sup>Истя ёвтни се, кие тень неIZE эсензэ сельмесэ, ды сонзэ валонзо видеть. Сон соды, видестэ корты, ды тыньгак кемевлиде.

<sup>36</sup>Те теевсь Сёрмадовксонтъ топавтовоманзо кисэ: «Сонзэ ловажазо илязо порксаво».

<sup>37</sup>Истя жо лия таркасоjak Сёрмадовксось корты: «Кармить ваномо Сень лангс, конань лазызь».

### **Иисусонь калмамозо**

<sup>38</sup>Теде мейле Иосиф, Ариматея ошонь ломань, энялдсь Пилатнэнь Иисусонь уловонзо валтомадо. Иосиф ульнесь Иисусонь тонавтницязо, ансяк салавань, еврееень прявтнэде пелеманть кувалма. Пилат мерсь. Иосиф мольсь ды саизе Иисусонь уловонтъ.

<sup>39</sup>Сась Никодимгак, кона васенцеде сакшнось Иисуснэнь веть. Сон кандсь ней смирна марто алоень човорязь тантей чине ой, колоньгеменьшка литра.

<sup>40</sup>Истя сынъ саизь Иисусонь уловонтъ, тапаризь тантей чине марто коцтонь тапарямосо, кода свал калмсить еврейтне.

<sup>41</sup>Се таркасонть, косо Сон вачкодезель крёст лангс, ульнесь сад пире, пиресэнтъ од калмо, козонь зярс кияк арасель калмазь.

<sup>42</sup>Секс мекс ульнесь еврееень пеця, оймсема чинь анокстамо чи, Иисусонь уловонзо путызь тозонь, эдь се калмось маласоль.

## **Иоанна 20**

### **Иисусонь вельмемазо**

<sup>1</sup>Недлечистэнтъ валске, чоподава, Магдалань Мария сась калмонтъ ваксс ды неизе: кевесь калмонтень совамо таркастонть сьвордозь.

<sup>2</sup>Чиезь сась сон Симон Петранень ды омбоце тонавтницянтень, конань Иисус вечкилизе, ды мерсь тенст: «Азоронтъ саизь калмосто, ды а содатано, ков Сонзэ путызь».

<sup>3</sup>Сеске лиссь Петра ды омбоце тонавтницясыкак ды тустъ калмонтъ ваксс.

<sup>4</sup>Сынь чийсть кавонест вейсэ, ансяк омбоце тонавтницясь чийсь Петрадо эрязаство ды сась калмонтъ ваксс васенцекс.

<sup>5</sup>Сон комась ды неинзе тапарямо коцтнэнь, ансяк калмонтень эзь сова.

<sup>6</sup>Мельганзо сась Симон Петра, сеске совась калмонтень, ваны – тосо ансяк тапарямо коцтт

<sup>7</sup>ды калмамонь пацясь, кона Сонзэ прясопь. Ней пацясь ульнесь тапарямо коцтнэде башка таркасо, тапардазь.

<sup>8</sup>Сестэ совась омбоце тонавтницяськак, кона сась калмонтъ ваксс васенцекс, неIZE ды кемезевсь.

<sup>9</sup>Сынь яла а чарькодилизь Пазонь пельде Сёрмадовкссо ёвтазенть: Иисуснэнь кулозьстэ вельмема.

<sup>10</sup>Ды истя тонавтницятне велявтсть кудов.

#### **Магдалань Мария вастови вельмезь Иисус марто**

<sup>11</sup>Мария аштесь калмонтъ вакссо ды авардсь. Авардемстэ варштась калмонтень

<sup>12</sup>ды несъ ашосо оршазь кавто ангелт. Сынь озадолть тосо, ков путокшнызь Иисусонь уловонзо, вейкесь пря песэ, омбоцесь пильге песэ.

<sup>13</sup>Сынь кевкстизь сонзэ: «Ава, мекс авардят?» Сон мерсь тенст: «Саизь монь Азором, ды а содан, ков Сонзэ путызь».

<sup>14</sup>Тень мерезь, сон велявтсь удалов ды неIZE стядо аштиця Иисусонь, ансяк эзизе сода Сонзэ.

<sup>15</sup>Иисус кевкстизе: «Ава, мекс авардят? Кинь вешнят?» Мария арсесь, те сад пирень азорось, ды мерсь Тензэ: «Парочи, бути тон Сонзэ ливтик, ёвтак монень, козонь путык, мон Сонзэ сайса».

<sup>16</sup>Иисус пшкадсь тензэ: «Мария!» Мария велявтсь ёнонзо ды серьгедсь Тензэ: «Раввуни!», смустезэ: «Тонавтыця!»

<sup>17</sup>Иисус мерсь тензэ: «Иля токшеве Монь эйс, эдь Мон зярс эзинь кепедеве Монь Тетянень. Азё Монь тонавтницятненень ды ёвтак тенст: Мон кепедеван Монь Тетянень ды тынк Тетянтень, Монь Пазонтень ды тынк Пазонтень».

<sup>18</sup>Магдалань Мария мольсь ды ёвтась тонавтницятненень: «Мон неия Азоронтъ». Ды сон ёвтнизе сыненст сень, мезе Азорось кортась тензэ.

#### **Тонавтницятне вастовить вельмезь Иисус марто**

<sup>19</sup>Секе недлячистэнтъ, чокшне, Иисусонь тонавтницянзо пурнавсть вейсэ. Кудо кенкштне пекстазельть, секс мекс сын пельсть еврейтнеде. Апак учо сась Иисус, арась куншказост ды мерсь тенст: «Седейоймамо тенк!»

<sup>20</sup>Тень мерезь, Сон невтинзе тенст кедензэ, пильгензэ ды боканзо. Азоронтъ неемстэ тонавтницянзо кенярдозевсть.

<sup>21</sup>Иисус мерсь тенст омбоцеде: «Седейоймамо тенк! Кода Тетясь Монь кучимим, истя Монгак тынк эйсэ кучан!»

<sup>22</sup>Тень мерезь, пувась лангозост ды мерсь тенст: «Саинк Иневанькс Оймеялтонть.

<sup>23</sup>Кинень нолдасынк-протясынк пежетнень, сенень нолдавить; кинень а нолдасынк, сень лангсо сын кадовитькак».

#### **Иисус ды Фома**

<sup>24</sup>Фома, кемгавтово тонавтницятнестэ вейкесь, конанень мерсть Кавтаське, арасель сынст марто, зярдэ сакшнось Иисус.

<sup>25</sup>Лия тонавтницятне ёвтасть тензэ: «Минь неинек Азоронтъ». Сон мерсь тенст: «Бути монсь а несынь Сонзэ кедьсэ эскень лазовкстнэнь, сурон а путсын эскень лазовкстнэненень, кедем а путса боказонзо, мон а кеман».

<sup>26</sup>Кавксо чиде мейле Иисусонь тонавтницянзо таго ульнест вейсэ, Фомаяк сынст мартоль. Сась Иисус, зярдэ кенкштне пекстазельть, арась куншказост ды мерсь: «Седейоймамо тенк!»

<sup>27</sup>Мейле мерсь Фоманень: «Путык сурот тей ды ваньтыть Монь кедень; венстик кедеть ды путык боказон. Иля уле акемицякс, ульть кемицякс».

<sup>28</sup>Фома тень каршо мерсь Тензэ: «Монь Азором ды монь Пазом!»

<sup>29</sup>Иисус ёвтась тензэ: «Тон кармить кемеме, мекс Монь неимик. Уцяскавт сеть, конат кемить апак нее».

<sup>30</sup>Иисус Эсь тонавтницянзо икеле тейсь ламо лия тамашаткак, конатнеде апак сёрмадо те книгасонть.

<sup>31</sup>Весе мезе тесэ сёрмадозь, те тынк кемевтеманк кисэ: Иисус – те Пазонь кучовт Идиця, Пазонь Цёра, ды, Сонзэ эйс кемезь, тыненк ули максозь Сонзэ лемс эрямо.

## Иоанна 21

### Иисус вастови сисем тонавтницянзо марто

<sup>1</sup>Тезде мейле Иисус таго невтизе прянзо тонавтницянстэнь Тивериадань эрькенть чиресэ. Лиссь те истя:

<sup>2</sup>Ульнесть вейсэ Симон Петра, Фома, конанень мерсть Кавтаське, Галилеянь Кана ошсто Натанаил, Зеведеень цёратне ды оштё кавто лия тонавтницянзо.

<sup>3</sup>Симон Петра корты тенст: «Молян калонь кундамо». Сынть мерсть каршонзо: «Миньгак мольтяно мартот». Сынть тусть ды сеске озасть венчес, ансяк се вестэнтъ мезеяк эзть кунда.

<sup>4</sup>Зярдо сась валскесь, Иисус аштесь эрьке чиресэ, ансяк тонавтницятне эзизь сода Сонзэ.

<sup>5</sup>Иисус кевкстинзе: «Цёрат, кода, ули-арась кодамояк ярсамопеленк?» Сынть мерсть Тензэ: «Арась».

<sup>6</sup>Сон кармавтсь тенст: «Каинк алтыманть венченть вить пелев, ды кундатадо». Сынть каизь, ды алтымась эзь таргаво тенст ламо калтнэде.

<sup>7</sup>Сестэ тонавтницясь, конань Иисус вечкилизе, мерсь Петранень: «Те Азорось!» Симон Петра, кода марясь, келя те Азорось, каизе ланганзо



ланга оршамонзо, эдь сон малав штаполь, карксызе ды кирнявть эрькес.

<sup>8</sup>Лия тонавтницятне уйсть мельганзо венчсэ, калдо пешксе алтыманть ускозь. Сынь эрьке чиренть эйстэ а васолольть, сядошка метрань тарка.

<sup>9</sup>Зярдэ сынь лиссть венчстэнтъ, несть сыремтезь толбандя, косо реставасть кал ды ульнесь кшияк.

<sup>10</sup>Иисус мерсь тенст: «Кандодо калтнэде, конатнень ней кундынк».

<sup>11</sup>Симон Петра совась венчентень, таргизе мода лангс алтыманть, кона пешксель покш калдо. Эйстэст ульнесь сядо ведьгемень колмо, ды вана истямо ламочидест эзь сезеве алтымась!

<sup>12</sup>Иисус мерсь тенст: «Садо, ярасадо». Тонавтницятнень эйстэ кияк эзь смея Сонзэ кевкстемензэ: «Кият Тон?» Сынь содасть, те Азорось.

<sup>13</sup>Иисус мольсь, сайсь кши ды явшизе тенст, истя жо калонтъкак.

<sup>14</sup>Те уш колмоцеде Иисус невтизе прынзо тонавтницянтэнь кулозьстэ вельмемадонзо мейле.

### Иисус ды Петра

<sup>15</sup>Ярсамодо мейле Иисус кевкстизе Симон Петрань: «Симон, Ионань цёразо, тон сынст коряс Монь седе пек вечксамак-а вечксамак?» Петра мерсь Тензэ: «Эно, Азорось! Тон содат, мон вечктян Тонь». Иисус мерсь тензэ: «Тряк-вант Монь вирезэнь».

<sup>16</sup>Таго Иисус кевкстизе, омбоцеде: «Симон, Ионань цёразо, тон Монь вечксамак-а вечксамак?» Петра мерсь Тензэ: «Эно, Азоро! Тон содат, мон вечктян Тонь». Иисус мерсь тензэ: «Вант Монь ревень».

<sup>17</sup>Иисус колмоцеде кевкстизе: «Симон, Ионань цёразо, тон Монь вечксамак-а вечксамак?» Петра нуваргадсь, мекс колмоцеде кевкстизе сонзэ: «Тон Монь вечксамак-а вечксамак?», ды мерсь Тензэ: «Азоро, Тон весемень содасак; Тон содат, мон вечктян Тонь». Иисус мерсь тензэ: «Тряк-вант Монь ревень».

<sup>18</sup>Алкукс, алкукс кортан тетъ: зярдо тон ульнить од, сестэ каркснитить тонсь ды молилить, ков мелеть. Зярдо сыредят, сестэ венстьсыть кедеть, ды лия тонь карксатанзат ды ветятанзат, ков арась мелеть».

<sup>19</sup>Тень Иисус ёвтызе чарькодевтемга, кодамо куломасо Петра канды шнамо Пазонтень. Тень ёвтазь, Иисус мерсь сонензэ: «Мольть Монь мельга».

### **Иисус ды вечкема тонавтницязо**

<sup>20</sup>Петра велявтьсь, неизе мельганзо молиця тонавтницянтъ, конань Иисус вечкилизе ды кона чокшнень ярсамсто, Иисусонь мештес чиремезь, кевкстизе: «Азорось, кие Тонь митянзат?»

<sup>21</sup>Сонзэ неезь, Петра пшкадсь Иисуснэнь: «Азоро! Сонензэ мезе ули?»

<sup>22</sup>Иисус мерсь тензэ: «Бути улевельгак Монь мелем, сон эрицякс кадоволь Монь самозон, тонеть мезень тев? Тон мольть Монь мельга».

<sup>23</sup>Ды срадсь те валось кемицятнень юткова, келя, те тонавтницясь а кулы. Ялатеке Иисус эзь мере Петранень, а кулы, ансяк ёвтась: «Бути улевельгак Монь мелем, сон эрицякс кадоволь Монь самозон, тонеть мезень тев?»

<sup>24</sup>Вана те тонавтницясь тесэ ёвтнияк весе тень эйстэ, сёрмадызаяк тень, ды содатано: сонзэ валозо виде.

<sup>25</sup>Ламо лияяк тейсь Иисус. Бути жо весемеде сёрмадомс педес, сестэ, арсян, сёрмадозь книгатне авольть кельге весе масторлангонтень. Аминь.

## Апостолтнэнь Тевест

### Деяния 1

<sup>1</sup>Васенце книгасонтъ мон сёрмадынь тетъ, Теофил, весемедентъ, мезе Иисус тейсь ды мезес тонавтсь ушодома шкасто саезь

<sup>2</sup>се чинтъ самс, зярдо Сон кепедевсь менельс. Теде икеле Сон Иневанькс Оймеялтонть вельде макссь кармавтокст Эсь кочкавт апостолтнэнь.

<sup>3</sup>Эсензэ куломадо мейле Иисус эрва кодамо невтевокссэ кемевикссэ невтизе Эсь прянзо вельмезекс. Сон лиснесь сынст икелев ниленьгемень чинь перть ды ёвтнесь Пазонь Инязорксчидентъ.

<sup>4</sup>Вестъ, апостолтнэнь марто ярсамо шкасто, Сон макссь тенст истямо кармавтокст: «Илядо тукшно Ерусалимстэ, мекевланк, учодо Тетянтъ алтазь казнензэ, конадонтъ Мон тенк кортынъ.

<sup>5</sup>Иоанн нававтсь-лемдсь ломантнень ведьсэ, тынь жо зяря чинь ютазь ультядо нававтозь Иневанькс Оймеялтсо».

#### Иисусонь менелев кепедевемазо

<sup>6</sup>Секскак, зярдо тонавтницятне пурнавтсь Иисусонь перька, сынъ кевкстизь Сонзэ: «Азоро, паряк сась Теть шкась одс велявтомс весень лангсо Израилень инязорксчинть?»

<sup>7</sup>Сон мерсь тенст: «Аволь тынк тевесь содамс шкатнень ды читнень, конатнень Тетям путынзе Эсь азорксчинзэ вийсэ.

<sup>8</sup>Ансяк зярдо Иневанькс Оймеялтось валги лангозонк, сестэ тыненк максови вий ды тынь карматадо улеме Монь эйстэ ёвтницякс-яволявтницякс Ерусалимсэ, весе Иудеясонтъ ды Самариясонтъ, ды моданть сехте васоло таркатнесэяк».

<sup>9</sup>Тень мерезь, Сон сынст сельмест икеле кармась кепедеведем верев, ды пелесь кекшизе Сонзэ эйстэст.

<sup>10</sup>Иисусонь кепедевемадо мейлеяк тонавтницятне пштистэ вансть менелентень, зярдо апак учо ваксозост лиссть ашосо оршазь кавто ломанть.

<sup>11</sup>Сынь мерсть: «Галилеянь ломанть! Мекс тынь аштетядо ды вантадо менельс? Те Иисус, кона саезь ваксстонк менелев, истямо ладсо велявтыяк, кода неинк менельс туеманзо».

### **Иудань таркас апостолонь кочкамось**

<sup>12</sup>Теде мейле апостолтнэ валгсть пандонть лангсто, конанень мерильть Ойумарькс пандо, ды састь мекев Ерусалимев. Те пандонть ды Ерусалименть ютксо молема таркась ульнесь авасоло, вайгельбень кувалмошка.

<sup>13</sup>Зярдо састь ошов, сынь пурнавсть вере покш нупальс, косо пурнавкшность свал. Тосо ульнесть Петра ды Яков, Иоанн ды Андрей, Филип ды Фома, Бартоломей ды Матвей, Алфеень Яков, Симон Зилот ды Яковонь Иуда цёразо.

<sup>14</sup>Весе сынь сеedyстэ пуромкшность тозо ве мельсэ озномо ды знялдомо. Сынст марто озность зярыя аваткак, Иисусонь братонзо ды Марияяк, Иисусонь авазо.

<sup>15</sup>Зярыя чинь ютазь, кемицянь промкссо, косо ульнесть сядо комсешка ломанть, Петра стясь ды кармась кортамо:

<sup>16</sup>«Кемиця ялгат! Эрявсь топавтовомс се Сёрмадовксонтень, конань эйсэ Иневанькс Оймеялтось Давидэнь вельде умок икелев ёвтась Иудадо. Иуда ульнесь кинь невтицякс Иисусонь кундыцятнень туртов.

<sup>17</sup>Сон ульнесь минек ютксо вейкекс ды важдось мартонок вейсэнть тевсэнть».

<sup>18</sup>– Ярмактнень лангс, конат тензэ максозельть зыянов тевензэ кисэ, сон рамась пакся, косо прась прянзо лангс ды истя яжавсь, мик пекезэяк сезевсь, ды ёртневсть сюлонзо-пекензэ.

<sup>19</sup>Теде кармасть содамо весе Ерусалимень эрицятне ды лемдизыгак те паксянтъ эсест кельсэ Акелдамакс, Верь Паксякс. –

<sup>20</sup>«Псалтирьсэ сёрмадозь: “Кадовозо чавокс сонзэ кудозо, ды илязо кадово сонзэ эйс эриця”, ды истя жо: “Кадык лиясь сайсы эсензэ лангс сонзэ ваныцянь важдеманзо”.

<sup>21</sup>Секскак миненек эряви кочкамс Иудань таркас ломань сетнень ютксто, конат свал якасть мартонок, зярдо ютксонок ульнесь Иисус Азорось,

<sup>22</sup>Иоаннонь пельде Иисусонь нававтовомастонть саезь се чинть самс, зярдо Иисус саезель минек ютксто менелев. Те ломанентень, кода миненеккак, улема Иисусонь вельмемадонзо ёвтницякс».

<sup>23</sup>Пуромозтне яволявтсть кавто лемть: Иосифень, конанень мерильть Барсаба эли Юстус, ды Матвиень.

<sup>24</sup>Седе мейле весе сынъ озность: «Азоронок, Тон содасак эрванть седеензэ. Невтик тенек, конань неть кавтотнень ютксто кочкик

<sup>25</sup>важдеме апостолокс Иудань таркас, эдь сон тусь тов, косо тензэ улемаяк».

<sup>26</sup>Мейле сынъ каясть жеребейсэ, ды уцяскась прась Матвей лангс. Ды сон совавтозель кевейкее апостолтнэнь юткс.

## Деяния 2

### Иневанькс Оймеялтонь самось

<sup>1</sup>Сась Ведьгеменце чинь покшчись. Весе тонавтницятне ве мельсэ пурнавсть вейсэ.

<sup>2</sup>Апак учо менельстэ каятотсь шалт, кона мольсь давол вармань увт ёнов, ды пештизе весе кудонтъ, косо сынъ ульнестъ.

<sup>3</sup>Мейле сынъ несть мезть-бути толгелень кондямот, конат явшесть ды валгонестъ вейкенъ-вейкенъ эрванть вельксэс.

<sup>4</sup>Сеске весе пештявсть Иневанькс Оймеялтсо ды кармасть кортамо эрва кодамо лия кельсэ, конатнесэ кортамонтъ максызе тенст Оймеялтось.

<sup>5</sup>Ерусалимсэ эрясть Пазнэнь кемиця ломанть, еврейть, конат састь масторлангонь эрва кодамо раськетнень ютксто.

<sup>6</sup>Зярдо марязевсь те шалтось, пурнавсть ламо ломанть, ды весе абунгадсть. Эдь эрвась эйстэст марясь, кода кортасть сонзэ тиринь кельсэнзэ!

<sup>7</sup>Весе прасть дивас ды талнозь кевкстнестъ вейкест-вейкест: «Нать весе неть ломантне аволь Галилеянь эрицят?

<sup>8</sup>Кода эно истя эрвась эйстэнек марясынзе сынст минек тиринь кельтнесэ кортамсто?

<sup>9</sup>Минь, конат Парфиясто, Мидиясто ды Эламсто, Месопотамиясто, Иудеясто ды Каппадокиясто, Понтосто ды Асиясто,

<sup>10</sup>Фригиясто ды Памфилиясто, Египетстэ ды Ливиянь Кириная ёнкссто, конат састь Римстэ, еврейть ды еврееень кемемас совавтозь лия раськень ломанть,

<sup>11</sup>Критэнь ды Аравиянь эрицят – весе минь марятано, кода сынъ ёвтнить Пазонь ине тевтнеде минек тиринь кельтнесэ!»

<sup>12</sup>Дивазь ды талнозь, сынъ кевкстнестъ вейкест-вейкест: «Кода тень чарькодемс?»

<sup>13</sup>Лиятне, пеедькшнезь, кортасть: «Сынъ иредсть ламбамо винадо».

#### **Ведьгеменце чинь покшчистэ Петрань кортамозо**

<sup>14</sup>Сестэ Петра, кевейкее апостолтнэнь марто вейсэ, стясь ды гайтев вайгельсэ мерсь ломантненень: «Еврейть ды весе, кить эрить Ерусалимсэ! Мон панжса тенк, кода тень чарькодемс. Кунсолонизь мелень явозь.

<sup>15</sup>Нетъ ломантне а иредьстэть, кода тыненк маряви. Шказо ней ансяк валскень вейксэце час.

<sup>16</sup>Аволь истя! Те истя топавтовсть Йоиль пазмарицянтъ валонзо:

<sup>17</sup> “Меельце читнестэ, – корты Пазось, – Мон валса Эсень Оймеялтонть эрва ломанентъ лангс. Тынк цёранк ды тейтеренк кармить пазмарицякс кортамо, од ломантне кармить нееме чартть-неявкст, тынк сыре атятне кармить нееме онт.

<sup>18</sup>Истя жо Эсень важотнень-уретнень лангс, кода цёратнень, истя аватнень лангскак, Мон валса Оймеялтом сеть читнестэ, ды сынъ кармить пазмарицякс кортамо.

<sup>19</sup>Мон невтян тамашат менель прясо ды эрва кодат тешкст мода лангсо: верь, тол ды тусто качамо.

<sup>20</sup>Чипаесь чополгады, ковань верии Азоронть Чинть самодонзо икеле, покш ды иневалдо Чидентъ икеле.

<sup>21</sup>Теке марто эрвась, кие тердъсы Азоронть лездыцякс, – идеви”.

<sup>22</sup>Израилень ломанть! Кунсолемизь: Назаретэнь Иисус тыненк кучозель Пазонть пельде. Пазось тень невтизе-кемекстызе виевдеяк виев тевсэ, ине тамашасо ды дивань тешкссэ. Сынст Сон теинзе Иисусонь вельде тынк сельменк икеле, кода тынськак содатадо.

<sup>23</sup>Те Иисусонть тынь маштынк. Сон максозель тынк кедь алов Пазонть арсевксэнзэ ды икелев ваноманзо коряс. Тынь эскесэ вачкодинк Сонзэ крёст лангс Коень а содыця лия раськенсетнень кедьсэ.

<sup>24</sup>Ансяк Пазось Сонзэ вельмевтизе, олякстомтызе куломань вийдентъ. Куломанть арасель виезэ кирдемс Сонзэ.

<sup>25</sup>Вана мезе Давид кортась Сонзэ эйтэ: “Мон свал эсень икеле неса Азоронть. Сон вить кедь ёно монь эйтэ, ды те максы монень вий кеместэ аштемс.

<sup>26</sup>Секскак монь седеем кенярды, келем корты моронь валсо. Натой рунгомгак карми оймсеме Пазонтъ лангс кемезь:

<sup>27</sup>Тон а кадсак оймем кулозтнень юткс, тоначис, Тон а макссак Эсетъ Иневаньксэнтъ рунгонзо наксадомас!

<sup>28</sup>Тон невтят монень эрямонь кинть, ды пештясамак кеняркссо Тонь чамат икеле!”

<sup>29</sup>Ялгат-оят, мереди видьстэ ёвтамс тенк Давид покштядонок: сон кулось ды калмазель, калмозояк течис ванстовсь тесэ.

<sup>30</sup>Давид ульнесь пазмарицякс ды содась: Пазось божазь-пежетькстазь алтась кепедемс сонзэ раськенъ ломантнень ютксто ломанень рунгосо Христосонь ды озавтомс сонзэ инязоронь озамо таркантень.

<sup>31</sup>Давид икелев неизе Пазонь кучовт Идицянтъ вельмеманзо ды кортась: Сонзэ оймезэ а кадови кулозтнень юткс, тоначис, ды рунгозо а наксады.

<sup>32</sup>Вана самай те Иисусонтъ вельмевтизе Пазось, ды тень минь весе неинек!

<sup>33</sup>Тетя Пазось кепедизе Иисусонь Эсь вить кедензэ ёнов ды максызе Тензэ Эсь Оймеялтонзо, кода алтакшноськак. Те Оймеялтонть Иисус валызе минек лангс. Тень тынь тынсь ней марятадо ды нетядо.

<sup>34</sup>Давид эзь кепедевкшне менельс, ялатеке сон мерсь: «Азорось мерсь монь Азоронтень: озак Монь вить кедь ёнов,

<sup>35</sup>зярс Мон а тейсынъ Тонь душманот пильгеть путома таркакс».

<sup>36</sup>Секскак, Израилень раське, кеместэ содак: Пазось теизе Иисусонь Азорокс ды Эсензэ кучовт Идицякс – те Иисусонтъ, конань тынь эскесэ вачкодинк крёст лангс».

<sup>37</sup>Зярдо ломантне маризь тень, сынст седеест пек ризнэзевсть. Сынъ кевкстнестъ Петрань ды лия апостолтнэнь: «Ялгат-оят, ней мезе миненек теема?»»



<sup>38</sup>Петра тень каршо мерсь: «Эрьвась эйстэнк велявтозо Пазонтень, нававтово Иисус Христосонь лемс, пежетензэ нолдамга, – ды максови тенк казнекс Иневанькс Оймеялтось.

<sup>39</sup>Эдь те алтамонть Пазось максызе тыненк, тынк эйкакштнэнень ды весе сетнененьгак, конат васолот Пазонтъ эйстэ, весенень, кинь тердсы Азорось, минек Пазось».

<sup>40</sup>Ламо лия валсоjak Петра кортась ды энялдсь сынст икеле: «Идеде эсь прянк зыяндонтъ, кона пры неень пингень колазь ломантнень лангс».

<sup>41</sup>Сеть, конат мельспаросо кемсть сонзэ валтнэнень, нававтовтсть прят. Се чистэнтъ кемицятнень вейсэндявсть колмо тѣжашка ломанть.

<sup>42</sup>Весе сынъ свал эрясть-аштеть апостолтнэнъ тонавтомасо, эсь ютковаст ялгакчисэ, кшинь синдемасо ды озномасо.

#### Кемицятнень эрямост

<sup>43</sup>Ерусалимсэ апостолтнэнъ вельде тейневсть ламо тамашат ды диванъ тевть, секкак эрьванть седейсэ эрясь сорнома ды пелема.

<sup>44</sup>Весе кемицятне свал эрясть-аштеть велувсо; весе, мезест ульнесь, ульнесь вейсэнъ.

<sup>45</sup>Сынъ микшнестъ кудост-чист, ули-парост ды явшестъ ярмакост лия кемицятнень ланга, эрьвантень арасьчинзэ коряс.

<sup>46</sup>Эрьва чине сынъ пуромильть Пазонъ кудонъ пирявкс потс, эсест кудовасткак пурнавильть вейсэ кшинь синтреме, ярснестъ кецнезь, ванькс седейсэ

<sup>47</sup>ды Пазонтъ шназь. Весе ломантне вечксть кемицятнень, ды чистэ чис Азорось вейсэндясь идезтнень кемицянь куронтень.

### Деяния 3

### Петра шумбралгавтсы чаморонть

<sup>1</sup>Весть Петра ды Иоанн сыргасть вейсэ Пазонь кудос. Шкась ульнесь чикуншкань колмо част, ознома шка.

<sup>2</sup>Пазонь кудонь ортанть вакссо, конанень мерильть Мазый орта, озадо аштесь чачомасто чамор ломань, конань эрва чистэ кандылизь ды озавтылизь тов максовксонь вешеме ютыцятнень пельде.

<sup>3</sup>Зярдо чаморось неинзе Петрань ды Иоаннонь Пазонь кудов совамсто, сон кармась сынст пельдеяк максовксонь вешеме.

<sup>4</sup>Петра ды Иоанн видьстэ варштасть лангозонзо, ды Петра пшкадсь тензэ: «Варштак минек лангс».

<sup>5</sup>Ломанесь пштистэ вансь апостолтнэнь ёнов, пельдест кодамояк максовксонь учозь.

<sup>6</sup>Сестэ Петра мерсь: «Сиям ды сырнем арась, секс максан теть мезем ули. Назаретэнь Иисус Христосонь лемсэ кармаван теть: стяк ды якак!»

<sup>7</sup>Петра саизе сонзэ вить кедте, лездась тензэ стямс, ды сеске чаморонть пильге эзнензэ ды санонзо кемекставсть.

<sup>8</sup>Сон кирнявтсь пильгензэ лангс ды кармась якомо! Совась апостолтнэнь марто Пазонь кудос, якась кирнявтнезь ды шнась Пазонть.

<sup>9</sup>Ломантне, конат тосо ульнесь, неизь сонзэ якицякс ды Пазонть шныцякс.

<sup>10</sup>Сынь содызь се ломаньсэнтэ чаморонть, кона свал озадоль Пазонь кудонь Мазый ортанть вакссо ды вешиль максовкст. Секскак сынь пек тандадсть ды талность сонзэ марто теевезентэ кувалма.

### Пазонь кудосо Петрань кортамозо

<sup>11</sup>Чаморось, кона шумбралгавтозель, эзь кадовкшно Петрань ды Иоаннонь эйстэ. Секскак ламо ломантне, талакалезь, пурнавсть сынст

перька Пазонь кудонь галереянтень, конанень мерить Соломонь галерея.

<sup>12</sup>Тень неезь, Петра пшкядсь ломантненень: «Израилень ломанть! Мезть тенень дивсетядо, мезть минек лангс вантадо, прок минь эсенек вийсэ эли парокойчисэ теинек тень, ды сон кармась якамо?»

<sup>13</sup>Авраамонь, Исаконь ды Яковонь Пазост, минек покштятненень Пазост невтизе Эсь Иисус Цёранзо инексчинть. Тынь миинк Сонзэ прявтиэнень, велявтынк прянк Сонзэ эйтэ Пилатонь икеле, зярдо тона нолдыксэлизе Сонзэ.

<sup>14</sup>Тынь жо велявтыде Сонзэ, Иневаньксэнтъ, Видечисэнтъ, эйтэ ды тарказонзо вешинк нолдамс олячис ломань чавицянтъ.

<sup>15</sup>Тынь чавинк эрямонь Казицянтъ! Ансяк Пазось Сонзэ вельмевтизе кулозьстэ, ды минь минсь тень неицят-содыцят.

<sup>16</sup>Иисусонь лемензэ виесь ды Иисуснэнь кемемась кемекстызе те ломанентъ. Тынь несынк ды содасынк те ломанентъ, ды вана кемемась, конань кази Иисус, максь тензэ шумбрачи весеменк икеле.

<sup>17</sup>Теке марто, ялгат-оят, мон содан: тынь, кода прявтонккак, те зыянонтъ теинк асодамочинк кувалма.

<sup>18</sup>Ансяк истя вана Пазось топавтызе весементъ, мезесь умок ёвтазель пазмарицянзо вельде, зярдо кортась: Сонзэ кучовт Идицянтъ учить пиштемат-майсемат.

<sup>19</sup>Секскак янкседе ды велявтодо Пазонтень, пежетенк допрок нардамга.

<sup>20</sup>Сестэ Азоро Пазось кучи тенк оймень-седеень сыргозема шка. Сон кучсы тенк Иисус-Идицянтъ, конань уш умок кочкизе тынк туртов.

<sup>21</sup>Иисуснэнь жо кадовома менельс, зярс а сы шкась, зярдо Пазось аравтсы весементъ эсь таркаванзо. Тень эйтэ Сон умок кортась Эсензэ кочкавт пазмарицянтненень вельде.

<sup>22</sup>Эдь Моисей кортась покштятненень-тетятненень: “Азорось, тынк Пазось, кочки тенк тынсенк расъкестэнтъ Пазмариця, кона монь кондямо. Кунсолодо Сонзэ весемесэ, мезе Сон тенк илязо корта.

<sup>23</sup>Эрвась, кона а карми се Пазмарицянтъ кунсолосо, ули панезъ Пазонь расъкестэнтъ ды истожазь”.

<sup>24</sup>Истя икелев кортасть неть читнеде Самуилстэ саезь весе пазмарицятне, конат пачтясть Пазонь валонть.

<sup>25</sup>Пазмарицятненень вельде максозь алтавкстнэ ды вейсэнълувось, конань Пазось теизе-сюлмизе тынк покштятненень марто, те весе теезь тынк туртов. Сон мерсь Авраамненень: “Тонь расъкень-буень поладыксэть вельде улить чанстязь масторлангонь весе эрицятне”

<sup>26</sup>Эсь Иисус Цёранзо вельмевтемадо мейле Пазось васняк кучизе Сонзэ тыненк, тынк чанстямо, эрванть эйстэденк тердеме велявтомс зыянонь кинть лангсто».

## Деяния 4

### Петра ды Иоанн Инепромксонть икеле

<sup>1</sup>Зярдо Петра ды Иоанн кортасть ломантненень, ваксозост састь попт, Пазонь кудонь ванстыцянь прявтось ды саддукейть.

<sup>2</sup>Весе сынь пек кежеельть сень лангс, мекс апостолтнэ тонавтсть ломантненень ды, Иисусонь вельмеманть лангс невтезь, кортасть кулозьстэ вельмемадо.

<sup>3</sup>Сынь кундызь Петрань ды Иоаннонь чокшнень шкава ды секскак валскес пекставтызь пекстамо кудос.

<sup>4</sup>Ансяк ламот, конат маризь сынст тонавтома валост, кемезевсть, ды кемицятненень цётост кассь вете тёжас.

<sup>5</sup>Омбоце чистэнтъ прявтнэ, покштнэ ды Моисеень Койс тонавтыцятне пурнавсть Ерусалимс.

<sup>6</sup>Тосо ульнесь Аннас – попонь прявтось, Кайафа, Иоанн, Александр ды попонь прявтонть лия роднянзо-раськензэ.

<sup>7</sup>Сынь аравтызь апостолтнэнь эсест икелев ды кевкстизь: «Кодамо вийсэ ды кинь лемсэ тынь шумбралгавтынк чамор ломанень?»

<sup>8</sup>Петра, Иневанькс Оймеялтсо пештязь, мерсь: «Раськенть прявтт ды Израилень покшт!

<sup>9</sup>Бути тынь течи вештядо минек пельде каршо вал сэредиця ломаннень лездамонь кувалма ды бути кевкстнетядо, кода сон ульнесь шумбралгавтозь,

<sup>10</sup>сестэ содадо тыньгак, Израилень весе раськеськак: Назаретэнь Иисус Христосонь лементь вельде те ломанесь ашти ней икеленк шумбра-паро! Тынь Иисусонь вачкодекшнынк крѣст лангс, а вана Пазось ялатеке вельмевтизе кулозьстэ.

<sup>11</sup>Иисус – се кевесь, конань тынь, кудонь теицятне, ёртынк ды кона мейле арась ужонь-уголонь кирдиця юр кевекс, ды Сондензэ башка киньгак эйсэ лиясо арась идема.

<sup>12</sup>Апак максо ломантненень весе менеленть ало лия истямо лем, конань вийсэ минь идевлинек».

<sup>13</sup>Зярдэ инепромксонсетне неизь Петрань ды Иоаннонь апелеманть ды редизь сынст апак тонавтозекс, весемень кондямо ломанекс, сын дивазевсть. Сестэ сын чарькодсть: неть ломантне ульнесть Иисусонь марто молицятнень ютксто.

<sup>14</sup>Шумбралгавтозентькак неизь апостолтнэнь вакссо аштемстэ, ды секскак сынест а мезе ульнесь ёвтамс каршо.

<sup>15</sup>Сестэ сын кармавтсть апостолтнэненень лисемс Инепромксстонть ды кармасть эсь ютковаст кортнеме:

<sup>16</sup>«Мезе миненек теэмс неть ломантнень марто? Ерусалимень весе эрицятне содыть, кодамо алкуксонь тамаша сынъ тейсть, ды миненек а кода тень сёпомс.

<sup>17</sup>Ансяк раськенть ютксо седе келейстэ те кулянтъ а эряви сравтнемс, тандавтнезь, кардасынек сынст: Иисусонь лемензэ коряс киненьгак мезеяк а кортамс».

<sup>18</sup>Сынъ таго тердизь апостолтнэнь ды кежейстэ кармавтсть тенст а кортамс ды а тонавтомс Иисусонь лемсэ.

<sup>19</sup>Ансяк Петра ды Иоанн мерсть тень каршо: «Арседе тынсь: бути карматано седе пек кунсолото тынк, ды аволь Пазонтъ, – те виде-а виде ули Пазонтъ икеле?

<sup>20</sup>Минь кодаяк а цидярдтано а кортамс сень эйстэ, мезенть неинек ды маринек».

<sup>21</sup>Инепромксонсетне таго, седеяк пек тандавтнезь, кардызь апостолтнэнь ды нолдызь. Сынъ эзьт муе эйсэст чумонь пандомань тувтал. Весе перькаст аштиця ломантне шнасть Пазонтъ теезенть кисэ,

<sup>22</sup>эдь ломанентень, конань марто лиссь те тамашань шумбралгавтомась, ульнестъ ниленьгеменде ламо иеть.

#### **Кемицятнень озномаст**

<sup>23</sup>Зярдэ Петрань ды Иоаннонь нолдызь, сынъ таго састь эсь ялгаст юткс ды ёвтнизь, мезе тенст кортасть попонь покштнэ ды раськень прявтнэ.

<sup>24</sup>Тень марямодо мейле весе кемицятне кармасть вайгельсэ озномо Пазонтень: «Весемькирди Паз! Тон теик менеленть, моданть, иневеденть ды весементь, мезе сынст эйсэ.

<sup>25</sup>Тон кортыть Иневанькс Оймеялтсо Давидэнь вельде, кона минек покштянок ды Тонь важот: “Мекс пек кежейгадсть лия раськенсетне? Мекс стяко арсить зыянов тевде раськетне?

<sup>26</sup>Масторлангонь инязортнэ сыргасть тюреме, прявтнэяк вейсэндявсть Азоро Пазонть каршо ды Сонзэ кучовт Идицянтъ каршо”.

<sup>27</sup>Ды алкукскак те ошсонть Ирод ды Понтий Пилат вейсэндявсть лия раськенсетнень ды Израилень ломантнень марто Тонь Иневанькс Иисус Цёрат каршо, конань Тон вадик-кочкик Идицякс.

<sup>28</sup>Сынь топавтызь сень, мезенть Тон икелепелев аравтык Эсь вийсэть ды арсемасот.

<sup>29</sup>Ды ней, Азоронок, варштак сынст тандавтнемаст лангс ды макст тенек, Тонь важотненень, вий апак пеле пачтямс Тонь валот.

<sup>30</sup>Тон венстик кедеть ды тейть истя: шумбралгалест сэредицят, улест невтезь дивань тевть ды тамашат Тонь Иневанькс Иисус Цёрат лемсэ!»

<sup>31</sup>Зярдэ сынь прядызь озномаст, сорнозевсь се таркась, косо сынь ульнесть, весе сынь пештявсть Иневанькс Оймеялтсо ды апак пеле ушодсть пачтямо Пазонь валонть.

#### **Весемесь вейсэнь**

<sup>32</sup>Кемицятнеде ульнесть ламо, ды весе сынь вейсэндявсть седейёжосост ды превсэст-оймесэст. Кияк эзь лово эсь ули-паронзо ансяк эсензэкс, весемесь ульнесть вейсэнь.

<sup>33</sup>Апостолтнэ, ине вийсэ пештязь, ёвтнесть Иисус Христос Азоронть вельмемадонзо, ды ине чанстесь ульнесть казезь весенень сыненст.

<sup>34</sup>Арасельть ютксост арасьчисэть, эдь весе ломантне, кинь ульнесть модаст ды кудост-чист, микшнильть эйсэст, ярмактнень кандылизь

<sup>35</sup>ды максылизь апостолтнэнь кедьс. Неть ярмактнень сынь явшильть кемицятнень ланга, кинень зяро эряви.

<sup>36</sup>Истя Иосияк, Кипра усиянь левинсесь, конанень апостолтнэ мерильть Варнава, лиякс – Лациця-Кемекстыця,

<sup>37</sup>миизе эсь паксянзо, кандынзе ярмактнень ды максынзе апостолтнэнь кедьс.

## Деяния 5

### Ананиянь ды Сапфирань кенгелемадост

<sup>1</sup>Вейке ломань, лемезэ Анания, Сапфира нинзэ марто вейсэ миизь эсест паксяст.

<sup>2</sup>Зярыя ярмакт Анания сёпсь, низэяк теде содась. Кадовозтнень сон кандынзе ды максынзе апостолтнэнь кедьс.

<sup>3</sup>Петра мерсь тензэ: «Анания, мекс истя нолдык Сатананть седеезэть, мик мельс прыть кенгелемс Иневанькс Оймеялтонть ды сёпить талика ярмактнеде, конатнень сайть миезь моданть кисэ?»

<sup>4</sup>Эдь модась миемадонзо икеле ульнесь тонь, ды ярмактнеяк, конатнень тон кисэнзэ сайть, – тонь. Мекс эно тон арсить теемс истя? Тон кенгелить аволь ломантненень – Пазонтень».

<sup>5</sup>Кода ансяк Анания тень маризе, сон оймевтеме прась. Весе, кить марясть теде, пек тандадсть.

<sup>6</sup>Мейле састь од цёрат, тапардызь Ананиянь уловонзо, ливтизь ды калмизь.

<sup>7</sup>Колмо часонь ютазь сась Ананиянь низэяк, кона эзь сода, мезе лиссь мирдензэ марто.

<sup>8</sup>Петра кевкстизе: «Ёвтык монень, истямо а истямо питнеде тынь мирдеть марто миинк моданть?» «Нама», мерсь авась, «зяродо».

<sup>9</sup>Петра мерсь тензэ: «Мекс тынь вейсэ арсиде вейке мельсэ снартнемс-варчавтнемс Азоронь Оймеялтонть? Марясыть кенкш удало эскелькстнэнь? Те састь тонь мирденть калмицянзо, сынть тонькак ливттыдызь».

<sup>10</sup>Авась сеске прась Петрань икелев оймевтеме. Од цёратне совасть, неизь кулозь аванть, ливтизь уловонзо ды калмизь мирдензэ ваксс.

<sup>11</sup>Весе кемицянь куронть ды лия ломантненькак, кить теде марясть, копачинзе покш тандадома.



### Дивань тевть ды тамашат

<sup>12</sup>Апостолтнэ тейнесть ломантнень ютксо ламо дивань тевть ды тамашат. Весе кемицятне ве мельсэ сеедьстэ пурнавильть Соломононь галереянтень.

<sup>13</sup>Ве ёндонсетне пельсть вейсэндявомс марто, теке марто весе пекшнасть эйсэст.

<sup>14</sup>Азорос кемицятнень ламочист яла кассь ды кассь, ламо цёрат ды ават вейсэндявсть сынст лувонтень.

<sup>15</sup>Ды вана сэредицятнень кармасть ливтнеме ушов тарканек-эземнек: паряк, куш Петрань сулеезэ пры лангозост, зярдон сон карми ютамо вакскаст.

<sup>16</sup>Ламот сакшныльть Ерусалимев оштнэстэ, конат маласольть, кандылизь сэредицятнень ды аванькс оймеялтсо колазтнень, ды весе шумбралгадыльть.

### Апостолтнэнь пекстамост

<sup>17</sup>Попонь прявтонтъ ды мартонзо весе саддукейтнень пек сьвадсть сельмест апостолтнэнь лангс.

<sup>18</sup>Секскак сынъ кундызь апостолтнэнь ды озавтызь весень туртов пекстамо кудос.

<sup>19</sup>Ансяк ветъ Азоронь ангел панжинзе пекстамо кудонь кенкштнень ды ливтинзе апостолтнэнь.

<sup>20</sup>«Азёдо Пазонь кудос», – мерсь сон, – «ды ёвтнеде ломантненень весементъ те од эрямодонтъ».

<sup>21</sup>Чинь стямодо икеле сынъ совасть Пазонь кудос, кода тенст мерезель, ды кармасть ломантнень тонавтомо. Валске марто попонь прявтось ды сонзэ малавиксэнзэ тердизь Израилень весе Инепромксонтъ ды кучсть ломанть апостолтнэнь мельга пекстамо кудос.

<sup>22</sup>Зярдю кучозтне састь пекстамо кудонтень, сынъ тосто апостолтнэнь эзизь муе ды, мекев сазь, ёвтасть истя:

<sup>23</sup>«Минь минсь неинек: пекстамо кудонтъ кенкшензэ кеместэ сёлгозь, кенкштнень икеле аштить ванстыцят, ансяк зярдю минь кенкштнень панжинек ды совинек потс, тосто киньгак эзинек муе».

<sup>24</sup>Попонь прявтось, Пазонь кудонь ванстыцятнень прявтось ды лият попонь покштнэ кунсолызь абунгадозь – мезе те истямось?

<sup>25</sup>Мейле та-кие совась ды ёвтась: «Конатнень тынь озавтнинк пекстамо кудос, аштить Пазонь кудосо ды тонавтыть ломанть».

<sup>26</sup>Сестэ ванстыцянь прявтось тусь эсь ломанензэ марто ды сынъ ветизь апостолтнэнь Инепромксос. Ансяк ветизь аволь вийсэ, сынъ пельсть ломантнеде: эсест аволизь чавно кевсэ.

<sup>27</sup>Апостолтнэнь совавтызь ды аравтызь Инепромксонтъ икелев. Попонь прявтось ушодсь кевкстнеме сынст.

<sup>28</sup>«Минь кармавтынек тенк а тонавтомс Иисусонь лемсэ, – мерсь попонь прявтось, – ансяк тынь ялатеке весе Ерусалиментъ пештинк тонавтомасонк ды теке марто чумондтадо минек Сонзэ куломасо».

<sup>29</sup>Петра ды лия апостолтнэ мерсть тень каршо: «Миненек кунсолома Пазонтъ, аволь ломантнень!»

<sup>30</sup>Минек ине покштятнень Пазост кулозьстэ вельмевтизе Иисусонь, конань тынь крёст лангс вачкодезь маштынк.

<sup>31</sup>Пазось озавтызе Сонзэ Эсь вить кедензэ ёнов Ветицякс ды Идицякс вана мекс: велявтомс Израилень весе раськентъ Пазонтень ды нолдамс сынст пежетест.

<sup>32</sup>Тень неицятне-содыцятне – минь ды Иневанькс Оймеялтось, конань Пазось максызе Сонзэ мелентъ ваныцятненень».

<sup>33</sup>Зярдю Инепромкссо весе аштицятне тень маризь, сынъ азаргадсть кежтнеде, мик анокольть маштомс апостолтнэнь.

<sup>34</sup>Сынст ютксо ульнесь вейке фарисей, Гамалил, Койс тонавтыця, конань весе ломантне пек вечкилизь. Сон стясь Инепромксонтъ икелев ды кармавтсь ливтемс аламнес апостолтнэнь.

<sup>35</sup>Мейле сон мерсь Инепромксонь ломантненень: «Израилень ломанть, вельть парсте арсинк, мезе карматадо тееме неть ломантненень марто.

<sup>36</sup>Аволь умок тесэль та-кодамо Тевда, кона эсь прянзо теиль-невтнилъ ине ломанькс, ды мельганзо сыркакшность нилесядошка ломань. Зярдс сон маштозель, весе сонзэ мельга молицянзо срадсть, весе теньсэ прядовськак.

<sup>37</sup>Теде мейле, сёрмадстома шкасто, сась Иуда Галилеясто. Сон кепедсь эсь мельганзо ломантнеде байтяк, ансяк сонгак маштозель, ды сонзэяк мельга молицянзо срадсть.

<sup>38</sup>Секс, те тевенть коряскак, вана мезе тенк мерян: кадынк неть ломантненень. Нолдынк. Улиндеряй сынст тевесь ломань пельде, сон сонсь лепами.

<sup>39</sup>Мекевланк, улиндеряй те тевесь Пазонтъ пельде, сон тыненк а лоткавтови. Ванстынк прянк! Илязо лисе истя: тынсь карматадо улеме Пазонтъ каршо молицякс-тюрицякс!»

<sup>40</sup>Гамалилэнь валонзо кемевтизь Инепромксонтъ. Сынъ тердизь апостолтнэнь, чавовтызь сынст, кардызь кортамодо Иисусонь лемденть ды нолдызь.

<sup>41</sup>Апостолтнэ лиссть Инепромксонтъ кенярдозь – сыненст максозель уцяска пиштемс Иисус Азоронтъ лемензэ кисэ.

<sup>42</sup>Сынсь ялатеке таго чиде чис апак лотксе тонавтсть Пазонь кудосоаяк, ломантненень кудовааяк ды ёвтнестъ весенень Кенярксов кулянтъ: Иисус – те Пазонь кучовт Идицясь.

## Деяния 6

### Сисем лездыцятнень кочкамо

<sup>1</sup>Нетъ читнестэ, зярдо тонавтницятнень цётост яла ламолгадсь, грекень кельсэ кортыця еврейтне кармасть пеняцямо эсь тиринь кельсэ кортыця еврейтненень лангс, мекс тонат вакска ютнесызь сынст довасть эрва чинь ярсамопеленть явшемстэ.

<sup>2</sup>Сестэ кемгавтово апостолтнэ пурнызь лия кемицятнень вейс ды мерсть: «Те апаро, бути минь кадсынек Пазонь валонтень важдеманок ярсамопеленть явшеманть кувалма.

<sup>3</sup>Секс, кемиця ялгат, кочкадо эсенк ютксто сисем ломанть, конатнень весе содасызь кода Иневанькс Оймеялтсо ды превейчисэ пештязтнень, ды минь макссынек те теветь сыненст.

<sup>4</sup>Сестэ минсь седе ламо шка карматано явомо озномантень ды Пазонь валс тонавтомантень».

<sup>5</sup>Те мелесь весеменень вечкевсь, ды кочкизь Стефанонь, кона пештязель кемемасо ды Иневанькс Оймеялтсо, Филипень, Прокоронь, Никаноронь, Тимононь, Парменэнь ды Антиокиясто лия раськень Николаень, кона совась еврееень кемемас.

<sup>6</sup>Сынст аравтызь апостолтнэнь икелев. Апостолтнэ озность ды путызь лангозост эсь кедест.

<sup>7</sup>Пазонь валось яла срадсь, тонавтницятнень ламочист Ерусалимсэ куруксто кассь, поптнэстэяк ламот совасть те кемемантень.

### Стефанонь кундамось

<sup>8</sup>Стефан ульнесь пештязь кемемадо ды вийде, тейнесь ломантнень ютксо ине тамашат ды дивань теветь.

<sup>9</sup>Се шкане муевсть ломанть Олячис нолдазтнень синагогастонтъ, кода тензэ мерильть. Сынъ ульнестъ еврейть Киринаесто ды Александриясто ды кармасть пелькстамо Стефанонь марто. Стефанонь каршо сыргасть истя жо лия еврейть Киликиясто ды Асиясто.

<sup>10</sup>Ансяк сынъ эзть цидярдю се превейчинть ды Оймеялтонь виенть каршо, конат мольсть Стефанонь валтнэстэ.

<sup>11</sup>Сестэ сынъ салава кармавтызь зяряя ломантнень истямо валонь ёвтамо: «Минь маринек, кода Стефан сяддома-покордамо валсо кортась Моисейде ды мик Пазонть эйстэяк».

<sup>12</sup>Теньсэ сынъ бузмолгавтызь весе раськенть, покштнэнь ды Койс тонавтыцятнень. Сынъ автордызь Стефанонь ды ветизь Инепромксос.

<sup>13</sup>Тердизь кенгели яволявтыцятнень, конат ёвтнесть: «Сон свал корты сяддома-покордамо валт Пазонь кудонть ды Коенть кувалт.

<sup>14</sup>Минь марсинек, кода сон кортась: Назаретстэ те Иисусось натой калавтсы Пазонь кудонтькак ды полавтсынзе илатнень-кирдатнень, конатнень миненек кадынзе Моисей».

<sup>15</sup>Инепромксонтъ весе ломантне, мелень явозь, вансть Стефанонь лангс ды несть: сонзэ чамазо вандолды прок ангелэнь.

## Деяния 7

### Стефанонь кортамозо Инепромксонтъ икеле

<sup>1</sup>Мейле попонь прявтось кевкстизе Стефанонь: «Те чумондомась виде?»

<sup>2</sup>Стефан мерсь: «Ялгат-оят ды раськень тетят! Кунсолормизь, инеськеть! Иневалдонь Пазось лиссь Авраам минек покштянтъ икелев, зярдю сон эрясь Месопотамиясо, Харанов туемадонзо икеле,

<sup>3</sup>ды мерсь: “Кадык тиринь масторот, раськеть, кадык тетятъ кудонзо ды азё масторс, конань Мон невтса теть”.

<sup>4</sup>Авраам кадызе Калдеянь масторонтъ ды кармасть эрямо Харансо. Тетянзо куломадо мейле Пазось сонзэ кучизе тосто те масторонтень, косо тынь ней эрятадо.

<sup>5</sup>Сон эзь максо Авраамнень модань кодамояк талика, пильгень чалгавксошкаяк. Пазось тензэ ансяк алтась: Авраам ды сонзэ

эйкакшонзо-нуцьканзо кармить улеме свал азорокс весе те масторонть лангсо, куш Авраамонь се шкане эйдезэяк арасель.

<sup>6</sup>Пазось мерсь тензэ: “Тонь эйкакштнэ-нуцькатне улить ве ёндонь сыцякс омбо масторсо. Тосо сынь кармить эрямо урекчисэ ды лепштямосо нилесядт иеть.

<sup>7</sup>Ансяк Мон судяса се раськенть, кона тейсынзе урекс тонь эйкакштнэнь-нуцькатнень. Ды теде мейле сынь лисить се масторстонть ды кармить суюконякшномо Монень вана те таркасонть”.

<sup>8</sup>Мейле Пазось кемекстась Авраам марто вейсэнълув, конань тешксэкс путозель цёрынень киськепень керявтомась. Теде мейле Авраамонь чачсь Исак цёразо, конанень сон тейсь керявтома чачомадонзо мейле кавксоце чистэ. Мейле Исаконь чачсь Яков цёразо, Яков ульнесь кемгавтово буень прявтнэнь тетякс.

<sup>9</sup>Яковонь цёратнень сьвадсть сельмест Иосифень лангс ды секскак сынь миизь сонзэ Египетэв урекс. Ансяк Пазось ульнесь Иосифень марто

<sup>10</sup>ды менстизе сонзэ весе стакачитнестэ. Сон казсь Иосифнень превейчи ды фараононть, Египетэнь инязоронть, пельде мельспаро. Фараонось аравтызе Иосифень покшокс эсензэ кудонзо ды весе Египетэнтъ лангсо.

<sup>11</sup>Ды вана сась вачочи ды ине майсема Египетэнь ды Ханаанонь мастортнэс. Минек покштятнененьгак а мезде ульнесь ярсамс.

<sup>12</sup>Зярдэ Яков марясь, келя, Египетсэ ули суро, сон васенцеде кучинзе тов цёранзо.

<sup>13</sup>Омбоцеде самстост Иосиф панжизе прянзо лелятнень-ялакстнэнь икеле, фараоноськак кармась содамо Иосифень раськетнеде.

<sup>14</sup>Теде мейле Иосиф тердинзе Яков тетянзо ды весе кудораськензэ, конатнеде ульнестъ сизьгемень вете ломанть.

<sup>15</sup>Яков кудораськенец сась Египетэв, козо мейле кулоськак, тозо кулость покштяноккак.

<sup>16</sup>Уловост пачтязельть мекев Сикем ошов ды путозельть кевботмарс, конань Авраам рамакшнызе сиядо Сикемсэ эриця Еморонь цёратнень кедьстэ.

<sup>17</sup>Малавгалесь шкась, зярдо топавтоволь Авраамнень максозь Пазонь алтавоксось. Минек раськесь Египетсэ яла ламолгадсь.

<sup>18</sup>Се шкастонть прятокс кармась лия инязор, кона мезеяк эзь сода Иосифте.

<sup>19</sup>Сон эрва кода ёжовгалесь минек раськенек каршо, нарьгась минек покштятнень лангсо, мик кармавтылинзе ёртнеме ансяк чачозь эйдест, ды эйдтне кулсильть.

<sup>20</sup>Те шкане чачсь Моисей, кона ульнесь Пазонь мельстуиця мазый эйдекс. Васенце колмо ковонь перть Моисеень трясть-вансть тетянзо кудосо.

<sup>21</sup>Мейле, зярдо савсь эйденть ливтемс кудосто ды кадомс съкамонзо, сонзэ пурнызе-сэрнize эстензэ фараононтъ тейтерезэ. Сон трясь-вансь Моисеень, кода эсь эйдензэ.

<sup>22</sup>Моисей тонавтозель се шкань Египетэнь весе превейчинтень-ёрокчинтень, ды сон ульнесь весемесэ кол: валсоjak, тевсэjak.

<sup>23</sup>Зярдо сонензэ топодсть ниленьгемень иеть, сась тензэ мель содавтомс эсь раськенсетнень, Израилень ломантнень.

<sup>24</sup>Весть сон нессь, кода египетэнь ломань нарьги израилень ломань лангсо. Моисей каявсь тензэ лездамо: пандызе кежентъ покордазентъ кисэ ды маштызе египетэнсентъ.

<sup>25</sup>Сон арсесь, эсь раськенсетне чарькодъсызь: Пазось сонзэ вельде кучи тенст идема. Ансяк сынъ тень эзизь чарькоде.

<sup>26</sup>Омбоце чистэнтъ Моисей неизе, кода израилень кавто ломанть тюрьгадсть эсь ютковаст. Сон терявтсь оймавтомост: “Оят, эдь тынь ве раськень! Мекс, эно, тейтядо берянь вейкенк-вейкенк туртов?”

<sup>27</sup>Сестэ тюреманы ушодыцясь тулкадизе Моисеень ве ёнов ды мерсь: “Кие тонь аравтынзеть прявтокс ды судиякс минек лангсо?”

<sup>28</sup>Эли тон арсят моньгак маштомс, кода исяк маштык египетэнсень?”

<sup>29</sup>Неть валтнэде Моисей оргодсь Мидиянь масторов ды эрять тосо кода лия ёндо сыця. Тосо сонзэ чачсть кавто цёранзо.

<sup>30</sup>Ниленьгемень иень ютазь чаво модасо, Синай пандодонтъ аволь васоло, Моисейнень лиссь Азоронтъ ангел, пальця кодоркс куракшто лисиця толгель потсо.

<sup>31</sup>Моисей пек дивазевсь неявксонтень. Зярдо сон сась ваномонзо седе малас, маризе Азоронтъ вайгелензэ:

<sup>32</sup>“Мон тонь покштятнень Пазост, Мон Авраамонь Пазан, Исаконь Пазан ды Яковонь Пазан”. Моисей сорнозевсь тандадомадонтъ, пельсь сельмензэяк кепедеме.

<sup>33</sup>Азорось мерсь тензэ: “Каить карсемапелеть: те таркась, косат ней тон, – Монь иневанькс аштема таркам.

<sup>34</sup>Мон варштынъ ды неия, кода Египетсэ лепштитъ Монь раськентъ, маринь ломантнень кувсемаст. Ней Мон сынъ ливтемест урексчистэ. Сак тей, Мон кучтан тонь мекев Египетэв”.

<sup>35</sup>Те ульнесь се Моисеесь, конань сынъ эзизь кунсоло ды конанень мерсть: “Кие тонь аравтынзеть прявтокс ды судиякс?” Сонзэ кучизе Сонсь Пазось улемс прявтокс ды идицякс. Пазось теизе тень ангел вельде, кона лиссь Моисейнень пальця кодоркс куракшто.

<sup>36</sup>Моисей ливтизе раськентъ Египетстэ. Сон тейнесь тамашат ды дивань тевть Египетсэяк, Якстере иневедьсэяк, ды ниленьгемень иень перть чаво модасояк.

<sup>37</sup>Те ульнесь секе Моисеесь, кона кортыль израилень ломантненень: “Азорось, тынк Пазось, кочки тенк тынсенк раськестэнтъ Пазмариця, кона монь кондямо. Сонзэ кунсолодо”.



<sup>38</sup>Те Моисеесь ёвтнилизе минек покштятненень ды раськентень, кона пурназель чаво модас, сень, мезенть ангелэсь панжилизе тензэ Синай пандонтъ прясо. Сонензэ максозельть Пазонь эрямонь кандыця валтнэ, миненек максомга.

<sup>39</sup>Ансяк покштянок эзь карма сонзэ кунсолото: сынъ велявтсть эйстэнзэ ды бажастъ мурдамс мекев Египетэв.

<sup>40</sup>Сынъ кортасть Ароннэнь: “Тейть тенек пазт, конат минек ветявольть. Эдь а содатано, мезе теевсь Моисеень марто, кона минек ливтимизь Египетстэ”.

<sup>41</sup>Сестэ сынъ тейсть од букань кондямо чопача, кармасть кандтнеме тензэ печкезь ракшань анокст ды лия казнеть ды тейнестъ киштемат-морамот эсь кедьсэст теевть пазонтъ лемс.

<sup>42</sup>Пазось велявтсь эйстэдест, кадынзе менелень тештненень сюконякшномо, кода теде сёрмадсть пазмарицятнеяк: “Израилень ломантне! Арази Монень тынь кандтниде печкемань ды пултамонь анокст неть ниленьгемень иетнень перть чаво модасонтъ?”

<sup>43</sup>Арась, тынь кандтниде мартонк Молох пазонтъ коцткудонзо ды Ремфан пазонк тештензэ, неть чопачатнень, конатнень теинк сюконямо таркакс. Секс Мон пантядызь Вавилононь томбалев”.

<sup>44</sup>Минек кезэрень покштятнень ульнесь чаво модасо коцткудост, косо сынъ озность-сюконясть Пазонтень. Коцткудось теезель Пазонтъ валонзо ды невтевксэнзэ коряс, конат ёвтазельть ды невтезельть Моисейнень.

<sup>45</sup>Мейле кезэрень покштятне максызь те коцткудонтъ минек покштятненень. Сынъ Иисус Навинэнь ветямонзо ало кандызь коцткудонтъ лия масторс. Те масторонтъ сынъ саизь эсест туртов сеть раськетнень кедьстэ, конатнень Пазось пансекшнынзе минек покштятнень икельде. Истя коцткудось ванстовсь Давидэнь шканзо самс.

<sup>46</sup>Пазось явиль мельспаро Давиднэнь, ды Давид энялдсь Сонзэ икеле: “Мерть монень путомс эрямо тарка тонеть, Пазонтень, конанень кемсь Яков”.

<sup>47</sup>Ансяк кудонтъ Тензэ путызе Соломон.

<sup>48</sup>Ялатеке Верепазось а эри ломанень кедьсэ путовт кудосо. Пазмарицясь истя пачти Пазонтъ валонзо:

<sup>49</sup> “Менелесь – Монь Инязорксчинь озамо таркам, модась – Монь пильгень чалгамо таркам! Кодамо кудо путови тыненк Монь туртов? – кевкстни Азорось, – Косто муеви Монень оймсема тарка?

<sup>50</sup>Арази аволь Монь кедьсэ те весе теезель?”

<sup>51</sup>Каршо молицят! Тынк арась меленк панжомс эсенк седеенк Пазонтень ды кунсолломс Сонзэ! Тынь истяттадо, кода покштянккак – тынь свал мольтядо Иневанькс Оймеялтонть каршо!

<sup>52</sup>Арази ульнесь зярдояк пазмариця, конань тынк покштянк аволизь пансе? Сынь маштнильть сетнень, конат икелепелев ёвтнильть Видечисэнтъ самодонзо, ды ней вана тынь Сонсензэяк миинк ды маштынк!

<sup>53</sup>Эдь тыненк ангелтнэнь вельде максозель Кой, ансяк тынь а эрятадо сонзэ коряс».

#### **Стефанонь чавизь кевсэ**

<sup>54</sup>Тень кунсолломсто Инепромксонь ломантне азаргадсть ды чикордсть пейсэст.

<sup>55</sup>Ансяк Иневанькс Оймеялтсо пештязь Стефан варштась менельс ды неIZE тосто Пазонтъ иневалдонзо ды Иисусонь, кона стядо аштесь Пазонтъ вакссо вить кедь ёно.

<sup>56</sup>«Ванодо», – мерсь сон, – «мон неса панжовозь менелентъ ды Ломантнень Цёранть, кона стядо ашти Пазонтъ вакссо вить кедь ёно!»

<sup>57</sup>Ды сынъ пижакадсть виев вайгельсэ, потомдасть эсест пилест, ды ве мельсэ каявсть Стефанонь лангс.

<sup>58</sup>Сынъ ускизь сонзэ ош ушов ды кармасть чавомонзо кевсэ. Чумондыцятне кадызь ланга оршамост од ломанень, конанень мерильть Савла, пильгензэ ваксс.

<sup>59</sup>Стефанонь чавсть кевсэ. Те шкане Стефан энялдозь ознось: «Иисус Азоро, вастык монь оймем».

<sup>60</sup>Мейле сон прась кумажа лангс ды вайгельсэ мерсь: «Азоро, иляк лово тень пежетекс сынст туртов!» Неть валтнэнь марто лиссь Стефанонь оймезэ.

## Деяния 8

### Савла панси христиантнэнь

<sup>1</sup>Савлаяк паро мельсэ вансь Стефанонь маштоманзо лангс. Секе чистэнтъ Ерусалимсэ сыргась покш пансема кемикуронтъ каршо. Весенень, апостолтнэде башка, савсь срадомс Иудеява ды Самариява.

<sup>2</sup>Паро коень ломанть калмизь Стефанонь, тейсть покш лайшемат сонзэ мельга.

<sup>3</sup>Савла снартнесь калавтомс кемицянь куронтъ, якась кудосто кудос, кундсесь цёратнень ды аватнень, озавтнесь эйсэст пекстамо кудова.

### Филип пачти Паро кулянтъ Самариясо

<sup>4</sup>Те шкане эсь таркастост панезь кемицятне яксесь эрва кува ды кандсть Кенярксов кулянтъ.

<sup>5</sup>Филип сась Самариянь прявтошс ды тосо ёвтнесь Пазонь кучовт Идицядонть.

<sup>6</sup>Филип тейнесь дивань тевть, конатнеде ломантне марсестъ ды конатнень ней сынъ сынсь несть. Секскак весе мельспаросо кунсолость сонзэ валтнэнь.

<sup>7</sup>Аванькс оймеялтнэ рангозь лисильть идемевсьсэ колазь ламо ломантнестэ, ламо катардыця ды чамордыця ломантне шумбралгадыльть.

<sup>8</sup>Ошсонть ульнесь покш кенярдома.

<sup>9</sup>Тосо эрясь ломань, лемезэ Симон, кона эсь мунямось-орожиямось тевтнесэ умок дивавтсь весе Самариянтъ. Сон сонськак невтсь эсь прянзо ине ломанькс.

<sup>10</sup>Ошонь ломантне, кода содавикстнэ, истя асодавикстнэяк, весе Симононь кунсолость мелень явозь ды кортасть: «Те ломаньсэнтъ сась миненек Пазонтъ ине виезэ».

<sup>11</sup>Ломантне мелень явозь кунсолость сонзэ, секс мекс сон пек умок дивавтсь эйсэст сельмевелявтоматнесэ.

<sup>12</sup>Ды вана зярдо кемезевсть Филипнень, кона ёвтнесь Кенярков кулянтъ Пазонь Инязорксчидентъ ды Иисус Христосонь лемдентъ, сестэ ламо цёрат ды ават нававтызь прят.

<sup>13</sup>Симонгак кармась кемеме Филипень валтнэнень ды нававтызе прянзо. Сон эрьва кува якась Филип мельга, яла дивсесь сеть ине тамашатнень ды виев тевтнень лангс, конатнень тона тейниль.

<sup>14</sup>Зярдо Ерусалимсэ апостолтнэ марясть: Самариянь ломантне кемезевсть Пазонь валонтень, сынъ кучизь тов Петрань ды Иоаннонь.

<sup>15</sup>Сынъ састъ ды озность, максовозо Самариянь кемицятнененьгак Иневанькс Оймеялт.

<sup>16</sup>Эдь сынст эйстэ киньгак лангс Оймеялтось те шкас эзь валгокшно, весе сынъ ансяк нававтозельть Иисус Азоронтъ лемс.

<sup>17</sup>Петра ды Иоанн путызь лангозост кедест, ды тонатненень максозель Иневанькс Оймеялтось.

<sup>18</sup>Зярдо Симон неизе, кода Иневанькс Оймеялтось максови апостолтнэнъ кедест путомасо, сон кандсь тенст ярмакт ды мерсь:

<sup>19</sup>«Максодо моненьгак истямо вий. Кадык сенень, кинь лангс путсынъ кедень, максови Иневанъкс Оймеялт».

<sup>20</sup>Петра тень каршо мерсь: «Ловиндерят, Пазонь казнесь рамави тетъ ярмакто, сестэ кадык ярмакоткак ёмить мартот вейсэ!

<sup>21</sup>Тонь арась те тевсэнть кодамомяк пельксэть ды таликат, эдь Пазось неи тонь колазь седеентъ.

<sup>22</sup>Янксек, кадыть пежететь ды ознок Азоронтень. Паряк, Сон нолдасынзе тетъ истят мельтнень.

<sup>23</sup>Мон неса, тон пештязят сявадомань сэпеде ды аштят сюлмазь пежетень тертьсэ».

<sup>24</sup>Симон кармась энялдомо: «Ознодо Азоронтень монь кисэ, илязо лисе мартон мезеяк сень кондымо, мезде тынь кортыде».

<sup>25</sup>Апостолтнэ ёвтнестъ Самариясо Азоронтъ эйтэ ды тонавтсть Сонзэ валонтень. Мейле сынъ мурдасть Ерусалимев ды тов модемстэяк ёвтнестъ Иисусто Паро кулянтъ Самариянь ламо велева.

#### **Филип нававы Эфиопиянь евнухонтъ**

<sup>26</sup>Азоронтъ ангелзэ мерсь Филипнень: «Стяк ды мольть лембе ёнксов, се кинть лангс, кона вети Ерусалимстэ Газав ды кона ломантеме».

<sup>27</sup>Филип стясь ды тусь. Ки лангсо вастсь эфиопиянь ломань, евнух, кона ульнесь Эфиопиянь кандакинъ, лиякс меремс, инязоравань, чинязокс ды весе сюпавчинзэ ванстыцякс. Сон якась Ерусалимев озномо

<sup>28</sup>ды ней ардыль кудов. Аштесь крандазонзо ды ловнось Исаяя пазмарицянтъ книганзо.

<sup>29</sup>Оймеялтось мерсь Филипнень: «Азё сасык крандазонть ды мольть вакссонзо».

<sup>30</sup>Филип чийсь тов ды мари, кода важонь прявтось ловны Исаяя пазмарицянтъ валонзо. «Чарькодят-арась, мезде ловнат?» – кевкстизе Филип.

<sup>31</sup>«Кода монень чарькодемс, бути кияк а тонавты эйсэнь?» – мерсь тона ды тердизе Филипень куземс крандазс ды озамс ваксозонзо.

<sup>32</sup>Евнухось ловнось Сёрмадовксонь се тарканть, косо ульнесть истят валт: «Кода реве Сон ветязель печкемас, кода вирез нарыцяно икеле вайгельтеме, истя Сонгак кургонзо эзизе панжтне.

<sup>33</sup>Сон покордазель, ды судястькак Сонзэ а видестэ. Ды кие ёвты Сонзэ эйкакштнэде-нуцькатнеде, бути Сонзэ модалангонь эрямозо сезеви?»

<sup>34</sup>Важонь прявтось кевкстизе Филипень: «Энялдан, ёвтак монень, те таркасонть киде корты пазмарицясь: эсензэ эйстэ эли кидеяк лиядо?»

<sup>35</sup>Сестэ Филип кармась ёвтнеме. Ушодсь Сёрмадовксонь се таркастонть, конань евнухось ловнось, ды ёвтнизэ тензэ Иисусто Кенярксов кулянтъ.

<sup>36</sup>Истя сынъ, кинть ланга ютазь, пачкодсть ведь ваксс. «Вант, тесэ ведь», – мерсь евнухось. «Мекс монень а нававторс-лемдемс прям?»

<sup>37</sup>Филип тень каршо мерсь: «Бути весе седейсэ кемат, сестэ нававтык прят». Евнухось мерсь: «Мон кеман: Иисус Христос – Пазонть Цёразо».

<sup>38</sup>Ды мерсь крандазонть лоткавтомадо. Филип ды евнухось совасть ведьс, ды Филип нававтызе сонзэ.

<sup>39</sup>Зярдс сынъ лиссть ведьстэнтъ, Иневанькс Оймеялтось валгсь евнухонть лангс, Азоронть ангелэсь жо сеске саизе Филипень. Евнухось мейле сонзэ эзизе некшне ды седе тов тусь эсь кияванзо, кеняркссо пештязь.

<sup>40</sup>Филипень мейле некшнизь Асдод ошсто. Тосто Кесарияв модемстэ, сон килангонзо перть пачтясь Кенярксов кулянтъ весе оштнэва.

## Деяния 9

### Савла вастови Иисус марто

<sup>1</sup>Савла икеле ладсо яла лакась кежсэ, Азоронть тонавтницянзо туртов куломань арсезь. Сон сась попонь прявтонть

<sup>2</sup>ды вешинзе кедьстэнзэ сёрматнень Дамасконь синагогатнень прявтост туртов. Сёрматнесэ мерезель: бути Савла муи ошто Иисусонь тонавтоманзо мельга молицят, сонензэ максозь вий кундамс сынст, цёрат сынъ эли ават, ды сюлмсезь пачтямс Ерусалимс.

<sup>3</sup>Ансяк зярдо Савла Дамаск ошонтъ маласоль, ки лангсо апак учо валдомтызе сонзэ менельстэ лисиця сияждома.

<sup>4</sup>Савла прась мода лангс ды марясь вайгель, кона кортась тензэ: «Савла, Савла! Мекс тон пансят Эйсэнь?»

<sup>5</sup>«Тон кият, Азоро?» – кевкстизе Савла. «Мон Иисусан, конань тон пансят, – мерсь вайгелесь, – Стака тетъ модемс пшти сялгонтъ каршо».

<sup>6</sup>Сон сорнозь ды пелезь мерсь: «Азоро! Мезе кармавтат монень теемс?» Азорось мерсь тензэ: «Стяк ды азё ошов. Тосо тонеть ёвтасызь, мезе тетъ теемс».

<sup>7</sup>Ломантне, конат ульнестъ Савла марто, чувтомсть таймаскадозь: сынъ маризь вайгелентъ, ансяк киньгак эзь нее.

<sup>8</sup>Савла стясь моданть лангсто, панжинзе сельмензэ, ансяк киньгак эзь нее, сон сокоргадсь. Дамаск ошов ветизь кедь педэ.

<sup>9</sup>Колмо чить сон мезеяк эзь нее, эзь ярсаяк, эзь симеяк.

<sup>10</sup>Дамаск ошсо эрясь Иисусонь вейке мельга молицязо, лемезэ Анания. Азорось пшкадсь сонензэ неякссо: «Анания!» – «Кунсолан, Азором!» – мерсь Анания.

<sup>11</sup>Азорось поладызе кортамонзо: «Стяк ды мольть улыцяв, конанень мерить Виде улыця, Иудань кудос. Тосо кевкстик Тарс ошонь ломанентъ, лемезэ Савла. Сон ней озны тосо

<sup>12</sup>ды неякссо несъ, кода тензэ сы ломань, лемезэ Анания, путсынзе лангозонзо кедензэ, ды Савла одс тееви неицякс».

<sup>13</sup>Тень каршо Анания мерсь: «Азоро, мон ламо марсинь те ломанентъ эйтэ: сон тейсь пек ламо берянь Ерусалимсэ Тонеть кемицятненень.

<sup>14</sup>Тейгак сон сась попонь покштнэнь пельде кармавтома марто кундсемс весень, кить озныть Тонеть».

<sup>15</sup>Ялатеке Азорось мерсь Ананиянень: «Азё! Те ломанесь Монь кочкавт кедьёнкс. Сон карми Монь эйстэ ёвтнеме лия раськетненень, сынст инязортнэненень, Израилень ломантнененьгак.

<sup>16</sup>Мон монсь невтса тензэ, кода ламо сонензэ пиштемс Монь лемем кисэ».

<sup>17</sup>Анания тусь ды совась ёвтазь кудонтень, путынзе кедензэ Савлань лангс ды мерсь: «Савла ялгам! Иисус Азорось, кона лиснесь тетъ ки лангсо тей самсто, кучимим тонеть: кадык тон одс тееват неицякс ды пештяват Иневанькс Оймеялтсо».

<sup>18</sup>Ды сеске прок лукшт прасть Савлань сельмензэ лангсто, ды сон нейке таго кармась нееме. Савла стясь ды нававтызе прынзо.

<sup>19</sup>Мейле сон ярсась, ды вийтне велявтсть тензэ одов.

#### **Савла ёвтни Иисусто Дамаск ошсо**

**Тед**е мейле Савла зярыя чить ютавтсь Дамаск ошсо кемицятнень ютксо.

<sup>20</sup>Сон сеске кармась синагогава ёвтнеме: Иисус – Пазонь Цёра.

<sup>21</sup>Весе, кить сонзэ маризь, дивсесть ды кевкстнестъ: «Арази а сон пансесь Ерусалимсэ Иисуснэнь озныцятнень? Ды тейгак сон сась арази аволь сынст кундсеме ды попонь покштнэненень ветнеме?»

<sup>22</sup>Савла тонавтсь седеяк ды седеяк покш вий марто. Еврейтне Дамаск ошсо талакадыльть, зярдод сон виевстэ кемевтиль: Иисус – те Пазонь кучовт Идиця.

<sup>23</sup>Те шкастонть ютасть читнеде байтяк, ды еврейтне вейсэ арсизь маштомс Савлань,

<sup>24</sup>ансяк Савла марясь сынст арсевксэст эйстэ. Чить ды ветъ еврейтне ванстсть эйсэнзэ ошонь орта лангсо, арсесть маштомонзо.



<sup>25</sup>Ансяк Савлань тонавтницянзо веть лездасть тензэ валгомс ошонь пирявксонть велькса покш паргсо.

### **Савла Ерусалимсэ**

<sup>26</sup>Савла сась Ерусалимев ды тосо терявтнесь вейсэндявомс Иисусонь мельга молицятненень. Ансяк сынь эзь кемь: сон Иисусонь алкуксонь мельга молицязо, пельсть эйстэнзэ.

<sup>27</sup>Ялатеке Варнава лездась Савланень ды ветизе апостолтнэнень. Сон ёвтнизэ тенст, кода Савла вастызе ки лангсо Азоронть, кода Азорось кортась мартонзо ды кода Савла кармась Дамаск ошсо апак пеле пачтямо Иисусто паро кулянтъ.

<sup>28</sup>Савла зярья шка эрясь ды якась мартогост Ерусалимга ды апак пеле пачтясь Иисус Азоронть эйстэ паро кулянтъ.

<sup>29</sup>Сон сеedyстэ кортакшнось ды совсесь пелькстамос грекень кельсэ кортыця еврейтненень марто. Тонат мик терявтнесь маштомс сонзэ.

<sup>30</sup>Зярдо кемиця ялгатне марясть теде, сынь ветизь Савлань Кесарияв ды тосто ильтизь Тарсов.

<sup>31</sup>Мейле весе Иудеянь, Галилеянь ды Самариянь кемицянь куротнес сась сэтьме шка. Сынь яла эрясть Азоронть мельде пелезь ды яла ламолгадсть Иневанькс Оймеялтонь виенть ды лездамонть вельде.

### **Айнеень шумбралгадомо**

<sup>32</sup>Петра, эрва кува якамстонзо, сась Иисуснэнь кемицятненень, конат эрясть Лидда ошсо.

<sup>33</sup>Тосо ульнесь цёра ломань Айней, кона катароль ды таркастонзо эзь стякшно кавксо иеть.

<sup>34</sup>Петра мерсь тензэ: «Айней! Иисус Христос тонь шумбралгавтынзеть. Стяк ды пурныть алксот-ацамот». Айней сеске стясь.

<sup>35</sup>Зярдо Лиддань ды Саронь эрицятне сонзэ неизь шумбракс-парокс, сынь кармасть кемеме Азоронтень.

### Табитань вельмевтемазо

<sup>36</sup>Иоппия ошсо ульнесь Иисусонь мельга молицязо, вейке ава, лемезэ Табита. Лементь смустезэ: “пандопрянь сея”, “газель”. Табита свал теиль ломаннень паро, лездыль кажовнень.

<sup>37</sup>Ды вана сон неть читнестэ ормалгадсь ды кулось. Уловонзо шлизь ды путызь вере икельце кудос.

<sup>38</sup>Лидда ошось Иоппия маласоль. Зярдэ Иисусонь мельга молицятне марясть, келя, Петра Лиддасо, сынь кучсть тензэ кавто ломанть знялдома марто: «Сак курукке миненек Иоппияв!»

<sup>39</sup>Петра сыргась мартост. Зярдэ сынь пачкодсть тов, Петрань ветизь вере нупальс. Перьканзо пуромсть весе доватне, сынь авардсть ды невтнесть тензэ руцяст ды паляст, конатнень стынзе тенст Газелесь, зярдэ эрясь мартост.

<sup>40</sup>Петра весеменень мерсь лисемеде, пульзясь кумажанзо лангс ды кармась озномо. Мейле сон велявтсь кулозенть ёнов ды мерсь: «Табита, стяк!» Табита панжинзе сельмензэ, неизе Петрань ды озась.

<sup>41</sup>Петра саизе кедте ды лездась тензэ стямс пильге лангс. Мейле сон тердинзе доватнень ды весе кемицятнень, аравтызе икелест вельмезь Табитань.

<sup>42</sup>Теде кармась содамо весе Иоппиясь, ды ламо ломанть кемезевсть Азоронтень.

<sup>43</sup>Теде мейле Петра эрясь зяряя шка Иоппиясо, Симон кедень теицянтъ кудосо.

## Деяния 10

### Корнелиень неавксо

<sup>1</sup>Кесариясо эрясь ломань, лемезэ Корнелий. Сон ульнесь сядонь прявтокс полксо, конанень мерильть Италиянь полк.

<sup>2</sup>Сонськак, кудораськензэяк ульнесть паро коень ды Пазонь мельде пелиця ломанть. Корнелий пек ламо лездась кажов еврейтненень, свал ознось Пазнэнь.

<sup>3</sup>Весть чикуншкадо мейлень колмошка чассто сон неявкссо ваньксстэ неIZE Пазонь ангелэнтъ, кона совась сонензэ кудос ды мерсь тензэ: «Корнелий!»

<sup>4</sup>Корнелий пштистэ ды тандадозь варштась сонзэ лангс ды кевкстизе: «Мезе, азор-парочи?» Ангелэсь мерсь: «Тонь озноматне ды кажовтненень лезкстнэ ледсть Пазонтъ мельс.

<sup>5</sup>Кучт ней ломанть Иоппия ошов тердемс Симононь, конанень мерить Петра.

<sup>6</sup>Сон ашти инжекс кедень теиця Симононь кудосо, кона иневедь чиресэ. Сон ёвты тонеть валт, конатнень вельде идеват тонгак, весе кудораськетъкак».

<sup>7</sup>Кортамодо мейле ангелэсь тусь. Корнелий тердсь кавто кудоважот ды паро коень ушман, кона ульнесь сонзэ кемевикс ванстыцятнень эйстэ вейкекс.

<sup>8</sup>Сон ёвтнизэ тенст весементъ, мезе мартонзо теевкшнесь, ды кучинзе Иоппияв.

#### **Петрань неявксозо**

<sup>9</sup>Омбоце чистэнтъ, зярдо Корнелиень кучовтонзо, ки ланга молезь, пачкодсть ошонтъ малав, Петра чикуншкане кузьс кудолато лангс озномо.

<sup>10</sup>Сон вачомсь ды вешсь ярсамопель. Зярс-мейс анокстасть ярсамопель, сонензэ кучозель неявкс.

<sup>11</sup>Сон несъ панжадо менель ды мезе-бути сонензэ верде валгиця покштояк покш коцтонь столешникень кондямо, конань ниле педе скулмазь нолдыльть мода лангс.

<sup>12</sup>Те коцтонть лангсо ульнесть эрва кодат ниле пильгесэ мода лангонь ракшат, идем ракшат, ёзмолдыцят ды менелень нармунть.

<sup>13</sup>Ды сон марясь вайгель: «Стяк, Петра, печкить ды сэвить сынст».

<sup>14</sup>«Зярдояк, Азоро!» – мерсь Петра. «Мон зярдояк мезеньгак берянде ды аванькстэ эзинь ярсне».

<sup>15</sup>Сестэ вайгелесь таго гайгезевсь: «Иля мерькшне аванькс сенень, мезенть Пазось теизе ваньксэкс».

<sup>16</sup>Весе те истя ульнесь колмоксть, мейле коцтось мекев кепедезель менельс.

<sup>17</sup>Зярс Петра аштесь абунгадозь ды арсесь, кодамо те неявксонть смустезэ, Корнелиень пельде кучозтне, ломанень кевкстнезь, муизь кедень теиця Симононь кудонть ды лоткасть ортанть икелев.

<sup>18</sup>Сынь кармасть кевкстнеме, тесэ а тесэ Симон, конанень мерить Петра.

<sup>19</sup>Те шкане Петра яла аштесь ды арсесь неезь неявкстонть. Сестэ Оймеялтось мерсь тензэ: «Вана, тонь вешнить колмо ломанть».

<sup>20</sup>Стяк, валгт алов ды азё мартост апак кавтолдо, эдь те Мон сынст кучинь».

<sup>21</sup>Петра валгсь алов ды мерсь Корнелиень пельде кучозь ломантненень: «Мон се, конань тынь вешнетядо. Мейс тынь сыде?»

<sup>22</sup>Сынь тень каршо мерсть: «Минек кучимизь Корнелий сядонь прявтось. Сон видекоень ды Пазонь мельде пелиця ломань, весе еврейтне шныть эйсэнзэ. Пазонь кучовт ангел мерсь сонензэ тердеметь эстензэ ды кунсолomot, мезе тон ёвтнят тензэ».

<sup>23</sup>Сестэ Петра сынст тердинзе кудос ды вастынзе кода инжетнень.

### **Петра Корнелиень кудосо**

**Омбоце чистэнтъ Петра ды Иоппиянь зярыя кемицят тусть сынст марто.**

<sup>24</sup>Вейке чинь ютазь сынь састь Кесарияв. Корнелий уш учось эйсэст, тердинзе малавикс раськензэ ды ялганзо.

<sup>25</sup>Зярдэ Петра совась кудос, Корнелий сонзэ вастызе сюконязь, мик прась пильгезэнзэ.

<sup>26</sup>Петра кепедизе сонзэ ды мерсь: «Стяк, монгак ломанян».

<sup>27</sup>Корнелий марто кортазь, Петра совась кудос, косо ломантнеде пурнавсть байтяк.

<sup>28</sup>Петра мерсь тенст: «Тынь парсте содатадо, минек Коенек а мери евреентень лия раськенъ ломань марто вастневемедэ ды кудозонзо совсемедэ. Теке марто Пазось невтизе монень: киньгак берянекс ды аваньксэкс а ловома.

<sup>29</sup>Секскак, зярдэ тердимизь, мон сынь, трокс валонь апак ёвта. Ней мередэ кевкстеменк: кодамо тевс мон тердезян?»

<sup>30</sup>Корнелий тень каршо мерсь: «Ниле чиде икеле мон те шкане пост кирдилинь ды ознылинь эсь кудосон, шказо ульнесь чикуншкадо мейлень колмо част. Апак учо икелень лиссь валдо оршамосо ломань.

<sup>31</sup>“Корнелий”, – мерсь сон, – “Пазось маринзе озномат ды ледстинзе кажовтненень лезксэть.

<sup>32</sup>Кучт эно ломанть Иоппияв Симононь мельга, конанень лиякс мерить Петра. Сон лоткась инжекс кедень теиця Симононь кудос, кона иневедь чиресэ. Сон сы ды ёвты тетъ”.

<sup>33</sup>Мон сеске кучинь тонь мельга, ды тон парсте теить, бути сыть. Ней весе минь тесэтяно, Пазонть икеле, ды меленек ули кунсолломс весементь, мезе Пазось кармавтсь тонеть ёвтамо миненек».

#### **Петрань кортамозо Корнелиень кудосо**

<sup>34</sup>Петра кармась кортамо: «Ней мон алкукс чарькодъса, Пазось а яви ломантнень.

<sup>35</sup>Пелиндеряй ломанесь Паздо, теиндеряй видечинь коряс, кодамо раськень сон илязо уле, Пазось васты сонзэ мельспаросо.

<sup>36</sup>Тынь содатадо кулядонть, конань Пазось кучизе Израилень раськентень. Сон кучизе те Кенярксов кулянтъ седейоймамодо Иисус Христосонь вельде, конась улияк весеменень Азорокс.

<sup>37</sup>Тынь содатадо сень эйстэяк, мезе лиссь весе Иудеясонтъ, Галилеясто саезь, нававтомадонть мейле, конас тонавтсь Иоанн.

<sup>38</sup>Содасынк, кода Пазось вадизе-кочкизе Назаретэнь Иисусонь ды макссь Тензэ Иневанькс Оймеялт ды вий. Иисус якась эрва кува, паро тевень теезь ды шумбрачинь максозь весенень, кить понгсть Идемевсень азорксчинть алов, эдь Сонзэ марто ульнесь Пазось.

<sup>39</sup>Минь неицят-содыцят весементъ, мезе Иисус тейсь Ерусалимсэ ды еврееень весе масторонь келес. Сынь маштызь Сонзэ, чувтонь крёстос вачкодезь.

<sup>40</sup>Пазось ялатеке колмоце чистэ вельмевтизе Сонзэ кулозьстэ, ды Иисус, Пазонь вийсэ-мельсэ, лиснесь ломантненень.

<sup>41</sup>Сонзэ неизе аволь весе израилень раськесь, неинек ансяк минь, Пазонь кочкавт неицятне-ёвтницятне! Минь ярсинек ды симнинек Сонзэ марто седе мейле, зярдо Сон вельмесь кулозьстэ!

<sup>42</sup>Сон миненек кармавтсь ёвтнемс ломантненень Паро кулядонть ды кемекстамс: Сон улияк Се, кинь Пазось путызе эректнень ды кулозтнень судямо.

<sup>43</sup>Сонзэ эйстэ ёвтнить весе пазмарицятне: эрвантень, кие кеми Иисуснэнь, нолдавить пежетензэ Сонзэ лементъ вийсэ».

**Лия раськень ломантнень лангс валови Иневанькс Оймеялтось**

<sup>44</sup>Зярдо Петра кортась неть валтнэнь, весе сонзэ кунсолыцятнень лангс валгсь Иневанькс Оймеялт.

<sup>45</sup>Петра марто сазь кемицятне, конат керявтозельть, дивсесть, мекс Иневанькс Оймеялтось валозель мик аволь еврейтнень лангскак.

<sup>46</sup>Эдь сынъ маризь, кода тонатне кортыть эрва кодамо лия кельсэ ды инелгавтнить Пазонть. Сестэ Петра мерсь:

<sup>47</sup>«Кинь ули виезэ кардамс неть ломантнень ведьсэ нававтомадонть? Эдь сыненст максозь Иневанькс Оймеялтось истя жо, кода миненеккак!»

<sup>48</sup>Ды сон кармавтсь неть ломантнень нававтомс Иисус Христосонь лемс. Мейле сынъ энялдсть Петрань икеле кадовома мартост зярыя чис.

## Деяния 11

### Ерусалимень кемицятне кунсолыть Петрань

<sup>1</sup>Апостолтнэ ды кемицятне Иудеянь весе таркатнесэ марясть: лия раськенъ ломантнеяк кемезевсть Пазонь валонтень.

<sup>2</sup>Секс, зярдэ Петра совась Ерусалимс, киськепень керявтомань кисэ аштиця кемицятне кармасть чумондомонзо.

<sup>3</sup>Сынъ кортасть: «Тон совсить атак керявтозень кудос ды ярсыть мартост».

<sup>4</sup>Петра сестэ мельга-мельцек ёвтнизэ, кода те лиссь.

<sup>5</sup>«Мон ознынъ Иоппиясо, – ёвтнесь сон, – ды монень кучозель неявкс: верде валгсь мезе-бути, покш коцтонъ столешникень кондямо, кона, ниле пева сьулмазь, нолдавсь менельстэ ды валгсь видьстэ тов, косолинь мон.

<sup>6</sup>Мон варштынъ потмозонзо ды неинъ тосто эрва кодат ниле пильгесэ кудонъ ды идем ракшат, ёзмолдыцяты ды менель нармунть.

<sup>7</sup>Мейле мон маринь вайгель, кона кортась монень: “Стяк, Петра, печкить ды сэвить сынст”.

<sup>8</sup>Тень каршо мон меринь: “Зярдояк, Азоро! Мон зярдояк мезеньгак берянде ды аванькстэ эзинь ярсне”.

<sup>9</sup>Вайгелесь менельстэ таго мерсь тень: “Иля мерькшне аванькс сенень, мезенть Пазось теизе ваньксэкс”.

<sup>10</sup>Истя ульнесь колмоксть, мейле коцтось мекев кепедевсь менельс.

<sup>11</sup>Ды вана секе шкастонть кудонть икелев, косолинь мон, лоткасть колмо ломанть, конат кучозельть монень Кесариясто.

<sup>12</sup>Пазонь Оймеялтось кармавтсь монень апак кавтолдо молемеде сынст марто. Неть кото кемиця ялгангак сыргасть мартон, ды минь сынек Корнелиень кудос.

<sup>13</sup>Сон ёвтнизэ тенек, кода кудозонзо совась ангел ды мерсь тензэ: “Кучт Иоппияв Симононь мельга, конанень мерить Петра.

<sup>14</sup>Сон ёвты тонеть валт, конатнень вельде идеват тонгак, весе кудораськетьяк”.

<sup>15</sup>Зярдю мон карминь кортамо, сынст лангс валгсь Иневанькс Оймеялтось, кода Сон валгонесь васня минек лангскак.

<sup>16</sup>Сестэ ледсть мелезэнь Азоронть валонзо: “Иоанн нававтсь ведьсэ, а вана тынь ультядо нававтозь Иневанькс Оймеялтсо”.

<sup>17</sup>Чарькодеви, Пазось максызе тенст теке казненць, конань миненеккак, зярдю карминек кемеме Иисус Христос Азоронтень. Секскак монь эзь сато смелчим молемс Пазонть каршо!»

<sup>18</sup>Зярдю Ерусалимень кемицятне тень кунсолызь, лоткасть Петрань чумондомадо ды кармасть шнамо Пазонть, истя кортазь: «Улема, лия раськетнененьгак Пазось невтсь пежетьстэ лисемань ки, кона вети зрямос!»

### **Антиокиянь кемицянь курсь**

<sup>19</sup>Те шкане кемицятне, конат сралекшность Стефанонь маштомадонзо мейле пансематнеде, пачкодсть мик Финикиянтъ, Кипрантъ ды



Антиокианть видьс. Ялатеке сынъ эзь ёвтне паро кулянтъ киненьгак, еврейтнеде башка.

<sup>20</sup>Ансяк сынст ютксо ульнестъ зяряя кемицят Кипрасто ды Киринаесто, конат Антиокияв самодо мейле кармасть ёвтнеме Кенярксов кулянтъ Иисус Азоронтъ эйстэ лия раськень ломантнененьгак.

<sup>21</sup>Сынст марто ульнесь Азоронтъ виезэ, ды пек ламот кармасть кемеме сынст валтнэненъ ды велявтсть Азоронтень.

<sup>22</sup>Теде кулясь пачкодсь Ерусалимень кемицянь куронтеньгак, ды тосто кучизь Антиокияв Варнавань.

<sup>23</sup>Сон сась, неIZE Пазонъ чанстентъ ды пек кенярдозевсь. Сон кармавтсь од христиантнэнь апак кавтолдо ванстомс Азоронтень кемеманть.

<sup>24</sup>Варнава ульнесь паро ломань. Сон пештязель Иневанькс Оймеялтсо ды кемемасо. Сестэ седеяк ламо ломанть састъ Азоронтень.

<sup>25</sup>Мейле Варнава тусь Тарсов Савлань вешнеме. Сон муIZE сонзэ ды ветIZE Антиокияв.

<sup>26</sup>Цела ие Варнава ды Савла важдсть кемицянь курсонтъ ды тонавтсть ламо ломанть. Антиокиясо Иисусонь мельга молицятненень васенцеде кармасть мереме христиант.

<sup>27</sup>Се шкане Ерусалимстэ Антиокияв састъ зяряя пазмарицят.

<sup>28</sup>Вейкесь эйстэст, лемезэ Агав, стясь ды Оймеялтонть ветямонзо коряс икелепелев ёвтызе: весе масторлангонть учни покш вачочи. Мейле, алкукскак, истямо вачочи сась Клавдий инязоронтъ пингестэ.

<sup>29</sup>Секс Иисусонь мельга молицятне сайсть мель кучомс Иудеяв кемиця ялгатненень ярмакт, эрьвась эсь уличинзэ коряс.

<sup>30</sup>Истя тейстькак ды мейле Варнавань ды Савлань вельде кучизь неть ярмактненень Ерусалимень кемицянь куронь прявтнэненъ.

## Деяния 12

### Петрань пекстамозо ды идемазо

<sup>1</sup>Малав секе шкастонть Ирод инязорось кармавтсь пансемс кемицятнень ды кой-конатнень юткстост кундсемс.

<sup>2</sup>Сон маштовтызе торосо Яковонь, Иоаннонь лелянзо.

<sup>3</sup>Зярдо Ирод неIZE, Яковонь куловтомась тусь еврейтнень мельс, сон кундавтызе Петраньгак. Те тевесь ульнесь Ламбамсто сюкоронь покшчистэнтъ.

<sup>4</sup>Петрань кундызь ды ёртызь пекстамо кудос. Ванстыцякс аравтсть ушманонь ниле курот, эрва куросонтъ ниле ушмант. Ирод арсесь ливтемс Петрань раськентъ икелев судямс евреень Инечиде мейле.

<sup>5</sup>Зярдо Петра пекстамо кудосоль, кемицянь курось псистэ ознось кисэнзэ Пазонтень.

<sup>6</sup>Раськентъ судямос ливтемадонзо икеле вестэнтъ Петра удыль кавто ушман ютксо, кшнинь тертьсэ сьулмсезь. Пекстамо кудонтъ кенкш лангсоjak аштеть ванстыцят.

<sup>7</sup>Апак учо сась Азоронтъ ангелээ, ды пекстамо кудось пештявсь валдосо. Ангелэсь тулкадизе Петрань бокас ды пувтызе. «Стяк седе курок!» – мерсь сон, ды кшнинь тертне сеск прастъ Петрань кедтнестэ.

<sup>8</sup>«Карксык панарот ды карсек», – таго мерсь ангелэсь. Петра истя тейськак. Седе тов кортась ангелэсь: «Оршик ланга оршамот ды мольть мельган».

<sup>9</sup>Петра лиссь ангелэнтъ мельга пекстамо кудостонтъ. Весе, мезе ангелэсь тейсь, ульнесь алкуксокс, ансяк Петра теде эзь чарькоде. Секскак арсесь, сон неи неявкс эли он.

<sup>10</sup>Сынь ютасть ванстыцянь васенце куронтъ вакска, ютызь омбоцентъ, пачкодсть кшнинь ортантень, кона ветясь ошов. Ортась сонсь панжовсь икелест. Сынь лиссть, мольсть вейке ульцява, ды апак учо ангелэсь ёматотсь.

<sup>11</sup>Зярдэ Петра чарькодизе мартонзо теевезенть, сон мерсь: «Ней мон алкукс чарькодия, мезе мартон лиссь! Азорось кучизе Эсь ангелэнзэ ды идимим Иродонь кедьстэ ды весемеденть, мезе учость еврейтне!»

<sup>12</sup>Тень чарькодезь, Петра мольсь Мариянь кудос, Иоаннонь аванстэнь. Те Иоаннонтень лиякс мерильть Марк. Тов пурнавсть озномо ламо ломанть.

<sup>13</sup>Петра вачкодсь ортас. Панжомо лиссь Рода важавась.

<sup>14</sup>Сон Петрань содызе вайгелень коряс ды чиезь тусь мекев, кенярдомадонть ортантькак стувтызе панжомс. «Петра ортанть икеле!» – кудос совамсто серьгедсь Рода.

<sup>15</sup>«Паряк, превстэ лисить?» – мерсть кудосотне. Ансяк Рода таго кортась: «Петра ортанть икеле». «Те сонзэ ангелээзэ», – кортасть кудосотне.

<sup>16</sup>Петра те шкане яла вачкоесь ортас. Зярдэ сынь, окояники, панжизь ортанть ды неизь Петрань, весе пек дивазевсть.

<sup>17</sup>Сон кедьсэ невтезь тердинзе чатьмонеме ды ёвтнизе, кода Азорось сонзэ ливтизе пекстамо кудостонть. «Ёвтадо теде Яковнень ды лия кемиця ялгатненень», – мерсь тенст Петра ды тусь лия таркав.

<sup>18</sup>Валске марто ушмантнэнь ютксо кепететсь покш талакалема – кияк эзь сода, мезе лиссь Петра марто.

<sup>19</sup>Ирод инязорось кармавтсь парстине сонзэ вешнемс, ансяк вешнематне мезеяк эзь максо. Сестэ сон кевкстневтинзе ушмантнэнь ды мерсь маштомост. Мейле Ирод тусь Иудеясто Кесарияв ды эрьсь тосо зярыя шка.

### **Иродонь куломазо**

<sup>20</sup>Ирод пек кежейгадсь Тирэнь ды Сидононь эрицятнень лангс. Тонат ве мельсэ састь мартонзо вастовомо. Сынь таргизь эсест пелев Бластонь, инязоронть малавикс важонзо, ды вешевтсь Иродонь кедьстэ

сэтьмелув, эдь Тирэсь ды Сидонось прят андыльть Иродонь масторонть кши-салсо.

<sup>21</sup>Путозь чистэнтъ Ирод оршизе инязоронь оршамопелензэ, озась инязоронь тарказонзо ды ушодызе кортамонзо пурнавозтнень икеле.

<sup>22</sup>Ломантне прянь вечкевтезь кармасть сеереме: «Те корты Пазось, – аволь ломань!»

<sup>23</sup>Ансяк Ирод эзинзе лоткавто сеерицятнень ды эзь ёвта шнамо вал Пазонтень, ды сеске Азоронтъ ангелзэ вачкодизе сонзэ, ды Ирод, сукссо сэвезь, кулось.

<sup>24</sup>Пазонь валось яла кассь ды сраговсь.

<sup>25</sup>Варнава ды Савла кандызь ярмактнень, конат максозельть тенст, ды мурдасть Ерусалимстэ Антиокияв Иоанн марто, конанень лиякс мерильть Марк.

## Деяния 13

### Варнавань ды Савлань кучить важомемас

<sup>1</sup>Антиокиянь кемицянь курсонть ульнестъ пазмарицят ды тонавтыцят: Варнава, Симеон, конанень лиякс мерсть Раужо, ды Лукий Киринаесто, Манаин, кона трызель-кастозель Ирод тетрархонтъ марто вейсэ, ды Савла.

<sup>2</sup>Вестъ, зярдо сынъ важдсть Азоронтень, озность ды аштестъ постонь кирдемасо, Иневанькс Оймеялтось мерсь: «Нолдынк Монень Варнавань ды Савлань се важомемантень, конанень Мон сынст тердинь».

<sup>3</sup>Сестэ сынъ постонь кирдемадонть ды озномадонть мейле путызь Варнавань ды Савлань лангс кедест ды кучизь сынст ки лангов.

### Апостолтнэ Кипрасо

<sup>4</sup>Нетъ кавто апостолтнэ, Иневанькс Оймеялтонть кучовтонзо, пачкодсть Селевкияв, тосто венчсэ тустъ Киправ.

<sup>5</sup>Сынь састь Саламис ошов ды тосо ёвтнесть Пазонь валонть евреень синагогава. Иоаннкак ульнесь мартоост ды лездась тенст те тевсэнть.

<sup>6</sup>Сынь ютызь Кипра усиянтъ ялго пестэ пес ды пачкодсть Паф ошов, косо вастсть вейке муниця-орожиця еврей, лемезэ Бар-Иисус, кона ульнесь кенгелиця пазмарицякс.

<sup>7</sup>Сон ульнесь Кипрань губернаторонтень, Сергий Павланень, лездыцякс. Сергий Павла ломанесь превеель. Сонзэ ульнесь мелезэ марямс Пазонь валонть, ды секскак тердинзе Варнавань ды Савлань эстензэ.

<sup>8</sup>Ансяк Элима муницясь – истя Бар-Иисусонь лемезэль грекекс – весе вийсэнзэ тень каршоль. Сон терявтнесь а нолдамс губернаторонтень кемемас совамо.

<sup>9</sup>Сестэ Савла, конанень лиякс мерильть Павол, Иневанькс Оймеялтсо пештязь, варштась видьстэ Элимань сельмс ды мерсь:

<sup>10</sup>«Тон, Идемевсентъ цёразо ды видечинть ятозо, пешксят эрьва кодамо кенгелемадо! Визькстэме! Арази тон зярдояк а лоткат Азоронтъ виде китнень менчемедесть?

<sup>11</sup>Ней вана Азоронтъ кедезэ тонь каршо кепедезь, тон улят сокорчисэ вачкодезь. Шканзо самс а кармат нееме чивалдоjak». Сеске жо сонзэ копачизе чопода, ды сон кармась кедензэ венстнезь шаштнеме тей-тов, кедь вельде ветницянь вешнеме.

<sup>12</sup>Зярко губернаторось неизе, мезе лиссь Элима марто, сон дивазевсь Азородонтъ тонавтомань виентень ды кармась кемеме Иисуснэнь.

#### **Павол ды Варнава Писидиянь Антиокиясо**

<sup>13</sup>Пафсто Павол ды сонзэ ялганзо венчсэ тусть Памфилиянь Пергев. Тосо Иоанн сынст кадынзе ды мурдась Ерусалимев.

<sup>14</sup>Пергестэ сынъ тусть Писидиянь Антиокияв. Евреень оймсема чистэнтъ совасть синагогав ды озасть кунсолома.

<sup>15</sup>Коень ды пазмарицятнень книгатнень ловномадонть мейле синагогань прявтнэ пачтясть тенст: «Ялгат-оят, бути тынк ули мезе ёвтамс ломантнень тонавтомга, кортадо».

<sup>16</sup>Павол стясь, кедень аволдамосо тердинзе каштмоleme ды мерсь: «Израилень ломанть ды тыньгак, Пазонь мелень ваньця лия раськень ломанть! Кунсоломизь!»

<sup>17</sup>Израилень раськенть Пазозо кочкинзе кезэренъ пингень минек покштятнень Эсензэкс. Сон ламолгавтызе те раськенть, зярдэ сон эрясь ятонь масторсо, Египетсэ. Мейле Сон Эсь виев кедьсэнзэ ливтинзе сынст тосто.

<sup>18</sup>Чаво модасо ниленьгемень иеть Пазось андсь эйсэст.

<sup>19</sup>Ханаансо Сон чавнось-маштнесь сисем лия раськетъ ды максызе сынст модаст Эсензэ кочкавт раськентень.

<sup>20</sup>Теде мейле, малав нилесядт ведьгемень иень перть, Сон макснесь тенст судият, Самуил пазмарицянтъ самс.

<sup>21</sup>Мейле раськесь вешсь эстензэ инязор, ды Пазось максызе тенст инязорокс Саулонь, Кишень цёранзо, Вениаминэнь буестэнтъ. Саул кирдсь инязорксчинть ниленьгемень иеть.

<sup>22</sup>Мейле Пазось каизе Саулонь ды инязорокс аравтызе Давидэнь, конань эйстэ ёвтась: “Мон муия Давидэнь, Иессеень цёранзо. Те ломанентъ Мон вечкса, сон топавтсынзе весе Монь арсевксэнь”.

<sup>23</sup>Кода Пазось алтакшноськак, теке жо Давидэнь буестэнтъ Сон кепедизе Израилень туртов Идицякс Иисусонь.

<sup>24</sup>Иисусонь самодонзо икеле Иоанн кортась весе израилень ломантненень: сыненст эряви кадомс пежетест ды нававтомс-лемдемс эсь прясъ.

<sup>25</sup>Эсь эрямо кинть прядомсто Иоанн кортась: “Мон аволь Се, киде тынь арсетядо, арась. Сон сы мондень мейле, мон а маштован Сонзэ карсемапелензэ юксницяккак”.

<sup>26</sup>Ялгат-оят, Авраамонь буень-раськень эйкакшт, ды тыньгак, Пазонь мелень ваньця лия раськень ломанть! Те идемадо кулясь кучозель тыненк.

<sup>27</sup>Ерусалимень эрицятне ды сынст прявтост Иисусонь эзизь сода. Сынть судизь Сонзэ куломас ды теньсэ топавтызь пазмарицятнень валост, конатнень ловныть еврейтне эрва оймсема чистэ.

<sup>28</sup>Сынть эзть муче Эйстэнзэ кодамомяк чумо, конань кисэ Сон максомаль куломантень, ды ялатеке энялдсть Пилатонь икеле маштомс Сонзэ.

<sup>29</sup>Зярдю весементь топавтызь, мезе Сондензэ сёрмадозель, Сон валгстозель крёстонть лангсто ды путозель калмс.

<sup>30</sup>Ансяк Пазось Сонзэ вельмевтизе кулозьстэ!

<sup>31</sup>Мейле ламо чинь перть Сон таго сакшнось сетненень, конатне икеле яксесть мартонзо Галилеясто Ерусалимев. Сынть ней ёвтнить Иисусто Израилень раськенть туртов.

<sup>32</sup>Минь яволявтнетяно ней те Кенярксов кулянтъ: мезе Пазось алтакшнось минек тетятненень, сень Сон топавтызе минек туртов, сынст эйкакшост туртов. Сон вельмевтизе кулозьстэ Иисусонь,

<sup>33</sup>кода сёрмадозьгак омбоце псалмасонтъ: “Тон Монь Цёрам, течи Мон чачтытинь Тонь!”

<sup>34</sup>Пазось вельмевтизе Иисусонь, ды рунгозо зярдояк а наксады. Сон теде ёвтась истямо валсо: “Мон алкукс макссынть тенк сеть аполавтовикс чанстямотнень-баславамотнень, конатнень алтакшнынъ Давиднэнь”.

<sup>35</sup>Лия таркасо сёрмадозь: “Тон а максак Эсетъ Иневаньксэнтъ рунгонзо наксадомас”.

<sup>36</sup>Давид эризе эрямонзо, Пазонь арсевксэнтъ топавтозь, ды кулось. Сонзэ калмизь покштятнень ваксс, ды уловозо наксадсь.

<sup>37</sup>Ансяк Се, конань Пазось вельмевтизе кулозьстэ, эзь наксадо!

<sup>38</sup>Секс, ялган-оян, содадо: тыненк яволявтови пежетень нолдамо ансяк Иисусонь кувалма.

<sup>39</sup>Сонзэ вельде эрьва кемицянтьень максови чумовтомочи, кона эзь максово Моисеень Коентъ вельде.

<sup>40</sup>Ванодо, илязо уле тынк марто истя, кода кортыльть Пазонь валсо пазмарицятне:

<sup>41</sup> “Ванодо, згилицят! Дивазеведе – ды ёмадо! Эдь тынк эрямонь читнестэ Мон теян истямо тев, конанень тынь зярдояк аволиде кемезеве, кияк ёвтындеряволь тенк те тевденть”».

<sup>42</sup>Зярдэ Павол ды Варнава лисильть еврееень синагогастонтъ, лия раськенъ ломанть сынст тердизь кортамонтъ поладомо сыця оймсема чистэяк.

<sup>43</sup>Зярдэ промксось срадсь, еврейтнестэ ламот ды еврееень кемемас совазь лия раськенсетнеяк тустъ Паволонь ды Варнавань мельга, конат кортнестъ сынст марто ды кемевтсть эйсэст эрямс-аштемс Пазонь седеймарямосо.

#### **Еврейтнень марто сёвнозевемась**

<sup>44</sup>Малав весе ошось промсь те оймсема чистэнтъ Пазонтъ валонзо кунсолосо.

<sup>45</sup>Зярдэ еврейтне неизь, зяро ломантнеде, сынст сявадозевсть сельмест. Сынъ сёвность ды покордасть Паволонь тонавтоманзо ды мольсть сонзэ каршо.

<sup>46</sup>Сестэ Павол ды Варнава мерсть тенст видьстэ сельмс: «Пазонь валонтень эрявсь тонавтомс васняк тынк. А вана тынь сонзэ а сайтядо мельс ды теньсэ эсь прянк тейтядо амаштовиксэкс пингедде пингень



эрямонтень. Секскак минь ней кадтадызь ды тутано лия раськенсетненень.

<sup>47</sup>Истя миненек кармавтсь Азорось. Сон мерсь: “Мон теян эйсэть валдокс лия раськетненень туртов. Тон кандат идема весе масторонь эрицятненень туртов”».

<sup>48</sup>Зярдю лия раськенсетне тень маризь, сынь кенярдкшность ды шнасть Азоронть валонзо, ды весе, кить кочказельть пингедь пингень эрямос, кармасть кемеме.

<sup>49</sup>Азоронть валозо сраговсь весе сеть таркатнева.

<sup>50</sup>Ялатеке еврейтне сыремтизь сюпав кудораськень Паздо пелиця аватненень ды ошонь сехте содавикс ломантненень кепедедемс Паволонь ды Варнавань каршо. Ломантне панизь неть кавтотненень эсест таркатнестэ.

<sup>51</sup>Павол ды Варнава чукадизь пильгстэст те ошонь пуленть, – истя невтизь пансицятненень чумост – ды тусть Иконияв.

<sup>52</sup>Тень лангс апак вано, Антиокиянь кемицятне ялатеке пештявсть кенярдомасо ды Иневанькс Оймеялтсо.

## Деяния 14

### Павол ды Варнава Икониясо

<sup>1</sup>Икониясо Павол ды Варнава совасть, кода свал, еврееень синагогас ды кортасть истя псистэ, ды секскак кемезевсть Иисуснэнь пек ламо еврейть ды гректькак.

<sup>2</sup>Теке марто сеть еврейтне, кинь арасель мелест кемемс, кирвазтизь лия раськенсетненень кежест кемицятненень каршо.

<sup>3</sup>Павол ды Варнава кадовкшность тозо талайс ды апак пеле ёвтнесть Азоронть эйстэ. Азорось максыль апостолтнэнень вий тейнемс дивань тевть ды тамашат, ды теньсэ невтсь: сынст кортамост Сонзэ седеймарямодонть виде.

<sup>4</sup>Ошонь эрицятне явовсть. Веенстнэ арасть еврейтнень пелев, лиятне – апостолтнэнь пелев.

<sup>5</sup>Лия раськенсетне ды еврейтне прявост марто састь ве мельс совавтомс визьксчамас ды чавомс кевсэ апостолтнэнь.

<sup>6</sup>Ансяк апостолтнэ марясть теде ды тусть Ликаониянь Листра ды Дербе оштнэс ды сынст пертьпельга велетнес,

<sup>7</sup>косо таго ёвтнесть Кенярксов кулядонть.

### Листрасо ды Дербесэ

<sup>8</sup>Листрасо эрясь ломань, конань пильгензэ а маштовильть, сон чамордыцяль чачомастонзо саезь ды зярдояк эзь яка.

<sup>9</sup>Те ломанеськак кунсолось, кода Павол кортась. Тонавтомань валонть ёвтамсто Павол варштась видьстэ чамордыцянтъ лангс ды неизе: тонань эйсэ ули кемема шумбралгадомс.

<sup>10</sup>«Кортан тетъ Иисус Христос Азоронтъ лемсэ: Стяк видьстэ пильгетъ лангс!» – верьга вайгельсэ серьгедсь Павол чамордыцянтень. Ломанесь кирнявтсь ды кармасть якамо!

<sup>11</sup>Ломантне неизь, мезе тейсь Павол, ды кармасть пижнеме ликаониянь кельсэ: «Ломанень чачосо пазт валгсть миненек!»

<sup>12</sup>Сынь Варнавань лемдизь Зевсэкс, Паволонь – Гермесэкс, мекс Павол седе ламо кортась.

<sup>13</sup>Ошонь ортанть икеле ульнесь Зевсэнъ озкскудозо. Сонзэ озатянтъ мелезэ ульнесь ломантнень марто максомс казнеть-анокст апостолтнэненъ. Секскак сон ветясь печкемс букат ды кандсь цецянь каштазт ортанть ваксс.

<sup>14</sup>Ансяк зярко Варнава ды Павол апостолтнэ теде марясть, сынъ сезнизь эсест оршамопелест, чийсть ломантнень юткс ды кармасть пижнеме:

<sup>15</sup>«Цёрат, мезе тынь тейтядо? Минь, кода тыньгак, ломантяно! Минь кандынек тенк Кенярксов куля. Кадынк неть аволь алкуксонь пазтнэнь

ды велявтодо эриця Пазонтень, кона теизе менеленть ды масторонть, иневедентькак ды весементь, мезе эйсэст.

<sup>16</sup>Икелень шкатнестэ Пазось эзь карда ломантнень эсест киява якамодонть.

<sup>17</sup>Ансяк сестэяк Сон эзь лотксе Эсензэ эйстэ ёвтнемеде паро тевензэ вельде. Эрявикс шкасто Сон кучни миненек пиземе ды сюпав сюронь чачома, Сон максы ярсамопель, седеенек пештясынзе кеняркссо».

<sup>18</sup>Неть валтнэ эль-эль лоткавтызь ломантнень апостолтнэнь туртов казнень-аноксонь максомадонть. Сынь макссть превть эрвантень туемс кудов. Теке шкастонть сынь кадовсть тоско ды тонавтсть.

<sup>19</sup>Мейле Антиокиясто ды Икониясто Листрав састь еврейть, конат кепедизь лиятнень Паволонь каршо. Ды зярдэ апостолтнэ смелстэ пачтясть куля, кепедизь ломантнень сынст каршо, истя кортазь: «Сынь мезеяк а ёвтыть алкуксонь, ансяк кенгелить». Ломантне лажнозевсть, кармасть кевсэ ёртнеме Павол лангс. Меельцекс сынь ускизь Паволонь ош ушов ды ёртызь тов. Арсесть, Павол кулось.

<sup>20</sup>Ансяк зярдэ кемицятне пурнавсть перьканзо, сон стясь ды совась мекев ошс. Валске сынь Варнава марто тусть Дербесэ ошов.

#### **Апостолтнэнь велявтомаст Сириянь Антиокияв**

<sup>21</sup>Павол ды Варнава ёвтнесть Кенярксов кулядонть Дербесэ ды пурнасть Иисус мельга ламо молицят. Мейле Павол ды Варнава мекев састь Листрав, Иконияв ды Антиокияв.

<sup>22</sup>Тосо сынь кемектасть Иисусонь мельга молицятнень оймест, тердсть сынст эрямс-аштемс кемемасонть. «Пазонь Инязорксчинтень совамодонок икеле миненек сави кирдемс ламо майсемат», – кортасть сынь.

<sup>23</sup>Весе кемицянь куротнева Павол ды Варнава аравтсть кемикуронь прывтт. Сестэ сынь постонь кирдемасо ды озномасо максызь сынст трымс-ваномс Азоронтень, конанень кармасть кемеме.

<sup>24</sup>Апостолтнэ ютызь Писидиянтъ ды састъ Памфилияв.

<sup>25</sup>Пергесэ Азоронь валонтъ пачтямодонзо мейле сынъ састъ Атталияв.

<sup>26</sup>Атталиясто венчсэ таго велявтсть мекев Антиокияв, косто Пазонь седейшкавань ванстома марто икеле кучозельть теемс се теветь, конань ней топавтызь.

<sup>27</sup>Мекев самодост мейле сынъ пурнызь кемицянь куронтъ ды ёвтнизь весементъ, мезе Пазось топавтсь вельдест ды кода Сон панжизе кемемас кенкшентъ аволь еврейтнененьгак.

<sup>28</sup>Тосо сынъ Иисусонь мельга молицятнень марто кадновсть талайс.

## Деяния 15

### Апостолтнэнь ды кемикуронь ветицятнень промксось Ерусалимсэ

<sup>1</sup>Иудеясто Антиокияв састъ ломанть, конат кармасть тонавтомо кемицятнень: «А карминдерятадо киськепень керявтомо Моисеень кармавтоманзо коряс, тынь а идевтядо».

<sup>2</sup>Мельтне явовсть, Павол ды Варнава пелькстазь сёвнозевсть Иудеясто сазь ломантнень марто. Окойники, састъ ве мельс: Паволнэнь ды Варнаванень зяряя лия кемиця марто молема те теветь коряс Ерусалимев апостолтнэненень ды кемицянь куронь прявтнэненень.

<sup>3</sup>Кемицянь курсь ильтинзе сынст ки лангов. Сынъ ютасть Финикиянь ды Самариянь трокс ды ёвтнестъ эрьва кува, кода велявтсть Пазонтень лия раськенсетне. Те кулясь кандыль кеняркс весе кемицятненень.

<sup>4</sup>Вана сынъ пачкодсть. Ерусалимень кемицянь курсь, апостолтнэ ды кемикуронь прявтнэ сынст вастызь паро мельсэ. Павол ды Варнава ёвтнизь весементъ, мезе Пазось тейсь-топавтсь сынст вельде ды кода Сон панжизе кемемас кенкшентъ аволь еврейтнененьгак.

<sup>5</sup>Кемицятне, конат ульнестъ фарисейтнень ютксто, стясть ды мерсть: «Ней лия раськенсетненень теема киськепень керявтома, ды эряви вешемс пельдест Моисеень Коентъ топавтоманзо».

<sup>6</sup>Апостолтнэ ды кемикуронь прявтнэ пурнасть вейсэнъ промкс те кевкстеманть ваномга.

<sup>7</sup>Кувака кортамотнеде мейле Петра стясь ды мерсь: «Кемиця ялгат, тынь содатадо, Пазось юткстонок умок кочкимим монь лия раськенъ ломантнень туртов Кенярксов кулянтъ пачтямо. Кадык марясызь сынъ те кулянтъ монь кургсто ды совить кемемас.

<sup>8</sup>Пазось, кона содасынзе ломантнень седеест, невтизе лия раськенсетненень Эсь паро мелензэ, зярдо казизе тенст Иневанькс Оймеялтонть истя жо, кода миненеккак.

<sup>9</sup>Сон эзинзе яво сынст минек эйстэ мейсэяк, ды кемеманть вельде ванськавтынзе сынст седеест!

<sup>10</sup>Мейс эно тынь снартневттядо-варчавтнетядо Пазонь цидярдоманть, зярдо путтадо кемицятнень кирьгас истямо ашко, кона эзь кандовкшно минек покштятненень, а кандови миненеккак?

<sup>11</sup>Минь кемтяно: Иисус Христос Азоронть чанстензэ вельде минь идевтяно, кода идевить сынъгак».

<sup>12</sup>Сестэ чатьмонезевсь весе промксось, весе кунсолость Варнавань ды Паволонь, конат ёвтнесь, кодат дивань тевть ды тамашат Пазось тейсь сынст вельде лия раськенсетнень ютксо.

<sup>13</sup>Зярдо сынъ прядызь ёвтнемаст, сайсь вал Яков. Сон мерсь: «Кемиця ялгат, кунсоломизь.

<sup>14</sup>Симон ёвтнесь миненек, кода Пазось васенцеде невтизе мелявксонзо лия раськенсетнеде ды кода кочкась Эсензэ туртов ломанть сынст ютксто.

<sup>15</sup>Истя жо кортыльть весе неть тевтнеде пазмарицятнеяк Пазонь пельде Сёрмадовкссонть:

<sup>16</sup>“Мейле Мон сан мекев ды одов кепедьса Давидэнь каладозь кудонзо, одс тейса ды витьса сень, мезесь тосо яжазель.

<sup>17</sup>Кадык вешнесызь Азоронть весе лия ломантне ды раськетне, конатнень Мон кочкинь Эсень туртов. Истя корты Азорось, конась теи весе тень.

<sup>18</sup>Пазось соды Эсензэ тевтнеде пингетнень ушодомадо икеле”».

<sup>19</sup>Яков поладсь: «Секс, монь койсэ, миненек а эряви тейнемс стакачить лия раськенсетнень туртов, конат арсить самс Пазонтень.

<sup>20</sup>Мекевланк, миненек сёрмадома тенст сёрмасо, мезде эряви кирдедемс: ярсамопельде, конась кандозь казнекс аволь алкуксонь пазнэнь ды секскак теевсь аваньксэкс; усксевемадо, сывельде, конастонтъ апак нолда вересь, ды верде, ды лиянень а эряви теемс сень, мезе а эряви теемс эстетъ.

<sup>21</sup>Эдь Моисеень Коесь пачтяви ды ловнови вайгельсэ эрва ошонь синагогасо эрва оймсема чистэ пек умонь шкатнестэ саезь».

**Апостолтнэнь промксонь сёрмась лия раськенъ кемицятненень**

<sup>22</sup>Теде мейле апостолтнэ ды кемикуронь прявтнэ весе кемицятнень марто сайсть мель кочкамс эсест ютксто зярыя ломанть ды сынст кучомс Павол ды Варнава марто Антиокияв. Сынъ кочкизь Иудань, конанень лиякс мерильть Барсаба, ды Силань. Нетъ кавтотне ульнестъ кемицятнень ютксо ветицякс.

<sup>23</sup>Мартост макссть сёрма, косо сёрмадозель: «Минь, апостолтнэ ды кемикуронь прявтнэ ды весе тынк кемиця ялгатне, кучтано шумбракстнемат тыненк, Антиокиянь, Сириянь ды Киликиянь кемицятненень, конат лия раськенсетнестэ велявтсть Пазонтень.

<sup>24</sup>Миненек пачкодсть кулят, келя, тыненк састъ таго-зяро минек кемикуронь ломанть, конатнень минь эзинек кучне. Сынъ талакавтыдизь тынк ды кавтолдовтызь ойменк эсь кортамосост керявтомадо ды Коень топавтомадо кортазь.

<sup>25</sup>Секскак минь пурнавинец вейс ды саинек мель кочкамс зярыя ломанть ды сынст кучомс тыненк минек вечкевикс Варнава ды Павол марто,

<sup>26</sup>конат весе эсь эрямост путызь важомантень Иисус Христос Азоронть туртов.

<sup>27</sup>Истя минь кучтано тенк Иудань ды Силань валсо кемекстамо минек сёрмадовксонть.

<sup>28</sup>Иневанькс Оймеялтось ды минь сынек ве мельс: а стакалгавтомс тынк канстонк мейсэяк, ансяк эрявикс вешематнеде башка:

<sup>29</sup>Кирдеведе аволь алкуксонь пазнэнь казнекс кандозь ярсамопельде, верде ды сывельде, конастонть апак нолда вересь, ды усксевемадо, ды лиянень а эряви теемс сень, мезе а эряви теемс эстеть. Эрядо неть кармавтовкстнэнь коряс, ды ули тенк паро. Уледе шумбрат!»

<sup>30</sup>Кучозтне пачкодсть Антиокияв. Тосо сынь пурнызь кемицянь куронть ды максызь сёрманть.

<sup>31</sup>Ломантне ловнызь сонзэ ды кенярдозевсть те седеень оймавтыця кулянтень.

<sup>32</sup>Иуда ды Сила сынсь ульнесть пазмарицякс, ды эсест кортамосост оймавтызь ды кемекстызь кемиця ялгасть.

<sup>33</sup>Сынь ютавтсть тосо зярыя шка. Мейле кемицятне ёвтасть сыненст седейоймамонь валт ды ильтизь апостолтнэнень.

<sup>34</sup>Сила, ялатеке, сайсь мель кадовомс тоско, Иуда мурдась Ерусалимев.

<sup>35</sup>Павол ды Варнава кадовсть зярс Антиокияс, ёвтнесть Кенярков кулянтъ ды ламо лия ломантнень марто пачтясть Азоронь валонть.

#### **Паволонь ды Варнавань ютксо пелькстамось**

<sup>36</sup>Зярыя шкань ютазь Павол мерсь Варнаванень: «Адя, таго содавтсынек кемиця ялгатнень весе оштнэва, косо тонавтынек Азоронь валонтень, ды вансынек, кода сынь пряст марить».

<sup>37</sup>Варнава саиксэлизе мартонзо Иоаннонь, конанень лиякс мерильть Марк.

<sup>38</sup>Ансяк Павол ловсь: а эряви саемс сень, кона сынст кадынзе Памфилиясо ды эзь моле мартост вейсэнь теветень, конань тееме сыннь кучозельть.

<sup>39</sup>Тень коряс сынст ютксо лиссь пси пелькстамо, ды сыннь явсть вейке вейкедест. Варнава саизе Марконь ды мартонзо венчсэ тусь Киправ.

<sup>40</sup>Павол кочкизе ялгакс Силань. Кемиця ялгатне ильтизь сонзэ Пазонь ванстома марто, ды сон тусь ки лангов.

<sup>41</sup>Павол якась Сириява ды Киликиява, косо кемекстась кемицянь куротнень.

## Деяния 16

### Тимофей сырги Павол ды Сила марто

<sup>1</sup>Павол пачкодсь Дербев ды мейле Листрав. Тосо эриль Иисусонь мельга молициясь Тимофей. Тимофеень авазо ульнесь еврей ава, кона кармась кемеме Христоснэнь, тетязо – грекель.

<sup>2</sup>Листрань ды Икониянь кемиця ялгатне ёвтась паро вал Тимофейде.

<sup>3</sup>Павол сайсь мель саемс Тимофеень эсензэ марто якамо, секскак теевть тензэ киськепень керявтома кой. Тень сон теизе еврейтнень кувалма, конат тосо эрясть, эдь сыннь содыльть: Тимофеень тетязо ульнесь грек.

<sup>4</sup>Ошто ошс якамсто сыннь пачтясть кемицятненень кармавтокстнэнь, конатнень максызь Ерусалимень апостолтнэ ды кемикуронь прявтнэ, ды кармавтсть топавтомс сынст.

<sup>5</sup>Ды яла виевгадсь кемикуротнень кемемаст ды эрва чистэ кассь ламочист.



### Паволонь неявиосо Троадасо

<sup>6</sup>Иневанькс Оймеялтоь эзь мере тенст Асиясо Пазонь валонь пачтямодо, ды секскак сынь кочкизь кинть Фригиянь ды Галатиянь ютксо моданть трокс.

<sup>7</sup>Зярдо пачкодсть Мисиянь модакирьксэнтъ видьс, саиксэльтъ мель ютамс Битинияв, ансяк Оймеялтоь тов эзинзе нолда.

<sup>8</sup>Секскак Мисиянтъ ютамодо мейле сынь састъ Троадав.

<sup>9</sup>Веть Павол несъ неяви. Лиссь тензэ Македониянь ломань ды энялдсь икелензэ: «Сак Македонияв, иневедентъ трокс ютазь, ды лездак тенек».

<sup>10</sup>Те неявиостонть мейле минь чарькодинек: истя Азорось терди эйсэнек тов Кенярксов кулянтъ кандомонзо, ды прынек ве мельс сыргамс Македонияв.

### Лидия карми Христоснэнь кемеме

<sup>11</sup>Троадасто минь венчсэ туинек видьстэ Самотраки усияв, тосто, омбоце чистэнтъ – Неаполев,

<sup>12</sup>Неапольстэ – Филиппав, римень колонияв, кона ульнесь Македониянь васенце пельксэнтъ ошокс. Тосо ульнинек зярыя чить.

<sup>13</sup>Оймсема чистэ минь лисинек ошонь орта ушов, леентень, косо еврейтне, кода минь арсинеккак, пурнавильть озномо. Минь озынек ды карминек кортнеме аватнень марто, конат тов пурнавсть.

<sup>14</sup>Ютксо ульнесь Тиатир ошсто Пазонь ловиця ава, лемезэ Лидия. Сон микшниль питней тусто-якстере тусонь коцт. Зярдо Лидия кунсолось, мезде кортась Павол, Азорось панжизе сонзэ седеензэ Паволонь кортамонтъ чарькодемантень.

<sup>15</sup>Сонськак, кудоятконсетнеяк нававтозельть, ды сон пек тердсь минек эйсэ эстензэ: «Ловиндерятадо эйсэнь Азоронтень алкуксонь кемицякс, садо монень ды эрядо кедьсэнь». Сонзэ энялдоманть минь топавтынек.

### Паволонь ды Силань озавтыть пекстамо кудос

<sup>16</sup>Таго весть ознома таркантень молемстэ минек ки лангсо вастовсь важо тейтерь. Сон ульнесь колазь аванькс оймеялтсо, кона вельдензэ кортыль сыця шкадонть. Сы шкадонть ёвтнематнесэ важо тейтересь кандыль ламо ярмакт эсь азортнэнь туртов.

<sup>17</sup>Сон мольсь Паволонь ды минек мельга, истя сеерезь: «Нетъ ломантне Верепазонтъ важонзо! Сынь ёвтнить седе, кода тенек идевемс!»

<sup>18</sup>Истя сон тейниль чиде чис. Окойники, Павол эзь кирдеве, велявть ёнонзо ды пшкадсь аванькс оймеялтонть: «Иисус Христосонь лемсэ тетъ кармаван: лиссть эйстэнзэ!» Сеске аванькс оймеялтось кадызе важо тейтерень.

<sup>19</sup>Зярдэ важо тейтерень азоронзо чарькодсть: лезэнь лисьмапрят ёмась, сестэ сынь кундызь Паволонь ды Силань, ускизь ошкужос, прявтнэненъ.

<sup>20</sup>Ветизь ошонь ине прявтнэненъ ды мерсть: «Нетъ ломантне еврейть, сынь минек ошонь сэтъмечинть колыцяст.

<sup>21</sup>Сынь тонавтыть койтненень, конат аштить минек коентъ каршо ды конатненъ миненек, Римень масторонь ломантненень, а эривить саемс ды топавтомс».

<sup>22</sup>Ошонь эрицятнеяк азаргадозь кепедевсть Паволонь ды Силань каршо, ды прявтнэ кармавтсть кайсевтнемест ды илейсэ чавомост.

<sup>23</sup>Сынст пек чавизь ды ёртызь пекстамо кудос. Ванстыцянтень кармавтсть седе пштистэ ваномс мельгаст.

<sup>24</sup>Истямо кармавтовксонь марязь, сон пекстынзе сынст сехте васоло потмарс, пильгест сёлгинзе кандс.

<sup>25</sup>Пелевень шкасто Павол ды Сила озность ды морасть шнамо морот Пазонтень, лият пекстазтне кунсолость эйсэст.

<sup>26</sup>Апак учо теевсь истямо виев модасорнома, мик пекстамо кудонть юрозо сыргстась таркастонзо. Сеске весе кенкштне панжовсть, весемень тертест прасть.

<sup>27</sup>Зярдю ванстыцясь сыргозсь ды неинзе пекстамо кудонь панжадо кенкштнень, сон каподсь торо эсь прянзо маштомга, эдь сон арсесь: пекстазтне оргодсть.

<sup>28</sup>Ансяк Павол серьгедсь тензэ: «Иля тее эстетъ зыян! Эдь минь весе тескетяно!»

<sup>29</sup>Ванстыцясь кармавтсь кирвазтемс тол, ёртозь ёртовсь Паволонь потмаронтень, ды тандадомадонть прясто пильгс сорнозь прась Паволонь ды Силань пильгезэст.

<sup>30</sup>«Азорт-парочить, мезе монень теемс идеман кисэ?» – кевкстинзе сынст пекстамо кудостонть ливтемстэ.

<sup>31</sup>Тень каршо сынь мерсть: «Кемть Иисус Христос Азоронтень, сестэ идеват тон, ды тонь кудораськетнеяк».

<sup>32</sup>Сынь кармасть пачтямо Азоронь валонть сонензэяк, кудуютконсетнененьгак.

<sup>33</sup>Пекстамо кудонь ванстыцясь сеске, секе вестэнтъ, саинзе сынст мартонзо, шлинзе-нардынзе аржост, ды нейке сонсь ды весе кудораськезэ нававтызь пряст.

<sup>34</sup>Мейле сон ветинзе сынст эсь кудозонзо, андынзе ды весе эсь кудуютконсетнень марто пек кенярдозевсть, мекс кемезевсть Пазонтень.

<sup>35</sup>Зярдю сась валскесь, ошонь прявтнэ кучсть пекстамо кудонь ванстыцянтень эсест пельде важодицят истямо кармавтома марто: «Нолдынк неть ломантнень».

<sup>36</sup>Пекстамо кудонь ванстыцясь мерсь Паволнэнь: «Прявтнэ кармавтсть нолдамонк. Лиседе ды азёдо седейоймамо марто!»

<sup>37</sup>Ансяк Павол мерсь важодицятненень: «Кода истя? Сынь судтомо минек, чумовтомотнень, илейсэ чавимизь весень икеле, куш минь Римень масторонь ломантяно, ды ёртымизь пекстамо кудос. Ней сынст мелест нолдамонок салава? Истя а ули! Кадык сынсь сыть тей ды ливтьсамизь тестэ».

<sup>38</sup>Важодицятне пачтизь неть валтнэнь прявтнэненень. Зярдо тонат маризь, келя, Павол ды Сила Римень масторонь ломанть, сынсь тандадсть.

<sup>39</sup>Прявтнэ састь, апостолтнэнь кедьстэ вешть чумонь нолдамот, ливтизь пекстамо кудостонть ды энядсть ошонть кадомадо.

<sup>40</sup>Пекстамо кудостонть лисемадо мейле Павол ды Сила састь Лидияненень. Тосо сынсь вастовсть кемиця ялгатнень марто ды кемекстызь сынст оймест. Мейле Павол ды Сила тусть Филиппа ошстонть.

## Деяния 17

### Апостолтнэ Фессалоникасо

<sup>1</sup>Павол ды ялганзо ютасть Амфиполенть ды Аполлониянть трокс, састь Фессалоникав, косо ульнесь еврееень синагога.

<sup>2</sup>Павол, кода свал тейнекшнесь, совась синагогав. Тосо мельга-мельцек колмо оймсема чинь перть кортнесь мартост Пазонь Сёрмадовкстонть,

<sup>3</sup>конань коряс чарькодевтсь ды невтсь: Пазонь кучовт Идицятнень алтазель пиштема ды кулозьстэ вельмема. «Те Иисусось, конань эйстэ мон ёвтнян тенк, улиак Пазонь кучовт Идицясь», – кортась Павол.

<sup>4</sup>Зярыя еврейть кемезевсть ды вейсэндявсть Паволнэнь ды Силанень, мартост ламо гректькак, конат ловсть Пазонтъ, ды аволь аламо содавикс аваткак.

<sup>5</sup>Те сьвадстовтынзе акемиця еврейтнень сельмест, ды сынсь пурнызь нузякс нулгодькс ломантнень ошкужотнестэ ды ошонь эрицятненьгак ды кармасть ошонтъ азаргавтомо. Сынь вешнесть Паволонь ды Силань

ды ливтиксэлизь сынст ломантнень икелев. Секскак каявсть Ясононь кудонтень.

<sup>6</sup>Ансяк тосто эзизь муе апостолтнэнь. Сестэ саизь Ясононь ды лия кемицятнень, ветизь ошонь прявтнэнь. Азаргавтозтне пижнесть: «Сынь прянзо лангс велявтызь весе масторлангонть, ней вана састь тейгак!

<sup>7</sup>Ясон жо саинзе сынст эсь кудозонзо. Сынь весе молить кесаренть мереманзо каршо ды свал кортыть лия инязоронь улемадо. А те инязорось, келя, Иисус!»

<sup>8</sup>Тень марязь, ошонь прявтнэ ды вейс пурнавозь ломантне теевсть теке азарсь кискат.

<sup>9</sup>Ошонь прявтнэ васняк сайсть Ясононь ды лиятнень пельде кемекстамо вал ярмакт марто ды мейле нолдызь.

#### **Беройя ошсо**

<sup>10</sup>Ансяк ушодовсь весь, кемиця ялгатне ильтизь Паволонь ды Силань Беройяв. Тов самодо мейле сынть мольсть еврееень синагогав.

<sup>11</sup>Беройянь еврейтне, аволь кода Фессалоникансетне, седе превеельть. Сынь мелень явозь кунсолызь тонавтома валонть ды эрва чистэ вансть Пазонь Сёрмадовксонть, сень содамга: видестэ а видестэ корты Павол.

<sup>12</sup>Ламот неть еврейтнень ютксто кемезевсть, мартост кемезевсть грекень содавикс аваткак ды цёраткак.

<sup>13</sup>Ансяк зярдэ еврейтне Фессалоникасо марязь, келя, Павол пачти Пазонь валонть Беройясяк, сынть састь товгак ды кармасть ломантнень апаро мельс совавтомо ды ацирьгавтнеме.

<sup>14</sup>Кемиця ялгатне сеске ильтизь Паволонь буто иневедь чирев, Сила ды Тимофей кадовсть Беройяс.

<sup>15</sup>Паволонь ильтицяно уйсть мартонзо Афинав, мейле мурдасть мекев. Сынъ пачтясть Паволонь пельде Силанень ды Тимофейнень энялдома – самс седе курок сонензэ.

### Павол Афинасо

<sup>16</sup>Павол, эсь ялгатнень учозь, якась Афинава. Кежензэ савтызь аволь алкуксонь пазонь чачотне, конатнеде пешксель те ошось.

<sup>17</sup>Секскак сон кортнесь синагогасо еврейтнень ды Пазонь ловиця гректнень марто. Эрьва чистэ кортнесь сетнень мартояк, конат вастовкшность тензэ наймансо.

<sup>18</sup>Весть сонзэ марто кармасть пелькстамо домка превень вечкицятне. Сынъ ульнесть Эпикуронь ды Зенононь мельга молицяст. Веенстнэ сынст эйстэ кевкстнесть: «Мезе ёвтыксэль те чаво чалгамонь чавицясь?» Лиятне кортасть: «Сон, паряк, ёвтни лия масторонь пазтнэде». Сынъ кортнесть истя секс, мекс Павол ёвтнесь Кенярксов кулянтъ Иисусто ды кулозтнень вельмемадост.

<sup>19</sup>Тень кувалма Паволонь ветизь промксос Ареопагов. «Ёвтак миненек, кодамо смустезэ те од тонавтоманть, конанень тон тонавтат?» – кевкстизь Паволонь.

<sup>20</sup>«Тон кортат таго-мезе ачарькодевикс. Ули меленек содамс, мейсэ смустезэ?»

<sup>21</sup>Афинань ломантне ды лия масторонсетнеяк, конат тосо эрильть, сехте пек вечкильть мездеяк одто кортнеме ды кунсолома.

<sup>22</sup>Ареопагонь промкссо Павол стясь ды мерсь: «Афинань ломанть! Весемень кувалма мон неса, тынь пек мелявттадо пазнэнь сюконямодо.

<sup>23</sup>Эдь ошканк якамсто ды озксонь тарканк ваномсто мон неинь мик истямо алтарь, конань лангсо сёрмадозь: “Асодавикс Пазонтень”. Мон ней ёвтнян тыненк те асодавикс Пазонтъ эйстэ, конанень тынь сюконякшнотадо, мик апак сода, кие Сон истямось.

<sup>24</sup>Пазось, кона теизе мирэнтъ-масторонтъ ды весементъ, мезе ули эйсэнзэ, Сон менелентъ ды масторлангонть Азорост. Сон эри аволь кедьсэ теевть Пазонь кудова.

<sup>25</sup>Ломантненень мезе тееви эсь кедьсэст Сонзэ туртов?! Сонензэ мезеяк а эряви. Сон Сонсь весе ломантненень максы эрямо, лексема ды весе лиянтъ.

<sup>26</sup>Сон теинзе вейке верьстэ весе ломаньраськетнень, кадык эрить весе масторлангованть. Сон эрьвантень сынст эйстэ аравтсь шка ды эрямо тарка.

<sup>27</sup>Сон теизе тень вана мекс: кадык вешнить ломантне Пазонтъ ды, паряк, щупазь-капазь мусызь. Пазось, ялатеке, минек эрьванть эйстэ авасоло.

<sup>28</sup>Эдь Сонзэ эйсэ минь эрятанояк, якатанояк, ультянояк. “Минь Сонзэ буень-раськень”, кода теде кортасть тынк конат-конат моронь сёрмадыцятнеяк.

<sup>29</sup>Истямо ладсо, бути минь лисинек Сонзэ буестэ-раськестэ, сестэ миненек а эряви арсемс, буто Пазонтъ чачозо сырнестэ, сиясто, эли кевстэ теезь чопачань кондямо. Пазонь чачось а моли ломанень кедьсэ ды мельсэ теезентъ ёнов, Сон – овсе лия.

<sup>30</sup>Пазось кувать цидярдсь ды эзинзе чумондо ломантнень сеть шкатнестэяк, зярдсэ сынъ Сонзэ а содылизь. Вана ней Сон кармавты весень эрьва косо кадомо эсест пежетест.

<sup>31</sup>Сон путсь чи, зярдсэ карми видестэ судямо масторлангонь весе ломантнень. Судиякс ули Ломань, конань Сон икеле аравтызе те тевентъ топавтомо. Пазось кемекстызе те кочкамонтъ весе ломантнень икеле, зярдсэ вельмевтизе Сонзэ кулозьстэ!»

<sup>32</sup>Зярдсэ сынъ марясть кулозьстэ вельмемадонть, конат-конат кармасть Павол лангсо пеедькшнеме, лиятне жо мерсть: «Те тевентъ коряс минек ули меленек кунсолос тонь лия шканеяк».

<sup>33</sup>Теке марто Павол кадызе Ареопагонь промксонть.

<sup>34</sup>Зярыя ломанть ялатеке вейсэндявсть Паволнэнь, кармасть кемеме. Сынст ютксо ульнесть Ареопагонь ломанесь Дионисий, Дамарь лемсэ ава ды лияткак.

## Деяния 18

### Павол Коринф ошсо

<sup>1</sup>Теде мейле Павол кадызе Афинанть ды тусь Коринфев.

<sup>2</sup>Тосо сон вастсь еврей, лемезэ Акила, чачомань коряс Понтсто. Сон Прискилла нинзэ марто сась аволь умок Италиясто секс, мекс Клавдий кесаресь кармавтынзе весе еврейтнень кадомс Рименть. Павол сась сыненст.

<sup>3</sup>Сынь Павол марто ёроковольть вейке тевсэ – ульнесть коцткудонь теицят, – ды секс Павол кадовсь кедьсэст вейсэ важоме.

<sup>4</sup>Эрьва оймсема чистэнтъ сон кортнесь синагогасо, снартнесь соватомс кемемас еврейтнень ды гректнень.

<sup>5</sup>Зярдю Македониясто састь Сила ды Тимофей, Павол, оймеялтонть ветямонзо коряс, невтсь еврейтненень: Иисус – те Пазонь кучовт Идицясь.

<sup>6</sup>Ансяк зярдю еврейтне кармасть сонзэ каршо молеме ды сёвнозь кортамо, сон оршамонзо лангсто сорновтызе пуленть ды мерсь тенст: «Тынь тынсь чумот эсенк ёмамосонк! Мон ваньксан, икеленк а чуман. Ней туян тонавтомо лия раськенсетнень».

<sup>7</sup>Павол лиссь синагогастонтъ ды совась Пазонь ловиця ломаннень, Юстуснэнь, конань кудозо синагоганть вакссо.

<sup>8</sup>Крисп, синагогань прявтось, ды весе кудораськезэ кемезевсть Азоронтень. Кемезевсть ды нававтызь пряст Коринф ошонь ламо лия эрицятнеяк, конат кунсолыльть Паволонь.



<sup>9</sup>Весть веть Азорось мерсь Паволнэнь невякссо: «Иля пеле! Седе товгак кортак, иля чатьмоне.

<sup>10</sup>Мон – тонь марто, секс киньгак виезэ а саты теемс тонеть зыян. Те ошсонть ламо Монь кемевикс ломанень».

<sup>11</sup>Ды Павол эрясь тосо, Пазонь валонтень тонавтозь, омбоце пель ие.

<sup>12</sup>Зярдэ Акайясо путозель губернаторокс Галлион, еврейтне вейсэндявсть Паволонь каршо ды ветизь сонзэ судс.

<sup>13</sup>Сынь кармасть чумондомонзо: «Те цёрась терди ломантнень Пазонть ловомо аволь минек Коенть коряс».

<sup>14</sup>Павол мезеяк эзь кенере ёвтамо, кода Галлион пшкадсь еврейтненень: «Еврейть! Улиндеряй те тевсэнтъ коень кодамояк коламо эли покш зыян, сестэ монь улевель тувталом кунсолормс тынк.

<sup>15</sup>Молиндеряй тесэ пелькстамось-спорямось кодамо-бути тонавтомадо, лемтнеде ды тынк Койденть, юкснеде неть сюлмотнень тынсь. Те тевсэнтъ мон тенк а карман судиякс».

<sup>16</sup>Ды сон панинзе сынст судямонь кудостонтъ.

<sup>17</sup>Сестэ гректне кундызь Состенэнь, синагогань прявтонть, ды пек чавизь видьстэ судямонь кудонтъ кустема лангсо. Галлион эзь яво тенень кодамояк мель.

#### **Антиокиав Паволонь велявтомазо**

<sup>18</sup>Павол ульнесь Коринфсэ таго сатышка ламо чить. Мейле сон ёвтась туемань валт, кадынзе кемиця ялгатнень ды венчсэ тусь Сирияв. Мартонзо тусть Акила ды Прискиллаяк. Кенкреясо, туемадонзо икеле, Павол нарынзе черензэ секс, мекс макссь Пазонтень алтамонь кеме вал.

<sup>19</sup>Зярдэ састь Эфесэв, Павол кадынзе Акилань ды Прискиллань. Сонсь совась синагогав ды кармась кортнеме еврейтнень марто.

<sup>20</sup>Сынь энялдсть: “Кадовт минек марто зярыя шкас”. Ансяк Павол эзь кадово.

<sup>21</sup>Туемстэнзэ сон мерсь: «Монень эряви ютавомс сыця покшчинть Ерусалимсэ. Тей мон таго сан, бути карми улеме Пазонтъ мелезэ». Ды венчсэ тусь Эфесстэ. Акила Прискилла марто кадовсь Эфессэ.

<sup>22</sup>Кесариясо сон валгсь венчстэнтъ ды тусь ялго Ерусалимев, косо вастовсь тосонь кемицятнень марто, мейле тусь Антиокияв.

<sup>23</sup>Павол эрясь тосо зярыя шка. Мейле сон сыргась тосто, ошто ошс ютызе Галатиянь ды Фригиянь ёнкстнэнь, косо кемекстась весе Иисусонь мельга молицятнень кемемаст.

### **Аполлос тонавты Эфессэ**

<sup>24</sup>Эфесэв те шкане сась вейке еврей, лемезэ Аполлос. Сон чачоманзо коряс ульнесь Александриясто, парсте содылинзе Пазонь Сёрмадовкстнэнь, кортамосоак ульнесь кол.

<sup>25</sup>Сон тонавтозель “Азоронтъ кинтень”, псистэ ды видестэ ёвтнесь Азородонтъ, куш сонсь содылизе ансяк Иоаннонь нававтоманть.

<sup>26</sup>Синагогосоак сон ушодсь кортамо апак пеле. Зярдо Акила ды Прискилла маризь Аполлосонь, сынъ сонзэ тердизь эстет ды седе домкасто панжизь тензэ “Азоронь кинть”.

<sup>27</sup>Зярдо Аполлос сайсь мель модемс Акайяв, кемиця ялгатне лездасть тензэ ды кучсть тосонь кемицятненень мартонзо сёрма, конань эйсэ энялдсть парсте вастомадонзо. Тов сазь, сон пек лездась сетненень, конат Пазонтъ чанстензэ кувалма кармасть кемеме.

<sup>28</sup>Аполлос весень икеле виевстэ лангс ливтизе еврейтнень авиде тонавтоманть. Пазонь Сёрмадовкстнэнь вельде сон кемевиксстэ невтсь весенень: Иисус – те Пазонь кучовт Идицясь.

## **Деяния 19**

## Павол Эфессэ

<sup>1</sup>Се шкастонть, зярдэ Аполлос ульнесь Коринфсэ, Павол, пандов таркатнень ютаמודост мейле, сась Эфесэв. Тосо сон вастовсь зярыя кемиця марто.

<sup>2</sup>«Тынк лангс валовсь Иневанькс Оймеялтось, зярдэ кармиде кемеме Иисуснэнь?» – кевкстинзе Павол. «Кодамояк Иневанькс Оймеялтто минь эзинек марсеяк», – мерсть тонат.

<sup>3</sup>Сестэ Павол кевкстинзе: «Эно кодамо нававторасо-лемдемасо тынь нававторь?» «Иоаннонь нававторасонть», – мерсть сынь.

<sup>4</sup>Павол мерсь: «Иоаннонь нававторазо ульнесь пежетнень эйстэ велявторань нававторакс. Сон тердсь Израилень ломантнень кемемс сенень, кинень самаль сонзэ мельга: Христос Иисуснэнь».

<sup>5</sup>Зярдэ кемицятне теде марясть, сынь нававторь прят Иисус Азоронть лемс.

<sup>6</sup>Ды зярдэ Павол путынзе эрвань пряс кедензэ, Иневанькс Оймеялтось валгсь лангозост, сынь кармасть кортамо лия кельсэ ды пазмарицянь валсо.

<sup>7</sup>Весемезэ эйстэст ульнесь кемгавтовошка ломань.

<sup>8</sup>Павол тонавтсь синагогасонть пецек колмо ковт, апак пеле кортнесь тосо ломантнень марто Пазонь Инязорксчиденть ды снартнесь совавтомс эйсэст кемемас.

<sup>9</sup>Ялатеке конат-конат кевензавтызь седеест ды эзь сае кемемань мель, весемень икеле сёвность Азоронть кинзэ. Сестэ Павол нетнень кадынзе. Сон явинзе эйстэст кемицятнень ды чистэ чис тонавтсь сынст Тиранонь тонавтома кудосонть.

<sup>10</sup>Истя мольсь кавто иень перть. Секскак Асиянь весе эрицятне, кода еврейтне, истя гректнеяк, маризь кулянть Иисус Азоронть.

<sup>11</sup>Пазось тейнесь Паволонь вельде эрва кодат тамашат.

<sup>12</sup>Истя Паволонь лангсто сайнильть ливезь пачинетнень ды важодема икельгапачятнень, путнильть сынст сэредицятнень лангс ды теде пиштицятнень ормаст ютыльть, апаро оймеялтнэяк лисильть эйстэст.

<sup>13</sup>Сестэ еврееень конат-конат оймеялтонь якиця-пакиця пансицятне кармасть ледстнеме Иисус Азоронь леменьть апаро оймеялтсо колазтнень шумбралгавтомга. Сынь кортнесть: «Кармавтано тенк Иисусонь лемсэ, конадо ёвтни Павол: лиседе те ломаньстэнтъ!»

<sup>14</sup>Истя тейсть еврееень Скева попонь покшонть сисем цёранзояк.

<sup>15</sup>Ансяк апаро оймеялтось тень каршо мерсь тенст: «Иисусонь содаса, Паволонь коряскак марсинь, а тынь кить истятнэ?»

<sup>16</sup>Ды цёрась, конань эйсэ ульнесь апаро оймеялтось, каявсь лангозост ды истя чавинзе, сынь мик штапо ды весе веревть менсть кудостонтъ.

<sup>17</sup>Зярдэ теде кармасть содамо еврейтне ды гректне, конат эрильть Эфессэ, сынь пек тандадсть ды Иисус Азоронть лемензэ кармасть седеяк верев кепедеме.

<sup>18</sup>Сетнень эйстэ, конат кармасть кемеме, ламот сыльть ды весемень икеле видькстыльть берянь тевдест.

<sup>19</sup>Ламот, конат теде икеле теильть мунямось-орожиямось тевть, кандылизь ве таркас мунямось книгаст ды весень икеле пултылизь сынст. Зярдэ ловизь пултазь книгатнень питнест, весемезэ лиссь ведьгемень тёжа драхмат.

<sup>20</sup>Истя виевстэ сраговсь ды кемекставсь Азоронь валось.

### **Эфессэ шалтось**

<sup>21</sup>Весе неть тевтнеде мейле Павол, Оймеялтонть мереманзо коряс, сайсь мель молемс Македониянь ды Акайянь трокс Ерусалимев. «Ерусалимденть мейле монень эряви улемс Римсэяк», – кортась сон.

<sup>22</sup>Сон кучинзе Македонияв кавто лездыцянзо, Тимофеень ды Эрастонь, сонсь жо зяряя шкас кадовкшнось Асиясо.

- <sup>23</sup>Те шкане Эфессэ кепедевкшнесь покш шалт Азоронтъ кинзэ каршо.
- <sup>24</sup>Сиянь чавица вейке гизай, лемезэ Димитрий, сиясто тейниль Артемида авапазонь вишкине озкскудынеть. Те максыль покш сюпавчи сынст тейницятненень.
- <sup>25</sup>Димитрий пурнынзе сынст ды те тевсэнтъ лия важодицятненъгак ды мерсь тенст: «Ялгат, тынь содатадо, те тевесь парсте лезды миненек.
- <sup>26</sup>Теке марто тынь неиде ды мариде, кода те Паволось Эфессэнтъкак, весе Асиясонтькак эсензэ кортамотнесэ манчезь велявтсь ламо ломанть эсензэ кемемантень. Сон корты, келя, ломанень кедьсэ теевть пазтнэ – аволь алкуксонь пазт.
- <sup>27</sup>Те тандавтни аволь ансяк сень кувалма, мекс минек тевесь ёмавтсы паро лемензэ. Теде башка ине Артемиданть озкскудозо ёмавтсы питнензэ. Ды весе те прядови вана мейсэ: минек ине авапазонок, конанень суюкони весе Асиясь ды Римень весе мастороськак, ёмавтсы эсензэ инексчинзэ».
- <sup>28</sup>Тень марязь, сынъ весе ацирьгадсть ды кармасть рангомо: «Эфесэнь Артемидась инеде ине!»
- <sup>29</sup>Курок весе ошоськак лажнозевсь. Весе ломантне ёртозь ёртовсть амфитеатрав, каподизь ды ускизь мартост Паволонь ялгатнень Гаень ды Аристарконь, конат састъ Македониясто.
- <sup>30</sup>Павол сонсь арсесь лисеме ломантнень юткс, ансяк кемицятне эзизь нолда.
- <sup>31</sup>Теде башка зярья ломанть Асиянь прявтнэнь юткстояк, конат ульнестъ Паволонь ялгакс, кучсть тензэ энялдома а лисемс амфитеатрав.
- <sup>32</sup>Те шкане пурнавозтне пачк талакадомасольть: веенст пижнестъ вейке, омбонст – лия. Ламотне тунь эзть сода, мейс тей пурнавсть.

<sup>33</sup>Еврейтне ломантнень ютксто ливтизь Александрань. Сон аволдась кедьсэнзэ ды бажась чарькодеветемс ломантнень, мейсэ тевесь.

<sup>34</sup>Ансяк зярдо чарькодсть, сон еврей, весе кармасть ве вайгельсэ сеереме: «Эфесэнь Артемидась инеде ине!» Ды истя сынь сеересть кавтошка часонь перть.

<sup>35</sup>Сестэ лиссь ошонь прявтось. Сон энгамтынзе ломантнень ды мерсь: «Эфесэнь эрицят, арази весе масторлангсонть а содыть: Эфессэ ванстови ине Артемидань озкскудось ды чачось, кона прась менельстэ?!

<sup>36</sup>Тень коряс а мезть пелькстамс. Энгамодо ды эрязкалезь мезеяк илядо тее.

<sup>37</sup>Неть ломантне, конатнень тынь ветинк тей, а чумот: сынь Артемидань озкскудостонть мезеяк эзть сала ды тынк авапазонтькак эзизь сядо-покорда.

<sup>38</sup>Улиндеряй Димитриень ды сонзэ ялганзо киньгак лангс чумондомаст, минек тень туртов улить судонь теемань чить ды судиця ломанть. Вейкест-вейкест лангс пеняцицятне кадык молить тов.

<sup>39</sup>Улиндеряйтть тынк кодаткак лия кевкстеманк, максынк ваномост раськень промксонтень, кона ютавтови коень коряс.

<sup>40</sup>Ванодо, течинь тевенть кувалма аволимизь чумондо минек прявтнэнь каршо кепедеветеманть кисэ. Эдь миненек стака улевель толковамс сыненст те шалтонть тувталонзо». Неть валтнэде весе пуромозь ломантне энгамсть ды тукшность эсь кудоваст.

## Деяния 20

### Павол моли Македонияв ды Грецияв

<sup>1</sup>Ломантнень кепедеветеманть оймамодо мейле Павол тердинзе Иисусонь мельга молицятнень, ёвтась тенст кемекстыця валт, сюконясь ды тусь Македонияв.

<sup>2</sup>Сон ютынзе сеть таркатнень ды кемицятненень ламо кортась истямо валсо, конат кемекстась сынст оймест. Истя сон сась Грецияв,

<sup>3</sup>косо ульнесь колмо ковт. Зярдо сон венчсэ туиксэль Сирияв, еврейтне анокстась сонзэ маштомонзо. Теде марязь, Павол сайсь мель мурдамс таго Македониянь трокс.

<sup>4</sup>Сонзэ марто вейсэ тусть Асиянь видьс Пиррэнъ цёразо Сопатра Беройя ошто, Аристарк ды Секунд Фессалоникасто, Гай Дербестэ, Тикик ды Трофим Асиясто ды Тимофей.

<sup>5</sup>Сынь ютасть икелев ды учость эйсэнек Троадасо.

<sup>6</sup>Минь жо покш венчсэ сыргинек Филиппасто Ламбамсто сукоронь покшчиденть мейле ды вете чинь ютазь вейсэндявинек мартост Троадасо. Тосо ульнинек сисем чить.

#### **Павол вельмевтьсы Эвтickenь**

<sup>7</sup>Оймсема чинь чокшнестэ, чинть валгомадо мейле, минь пурнавинек кшинь синдеме. Павол пурнась сыця чистэнтъ ки лангов, кортнесь весень марто пелевес.

<sup>8</sup>Вере нупальсэнтъ, ков минь пурнавинек, палсть ламо лампат.

<sup>9</sup>Вальма лангсо озадоль од ломань, лемезэ Эвтик. Паволонь кортамсто од ломанесь нуваземсь ды удомсто прась колмоце кудонтъ сэрьстэ алов. Кепедемстэ редизь: сон кулозель.

<sup>10</sup>Павол валгсь, комась од ломанентъ вельксс ды кутмордызе сонзэ. «Илядо мелявто, – мерсь Павол, – сон жив!»

<sup>11</sup>Павол таго кузсь вере нупальс, косо пурнавозельть весе, синтризе кшинть ды ярсась мартост. Сон кувать, малав валскес, кортась пурнавозтнень марто ды мейле тусь эсь кияванзо.

<sup>12</sup>Од ломанентъ ветизь кудов живстэ, ды тень эйтэ весе пек кеняргадсть.

### Троадасто Милетэв уемась

<sup>13</sup>Минь озынек покш венчс ды туинек Ассов, косо Павол вейсэндявиксэль миненек. Сон эсь мелензэ коряс Ассов кинть ютызе ялго.

<sup>14</sup>Ассосо сон вастымизь, озась минек венчентень, ды минь туинек Митилинав.

<sup>15</sup>Омбоце чистэ минь таго ведьга туинек тосто седе тов ды пачкодинек Киосос. Чинь ютазь минь ульнинек Самосо, ды Трогиллияв совамодо мейле таго чинь ютазь пачкодинек Милетэв.

<sup>16</sup>Павол сайсь мель вакска ютамс Эфесэнтъ, Асиясо а кирдеземга. Сон пек кашась, бути те топавтови, кенеремс Ерусалимев Ведьгеменце чинь покшчинтень.

### Павол корты Эфесэнь кемикуронь прявтнэнь марто

<sup>17</sup>Милетстэ Павол кучсь Эфесэв кулянь пачтиця, кемицянь куронь прявтнэнь тердемга.

<sup>18</sup>Зярдэ тонат састъ, сон мерсь тенст: «Тынь тынсь содатадо, кода мон эринь мартонк Асияв самодон мейле васенце чистэнтъ саезь.

<sup>19</sup>Мон сэтместэ ды ламо сельведь марто важдинь Азоронтень. Мон эзинь вано варчавтнематнень лангс, конатнень монень савсь кирдемс еврейтнень зыянов арсематнень кувалма.

<sup>20</sup>Мон эзинь стувто мезеяк эрвиксэнтъ эйстэ, мезде монень кортамаль тенк. Мекевланк, кортынъ апак кекшне весемень икеле ды тонавтынъ тынк кудосто кудос яказь.

<sup>21</sup>Мон пек тердинъ еврейтнень ды гректнень, пажетест кадозь, велявтомс Пазонтень ды кемевемс минек Иисус Христос Азоронтень.

<sup>22</sup>Ней вана, Оймеялтонть кармавтомасо сьулмазь, молема тень Ерусалимев, кадык а содангак, мезе тосо учи эйсэнь.



<sup>23</sup>Ансяк вейкеде содан: эрва ошсонть Иневанькс Оймеялтось корты монень пекстамо кудодо ды пиштемадо, конатне монь учнить.

<sup>24</sup>Ялатеке мон эсь эрямом мезекскак а путан, а пелян куломадоаяк. Монень эряви ансяк кеняркс марто ютамс эсь ким ды парсте прядомс важоманть, конань максызе монень теемс Иисус Азорось, – пачтямс Кенярксов кулянтъ Пазонь чанстедентъ.

<sup>25</sup>Мон эринь тынк ютксо, ёвтнинь тыненк Пазонь Инязорксчидентъ. Ней вана содан: кияк тынк эйстэ монь зярдояк мейле а несамам.

<sup>26</sup>Секс мон течи яволявтнян: бути кияк тынк эйстэ моли ёмамос, монь теньсэ чумом арась.

<sup>27</sup>Эдь мон свал тенк ёвтнинь Пазонтъ весе мелензэ-арсевксэнзэ, мезеньгак апак стувто.

<sup>28</sup>Ванодо эсенк мельга ды весе стаданть мельгаяк, конанень Иневанькс Оймеялтось путыдизь ваныцякс. Ванстодо Азоронтъ ды Пазонтъ кемикуронзо, конань Сон Эсь верензэ питнесэ рамизе-идизе Эсензэ туртов.

<sup>29</sup>Мон содан: туемадон мейле тыненк сыть азарсь верьгизт, конат стаданть а жалясызь.

<sup>30</sup>Тынсенк юткстояк лисить ломанть, конат кармить кенгелеме, виде кинть лангсто кемицятнень эсь мельгаст саемга.

<sup>31</sup>Секс илядо удо ды кирдеде мельсэнк, кода мон колмо иень перть чинек-венек апак лотксе сельведь марто тонавтынть тынк.

<sup>32</sup>Ней вана кемиця ялган, мон кадтадызь тынк Пазонтъ мелявтыця кедензэ лангс ды Сонзэ чанстентъ эйстэ кулянтень. Те кулянтъ ули виезэ кемекстамс тынк ды максомс тенк алтазь вадря таликанть Пазонь весе ломантнень ютксо.

<sup>33</sup>Мон эзинь бажа саеме эсень туртов киньгак пельде а сия, а сырне, а оршамопель.

<sup>34</sup>Тынсь содатадо, вана неть кедтнесэ мон тринь-андынь эсь прямгак, ялгатненьгак.

<sup>35</sup>Теньсэ мон невтинь тенк: вана истя, важдезь, эряви лездамс кажовтненень ды мельсэ кирдемс Иисус Азоронтъ валонзо. Сон Сонсь мерсь: «Седе уцяскав максыцясь – аволь саицясь»».

<sup>36</sup>Тень ёвтазь, Павол весемень марто пульзясь кумажа лангс ды ознось.

<sup>37</sup>Весе авардсть, кутморясть Паволонь ды палсестъ эйсэнзэ.

<sup>38</sup>Сынст сехте пек ризнэвтизь сонзэ валонзо: «Тынь монь зярдож мейле а несамизь». Ды теде мейле кемиця ялгатне Паволонь ильтизь покш венчентъ видьс.

## Деяния 21

### Ерусалимев Паволонь якамось

<sup>1</sup>Ильтицятнень марто явовомадо мейле минь лисинек иневедьс ды туинек видьстэ Кос усиянтень. Омбоце чистэнтъ минь сынек Родосов, тосто туинек Патарав.

<sup>2</sup>Тосо муинек покш венч, кона пурныль туеме Финикияв, ды те венчэнтъ сыргинек седе тов.

<sup>3</sup>Зярдо минь неинек Кипрантъ, ютынек сонзэ вакска видь кедь ёндо. Сестэ минь кинть саинек Сириянтъ ёнов ды лоткакшнынек Тирс, косо эрявсь валгстомс покш венчстэнтъ та-кодат курмот-кармот.

<sup>4</sup>Тосо минь муинек Иисусонь мельга молицят ды эринек сынст кедьсэ сисем чить. Сынъ, Оймеялтонть мельспутоманзо коряс, кортасть Паволнэнь: «Иля яка Ерусалимев!»

<sup>5</sup>Ялатеке, зярдо шказо сась, минь сыргинек седе тов. Весе кемиця ялгатне, поланек-эйкакшнек, ильтясть эйсэнек ошстонть. Ведь чиресэнтъ минь пульзинек кумажа лангс ды ознынек.

<sup>6</sup>Мейле ёвтынек туемань сюкпрат эрьвейкенень ды озынек покш венчентень. Ломантне мурдасть эсест кудова.

<sup>7</sup>Тир ошто минь сынек Птолемаидав. Тосо содавтынек кемиця ялгатнень ды мартост ульнинек ве чи.

<sup>8</sup>Омбоце чистэнтъ минь Павол марто сыргинек Кесарияв, лоткинек Филип евангелистэнтъ кудос, кона ульнесь Ерусалимсэ сисем кочказтнеде вейкекс.

<sup>9</sup>Филипень ульнестъ мирденень апак максо ниле тейтерензэ, конатнень ульнесь пазмарицянь валсо кортамонь казнест.

<sup>10</sup>Зярыя чинь ютазь, зярдо минь ульнинек тосо, Иудеясто сась Агав пазмарицясь.

<sup>11</sup>Сон совась миненек, саизе Паволонь карксонзо, сюлмсинзе эсензэ кедтнень-пилыгтнень ды мерсь: «Иневанькс Оймеялтоь корты: “Истя еврейтне Ерусалимсэ сюлмсесызь те карксонь азоронть ды макссызь сонзэ лия раськенсетнень кедь алов”».

<sup>12</sup>Зярдо тень маринек, минь ды тосотне карминек энялдомо Паволнэнь: «Иля моле Ерусалимев!»

<sup>13</sup>Ансяк Павол тень каршо мерсь: «Мезе тынь тейтядо, мекс авардтядо, мекс сезнетядо седеем? Мон аволь ансяк сюлмсемс максовлия прям, анокан куломскак Ерусалимсэ Иисус Азоронть кисэ».

<sup>14</sup>Зярдо минь чарькодинек, сон мелензэ а полавтсы, лоткинек энялдомодо ды меринек: «Кадык топавтовови Азоронть мелезэ».

<sup>15</sup>Сеть читнеде мейле, конат ютавтозельть Кесариясо, минь пурнынек-сэрнинек ды туинек Ерусалимев.

<sup>16</sup>Мартонок сыргастъ зярыя тостонь кемицят. Сынь минек ветимизь Мнасононь кудос, косо анокстазель миненек эрямо тарка. Мнасон Кипрань ломанель, умонь кемицятнень эйстэ вейкель.

### **Ерусалимсэ Паволонь Яков марто вастовомась**

<sup>17</sup>Ерусалимсэ кемиця ялгатне вастымизь кенярдозь.

<sup>18</sup>Омбоце чистэнтъ минь Павол марто молинек Яковнень. Кемикуронь прявтнэяк весе тосольть.

<sup>19</sup>Шумбракстнемадо мейле Павол педэ пес ёвтнизе весементъ, мезе Пазось сонзэ важоманзо вельде тейсь лия раськетнень ютксо.

<sup>20</sup>Яков ды весе лиятне кунсолызь Паволонь ды инелгавтнизь Пазонтъ. Мейле Паволнэнь мерсть: «Кемиця ялганок, тон содат, ней еврейтнень ютксо кемицятнеде кармасть улеме тѣжат, ды весе сынъ седейшкава ванстыть Моисеень Коентъ.

<sup>21</sup>Сыненст ёвтасть, келя, тон весе еврейтнень, конат эрить лия раськетнень ютксо, тонават Моисеень Коентъ эйтэ потома. Тон, келя, кортат: сыненст а эряви эсест цѣрынетненень теемс киськепень керявтоманть ды а эряви эрямс минек раськенъ весе койтнень-кирдатнень коряс.

<sup>22</sup>Ней мезе тенек теемс? Сынъ, нама, марить самодот, ды пурнавить ламо ломанть.

<sup>23</sup>Кунсолемизь, тейть минек превспутоманть коряс. Минек ютксо улить ниле ломанть, конат макссть алтамо вал Пазонтень.

<sup>24</sup>Саить сынст, ютак мартост ванськавтовомань илат ды пандт пряст нарамонь кисэ. Сестэ весе несызь: апаро кулятне тонь леметь перька аволь видеть – тон эрят Коентъ коряс.

<sup>25</sup>Лия раськенсетненень, конат совастъ кемемас, минь уш сѣрмасо кучинек эсенек меленек-превенек. Кадык сынъ а кирдить мезеяк истямо. Сынъ кирдевест ансяк аволь алкуксонь пазнэнь казнекс кандозь ярсамопельде, верде, сывельде, конастонть апак нолда вересь, ды усксевемадо».

<sup>26</sup>Сестэ Павол саинзе мартонзо неть ломантнень ды омбоце чистэнтъ ютавтынзе мартост вейсэ ванськавтовомань илатнень. Мейле сон совась Пазонь кудос ды яволятсь, зярдэ прядови неть нилетнень

ванськавтовомань шкаст ды зярдо эрванть кисэ максови Пазонтень казне.

### Пазонтъ кудосо Паволонь тертямозо

<sup>27</sup>Зярдо прядовкшнось ванськавтома шкань сисемеце чись, зяря еврейть, конат Асиястольть, неизь Пазонь кудосто Паволонь. Сынъ кепедизь перька аштиця ломантнень, кундызь Паволонь

<sup>28</sup>ды кармасть пижнеме: «Израилень ломанть! Лездадо! Те цёрась сравтнэ эрва кува тонавтома, кона моли минек раськенть каршо, минек Коенть каршо ды те иневанькс тарканть каршо. Ней, теде башка, сон ветясь Пазонь кудозонок аволь еврейть, тень эйсэ нулгодькстызе те иневанькс тарканть ваньксчинзэ».

<sup>29</sup>Теде икеле сынъ ошсо некшнлизь Павол марто вейсэ Трофимень, кона Эфесстэль. Ды секс сынъ арсесть, Павол, нама, ветнилизе тонань Пазонь кудос.

<sup>30</sup>Весе ошось шалнозевсь. Паволонь каподизь, ускозь ускизь Пазонь кудостонтъ ды Пазонь кудонь кенкштнень сеске пекстызь.

<sup>31</sup>Сынъ арсесть маштомс Паволонь, ансяк кулясь весе Ерусалименть лажнозевемадонть пачкодсь римень ушмонь тѣжань прявтонть.

<sup>32</sup>Сон сеске сайсь зяря сядонь прявтт ды ушмант ды лиссь пурнавозтненень. Зярдо шалныцятне неизь тѣжань прявтонть, сынъ лоткасть Паволонь чавомодо.

<sup>33</sup>Тѣжань прявтось саизе Паволонь, кармавтсь тертямонзо кшнинь кавто тертьсэ. Сон кевкстинзе ломантнень, кие те истямось ды мезе сон тейсь.

<sup>34</sup>Пурнавозтнень ютксто веенст кармасть пижнеме седе, омбонст лиядо. Истямо шалтсонть тѣжань прявтонть кодамояк смусть эзь чарькодеве, ды сон кармавтсь ветямс Паволонь ушмокудос.

<sup>35</sup>Зярдо сынъ кустема лангсольть, пурнавозтне пек азаргадсть ды ушмантнэнень савсь кандомс Паволонь кедь лангсост.

<sup>36</sup>Ломантне мольсть мельгаст ды пижнестъ: «Кулома тензэ!»

**Ломантнень икеле Паволонь идема валозо**

<sup>37</sup>Ушмокудов совамсто Павол кевкстизе тѣжань прявтонть: «Мерят-арась монень пшкадемс тонеть вейке вешемань кувалма?» «Арази тон кортат грекенъ кельсэ?» – дивазевсь се.

<sup>38</sup>«Сестэ, лисни, тон аволь се египетэнь ломанесь, кона аволь умок кепедевкшнесъ масторонь прявтнэнь каршо ды ливтекшнесъ эсензэ марто чаво модав ниле тѣжат нельгицят-маштницят?»

<sup>39</sup>«Арась. Мон евреян, – мерсь Павол, – Киликиянь Тарс ошсто, кона весенень содавикс. Энялдан, макст монень ёвтамс вал ломантненень».

<sup>40</sup>Тона макссь тензэ вал. Павол стясь кустеманть лангс ды кедень аволдамосо тердинзе ломантнень чатьмонеме. Зярдэ весе опамсть, Павол кармась кортамо евреень кельсэ:

**Деяния 22**

<sup>1</sup>«Покштят-тетят ды ялгат-оят! Кунсолемизь. Мон ёвтан икеленк зярыя валт эсь прям идемга».

<sup>2</sup>Зярдэ ломантне маризь, Павол корты евреень кельсэ, сынъ седеяк кармасть каштмолеме. Павол поладсь:

<sup>3</sup>«Мон евреян, чачинъ Киликиясо, Тарс ошсо, ды касынъ те ошсонть. Ды тесэ, Гамалилэнь кедьсэ, мон ульнинъ тонавтозь покштятнень Коень кеместэ топавтоманть-кирдеманть. Мон весе вийсэнъ тюринъ Пазонъ теветъ кисэ, кода течи тюри эрвась тынк эйстэяк.

<sup>4</sup>Мон пансинъ мик маштомас Азоронтъ киява молицятнень, кундсинъ цѣратнень ды аватнень, ёртовтнинъ эйсэст пекстамо кудова.

<sup>5</sup>Теде соды попонъ прявтоськак, раськенъ весе прявтнэяк. Монень мик максозельть пельдест сѣрмат Дамасконъ еврейтненень. Мон молинъ тов нетъ ломантнень кундсеме ды Ерусалимев тертязь сынст пачтямо чумонъ пандовтоманъ кисэ.

<sup>6</sup>Ды вана мезе лиссь монь марто Дамаск ошонтъ маласо, ки лангсо: чикуншкане апак учо валдомтымим менельстэ ине валдо.

<sup>7</sup>Мон прынь мода лангс ды маринь вайгель, кона мерсь тень: “Савла! Савла! Мекс тон пансят Эйсэнь?”

<sup>8</sup>Мон кевкстия: “Тон кият, Азоро?” Сон мерсь: “Мон Назаретэнь Иисусан, конань тон пансят”.

<sup>9</sup>Монь ялгатне неизь валдонть ды пек тандадсть, ансяк Сень вайгелензэ, кие монень кортась, сынъ эзизь маря.

<sup>10</sup>Мон таго кевкстия: “Азоро! Мезе монень теемс?” Азорось мерсь монень: “Стяк ды азё Дамасков. Тосо весементъ ёвтасызь, мезе теть теема”.

<sup>11</sup>Ине валдось монь сокоргавтымим, секскак ялган кедте ветимизь Дамаск ошов.

<sup>12</sup>Тосо эрясь Анания, Коентъ педэ пес кирдиця ломань, конань весе Дамасконь еврейтне шнасть.

<sup>13</sup>Сон совась монень ды мерсь: “Савла ялгам, велявтозо теть сельмевалдось!” Сеске мон карминь нееме ды ваномо сень лангс, кие ёвтынзе монень неть валтнэнь.

<sup>14</sup>Сон мерсь: “Минек покштятнень-тетятнень Пазост тонь кочкинзеть Сонзэ мелензэ содамо, Видечисэнтъ нееме ды Сонзэ вайгелензэ марямо, зярдо Сон теть пшкади.

<sup>15</sup>Тон улят весе ломантнень икеле Сонзэ ёвтницякс сень коряс, мезе неить ды мезе марить.

<sup>16</sup>Сестэ мезе жо тон учнят? Озномасот тердик Азоронтъ лездыцякс. Стяк, нававтык прят ды шлить пежететь”.

<sup>17</sup>Мейле мон велявтынъ Ерусалимев ды, Пазонь кудосо озномсто, кучозель тень неявкс.

<sup>18</sup>Мон неия Азоронтъ, кона мерсь монень: “Капшак ды нейке кадык Ерусалиментъ: неть ломантне а кармить кемеме тонь валозот Мондень”.

<sup>19</sup>Мон меринь тень каршо: “Азором, неть ломантне содыть, кода мон, синагогасто синагогав яказь, кундсилинь ды локшосо керсилинь Тонеть кемицятнень.

<sup>20</sup>Ды зярдэ валовсь Стефанонь, Тондеть ёвтницянтъ, верезэ, монгак тосо аштинь ды ульнинь сонзэ маштоманзо кисэ. Мон мик ванстынь сонзэ маштыцятнень оршамопелест”.

<sup>21</sup>Сестэ Азорось мерсь монень: “Азё. Мон кучтан тонь васов, лия раськенсетненень”».

#### Павол тѣжань прявтонь кедьсэ

<sup>22</sup>Неть валтнэнь видьс пурнавозтне кунсолость Паволонь. Ансяк неть валтнэде мейле сынъ кармасть рангомо: «Истямонть нардама моданть лангсто! Сонензэ а эряма!»

<sup>23</sup>Сынъ рангсть, сезнеть ланга оршамост, коморсост ёртнеть коштс пуленть.

<sup>24</sup>Тѣжань прявтось кармавтсь Паволонь ветямс ушмокудов, тосо локшосо керямс ды парстине кевкстнемс сонзэ, мекс ломантне истя пижнеть лангозонзо.

<sup>25</sup>Зярдэ Паволонь сьулмсизь локшосо керямс, сон пшкадсь вакссонзо аштиця сядонь прявтонть: «Мери-арась коесь тенк локшосо керямс Римень масторонь ломаненть, кона судскак арасель максозь?»

<sup>26</sup>Зярдэ тень маризе сядонь прявтось, сон мерсь тѣжань прявтонть: «Мезе тон теят? Те ломанесь – Римень масторонь ломань».

<sup>27</sup>Сестэ тѣжань прявтось лиссь Паволнэнь ды кевкстизе: «Тон алкукс Римень ломанят?» «Алкукс», – мерсь Павол.



<sup>28</sup>Сестэ тѣжань прывтось мерсь: «Монень савсь покш питне пандомс Римень ломанькс арамга». «Мон вана чачинь Римень ломанекс», – мерсь тень каршо Павол.

<sup>29</sup>Сетне, конат анокольть пензавтомо Паволонь, сеске тусть. Тѣжань прывтоськак тандадсь: эдь сон кшнисэ тертизе Римень масторонь ломаненть.

### Павол Инепромксонтъ икеле

<sup>30</sup>Тѣжань прывтонть ульнесь мелезэ содамс, мезень кисэ еврейтне чумондыть те ломаненть. Омбоце чистэнтъ сон нолдызе Паволонь кшнинь тертнестэ. Сон тердинзе весе попонь покштнэнь ды Инепромксонтъ. Мейле совавтызе ды аравтызе икелест Паволонь.

### Деяния 23

<sup>1</sup>Павол варштась Инепромкссо пурнавозтнень лангс ды мерсь: «Ялгат-оят, весе эрямом перть, течинь чис мон ванькс оймеёжосо эринь Пазонтъ икеле».

<sup>2</sup>Тесэ попонь прывтось Анания кармавтсь вакссо аштицятненень лоштямс Паволонь турва ланга.

<sup>3</sup>Павол сестэ мерсь: «Пазось лоштятанзат тоньгак, ашосо ваднезь пирявкс! Тон аштят Коенть коряс монень судонь теицякс, теке марто тонсь колсят Коенть, зярдс кармавтат монь лоштямо!»

<sup>4</sup>Маласонзо аштицятне мерсть Паволнэнь: «Кода тетъ а визькс покордамс Пазонь попонтъ прывтонзо?»

<sup>5</sup>Павол тень каршо мерсь: «Ялган-оян, мон а содылинь теде: сон попонь прывт. Алкуккак сѣрмадозь: “Беряньстэ иля корта раськетъ прывтодонзо”».

<sup>6</sup>Павол содыль: веенстнэ тесэ саддукейть, лиятне – фарисейть. Секс сон вайгельсэ мерсь Инепромксонтень: «Ялган-оян, мон фарисеян,

фарисеень цёран, ды монь судить тесэ, мекс мон кеман-нежедян кулозьстэ вельмеманть лангс».

<sup>7</sup>Кода ансяк сон тень ёвтызе, фарисейтнень ды саддукейтнень ютксо кирвазсь пелькстамо, ды промксось явовсь кавтов.

<sup>8</sup>Саддукейтне кортыть: кулозьстэ вельмемаяк арась, ангелткак арась, оймеялткак арась. Фарисейтне, мекевланк, весеменень тенень кемить.

<sup>9</sup>Кепедевсь покш шалт. Койс тонавтыцятне, конат фарисейтнень пельдельть, стясть ды кежейстэ ёвтызь эсест мелест-валост: «Минь а мукшнотано те ломаньстэнтэ мезеяк берянь. Бути сонзэ марто кортась оймеялт эли ангел, сестэ минь а карматано молеме Пазонтэ каршо».

<sup>10</sup>Пелькстамось кирвазсь истя пек, мик тёжань прявтось пелезевсь, аволизь сезне Паволонь. Секс сон кармавтсь ушмантнэнень самс саемс Паволонь юткстост ды ветямс сонзэ ушмокудос.

<sup>11</sup>Тезде мейле веть Паволонь икелев лиссь Азорось ды мерсь: «Иля пеле, Павол! Кода тон кортыть Монь эйстэ Ерусалимсэ, истя эряви кортамс тетэ Римсэяк».

### **Паволонь каршо салавань арсевксэсь**

<sup>12</sup>Валске марто зярыя еврейть пурнавсть ды салава тейсть Паволонь каршо арсевкс: сынь пежетъкстасть мездеяк а ярсамс ды а симемс се шкас, зярс а маштсызь Паволонь.

<sup>13</sup>Истя арсесть тееме ниленьгеменде ламо ломанть.

<sup>14</sup>Сынь састь попонь покштнэнень ды раськеня прявтнэнень ды мерсть: «Минь пежетъкстынек мездеяк а ярсамс, зярс Паволонь а маштсынек.

<sup>15</sup>А вана тынь ды Инепромксось мереди ней тёжань прявтонть ливтемс Паволонь тей ванды, буто сонзэ судямонь теვენзэ седе парсте ваномс. Минь жо ультяно анокт ды маштсынек сонзэ тей пачкодемадонзо икеле».

<sup>16</sup>Те арсевкстэнтъ кармась содамо Паволонь сазоронзо цёра. Сон мольсь ушмокудов ды ёвтась теде лелянстэнь.

<sup>17</sup>Павол тердсь вейке сядонь прявт ды мерсь тензэ: «Ильтик те од цёрынентъ тёжань прявтонть, сонзэ ули мезе-бути пек эрявикс ёвтамс тензэ».

<sup>18</sup>Сядонь прявтось ветизе цёрынентъ тёжань прявтонть ды мерсь: «Пекставтозь Павол тердимим ды энядсь монень те од цёрынентъ тонеть ильтямонзо. Сонзэ, келя, ули мезе-бути ёвтамс тонеть пек эрявикс».

<sup>19</sup>Тёжань прявтось саизе цёрынентъ кедте, ветизе ве ёнов ды кевкстизе: «Мезе тон ёвтыксэлитъ монень?»

<sup>20</sup>Тона мерсь: «Еврейтне совасть ве мельс вешемс ванды тонь кедьстэ Паволонь Инепромксов, буто седе парсте ваномс судямонь тевензэ.

<sup>21</sup>Ансяк тон тенень иля кеме – кекшезь таркасо сонзэ кармить учомонзо ниленьгемень ломанть. Сынъ пежетъкстасть а ярсамс, а симемс, зярс Паволонь а маштсызь. Сынъ анокт, учить ансяк тонь валот».

<sup>22</sup>Тёжань прявтось мерсь од цёрынентень нолдамстонзо: «Сень, мезде монень ёвтыть, киненьгак иля ёвтне».

#### **Паволонь кучить Кесарияв**

<sup>23</sup>Тёжань прявтось тердсь кавто сядонь прявтт ды мерсь тенст: «Анокстадо кавтосядт ушмант, сизьгемень ластеть, кавтосядт налчирькесэ ледницят, ды чокшнень вейксэце чассто саезь улест анокт Кесарияв лисеманть.

<sup>24</sup>Анокстадо лишметъ Паволонь туртовгак ды ванодо, улезэ сон ильтязь-пачтязь шумбрасо-парсте Феликс прявтонть».

<sup>25</sup>Сон кучсь сёрмаяк, конаньсэ сёрмадозель:

<sup>26</sup>«Клавдий Лисий кучи шумбракстнемат вечкевикс ине Феликс прявтонть.

<sup>27</sup>Пачтян тонеть: те ломаненть кундызь еврейть ды уш маштыксэлизь, ансяк мон кенеринь ушманон марто ды идия, зярдю карминь содамо: сон Римень масторонь ломань.

<sup>28</sup>Мон арсинь седе парсте содамс, мезень кисэ сонзэ чумондыть, ды секскак ветия сонзэ Инепромксос.

<sup>29</sup>Мон чарькодия, чумондомась сюлмавозь сынст Коенть марто. Ансяк кодамояк истямо чумо, конань кисэ макснить куломас эли озавтнить пекстамо кудос, сонзэ эйсэ арась.

<sup>30</sup>Зярдю монень пачтязель, келя, еврейтне арсить сонзэ салава маштомо, мон сеске сонзэ кучия тонеть. Сонзэ чумондыцятненень мон кармавтынь ёвтнемс тонеть, кодамо чумо мусть сонзэ эйстэ. Ульть шумбра».

<sup>31</sup>Те кармавтоманть коряс ушмантнэ саизь Паволонь ды веть тусть мартонзо Антипатридав.

<sup>32</sup>Омбоце чистэнтъ ластетнень марто сонзэ ильтизь Кесарияв, ялготне мурдасть ушмокудов.

<sup>33</sup>Зярдю ластетне пачкодсть Кесарияв, сынь максызь Феликс прявтонть сёрмантькак, Паволоньгак.

<sup>34</sup>Прявтось ловнызе сёрманть ды кевкстизе Паволонь, кодамо сон ёнксонь. Зярдю марясь: Павол Киликиясто,

<sup>35</sup>сон мерсь: «Мон кунсолоса теветь, зярдю тей сыть тонь чумондыцятне». Теде мейле сон кармавтсь кирдемс Паволонь Иродонь азоркудосонтъ ванстыця марто.

## Деяния 24

### Паволонь чумондыть Феликсэнь икеле

<sup>1</sup>Вете чинь ютазь Анания, попонь прявтось, еврееень покштнэнь ды Тертулланы, римень коень содыцянтъ, марто вейсэ састь Кесарияв, Паволонь каршо чумондоматнень Феликс прявтонть ёвтамо.

<sup>2-3</sup>Зярдэ Паволонь совавтызь, Тертулла кармась сонзэ каршо чумондоматнень ловномо: «Вечкевикс ине Феликс! Свалшкане ды эрва кува минь седейшкава ды покш сукпря марто яла видькстнетяно, те тонь кедь ало, тонь преввалдосот минек масторось пачкодсь кеме сэтъмелувс, ды тонь теветь кувалт эрямось кармась улеме пародояк паро.

<sup>4</sup>Минек арась меленек саемс тонь ламо шкат, ансяк вейкеде вешан: мельспаросо, инесъкеть, кунсолык нурькине энялдоманок.

<sup>5</sup>Миненек те ломанесь маряви зыянонь кандыця сыявксокс. Сон кепси шалт весе масторлангонь еврейтнень ютксо. Сон назаретэнсетнень авиде тонавтомань сравтницянь прявтост.

<sup>6</sup>Минь сонзэ кундынек, зярдэ сон колыксэлизе натой Пазонь кудонтъ ваньксчинзэ ды секскак теиксэлинек сонзэ туртов судямо минсенек Коень коряс.

<sup>7</sup>Ансяк Лисий тѣжань прявтось саизе сонзэ минек кедьстэ вийсэ, кучизе тонеть

<sup>8</sup>ды кармавтымизь минеккак, сонзэ чумондыцятнень, ёвтамс тонеть сонзэ чумодонтъ. Зярдэ тон пензазь сонзэ кевкстнесак, тонсь чарькодъсак: минек чумондоматне видеть».

<sup>9</sup>Еврейтне кемекстызь неть чумондомань валтнэнь, мерсть, келя, мезе те ломанентъ коряс ёвтазель, весе виде.

#### **Паволонь идема валозо**

<sup>10</sup>Прявтось аволдась Паволнэнь ды теньсэ мерсь тензэ кортамодо. Павол ушодызе идема валонзо: «Мон содан, тон те раськень судият уш ламо иеть ды теят эсь теветь видестэ. Секскак мон олясо прянь марязь карман кортамо идема валом тонь икеле.

<sup>11</sup>Кемгавтово чиде икеле, мезде тонеть а стака ули содамс, мон сынъ Ерусалимев суюконямо.

<sup>12</sup>Чумондыцян монь эзимизь некшне Пазонь кудососяк, синагогасояк, ошсосяк киньгак марто пелькстамодо эли прявтнэнь каршо ломантнень кепедемстэ.

<sup>13</sup>Сыненст мейсэяк а кемекставить чумондоматне, конатнень сынь аравтнить ней монь каршо.

<sup>14</sup>Ялатеке мон тонь икеле видькстан: мон се тонавтоманть мельга молицязо, конань сынь ловить авиде тонавтомакс, ды истя алкуксккак важдян покштянок-тетянок Пазонтъ туртов. Мон кеман весеменень, мезе сёрмадозь Коентъ эйсэ ды пазмарицятнень книгатнесэ.

<sup>15</sup>Ды мон кемезь учан, кода неть ломантнеяк учить: Пазось вельмевтьсынзе виде ойметненьгак, пежетевтненьгак.

<sup>16</sup>Секс мон свал бажан ванстомс оймеёжонь ваньксчинть, кода Пазонтъ икеле, истя ломантнень икелеяк.

<sup>17</sup>Зярыя иень ютазь мон ней сынь Ерусалимев эсень раськем туртов лезксэнтъ кандомо ды Пазонтень казнень-аноксонь максомо.

<sup>18</sup>Те теветнъ теемстэ монь куродемизь Пазонь кудосо ванськавтовомам теемадо мейле. Те шкане монь перька эзь пурнавкшно ломанть, ды киньгак мон эзинь азаргавтне.

<sup>19</sup>Тосо ульнестъ Асиясто зярыя еврейть. Неть ломантненень ней улемаль тонь икеле эсь чумондомаст марто, бути сынст ули мейсэ монь чумондомс.

<sup>20</sup>Эли кадык нетне тесэ ёвтыть, кодамо чумо мусть сынь эйсэнь, зярдэ монь кевкстнесь Инепромксось.

<sup>21</sup>Арази чумом сеть валтнэсэ, конатнень мон тосо серьгединь икелест стядо аштемстэ: Течи тынь монь судятадо сень кис, мекс кеман-нежедьян кулозьстэ вельмеманть лангс?»

<sup>22</sup>Тень кунсоломадо мейле Феликс лоткавтызе тевенть ды мерсь: «Мон ёвтаса арсемам тынк тевенк коряс, зярдэ сы Лисий, тёжань прявтось, ды мон седе домкасто чарькодьса те тонавтоманть».

<sup>23</sup>Сон кармавтсь сядонь прявтонть кирдемс Паволонь пекстазь, ансяк максомс тензэ аламошка олячи: кадык малавиксэнзэ якить мельганзо эли сакшныть тензэ.

#### **Павол пекстамо кудосо**

<sup>24</sup>Зяряя чинь ютазь Феликс сась нинзэ марто, кона еврей аваль, лемезэ Друзилла. Прявтось тердевтизе Паволонь ды мелень явозь кунсолось сонзэ ёвтнеманзо Христос Иисусэннь кемемадонть.

<sup>25</sup>Теде мейле Павол кармась кортамо Пазонь мелень коряс эрямодонть, кирдевемадонть ды се чиденть, зярдэ Пазось карми судямо ломантнень. Феликсэннь те тандавтызе, ды сон мерсь: «Саты! Азё ней! Зярдэ муян шка, таго тердтян».

<sup>26</sup>Теде башка, сон учось: Павол максы тензэ ярмакт олякстомтоманзо кисэ, секскак сеedyтэ кучнесь кисэнзэ ды кортнесь мартонзо.

<sup>27</sup>Ютасть кавто иеть, ды Феликс прявтонть таркас арась Поркий Фест. Феликс ялатеке Паволонь кадызе пекстамо кудонтень, еврейтнень мельс туемга.

### **Деяния 25**

#### **Павол веши кесарень суд**

<sup>1</sup>Фест, прявтокс арамонзо мейле колмо чинь ютазь, сыргась Кесариясто Ерусалимев.

<sup>2</sup>Ерусалимсэ сонензэ састь попонь покш, еврееень весемеде содавикс прявтт, ды ёвтызь тензэ чумондома валост Паволонь каршо.

<sup>3</sup>Фестэннь икеле сын пек энядсть эсь мелест топавтомань туртов ускомс Паволонь Ерусалимев. Сын арсесть Паволонь маштомс ки лангсо ютамстонзо.

<sup>4</sup>Фест мерсь: «Павол пекстамо кудосо Кесариясо, монськак курок молян тов.

<sup>5</sup>Кадык тынк эйстэ сетне, кить молевить, молить монь марто ды тосо ёвтасызь эсест чумондомаст, бути те ломанесь тейсь мезеяк берянь».

<sup>6</sup>Ерусалимсэ Фест ульнесь ансяк кеменьшка чить ды велявтсь Кесарияв. Омбоце чистэ сон озась судямо эзементь лангс ды кармавтсь эсензэ икелев ветямс Паволонь.

<sup>7</sup>Паволонь ветизь. Еврейтне, конат састь Ерусалимстэ, арасть перьканзо ды кармасть чумондомонзо эрва кодамо зыянов тевсэ, ансяк сыненст мейсэяк эзь кемекставт чумондоматне.

<sup>8</sup>Эсь прынзо идемга, Павол мерсь: «Мон эзинь тее кодамояк зыян еврееень Коенть каршояк, Пазонь кудонть каршояк, Римень кесаренть каршояк».

<sup>9</sup>Фест еврейтненень савтомань кисэ Паволонь кевкстизе: «Ули-арась мелеть модемс Ерусалимев судонь кирдеме? Тосо тонь тевенть ветявлия монсь».

<sup>10</sup>Павол мерсь: «Мон уш аштян кесарень судонть икеле, тесэ монь судямскак. Мон эзинь тее кодамояк зыян еврейтненень, тень тон парсте содасак.

<sup>11</sup>Бути чуман, бути теинь мезеяк истямо, мезень кисэ монь эряви куловтомс, сестэ куловтомизь, мон каршо а молян. Ансяк бути еврееень чумондоматне аволь видеть, сестэ киньгак арась виезэ максомс монь сынст кедьс. Мон вешан кесарень суд!»

<sup>12</sup>Превспутыцянзо марто кортамодо мейле Фест мерсь: «Тон вешат кесарень суд, кесарентень кучтадызыгак».

#### **Павол Агриппа инязоронть икеле**

<sup>13</sup>Зярыя чинь ютазь, Кесарияв Фестэнь содавтомо сась Агриппа инязорось Вереника марто.



<sup>14</sup>Сынь Фестэнь кедьсэ эрясть аволь вейке чи, ды лиссь кортамо Паволонь тевензэ корякак. «Тесэ ули ломань, кона пекстамо кудос озавтозель уш Феликсэнь пингестэ», – ёвтнесь Фест Агриппанень.

<sup>15</sup>«Зярдо мон Ерусалимсэлинь, еврееень попонь покштнэ ды прявтнэ ливтсть каршонзо чумондома ды вешсть судьямонзо.

<sup>16</sup>Мон меринь тенст: римень коень-кирдань коряс ломаненть а судьякшныть куломас, зярс сон а вастови чумондыцянзо марто ды а максови тензэ олячи идемс эсь прянзо чумондоманть эйстэ.

<sup>17</sup>Зярдо сынь састь тей монь марто, мон, шкань апак таргсе, омбоце чистэнтъ озынь судьямо тарказон ды ветявтия те ломаненть.

<sup>18</sup>Зярдо чумондыцянзо стясть ды кармасть кортамо, сынь эзизь чумондо сонзэ вейкеяк истямо зыянсо, мезде мон арсекшнинь марямс.

<sup>19</sup>Сынь ансяк пелькстасть-спорясть сонзэ марто эсест кемемаст коряс ды та-кодамо кулозь Иисусонь коряс, кона, Паволонь валонзо кувалт, ялатеке эри.

<sup>20</sup>Мон эзинь сода, кодамо мельс прамс истямо тевсэ, ды кевкстия, ули-арась Паволонь мелезэ модемс Ерусалимев кирдемс судонтъ тосо.

<sup>21</sup>Ансяк Павол вешсь кесарень суд ды энялдсь кадомс эсь прянзо теске ванстыця марто. Секскак мон кармавтынь кирдемс сонзэ пекстамо кудосонтъ кесарентень кучомазонзо».

<sup>22</sup>Агриппа мерсь Фестнэнь: «Мелем ули эстенъ кунсолломс те ломаненть». «Ванды марясак», – мерсь Фест.

<sup>23</sup>Омбоце чистэнтъ Агриппа ды Вереника, весе каштанчисэст ды цивтёрдыця мазычисэст, совасть судьямо кудос. Мартост ульнестъ тёжань прявтнэ ды ошонь сехте содавикс ломантне. Фестэнь кармавтоманзо коряс совавтызь Паволонь.

<sup>24</sup>Фест мерсь: «Агриппа инязор ды весе тесэтно! Икеленк ашти се, конань кисэ монь лангс пек лепштясть весе еврейтне Ерусалимсэ ды тесэ, Кесариясоjak. Сынъ пижнезь вешить пельдень маштовтомс сонзэ.

<sup>25</sup>Мон жо а мукшнан эйтэнзэ кодамояк чумо, конань кисэ сонзэ эрjви маштомс. Ды вана сайнь мель кучомс сонзэ Римев, сон вешсь кесарень суд.

<sup>26</sup>Ансяк монь арась мезеjak чумонзо невтемга, мезеньт сёрмадомаль кесарентень. Секс мон ливтия сонзэ тынк икелев ды васняк тонеть, Агриппа инязор. Сестэ, зярдэ тон кевкстнесак сонзэ, монгак карман содамо, мезе сёрмадомс кесарентень.

<sup>27</sup>Мон лован: ули авидекс кучомс пекстазенть Римев, чумонзо апак невте».

## Деяния 26

### Паволонь идема валозо Агриппань икеле

<sup>1</sup>«Тонеть максови вал эсь прят идемга», – jволявтсь Агриппа. Павол кепедизе кедензэ ды кармась кортамо:

<sup>2</sup>«Агриппа инязор! Мон лован эсь прям уцяскавкс: монень течи максоzь тонь икеле ёвтамс идема вал еврейтнень чумондомаст каршо.

<sup>3</sup>Эдь тон вадрясто содасыть еврейтнень весе коест-кирдаст ды пелькстамо кевкстемаст. Секскак знялдан: кунсоломак мелень явозь.

<sup>4</sup>Еврейтне парсте содасызь весе эрямо ким. Од пингестэ саезь мон свал эринь эсень раськенть ютксо Ерусалимсэ.

<sup>5</sup>Сынъ умок монь содасамизь ды улиндеряй мелест, сынъ ёвтасызь, кода мон эринь фарисеекс, лиякс меремс, топавтынъ минек кемемань сехте казjмо койтнень-кирдатнень.

<sup>6</sup>Ней вана мон аштян суд икеле сень кис, мекс кеман-нежедян Пазонтъ алтамонзо лангс, конань Сон максyзе минек покштjатненень-тетjатненень.

<sup>7</sup>Самай теке алтамонть топавтовоманзо учозь, минек раськень кемгавтово буеть-кант чинек-венек седейшкава озныть-сюконить Пазонтень. Те кемеманть-нежедеманть кисэ, Агриппа инязор, еврейтне течи эйсэнь чумондытькак!

<sup>8</sup>Мезень кувалма весе тыненк маряви акемевиксэкс истямо тевесь: Пазось вельмевти кулозтнень?

<sup>9</sup>Монгак икеле ловилинь: эряви тюремс весе вийсэ Назаретэнь Иисусонь каршо.

<sup>10</sup>Истя мон тейниньгак Ерусалимсэ. Попонь покштнэнь пельде максозь азорксчисэнтъ, мон озавтнинь пекстамо кудова Пазонь ламо ломанть, ды зярдо кучильть сынст куломас, монгак максылия вайгелем тень кисэ.

<sup>11</sup>Мон ламоксть пиштевилинь эйсэст синагогатнесэ, кармавтылинь Иисусонь сялдомо-покордамо. Мон кирдинь лангозост истямо кежбеке, яксинь пансемест, натой, минек масторонь томбале оштнэваяк».

#### **Павол ёвтни Христос марто вастомадонзо**

<sup>12</sup>«Весть теке тевенть коряс мон туинь Дамаск ошов, попонь покштнэнь пельде максозь азорксчинть ды кармавтовкстнэнь марто.

<sup>13</sup>Ки лангсо, чинь куншкане, инязор, мон неинь менельстэ валдо, кона сияждсь чиденть валдосто. Сон валдомтымим монь ды мартон молицятнень.

<sup>14</sup>Весе пракшность мода лангс, ды мон маринь вайгель, кона мерсь монень еврееень кельсэ: “Савла, Савла! Мекс тон пансят Эйсэнь? Стака теть молемс пшти сялгонть каршо”.

<sup>15</sup>Мон кевкстия: “Тон кият, Азоро?” – “Мон Иисусан, конань тон пансят”, – мерсь Азорось.

<sup>16</sup>“Стяк. Мон аравтытинь Монень важодицякс ды ёвтницякс седе, мезе тон ней Мондень неить ды икелепелевгак неят, зярдо Мон лисян икелеть.

<sup>17</sup>Мон идетьян тонь эсь раськеть ды лия раськенсетнень кедьстэ, конатненень кучан эйсэть.

<sup>18</sup>Тон панжсыть сельмест, велявтсыть чоподастонть валдонть, Сатанань кедензэ алдо Пазонтень. Монь эйс кемемаст кувалма улить нолдазь-простязь сынст пежетест, ды карми улеме тенст тарка-талика Пазонь кочкавт ломантнень ютксо”».

#### Павол ёвтни эсензэ тевде

<sup>19</sup>«Секскак, Агриппа инязор, мон эзинь молевть менельстэ кучозь неявксонть каршо.

<sup>20</sup>Мон пачтинь Кенярксов кулянтъ васняк Дамаск ошсо, мейле Ерусалимсэ, Иудеясо ды лия раськетнень ютксоjak. Мон тердинь весень кадомс пежетест, велявтомс Пазонтень ды невтемс тевсэ эсь янксемаст-велявтомаст.

<sup>21</sup>Секс еврейтне кундымизь Пазонь кудосо ды маштыксэлимизьгак.

<sup>22</sup>Ялатеке Пазось течис монень лезды, ды нейгак мон аштян тесэ ды ёвтнян видестэ весе ломантненень, содавикстнэнень ды асодавикстнэнень. Мон кортан ансяк седе, мезде икелев ёвтасть пазмарицятне ды Моисей.

<sup>23</sup>Сынь сёрмадсть: Пазонь кучовт Идицянть сави пиштемс ды васенцекс кулозьстэ вельмемс. Сон пачтясы идемань валдочинть Эсь раськенстэнь ды лия раськетнененьгак!»

<sup>24</sup>Зярдо Павол ёвтыль идема валонзо, Фест верьга вайгельть серьгедсь: «Тон превстэ лисить, Павол! Ламонь содамось тонь пачтинзеть превстэ лисемас!»

<sup>25</sup>Павол тень каршо мерсь: «Вечкевикс ине Фест, мон превстэ эзинь лисе. Монь валон видеть ды ёвтазь валдо превсэ.

<sup>26</sup>Агриппа инязорось весементь тень содасы, секс мон апак пеле кортан сонензэ тень эйстэ. Мон содан, мезеjak сонзэ эйстэ арасель кекшезь, эдь весе те теевсь аволь анеявикс таркасо.

<sup>27</sup>Тон, Агриппа инязор, кемат – а кемат пазмарицятненень? Мон содан – кемат».

<sup>28</sup>Агриппа мерсь: «Тон, паряк, арсят моньгак куроку теэмс христианокс?»

<sup>29</sup>Павол мерсь каршонзо: «Курок эли а куроку, мон ознан Пазонтень тонь кисэяк, весень кисэяк, кить течи кунсолыть эйсэнь: теевлиде монь кондямокс – ансяк неть тертнеде башка!»

<sup>30</sup>Зярдосон ёвтызе тень, инязорось стясь, мартонзо стясть ошонь прявтось, Вереника ды весе, кить ульнесь мартост тосо.

<sup>31</sup>Сынь лиссть, эсь ютковаст истя кортазь: «Те ломанесь эзь тее мезеяк, мезень кисэ сонзэ эряволь пекстамс тюрьмас эли куловтомс».

<sup>32</sup>Агриппа мерсь Фестнэнь: «Те ломанесь, нама, олякстомтомаль, бути а вешевель сон кесарень суд». Секс прявтось кучизе сонзэ кесарентень.

## Деяния 27

### Павол туи венчсэ Римев

<sup>1</sup>Зярдосон Фест кармавтымизь минек туемс Италияв, сестэ Паволонь ды зярыя лият пекстатнень максызь Юлий сядонь прявтонь кедензэ алов. Сон ульнесь кесарень ушмосто.

<sup>2</sup>Минь озынек Адрамит ошонь покш венчс, конанень эрявсь уемс Асиянь лоткамо таркатнева, ды сыргинек. Мартонок ульнесь Македониянь ломань Аристарк Фессалоника ошсто.

<sup>3</sup>Омбоце чистэнтъ минь пачкодинек Сидонов. Юлий прянзо ветясь Паволонь марто седейшкава. Сон мик нолдызе Паволонь ялганзо содавтомо ды саеме кедьстэст весе эрявиксэнтъ.

<sup>4</sup>Мейле минь таго лисинек иневедьс ды каршо пувиця вармадонть уинек Кипра усиянтъ ёжова, косо вармась ульнесь аволь истямо виев.

<sup>5</sup>Мейле минь ютынек покш иневедентъ трокс Киликиянтъ ды Памфилиянтъ ваксака ды пачкодинек Ликиянь Мира ошс.

<sup>6</sup>Тосо сядонь прявтось мусь Александриянь покш венч, кона уйсь Италияв, ды минек озавтымизь те венчентень.

<sup>7</sup>Минь састо уинек ламо чить ды, окоўники, ламо виень путозь пачкодинек Книда ошонть малав. Вармась пувась каршо, ды миненек а кода ульнесь модемс седе тов. Секскак савсь уемс Салмононь неренть вакска Крит усиянть вармавтомо чирева.

<sup>8</sup>Истя эль-эль шаштозь Критэнь чиренть ёжова, минь пачкодинек таркантень, конань лемезэ Вадря Лоткамо таркат, кона Ласея ошонть маласо.

<sup>9</sup>Шкадонть ёмавтозель ламо, ютакшнось уш Постонь кирдема чиськак, ды те шкастонть уемс апак пеле ульнесь а кода. Секс Павол мерсь весенень, конат ульнесть венчсэнть:

<sup>10</sup>«Цёрат! Мон неян: минек укшномась седе тов карми молема покш стакачи ды пелема марто, аволь ансяк венченть ды канстонзо туртов, ломантнень эрямост туртовгак».

<sup>11</sup>Ансяк сядонь прявтось седе пек кемсь венчень ветицантень ды венчень азоронтень, аволь Паволнэнь.

<sup>12</sup>Те лоткамо таркаськак а маштовиль телень печтямс, ды седе ламотне сайсть мель уемс седе тов, терявтомс пачкодемс Фойниксэв ды тосо печтямс теленть. Фойниксэсь ульнесь Крит усиянть лангсо ды панжозель варматненень, конат пувить обед ёнкс-чивалгомасто ды пелеве ёнкс-чивалгомасто.

### **Иневедьсэ давол**

<sup>13</sup>Пувазевсь обед ёнксонь шожда вармине. Сынь арсезевсть: нама, те се, мезе тенст эрявияк арсемаст топавтомань туртов, кепедизь якоренть ды сыргавтызь венченть Крит усиянть кувалт, чиренть эйстэ васов апак туге.

<sup>14</sup>Аламо шкань ютазь усиянть удалдо пувазевсь виев давол варма, конанень мерить “пелеве-чилисема ёнксонь давол”.

<sup>15</sup>Сон истя кундызе венчень, кодаяк эзинек цидярдо варманть каршо. Минь максынек прянок вармантень, кона кармась кандтнеменек, ков понгсь.

<sup>16</sup>Истя понгинек Клавда вишкине усиянть вармадо кекшезь ёнксонть. Тосо покш стакачи марто идинек вишкине венчкенть,

<sup>17</sup>конань кепединек палуба лангс. Теде мейле венчсэ важодицятне нолдасть пикст покш венчень перька ды сюлмсизь сонзэ эрва ёндо. Сынть пельсть озавомс Сиртэнь чувар мазя тарканть лангс, секскак нолдызь вармаментень, ды истямо ладсо венчесь максозель вармантень.

<sup>18</sup>Омбоце чистэнтъ даволось седеяк виевгадсь, ды венчсэ важодицятне кармасть канстнэнь-сталмотнень ёртнеме ведьс.

<sup>19</sup>Колмоце чистэнтъ минь эсь кедьсэнек ёртнинек иневедьс венчень пельксэнзэяк.

<sup>20</sup>Зярыя чить менеленть лангсо эзь неяво а чи, а тештть, ансяк даволось яла ацирьгалесь. Окойники минь допрок ёмавтынек идеманть лангс кемеманоккак.

<sup>21</sup>Венчсэнтъ ломантне умок уш мездеяк эзь ярса. Сестэ Павол стясь юткозост ды мерсь: «Цёрат, эряволь тенк кунсолумс превспутомам ды кадовомс Крит усиянть вакс. Сестэ аволиде кирде неть кажотнень ды ёмавкстнэнь.

<sup>22</sup>Ялатеке ней прянк илядо нолдтне: кияк эйстэнк а ёми, яжави ансяк венчесь.

<sup>23</sup>Мон теде содан вана косто: ютазь вене монень сакшнось Пазонь кучовт ангел, се Пазонтъ пельде, конанень мон максыя прям ды конанень важдян.

<sup>24</sup>Сон монень мерсь: “Иля пеле, Павол! Тонеть эряви аштемс кесарень суд икеле, ды тенде башка Пазось Эсь чанстензэ кувалма максы тетя истямо казне: ванстовить мартот весе уицятнень эрямоствак”.

<sup>25</sup>Секс, цёрат, илядо пеле! Мон кеман Пазонтень ды содан: кода монень ёвтазь, истя улияк.

<sup>26</sup>Минь ультяно ёртозь кодамояк усия лангс, мезеяк лангс апак вано».

#### **Венчень яжавомась-каладомась**

<sup>27</sup>Кемнилееце вестэнтъ, зярдэ даволось кандтнесь-пансесь эйсэнек Адриянь иневедентъ ланга, пелеве шкасто венчень важдицятне чарькодсть: аволь васоло та-кодамо мода.

<sup>28</sup>Сынь онкстызь ведень сэренеть, лиссь комсешка сэльть-сажентъ. Мейле, аламо таркань ютазь, таго онкстызь, лиссь уш ансяк кеветее сэльтъ.

<sup>29</sup>Венчсэ важдицятне пельсть, аволинек вачкодеве кевтнес, ды венч удалксстонть нолдасть ниле якорть ды озность: седе куроц сазо чись.

<sup>30</sup>Сынь терявтсть оргодеме венчень лангсто, уш нолдызь вишкине венчень ведьс. Тень эйсэ невтсть, буто арсить ёртомс якорть венчень икелькс ёндо.

<sup>31</sup>Павол мерсь сядонь прывтонть ды ушмантнэнь: «А кадовиндеряйтъ неть ломантне венчень лангс, тынь а идевтядо».

<sup>32</sup>Сестэ ушмантнэ керсизь пикстнэнь, конатнесэ сюлмазель вишкине венчексь, ды сон тусь иневедев.

<sup>33</sup>Валске малав Павол кармась энялдомо весе ломантненень: эряви мездеяк сускомс. «Кемнилееце чи уш, кода тынь аштетядо учозь ды мездеяк а ярстадо», – мерсь сон.

<sup>34</sup>«Секс энялдан, мездеяк ярсадо. Те эряви эрямонк ванстомга. Тынк эйстэ киньгак прясто вейкеяк черь а пры».



<sup>35</sup>Тень мерезь, Павол сайсь кши, весемень икеле ёвтась суюпря Пазонтень, синдсь кши сускомо ды кармасть ярсамо.

<sup>36</sup>Сестэ лиятнеяк састь паро ёжос ды кармасть ярсамо.

<sup>37</sup>Венченьтэ лангсо эйстэнек ульнесть кавтосядт сизьгемень кото ломанть.

<sup>38</sup>Зярдэ ломантне пекест пештизь, сынть кармасть шождалгавтомо венченьтэ ды кадовикс товзюронтэ ёртнизь иневедьс.

<sup>39</sup>Зярдэ ашолгадсь, венчсэ важодицятненень эзь содаво модась: икелест ведьуло, вандора чире марто. Сынть совасть мельс ветямс венченьтэ тов, бути ветяви.

<sup>40</sup>Сынть керизь якорень кирдема пикстнэнь ды кадызь якортнень иневедьс. Секе шкастонть юкснизь пикстнэнь, конатнесэ суюлмсезельть ветямо рулень милетне, варма мельга кепедизь икельце вармамевтентэ, ды кармасть венченьтэ ветямо чирентэ ёнов.

<sup>41</sup>Апак учо венчесь эртевсь мазя таркас ды озась. Венченьтэ судось пезнась чуваронтень ды ковгак эзь шашто, удалксонтэ жо вачкоость ды яжасть виев ведьвелявкст.

<sup>42</sup>Ушмантнэ пельсть: иляст оргоде чирентень миледемстэ пекстазтне, секс маштыксэлизь.

<sup>43</sup>Ансяк сядонь прявтось сайсь мель идемс Паволонь ды лоткавтынзе сынст. Сон кармавтсь весенень, кить маштыть укшномо, васенцекс кирнявтомс ведьс ды уемс чирентэ ёнов.

<sup>44</sup>Лиятненень – уемс лаз лангсо ды лия мезе лангсо, мезе кадовсь венченьтэ эйстэ. Истя минь весе идевинек ды лисинек мода лангс.

## Деяния 28

### Павол Мальта усиясо

<sup>1</sup>Идезтне, конат ульнесть Павол марто, кармасть содамо: усиянтэ, конань лангс минь шумбрасто-парсте лисевинек, лемезэль Мальта.

<sup>2</sup>Усиянь эрицятне минек вастымизь пек седейшкава. Сынь кирвазтсть толбандя ды весень минек тердимизь эжнеме, эдь ушосонтъ якшамоль ды мольсь пиземе.

<sup>3</sup>Павол пурнась ве берема тарадт, кармась путнеме эйсэст толбандянтень. Тарадтнэнь ютксто псидентъ лиссь гуй, кона пезназь пезнась Паволонь кедьс.

<sup>4</sup>Зярдэ усиянь эрицятне неизь гуентъ, кона поведевсь Паволонь кедьс, сынь кармасть кортамо эсь ютковасть: «Те ломанесь, улема, ломанень маштниця. Сон идевсь иневедьсэ, ялатеке видечинь авапазось а мери тензэ кадовомс эрямо».

<sup>5</sup>Павол жо сорновтызе гуентъ толс, ды сонзэ эйстэ Паволнэнь эзь ульне кодамояк зыян.

<sup>6</sup>Ломантне учость: Павол курокарми таргоземе эли сеске пры кулозь. Сынь кувать учость ды мейле, зярдэ неизь, мезеяк берянь сонзэ марто эзь тееве, полавтызь арсемасть ды кармасть кортамо: келя, сон – паз.

<sup>7</sup>А васоло ульнестъ Публиень, усиянь прявтонть, кудонзо-чинзэ. Сон минек саймизь эсь кудозонзо, ды колмо чить минь эринек инжекс сонзэ кедьсэ.

<sup>8</sup>Те шкастонть сонзэ тетязо стакасто сэрэдсь, эзь стякшново, чавсь эйсэнзэ пси ды пеке орма. Павол совась нупалезэнзэ, ознось, путынзе лангозонзо кедензэ ды шумбралгавтызе сонзэ.

<sup>9</sup>Тедэ мейле весе лия сэредицятнеяк, конат ульнестъ те усиянтъ лангсо, сакшныльтъ Паволнэнь ды пичкильтъ.

<sup>10</sup>Сынь эрва кода невтсть миненек эсь паро мелест ды вечкемасть. Зярдэ карминек туеме кедьстэст, сынь макссть мартонок весе, мезе ансяк тенек эрявсь.

### Павол пачкоди Римев

<sup>11</sup>Колмо ковонь ютазь минь лисинек иневедьс Александриянь покш венчсэнтъ, конань лемезэль “Кавтаськетъ”. Сон телентъ ютавтызэ те усиянтъ лангсо.

<sup>12</sup>Минь пачкодинек Сиракуза ошов ды ульнинек тосо колмо чить.

<sup>13</sup>Тосто уинек Регияв. Чинь ютазь, пувазевсь лембе ёнксонь варма, ды омбоце чистэнтъ минь пачкодинек ПUTEОЛ ошс.

<sup>14</sup>Тосто муинек кемицятнень ды, сынст энялдомаст коряс, эринек кедьсэст сисем чить. Мейле, okayники, минь сыргинек Римев.

<sup>15</sup>Римсэ кемицятне марясть эйтэнек ды лиссть минек вастомо. Веенст вастымизь Аппиень Ошкужосонтъ, омбонст – Колмо Инжекудонь ошсонтъ. Кемицятнень неезь, Павол ёвтась сукпря Пазонтень, ды сонзэ оймезэ кемекставсь.

<sup>16</sup>Зярдэ минь сынек Римев, сядонь прявтось максынзе пекстатнень римень ушмонь прявтонть кедьс, Паволнэнь мерсть эрямс башка кудосо ды путсть тензэ ванстыця.

### Павол Римсэ

<sup>17</sup>Колмо чинь ютазь, Павол тердинзе эстензэ еврееень куронь прявтнэнь. Зярдэ сынь промсть, сон мерсь тенст: «Ялгат-оят, Ерусалимсэ монь кундымизь ды максымизь римень ломантненень. Ансяк мон мезеяк эзинь тейне раськенек каршо ды покштянок койтнень-кирдатнень каршояк.

<sup>18</sup>Тонат, монь кевкстнемадон мейле, нолдыксэлимизь, секс мекс эзьт муе монь эйтэ кодамояк чумо, конань кисэ монь эряволь маштомс.

<sup>19</sup>Ялатеке еврейтне ульнестъ олякстомтоман каршо. Секскак монень савсь вешемс кесарень суд, ансяк монь раськем аволь мейсэяк чумондоманзо кисэ.

<sup>20</sup>Тень кувалма мон тынк тердидизьгак: вастовомс ды весемеде теде кортнемс мартонк. Эдь се седейнежедьксэнтъ кисэ, конань

топавтоманзо Израилень раськесь умок учи, мон течи кандтнян неть тертнень».

<sup>21</sup>Паволонь кунсолыця еврейтне мерсть: «Миненек Иудеясто эзь пачколе тондеть кодаткак сёрмат, ды сеть ялгатне-оятнеяк, конат тей сакшность, тондеть мезеяк берянь эзь ёвтне.

<sup>22</sup>Ялатеке минек меленек кунсоломс тонь, кода тон арсят тень эйстэ. Минь те од тонавтомадонть содатано ансяк сень: сонзэ кувалт эрва косо молить пелькстамот-спорямот».

<sup>23</sup>Паволонь марто сынь аравтызь вастовома чинть. Се чистэнтъ Паволнэнь кудов сакшность седеяк ламо еврейть. Валскестэ чопода чокшнес Павол кортась мартост ды панжсь тенст Пазонь Инязоркчинть смустензэ. Моисеень Коенть ды пазмарицянтень сёрмадовксост лангс нежедезь, сон терявтнесь кемевтемс сынст Иисуснэнь.

<sup>24</sup>Веенстнэ кемсть сонзэ валтнэненъ, лиятне эзь кеме.

<sup>25</sup>Мельтне явовсть, ды сынь кармасть тукшномо. Сестэ Павол ёвтынзе меельце валонзо: «Пек парсте Иневанькс Оймеялтось ёвтась минек покштятненень-тетятненень Исайя пазмарицянтъ вельде:

<sup>26</sup> “Азё те раськентень ды мерть: Карматадо пилесэнк кунсолома, ды а чарькодъсынк, сельмесэнк ваномо, ды а несынк.

<sup>27</sup>Нетъ ломантне калгодкстомтызь седеест, пилесткак потомдызь, сельместкак конизь, секс: иляст нее сельмесэст, иляст маря пилесэст, иляст чарькоде седейсэст, иляст велявто Монень ды Мон илинь шумбралгавто сынст”.

<sup>28</sup>Ней содадо: Пазось кучизе идемадо Кулянтъ лия раськетненень, ды сынь марясызъгак!»

<sup>29</sup>Зярдэ Павол ёвтызе тень, еврейтне тусть, псистэ эсь ютковаст пелькстнезь-спорязь.

**30** Павол эрясь Римсэ мик кавто иеть эсензэ сиведезь кудосонть ды паро мельсэ вастнесь эрьванть, кие тензэ сакшныль.

**31** Сон апак пеле ды кодамояк пирявкстомо кортась Пазонь Инязорксчиденть ды тонавтсь ломантнень содамс Иисус Христос Азородонтъ видечинть.



## Яковонь Сёрмазо

### Иакова 1

<sup>1</sup>Яков, Пазонть ды Иисус Христос Азоронть важозо, кучи шумбракстнемат срадозь эриця кемгавтово буетненень.

#### Снартнемат-варчавтнемат ды кемема

<sup>2</sup>Кемиця ялган, ловодо ине кенярксокс эрьва кодамо снартнематнень-варчавтнематнень, конатнес тынь понгонетядо.

<sup>3</sup>Эдь тынь содатадо, зярдю тынк кемемась юты варчавтнематнень пачк, те чачты-касты эйсэнк цидярдома.

<sup>4</sup>Ды те цидяромась кадык прядсы эсь тевензэ: сестэ тынь карматадо улеме весеме ёндо вийс совазекс, апак кола ды кодамояк асатыкстэмекс.

<sup>5</sup>А бути киньгак тынк эйстэ а сатны превейчизэ, кадык веши сонзэ Пазонть пельде. Ды максозь ули тензэ, эдь Пазось весенень максы паро мельсэ, апак коря.

<sup>6</sup>Ансяк кадык веши кемезь ды допрок апак кавтолдо. Се, кие кавтолды, моли иневедень ведьвелявкс ёнов, конань вармась панси ды вырновтни эрьва ёнга.

<sup>7</sup>Истямо ломанесь кадык а арсияк мезеяк саемс Азоронть пельде,

<sup>8</sup>секс мекс сон кавтов явозь ойме ды аволь кеме весе эсь тевсэнзэ-валсонзо.

#### Сюпавт ды кажовт

<sup>9</sup>Кадык кажов кемиця ялгась шны прянзо, секс мекс Пазось сонзэ кепеди-касты.

<sup>10</sup>А вана сюпавось кадык шны прянзо сестэ, зярдю Пазось сонзэ алкинъгавты, секс мекс сон юты-ёми паксянь цеця ладсо.

<sup>11</sup>Лиси чизэ, пултасы псисэнтъ – ды пужи тикше недьксэсь, певерить сонзэ цецятне, ды кулы-ёми цецянтъ мазычизэ. Истя жо пужи-ёми сюпавоськак эсь эрямонь тевензэ лакамо шкастонть.

#### **Снартнематне-варчавтнематне ды сынст кирдемаст**

<sup>12</sup>Кодамо уцяскав ломанесь, кона цидярдозь канды снартнематнень-варчавтнематнень. Сенень, конанень сынъ кирдевить, максови изницянь каштазокс эрямо, конань Пазось алтызе Сонзэ вечкицятненень.

<sup>13</sup>Кадык кияк сетнеде, кинь лангс прастъ варчавтнематне, а корты: «Пазось монь снартни-варчавтни». Эдь зыянонтъ арась виезэ варчавтнемс Пазонтъ ды Пазось Сонськак киньгак а снартни-варчавтни.

<sup>14</sup>Эрвантъ снартни-варчавтни эсензэ зыянов мелень бажамось, кона уски-тарги ды мани сонзэ эсь мельганзо.

<sup>15</sup>Зярдо зыянов мелень бажамось пекии, сестэ сон чачты пежеть, а зярдо пежетесь касы-кемексты, сон канды кулома.

<sup>16</sup>Илядо ильведе-манчеве, монь вечкевикс кемиця ялгат.

<sup>17</sup>Эрва кудамо паро максовксось ды эрва кудамо асатыкстэме казнесь максовить верде, весе валдо тевень Тетянтъ пельде, кона зярдояк а полавтневи, ды Сонзэ валдось зярдояк а тееви чоподакс.

<sup>18</sup>Те Сон Эсь олянзо коряс чачтымизь минек видечинь валсонзо: улевлинек минь васенце таркасо Сонзэ теевкстнэнь ютксо.

#### **Уледе Пазонь валонь марицят ды топавтыцят**

<sup>19</sup>Истя, вечкевикс кемиця ялган: кадык эрва ломанесь капши кунсолOMO, ансяк кадык а капши кортамо ды а капши кежиявтнеме.

<sup>20</sup>Эдь кежень пачк ломанентень а тееви видестэ, Пазонтъ мелензэ коряс.

<sup>21</sup>Секскак, кадынк ве ёнов эрва кодамо аваньксэнтъ ды весе зыянонтъ. Сэтьместэ сайнк валонть, кона путозь-видезь седеезэнк ды конань ули виезэ идемс тынк ойменк.

<sup>22</sup>Уледе валонь топавтыцякс, аволь ансяк кунсолицякс – истят ломантне манчить эсь прят.

<sup>23</sup>Эдь кие кунсолы валонть ды а топавты сонзэ, се моли истямо ломань ёнов, кона ванкшны эсь чаманзо зеркалань пачк.

<sup>24</sup>Сон варшты эсь лангозонзо, туи ве ёнов ды сеске стувтсы, кодамо сон.

<sup>25</sup>Ансяк се, кие пштистэ ваны асатыкстэме коентъ лангс, кона олякстомты ломанентъ, ды седе товгак карми истя ваномо, ды кие аволь стувтыця кунсолиця, мекевланк, коентъ коряс теиця, сон карми улеме уцяскавкс эсь тевензэ теemaso.

<sup>26</sup>Бути кияк эйтэнк арси: сон видестэ важоди Пазонтень, ансяк а машты кирдеме эсь келензэ, сестэ сон манчи эсь прянзо ды Пазонтень сонзэ важдемазо чаво чалгамонь кондямо.

<sup>27</sup>Вана кодамо Пазонтъ, Тетянтъ, сельме икеле ванькс ды асатыкстэме Тензэ важдемась: бути лездат урозтнэненъ ды доватненень сынст стакачисэнтъ ды бути ванстат эсь прят те масторлангонть аваньксчинзэ эйтэ.

## **Иакова 2**

### **Ванодо ломантнень лангс вейкетъстэ**

<sup>1</sup>Кемиця ялган, тынь, кие кеми Иисус Христоснэнь, инексчинь минек Азоронтень, ванодо весе ломантнень лангс вейкетъстэ, киньгак башка апак яво.

<sup>2</sup>Невтевксэкс: тынк промксос сови ломань цивтёрдыця оршамосо, сурсонзо сырнень суркс, истя жо сы кажов ломань, таштомозь оршамосо.



<sup>3</sup>Тынь, нама, сеске несынк сень, кие цивтёрдыця оршамосо, ды мертядо: «Озак тезэнь, тесэ паро таркась», мекевланк, кажовонтень, мертядо: «Тон жо арак тозонь» эли «Озак масторов, монь пильгень ваксс».

<sup>4</sup>Арази теньсэ тынь уш эзиде тее авейкетьксчи эсенк ютксо? Арази эзиде карма улеме судиякс, конат судить аволь видестэ?

<sup>5</sup>Кунсолодоя, вечкевикс кемиця ялган! Арази Пазось эзинзе кочка масторлангонь кажовтнень? Сон сынст тейсынзе кемемасо сюпавокс ды совавтсынзе Эсь Инязорксчизэнзэ, конань Сон алтызе вечкицянзо туртов.

<sup>6</sup>Ансяк тынь кажовонтъ покордынк. Арази аволь сюпавтне лепштить тынк эйсэ? Арази аволь сынъ усксить-таргсить эйсэнк судга?

<sup>7</sup>Арази аволь сынъ покордыть-чалгсить се ине лементъ, кона ёвтазель тынк велькссэ.

<sup>8</sup>Бути тынь топавттадо Пазонь Инязорксчинь коентъ, кона кирдеви Пазонь пельде Сёрмадовкссонтъ: «Вечкть малавиксэть кода эсь прят», – сестэ тынь тейтядо парсте.

<sup>9</sup>А бути тынь вантадо ломань лангс авейкетъстэ, сестэ тынь тейтядо пежеть ды Коесь невттыдызь тынк сонзэ колсицякс.

<sup>10</sup>Эдь се, кие топавты весе Коентъ, ды ансяк мейсэ-бути вейкесэ теи пежеть, сон чумо весе Коентъ коламосо.

<sup>11</sup>Пазось, кие мерсь: «Иля ускуря», истя жо мерськак: «Иля маштне». Лисни истя: бути тон а ускурят, тонсь жо маштнят, сестэ ялатеке тон колсят Коентъ.

<sup>12</sup>Кортадо ды тееде истят ломантнень ладсо, конатнень кармить судямо олячинь максыця коентъ коряс.

<sup>13</sup>Эдь судось аволь седеймариця сетненень, кить а путыть лиянень седеймарямо, а вана седеймарямось изни судонтъ лангсо!

### Кемемась ды тевтне

<sup>14</sup>Кемиця ялган, кодамо лезэ тень эйстэ, бути ломанесь корты: сонзэ ули кемемазо, ансяк арасть тевензэ? Идеви а идеви сон те кемемантень?

<sup>15</sup>Бути кемиця братонтень эли сазоронтень а мейсэ оршамс ды а мезде ярсамс,

<sup>16</sup>кияк жо тынк эйстэ мери тенст: «Азёдо седейоймамо марто, эжнеде ды ярсудо!» – ансяк тынсь мезеяк а макстадо сынст рунгост туртов, сестэ кодамо лезэ ули тень эйстэ?

<sup>17</sup>Истя кемемаськак, бути сон ськамонзо, тевтеме, сестэ сон кулозь.

<sup>18</sup>Мекевланк, невтевксэкс, кияк мери: «Тонь ули кемемат, а вана монь тевень». Невтик монень тон эсь кемемат тевтеме, ды монгак тонеть невтьса кемемам эсь тевсэнъ!

<sup>19</sup>Тон кемат: Пазось – вейкине. Видестэ теят! Идемевстнеяк истя жо кемить ды сорныть-талныть.

<sup>20</sup>Истя содат а содат, тон, чавола ломань: тевтеме кемемась – кулозь.

<sup>21</sup>Арази минек ине покштянок Авраам ловозель чумовтомокс Пазонтъ икеле аволь тевензэ кисэ, зярдо путызе Исаконь, эсь цёранзо, аноксонь максома алтарентъ лангс?

<sup>22</sup>Тон неят: кемемась важдось вейсэ тевензэ марто ды тевтнень вельде кемемась теевсь алкуксокс.

<sup>23</sup>Истямо ладсо топавтовсть Пазонтъ пельде Сёрмадовксонь валтнэ: «Авраам кемезевсь Пазонтень, ды тень кисэ Пазось ловизе сонзэ чумовтомокс», ды сонензэ кармасть мереме “Пазонь ялга”.

<sup>24</sup>Нетядо, Пазось лови ломанентъ чумовтомокс тевензэ кисэ, аволь ансяк кемеманзо кисэ.

<sup>25</sup>Истя ульнесь Рахав усксевиця аванть мартояк. Сон ульнесь ловозь чумовтомокс тевензэ кисэ, зярдэ сон нолдынзе эсензэ кудос салава кевкстнициятнень-киведициятнень ды мейле сынст ливтинзе лия киява.

<sup>26</sup>Эдь кода рунгось оймевете кулозь, истя кемемаськак тевтеме кулозь.

## Иакова 3

### Онкстядо-кирдеде эсь келенк

<sup>1</sup>Кемиця ялган, кадык аволь ламот эйтэнк бажить улемс тонавтыцякс! Кода тынь содатадо: минек, тонавтыциятнень, учи седеяк покш судямо.

<sup>2</sup>Эдь минь весе ламосо пупордькшнетяно. Кие а пупордькшни кортамсто, се ломанесь уш теевсь асатыкстэмекс, ды сонзэ саты виезэ онкстямс весе эсензэ рунгонзояк.

<sup>3</sup>Бути минь онкстятанэ лишменть ды теньсэ сонзэ кармавттанэ минек кунсолосо, сестэ весе сонзэ рунгось миненек ветяви тов, ков эряви.

<sup>4</sup>Эли жо покш венчтне: кадык сынь истят покшт ды канднить-пансить эйсэст виев вармат, ялатеке сынь велявтовить пек вишине рульсэнтэ тов, ков ветиянтэ мелезэ.

<sup>5</sup>Истя келенть мартояк: сон рунгонь вишкине пелькс, а прянзо шны покш тевсэ. Вантая, кодамо вишкине сяткинесь ды кодамо покш вирь сон кирвазти!

<sup>6</sup>Ды келеськак истямо сяткине, прок зьянсо пештязь масторланго. Сон ашти минек рунгонь пелькстнэнь ютксо истямокс, кона теи аваньксэкс весе рунгонть ды кирвазти толсо минек весе эрямонь кинть ды сонсь кирвазтеви тоначинь толонтэ эйтэ.

<sup>7</sup>Ломанентень кармавтовить ды сон кармавтынзе кунсолосо эрва кодат идем ракшатнень, нармунтнень, ёзмолдыциятнень ды иневедень ракшатнень.

<sup>8</sup>А келесь жо кодамояк ломаннень а тееви кунсолицякс! Сон а кирдевица зыян, пештязь куловтыця ядсо!

<sup>9</sup>Кельсэнтъ минь шнатано-чанстянано Пазонтъ ды Тетянтъ, ды теке жо кельсэнтъ сюдотано ломантнень, конат теезь Пазонтъ чачонзо кондямокс.

<sup>10</sup>Теке жо кургстонть лисить шнамо ды сюдома. Кемиця ялган, истя илязо ульне!

<sup>11</sup>Чавкшны а чавкшны вейке лисьмапрясто ламбамо ды чапамо ведь?

<sup>12</sup>Кемиця ялган, кандокшны а кандокшны инжир чувтось ойумартъ эли винаумарькс – инжирт? Истя жо вейке лисьмапрясто а чудекшни салов ды ламбамо ведь.

#### Алкуксонь превейчи

<sup>13</sup>Кие тынк ютксо превей ды чарькодиця ломань? Кадык сон тень невтсы паро эрямосонзо ды тевсэнзэ, конатне теевить сэтместэ превейчи марто.

<sup>14</sup>А бути тынк седейсэнк ули сельмень раужо сявадома ды бажамо ансяк эсь мелень топавтомас, сестэ илядо шна прянк, илядо кенгеле видечинть лангс!

<sup>15</sup>Те аволь се превейчись, кона валги верде. Сон масторлангсто, идемевстнень пельде, аволь Пазонь Оймеялтонть пельде!

<sup>16</sup>Эдь косо ули сельмень сявадома ды бажамо ансяк эсь мелень топавтомас, тосо минень-сюнонь лув ды эрьва кодамо амазы тевть.

<sup>17</sup>А вана се превейчись, кона верде, васенцекс, ванькс, мейле ладямонь теиця, чевте седей, мелень ваныця, пештязь седеймарямосо ды паро тевсэ, ломанень вейкетькс ловиця ды сельмс кортыця.

<sup>18</sup>Ладямонь видьмесь, конань видитъ ладямонь теицятне, чачты-рашты видечи.

#### Иакова 4

### Максынк прянк Пазонть кедь алов

<sup>1</sup>Косто саевить тынк ютксо эртневематне ды сёвноматне? Арази аволь тынк визькс мелень вешематнестэ, конат азаргалезь лакить рунгосонк?

<sup>2</sup>Тынь покш мельсэ мезе-бути мельга правтадо, ансяк тынк те арась. Тынь маштнетядо ды, сельменк сявадстозь, мезес-бути пек бажатадо, ялатеке тыненк те а саеви. Тынь сёвнотадож, тюртядож, ансяк тынк ялатеке мезенккак арась, секс мекс тынь а вештядо.

<sup>3</sup>Бути мик вештядож, сестэж тенк мезеж а максови. Эдь тынь вештядо аволь паронь теемань кисэ, мекевланк, эсенк визьксэнь меленк витемань-петемань кисэ.

<sup>4</sup>Авидечисэ ломанть! Арази тынь а содатадо: бути тынь ялгат те масторлангонть марто, сестэ тынь мольтядо Пазонть каршо! Истямо ладсо: кинь мелезэ улемс ялгакс те масторлангонтень, се тееви ятокс Пазонтень.

<sup>5</sup>Эли тынь, паряк, арсетядо, Пазонть пельде Сёрмадовксошь стяко корты: «Сон седеень покш паломасо вечки-вешни ойменть, конань совавтызе эйзэнек».

<sup>6</sup>А вана чанстесь, конань Сон максы миненек, седеяк покш. Секскак Сёрмадовкссо кортави: «Пазось моли прянь верьга кандыцятненень каршо, сэтьметненень жо Сон максы чансть».

<sup>7</sup>Истя, максынк прянк Пазонть кедь алов! Стядо Сатананть каршо, ды сестэ сон оргоди тынк эйстэ.

<sup>8</sup>Малавгадодо Пазонтень, ды Сонгак малавгады тыненк! Шлинк кеденк, пежетень тейницят, ванськавтынк седеенк, кавтов явозь ойметь!

<sup>9</sup>Чаводо прянк, рангодо ды авардеде! Тынк пейдеманк теевезэ рангомакс ды кенярксонккак – ризксэкс.

<sup>10</sup>Вишкиньгавтынк-сэтьмелгавтынк прянк Азоронть икеле, ды Сон тынк кепедтядызь.

### Илядо судя лиянь

<sup>11</sup>Кемиця ялгат, илядо беряньстэ кортавто вейкенк-вейкенк. Кие кортавты малавиксэнзэ эли суди сонзэ, се кортавты Коенть ды суди Коенть. А бути тон судят Коенть, сестэ тон уш Коень судиця, аволь сонзэ топавтыця.

<sup>12</sup>Ули ансяк Коень вейкине максыця ды вейкине Судия, конань ули виезэ идемкак ды ёмавтомкак. Тон эно кият истямось, лиянь судицясь?

### Илядо шна прянк

<sup>13</sup>Ней кунсолодо тынь, конат кортыть: «Течи эли ванды сыргатано истямо-истямо ошов, ды эрятано тосо вейке ие, ды карматано микшнеме-рамсеме, ды покшолгавтомо-ламомлгавтомо уличинек».

<sup>14</sup>Ансяк тынь тунь а содатадо, мезе карми улеме ванды! Мезе истямо тынк эрямось? Тынь теке шожда качамне, конась сась вейке липкес ды сеске жо ёмась.

<sup>15</sup>Тень таркас тыненк эряволь кортамс: «Бути карми улеме Азоронтъ мелезэ ды ультяно эрицят, сестэ минь тейсынек тень ды тонань».

<sup>16</sup>Ней жо тынь шнатадо ды верьга кандтадо прянк. Эрьва кодамо истямо прянь шнамось ули зыянокс.

<sup>17</sup>Лисни, кие соды, мезе истямо паронь теемась, ансяк тень а теи, се сови пежетьс.

## Иакова 5

### Сюпавтне улить чумондозь

<sup>1</sup>Ней, вана, кунсолодо тынь, сюпавтне! Авардеде, лайшеде кажотнеде, конат кармить прамо лангозонк.

<sup>2</sup>Тынк сюпавчинк наксадсь, ды оршамопеленккак сэвинзе ки сукс.

<sup>3</sup>Тынк сырненк ды сиянк чемениясть. Те чеменесь ашти тынк каршо чумондыцякс ды сэвсы-нильсы тынк сывеленккак теке тол. Тынь таштыде-пурныде эстенк сюпавчи неть меельце читнестэ!

<sup>4</sup>Тынь жо эзинк пандо важодема питнень паксясонк нуицятненень, ды сын пижнить-рангить. Сюронк пурныцятненень пеняцямоост пачкодсть Весемькирди Азоронть пилес!

<sup>5</sup>Тынь эриде сюпавчисэ, витниде-петниде седеенк моданть лангсо. Тынь андынк-куялгавтынк эсь прянк теке печкема чинень.

<sup>6</sup>Тынь судинк ды маштынк чумовтомонть, сон тынк каршо эзь моле.

#### **Учодо цидярдозь Азоронь самонть**

<sup>7</sup>Истя, кемиця ялгат, уледе кувать цидярдыцякс Азоронть самонзо учомсто. Ванодоя, кодамо кирдема марто сокицясь-видицясь учи, зярс модась а максы питнейдеяк-питней суро ды а туйть сёксень ды тундонь пизементне.

<sup>8</sup>Тыньгак истя жо уледе кувать цидярдыцякс, кемекстынк эсь седеенк, эдь Азоронть самось маласо.

<sup>9</sup>Кемиця ялгат, илядо пеняця-музгорде вейкенк-вейкенк лангс – судязь тенк а улемга. Ванодо, судиясь уш ашти кенкш лангсо.

<sup>10</sup>Кемиця ялгат! Майсематнень кирдемань ды цидярдомань невтевоксэкс саинк пазмарицятненень, конат кортыльть Азоронть лемензэ пельде.

<sup>11</sup>Истя, уцяскавкс минь ловтано сетнень, конат печтизь-кирдизь весементь. Тынь мариде Иовонь цидярдомадонть ды содатадо седе, кодамо эрямонь пе Азорось макссь сонензэ. Эдь Азорось седеймариця ды чевте седей.

#### **Илядо божа-пежетькста**

<sup>12</sup>Васняк, кемиця ялган, илядо божа-пежетькста менеленть эйсаяк, моданть эйсаяк, эли кодамояк лия пежетькстамосаяк. Улезэ тынк валонк ансяк «эно», бути алкукс меленк ёвтамс «эно», эли ансяк «арась», бути алкукс меленк ёвтамс «арась» – сестэ тынь а понгтадо судямос.

### Озноманть виезэ

<sup>13</sup>Бути кияк тынк ютксто майси, кадык сестэ сон озны. Бути кие мельспаросо, се кадык моравты Пазонь шнамо морот.

<sup>14</sup>Бути кияк юткстонк сэреди, сестэ кадык тердьсызь кемикуронь прявтнэнь ды кадык сынъ озныть кисэнзэ ды Азоронть лемсэ ваднесызь сонзэ елейсэ.

<sup>15</sup>Кемема марто озномась идесы сэредицянтъ, ды Азорось стявтсы сонзэ пильге лангс. Бути сон тейсь пежеть, сестэ нетнеяк нолдавить-проставить тензэ.

<sup>16</sup>Секс ёвтадо-видькстадо вейкенк-вейкенк туртов эсь пежетенк эйстэ ды ознодо вейкенк-вейкенк кисэ. Сестэ тынь ультядо шумбралгавтозь. Ламо теи видечисэ ломанень виев озномась!

<sup>17</sup>Илия ульнесь истямо жо минек кондямо ломань. Сон пек ознось: илязо уле пиземе. Ды пиземесь моданть лангс эзь пракшно колмо иеть ды кото ковт.

<sup>18</sup>Сон таго ознось, ды менелесь макссь пиземе, ды модась чачтась-кастась урожай.

### Кадовозенть виде ки лангс путома

<sup>19</sup>Кемиця ялган! Бути кияк тынк эйстэ туи видечинь кистэнтъ ве ёнов, ды кияк велявтсы сонзэ мекев,

<sup>20</sup>сестэ содадо: се ломанесь, кона велявтсы пежетевентъ авиде ки лангстонть, идесы сонзэ оймензэ куломадо ды вельтясынзе ламо пежетензэ.



## Петрань Васенце Сёрмазо

### 1-е Петра 1

<sup>1</sup>Петра, Иисус Христосонь апостолось, кучи шумбрактнемат Пазонь кочкавтнэнень, конат те мирэнтъ-масторонтъ лангсо теке ве ёндонь ломанть ды сравтнезь эрить Понтонь, Галатиянь, Каппадокиянь, Асиянь ды Битиниянь ёнкстнэва.

<sup>2</sup>Тынк уш икелевгак Тетя Пазось Эсь арсеманзо-мелензэ коряс кочкидизь ды теидизь Оймеялтонть вельде Эсензэ иневанькс ломанекс. Истя тынь ней теевтядо Иисус Христосонь кунсолыцякс ды ванськавтозекс Сонзэ верьсэнтъ. Кадык яла седе ламолгадыть тынк туртов Пазонь чанстесь ды седейоймамось!

#### Эриця седейнежедькс

<sup>3</sup>Улезэ шназь-чанствязь Пазось, минек Иисус Христос Азоронтъ Тетязо! Сон вельмевтизе кулозьстэ Иисус Христосонь ды теньсэ, Эсь ине седеймарямонзо коряс, чачтымизь од эрямос ды макссь миненек свал эриця седейнежедькс.

<sup>4</sup>Секс минь учотано Пазонтъ пельде аёмиця, аколавиця, апужиця парочи. Те парочись кирдеви-ванстови менель лангсо тынк туртов.

<sup>5</sup>Тынк жо, кемеманк кисэ, ванстгадызь Пазонь виесь ды пачтятадызь идемас, кона анокстазь ды панжови шканть прядовома пестэ.

<sup>6</sup>Весе тенень тынь кенярдодо, куш ней тыненк акувать, паряк, сави кирдемс эрьва кодат ризксэнь кандыця стакачить.

<sup>7</sup>Мик сырнеськак снартневи-варчавтневи толсо. Истя жо неть стакачитне снартнить-варчавтнить тынк кемеманть алкуксчинзэ. Иисус Христосонь самсто тынк кемемась, кона ёмиця сырнеде питней, карми улеме тыненк шнамокс, инексчикс ды ловомакс.

<sup>8</sup>Кадык тынь Сонзэ эзинк неекшнеяк, ялатеке Сонзэ вечксынк. Нейгак Сон тыненк а неяви, ды ялатеке кемтядо Тензэ ды кенярдкшнотадо аёвтавомашка кецнемасо:

<sup>9</sup>тынь пачкодтядо кемеманк топавтомантень, ойменк идемантень.

<sup>10</sup>Те идеманть пек вешнеть ды домкасто тонавтнеть пазмарицятне, конат икелев ёвтакшность тыненк максовиця чанстенть эйтэ.

<sup>11</sup>Сынь бажасть чарькодемс, кодамо шкадо ды тевде-тувталдо кортась Христосонь Оймеялтось сынст вельде, зярдю икелев яволявтнесь Христосонь пиштематнеде-майсематнеде ды сынст мельга молиция Сонзэ инексчиденть.

<sup>12</sup>Ды сынест ульнесь панжозь: сын вожодсть тынк лангс, аволь эстет, зярдю кортасть неть тевтнеде. Текень жо ней тыненк ёвтнить сетне, кить пачтизь тенк Кенярксов кулянть менельстэ кучозь Иневанькс Оймеялтонть вийсэ. Неть тевтнень лангс ангелтнэяк паро мельсэ бажить ваномс.

#### Пазонтень алтазь эрямо

<sup>13</sup>Секскак, аравтынк-сыргозтынк меленк вожодемас ды свал уледе валдо превсэ. Нежедеде ансяк Пазонь се парочинть лангс, конась максови тенк Иисус Христосонь самсто.

<sup>14</sup>Уледе Пазонь кунсолыця эйкакшокс, илинк максо прянк визькс мелень вешематненень, конатнень ало эриде-аштиде икеле асодамочинк кувалт.

<sup>15</sup>Мекевланк, кодамо иневанькс тынк Тердицясь, тыньгак уледе истямо иневаньксэкс эсенк прянь ветямосо.

<sup>16</sup>Пазонь пельде Сёрмадовкссонтъ ёвтазь: «Мон иневаньксан, секс тыньгак иневанькст уледе».

<sup>17</sup>Ды бути тынь эсь озномасонк мертядо “Тетяй” Пазонтень, кона, киньгак лангс апак вано, суди эрванть сонзэ тевензэ коряс, сестэ тесэ, масторланга якамстонк-пакамстонк, свал эрядо Сонзэ ловозь ды мельдензэ пелезь.

<sup>18</sup>Тынь содатадо: стяконь чаво эрямостонть, конань кадызь тенк покштянк-тетянк, тынь идезь-рамазь олячис аволь питнень ёмавтыця сиядо эли сырнеде.

<sup>19</sup>Тынь идезь-рамазь Христосонь, асатыкстэме ды ванькс Вирезэнтъ, питнейдеяк питней верьсэнтъ.

<sup>20</sup>Сон кочказель мирэнтъ-масторонтъ теемадо икеле, ды ансяк ней, меельце шкастонть, тынк кисэ яволявтозель.

<sup>21</sup>Христос вельде тынь кемезевиде Пазонтень, кона Сонзэ вельмевтизе кулозьстэ ды макссь Тензэ инексчи. Секскак тынь ней кемтядо ды седейсэнк нежетядо Пазонтъ лангс.

<sup>22</sup>Ней тынь кунсолыцят Пазонь видечинтень ды теньсэ ванськавтынк ойменк Оймеялтонть вельде ды кармиде кемиця ялганк седейшкава вечкеме. Истя тейнеде седе товгак: свал вечкеде вейкенк-вейкенк ванькс седейсэ.

<sup>23</sup>Тынь жо чачиде одс аволь ёмиця видьместэ, а вана Пазонь аёмиця валстонть, кона эри ды карми эрямо-аштеме пингедэ пингес.

<sup>24</sup>Сёрмадовкссо ёвтазь: «Весе ломантне тикшень кондят, ды сынст ине мазычист паксясо цецянь кондымо. Тикшесь коськи ды цецяськак пужи.

<sup>25</sup>Ансяк Азоронтъ валось эри-ашти пингедэ пингес». Те валось – Кенярксов кулясь, кона тыненк пачтязь.

## 1-е Петра 2

### Христос – кемикуронтъ юр кевезэ

<sup>1</sup>Секскак кадынк ве ёнов эрьва кодамо зыянонтъ ды эрьва кодамо кенгелеманть-манчеманть, кавто чачосо улеманть, сельмень сявадоманть ды эрьва кодамо беряньстэ кортавтоманть.

<sup>2</sup>Пиже эйкакш ладсо бажадо ярсамс Пазонь валонь ванькс ловсодонтъ, конань вийсэ тынь кастадо ды пачкодтядо идемас.

<sup>3</sup>Сёрмадовкссо ёвтазь: «Тынь Азоронтъ паронзо уш неинк-варчинк».

<sup>4</sup>Садоя Сонензэ, эриця Кевентень, конань ёртызь ломантне, а вана Пазось кочкизе ды ловизе питнейкс.

<sup>5</sup>Тынськак, кода эриця кевть, тееведе оймеялтонь кудокс. Сестэ тынь ультядо Пазонтень важодиця попокс ды карматадо кандтнеме Тензэ оймеялтонь казнеть-анокст, конат тукшныть Сонзэ мельс Иисус Христосонь кисэ.

<sup>6</sup>Пазонь пельде Сёрмадовкссонть кортави: «Вант, Мон путса Сионс кочказь питней кевенть, ужонь-уголонь кирдиця юр кевенть. Ды Сонензэ кемицясь зярдояк а ули совавтозь визьксчамас».

<sup>7</sup>Питней Сон тыненк, кемицятненень, а вана сетненень, конат а кемить, «кевесь, конань ёртызь кудонь теицятне, теевсь ужонь-уголонь кирдиця юр кевекс» ды «пупордямо кевекс, кевпандокс, конань эйс сынь эшкевить».

<sup>8</sup>Сынь а кунсолыть Пазонь валонть, ды секскак пупордькшнить сонзэ эйс. Истямо уцяска Сон сыненст аравтськак.

<sup>9</sup>А вана тынь – Пазонь кочкавт бую, Инязоронтень важодиця попт, Пазонтень алтазь раське, ансяк Сонензэ явозь ломанть. Тынь аравтозтядо яволявтомс Сонзэ пародояк паро ине тевтнеде. Сон тынк тердидизь-ливтидизь чоподачистэ Эсензэ дивань-тамашань валдочинтень.

<sup>10</sup>Икеле тынь ульниде аволь Сонзэ ломанть, – ней жо Пазонь ломантядо. Икеле Сон тыненк эзь путне седеймарямо, – ней жо Сон тыненк максызе Эсь седеймарямонзо.

#### **Уледе Пазонь важокс**

<sup>11</sup>Вечкевикс ялгат, энялдан тенк, кода масторланга якицятненень-пакицятненень ды лия ёнксонь ломантненень: илинк максо прянк пежетев обуцянк мельтнень алов, конат тюрить тынк ойметнень каршо.

<sup>12</sup>Ветядо прянк пародояк парсте виде Пазонь асодыцятнень ютксо, куш сынь чумондыть эйсэнк кода зыянонь тейницянь. Сестэ сынь, тынк паро

тевенк лангс ванозь, кармить шнамо Пазонтъ се чистэнтъ, зярдо Сон сынст содавтсынзе.

<sup>13</sup>Истя, Азоронтъ кисэ максынк прянк масторлангонь весе прывтнэнь кедь алов: инязоронтень, весемеде покш прывтонть,

<sup>14</sup>ды истя жо ветицятнененьгак, конатнень Сон кучинзе чумонь пандомо зыянонь теицятненень ды шнамо паронь теицятнень.

<sup>15</sup>Пазонтъ мелезэ: паронь теезь тынь лоткавтсынк ачарькодиця ломантнень превтеме лабордомаст-лавгамост.

<sup>16</sup>Эрядо олячисэ, ансяк илязо уле те олячись берянь тевень кекшемакс, мекевланк, эрядо Пазонь важо ладсо.

<sup>17</sup>Весень ловодо, эсенк кемиця ялганк вечкеде, Пазонтъ мельдензэ пеледе, инязоронтъ-кесарентъ ловодо.

#### **Тееде Христос ладсо**

<sup>18</sup>Важот, максынк прянк эсь азоронк кедь алов, весемесэ ванодо мелест, аволь ансяк партнэнь ды чевте седейтнень, истя жо казямотнененьгак.

<sup>19</sup>Се тукшны мельс Пазонтень, зярдо кияк чумовтомо пиштезь кирди ризкст-мелявкст Пазонтъ мелензэ кунсолманть кисэ.

<sup>20</sup>Зярдо тынь кирдтядо чавома берянь тевень кисэ, сестэ мекс тынк шнамс? А вана бути тынь карматадо кирдеме майсемат паро тевенк кисэ, те тукшны мельс Пазонтень.

<sup>21</sup>Тенень тынь тердезьгак. Сонсь Христоскак пиштсь минек кисэ, ды теньсэ макссь тенек невтевкс: миньгак молевлинек Сонзэ мельга.

<sup>22</sup> «Сон кодамояк пежеть эзь тее, ды Сонзэ кургсто кияк кенгелема вал эзь марсе».

<sup>23</sup>Зярдо Сонзэ покордасть, Сон покордамо вал каршост эзь ёвта; зярдо пиштсь-майсесь, Сон сынст эзь тандавтне, а вана кемезь максызе прянзо Пазонтень, виде Судицятнень.

<sup>24</sup>Сон Сонсь кандынзе-кепединзе минек пежетенек Эсь рунгосонзо крёст лангс вана мекс: куловлинек минь пежетенть туртов ды эрявлинек видечинть туртов. Сонзэ рантнень-аржотнень вельде тынь шумбралгадовлиде.

<sup>25</sup>Зярдо-бути тынь ульниде теке кадовозь реветь, а вана ней велявтыде мекев эсенк Ваньщянтень, ойменк Ванстыщянтень.

## 1-е Петра 3

### Превспутомат мирдетненень-нитненень

<sup>1</sup>Истя жо тыньгак, нить, максынк прянк эсенк мирденк кедь алов. Ды сестэ сеть мирдетнеяк, конат, паряк, а кунсолыть Пазонь валонть, теевельть кемицякс прянь ветямонк кувалт. Валт уш тесэ а эрявить,

<sup>2</sup>зярдо сынь кармить нееме тынк ванькс эрямонк ды Пазонь мельде пелеманк.

<sup>3</sup>Тынк мазылгавтыцякс илязо уле ушо ёндо неявиксэсь: аволь прянь питней черькодавкстнэ, аволь сырнень понгавтнемкатне, аволь сельмс каятыця оршамотне.

<sup>4</sup>Тынк мазычись улезэ ануваргадыцякс-аёмицякс: те – алкуксонь седейёжонь ломанесь, чевте ды сэтьме обуцяно марто. Истямо мазычись пек питней Пазонть сельме икеле.

<sup>5</sup>Истямо ладсо мазылгавтнесть-наряжасть эсь пряст кезэрень шкане Пазонтень озныця нитнеяк, конат нежедсть Сонзэ лангс. Неть аватне ульнесть мирдест кунсолыцят.

<sup>6</sup>Истя тейнесь Сарраяк: сон ульнесь Авраамонь кунсолыця ды мериль тензэ “монь азором”. Бути тыньгак тейнетядо паро ды мездеяк а пельтядо ды а тандалетядо, – тыньгак карматадо улеме Саррань кондямокс.

<sup>7</sup>Истя жо тыньгак, мирдеть, ветядо эсь прянк нинк марто, кода эсенк коряс седе лавшо марто. Невтеде тензэ вечкема-ловома, эдь сонензэяк,

кода тыненк, максови казнекс Пазонть пельде пингеде пингень эрямо. Сестэ а ули кодамояк пирявкс тынк озноманк туртов.

### Паро тевень кисэ пиштемадо-майсемадо

<sup>8</sup>Меельце пелев, уледе весе ве мельсэ, лиянь домкасто чарькодицят, вейкенк-вейкенк вечкицят, седеймарицят, ялгакчинь ванстыцят, сэттьметь.

<sup>9</sup>Илядо пандо кежсэ кеж эли покордамосо – покордамо. Мекевланк, чанстядо-баславадо, содазь: Пазось тердидизьгак тынк истя тееме. Сестэ Сон тынккак чанстятадызь-баславатадызь.

<sup>10</sup>Сёрмадовкссоjak ёвтазь: «Кинь мелезэ вечкемс эрямонть ды неемс мельспаронь чить, се кирдезэ эсь келензэ апаро валдо ды кургонзо кенгелемадо.

<sup>11</sup>Сон туезэ ве ёнов зыяндоды теезэ паро, вешнезэ ладямо-оймамо ды бажазо тенень.

<sup>12</sup>Эдь Азоронь сельметне неить видечисэтнень ды пилензэ марить сынст озномаст. А вана зыянонь теицятнень эйстэ Азорось велявты Эсь чачонзо-чаманзо [– нардамс сынст моданть лангсто]».

<sup>13</sup>Бути тынь покш мельсэ тейтядо паро, сестэ киньгак а саты виезэ теемс тыненк зыян.

<sup>14</sup>Куш, паряк, савияк пиштемс тенк видечинть кисэ – ялатеке тынь уцяскавтадо. «Илядо пеле седе, мезде сын пелить, ды мезеяк тынк илязо тандавтне».

<sup>15</sup>Седейсэнк свал Пазонть ловодо Азорокс, ды уледе свал анокт максомс каршо вал сенень, кие веши пельденк панжомс тынк кемеманть ды седейнежедьксэнтъ смустензэ. Ансяк тень теде чевтестэ-сэттьместэ ды лиянть мелензэ ванозь.

<sup>16</sup>Кирдеде ваньксэкс эсь оймеежонк. Кадык совить визьксчамас эсь кенгелемаст кисэ тынк покордыцятне. Сын стяко чумондыть эйсэнк, куш тынь, кода Христос мельга молицят, прянк ветятадо парсте.

<sup>17</sup>Седе паро пиштемс-майсемс, бути тенень ули Пазонтъ мелезэ, паро тевень кисэ, аволь беряненъ кисэ.

<sup>18</sup>Эдь Христос Сонськак – вестъ ды весе шкатнень кисэ – пиштсь минек пежетенек кисэ: Видечисэсь – авидечисэтнень кисэ, минек Пазонтень ветямга. Ульнесь куловтозь Сонзэ рунгозо ды вельмевтезь эрямос оймеялтозо,

<sup>19</sup>конань вельде Христос тусь ды пачтясь куля оймеялтнэнень, конат пекстазельть чоподас.

<sup>20</sup>Сынь кезэрень пингене эзизь кунсолокшно Пазонтъ, куш Сон цидярдозь учось Эстензэ велявтомаст весе се шканть перть, зярс Ной тейсь иневенчентъ. Ансяк аламотне, весемезэ кавксо ломанть, идевсть иневенчсэнтъ ведентъ вельде.

<sup>21</sup>Те ведесь невти лемдеманть-нававтоманть, конась ней иди тынккак. Нававтомась – Пазонтъ кедьстэ ванькс оймеёжонь вешема, аволь рунгонь карготьксчинь шлямо. Нававтомась идетьядызь тынк Иисус Христосонь кулозьстэ вельмеманть вельде.

<sup>22</sup>Христос ней кепететсь менельс ды ашти Пазонтъ вить кедензэ ёно. Ды Сонзэ икеле сюконить ангелтнэ, азоркчитне ды вийтне.

## 1-е Петра 4

### Паз марто од эрямо

<sup>1</sup>Истя вана: кода Христос пиштсь-майсесь минек кисэ рунгосонзо, тыньгак кемекставодо теке арсемасонтъ. Кие майси рунгосонзо, се лотки пежетень тейнемадо.

<sup>2</sup>Секскак ней уш эринк мода лангсо кадовозь тенк шканть Пазонтъ мелензэ коряс, аволь ломанень визькс мельтнень мельга молезь.

<sup>3</sup>Уш сатышка шка тынь эриде Пазонь асодыця ломантнень ладсо. Тынь макснинк прянк эрва кодамо аваньксчис, визьксэнь мельтнес, [цёра цёра марто удсемас, ракша марто эрямос, апаро тевс,] винадо



иредемазонк симемас, промкссо идемгалезь визьксэв велямос-чарамос  
ды минень-сюнонь тандавкснэнь седеень кельмевтиця сюконямос.

<sup>4</sup>Секс сынъ ней дивсить сень лангс, мекс тынь сынст марто вейсэ а  
чийтядо теке жо визьксчис прамо-ёмамо чадынтень, ды амазы валсо  
сёвныть-пазить эйсэнк.

<sup>5</sup>Ансяк сыненст ялатеке сави кирдемс каршо вал Азоронть икеле, кие  
курок карми судямо эрицятненьгак, кулозтненьгак.

<sup>6</sup>Кенярксов кулясь пачтязель кулозтнененьгак тень кисэ: эрявольть  
сынъ Пазонть ладсо пингеде пингес эсь оймесэст, куш сынъгак  
судязельть рунгонь куломас лия ломантнень ладсо.

#### **Пазонь казнетнень нолдадо тевс!**

<sup>7</sup>Курок весементень сы пе. Секскак уледе ванькс мельсэ ды валдо  
превсэ, ды истя ультядо анокт озномантень.

<sup>8</sup>Васняк, седейшкава вечкеде вейкенк-вейкенк, эдь вечкемась вельти-  
нарды пек ламо пежетть.

<sup>9</sup>Апак музгорде, седейшкава келейстэ панжинк кенкшенк вейкенк-  
вейкенк туртов.

<sup>10</sup>Кадык эрьвась эйстэнк важоди вейкенк-вейкенк туртов се казнить  
коряс, конань максызе тензэ Пазось. Сестэ тынь ультядо Пазонь эрьва  
ладсо невтевиця чанстенть тевс нолдыця паро важокс.

<sup>11</sup>Кие корты, се кадык корты, кода кортыть Пазонь валтнэ. Кие лезды-  
важоди, се кадык лезды-важоди се вийсэнтъ, конань максы тензэ  
Пазось. Истямо ладсо весе тень эйсэ шнави Пазось Иисус Христос  
вельде, конанень улезэ инексчи ды азорксчи пингеде пингес! Аминь.

#### **Кенярдодо пиштематненень-майсематненень**

<sup>12</sup>Вечкевикс ялгат, илядо дивсе теке пси толсо тынк варчавтнемантень;  
теньсэ мезеяк истямо а эрсиця арась.

<sup>13</sup>Мекевланк, кенярджшнодо, зярдо тынь явтадо Христос марто вейсэ Сонзэ пиштематнень. Кода панжови Сонзэ инексчизэ, сестэ седеяк пек карматадо кенярдозь кенярдомо.

<sup>14</sup>Бути тынк сёвныть-пазить Христосонь кисэ, сестэ тынь уцяскавт, секс мекс Иневалдонь Оймеялтось, лиякс, Пазонь Оймеялтось, эри-ашти тынк эйсэ. Сетне Сонзэ сёвныть-пазить, а вана тынь Сонзэ шнатадо-инелгавтадо.

<sup>15</sup>Ансяк кияк эйстэнк илязо пиште ды чумондово кода чавныця-маштница, салыця эли зыянонь теиця, эли лия ломанень тевс эциця.

<sup>16</sup>Вана кияк майсиндеряй христианокс улеманть кисэ, сестэ кадык тень кисэ а визделгали, ды кадык шнасы Пазонтъ истямо уцясканть кисэ, конань сон кандтни.

<sup>17</sup>Сась судонь шкась, ды васенцекс судявить Пазонь ломантне. Ды бути судось ушодови минек эйстэ, сестэ кодамо уцяска учи сетнень, конат а кемить Пазонь пельде Кенярксов кулянтень!

<sup>18</sup> «Бути стака идевемс видечисэ ломанентень, сестэ мезе карми уleme Пазнэнь акемиця пежетевенть марто?»

<sup>19</sup>Вана мекс сеть, кить пиштить-майсить Пазонтъ мелензэ коряс, кадык макссызь эсь оймест кемевикс Теицянтень-Кирдицянтень ды кадык седе товгак тейнить паро тевть.

## 1-е Петра 5

### Пазонь кемикурось ды сонзэ ветицянзо-ваныцянзо

<sup>1</sup>Мон монськак ветицян-ваныцян ды Христосонь майсематнень-пиштематнень неицян-содыцян ды курок панжовиця инексчинзэ явицян. Секс мон ней кемикуронь ветицянтень-ваныцянтень икеле знялдан:

<sup>2</sup>ванодо Пазонь стаданть, конань Сон кадызе тынк лангс. Мельганзо ванодо паро мельсэ, кода вечкеви Пазонтень, аволь секс, мекс истя

тыненк кармавтозь. Тееде те тевенть седейшкава, мелень путозь, аволь ярмакс правтомань кисэ.

<sup>3</sup>Илядо уле кежей азорокс Пазонтъ кедь ало улицянтъ лангсо. Мекевланк, уледе паро невтемакс стадантень.

<sup>4</sup>Зярдс сы весемеде Покш Ваньцясь, сестэ Сон тыненк максы инексчинь апужиця каштаз.

<sup>5</sup>Тынь жо, одтнэ, максынк прянк кемикуронь прывтнэнь кедь алов. Ды весе тынь сэтместэ максынк прянк вейкенк-вейкенк кедь алов, кинь икелеяк апак покшкавтне. Сёрмадовкссоаяк истя ёвтазь: «Пазось моли прянь верьга кандыцятнень каршо, сэтметненень жо Сон максы чансть».

<sup>6</sup>Истя вана, сэтместэ максынк прянк Пазонтъ виевдеяк виев кедензэ алов, ды аравтозь шкасто Сон тынк кепедтядызь.

<sup>7</sup>Весе эсь ризксэнк ды мелявксонк путынк-каинк Сонзэ лангс, эдь Сон мелявты тынк кисэ.

<sup>8</sup>Уледе валдо превсэ, свал ванодо: тынк душманось, Идемевсесь, яки-азгонди пертьпельга ирныця лев ладсо ды вешни, кинь тензэ нилемс.

<sup>9</sup>Аштеде каршонзо а синдевикс кемемасонк. Нама, тынь содатадо: истят жо майсемат савкшныть печтямс-кирдемс тынк кемиця ялгатнененьгак весе масторонтъ лангсо.

<sup>10</sup>Ялатеке тыненк майсемс-пиштемс сави аволь кувать. Пазось, эрва кодамо чанстень лисьмапрясь, тердимизь минек явомс Христос Иисус марто вейсэндямонк вельде Эсензэ пингеде пингень инексчинть. Сон Сонсь тынк кадык пурнатадызь-сэрнятадызь ды кемекстатадызь, кадык виевгавттадызь ды тейтядызь цидярдыцякс.

<sup>11</sup>Сонензэ улезэ инексчи ды азорксчи пингеде пингес! Аминь.

### **Меельце паро арсемат**

<sup>12</sup>Силуанонь кедьстэ, конань мон лован кемевикс кемиця ялгакс, мон нурькинетэ сёрмадстыя тенк те сёрманть. Арсян кепедемс меленк ды

кемевтемс тынк: мезде ёвтазь те сёрмасонть, – те Пазонь алкуксонь чансть. Кеместэ тынь аштеде-кирдеведе эйсэнзэ!

<sup>13</sup>Шумбрат-парт кучить тенк Пазонь кочкавт тынк кондямо кемикурось Вавилонсо ды Марк, кона монень теевсь цёрань кондямокс.

<sup>14</sup>Шумбракстнеде вейкенк-вейкенк марто вечкемань паламосо. Седейоймамо весенень тыненк, кить вейсэндявсть Христос Иисус марто! Аминь.



## Петрань Омбоце Сёрмазо

### 2-е Петра 1

<sup>1</sup>Симон-Петра, Иисус Христосонь важось ды апостолось, кучи шумбракстнемат сетненень, конатненень, кода миненеккак, максозь питнейде питней кемемась – минек Пазонтъ ды Идицянтъ Иисус Христосонь весенень паро мелензэ коряс.

<sup>2</sup>Кадык яла ламолгадыть тынк чанстесь ды седейоймамось Пазонтъ ды минек Иисус Азоронтъ содамо-чарькодемаст вельде.

#### Пазонь тердевтне ды кочкавтнэ

<sup>3</sup>Иисус эйсэ Пазонь виесь казизе миненек весе сень, мезе эряви Пазонтъ мелензэ коряс эрямонтень. Эдь минь чарькодинек Сонзэ, кие минек тердимизь Эсь инекчисэнзэ ды вадрячисэнзэ.

<sup>4</sup>Истя Сон казсь миненек ине ды питнейдеяк питней алтамот. Сынст вельде тынь олякстомтсынк прянк се прамонтъ-ёмамонтъ эйстэ ды апаро мельтнень эйстэ, конат азоркчисэ масторлангсонть, ды вейсэндявтадо Пазонь обуцянтень.

<sup>5</sup>Секскак весе вийсэнк бажадо невтемс эсенк кемемасонк паронь теема, паронь теемасонть жо невтеде содамочи.

<sup>6</sup>Содамочисэнтъ невтеде парсте прянь кирдема, прянь кирдемасонть – цидярдома, цидярдомасонть – Пазонтень максозь эрямо.

<sup>7</sup>Пазонтень максозь эрямосонть невтеде кемиця ялгатненень вечкема, кемиця ялгань вечкемасонть – седейшкавань вечкема.

<sup>8</sup>Бути те весе тынк эйсэ ули ды ламолгали, сестэ тынь аволь стяко содасынк минек Иисус Христос Азоронтъ, ды эрямонк а ули лезэвтемекс.

<sup>9</sup>Кинь эйсэ весе те арась, се сокор, васов а неиця. Сон стувтызе: зярдобути ванськавтозель икелень пежетензэ эйстэ.

<sup>10</sup>Секс, кемиця ялган, яла седе пек бажадо теемс кемекс Пазонь пельде тердеманк ды кочкамонк. Бути тынь карматадо тееме истя, сестэ зярдояк а пупордытадо.

<sup>11</sup>Истя тынк туртов келейстэ панжови совамо кенкшесь минек Азоронть ды Иисус Христос Идицянтъ пингедэ пингень Инязорксчинтень.

#### **Петра сыргозти паро мельть**

<sup>12</sup>Тень кисэ монь мелем зярдояк а лоткамс ледстнемедэ мелезэнк неть тевтнень, куш тынь содасынккак сынст ды кеместэ аштетьядо те виде тонавтомасонть, кона тыненк пачтязь.

<sup>13</sup>Мон лован видекс-эрявиксэкс сыргозтнемс тынк истямо мельс ледстнематнесэ, зярс эрян масторлангсо эсень рунгонь кудынесэнтъ.

<sup>14</sup>Содан: курок сави кадомс эсень те кудыненъ, кода теде монень ёвтась минек Иисус Христос Азорось.

<sup>15</sup>Секс мон бажан тееме весементъ, мезе монь вийсэ: кадык тынь монь туемадо мейлеяк кирдьсынк весе тень мельсэнк.

#### **Христосонь инексчинзэ неицятне**

<sup>16</sup>Эдь минь эзинек моле ёжовсто поназь-кодазь ёвкстнэнь мельга, зярдэ пачтинек тенк куля минек Иисус Христос Азоронть вийдензэ ды самодонзо. Мекевланк, минь эсь сельмсэнек неинек Сонзэ инексчинзэ.

<sup>17</sup>Эдь шнамось ды инексчись Сонензэ максозельть Тетя Пазонть пельде, зярдэ сехте покш Инексчинть пельде каятотсь Тензэ вайгелесь: «Те Монь вечкевикс Цёрам, Сон Монь седейкенярксом».

<sup>18</sup>Те вайгелентъ, кона каятотсь менельстэ, минь минсь маринек, зярдэ ульнинек мартонзо Пазонь пандонть лангсо.

<sup>19</sup>Те весе теи минек туртов седеяк кемевиксэкс пазмарицятнень ёвтавт кулянтъ. Ды тынь видестэ тейтядо, зярдэ кирдтядо те кулянтъ кода валдо, кона сияжды чоподасо, зярс а сы те валдо Чись ды Валскень зоря тештесъ а карми сияждомо тынк седейсэ.

<sup>20</sup>Васняк, мельсэнк кирдеде сень: пазмарицянь вейкеяк вал Пазонь пельде Сёрмадовкссонтъ а панжови ломанентень эсь превсэнзэ.

<sup>21</sup>Эдь зярдояк пазмарицянь валтнэ эзть ульне ёвтазь ломанень мелень коряс. Сынст ёвтнестъ Пазонь иневанькс ломанть, конатнень ветясь Иневанькс Оймеялтось.

## 2-е Петра 2

### Кенгелиця тонавтыцят

<sup>1</sup>Кода Израилень ломантнень ютксо ульнестъ кенгелиця пазмарицят, истя тынк ютксоjak кармить уleme кенгелиця тонавтыцят. Сынъ салава совавтыть кемикурос ёмавтыця-манчиця тонавтомат ды мик ёртыть-кадыть эсест Христос Кирдицянтъ, кона идинзе-раминзе олячис. Теньсэ сынсь таргить эсест лангс куроконь ёмамо.

<sup>2</sup>Ды ламот кармить молеме сынст визьксэнь эрямост мельга, ды лиятнеяк сынст кувалт кармить сядомо-покордамо видечинь кинть.

<sup>3</sup>Нетъ апештевикс ломантне кармить тынк лангсо прят сьупалгавтомо эсест понавт-кодавт манчемань ёвтнемасост. Ансяк Пазонь судось сынст туртов умок анокстазь, сон шканть а таргасы, ды сынст ёмамоськак уш а кирдеви.

<sup>4</sup>Эдь Пазось эзинзе жаля пежетъс празь ангелтнэньгак, конатнень Сон ёртынзе тоначинь чопода отьмас, косо сынъ тертязь учить судонь чинть.

<sup>5</sup>Сон эзизе жаля мик кезэрень масторлангонтькак. Сонзэ нулгодьксэв ломанензэ лангс Сон кучсь инечады. Теке марто Сон ванстызе ансяк Ноень, видечинь пачтицянтъ, ды сисем лиятнень.

<sup>6</sup>Пазось судинзе ёмамос Содом ды Гоморра оштнэнь, толсо пултынзе сынст куловокс. Истя Сон невтизе сыця шкань нулгодькс тевень теицятненень: сынст мартояк карми уleme истя жо.

<sup>7</sup>А вана Сон идизе видечинь коряс эриця Лотонь, кона вельть сизесь койтеме ломантнень визькс мелень топавтомадост.

<sup>8</sup>Нетъ ломантнень ютксо эрямсто те паро ломанесь несъ ды марясь эрва чистэ сынст апаро тевдест. Секс сонзэ виде оймесь пиштсь ды сэредсь.

<sup>9</sup>Истямо ладсо, Азорось соды, кода идемс видечинь коряс эрицятнень варчавтнематнень эйстэ, ды кода судонь чинть самс апаро ломантнень кирдемс чумост пандоманзо туртов.

<sup>10</sup>Азорось пек кежей сетнень лангс, конатне топавтыть эсест рунгонь визькс мелест ды мезекскак а ловить Пазонть азорксчинзэ.

#### **Кенгелиця тонавтыцятнень пежетест**

**Нетъ** кенгели тонавтыцятне визькстэметь-акирдевицят, эсь мелест топавтыцят ды а виздить-а пелить сялдомс-амбамс мик менелень вийтненьгак,

<sup>11</sup>куш натой ангелтнэяк, конат сындест кеметь ды виевть, а сялдыть-амбить эйсэст Азоронть икеле.

<sup>12</sup>Нетъ ломантне сёвныть-покордыть сень, мезенть а чарькодить. Сынъ молитъ превтеме ракша ёнов, конат эрить эсь чачома обуцяст коряс ды чачозь тень кисэ: улемс кундазь ды чавозь. Идем ракшатнень ладсо сынъгак улить маштнезь-чавнозь.

<sup>13</sup>Весе чумонть кисэ, конань сынъ тейсть лиятненень, максови тенст чумонь пандома. Сынъ витнить-петнить седеест, зярдю чинь куншкане тейнить минень-сюнонь ярсамкат-симнемкат ды пряст лангсо стякшномкат. Сынъ нулгодькст ды визьксчамат, ды сыненст мельспаро, зярдю мартонк вейсэ ярсамсто-симемстэ манчить эйсэнк.

<sup>14</sup>Авань неемстэ сынст сельмест палыть визьксэнь мельсэ, ды зярдюяк сынъ а пештевить пежеттенть. Сынъ манчить-кундсить аволь кеме ойметнень. Сынст седеест тонадсть эрва мезе мельга правтомас. Сынъ сюдозь ломанть!



<sup>15</sup>Сынь пурдасть виде кинть лангсто ды кадовсть-тапавсть. Сынь тусть Валаамонь, Босоронь цёранзо, киява: сонензэ вечкевсь манчемань кисэ питнень саемась.

<sup>16</sup>Пазось жо пежетензэ кисэ сонзэ ливтизе лангс. Осёлозо, кортамо а маштыця ракшась, кортазевсь ломанень вайгельсэ ды лоткавтызе пазмарицянтъ превтеме тевензэ.

### **Кенгелиця тонавтыцятне судязь**

<sup>17</sup>Нетъ ломантне теке ведтеме лисьмапрат, сумборя сувонь пельть, конатне пансевить виев вармасо. Сыненст анокстазь пингедэ пингень тунь чопода отьма.

<sup>18</sup>Эдь сынь каштангалить стяко прянь шнамосо, сынь таргить-кундсить рунгонь визькс ды аванькс мелест топавтомас сетнень, кить ансяк кармасть явомо манчемасо эрицятнень эйстэ.

<sup>19</sup>Нетъ кенгели тонавтыцятне алтыть тенст олячи, куш сынсь – прамос-ёмамос ветия эрямокоень уреть. Эдь ломанесь сенень уре, мезесь сонзэ изнизе.

<sup>20</sup>Минек Иисус Христос Азоронть ды Идицянтъ содамонзо-чарькодеманзо кувалт нетъ ломантне туевкшнесь олячис те масторлангонть аваньксчинзэ эйстэ. Бути сынь мейле таго тапавсть теке аваньксчинтень ды ваясть эйзэнзэ, сестэ сынст эрямоост кармась улеме седеяк берянь икеленсентъ коряс.

<sup>21</sup>Сыненст седе паро улевель допрок а чарькодемс видечинь кинть. Ней сынст седеяк берянь чарькодемс сонзэ ды ялатеке велявтомс иневанькс кармавтовксонтъ эйстэ, кона сынст максозель.

<sup>22</sup>Сынст марто алкукс теевсь се, мезе ёвтазь нетъ валмеревкстнэсэ: «Кискась сы мекев эсь уксовксонзо лангс» ды «Шлязь тувось таго моли экшелямо рудазс».

## **2-е Петра 3**

## Христос курок сы

<sup>1</sup>Вечкевикс ялган, те уш омбоце сёрма сёрмадан тенк. Мон бажинь неть ледстямотнесэ сыргозтемс тынк превс ванькс мельть-арсемат:

<sup>2</sup>Кирдинк мельсэнк Пазонь кучовт пазмарицятнень икелев ёвтавт валтнэнь ды минек Азоронть ды Идицянтъ кармавтовоксонть, кона тенк максозь тынк апостолтнэнь вельде.

<sup>3</sup>Васняк содадо: меельце читнестэ сыть мусколиця сёвныцят-нарьгицят, конат кармить пряст ветямо эсь визьксэнь мелест коряс.

<sup>4</sup>Сынь згилязь кармить кортамо: «Косо эно Христосонь самось, кона алтазель? Минек покштятне-тетятне уш кулсесть, ды ялатеке мезеяк эзь полавтово. Весе юты истя жо, кода мольсь масторлангонть теема шкастонть саезь!»

<sup>5</sup>Сынь содазь стувтнить вана мезде: кезэрень пингене Пазонь валонть коряс теезельть менелесь ды масторось веденть эйстэ ды веденть вельде.

<sup>6</sup>Истя жо неть вийтнесэ калавтозель кезэрень масторлангось, кона ульнесь ваявтозь чады ведьсэ.

<sup>7</sup>А вана неень менелесь ды масторось ванстовить теке жо валонть коряс – толсо ёмавтоманть туртов. Те тееви судонь чистэнтъ, зярдо улить судязь-ёмавтозь весе, кить а кемить Пазонтень.

<sup>8</sup>Ансяк тынь, вечкевикс ялган, илинк стувтне вейкентъ: Азоронть туртов вейке чись, кода тёжа иеть ды тёжа иетне, кода вейке чи.

<sup>9</sup>Азорось а таргси Эсь алтамонзо топавтома шканть, кода ловить конат-конат. Мекевланк, Сон теньсэ невти миненек Эсь куватень кирдеманзо, секс мекс Сонзэ арась мелезэ ёмавтомс киньгак. Сон покш мельсэ учи-эрви, зярдо весе велявтыть пежетнеде.

<sup>10</sup>Ансяк ялатеке Азоронть чись сы апак учо, салыця ладсо веть. Те чистэнтъ менелесь зэрнезь-увнозь ёми, менелень валдомтыцятнеяк

псиденть солыть ды каладыть, масторлангоськак ды весемесь, мезе сонзэ лангсо, палы.

<sup>11</sup>Бути те весемесь истямо ладсо калавтови, сестэ арседе, кодамокс тыненк эряви улемс. Тыненк эряви эрямс иневанькс эрямосо ды весемесэ теэмс Пазонть мелензэ коряс,

<sup>12</sup>Зярдэ пек покш мельсэ учотадо ды малавгавтадо Пазонь чинть самонзо. Те чинть кисэ палы-калады менелесь, менелень валдомтыцятнеяк солыть толонь псиденть.

<sup>13</sup>А вана Пазонь алтамонзо коряс минь учотано од менель ды од мода, конатнень лангсо эри видечи.

<sup>14</sup>Секс, вечкевикс ялган, тень учозь тееде весе, мезе тынк вийсэ: стявлиде Пазонть сельмензэ икелев асатыкстэмекс-ваньксэкс, челькевтемекс, Сонзэ марто ладязекс.

<sup>15</sup>Ды ловодо минек Азоронть куватень кирдеманть эсенк идемакс. Истя жо, Пазонь максовт превейчинть вельде, тыненк сёрмадсь минек вечкевикс кемиця ялгась Паволгак.

<sup>16</sup>Текень эйстэ сон корты весе эсь сёрматнесэ, конатнесэ ёвтни неть тевтнеде. Неть сёрматнесэ, нама, улить истяткак таркат, конатнень стака чарькодемс ды конатнень чоподасотне ды аволь кеме ойметне колыть-тапить. Истямо ладсо сынь колсиль лия Сёрмадовкстнэньгак, ды теньсэ таргить эсест лангс кулома-ёмамо.

<sup>17</sup>А вана тынь, вечкевикс ялгат, тень эйстэ содатадо уш икелев. Секскак вансто до прянк: аволидизь пурдавто тынк ки лангсто койтеметнень ильведевксэст, ды аволиде пра эсь кеме юронк лангсто.

<sup>18</sup>Касодо-кемекстадо минек Иисус Христос Азоронть ды Идицянтъ чанстензэ ды содамонзо-чарькодемманзо эйсэ. Сонензэ улезэ инексчи ней ды пингеде пингес! Аминь.

## Иоаннонь Васенце Сёрмазо

### 1-е Иоанна 1

<sup>1</sup>Седе, мезе ульнесь ушодксстонть саезь, мезе минь маринек ды неинек эсенек сельмесэ, мезе мельга минь ванкшнынек ды мезес токшесть кедьёжонок – Эрямонь раштыця Валонть эйстэ минь ёвтнетяно.

<sup>2</sup>Те эрямость панжовсь, ды минь сонзэ неинек. Ды секскак кортатано кода неицят-содыцят ды пачтятано тыненк те пингедэ пингень эрямодонть, кона ульнесь Тетянтэ марто ды панжовсь минек туртов.

<sup>3</sup>Сень, мезе минь неинек ды маринек, пачтятано ней тыненк. Ды истя тыньгак ультядо вейсэндязь минек марто. Минь вейсэндязь Тетянтэ ды Сонзэ Иисус Христос Цёранзо марто.

<sup>4</sup>Ды секскак теде сёрмадтано тыненк: эсенк кенярксонть пештямонь-топавтомань кисэ.

### Пазось – те валдо

<sup>5</sup>Ды вана кодамо те кулясь, конань минь маринек Сонзэ пельде ды пачтятано тыненк: Пазось – те валдо, ды Сонзэ эйсэ арась кодамояк чопода.

<sup>6</sup>Бути мертяно: «Минь вейсэндязь Пазонть марто», – ансяк теке шкане яла эрятано чоподасонть, сестэ минь кенгелетяно ды а эрятано видечинть коряс.

<sup>7</sup>Ансяк бути минь эрятано валдосонть, кода Сонсь Пазось – валдосо, сестэ минь вейсэндязь вейкенек-вейкенек марто, ды Иисус Христосонь, Пазонь Цёранть, вересь ванськавты минек эрва кодамо пежетте.

<sup>8</sup>Бути мертяно: «Миньсэнек арась пежетень видьме», – сестэ манчетяно эсь прянок, ды видечи миньсэнек арась.

<sup>9</sup>Ансяк бути видькстатано Пазонть икеле эсенек пежетнеде, сестэ Пазось нолдасынзе минек пежетнень ды ванськавтсамизь эрва кодамо авиде тевде, эдь Сон свал кемевикс ды теи видечинть коряс.

<sup>10</sup>Бути мертяно: «Минь эзинек совсе пежетьс», – сестэ минь тейтяно кенгелицякс Пазонть, ды Сонзэ валозо минек эйсэ арась.

## 1-е Иоанна 2

### Христос – минек кисэ валонь каиця

<sup>1</sup>Тиринь тякинеть! Мон тень сёрмадан тыненк пежетьс а совамонк кисэ. Бути кие ялатеке сови пежетьс, минек Тетянтъ икеле ули кисэнек валонь каиця – Иисус Христос, кона теи видечинть коряс.

<sup>2</sup>Сон минек пежетнень нолдыцясь ды аволь ансяк минектнень – весе масторлангонь пежетнень нолдыцясь.

<sup>3</sup>Бути минь эрятано Пазонь кармавтокстнэнь коряс, те алкуксккак невти миненек: минь парсте содасынек Пазонть.

<sup>4</sup>Кие корты: «Мон парсте содаса Пазонть», – ансяк сонсь ялатеке а эри Сонзэ кармавтокстнэнь коряс, се кенгелиця, ды видечи эйсэнзэ арась.

<sup>5</sup>Кие эри Сонзэ валонть коряс, сень эйсэ Пазонь вечкемась алкуксокс топавтовсь. Тень кувалт алкуксокс содави миненек: минь Пазонть эйсэ.

<sup>6</sup>Кие корты: «Мон эрян-аштян Пазонть эйсэ», – эрязо истя, кода эрясь Христос.

<sup>7</sup>Вечкевикс ялган! Сёрмадан тенк аволь од кармавтоккс, мекевланк, ташто кармавтоккс, конань тынь содасынк ушодксстонь саезь. Те ташто кармавтокксось – куля, конань тынь маринк ушодксстонть саезь.

<sup>8</sup>Ды ялатеке сёрмадан тенк од кармавтоккс, ды сонзэ алкуксчись неяви ней Христоссо ды тынк эйсэяк: эдь чоподачись поты, ды алкуксонь валдочись уш валдомты.

<sup>9</sup>Кие корты: «Мон эрян валдосо», – ансяк сонсь ялатеке кеж кирди эсензэ кемиця ялганзо лангс, се течинь чис чоподасо.

<sup>10</sup>Се, кие вечксы эсензэ кемиця ялганзо, эри-ашти валдосо, ды сонзэ эйсэ арась мезеяк истямо, конась кармавтоволь пупордямо.

<sup>11</sup>Се, кие кеж кирди кемиця ялганзо лангс, – се чоподасо аштиак, чоподасо якияк ды а соды, ков сон моли, эдь чоподась сельмензэ сокоргавтынзе.

<sup>12</sup>Сёрмадан тенк, тиринь тякинеть: тынк пежетенк нолдазь Сонзэ лементь кувалт.

<sup>13</sup>Сёрмадан тыненк, сыретне: тынь содасынк Сонзэ, кона ульнесь ушодкссто саезь. Сёрмадан тыненк, одтнэ: тынь изнинк Апаронть. Сёрмадан тенк, эйдинеть: тынь содасынк Тетянь.

<sup>14</sup>Мон сёрмадынть тыненк, сыретне: тынь кармиде содамо Сонзэ, кона ульнесь ушодкссто саезь. Мон сёрмадынть тыненк, одтнэ: тынь виевтядо ды тыньсэнк эри-ашти Пазонь валось, ды тынь изнинк Апаронть.

<sup>15</sup>Илядо вечке те пежетев масторлангонть ды сеньгак, мезе те масторлангсонть. Кие вечксы истямо масторлангонть, сеньсэ арась таркине Тетянтень вечкеманть туртов.

<sup>16</sup>Эдь весе, мезе те масторлангсонть, – ломанень колазь бажамотне, сельмень визькс мельтне ды эрямонь каштанчись – те весемесь моли пежетев масторлангстонть, аволь Тетянь пельде.

<sup>17</sup>Ды те масторлангось весе эсензэ визькс мельтнень марто прядови, ансяк Пазонь мелень топавтыцясь эри пингеде пингес.

#### **Антихристэсь эли Христосонь каршо молицясь**

<sup>18</sup>Эйдинеть! Ды вана сась прядовома шкась. Тынь мариде: сы Антихристэсь. Ды вана ней лиссть лангс уш ламо антихристт, ды теньсэ чарькодтяно: сась прядовома шкась.

<sup>19</sup>Сынь лиссть минек ютксто, ансяк минекекс сынь зярдояк арасельть. Бути сынь улевельть минекекс, сестэ сынь ковгак а тукшновольть юткстонок. Минек эйстэ сынст туемась невти: весе сынь аволь минекть.

<sup>20</sup>Тыненк максозь Иневаньксэнтъ пельде Оймеялтонь вийсэ вадема, ды тынь содасынк весементь.

<sup>21</sup>Мон сёрмадан тыненк аволь секс, будто тынь а содасынк видечинть. Мекевланк, сёрмадан секс, мекс тынь содасынк сонзэ ды содасынк сеньгак: кодамояк кенгелямо а рашты видечистэ.

<sup>22</sup>Кенгелицясь – кие истямось? Кенгелицясь – се, кона а лови Иисусонь Христосокс. Ломанесь, кона а кеми Тетянтеньгак, Цёрантеньгак, – те антихрист.

<sup>23</sup>Кона а кеми Цёрантень, сень арась Тетязояк; кона апак сёпо кеми Цёрантень, сень ули Тетязояк.

<sup>24</sup>Истя, эрязо-аштезэ эйсэнк се, мезе тынь мариде ушодксстонть саезь. Бути тынк эйсэ свал эри-ашти се, мезе тынь мариде ушодксстонть саезь, сестэ тыньгак свал эрятадо-аштетядо Цёранть ды Тетянтэ марто сюлмавозь.

<sup>25</sup>Ды те улиак Христосонь алтавт казнесь миненек – те пингеде пингень эрямось.

<sup>26</sup>Вана тень мон сёрмадынть тыненк сетнень кувалт, конат снартыть пурдавомс тынк виде кистэнтэ.

<sup>27</sup>Тынк эйсэ, ялатеке, свал эри-ашти те Оймеялтонь вийсэ вадемась, конань тыненк максызе Иневаньксэсь, ды секскак тыненк а эряви лия тонавтыця. Те самай вадемась тонавты тынк весементень. Сон пачти тыненк видечинть ды зярдояк а кенгели. Секскак тееде истя, кода Сон тынк тонавты: эрядо-аштеде свал Христосонь марто сюлмавозь.

#### **Пазонь эйкакшт**

<sup>28</sup>Ды ней, тиринь тякинетэ, эрядо-аштеде свал Христосонь марто сюлмавозь. Ды сестэ, зярдэ Сон сы, минь карматано аштеме Сонзэ икеле апак пеле, ды сестэ миненек а сави визькс марто туемс сельмензэ икельде Сонзэ самсто.

<sup>29</sup>Тынь содасынк Сонзэ кода видечинь коряс теиця, – истя тынь чарькодъсынк сеньгак: эрвась, кона эри видечинь коряс, чачозь Пазонтэ эйстэ.

### 1-е Иоанна 3

<sup>1</sup>Ванодо, кодамо ине вечкема казезь миненек Тетянтъ пельде: миненек максозь кандтнемс Пазонтъ эйкакшонъ лементъ, ды минь алкуксккак Сонзэ эйкакшонзо! Секскак те масторлангось а содасамизь минек, эдь сон зярдояк эзизе содакшно минек Тетянтъкак.

<sup>2</sup>Вечкевикс ялган! Минь ней Пазонъ эйкакштано, ды кодамокс ультяно икелепелев – те нейке а неяви. Ансяк содасынек сень: зярдю Христос сы, минь теевтяно Сонзэ кондямокс – секс, мекс несынек Сонзэ истямокс, кодамо Сон алкукс.

<sup>3</sup>Ды эрвась, конань ули Пазонтъ лангс истямо седейнежедьксэзэ, теи эсь прынзо истямо ваньксэкс, кодамо ванькс Христос.

#### Пазонъ эйкакштнэ а совавить пежетъс

<sup>4</sup>Эрвась, кие совси пежетъс, теи Пазонъ Коень колыцянтъ ладсо, эдь пежетесь улиак Пазонъ Коень коламо.

<sup>5</sup>А вана Христос, кода тынь содатадо, сась пежетнень минек эйстэ саеме, ды Сонзэ эйсэ арась кодамояк пежетъ.

<sup>6</sup>Истя, эрвась, кона эри-ашти Христос марто сьулмавозь, а совси пежетъс. Кона совси пежетъс, се эзизе некшне Сонзэ ды а содасыак Сонзэ.

<sup>7</sup>Тиринь тякинеть! Киненьгак илядо пурдаво виде кистэнтъ. Се, кие эри видечинь коряс, сонськак Христосонъ кондямо видечисэ эриця.

<sup>8</sup>Кие совси пежетъс, се Идемевсентъ эйстэ, эдь Идемевсесь совась пежетъс ушодкссонтъ саезь. Пазонъ Цёрась саськак масторлангов самай те тувталонъ коряс: Идемевсентъ тевензэ педес яжамо.

<sup>9</sup>Кияк Пазонтъ эйстэ чачозесь пежетъс а сови, эдь сонзэ эйсэ эри-ашти Пазонъ видьмесь. Сон а совави пежетъс, секс мекс сон чачозь Пазонтъ эйстэ.



<sup>10</sup>Пазонь эйкакштнэ ды Идемевсень эйкакштнэ вана кода содавить: кие а теи видечинь коряс, се аволь Пазонть эйстэ, кода сеяк, кие а вечксы эсензэ кемиця ялганзо.

#### **Вечкеде вейкенк-вейкенк**

<sup>11</sup>Кулясь, конань тынь маринк ушоджсстонть саезь, вана кодамо: миненек эряви вечкемс вейкенек-вейкенек.

<sup>12</sup>Илязтано уле истямокс, кодамо Каин, Апаронть левксэсь, кона чавозь куловтызе эсензэ ялаксонзо. Мекс куловтызе? Секс, мекс Каинэнь тевтне ульнесть зыяновт, ялаксонзо тевтне – видекоень.

<sup>13</sup>Секскак илядо дивсе, кемиця ялгат, мекс те масторлангось кирди кеж тынк лангс.

<sup>14</sup>Минь жо ютынек куломасто эрямос. Тень минь содасынек секс, мекс минь вечксынек кемиця ялганок. Се, кона а вечки кемиця ялганзо, каднови куломанть кедь ало.

<sup>15</sup>Эрвась, конась кирди кеж кемиця ялганзо лангс – се ломанень маштниця. А ломанень маштницянь, кода тынь содатадо, арась пингде пингень эрямозо, конась эряволь-аштевель эйсэнзэ.

<sup>16</sup>Вечкеманть минь карминек содамо вана кода: Иисус максызе Эсь эрямонзо минек кисэ. Секс миненеккак эряви максомс эсь эрямонок минек кемиця ялгатнень кисэ.

<sup>17</sup>Бути парсте эриця ломанесь несы эсензэ кемиця ялганзо арасьчисэ ды ялатеке пекстасы седеензэ сонзэ эйстэ, сестэ сонзэ эйсэ кодаяк а эри-ашти Пазонтень вечкемась!

<sup>18</sup>Тиринь тякинеть! Миненек эряви вечкемс паро тевсэ ды видечисэ, аволь ансяк кельсэ-валсо.

#### **Пазонь эйкакштнэ апак пеле молить Пазонтень**

<sup>19</sup>Тень коряс минь содасынек: минь видечинть эйстэ. Теньсэ минь оймавтсынек седеенек Пазонть икеле

<sup>20</sup>свал, зярдю минек седеесь чумонды эйсэнек. Эдь Пазось минек седейденек седе покш, ды Сон содасы весементь.

<sup>21</sup>Вечкевикс ялган! Бути минек седеесь а чумонды эйсэнек, сестэ минь апак пеле мольтяно Пазонтень.

<sup>22</sup>Ды сестэ, мезе а вештяно Пазонтъ пельде, – сень Сон макссы, эдь минь эрятано Сонзэ кармавтокстнэнь коряс ды тейтяно сень, мезесь тукшны Сонзэ мельс.

<sup>23</sup>Ды Сонзэ кармавтоксошь вана кодамо: миненек эрви кемемс Иисус Христоснэнь, Сонзэ Цёрантень, ды вечкемс вейкенек-вейкенек, кода Сон кармавтсь миненек.

<sup>24</sup>Эрвась, кие топавты Пазонь кармавтокстнэнь, эри-ашти Пазонтъ эйсэ, ды сонзэ эйсэ эри-ашти Пазось. Ды Сонзэ эрямодонтъ-аштемадонтъ минек эйсэ минь содатано Оймеялтонть коряс, конань Сон максызе миненек.

## 1-е Иоанна 4

### Пазонь Оймеялтошь ды Антихристэнь оймеялтошь

<sup>1</sup>Вечкевикс ялган! Илядо кеме эрва кодамо оймеялтонть, терявтнеде-снартнеде сонзэ: Пазонтъ пельде сон эли аволь. Эдь масторланга ней якить ламо кенгелиця пазмарицят.

<sup>2</sup>Пазонь Оймеялтонть содасынк истя: эрва оймеялтошь, кона видьксты ломанень рунгосо Иисус Христосонь самодонтъ, – те оймеялтошь Пазонтъ пельде.

<sup>3</sup>Мекевланк, эрва оймеялтошь, кона а видьксты Иисус Христосонь ломанень рунгосо самодонтъ, – аволь Пазонтъ пельде. Те оймеялтошь – Антихристэнь пельде, конань самодонтъ тынь марсиде, ды сон уш нейгак тесэ, масторлангсонть.

<sup>4</sup>Тиринь тякинеть! Тынь Пазонть пельде, ды тыненк изнявсть кенгелиця пазмарицятне, эдь Се, конась тыньсэнк, седе покш Идемевстенць, кона те пежетев масторлангонь ломантнесэ.

<sup>5</sup>Сынь – те масторлангстонць. Ды секскак кортыть истя, кода кортыть те масторлангсонць, ды те масторлангось кунсолы сынст.

<sup>6</sup>А вана минь Пазонть пельде, ды се, кие содасы Пазонть, кунсолы минек. Кие аволь Пазонть пельде, се а кунсолы минек. Истя минь содасынек видечинь Оймеялтонць ды манчемань оймеялтонць.

### Алкуксонь вечкемадо

<sup>7</sup>Вечкевикс ялган! Карматано вечкеме вейкенек-вейкенек, эдь вечкемась максозь миненек Пазонть пельде. Ды эрьвась, кона вечки, чачозь Пазонть эйстэ ды содасы Пазонть.

<sup>8</sup>Кие а вечки, се зярдояк эзизе содакшно Пазонть, эдь Пазось – вечкема.

<sup>9</sup>Пазось невтизе миненек Эсь вечкеманзо вана мейсэ: Сон кучизе масторлангонтень Эсензэ вейкине Цёранзо миненек эрямонь максомга.

<sup>10</sup>Вечкемась ашти аволь сеньсэ, кода минь вечкинек Пазонть, а вана мейсэ: Пазось Сонсь вечксамизь минек ды кучизе Эсензэ Цёранзо минек пежетнень нолдамонць кисэ.

<sup>11</sup>Вечкевикс ялган! Бути Пазось минек истя пек вечксамизь, сестэ миненеккак эряви вечкемс вейкенек-вейкенек.

<sup>12</sup>Пазонть зярдояк кияк эзизе некшне. Ансяк бути минь вечктяно вейкенек-вейкенек, сестэ минек эйсэ эри-ашти Сонсь Пазось, ды Сонзэ вечкемась алкуксокс топавтовсь минек эйсэ.

<sup>13</sup>Минь эрятано-аштетяно Пазонть эйсэ, ды Сонгак эри-ашти минек эйсэ. Теде минь содатано Сонзэ Оймеялтонць коряс, конань Сон максызе миненек.

<sup>14</sup>Минь минсь неинек ды яволявтано: Тетясь кучизе Эсензэ Цёранзо масторлангонць Идицякс.

<sup>15</sup>Кие видьксты: Иисус – Пазонть Цёра, сень эйсэ эри-ашти Пазось, ды сонсь те ломанесь эри-ашти Пазонть эйсэ.

<sup>16</sup>Вана истя минь карминек содамо, кода Пазось вечксамизь, ды минь кемтяно те вечкемантень. Пазось – вечкема, ды се, кие эри-ашти вечкемасо, эри-ашти Пазонть эйсэ, ды Пазось эри-ашти те ломаньсэнтъ.

<sup>17</sup>Пазонь вечкемась алкуксокс топавтовсь минек эйсэ, ды те масторлангсонть минь эрятано истя, кода эри Христос. Секскак минь апак пеле вастсынек Судямо чинть.

<sup>18</sup>Вечкемасонть арась пелема. Ине вечкемась пани весе пелеманть. Пелемась свал сьулмазь чумонь пандоманть марто, ды кие эри пелезь, се эзь пачкоде ине вечкемантень.

<sup>19</sup>Минь вечктяно Сонзэ секс, мекс Пазось васенцекс вечкимизь минек.

<sup>20</sup>Кие корты: «Мон вечкса Пазонть», – ансяк сонсь кирди кеж эсензэ кемиця ялганзо лангс, се кенгелиця. Кие а вечксы эсензэ кемиця ялганзо, конань сон некшнлизе, сенень а вечкеви Пазоськак, конань сон эзизе некшне.

<sup>21</sup>Ды вана те кармавтовоксось, конань Пазось миненек кадызе: «Кие вечксы Пазонть, сенень вечкема эсензэ кемиця ялганзояк».

## 1-е Иоанна 5

### Кемемась изни те пезетев масторлангонть

<sup>1</sup>Эрьвась, кие кеми сенень: Иисус – те Христос, се чачозь Пазонть эйстэ. Ды кие вечксы Тетянтъ, се вечксынзе Сонзэ эйкакшонзояк.

<sup>2</sup>Бути минь вечксынек Пазонть ды топавттано Сонзэ кармавтовкстнэнь, сестэ содатано: миненек эряви вечкемс Сонзэ эйкакшонзояк.

<sup>3</sup>Пазонтень вечкемась невтеви Пазонь кармавтовкстнэнь коряс эрямосонок. Ды Пазонь кармавтовкстнэ аволь стакат топавтомс,

<sup>4</sup>Эдь эрвась, кие чачозь Пазонть эйтэ, изни те пежетев масторлангонть. Ды те изнямось, кона изнизе масторлангонть, – минек кемеманок.

<sup>5</sup>Кие эно изнясы масторлангонть? Ансяк се, кие кеми: Иисус – те Пазонь Цёра.

<sup>6</sup>Вана Се, кона сась миненек ведь ды верь вельде ды Оймеялтсо, те – Иисус Христос. Сон сась аволь ансяк ведь вельде, Сон сась ведь ды верь вельде. Ды тень кемексты Оймеялтось, эдь Оймеялтось – видечи.

<sup>7</sup>Улить колмо кемекстыцят менель лангсо: Тетя, Вал ды Иневанькс Оймеялт, ды колмонест Сынъ – вейке.

<sup>8</sup>Ды улить колмо кемекстыцят мода лангсо: Оймеялтось, ведесь ды вересь. Ды сынъ колмонест кемекстыть текень жо.

<sup>9</sup>Минь кемтяно ломанень кемекстамо валонтень, ансяк Пазонь кемекстамо валось седеяк виев. Ды вана кодамо Пазонь кемекстамо валось: Сон макссь кемекстамо вал Эсензэ Цёрадонть.

<sup>10</sup>Эрванть, кие кеми Пазонь Цёрантень, те кемекстамо валось ули седейсэнзэ. Кие а кеми Пазонтень, се теи Пазонть кенгелицякс, эдь сон а кеми Пазонь кемекстамо валонтень, конань Пазось Сонсь ёвтызе Эсензэ Цёрадонть.

<sup>11</sup>Вана мезде корты те кемекстамо валось: Пазось макссь миненек пингеде пингень эрямо, ды те эрямось Сонзэ Цёрасонть.

<sup>12</sup>Кинь ули Цёразо, сень ули эрямозо, ды кинь арась Пазонь Цёразо, сонзэ арась эрямозояк.

#### **Миненек казезь пингеде пингень эрямо**

<sup>13</sup>Весе тень мон сёрмадыя тыненк, Пазонь Цёрань лементень кемицятненень, вана мекс: содадо: тынк, Пазонь Цёрантень кемезь, ули пингеде пингень эрямонк.

<sup>14</sup>Бути минь, сьулмавозь Сонзэ меленть марто, вештяно Пазонтъ пельде мезе-бути, Сон минек марясамизь. Секскак минь мольтяно Пазонтень апак пеле ды кемезь.

<sup>15</sup>Ды бути минь содатано: Сон марясамизь минек, зярдо минь вештяно мезе-бути, сестэ минь содатано сеньгак: се, мезе минь вешинек Сонзэ пельде, миненек уш максозь.

<sup>16</sup>Бути кие неи эсензэ кемиця ялганть пежетьс совамонзо, ансяк те пежетесь а вети куломас, кадык сон озны ялганзо кисэ, ды Пазось максы тонанень эрямо. Те кортамось моли сетнень ланга, конатнень пежетесь а вети куломас. Ули истямояк пежеть, кона вети куломас, ды истямо пежетьс совицянтъ кисэ мон а тердян озномо.

<sup>17</sup>Эрва берянь тевесь – пежеть, ансяк ули истямояк пежеть, кона а вети куломас.

<sup>18</sup>Минь содатано: кияк Пазонтъ эйстэ чачозесь а сови пежетьс. Эдь Пазонтъ эйстэ чачозесь вансты эсь прянзо, ды Апарось истямо ломанентъ маласкак а молеви.

<sup>19</sup>Содатано: минь – Пазонтъ эйстэ, ансяк весе те масторлангось Апаронтъ кедензэ ало.

<sup>20</sup>Минь содатано тедеяк: Пазонь Цёрась сась ды макссь тенек чарькодема, кода содамс алкуксонь Пазонтъ. Минь эрятано те алкуксонь Пазонтъ эйсэ, эдь минь эрятано Сонзэ Цёранть эйсэ, Иисус Христоссо. Сон – алкуксонь Паз ды пингеде пингень эрямо!

<sup>21</sup>Тиринь тякинеть! Вансто до эсь прянк аволь алкуксонь пазтнэде! Аминь.

## Иоаннонь Омбоце Сёрмазо

### 2-е Иоанна 1

<sup>1</sup>Содавикс Атя кучи шумбракстнемат тонеть, Пазонь кочкавт Азорава, ды тонь эйкакштнэнень. Мон видечисэ вечктядызь тынк, ды аволь ансяк мон. Истя жо вечктядызь тынк весе лиятнеяк, кить кармасть содамо видечинть.

<sup>2</sup>Эдь те видечись эри-ашти минек эйсэ ды карми улеме мартонок пингеде пингес.

<sup>3</sup>Кадык Тетя Пазось ды Иисус Христос Азорось, Тетянтъ Цёразо, максыть тыненк видечи ды вечкема марто чансть, седеймарямо ды седейоймамо.

#### Видечи ды вечкема

<sup>4</sup>Мон пек кенярдынь, зярдю неинь тонь кона-кона эйкакшот видечисэ эрицякс, кода кармавтозельгак минек Тетянок пельде.

<sup>5</sup>Ды ней энядан икелеть, азорава: карматано вечкеме вейкенек-вейкенек. Мон сёрмадан тетя аволь од кармавтовкс, мекевланк, сень, кона максозель миненек ушодксстонть саезь.

<sup>6</sup>Ды те вечкемась вана мейсэ: миненек эряви эрямс Пазонь кармавтовкстнэнь коряс. Те Сонзэ кармавтовксонть тынь маринк ушодксстонть саезь ды сонзэ коряс тыненк эряви эрямс.

<sup>7</sup>Эдь масторланга кармасть якамо ламо манчицят, конат а видькстыть ломанень рунгосо Иисус Христосонь самодонтъ. Истятнэ – манчицят ды антихристт.

<sup>8</sup>Секс ванодо эсь мельганк, а ёмавтомс миненек сень, мезентъ таштынек эсь важдемасонок, мекевланк, кадык максови тенек казнесь-пандомась целанек.

<sup>9</sup>Кие а эри-ашти Христосонь тонавомасо ды моли сонзэ каршо, сень арась Пазозо; кие эри-ашти Христосонь тонавомасо, сень ули Тетязояк ды Цёразояк.

<sup>10</sup>Бути кияк сы тыненк ды а пачти те тонавоманть, истямо ломаненть илинк соавто эсенк кудос ды илядо шумбрактнеяк мартонзо.

<sup>11</sup>Кие шумбраксты истямо ломаненть марто, се сонзэ марто вейсэ теи зыянов тевть.

### Прядома валт

<sup>12</sup>Ламодо ёвтыксэлинь мон тыненк, ансяк арась мелем теемс тень черниласо конёв лангс. Мон кеман: паряк, сан ды вастован мартонк, ды сестэ кортатано сельмеде сельмс кенярдоманк пештямос.

<sup>13</sup>Пазонь кочкавт Патять эйкакштнэ кучить теть шумбрактнемат. Аминь.



## Иоаннонь Колмоце Сёрмазо

### 3-е Иоанна 1

<sup>1</sup>Содавикс Атя кучи шумбракстнемат тонеть, вечкевикс Гай оям. Тонь мон вечктян видечисэ.

<sup>2</sup>Вечкевикс оям! Мон ознан-арсян тонеть весемесэ вадрясто эрямо. Улезэ рунгонь шумбрачитькак, эдь тонь оймень шумбрачиденть мон содан.

<sup>3</sup>Мон пек кенярдынь, зярдо сакшность кемиця ялгатне ды ёвтнеть, кода кемевиксстэ тон эрят видечисэ. Алкуккак тон эрят видечинть коряс.

<sup>4</sup>Монь туртов арась седе покш кенярдома истямо кулянтъ коряс: монь эйкакштнэ молитъ видечинь кияванть.

#### Вейсэнь ваходема ды каршо аштема

<sup>5</sup>Вечкевикс оям! Тонь кемевиксчиденть кортыть весе тевтне, конатнень тон теят кемиця ялгатнень туртов, ды натой сетнень туртовгак, конат сакшныть лия таркасто.

<sup>6</sup>Сынь ёвтасть весе тесэнь кемикуронтень тонь вечкемадонть. Инеськетъ, тейть паро тев ды лездак седе товгак сынст якамо ст туртов истя, кода туевель Пазонтъ мельс.

<sup>7</sup>Эдь сынъ тустъ якамо Христосонь лементъ кисэ ды мезеяк а сайть акемицятнень пельде.

<sup>8</sup>Секскак миненек эряви лездамс истят ломантненень ды истямо ладсо сынст марто вейсэ теевемс видечинтень важодицякс.

<sup>9</sup>Мон сёрмадынь сёрма кемикуронтень, ансяк Диотреф, кона вети эсь прянзо прок тосонь азоро, а саи мельс сень, мезде минь кортатано.

<sup>10</sup>Секскак, зярдо мон сан тов, сестэ лангс ливтьсынъ сеть тевтнень, конатнень сон тейни. Сон сравтни минек кувалма кежей кенгелемат, ансяк сонзэ туртов теяк аламо. Сон сонсь а васты лия таркань кемиця

ялгатнень, тейни пирявкст сетнень каршо, кинь ули мелезэ вастомс сынст. Сон мик панси кемикуросто сетнень, кить вастыть лия таркань кемиця ялгатнень!

<sup>11</sup>Вечкевикс оям! Иля моле зыянов невтевкс мельга, мольть паро невтевкс мельга. Кие теи паро тевть, се ломанесь Пазонтъ эйстэ. Кие теи зыянов тевть, се зярдояк эзизе некшне Пазонтъ!

<sup>12</sup>Деметрейде весе кортнить ансяк паро ёндо, кода корты сонсь видечиськак. Миньгак макстано паро вал кисэнзэ, ды тынь содатадо: минек валось алкуксонь.

### Прядома валт

<sup>13</sup>Ламодо ёвтыксэлинь тонеть, ансяк арась мелем теемс тень черниласо ды толгасо.

<sup>14</sup>Кеман: курок нетян тонь ды кортнетяно мартот сельмеде сельмс.

<sup>15</sup>Седейоймамо теть. Весе оятне кучить теть шумбракстнемат. Тонгак ёвтак минек пельде шумбракстнемат эрва оянтъ туртов. Аминь.

## Иудань Сёрмазо

### Иуда 1

<sup>1</sup>Иуда, Иисус Христосонь вожозо ды Яковонь братозо, кучи шумбракстнемат тердестненень, конатнень алтынзе Эстензэ Тетя Пазось ды конатнень вансты Иисус Христос.

<sup>2</sup>Кадык яла ламолгалить тынк ютксо седеймарямось, сэдейоймамось ды вечкемась.

### Манчиця тонавыцят

<sup>3</sup>Вечкевикс ялган, монь ульнесь покш мелем сёрмадомс тенк минек вейсэнъ идемадонть, ды ней мон ловия пек эрявиксэкс сёрмадомс тенк сёрма ды тердемс тынк тюреме кемеманть кисэ, кона вестъ ды свал шкас максозь Пазонь ломантненень.

<sup>4</sup>Тевесь сеньсэ: тынк юткс салава совасть кодат-бути пазтомо ломанть, конатненень уш умок аравтозь-анокстазь Пазонь судось. Сынъ минек Пазонь чанстентъ теить эсь визькс мелест топавтома тевекс, ды велявтыть-пурдыть минек вейкине Кирдиця Пазонтъ ды Иисус Христос Азоронтъ эйстэ.

<sup>5</sup>Монь мелем ледстямс тенк, куш тынь весе тень уш содасынк: Азорось, кона идизе-ливтизе Эсь раськензэ Египетэнь масторсто, мейле маштнинзе-чавнынзе юткост сетнень, кить Тензэ эзть кеме.

<sup>6</sup>Ды ангелтнэнь, конатне эзизь кирде тенст максозь азорксчинть ды кадызь эсест эрямо таркаст, Сон вансты чопода отьмасо, пингеде пингень тертьсэ, покш чинь судонтень.

<sup>7</sup>Истя жо Содом, Гоморра ды перькаст аштиця оштнэяк сынст ладсо пряст каякшнызь усксевемас-ускурямос ды рунгонь визьксэнь мелест эрва ладсо топавтомас. Сынъ улить весенень невтевксэкс: чумонь пандомакс максозь тенст пингеде пингень тол.

<sup>8</sup>Истя жо неть пазтомотне, ононь-чартень неицятне теить эсь рунгост нулгодьксэкс-аваньксэкс, мезекскак а ловить прявтнэнь ды сёвныть-покордыть менелень вийтнень.

<sup>9</sup>Мик Михаил архангелэсь, зярдон сон пелькстась-спорясь Идемевсенть марто Моисеень уловдонть, эзь сае смелчи сёвноть-покордазь судямс Идемевсенть. Сон ансяк мерсь: «Кадык чумот пандсы Азорось!»

<sup>10</sup>Неть ломантне жо сёвныть-покордыть сень, мезенть а чарькодъсызыгак. Ансяк мезенть сын чарькодить, кода превтеме ракшат, эсь чачома обуцяст коряс, теньсэ сын ёмавтыть эсь пряст.

<sup>11</sup>Вай, кодамо зыян сы тенст, секс мекс сын тусть Каинэнь киява. Сын питнень саемань кисэ Валаам ладсо ваясть манчевемас, ды каршо молемаст кисэ Корей ладсо кулыть-ёмить.

<sup>12</sup>Неть ломантне визькстэме ветить эсь пряст тынк вечкемань каванямо промкстнэсэ, косо сын мартонк симить-ярсыть ды допрок апак визде пештить эсь пекест. Сын мелявтыть ансяк эсь прядост. Сын пиземевтеме пельть, конатнень пансить-кандтнить варматне. Сын сёксень чувтт, умартеме, кавксть кулозь, юрнэк-корённэк таргазь.

<sup>13</sup>Сын иневедень кежей ведьвелявкст, конат човиякшныть эсест визьксчисэст; азгондыця-кадовиця тештт, конатненень анокстазь-ванстоць пингедэ пингес тунь чопода отьма.

<sup>14</sup>Те сынст эйтэяк икелев ёвтась Енок, Адамсто саезь сисемеце ине покштясь: «Вана сы Азорось Эсь тёжа тёжат иневанькс ангелэнзэ марто

<sup>15</sup>весеме лангсо судонь тееме. Сон ливтьсынзе лангс Пазнэнь весе акемицятнень весе пазтомо тевсэст, конатнень сын теизь Пазонт каршо, ды визькстэме весе валсост, конатнень ёвтызь Сонзэ каршо неть Пазнэнь акемиця пежетевтне».

<sup>16</sup>Сын свал музгордить ды пеняцить уцяскаст лангс, топавтыть эсест визькс мелест пазтомо ды койтеме, каштангалить стяконь шнамо валсост ды соланясто савтыть ломантненень эстет лезэнь кисэ.

### Превспутомат кемицятненень

<sup>17</sup>А вана тынь, вечкевикс ялгат, кирдеде мельсэнк сень, мезе икелев ёвтасть минек Иисус Христос Азоронть апостолтнэ.

<sup>18</sup>Сынь кортасть тенк: «Меельце шкастонть сыть нарьгицят-мусколицят, конат кармить пряст ветямо пазтомо эсь визьксэнь мелест коряс».

<sup>19</sup>Неть ломантне явить эсь пряст кемемань вейсэнъксчинть эйстэ, сынь эрить ансяк эсь мода лангонь арсемаст коряс, арась эйсэст Пазонь Оймеялт.

<sup>20</sup>Тынь жо, вечкевикс ялгат, касодо-кемекстадо Пазонь максовт питней кемемасонк ды ознодо Иневанъкс Оймеялтонть ветямонзо коряс.

<sup>21</sup>Вансто до прянк Пазонть вечкемасо ды учодо: минек Иисус Христос Азорось Эсь седеймарямосонзо ветясамизь минек пингеде пингень эрямос.

<sup>22</sup>Веенстнэненень уледе седеймарицякс ванозь.

<sup>23</sup>Омбонстнэнь идеде-ливтеде тандавтнезь, теке толсто таргазь. Лиятнень жо лангс таргадо ванозь-пелезь, нулгодеде мик сынст оршамопельдест, кона теевсь аванъксэкс сынст рунгосост.

### Шнамо Пазонтень

<sup>24</sup>Ансяк Пазонть ули виезэ ванстомс тынк прамодо ды аравтомс тынк асатыкстэмекс-ванъксэкс ды кецязь Эсь сияждыця инексчинзэ икелев.

<sup>25</sup>Улезэ Сонензэ, вейкине превейдеяк превей Пазонтень, минек Идицянть, шнамо, инексчи, вий ды азорксчи, минек Иисус Христос Азоронок вельде, весе пингетнеде икеле, ней ды пингеде пингес! Аминь.

## Рим Ошонь Кемикуронтень Паволонь Сёрмазо

### К Римлянам 1

<sup>1</sup>Иисус Христосонь вазозо Павол, конань Пазось тердизе апостолокс ды кочкизе Эсь Кенярксов кулянзо пачтицякс, кучи шумбракстнемат весе тыненк, Рименсетненень, конатне вечкевить Пазонтень ды конатнень Пазось тердинзе улеме Сонензэ алтазь ломанекс .

<sup>2</sup>Пазось те Кенярксов кулянтъ алтызе умок Эсь пазмарицянзо вельде Пазонь пельде Сёрмадовкссонтъ.

<sup>3</sup>Те кулясь Сонзэ Цёрадонзо, кона кода ломань чачсь-лиссъ Давид инязоронтъ буестэ-раськестэ.

<sup>4</sup>Ансяк иневаньксчинь Оймеялтонзо коряс Сон ульнесь аравтозь Пазонь пек виев Цёракс, мезентъ Пазось невтизе кулозьстэ Сонзэ вельмемасонтъ. Те – Иисус Христос, минек Азорось.

<sup>5</sup>Сонзэ вельде Пазось макссь миненек апостолокс улемань чансть: секскак Сонзэ лементъ инексчинзэ кисэ минь ветятано весе раськетнень Сонензэ кемемас ды кунсолomas.

<sup>6</sup>Сынст ютксо тыньгак, конат тердезь улеме Иисус Христосонь ломанекс.

<sup>7</sup>Улезэ тенк чансть ды седейоймамо Пазонтъ, минек Тетянтъ, пельде ды Иисус Христос Азоронтъ пельде.

### Павол ёвты сукпря Пазонтень

<sup>8</sup>Васняк ёвтан сукпря Иисус Христос вельде монь Пазонтень весень тынк кисэ, секс мекс тынк кемемадонть кармасть содамо весе масторлангонтъ келес.

<sup>9</sup>Пазось, конанень мон весе седейсэнъ важдян, зярдо пачтян Кенярксов кулянтъ Сонзэ Цёрадонть, Сонсь тень неиця-содыця, кода мон апак лотксе ледстнян тынк

<sup>10</sup>Эсь озномасон. Мон свал вешан: паряк, окојники, монень мереви самс тынк содавтомо, бути тенень ули Пазонть мелезэ.

<sup>11</sup>Эдь мон пек бажан неемс тынк: мелем ули максомс тенк оймеялтонь кодамомяк казне ды теньсэ виевгавтомс тынк ойменк.

<sup>12</sup>Истя арсян кемекстамс-ливчакавтомс прянок минек вейсэнъ кемеманть вельде: монень – тынк кемеманть вельде, тыненк – монсентъ вельде.

### **Павол ды Римень кемикурось**

<sup>13</sup>Содадо, кемиця ялгат, эдь мон ламоксъ пурнакшнынъ самс тыненк, ансяк те шкас кодат-бути тувталт кирдевтсть монь. Монь мелем тынк ютксомяк теемс седе ламо Христос мельга молицят, кода мон тейнекшнинъ лия таркатневаяк.

<sup>14</sup>Мон прок долксан весе ломантнень икеле: гректнень ды варвартнэнь икеле, превейтнень ды асодыцятнень икелеяк.

<sup>15</sup>Секскак, мезесь ашти монь эйтэ, мон анокан ёвнемс Кенярксов кулянтъ тыненккак, Рименсетне.

### **Кенярксов кулянтъ виезэ**

<sup>16</sup>Мон а виздян Христосто Кенярксов кулядонть: сон – Пазонъ вий, кона иди весень Сонензэ кемицятнень, васняк еврейтнень ды мейле лия раськенсетненьгак.

<sup>17</sup>Эдь те Кулясонть панжови, кода Пазось ломантнень лови чумовтомокс: ансяк педес пес кемеманъ кисэ. Сёрмадовкссо ёвтазь: «Ломанесь, кона кемеманъ кисэ ловозь чумовтомокс, карми эрямо».

### **Весе ломантне чумовт**

<sup>18</sup>Пазонъ кежень пандомась валги менельстэ эрва кодамо пежетень ды зыянонь теицятнень лангс, конатне эсь зыяновчисэст кекшитъ-вельтитъ ломантнень эйтэ видечинть.

<sup>19</sup>Эдь весе, мезе ломанентъ вийсэ содамс Пазонть эйтэ, те сыненст максозь чарькодевиксстэ: Сонсь Пазось тенъ панжизе сыненст.

<sup>20</sup>Менельтнень-мастортнэнь теемасто саезь Пазонь анеявикс ёнкстнэ – Сонзэ пингеде пингень виезэ ды пазоксчизэ – парсте неявить ломантненень сеть тевтнесэ, конатнень Сон теинзе. Секс сынст лангсто мейсэяк а саеви чумост.

<sup>21</sup>Куш сынь Паздонть содыть, ялатеке Сонзэ кода Пазонть а шныть ды а ёвтыть сукпря Тензэ. Мекевланк, сынст мелест-арсемаст кармасть улеме чавот-стякот, ды ачарькодиця седеест чополгадсть.

<sup>22</sup>Сынь ловить эсь прят превеекс, алкукс жо лиссть превстэ.

<sup>23</sup>Ине Пазонть таркас, кона эри пингеде пингес, сынь суюконить кедьсэст теевкстнэнень-идолтнэнень, конат молить кулыця-наксадыця ломань ёнов, нармунь, ниле пильгсэ якиця ракша ды ёзмолдыця ёнов.

<sup>24</sup>Тень кисэ Пазось кадынзе сынст аванькс ды визькс седей мелест топавтомас. Секскак сынь вейкест-вейкест марто нулгодьксэкс тейнить эсь рунгост.

<sup>25</sup>Сынь Паздо видечинть полавтызь манчемасо. Сынь суюконить ды важдить Пазонь теевксэнтень Инешке-Теицянтъ таркас. Улезэ Сон شناзь-чанстязь пингеде пингес! Аминь.

<sup>26</sup>Секс Пазось кадынзе сынст визькс мелест топавтнеме. Аватне полавтызь мирде марто эрямо коентъ тень каршо молицясо: ава ава марто визькс тевень тейнемасо.

<sup>27</sup>Истя жо цёратнеяк кадызь ава марто эрямонть ды кирвазсть визькс мельсэ вейкест-вейкест туртов. Цёра цёра марто тейнить визькс тевть, ды тень кисэ максозь тенст эсест эйсэ чумонь пандома, кона эрявськак истя беряньстэ прят ветямонть кисэ.

<sup>28</sup>Сень кувалма, мекс сынст арасель мелест ловомс-содамс Пазонть, Сон кадынзе сынст колазь превест алов, тейнеме сень, мезе а эряви тейнемс.

<sup>29</sup>Сынь пештязь эрва кодамо авидечисэ, ускурямосо-усксевемасо, апаросо, жаднойчисэ, зыянчисэ ды колазь прясто пильгс. Сынь



сельмень сьвадыцят, маштницят-чавныцят, сёвныцят, манчицят, зьянонь арсицят, берянь кулянь сравтницят.

<sup>30</sup>Сынь кенгелицят, Пазонь авечкицят, покордыцят, каштант-покшкавтницят, прянь шныцят, зьянонь сыргавтыцят, тетянь-авань ломанькс апутыцят,

<sup>31</sup>ачарькодицят, аволь кемевикст, авечкицят, аладицят, казямо седейть.

<sup>32</sup>Сынь содыть: сетне, кить теить истя, Пазонь виде Коенть коряс максовить куломас. Сынь ялатеке аволь ансяк сынсь тейнить тень, мик шныть сетненьгак, кить теинить сынст ладсо.

## К Римлянам 2

### Пазонь судось виде

<sup>1</sup>Секскак, ялгай, бути тон судят лият, сестэ теть кодаяк а саеви лангстот чумот, кие тон аволить уле. Зярдон тон судят лиянтъ, сестэ судявтат эсь пряткак, секс мекс тон, лиятнень судиця, тонськак тейнят некеть тевтнень, конатнень сынъгак.

<sup>2</sup>Весе минь содатано: Пазось теи видестэ, зярдон суди истямо тевень тейницятнень.

<sup>3</sup>А вана тонсь, ялгай, тейнят некеть жо тевтнень, конатнень кисэ судят лиятнень! Натъ тон арсят оргодемс Пазонь судонть эйстэ?

<sup>4</sup>Паряк, тон стякокс ловат Сонзэ паро мелень ине сюпавчинть, кувать цидярдоманть ды коронь кирдеманть? Эли тон а чарькодят: Пазонь парось вети тонъ пежетте велявтомас?

<sup>5</sup>Ансяк тонъ седееть калгодо-казямо ды арась велявтома мелеть. Истямо ладсо тон таштат эсеть лангс седеяк покш кеж, кона пры лангозот Кежень чистэнтъ, зярдон Пазось карми судямо ломантнень Эсь видечинзэ коряс.

<sup>6</sup>Сестэ Сон максы-панды эрвантень эсь тевензэ коряс.

<sup>7</sup>Веенстнэ паро тевсэ цидярдозь вешнить Пазонь пельде шнамо, арне ды акулома. Сыненст Сон максы пингеде пингень эрямо.

<sup>8</sup>Лиятне жо вечкить эсь прят ды а кунсолыть видечинть, молитъ зыянонтъ мельга. Сыненст – Пазонь кежесь ды ацирьгадомась.

<sup>9</sup>Ризкс ды майсема учи беряненъ теиця эрва ломанентъ, васняк евреентъ, мейле лия раськенсентькак.

<sup>10</sup>Шнамо, арне ды седейоймамо максы Пазось паронь эрва теицянтень, васняк евреентень, мейле лия раськенсентенькак.

<sup>11</sup>Эдь Пазось виде, киненькак а савтни.

### **Моисеень Коесь судто а вансттанзат**

<sup>12</sup>Кить теить пежеть Моисеень Коентъ апак сода, сеть ёमितькак Койтеме. А вана кить теить пежеть Моисеень Коентъ содазь, сеть судязькак улить Коентъ коряс.

<sup>13</sup>Пазонтъ икеле лововить чумовтомокс сетне, конат топавтыть Коентъ, аволь сетне, конат ансяк марить Коень валонтъ.

<sup>14</sup>Зярдэ лия раськенъ ломантне, конатненъ арась Коест, эсь эрямонь ёжомарямост коряс теить сень, мезе веши Коесь, сестэ сынъ сынсь эстест теить Кой, куш сынст Моисеень Коест араськак.

<sup>15</sup>Теньсэ сынъ невтить: Коень вешематне сёрмадозь сынст седейсэст. Тень кемексты оймеёжосткак, зярдэ арсемаст шкань-шкань чумондыть эли идить эйсэст.

<sup>16</sup>Те неяви се Чистэнтъ, зярдэ Пазось карми судямо ломантненъ салаванъ арсемаст-тевест Иисус Христос вельде. Истя ёвтазь Кенярксов кулясонть, конанъ мон пачтян.

### **Еврейтне ды Коесь**

<sup>17</sup>А кода тонъ коряс? Тон ловат эсь прят евреекс, тон нежедят Моисеень Коентъ лангс ды шнат прят эсь Пазот эйсэ.

<sup>18</sup>Тон содат, мезе тетъ теемс Пазонь меленть топавтомга, тон тонавтозят Коентень, секс маштат кочксеме сень, мезесь седе паро.

<sup>19</sup>Тон кемат: тон сокоронь ветниця ды чоподачисэ аштицятнень валдост,

<sup>20</sup>ачарькодицятнень превс путыцяст, пижетнень тонавтыцяст, – секс мекс тонь ули Коеть, конасонть кирдевить весемень коряс содамочи ды видечи.

<sup>21</sup>Тон тонавтат лият, а мекс эсь прят а тонавтат?

<sup>22</sup>Тонавтат а саламс, ансяк тонсь мекс салат? Кортат: «илия ускура», ансяк тонсь мекс ускураят? Нулгодят аволь алкуксонь пазтнэде, – ансяк тонсь мекс салат ули-паро сынст озкскудосто?

<sup>23</sup>Тон прят шнат Пазонь Коень улемасот – ансяк тонсь Коень коламосонть мекс покордат Пазонть?

<sup>24</sup>Эдь кода ёвтазь Сёрмадовксонть эйсэ: «Тынк кисэ лия раськень ломантне сяддыть-покордыть Пазонть».

<sup>25</sup>Цёрынень киськепень керявтомась лезэв ансяк сестэ, зярдо тон топавтат Моисеень Коенть, а бути тон колсят Коенть, сестэ тонь керявтомась, ловт, арасельгак.

<sup>26</sup>Мекевланк, бути апак керявтозесь топавты Коень вешематнень, арази Пазось а ловсы сонзэ керявтозекс?

<sup>27</sup>Истямо ладсо, Коень топавтыцятне, конатне рунгонь коряс апак керявто, кармить видестэ судямо тонь, конань ули сёрмадозь Коезэяк, керявтомазояк, ды кона ялатеке колси Коенть.

<sup>28</sup>Лисни: алкуксонь еврееь аволь се, кона неяви евреекс, ды алкуксонь керявтомаськак аволь се, кона неяви рунгосо.

<sup>29</sup>Арась! Алкуксонь еврей се, кие еврей потмоёнксонь коряс, ды керявтомась се, кона седейсэ-оймесэ, оймеялтсо, аволь буквасо. Истямо еврееь шнави Пазонть пельде, аволь ломантнень пельде.

### К Римлянам 3

<sup>1</sup>Сестэ кодамо питнейчист еврейтнень лия раськетнень коряс ды кодамо лезкс керявтоманть эйстэ?

<sup>2</sup>Нама, лезксэсь покш весеме ёндо! Васенцекс, Пазось кемсь лангозост ды максызе тенст Эсь кулянзо.

<sup>3</sup>Мезе сень эйстэ, бути конат-конат сынст ютксто ульнестькак Пазонтень акемевиксэкс? Арази сынст акемевиксчись ёртсы-ёмавтсы Пазонь кемевиксчинть?

<sup>4</sup>Нама, арась! Пазось свал ашти Эсь валонзо лангсо, мик сестэяк, бути “весе ломантне кенгелицят”. Сёрмадовксонтэ эйсэ Паздонть ёвтазь истя: «Тонь Валот свал кармить лововомо видекас, ды Тон изнясыть сетнень, конат чумондыть Тонь».

<sup>5</sup>А бути минек авидечись теи седеяк неяви́ксэкс Пазонь видечинть, мезе миненек сестэ ёвтамс? Арази Пазось ули авидечисэ, зярдо Сон кеждязь панды минек чумонок? Мон тесэ кортан ломанень арсемань коряс.

<sup>6</sup>Нама, аволь! Бути те улелель истя, сестэ Пазонтень кодаяк а судяволь те масторлангось.

<sup>7</sup>Бути монь кенгелемась теи седеяк неяви́ксэкс Пазонь алкуксчинть, ды теньсэ седеяк кастови Сонзэ инексчись, мекс сестэ монь судямс кода пежетень теицянтэ?

<sup>8</sup>Мекс сестэ а меремс: «Карматано тееме зыян паронть лисеманзо кисэ»? Конат-конат кенгелицятне-сялдыцятне, алкукскак, чумондыть минек истя кортамонок кисэ. Неть ломантнень чумост пандови тевест коряс!

#### Ве ломаньгак арась чумовтомо

<sup>9</sup>Кода эно сестэ? Арази минь, еврейтне, аштетяно седе паро таркасо лиятнень коряс? Допрок аволь! Минь уш икеле невтинек, кода

еврейтне, истя лия раськетнеяк – весе вейкетьстэ аштить пежетень виенть ало.

<sup>10</sup>Тенде ёвтазь Сёрмадовкссо истя: «Ве ломаньгак арась чумовтомо,

<sup>11</sup>вейкеяк арась чарькодиця, ды кияк а вешни Пазонтъ.

<sup>12</sup>Весе велявтсть Пазонтъ эйтэ, весе колазь. Арась паронь теиця – арась вейкеяк.

<sup>13</sup>Сынст кирьгапарест – теке панжадо калмот, сынст кель прясост – манчема, турваст лангсо – куловтыця валт, теке гуень яд,

<sup>14</sup>курго потмост пештязь сэпеде ды сюдомадо.

<sup>15</sup>Сынь чиезь чиить верень валомо,

<sup>16</sup>ды мельгаст весемесь кадови тапазь, яжазь.

<sup>17</sup>Сынь а маштыть ладязь эрямо.

<sup>18</sup>Сынь эзь тонадо Паздо пелеме».

<sup>19</sup>Минь содатано: весе се, мезде корты Коесь, ёвтазь сетненень, кить эрить-аштить сонзэ ало. Сестэ киньгак а панжови кургозо каямс вал эсензэ кисэ, ды весе масторлангонь ломантне чумот Пазонтъ икеле!

<sup>20</sup>Эдь вейкеяк ломань Коень топавтоманть вельде а ловови Пазонтъ икеле чумовтомокс. Коентъ вельде ломантне ансяк кармить содамо-чарькодеме эсест пежетест.

#### **Пазось лови ломанень чумовтомокс кемеманть кисэ**

<sup>21</sup>Вана ней Пазось панжизе ломантненень чумовтомокс ловоманть, кона максови аволь Коентъ вельде. Тень эйтэ уш яволявтнестъ пазмарицятнеяк, Коеськак.

<sup>22</sup>Те чумовтомочись казеви ломантненень Иисус Христоснэнь кемемаст кисэ. Сон сы весе лангс ды весенень, кить кемить Тензэ, киньгак аapak яво.

<sup>23</sup>Эдь весе совасть пежетьс ды арась эйсэст Пазонь иневалдонть сияждома.

<sup>24</sup>Ды ялатеке, Пазонь чанстенть коряс, весенень максови казнекс чумовтомочи Христос Иисус вельде, кона сынст идинзе-раминзе олячис.

<sup>25</sup>Сонзэ аравтызе Пазось улемс ладямонь аноксокс : Сонзэ верьсэ ванськавтовить весе, конат кемить Тензэ. Истя Пазось невти Эсь видечинзэ. Сон эзь пандо чумо икелень теевть пежетнень кисэ,

<sup>26</sup>Эсь куватень кирдеманзо коряс. А вана неень шкасто Сон невти Эсь видечинзэ: Сон Сонсь виде ды лови видекс-чумовтомокс эрванть, кие кеми Иисуснэнь.

<sup>27</sup>Ули-арась минек ней каштангалемань тувталонок? Арась, весе тувталтнэ ёмавтозь. Кодамо жо коесь тень теизе? Коесь, кона веши тевть? – Аволь. Тень теизе кемемань коесь.

<sup>28</sup>Секскак минь кемекстатано: ломанентень максови Пазонтъ икеле чумовтомочи ансяк кемеманть вельде, допрок аволь Коень топавтоманть вельде.

<sup>29</sup>Ды арази Пазось ансяк еврееень Паз? Арази Сон лия раськетнень туртов аволь Паз? Нама, Сон – лия раськетненьгак Паз,

<sup>30</sup>секс мекс Пазось – вейке. Сон лови Эсензэ икеле чумовтомокс кемемаст коряс керявтозтненьгак ды истя жо кемемаст вельде апак керявтозтненьгак.

<sup>31</sup>Лисни: минь кемеманть эйсэ ёмавттанно-полавттано Коентъ? – Кодаяк арась. Мекевланк, минь Коентъ кемекстатано.

## К Римлянам 4

### Авраамонь кемемазо

<sup>1</sup>Сестэ мезе минь ёвтатано Авраамдо, минек раськенъ кезэренъ пингень тетядонть? Мейсэ сонзэ муевксэзэ?

<sup>2</sup>Бути Авраам ловозель чумовтомокс эсь тевензэ кисэ, сестэ сонензэ, нама, улевель мейсэ каштангалемс – ансяк аволь Пазонтъ икеле.

<sup>3</sup>Вана кода теде кортави Сёрмадовкссонтъ: «Авраам кемезевсь Пазонтень, ды тень кисэ Пазось ловизе сонзэ чумовтомокс».

<sup>4</sup>Важодицянтень питнень пандомась ули се, мезе тензэ эряви тевензэ кисэ, аволь казне.

<sup>5</sup>Мекевланк, бути ломанесь кеми-нежеди аволь эсь тевензэ лангс, ансяк Пазонтъ лангс, кона пежетев ломанентъ лови чумовтомокс, сестэ те кемемантъ кисэ Пазось ловсы сонзэ чумовтомокс.

<sup>6</sup>Текеде арсесь Давид инязороськак, зярдо кортась, кодамо уцяскав се ломанесь, конанъ Пазось лови чумовтомокс тевензэ лангс апак вано:

<sup>7</sup> «Кодат уцяскавт сеть, конатнень зыянов тевест нолдазь-протязь ды конатнень пежетест нардазь!

<sup>8</sup>Кодамо уцяскав се ломанесь, кинень Пазось а путсы чумокс пежетензэ!»

<sup>9</sup>Арази те уцяскась максови ансяк сетненень, кить керявтозь, эли истя жо апак керявтозтнененьгак? Эдь минь Сёрмадовкссто ловнотано: «Пазось ловизе Авраамонь чумовтомокс кемеманзо кисэ».

<sup>10</sup>Зярдо эно сон ульнесь истямокс ловозь? Керявтомадо икеле эли керявтомадо мейле? Нама, керявтомадо икеле, аволь мейле.

<sup>11</sup>Ансяк мейле сон керявтозель. Те керявтомась ульнесь кода тешкс, кона невтизе чумовтомочинзэ, кона максозель тензэ кемеманзо кисэ керявтомадо икеле. Истямо ладсо Авраам кармась улеме тетякс весе сетненень, конатнень Пазось лови чумовтомокс кемемаст кисэ, куш сынъ апак керявтояк.

<sup>12</sup>Истя жо Авраам кармась улеме тетякс керявтозтнененьгак, конат молить сонзэ мельга аволь ансяк керявтоманъ коряс, истя жо се

кемеманть коряскак, кона ульнесь Авраамонь, минек тетянь, уш керявтомадо икеле.

#### Пазонь алтамось весе кемицятненень

<sup>13</sup>Пазось алтась мирэнтъ-масторонтъ максомс Авраамонь ды эйкакшонзо-нуцьканзо кедьс. Те алтамось максозель Авраамнень кемеманзо кисэ, конань коряс Пазось ловизе сонзэ чумовтомокс, аволь сень кисэ, мекс топавтсь Коень вешематненень.

<sup>14</sup>Бути те алтамось максоволь ансяк сетненень, кить топавтыть Коентъ, сестэ ломантненень кемемась улевель стяконь ды Пазонь алтамоськак допрок чаво.

<sup>15</sup>Коесть тарги мельганзо Пазонь кеж; косо арась Кой, тосо арась сонзэ колсемаяк.

<sup>16</sup>Секскак алтамось максозь кемеманть коряс: Пазонь чанстенъ казнекс улеманзо кисэ. Истя Пазонь алтамось улезэ кеме Авраамонь весе эйкакшонзо-нуцьканзо туртов – аволь ансяк сетненень, кить топавтыть Коентъ, истя жо сетнененьгак, кить кемить Авраам ладсо. Сон весенень миненек тетя,

<sup>17</sup>кода ёвтазь Сёрмадовкссо: «Мон теитинь тонь ламо раськенъ тетякс». Истямокс сон улиак Пазонтъ сельме икеле, Пазонтъ, конанень сон кемсь, кона велявты кулозтненень эрямос ды кона Эсь валсонзо свал теи од, мезесь икеле эзь ульне.

<sup>18</sup>Зярдо уш а мезе лангс ульнесь кемемс-нежедемс, Авраам ялатеке седейнежедькс марто кемсь: сон карми улеме ламо раськенъ тетякс, неть валтнэнь коряс: «Тонь эйкакштнэде-нуцькатнеде кармить улеме истя жо пек ламо».

<sup>19</sup>Ды сонзэ кемемась эзь лавшомгадо, куш сон содась: сонензэ малав уш сядо иеть, цёрань виезэяк маштсь, ды нинзэяк потмозо умок чувтомозель.



<sup>20</sup>Сон эзь кавтолдозеве, ялатеке кемсь Пазонь алтамонтень ды кемеманть вельде пештявсь вийсэ. Сон шнась Пазонтъ

<sup>21</sup>ды пек кемсь: Пазонтъ ули виезэ теемс сень, мезе алтась.

<sup>22</sup>Те кемеманть коряс Пазось ловизе Авраамонь чумовтомокс.

<sup>23</sup>Сёрмадовксонь неть валтнэ «ловизе чумовтомокс» ёвтавить аволь ансяк Авраамнень,

<sup>24</sup>истя жо миненеккак. Пазось минеккак ловсамизь чумовтомокс, зярдо минь кемтяно Сенень, Кие вельмевтизе кулозьстэ Иисусонь, минек Азоронтъ.

<sup>25</sup>Пазось максызе Христосонь куломас пежетьстэ ливтеманок кисэ ды кулозьстэ вельмевтизе минек чумовтомокс ловоманок кисэ.

## **К Римлянам 5**

### **Минь ней ловозь чумовтомокс**

<sup>1</sup>Минь ней ловозь чумовтомокс кемемань коряс, ды секс ладязь эрятано Пазонтъ марто минек Иисус Христос Азоронтъ вельде.

<sup>2</sup>Те Сон панжизе миненек кинть совамс кемеманть вельде те чанстентень, конасонтъ минь ней эрятано-аштетяно. Ней минь кенярдозь седейнежедькс марто учотано сень, зярдо миньгак соватано Пазонтъ марто Сонзэ инексчинтень.

<sup>3</sup>Ды минек кенярксось аволь ансяк теньсэ. Минь кенярдтано истя жо пиштематнененьгак-майсематнененьгак, секс мекс содатано: пиштемась чачты-касты цидярдома,

<sup>4</sup>цидярдомась – кеме обуця, кеме обуцясь максы тенек седейнежедькс.

<sup>5</sup>Ды те седейнежедьксэсь а манчи-визделгавтни минек, секс мекс Пазось валызе минек седейтнес Эсь покш вечкеманзо – Иневанькс Оймеялтонть вельде, конань Сон миненек максызе.

<sup>6</sup>Минек арасель виенек лездамс эстенек. Сестэ Пазонь путовт шкасто Христос кулось минек, пежетев ломантнень, кисэ.

<sup>7</sup>А содан, муеви-арась вейкеяк истямо ломань, конань улевель мелезэ куломс мик Коень топавтыцянтъ кисэ. Паряк, кияк анок максомс прянзо алкуксонь паро ломанень кисэ.

<sup>8</sup>А вана Христос кулось минек кисэ сестэ, зярдо минь ульнинек пежетевть! Истя Пазось невтизе миненек, кода Сон вельть вечксамизь.

<sup>9</sup>Бути Пазось Иисусонь верентъ вельде ловимизь ней чумовтомокс, сестэ Иисус седеяк идесамизь Пазонь кежентъ эйстэ.

<sup>10</sup>Бути минь ладинек Пазонтъ марто Сонзэ Цёранзо куломанть вельде сестэ, зярдо ульнинек Сонензэ душманокс, – ней жо, зярдо минь Сонзэ марто уш ладязь, седеяк пек идевтяно Пазонь Цёранть эрямонзо вельде.

<sup>11</sup>Ды те зярс аволь весе! Минь кенярдтанояк минек Пазонтъ эйсэ, секс мекс минь ладязь Пазонтъ марто минек Иисус Христос Азоронтъ вельде.

### **Адам ды Христос**

<sup>12</sup>Пежетесь совась масторонтъ лангс вейке ломань вельде. Куломаськак сась пежетентъ марто. Истя куломась стардсынзе весе ломантнень, секс мекс весе совась пежетесь.

<sup>13</sup>Моисеень Коентъ максомадо икелеяк пежетесь уш ульнесь масторонтъ лангсо; ансяк тосо, косо арась Кой, пежетесь чумокс а ловови.

<sup>14</sup>А вана Адамонь эрямо шкасто саезь Моисей видьс куломась ульнесь азорокс весе ломантнень лангсо, натой сетнень лангсожак, кить эзь колсе Пазонтъ кармавтоксо, кода тейсь Адам. Адам ульнесь Се ломанентъ ёнов молицякс, Кинень эряволь самс седе мейле.

<sup>15</sup>Ансяк Адамонь теевть пежетесь кодаяк а вейкетстави Пазонь чанстентъ марто. Вейке ломанень теевть пежетесь, нама, кандсь кулома

весе ломантненень. Мекевланк, ламодояк седе покш Пазонь чанстесь ды Сонзэ чанстень казность, конат максовить весенень вейке ломань, Иисус Христос, вельде!

<sup>16</sup>Вейке ломанень пежетесь кодаяк а вейкетствяи Пазонь чанстень марто. Сестэ вейке пежетенть кисэ ульнесь суд ды кежей чумондома. Ней жо ламо теезь пежетень кисэ максови чанстень казность чумосто ливтема.

<sup>17</sup>Вейке ломанень пежетензэ кисэ, ансяк сонзэ вейкенть кувалт, куломась теевсь азорокс. Ансяк пек седе покш се, мезе тейсь вейке Ломань, Иисус Христос. Сеть, кинень сюпавсто-важовсто максозь Пазонть пельде чансть ды чумовтомочинь казне, кармить эрямо ды улеме азорокс Христосонь кувалт.

<sup>18</sup>Секс лисни: кода вейкень пежетесь кандсь кежей чумондома весе ломантненень, истя жо вейкень видечись теи весе ломантненень Пазонть икеле чумовтомокс ды кази тенст эрямо.

<sup>19</sup>Кода вейкень, Адамонь, а кунсоломась теинзе весе ломантненень пежетевекс, истя жо вейкень, Иисусонь, кунсоломась теи весе ломантненень Пазонть икеле чумовтомокс.

<sup>20</sup>Моисеень Коезь максозель мейле пежетевчинь ламолгадоманть кисэ. Ды вана зярдэ ламолгадсь пежетевчись, сестэ седеяк пек кассь-лаболгадсь Пазонь чанстесь.

<sup>21</sup>Истя, кода икеле пежетесь ульнесь азорокс ды ветясь куломас, истя жо ней Пазонь чанстеськак ули азорокс ды вети пингедэ пингень эрямос ды чумовтомочис минек Иисус Христос Азоронть вельде.

## К Римлянам 6

**Ловодо прянк кулозекс пежетенть туртов – эрицякс Христосонь туртов**

<sup>1</sup>Истямо ладсо, мезе ёвтамс тень коряс? Карматано, кода икелеяк, тейнеме пежетть, Пазонь чанстень кастомга? Кодаяк арась!

<sup>2</sup>Минь пежетенть туртов кулынек! Кода эно миненек седе тов эрямс пежетьсэ?

<sup>3</sup>Арази тынь а содатадо: зярдо минь нававтынек прянок Христос Иисус марто сюлмавомань кисэ, теньсэ уш весе минь кулынек Сонзэ марто.

<sup>4</sup>Истямо ладсо, нававтомсто минь кулынек Сонзэ марто ды ульнинек калмазь Сонзэ марто вана мекс: кода Христос кулозьстэ вельмевтезь Тетянтъ инекчинзэ вийсэ, истя жо миньгак карматано эрямо од эрямосо.

<sup>5</sup>Эдь бути Сонзэ куломась кармась улеме теке минек куломакс ды теньсэ минь сюлмавинек-тапардавинек мартонзо вейс, сестэ минь Сонзэ ладсо ультяно вельмевтезьгак мартонзо од эрямос.

<sup>6</sup>Минь содатано: икелень ломанесь минек эйсэ кулось Христос марто крёст лангсо сень кисэ: кадоволь вийтемекс минек пежетев обуцянок, ды истя минь лоткавлинек улеме пежетенть урекс.

<sup>7</sup>Эдь кулозесь олякстомтозь пежетенть эйстэ.

<sup>8</sup>Минь кемтяно: бути кулынек Христос марто, сестэ эрямож карматано мартонзо.

<sup>9</sup>Эдь минь содатано: Христос, кона кулозьстэ вельмесь, ней, нама, зярдож а кулы. Куломанть уш арась азорксчизэ Сонзэ лангсо.

<sup>10</sup>Зярдо Христос кулось, Сон весть ды допрок кулось пежетенть туртов. Эрямось, конаньсэ Сон ней эри, алгазь Пазонтъ туртов.

<sup>11</sup>Истя тыньгак, конат сюлмазь минек Христос Иисус Азоронтъ марто, ловодо эсь прянк кулозекс пежетенть туртов ды эрицякс Пазонтъ туртов.

<sup>12</sup>Кадык пежетесь а ули уш азорокс тынк кулыця рунгонтъ лангсо, ды илядо кунсоло сонзэ визьксэнь мельтнень.

<sup>13</sup>Илинк максо пежетентень рунгонь кодамояк пельксэнк берянь темень теема кедьёнксокс. Мекевланк, алтынк эсь прянк Пазонтень, кода

ломанть, конат ютасть куломасто эрямос. Эсь рунгонь пельксэнккак максынк Пазонтень паро тевень теема кедьёнксокс.

<sup>14</sup>Кадык пежетесь уш а ули тынк азорокс, секс мекс тынь ней эрятадо Пазонь чанстенть ало, аволь Коенть ало.

**Тынь олякстомтозь пежетенть эйстэ**

<sup>15</sup>Истя мезе эно? Паряк, карматано тейнеме пежетть, бути минь ней эрятано Пазонь чанстенть ало, аволь Коенть ало? Кодаяк арась!

<sup>16</sup>Арази тынь а содатадо: бути тынь максынк эсь прянк киньгак кедь алов, сестэ тынь алкуксккак кармиде улеме сень урекс, кинь кунсолотадо? Эли тынь уреть пежетентень, мезесь вети куломас, эли тынь Пазонь кунсолиця уреть, мезесь вети тынк Сонзэ икеле чумовтомочис.

<sup>17</sup>Тынь зярдо-бути ульниде пежетень урекс. Ней, – сукпря Пазонтень, – весе седейсэнк кармиде кунсолосо се тонавтоманть, конань алов тынь максозядо.

<sup>18</sup>Тынь олякстомтозь пежетень урексчистэ, паронь теиця урекс улемга.

<sup>19</sup>Монень савкшны теде ёвтнемс се кельсэнтъ, конасонтъ весе свал кортыть, секс мекс лиякс тынь а чарькодтядо. Тынь икеле максынк рунгонь весе пельксэнк аваньксчинь ды койтемечинь урексчис, кона ветясь койтеме эрямос. А ней вана максынк рунгонь весе пельксэнк паро тевень урексчис, кона ветятадызь Пазонтень алтазь эрямос.

<sup>20</sup>Зярдо тынь ульниде пежетень урекс, сестэ тынь ульниде олясо паро тевень теемадо.

<sup>21</sup>Кодамо жо лезэ тынь саиде тень эйстэ? Саиде сень, мезде ней виздтядо, секс мекс сонзэ пезэ – кулома.

<sup>22</sup>Ней жо тынь олякстомтозь пежетенть эйстэ ды теевиде Пазонтъ “урекс”. Весе тынк эрямонк уш ней алтазь Пазонтень, ды сонзэ песэ максови тыненк пингеде пингень эрямо.

<sup>23</sup>Пежетесь панды эсь уренстэнь куломасо. Пазось Эсь чанстензэ коряс кази пингде пингень эрямо минек Христос Иисус Азоронтъ марто.

## **К Римлянам 7**

### **Тынь олякстомтозь Моисеень Койденть**

<sup>1</sup>Кемиця ялгат, ней мон тыненк карман кортамо, кода сетненень, кие соды, мезе истямо Коесь. Тынь, нама, содатадо: Коесь кирди азорксчи ломаненть лангсо ансяк сонзэ эрямо шкасто.

<sup>2</sup>Невтевксэкс, мирде эшсэ аванть Коесь сьолми мирденстэнь, зярс мирдесь эри. Бути мирдесь кулы, сестэ сон олякстоми Коенть эйстэ, кона сьолмилъ эйсэнзэ мирдентень.

<sup>3</sup>Бути нись мирдень пингестэ туи лиянень, сестэ сонзэ ловсызь ускурицякс. Бути мирдесь кулы, нись олякстоми те коенть эйстэ ды сестэ уш сонзэ а ловсызь ускурицякс, бути лиси лия мирденень.

<sup>4</sup>Истя эрси тынк мартояк, кемиця ялган: Христосонь куломсто тыньгак, кода Сонзэ рунгонь пелькст, кулыде Коенть туртов. Ней кармиде улеме Лиянь, – Сень, Кона вельмевтезь кулозьстэ. Истя минь карматано лезэвстэ важдеме Пазонтень.

<sup>5</sup>Зярдэ минь эринек колазь обуцянок коряс, сестэ пежетев бажамотнень, конатнень кирватсь Коесь, ульнесь виест минек рунгонть лангсо ды минь лезэвстэ важдинек ансяк куломантень.

<sup>6</sup>Ней вана минь олякстомтозь Коенть эйстэ, секс мекс минь кулынек сенень, мезесь икеле кирдсь минек эсь кедензэ ало. Ней минь важдтяно Пазонтень одкс, Оймеялтонть ветямонзо коряс, аволь кода икеле, зярдэ эринек сёрмадозь Коенть коряс.

### **Коесь ды пежетесь**

<sup>7</sup>Мезе тень эйстэ лисни? Арази сонсь Коесь пежетев? Кодаяк аволь! Ансяк Коенть вельде мон карминь содамо пежетенть эйстэ. Бути Коесь аволь ёвта: «Иля кайсе сельметь...», мон аволинь содаяк, мезе истямо сельмень кайсемась.

<sup>8</sup>Пежетесь нолдызе тевс Коень те кармавтоксонть ды сонзэ вельде кирвазевтсь монь эйсэ эрва мезе лангс сельмень кайсемат. Эдь Койтеме – пежетесь кулозь.

<sup>9</sup>Ульнесь шка, зярдон мон Коенть а содылия ды ялатеке эринь. Зярдон карминь содамо Коень кармавтокстонть, сестэ кармась эрямо пежетеськак –

<sup>10</sup>ансяк монсь кулынь. Истямо ладсо кармавтоксоось, кона путозель эрямонь максыцякс, кандсь монень кулома.

<sup>11</sup>Пежетесь, кона те кармавтоксонть нолдызе тевс, сонзэ вельде манимим ды маштымим.

<sup>12</sup>Сонсь Коесь ялатеке максозь Пазонть пельде, ды сонзэ кармавтоксооськак иневанькс, виде ды паро.

<sup>13</sup>Истя, лисни: арази те парось кандсь монень кулома? Кодаяк аволь! Тень теизе пежетесь, конась истя невтизе эсензэ алкуксонь чачонзо: сон нолдызе тевс те паронть ды кандсь монень кулома. Истя, кармавтоксонть вельде теевсь седеяк чарькодевиксэкс, кодамо тандавкс пежетесь!

#### **Паронь ды зыянонь тюрема**

<sup>14</sup>Минь содатано: Коесь оймаелтонь. А мон колазь обуця марто ломанян ды миезян пежетентень урекс.

<sup>15</sup>Монень допрок а чарькодевить эсь теевть тевень: мезе мелем, сень а теян. Мекевланк, мезесь монень пек а вечкеви, сень теян.

<sup>16</sup>Ды зярдон теян монь сень, мезенть теемс арась мелем, сестэ мон лован Коенть видекс-парокс.

<sup>17</sup>Тень коряс лисни: те зыянонь теи эйсэнь эриця пежетесь, аволь мон.

<sup>18</sup>Мон содан: парось а эри монь эйсэ, лиякс меремс, монь колазь обуцясонть. Мелем ули теемс паро, ансяк сон тень а тееви.

<sup>19</sup>Мон а теян се паронть, конань ули теемс мелем. Мекевланк, теян зьян, конань теемс мелем арась.

<sup>20</sup>Бути мон теян сень, мезенть теемс арась мелем, сестэ те невти: тень теи моньсэнь эриця пежетесь, аволь мон.

<sup>21</sup>Лисни, мон свал неян эсень эйсэ истямо кой: зярдэ ули мелем теемс паро, монь эйстэ лисни ансяк зьян.

<sup>22</sup>Монь потмо мелесь, нама, кеци Пазонь Коентень.

<sup>23</sup>Ансяк эсень эйсэ мон неян лия кой, кона тюри монь превень-седеень коенть каршо. Сон саи монь полонс пежетень коенть алов, кона важоди монь рунгосонть.

<sup>24</sup>Мон пайстомо ломань! Кие монь олякстомтсамам куломань кандыця те обуцядонть?!

<sup>25</sup>Сюкпря Пазонтень – Сон тень теи минек Иисус Христос Азоронть вельде! Лисни истя: мон превсэнь-седейсэнь важдян Пазонь Коентень, а вана колазь обуцясон важдян пежетень коентень.

## К Римлянам 8

### Од эрямо Пазонь Оймеялтонть ветямонзо коряс

<sup>1</sup>Истя, сетнень, кить Христос Иисус марто вейсэндязь, эрить аволь колазь обуцянтъ коряс, а вана Оймеялтонть коряс, Пазось ней мейсэяк а судясынзе.

<sup>2</sup>Эдь Пазонь Оймеялтонть коесь, кона максы эрямо сетненень, кить максызь прят Христос Иисуснэнь, олякстомтымим монь пежетень ды куломань койденть.

<sup>3</sup>Те эзь тееве Моисеень Коентень, кона лавшоль минек колазь обуцянтъ чумонзо коряс, тень теизе Пазось. Кода анокс пежетенек кисэ Сон кучизе масторлангс Эсензэ Цёранзо, кона молиль пежетев ломань ёнов. Истя Сон Христосонь рунгосонть судизе ломанень пежетенть.



<sup>4</sup>Сон тень теизе сень кисэ: топавтомс миненек Коень виде вешематнень, эдь минь эрятано Оймеялтонть коряс, аволь уш колазь обуцянок коряс.

<sup>5</sup>Кить эрить эсест колазь обуцяст коряс, сеть арситькак колазь обуцяст бажамотнень коряс. Кить эрить Оймеялтонть коряс – сеть арситькак Оймеялтонь бажамотнень коряс.

<sup>6</sup>Колазь обуцянь бажамотне ветить куломас, Оймеялтонь бажамотне ветить эрямос ды седейоймамос.

<sup>7</sup>Истямо ладсо, колазь обуцянь бажамотнень коряс эрицятне теевить Пазонть ятокс-душманокс: сынь а максыть пряст Пазонь Коенть алов, ды сыненст сон а максовияк.

<sup>8</sup>Ломантнень, конатне эрить колазь обуцяст коряс, арась виест савтомс Пазонтень.

<sup>9</sup>Ансяк тынь эрятадо Оймеялтонь бажамотнень коряс, аволь колазь обуцянк коряс, бути, нама, тынк эйсэ эри Пазонь Оймеялтось. Кинь эйсэ арась Христосонь Оймеялтось, се аволь Сонзэ.

<sup>10</sup>Бути Христос тынк эйсэ, сестэ рунгось кулозь пежетентень, а вана оймеялтось эри видечинтень.

<sup>11</sup>Пазось вельмевтизе кулозьстэ Иисусонь. Ды бути тынк эйсэ эри Сонзэ Оймеялтось, сестэ самай те Пазось, кие вельмевтизе кулозьстэ Христосонь, тейсынзе эрицякс тынк кульця рунгонккак Эсензэ Оймеялтонть вельде, кона эри тынк эйсэ.

<sup>12</sup>Истя, кемиця ялган, минь долгсотано, ансяк аволь минек колазь обуцянтъ икеле: миненек а эряви теемс сонзэ бажамотнень коряс.

<sup>13</sup>Эдь бути тынь карматадо эрямо колазь обуцянтъ коряс, сестэ кулотадо-ёматадо. Бути Оймеялтонть вийсэ куловтсынк пежетев тевенк, сестэ карматадо эрямо.

<sup>14</sup>Весе, кинь вети Пазонь Оймеялтось, Пазонь эйкакшт.

<sup>15</sup>Оймеялтось, кона тыненк максозь, те аволь урексчинь оймеялт, кона кармавтовлидизь тынк одс пелезь эрямо. Мекевланк, тыненк максозь Оймеялт, кона тынк теидизь Пазонь эйкакшокс! Те Сон сыргавты эйсэнк тердеме Пазонть: «Абба! Тетяй!»

<sup>16</sup>Сонсь Пазонь Оймеялтось кемевти минек седейёжонтькак: минь Пазонь эйкакштано.

<sup>17</sup>Ды бути минь Сонзэ эйкакштано, сестэ миненек истя жо максови Сонзэ алтавт чанстямось-баславамось. Те скупа чанстямонть Пазось макссы миненек Христос марто вейсэ. Эдь бути минь Христос марто пиштяно-майсетяно, сестэ явсынек Сонзэ инексчинтькак.

#### **Миньгак карматано уleme Пазонь инексчисэнтъ**

<sup>18</sup>Мон кеман: минек неень шкань пиштематне мезекскак а лововить се инексчинть коряс, кона панжови тенек ды учи эйсэнек.

<sup>19</sup>Пазонь весе теевксэсь покш седейризкс марто учи, зярд Пазось апак кекше невьсынзе-яволявтсынзе Эсь эйкакшонзо.

<sup>20</sup>Пазонь весе теевксэсь понгсь пиштеманть-ёмамонть алов – аволь эсь мелензэ коряс. Тень истя аравтызе Пазось кемезь-нежедезь се лангс:

<sup>21</sup>Сонзэ теевксэськак ули олякстомтозь ёмамонь-наксадомань урексчистэ ды явсы Пазонь эйкакшонь олячинть ды инексчинть.

<sup>22</sup>Минь содатано: Пазонь весе теевксэсь те шкас кувси ды пишти прок чачтомсто ава.

<sup>23</sup>Ды кувси аволь ансяк Пазонь теевксэсь, истя жо миньгак, конатненень максозь Оймеялтось, кода Пазонь пельде васенце казне. Миньгак оймесэнек кувсетяно се шканть учозь, зярд Пазось сайсамизь минек кода Эсь эйкакшонзо ды рунгонек-мезнек олякстомтсамизь куломанть эйстэ.

<sup>24</sup>Минь идезтяно – те минек кеме седейнежедьксэнек. Бути минек седейнежедькс марто учомась уш топавтоволь, сестэ а мезекс улевель те учомась. Кие жо седейнежедькс марто учни сень, мезень уш неи!

<sup>25</sup>Ды бути минь нежедтяно-кемтяно мезе-бути лангс, кона зярс анеявикс, сестэ минь учотанояк сонзэ цидярдозь ды кеместэ.

<sup>26</sup>Ды тесэ Оймеялтось сы тенек лездамо: эдь минь лавшотано ды а содатано, кода эряви тенек озномс. Сестэ Оймеялтось Сонсь озны-энялды минек кисэ кувсематнесэ, конат а ёвтавить валсо.

<sup>27</sup>Ды Пазось, кона чарькодъсынзе минек седеенек, соды, мезде арси Оймеялтось, секс мекс Оймеялтось озны-энялды Пазонь ломантнень кисэ Пазонь меленть коряс.

<sup>28</sup>Минь содатано: весемесь велявты парокс сетненень, кить вечксызь Пазонтъ, ды конатнень Сон тердинзе Эсь мелензэ-арсеманзо коряс.

<sup>29</sup>Те сеть, конатнень Пазось кочкинзе умок, зярдэ сынъ арасельтькак, ды аравтынзе улемс Эсь Цёранзо ёнов молицякс. Истямо ладсо, Сонзэ Цёрась карми уleme васенцекс ламо ялакстнэнь-сазортнэнь ютксо.

<sup>30</sup>Конатнень Пазось аравтынзе, сетнень тердинзаяк; конатнень тердинзе, сетнень ловинзе чумовтомокскак; конатнень ловинзе чумовтомокс, сетнень марто явизе инексчинзаяк.

#### **Пазонь вечкемась**

<sup>31</sup>Мезе эно ёвтамс весе тень коряс? Бути Пазось минек кисэ, сестэ кинь ули виезэ аштемс минек каршо?

<sup>32</sup>Киньгак арась! Эдь Пазось эзизе жаля мик Эсь Цёранзояк, конань максызе куломас весень минек кисэ. Бути Сон максызе эсь Цёранзо, сестэ Сон миненек макссы весементь лиянтъкак!

<sup>33</sup>Кинень чумондовить Пазонь кочкавтнэ? Киненьгак! Эдь Сонсь Пазось сынст ловинзе чумовтомокс!

<sup>34</sup>Кинь эно ули виезэ сынст судямс? Киньгак! Эдь Христос Иисус кулось, ды те допрок аволь весе: Сон кулозьстэ вельмевтезьгак ды ней ашти Пазонтъ вить кедензэ ёно ды озны-энялды минек кисэ!

<sup>35</sup>Кие эно минек явсамизь Пазонь вечкеманть эйстэ? Паряк, пиштема, стакачить, пансемат, вачочи, арасьчи, пелемачи, кулома..?

<sup>36</sup>Сёрмадовкссо ёвтазь: «Тонь кисэ минь свал кулома лангсо, минек ловить ревекс, конатнень ветить пеель алов».

<sup>37</sup>Ансяк весе неть стакачитнестэ минь листяно ине изницякс Сень вийсэ, Кинень минь вечкевинек.

<sup>38</sup>Мон кеман: мезеяк – куломаськак, эрямоськак, ангелтнэяк, менелень лия прявтнэяк, вийтнеяк, неень пингеськак, сыця пингеськак,

<sup>39</sup>верце вийтнеяк, алце вийтнеяк ды Пазонь кодамояк лия теевксэськак – а явсамизь минек Пазонь вечкеманть эйстэ, кона тенек невтезь минек Христос Иисус Азоронть вельде!

## **К Римлянам 9**

### **Израиль ды Пазонь алтамотне**

<sup>1</sup>Мезе мон ней ёвтан – те видечи. Мон Христосонь ломанян ды секс а кенгелян. Тень кемексты монь оймеёжось, конань вети Иневанькс Оймеялтось.

<sup>2</sup>Пек покш монь ризксэм, ды седейсэнь палы алотксиця сэредькс

<sup>3</sup>монь раськень ялгатнень-оятнень кисэ, конат монень малавикст верень коряс. Мон маласан се мелентень: сынст кисэ седе паро монень эстенъ улемс сюдозь ды явозь Христос эйстэ.

<sup>4</sup>Сынь жо израилень ломанть: те сынст теинзе Пазось Эсензэ эйкакшокс, сынест невтизе Эсь инексчинзэяк. Сынст марто Сон сюлмась вейсэнълувт, макссь тенст Кой, истя жо Пазнэнь видестэ ознома-сюкопямо ды ламо алтамоткак.

<sup>5</sup>Сынст ульнестъ кезэрень пингень ине тетятнеяк, те раськентъ ютксо ломанекс чачсь Христоскак. Сон весемеде ине, пингеде пингес шназь-чанстязь Паз! Аминь.

<sup>6</sup>Тень коряс а лисни, буто Пазось эзизе топавто Эсь алтамонзо. Эдь аволь весе, кить Израильстэ, алкукс Пазонь кочкавт ломанть.

<sup>7</sup>Ды аволь весе Авраам эйстэ чачицятне-касыцятне – Сонзэ алкуксонь эйкакшонзо. Эдь Пазось мерсь Авраамнень: «Тонь раськесь туи-рашты ансяк Исаконь пельде».

<sup>8</sup>Лиякс, Авраамонь пельде аволь весе чачозь эйкакштнэ лововить Пазонь эйкакшокс, ансяк сетне, конатнень чачомаст ульнесь алтазь Пазонть пельде.

<sup>9</sup>Авраамнень те алтамось ульнесь вана кодамо: «Мон таго сан тонеть теке шкастонть иень ютазь, ды Саррань карми улеме цёразо».

<sup>10</sup>Истя ульнесь аволь весть. Ревеккань\* кавтаськеть цёратнень ульнесь секе тетяст, минек покштысь Исак.

<sup>11-12</sup>Зярдо эйкакштнэ эзть чачокшнояк ды эзть кенере тееме парояк, беряньгак, уш сестэ Пазось Ревекканень ёвтась: «Покшось карми улеме вишкинентень важокс». Теньсэ Пазось невтизе: Сон кочкась Эсь мельсэнзэ, ансяк тердеманзо коряс, аволь ломаненть тевензэ коряс.

<sup>13</sup>Сёрмадовкссонтъ истя ёвтазьгак: «Яковонь мон кочкия – Исав Монень а эряви».

<sup>14</sup>Мезе эно ёвтамс тень коряс? Нать Пазось теи авидестэ? Кодаяк аволь!

<sup>15</sup>Моисейнень Пазось мерсь: «Кинень ули мелем путомс седеймарямо, сенень путангак. Кинь ули мелем жалямс, сень жалясяк».

<sup>16</sup>Лисни, весе те тееви Пазонь седеймарямонть коряс, аволь ломанень мелень эли виень коряс.

<sup>17</sup>Сёрмадовкссо Пазось корты фараононтень\*: «Мон тонь теитинь инязорокс вана мекс: невтемс тонь лангсо Монь виенть, ды весе масторланганть теемс содавиксэкс Монь лементь».

<sup>18</sup>Лиякс меремс, Пазось Эсь мелензэ коряс вейке ломанентень путы седеймарямо, лиянтъ Эсь мелензэ коряс тейсы калгодо седеекс.

### Пазонь кежесь ды седеймарямось

<sup>19</sup>Кияк тынк эйстэ, паряк, ней монь кевкстьсамам: «Сестэ мекс эно Пазось чумонды ломантнень? Арази киньгак саты виезэ модемс Сонзэ меленть каршо?»

<sup>20</sup>А вана кият тон истямось, пайстомо ломань, кона пельксты-спори Пазонт марто? Арази чакшось мери чакшонь теицянтень: «Мекс тон монь истямокс теимик?»

<sup>21</sup>Мезе, арази чакшонь теицянт арась олязо теке сёвоньстэнт теемс питней кедьге ды истяконь кедьгеяк?

<sup>22</sup>Истя тейсь Пазоськак: Сон бажась невтемс Эсь кежензэ ды виевчинзэ. Ялатеке Сон кувать кирдсь неть “кедьгетнень”, конатне Сонзэ кеждясть ды конатнень эрявсь ансяк тапамс.

<sup>23</sup>Теде башка Сон путсь мель невтемс Эсь покштояк покш инексчинзэ неть “кедьгетнень” лангсо, конатнень Сон Эсь седеймарямонзо кувалт умок уш анокстынзе инексчинтень.

<sup>24</sup>Седеймарямонь кедьгетне – те минь. Те минек тердимизь Пазось – ды аволь ансяк еврейтнень, истя жо лия раськенсетненьгак.

<sup>25</sup>Тень эйстэ Сон корты Осия пазмарицянт вельде: «Раськенть, кона икеле ульнесь аволь Монсень, ней ловса Монсень раськекс, авечкевиксэнт – вечкевиксэкс.

<sup>26</sup>Ды секе таркасонть, косо Пазось мерсь тенст: “Тынь аволь Монсетне”, – ней сынст ловсызь эриця Пазонь эйкакшокс».

<sup>27</sup>А вана Израиленть коряс Исаяя ранги: «Куш Израилень ломантнеде улелельтькак вельть ламо, кода иневедень чувар, ялатеке идезь улить аламот, ансяк кадовикстнэ».

<sup>28</sup>Эдь Азорось теवंть тейсы педэ пес ды куроқ топавтсы видечинь коряс. Апак кавтолдо Сон сонзэ прядсы мирэнт-масторонт лангсо.

<sup>29</sup>Сестэ тееви истя, кода икелев ёвтызе Исаяя: «Бути Весемькирди Азорось аволь кадо миненек буень-раськень зярыя поладыцят, сестэ

минек марто улелель секе жо, мезе теевсь Содомонь ды Гоморрань эрицятнень марто».

### **Израиль ды Кенярксов кулясь**

<sup>30</sup>Мезе эно ёвтамс тень коряс? Лия раськетне, конат эзь вешне Пазонть икеле чумовтомочи, ловозь чумовтомокс, ансяк те чумовтомокс ловомась – кемеманть кисэ.

<sup>31</sup>Секе шкастонть Израилень раськесь вешнесь кой, конань вельде Пазонть икеле лисемс чумовтомокс, ды те коенть эзизе мие.

<sup>32</sup>Мекс? Сень кувалма, мекс сын арсесть нежедемс коень тевтнень лангс, аволь кемеманть лангс. Истя те раськесь пупордявсь “пупордявома кевс”,

<sup>33</sup>конадо Пазось ёвтась Сёрмадовкссо: «Кунсолодоя: Мон путан Сионс Кев, конань эйс пупордявить, Кевпандо, конань эйс эшкевить. Ансяк кияк Сонензэ кемицятнеде а ули совавтозь визьксчамас».

### **К Римлянам 10**

<sup>1</sup>Кемиця ялгат, монь сехте покш седей пултыця бажамом – те тиринь Израилень раськенть идемась, ды тень кисэ мон ознан Пазонть икеле.

<sup>2</sup>Мон яволятнян: сын пиить-палыть Пазонть мелензэ топавтомадо, ансяк тень коряс сынст арась алкуксонь содамочист.

<sup>3</sup>Сын эзизь чарькоде, кода Пазось лови ломантнень чумовтомокс, ды бажить кемекстамс чумовтомочист эсест тевест вельде. Истя сын эзизь максо прят се чумовтомокс ловомантень, кона Пазонть пельде.

<sup>4</sup>А вана Христос – Коенть топавтыцязо ды пезэ: ней эрвась, кие кеми Тензэ, се ули ловозь чумовтомокс Пазонть икеле.

### **Идемась максови весенень**

<sup>5</sup>Моисей сёрмады се чумовтомочиденть, конанень ломантне бажить пачкодемс Коенть вельде: «Ансяк се, кие топавты Коень весе вешематнень, сонзэ вельде карми эрямо».

<sup>6</sup>А се чумовтомочиденть, кона максови кемеманть вельде, Сёрмадовкссо кортави истя: «Иля кевкстне эсь прят: Кие кепедеви менельс?» – лиякс меремс: Христосонь мода лангс валтомга.

<sup>7</sup>«Ды иля кевкстне эсь прят: Кие валги тоначинь потмакстомо отьмас?» – лиякс меремс: Христосонь кулозтнень ютксто велявтомга.

<sup>8</sup>Мезде жо корты Сёрмадовксоь: «Пазонь валось тонь вакссот – тонь кургсоткак ды тонь седейсэтькак». Те улияк кемемадо валось, конань минь ёвтнетяно.

<sup>9</sup>Бути тон кармат эсь кургосот весеме икеле ёвтнеме: Иисус – Азоро, ды кармат седейсэть кемеме: Пазось Сонзэ вельмевтизе кулозьстэ, – сестэ улят идезь.

<sup>10</sup>Эдь кие кеми седейсэ – се ловови чумовтомокс, ды кие ёвтни эсь кургосонзо – се идеви.

<sup>11</sup>Сёрмадовксоь корты: «Кияк Сонензэ кемицятнеде а ули совавтозь визьксчамас».

<sup>12</sup>Те тевсэнтъ арась авейкетъксчи еврейтнень ды лия раськенсетнень ютксо. Эдь Азорось весень вейке ды сюпавсто кази весень, кие Сонзэ тердьсы лездыцякс.

<sup>13</sup>Эдь сёрмадозь: «Эрьвась, кие тердьсы Азоронтъ лездыцякс, – идеви».

<sup>14</sup>Ансяк кода эно сыненст тердемс лездыцякс Сень, конанень а кемить? Кода сыненст кемемс Сенень, конадо эзь марсе? Кода сын марясызь, бути кияк сыненст а пачти куля?

<sup>15</sup>Кие карми пачтямо куля, бути сонзэ кияк эзизе кучо? Сёрмадовксоь корты: «Вай, кода паро неемс сэтьмелувдо ёвтницятнень, Кенярксов кулянь пачтицятнень, самост!»

#### **Аволь весе кунсолость Кенярксов кулянтъ**

<sup>16</sup>Ансяк аволь весе парсте вастызь Кенярксов кулянтъ. Сонсь Исайя корты: «Азором! Кие кемезевсь сенень, мезе марясь минек пельде?»



<sup>17</sup>Истя, кемемась чачи Кулянтъ марямсто, ды Кулясь ёвтневи Пазонь валонть пачтямсто.

<sup>18</sup>Ней мон кевкстнян: Арази сынъ зярдояк эзизь марсе Кулянтъ? Нама, марсизь! Эдь Сёрмадовкссо кортави: «Весе масторланганть гайгезевсть сынст вайгелест, мирэнтъ-масторонть пес пачкодсть сынст валост».

<sup>19</sup>Мон таго кевкстнян: Арази Израиль эзь чарькоде? Уш Моисей Пазонтъ пельде тенст ёвтась: «Мон сыргозтян эйзэнк сельмень сявадома раськентъ вельде, кона раськеккак а ловови. Ачарькодиця раськентъ вельде Мон сыргозтян эйзэнк кеж!»

<sup>20</sup>Исайя Пазонтъ пельде седеяк смелстэ корты: «Монь муимизь сетне, конатне Монь эзь вешне. Мон невтия-яволявтыя прям сетненень, конатне Мондень эзь кевкстне».

<sup>21</sup>А вана Израильде сон корты: «Чинь чоп Мон стяко венстнинь кедень акунсолыця ды каршо молиця раськентень».

## К Римлянам 11

### Пазось эзизе кадо Эсь раськензэ

<sup>1</sup>Секкак мон кевкстнян: Арази Пазось кадызе Эсь раськензэ? Нама, эзизе! Мон монськак израилень ломань, Авраамонь раськенть поладыця, Вениаминэнь буестэ.

<sup>2</sup>Эзизе кадо Пазось Эсензэ раськентъ, конань Сон умок уш кочкизе Эсензэкс. Арази тынь стувтынк, мезе корты Сёрмадовксоь се таркасонть, косо Илия пеняци Пазонтень Израиль лангс:

<sup>3</sup>«Азором, сынъ чавнызь Тонь пазмарицятнень, калавтнизь Тонь аноксонь алтартненьгак. Мон кадовинь ськамон, ды моньгак сынъ арсить маштомс?»

<sup>4</sup>Мезе мерсь каршонзо Пазось? – «Мон ванстынь Эстенъ сисем тэжат ломанть, конат эзь пра кумажа лангс аволь алкуксонь Бал пазонтъ\* икеле».

<sup>5</sup>Истя неень шкастояк ванстовсь “кадовкс”, конань Пазось кочкизе Эсь чанстензэ коряс.

<sup>6</sup>Те кочкамось – Пазонтъ чанстензэ коряс, аволь темень коряс. Бути те кочкамось теевель ломантнень тевест коряс, сестэ те чанстесь допрок аволь уле чанстекс. А бути те теевель тевтнень коряс, сестэ те уш аволь уле чанстекс, ды сестэ тевеськак уш аволь уле тевекс.

<sup>7</sup>Мезе тень эйстэ лисни? – Израиль эзь пачкоде сень эйс, мезес бажась. Пачкодсть тенень аламот, ансяк кочказтне, а вана лиятнень калгодкстомсть седеест.

<sup>8</sup>Тень эйстэ истя корты Сёрмадовксось: «Пазось кучсь лангозост оймень-седеень чополгадама: течинь чис а неить сынст сельместкак ды а марить пилесткак».

<sup>9</sup>Давид инязороськак корты: «Кадык сынъ понгить кундамкас каванямо шкастост! Кадык сынъ прыть туворс, ды кадык сы тенст чумонь пандома!

<sup>10</sup>Кадык сынст сельмест вельтявить чоподасо ды лоткить неемадо! Пингезэст мендить сынст карязост!»

#### **Лия раськетнень идемась**

<sup>11</sup>Секскак мон кевкстнян: Арази еврейтне пупордясть ды допрок прасть? Нама, эзь! Сынст пупордямонть кувалт идема сась лия раськетненень, ды те сыргозтсь еврейтнень эйсэ сельмень сьвадома.

<sup>12</sup>Бути жо еврейтнень пупордямось кандсь масторлангонтень чанстямо-баславамо, ды бути сынст кажовчись макссь лия раськетненень сюпавчи, сестэ седеяк покш ули се чанстямонь сюпавчись, зярдэ весе еврейтне велявтыть Пазонтень!

<sup>13</sup>Ней мон пшкадян тыненк, лия раськенъ ломанть: мон лия раськетнень апостол ды ёвтан сюкпря Пазонтень монень максозь важдеманть кисэ.

<sup>14</sup>Паряк, истя монень сыргозтеви сельмень сьвадома тынк лангс монь масторонь ломантнень эйсэ, ды конат-конат эйстэст идевить.

<sup>15</sup>Бути еврейтнень эйстэ Пазонтъ велявтомась панжсь лия раськетненень Пазонтъ марто ладямонь ки, мезе эно ули сестэ, зярдо Пазось сынст мекев сайсынзе? Те ули кулозьстэ вельмема!

<sup>16</sup>Бути чапаксонть васенце пельксээ алтазь Пазонтень, сестэ Сонензэ алтазь весе чапаксоськак. Ды бути чувто корёнтнэ-ундокстнэ алтазь Пазонтень, сестэ Сонензэ алтазь тарадтнэяк.

<sup>17</sup>Конат-конат пирень ойумарьксэнь тарадтнэ ульнестъ синтрезь, ды тон, вирень ойумарьксэнь тарад, ульнить педявтозь сынст таркас.\* Истя тон вейсэндявить пире ойумарьксэнь ундокстнэненень, конатнень вийсэ эри чувтось.

<sup>18</sup>Секскак тон иля покшкавтне прят сетнень икеле, конат ульнестъ синтрезь кода алкуксонь тарадт! А мейсэ тонеть покшкавтнемс прят! Эдь ундокстнэ максыть тонеть вий, аволь тон ундокстнэненень.

<sup>19</sup>Паряк, тон ёвтат: «Нетъ тарадтнэ ульнестъ синдезь монь педявтоманть кисэ».

<sup>20</sup>Те виде. Сынъ синдезь акемемаст кисэ, а вана тон сынст таркасо аштят кемемат кувалт. Ялатеке прят пек верьга иля кандо, – пельть!

<sup>21</sup>Бути Пазось эзинзе жаля еврейтнень, кода алкуксонь тарадтнэнь, арсят, тонь жалятанзат?

<sup>22</sup>Вант, Пазось чевте седейгак ды калгодояк. Калгодо Сон Эйстэнзэ потыцятненень, а тонеть чевте седей, бути седе товгак кармат кирдевеме Сонзэ чевте седейсэнтъ. Бути а кармат, – сестэ Пазось тоньгак керятанзат.

<sup>23</sup>Ды бути еврейтнеяк кадсызь эсь акемемаст, сестэ сынъ улить велявтозь тарказост. Пазонтъ ули виезэ одс педявтомс сынст чувтонтень.

<sup>24</sup>Ды бути тон керязь вирень ойумарьксстэ, конаньсэ ульнить чачомань коряс, ды педявтозь чачома коенть каршо пиренсентень, сестэ Пазонтень седеяк шожда ули мекев педявтомс неть алкуксонь тарадтнэнь эсь чувтост лангс.

### Израилень идемась

<sup>25</sup>Монь мелем, кемиця ялгат, панжомс тенк вейке салавачи, кона вансттадызь тынк ансяк эсь превейчинк лангс нежедемадонть: седеень калгодьксчись, конаньсэ ашти Израилень раськень пельксэсь, те аволь свал шкас. Сон таргави ансяк семс, зярс лия раськень ломантне, конатнень аравтынзе Пазось, а велявтыть Тензэ.

<sup>26</sup>Ды сестэ весе Израилесь ули идезь, кода тенде корты Пазонь пельде Сёрмадовксоськак: «Олякстомтыцясь сы Сионсто ды Яковонь раськенть поладыцянзо ванськавтсынзе зыяндонть.

<sup>27</sup>Ды Мон тейса сынст марто те вейсэньлувонть, зярдю нардасынь пежетест».

<sup>28</sup>Еврейтне – Пазонтень душмант, секс мекс эзизь васто Кенярксов кулянтъ, мезесь моли тынк лезэс. А вана кезэрень пингень ине тетяст кисэ сынъ – Пазонтень вечкевикст, секс мекс сынъ – Пазонь кочкавт раське.

<sup>29</sup>Пазось а полавтни Эсь казнензэ ды тердеманзо.

<sup>30</sup>Тынь зярдю-бути ульниде Пазонь а кунсолицякс, ансяк ней тыненк максозь Пазонь седеймарямо еврейтнень а кунсолост кис.

<sup>31</sup>Истя еврейтнеяк ней Пазонь а кунсолицят, ды истя жо сыненсткак ней максови Пазонтъ седеймарямо – тыненк максозь седеймарямонть кувалт.

<sup>32</sup>Пазось пекстынзе-саинзе весень Сонзэ а кунсолостанть алов, весенень седеймарямонь максомга.

<sup>33</sup> Вай, кодамо певтеме Пазонь сюпавчись, кодамо домка Сонзэ превейчись ды содамочись! Киненьгак а панжовить Сонзэ мельтне-арсематне! Киненьгак а чарькодевить Сонзэ китне-янтнэ!

<sup>34</sup>«Кие чарькодинзе Азоронть мелензэ-превензэ, ды кие ульнесь Сонзэ превспутыцякс?

<sup>35</sup>Ды кие макссь Тензэ икеле мезеяк, конань Сонензэ эряволь максомс мекев?»

<sup>36</sup>Эдь весемесь теезь Сонзэ кувалт ды эри Сонзэ вельде ды Сонзэ туртов! Улезэ Тензэ шнамо пингеде пингес! Аминь.

## К Римлянам 12

### Христос марто вейсэндязь эрямо

<sup>1</sup>Кемиця ялгат, секскак Пазонть ине седеймарьямонзо кисэ энялдан тенк: максынк Пазонтень весе эсь прянк, кода эриця анокс, кона алтазь Тензэ ды тукшны Сонзэ мельс. Те улияк Пазонтень тынк оймень-седеень алкуксонь важодеманк.

<sup>2</sup>Илядо эря истя, кода ней эрить те масторонть лангсо. Мекевланк, мереди Пазонтень полавтомс потмоёжонк, одкстомтомс превенк-содавксонк. Сестэ тынь чарькодъсынк Пазонть мелензэ: мезесь вадря, Сонзэ мельс туиця ды асатыкстэме.

<sup>3</sup>Пазонть пельде максозь чанстенть коряс мон кортан эйтэнк эрвантень: илядо арсе эсь прядонк эрявикстэнтъ ламо. Мекевланк, арседе эсь прядонк апак покшкавтне, се кемеманть лувсо, конань Пазось максызе эрвантень.

<sup>4</sup>Эрья, невтемакс саинк рунгонть: минек сон вейке, ансяк эйсэнзэ ламо пелькст, ды эрва пельксэнтъ эсензэ тевезэ.

<sup>5</sup>Истя миньгак: кадык минь ламонек, ансяк Христос марто вейсэндязь минь – вейке рунго, ды вейке-вейкенек марто сюлмавозь вейс, кода рунгонь башка пелькст.

<sup>6</sup>Пазонть пельде максозь чанстенть коряс, минек эрванть ули кодамояк казненек. Кинь ули пазмарицякс кортамонь казнезэ, се кадык ютавтсы сонзэ тевс эсь кемеманзо коряс.

<sup>7</sup>Кинь ули лиятненень лездамонь казнезэ, кадык се лезды. Кинь ули тонавтыцянь казнезэ, се кадык тонавты.

<sup>8</sup>Кинь ули седей мелень кемекстамо казнезэ – се кадык лиятненень кемексты, кинь максыцянь – се кадык максы сюпавсто-важовсто, кинь ветицянь – се кадык вети тевтненень мелень путозь. Кинь ули паронь теема казнезэ – се кадык паронть теи кецязь.

<sup>9</sup>Улезэ тынк вечкеманк седейстэ лисиця. Туеде зыяндонть, педядо паронтень.

<sup>10</sup>Вечкеде вейке-вейкенк лелянь-сазоронь лембе вечкемасо, эстеденк пек ловодо ялганк эйсэ.

<sup>11</sup>Кадык а лавшомгады тынк бажамонк паронтень; палыця седейсэ важодеде Азоронтень.

<sup>12</sup>Кенярдодо – тынк ули седейнежедьксэнк, стакачитнесэ цидярдодо, апак лотксе ознодо.

<sup>13</sup>Лездадо Пазонь ломантненень, зярдо сынь арасьчисэ, ды уледе свал инжень вастыцякс.

<sup>14</sup>Чанстядо-баславадо тынк пансицятненень, илядо сюдо сынст, ансяк чанстядо.

<sup>15</sup>Кенярдодо кенярдыцятненень марто ды авардеде авардицятненень марто.

<sup>16</sup>Эрядо вейкенк-вейкенк марто ве мельсэ. Илядо уле верьга прянь кандыцякс, эрядо ялгакчисэ истяконь ломантненень марто. Илядо покшкавтне эсь превейчисэнк.

<sup>17</sup>Киненьгак кеж кежсэ илядо пандо, тееде сень, мезесь паро весе ломантненень сельмест икеле.

<sup>18</sup>Эсь ёндонк тееде весементь: эрядо ладямосо весе ломантненень марто.

<sup>19</sup>Вечкевикс ялгат! Эсь кисэнк кеж илядо пандо. Кадынк те тевенть Пазонь ацирьгадомантень. Эдь сёрмадозь: «Кежень пандома тевесь – Монь, ды Мон пандсаяк, корты Азорось».

<sup>20</sup>Мекевланк, тееде истя, кода ёвтазь Сёрмадовкссонть: «Бути тонь душманот вачо, андык сонзэ, бути симемазо сась, симдик сонзэ. Истя теезь, тон пурнат сонзэ пряс палыця тонолт».

<sup>21</sup>Иля изняво кежентень, – изник сонзэ паросо.

## К Римлянам 13

### Кунсолодо масторонь ветицятнень!

<sup>1</sup>Эрва ломанентень эряви кунсоломс масторонь ветиця прявтнэнь. Эдь арась истямо прявт, кона улевель аволь Пазонтъ пельде. Весе мастортнэнь прявтнэнь путынзе Пазось.

<sup>2</sup>Секскак, кие моли прявтнэнь каршо, се моли Пазонь аравтоманть каршо. Истя теицятне сынсь эсь лангозост таргить чумондома.

<sup>3</sup>Эдь ветицятне улить тандавксокс зыянонь теицятненень, аволь паронь теицятненень. Улиндеряй мелеть а пелемс прявтнэде, сестэ тейть паро, ды сынсь шнатадызь тонь.

<sup>4</sup>Прявтнэ Пазонь важот ды кандыть тонеть паро. Ансяк бути тон тят зыян, сестэ пельть, эдь сынсь аволь стяко кандтнить торот. Сынсь Пазонь важот ды пандсызь кеженть зыянонь теицятненень.

<sup>5</sup>Секскак, эряви кунсоломс прявтнэнь, аволь ансяк Пазонь кежень пандоманть кисэ, истя жо оймеёжонь вешеманть кисэ.

<sup>6</sup>Те тувталонтъ кувалт тынь пандтадо каявкст-налогт. Зярдэ прявтнэ топавтыть парсте эсь тевест, теньсэ сынсь важдит Пазонтень.

<sup>7</sup>Истя вана, максодо-пандодо тенст сень, мезесь эрвантень эряви: кинень каявкс эли кодамояк пандома, кинень ловома эли шнамо.

<sup>8</sup>Киненьгак мейсэяк илядо кадово долксо – вейкень-вейкень вечкема долгтонть башка. Кие вечксы лиянтъ, се уш топавтынзе Коень вешематнень.

<sup>9</sup>Весе кармавтокстнэ – «иля ускуря», «иля маштне», «иля сала», «иля кенгеле», «иля кайсе сельметь...» – неть кармавтокстнэ ды весе лиятнеяк вейсэндявить вейкес: «вечкть малавиксэть кода эсь прят».

<sup>10</sup>Вечкемась а теи малавиксэнтень кодамояк зыян. Истямо ладсо, вечкемась – Коень весе вешематнень топавтома.

### Чись малавгали

<sup>11</sup>Тынь содатадо, кодамо ней шкась: сась уш миненек шка сыргоземс удомадо. Эдь минек идемась ней седе маласо се шканть коряс, зярд минь ансяк совинек кемемантень.

<sup>12</sup>Весь юты, чись малавгады. Секскак ёртсынек чоподань тевтнень ды каясынек лангозонок валдонь оршамопельтнень, кода кедьёнкст.

<sup>13</sup>Эрьга, карматано эрямо истя, кода те эряви чинь валдосо: ламо ярсамонь сэвемас ды винас прянь апак кая, визьксэнь мельс апак пра ды апак ускуря, апак сёвно ды сельмень апак сявадо.

<sup>14</sup>Вельтяводо Иисус Христос Азоросонтъ кода оршамопельсэ! Ды лоткадо ней колазь обуцянк васькавтомадо ды сонзэ визькс мелензэ топавтомадо!

## К Римлянам 14

### Илядо чумондо кемиця ялганк

<sup>1</sup>Саинк эсь юткозонк лавшо кемема марто ломанентъ ды илядо пелькста сонзэ марто арсеманзо коряс.

<sup>2</sup>Эдь вейкесь кеми: вадря ярсамс эрьва мезде. А вана лиясь, кинь кемемазо лавшо, ярсы ансяк эмежде.



<sup>3</sup>Се, кие ярсы эрва мезде, кадык а безарди седе, кие ярсы ансяк эмежде. Ды се, кие ярсы ансяк эмежде, кадык а чумонды сень, кие ярсы эрва мезде, эдь Пазось сонзэяк саизе Эстензэ.

<sup>4</sup>Кият тон истямось, лиянь важонзо чумондыцясь? Сонзэ Азорозо сонсь несы: стядо се ашти эли празь. Ды сон ялатеке карми аштеме стядо, секс мекс Пазонть ули виезэ кирдемс сонзэ стядо.

<sup>5</sup>Вейкесь лови кодамо-бути чинть лиятнеде седе покшокс. Лиянтень весе читне вейкетъ. Кадык эрвась теи эсь кемеманзо-вановтонзо коряс.

<sup>6</sup>Се, кие седе покшокс лови-яви кодамо-бути чи, сон тень теи Азоронть ловоманзо кисэ, ды се, кие а лови-яви истямо чи, сон тень теи истя жо Азоронть ловоманзо кисэ. Сеяк, кие ярсы эрва мезде, ярсы Азоронть ловомга ды ёвты сукпря Пазонтень. Кие эрва мезде а ярсы, се а ярсы Азоронть ловомга ды истя жо ёвты сукпря Пазонтень.

<sup>7</sup>Кияк минек эйтэ а эри ансяк эсь кисэнзэ, ды истя жо эсь кисэнзэ кияк а кулы.

<sup>8</sup>Бути минь эрятано, сестэ эрятано Азоронть кисэ. Бути кулотано, сестэ кулотанояк Азоронть кисэ. Лисни истя: эрятано минь эли кулозтяно, яла кадовтано Азоронть ломанекс.

<sup>9</sup>Эдь Христос кулось ды одов кармась эрямо сень кисэ: улемс Азорокс кулозтнень лангсоjak ды эрицятнень лангсоjak.

<sup>10</sup>Мекс эно тон чумондат кемиця ялгать? А мекс тон безардят ялгадот? Минь весе карматано аштеме Христосонь судонть икеле.

<sup>11</sup>Эдь Пазонь Сёрмадовкссонть ёвтазь: «Кода алкукс Мон эрян, – корты Азорось, – истя алкукс сеяк: эрвась пры кумажа лангс Монь икеле, ды эрва келесь шнасы Пазонть».

<sup>12</sup>Истя, эрвась минек эйтэ сонсь ёвтни Пазонтень эсь тевдензэ.

### Илядо совавто пежетьс кемиця ялганк

<sup>13</sup>Секскак а карматано чумондомо вейкенек-вейкенек. Мекевланк, бажадо а теемс мезеяк истямо, конась кемиця ялганть кавтолдовтсы-пупордявтсы эли совавтсы пежетьс.

<sup>14</sup>Иисус Азоронть марто вейсэндямонть кувалт мон содан ды пек кеман: мезеяк арась истямо, мезесь бу сонсь улевель аванькс. Ансяк се, мезенть ломанесь лови аваньксэкс, улиак сонензэ аваньксэкс.

<sup>15</sup>А бути тон ярсат истямо ярсамопельде, конадо кемиця ялгать сайсы мельсапаро, сестэ тон уш а эрят вечкеманть коряс. Эсь ярсамопельсэть иля ветя ёмамос сень, кинь кисэ кулось Христос!

<sup>16</sup>Истя, илядо максо лиятненень кодамояк тувтал беряньстэ кортамс сень эйстэ, мезенть тынь ловтадо вадрякс.

<sup>17</sup>Эдь Пазонь Инязоркчись – те аволь ярсамопельде ды симемапельде кевкстема. Те – Пазонь мелень топавтома, ладямо ды кеняркс, конатненень максы Иневанькс Оймеялтось.

<sup>18</sup>Кие истямо ладсо важоди Христоснэнь, сон мельс тукшны Пазонтень ды ловови вадрякс ломантненень ютксоjak.

<sup>19</sup>Истя, карматано бажамо эрямс весе марто ладязь ды вейкенек-вейкенек кемекстазь.

<sup>20</sup>Иля калавто Пазонь тевенть ярсамопеленть кисэ. Ярсамс меревеи эрва мезде, а вана берянь се, бути тон совавтат ломаненть пежетьс эсь ярсамопельсэть.

<sup>21</sup>Седе паро а ярсамс сывельде ды а симемс винадо ды мезеяк а теемс истямо, конась тонь кемиця ялганть совавты пежетьс, эли пупордявтни, эли теи лавшокс.

<sup>22</sup>Ванстык тень лангс кемемат-вановтот эсь потсот, кадык сындест соды ансяк Пазось. Вай, кодамо уцяскав се ломанесь, кона а чумонды эсь прынзо сеньсэ, мезенть сонсь лови парокс!

<sup>23</sup>А бути ломанесь кавтолды ярсамопелензэ коряс ды ялатеке ярсы, сестэ Пазось сонзэ чумондсы сень кисэ, мекс сон теи аволь эсь кемеманзо-вановтонзо коряс. Весемесь, мезенть ломанесь теи аволь эсь кемеманзо коряс, ули пежетекс.

### **Пазонтень пингеде пингень шнамо**

<sup>24</sup>Шнамо Пазонтень, конань ули виезэ кемекстамс тынк кемеманть! Теде корты Кенярксов кулясь, конань мон ёвтнян. Те улияк Иисус Христос эйстэ кулясь, лиякс меремс, се салавачись, кона кекшезель ламо пингень перть ды ней уш панжозь.

<sup>25</sup>Ней те салавачись панжозь пазмарицятнень Сёрмадовкстнэсэ. Сынст вельде сон яволявтозь пингеде пингень Пазонтень мереманзо кувалт весе раськетненень, – ветямс сынст Азоронтень кемемас ды кунсолomas.

<sup>26</sup>Улезэ Иисус Христос вельде пингеде пингень шнамо вейкине Пазонтень, кона ськамонзо превейдежк превей! Аминь.

## **К Римлянам 15**

### **Весе вейсэ шнадо Пазонтень!**

<sup>1</sup>Миненек, кемемасо виевтненень, эряви улемс нежедьксэкс-кирдицякс седе лавшотненень, эсь прянок туртов апак савто.

<sup>2</sup>Кадык эрвась минек эйстэ савты кемиця ялганстэнь ды арси седе, мезесь канды тензэ паро ды виевгавты кемеманзо.

<sup>3</sup>Христоскак савтсь аволь Эстензэ. Мекевланк, Сёрмадовкxось корты Сондензэ истя: «Тонь покордыцятнень покордамотне прасть-понгсть Монь лангс».

<sup>4</sup>Весе, мезесь ёвтазь Сёрмадовкxо, сёрмадозь минек тонавтомань кисэ. Те книгась максы тенек цидярдома ды кемекстамо, минек седейнежедьксэнтъ а ёмавтомга.

<sup>5</sup>Кадык Пазось, цидярдомань ды кемекстамонь лисьмапрясь, лезды тыненк улемс эсь юткованк ве мельсэ, Христос Иисус мельга молезь.

<sup>6</sup>Сестэ весе тынь ве мельсэ-седейсэ ды ве валсо карматадо шнамо Пазонтъ, минек Азоронтъ Иисус Христосонь Тетянзо.

<sup>7</sup>Секскак, Пазонтъ шнамонзо кисэ, саеде вейкенк-вейкенк эйсэ эсь седеезэнк истя, кода Христоскак саидизь тынк Эсь седеезэнзэ.

<sup>8</sup>Мон кирдян мельсэнъ вана мезе: Иисус Христос сась еврейтненень важдеме ды Пазонтъ видечинзэ невтеме. Сон сась топавтомо алтамотнень, конатнень Пазось максынзе кезэрень пингень ине тетятненень.

<sup>9</sup>Истя жо Сон сась сень кисэяк: кадык лия раськетнеяк шнасызь Пазонтъ Сонзэ седеймарямонзо кисэ, кода ёвтазь Сёрмадовкссо: «Секскак карман шнамот лия раськетнень ютксо ды карман шнамо Тонь леметь моравтозь».

<sup>10</sup>Сёрмадовкссо истяк ёвтазь: «Лия раськетне! Кенярдодо Пазонь кочкавт раськентъ марто вейсэ!»

<sup>11</sup>Ды истяк: «Весе лия раськетне! Шнадо Азоронтъ! Весе раськетне, кепедеде Сонзэ инексчинть!»

<sup>12</sup>А вана Исайя корты истя: «Иессеень родсто-юрсто пургонды Лисевкс, конась касы-кепети весе раськетнень ветицякс. Сонзэ лангс сынъ кармить седейсэст нежедеме».

<sup>13</sup>Кадык Пазось, седейнежедьксэнь лисьмапрясь, пештятадызь тынк, конат кемить, покш кеняркссо ды седейоймамосо. Кадык истя жо тынк седейнежедьксэнк апак лотксе касы-кепети Иневанькс Оймеялтонтъ вийсэ.

#### **Павол ёвтни эсь важдемадонзо**

<sup>14</sup>Кемиця ялган, мон зярдояк а кавтолдан тень кувалт: тынь пештязь паро арсемасо, тынк улить ламо эрва кодамо содамочинк ды маштадо путомс превс вейкенк-вейкенк.

<sup>15</sup>Ялатеке мон сёрмадан тенк, кемиця ялган, – кона-кона таркатнесэ покш смелчи марто, – арсян ледстямс мелезэнк кой-кона тевтнень. Мон тень теян секс, мекс Пазось макссь монень чансть,

<sup>16</sup>улемс Иисус Христосонь вожокс лия раськетнень туртов. Мон поп ладсо топавтан эсь важомедам: пачтян Пазонь Кенярков Кулянтъ ды тень вельде теян лия раськетнестэ Пазонтень мельстуиця анокс, кона алтазь Тензэ Иневанькс Оймеялтонть вельде.

<sup>17</sup>Христос Иисусонь шнамонзо кисэ мон каштангалян эсь важомемасон Пазонтень.

<sup>18</sup>Мон а пелян кортамс ансяк седе, мезе монь вельде тейсь Христос, лия раськетнень Пазонтъ кунсолемас ветямга. Сон тень теизе монь валсо ды тевсэ,

<sup>19</sup>тамашань ды дивань тешксэнь вийсэ, Пазонь Оймеялтонть вийсэ. Истямо ладсо, мон ёвтния Христосто Кенярков кулянтъ эрьва кува, Ерусалимстэ саезь Иллирикев пачкодемс.

<sup>20</sup>Мон свал бажинь ёвтнемс Кенярков кулянтъ ансяк тосо, косо Христосонь лемензэ зярс эзизь марсе. Монь арасель мелем путомс се кудо юртонтъ лангс, конань ушодызь лият.

<sup>21</sup>Ульнесь мелем топавтомс Пазонь Сёрмадовксонь валтнэнь: «Сеть, кинень Сондензэ эзть ёвтне, несызь, ды сеть, конатне эзть марсе, чарькодъсызь».

#### **Паволонь мелезэ содавомс Рименть**

<sup>22</sup>Секс мон те шкас эзинь саво тыненк, куш ламоксть пурнакшныньгак.

<sup>23</sup>А вана ней мон прядынь тевень неть таркатнесэ ды кеман: паряк, топавтови монь ламо иень бажамом – самс-вастовомс тынк марто.

<sup>24</sup>Монь ули мелем Испанияв модемстэ самс тенк, неемс тынк ды зяркак кенярдокшномс мартонк вастовомасонтъ. Кеман, тынь мейле макстадо тень лезкс сеньсэ, мезе монень эряви те якамонть туртов.

<sup>25</sup>Ней мон кирдян ким Ерусалимев, ков эряви кандомс лезксэнтъ Пазонь ломантненень.

<sup>26</sup>Кортамось моли седе: Македониянь ды Акайянь кемикуротне эсест мельсэ пурнасть лезксэкс ярмакт Ерусалимень кемиця ялгатненень, конат эрить арасьчисэ.

<sup>27</sup>Сынь сынсь тень теизь, ды алкуккак сынсь долксот неть арасьчисэтненень икеле. Бути Ерусалимсэ кемиця еврейтне явизь сынст марто эсест оймеялтонь сюпавчист, сестэ ней неть, лия раськень кемицятнеяк, кадык лездыть тенст мода лангонь эсест сюпавчисэст.

<sup>28</sup>Истя, зярдонь мон те теветь топавтса ды пачтысынть тенст весе сеть ярмактненень, конат ульнестъ тенст пурназь, сестэ туян Испанияв ды ютамсто содавттадызь тынк.

<sup>29</sup>Мон содан: зярдонь сан тенк, кандса тыненк Христосонь Кенярксов кулянть чанстямонь-баславамонь пешкесчинть.

<sup>30</sup>Кемиця ялган, энялдан тенк минек Иисус Христос Азоронть лемсэ ды Оймеялтонть казевть вечкемасонть: лездадо тень монь тюремасонть. Ознодо кисэнь Пазонтень:

<sup>31</sup>Иудеянь акемицятне иляст тее монень зыян, ды Пазонь ломантне Ерусалимсэ саевлизь паро мельсэ лезксэнтъ, конань мон кандан тов.

<sup>32</sup>Ды теде мейле мон кенярдозь сован тыненк, бути ули тенень Пазонтъ мелезэ, ды оймазь, тынк марто вейсэ ютавтса шканть.

<sup>33</sup>Пазось, седейоймамонь лисьмапрясь, улезэ весень тынк марто! Аминь.

## **К Римлянам 16**

### **Павол кучи сюкпрат Римень кемицятненень**

<sup>1</sup>Ули мелем ёвтамс тенк зярыя паро валт минек Фива кемиця сазоронть эйстэ, Кенкреянь\* кемикуронь лездыцядонть.

<sup>2</sup>Вастынк сонзэ, кода тейнить Пазонь ломантне, прок Азоронть важонзо, ды максодо тензэ лезкс весемесэ, мезе тензэ эряви тынк пельде. Эдь сонськак лездакшнось ламонень, истя жо моненьгак.

<sup>3</sup>Сюкпря монь пельде Прискилланень ды Акиланень, конат важдить монь марто Христос Иисуснэнь.

<sup>4</sup>Сынь анокт ульнесть монь идемам кисэ путомс-максомс эсь пряст. Мон аволь ськамон суюконян сыненст, истя жо суюконить тенст лия раськень весе кемикуротнеяк. Ёвтадо монь пельде суюкпря кемикуронтеньгак, кона пурнавкшны сынст кудосо.

<sup>5</sup>Сюкпря монь вечкевикс Эпенет ялгантень, кона Акайясо васенцекс кармасть кемеме Христоснэнь.

<sup>6</sup>Сюкпря Мариянень, кона ламо ды стакасто важдось минек кисэ.

<sup>7</sup>Сюкпря Андроникнень ды Юниянень, монь масторонь ломантненень, конат ульнесть монь марто пекстамо кудосо. Сынст парсте содасызь апостолтнэнь ютксо, ды Христоснэнь сынь кармасть кемеме мондень икеле.

<sup>8</sup>Ёвтадо суюкпря вечкевикс Амплиатнэнь, Азоронтень кемемань коряс монь малавикс ялгантень.

<sup>9</sup>Сюкпря Урбаннэнь, кона важди мартонок Христоснэнь, ды истя жо Стакис монь вечкевикс ялгантень.

<sup>10</sup>Сюкпря Апеллеснэнь, кинь видечизэ Христоснэнь невтезь сонзэ тевтнесэ. Сюкпря Аристубулонь кудораськентень.

<sup>11</sup>Сюкпря монь масторонь Иродионнэнь. Сюкпря Наркиссэнэнь кудораськестэ сетненень, конат кемить Азоронтень.

<sup>12</sup>Сюкпря монь пельде Трифена ды Трифоса аватненень, конат ламо важдось Азоронть туртов. Сюкпря Персиданень, монь вечкевикс сазоронтень, кона ламо ды стакасто важдось Азоронть туртов.

<sup>13</sup>Истя жо сьукпря Руф ялгантень, Азоронь кочкавт важодицянтень, ды сонзэ аванстэнь, кона моненьгак тиринь авань кондямо.

<sup>14</sup>Сьукпря ёвтадо Асинкритнэнь, Флегоннэнь, Эрмийнэнь, Патровнень, Эрманень ды весе кемиця лия ялгатнененьгак, конат сынст марто.

<sup>15</sup>Кучан сьукпря Филологнень ды Юлиянень, Нирейнень ды сонзэ сазоронстэнь, Олимпаннэнь ды Пазонь весе ломантненень, конат сынст марто.

<sup>16</sup>Шумбракстнеде вейкенк-вейкенк марто Пазонь ломанень паламосо. Сьукпря тенк Христосонь весе кемицянь куротнень пельде.

#### **Меельце превспутоматне**

<sup>17</sup>Кемиця ялган, энялдан тенк, пеледе сетнеде, кить кирвазтить пелькстамонь-явомань мельть ды пирить тынк кемемань кинть. Сынть молитъ се тонавтоманть каршо, кона тыненк максозь. Кирдеведе эйстэст ве ёно.

<sup>18</sup>Нетъ ломантне важдить эсест пекест кисэ, аволь минек Иисус Христос Азоронть кисэ. Сынть мазый ды соланя кельсэст манчить сетнень седеест, конат эрва мезес кемить.

<sup>19</sup>Весе содыть, кода парсте тынь максынк прянк кемемантень, ды те монь пек кецявты. Монь мелем: уледе паронь содыцякс ды зыянонь ачарькодицякс.

<sup>20</sup>Ды Пазось, седейоймамонь лисьмапрясь, курок правтсы Сатананть тынк пильгенк алов. Минек Иисус Христос Азоронть чанстесь улезэ мартонк! Аминь.

<sup>21</sup>Сьукпря ёвты тенк Тимофей, кона важди монь марто, ды монь масторонь ломантне Лукий, Ясон ды Сосипатра.

<sup>22</sup>– Ды монгак, Тертый, кона сёрмадызе те сёрманть Паволонь ёвтнеманзо коряс, кучан тенк монсень христианонь сьукпря.



<sup>23</sup>– Сюкпря ёвты тенк Гай, инжень вечкиця монь азорось, конань кудосо пурнавкшны весе кемицянь куроськак. Сюкпря ёвты тенк Эраст, ошонь ярмаконь ванстыцясь, ды минек кемиця ялгась Кварт.

<sup>24</sup>Улезэ весеменк тынк марто минек Иисус Христос Азоронтъ чанстесь!  
Аминь.



## Коринф Ошонь Кемикуронтень Паволонь Васенце Сёрмазо

### 1-е Коринфянам 1

<sup>1</sup>Павол, кона Пазонтъ мелензэ коряс тердезь Иисус Христосонь апостолокс, ды Состен, кемиця ялгась,

<sup>2</sup>кучить шумбракстнемат Коринф ошсо Пазонь кемицянь куронтень, сетненень, конат Христос Иисус вельде алтазь Пазонтень ды тердезь улемс ансяк Пазонь ломанекс. Истя жо кучтано шумбракстнемат весе сетнененьгак, конат тердить лездыцякс минек ды сынст Азоронтъ, Иисус Христосонь, косо сынъ иляст эря.

<sup>3</sup>Чансть ды седейоймамо тенк Пазонтъ, минек Тетянтъ, пельде ды Иисус Христос Азоронтъ пельде.

#### Павол шны Пазонтъ

<sup>4</sup>Мон свал ёвтан сукпря монь Пазонтень тынк кисэ, се чанстентъ кисэ, конань Сон максызе тыненк Христос Иисус вельде.

<sup>5</sup>Эдь Сонзэ вельде Пазось сүпалгавтыдизь тынк эрва мейсэ: эрва кодамо валсоjak ды эрва кодамо содамочисяк.

<sup>6</sup>Христосто кулясь домкасто кемекставсь тынк ютксо.

<sup>7</sup>Секс тынк арась асатыксэнк Оймеялтонь кодамояк казнесэ, зярдю учотадо минек Иисус Христос Азоронтъ велявтоманзо.

<sup>8</sup>Сон кемекстатадызь тынк педс: истямо ладсо тынь ультядо а чумондовицякс минек Азоронтъ Иисус Христосонь омбоцеде само чистэнтъ.

<sup>9</sup>Кеместэ кирди валонзо Пазось, кона тердидизь тынк вейсэндямос Эсь Цёранзо, минек Азоронтъ, Иисус Христос марто.

#### Явновоматне кемикуронтень

<sup>10</sup>Энялдан тенк, кемиця ялгат, минек Азоронтъ Иисус Христосонь лемсэ: уледе вейкенк-вейкенк марто ладямосо тевсяк, валсоjak. Иляст

уле юткованк явновомат-пелькстамот! Кадык тынк вейсэндятадызь вейкеть мельтне-превтне, ды вейкеть арсематне!

<sup>11</sup>Мон жо маринь Клоянь ломантненень пельде: тынк ютксо, кемиця ялган, молить пелькстамот.

<sup>12</sup>Мон кортан вана мезде: веенстнэ юткстонк кортыть: «мон – Паволонь», лиятне: «мон Аполлосонь», «мон Кефань» эли «мон Христосонь».

<sup>13</sup>Мезе те истямось?! Нать Христос явовсь пельксэнь пелькс? Нать Павол кулось крёст лангсо тынк кисэ? Нать тынь нававтозь Паволонь лемс? Нама, те аволь истя.

<sup>14</sup>Сюкпря Пазонтень, мон эзинь нававто киньгак тынк эйстэ, Криспте ды Гайде башка.

<sup>15</sup>Секскак киньгак арась тувталозо кортамс: мон нававтодызь монь мельга молицякс.

<sup>16</sup>Нама, истя жо мон нававто Стефанасоньгак кудораськензэ марто. Лиянь киньгак нававто эли эзинь, мельсэн а ашти.

<sup>17</sup>Христос жо монь кучимим Кенярксов кулянт пачтямо, аволь нававтомо. Сонзэ а эряви пачтямс ломанень превейчинь кельсэ-валсо. Лиякс ёмавтови Христосонь крёстонть виезэ.

### **Христос – Пазонь вий ды превейчи**

<sup>18</sup>Крёст лангсо кулозdentь кулясь – те превтемечи сеть ломантненень, конат молить ёмамонь киява. Миненек жо, конат молить идемань киява, те кулясь – Пазонь вий.

<sup>19</sup>Пазонь пельде Сёрмадовкссонтъ ёвтазь: «Мон ёмавтса превейтненень превейчист, ды Мон маштса чарькодицятненень чарькодемаст».

<sup>20</sup>Сестэ, косо ней неть превейтне? Косо неть содыцятне? Косо те масторлангонть домкасто арсицятне-кортыцятне? Арази Пазось эзизе невте: масторлангонть превейчись – те превтемечи?

<sup>21</sup>Эсь превейчисэнзэ Пазось тейсь истя: ломантненень эсь превейчист вельде эзь панжово-чарькодеве Пазось. Секс Сон кочкинзе идемс кемицятненень се “превтемечинь” кулянтъ вельде, конань минь пачтятано.

<sup>22</sup>Еврейтне вешить тамашань тешкст, гректне вешнить содамочить.

<sup>23</sup>А вана минь пачтятано куля крёст лангс вачкодезь Христосто. Те кулясь еврейтненень – покордамо, гректненень – превтемечи.

<sup>24</sup>Ансяк сетненень, конатненень тердинзе Пазось, кода еврейтненень, истя гректнененьгак, Христосось – те Пазонь вий ды Пазонь превейчи.

<sup>25</sup>Мезесь сыненст неяви Пазонь “превтемечикс”, се пек седе превей ломанень превейчидентъ, ды Пазонь “лавшочись” – пек седе виев ломанень вийдентъ.

<sup>26</sup>Кемиця ялгат, ледстинк мелезэнк, кодамокс тынь ульниде сестэ, зярдо тынк ансяк тердидизь Пазось. Аламот тынк ютксто ульнестъ, ломанень вановтонь коряс, превейть, аламот ульнестъ виевть-лововикст ды чачозь содавикс кудораськестэ.

<sup>27</sup>Тень таркас Пазось кочкинзе сень, мезесь, ломанень вановтонь коряс, ловови превтемекс. Теньсэ Сон вети визьксчамас те масторлангонь превейтненень. Пазось кочкинзе сень, мезесь ловови лавшокс. Истя жо теньсэ Сон вети визьксчамас те масторлангонь виевтненень.

<sup>28</sup>Пазось кочкинзе сетненень, конат, ломанень вановтонь коряс, лововить покордазекс, алововиксэкс ды аэрявиксэкс. Сон тейсь истя вана мекс: теемс чаво таркакс сень, мезентъ масторлангось лови эрявиксэкс.

<sup>29</sup>Истямо ладсо, кадык вейкеяк ломань а шны прянзо Пазонтъ икеле!

<sup>30</sup>Эдь те Сон сьулмидизь тынк Христос Иисус марто, конань Сон теизе минек туртов превейчикс! Сонзэ вельде минь ловозь чумовтомокс Пазонтъ икеле, алтазь Сонензэ ды идезь-рамазь олячис.

<sup>31</sup>Истямо ладсо топавтови Пазонь Сёрмадовкссо ёвтазесь: «Кинь ули мелезэ шнамс эсь прянзо, кадык шнасы Азоронть эйсэ!»

## 1-е Коринфянам 2

### Коринфсэ Паволонь икелень тонавтомазо

<sup>1</sup>Ды зярдо мон сынъ тыненк, кемиця ялган, Паздонть яволявтоманть пачтямо, сестэ мон эзинь нежеде келем мазыйчинзэ ды превейчинзэ лангс.

<sup>2</sup>Эдь мон совинь кеме мельс: тынк ютксо улемстэ мезеяк лия а содамс Иисус Христосто башка – крёст лангс вачкодезь Христосто башка.

<sup>3</sup>Мон сынъ тыненк лавшокс, пелицякс, пек сорныцякс.

<sup>4</sup>Монь валось ды тонавтомась эзь снарты тынк кемевтемс ломанень превейчисэнтъ. Мекевланк, сынъ невтизь Пазонь Оймеялтонть виензэ.

<sup>5</sup>Истямо ладсо, кадык тынк кемеманк нежеди Пазонь виентъ лангс, аволь ломанень превейчинть лангс.

### Пазонь превейчи

<sup>6</sup>Ялатеке, касозь-виензазь ломантнень ютксо улемстэ, минь пачтятано превейчи, ансяк аволь те масторлангонть ды сонзэ прятнэнь превейчинть. Сынст азорксист курок прядови.

<sup>7</sup>Минь пачтятано Пазонь салавань превейчинть, кона те шкас кекшезель ды конань Пазось аравтызе минек инекчис уш мирэнтъ-масторонть теемадо икеле.

<sup>8</sup>Те превейчинть кияк те масторлангонь прятнэнь эйстэ эзизе чарькоде. Бути сынъ сонзэ чарькодевлизь, сестэ аволизь вачкоде крёст лангс инекчинь Азоронть.

<sup>9</sup>Сёрмадовкссо ялатеке ёвтазь: «Мезе сельмесь эзь некшне ды пилеськак эзь марсе, ды мезе эзь сакшно ломанень превскак, сень анокстызе Пазось Сонзэ вечкицятненень».

<sup>10</sup>А вана миненек Пазось панжизе те превейчинть Эсь Оймеялтонзо вельде. Оймеялтось педь пес онксты-чарькоди весементь, мик Эсензэ Пазонтъ домка салавачинзэяк.

<sup>11</sup>Кинень содавить ломанентъ мелензэ-арсеманзо? Сынъ содавить ансяк ломанень оймеялтонть, кона сонзэ эйсэ. Истя жо Пазонь мельтне-арсематнеяк содавить ансяк Пазонь Оймеялтонть.

<sup>12</sup>Миненек жо максозь Оймеялтось Пазонтъ пельде, аволь те масторлангонть оймеялтось. Тень кувалт миненек содави се, мезентъ Пазось максозь те тень казнекс.

<sup>13</sup>Весе тень эйтэ минь ёвтнетянояк, ансяк истямо валтнэсэ, конатнес тонавтымизь Иневанькс Оймеялтось, аволь сеть валтнэсэ, конатнес тонавтымизь ломанень превейчись. Секскак Оймеялтонь тевтнень панжтано Оймеялтонь максот валсо.

<sup>14</sup>Ломанентень эсь обуцяно коряс а саеви превс се, мезесь максозь Пазонь Оймеялтонть пельде: сон тень лови превтемечикс. Сонзэ арась виезэ тень чарькодемс, секс мекс те онкстави ансяк Оймеялтонть вельде.

<sup>15</sup>Оймеялтонь ломанесь онксты эрва мезентъ, ансяк сонзэ онкстамс киньгак арась виезэ.

<sup>16</sup>Эдь Сёрмадовкссо ёвтазь: «Кие чарькодинзе Азоронтъ мелензэ-превензэ, кинь ули виезэ путомс Сонзэ превс?» Миненек жо максозь Христосонь мельтне-превтне.

## 1-е Коринфянам 3

### Апостолтнэ – Пазонь важот

<sup>1</sup>А вана мон, кемиця ялган, эзинь кортаво тынк марто кода оймеялтонь ломань марто. Монень савсь кортамс мартонк кода пежетев обуцянь коряс эриця ломантнень марто, конат Христоснэнь эсь кемемасост пиже эйкакшонь кондят.

<sup>2</sup>Мон андынь эйсэнк ловсодо, аволь калгодо ярсамопельде, секс мекс сон тыненк эзь сэвеве. Нейгак сон тыненк а сэвеви,

<sup>3</sup>эдь тынь яла эрятадо пежетев обуцянк коряс. Бути тынк ютксо улить сельмень сявадомат ды сёвномат-пелькстамот, арази сестэ тынь эрятадо аволь пежетев обуцянк коряс? Арази тынь ветятадо прянк аволь те масторлангонть ломантнень ладсо?

<sup>4</sup>Бути вейкесь корты: «Мон – Павол мельга молиця», лиясь: «Мон – Аполлос мельга», сестэ кить жо тынь? Нама – пежетев обуця марто ломанть!

<sup>5</sup>Кие эно те Аполлосось? Кие истямось Павол? Минь – ансяк важот, конат лездасть тенк совамс кемемас. Азорось макссь эрвантень эйстэнек эсензэ тев:

<sup>6</sup>Мон видия видьменть, Аполлос валнызе сонзэ, кастызе жо Пазось.

<sup>7</sup>Секс мезекскак а путови се, кие види, ды сеяк, кие валны. Весемесь ансяк Пазонтъ кедьсэ, кона касты.

<sup>8</sup>Видицясь ды валныцясь теить вейке тев, ды эрвантень Пазось панды питне важдеманзо коряс.

<sup>9</sup>Минь кавонек – Пазонтъ марто важдицят, а вана тынь – Пазонь пакся, кудо, конань путы-кепеди Пазось.

<sup>10</sup>Пазонь максот чанстенть коряс мон, кудонь превей путыця ладсо, путынь юр, кие-бути лия стявты лангозонзо кудо. Кадык эрвась ваны эсензэ мельга, кода сон стявты.

<sup>11</sup>Киненьгак а путови лия кудюор сенде башка, кона уш ули. Те юрось – Иисус Христос.

<sup>12</sup>Те юронть лангс ломанесь стявты кудо сырнестэ, сиясто, питней кевстэ, чувтосто, тикшестэ эли олгсто.

<sup>13</sup>Ансяк мейле неяви, мезе эрьвась путсь-стявтсь. Судонь чистэнтъ весемесь ули ютавтозь толонь пачк, ды толось эрьвантъ тевензэ ливтьсынзе лангс.

<sup>14</sup>Кинь путовксось-теевксэсь цидярдсы толонтъ, сенень пандови питне.

<sup>15</sup>А кинь путовксозо-теевксэзэ толсонть палы, се весементъ ёмавтсы. Нама, сонсь ялатеке идеви, прок таргави толонтъ потсто.

<sup>16</sup>Арази тынь а содатадо: тынь – Пазонь кудо, ды Пазонь Оймайтось эри тынк эйсэ.

<sup>17</sup>Ды бути кияк калавтсы-ёмавтсы Пазонь кудонтъ, сень Пазось ёмавтсы. Эдь Пазонь кудось иневанькс, ды те кудось ультядо тынь.

<sup>18</sup>Кадык кияк а манчи эсь прынзо! Бути кияк тынк эйстэ лови эсь прынзо превеекс те масторлангонть вановтонзо коряс, кадык сон васняк тееви превтемекс – ансяк сестэ сон ули алкуксонь превеекс.

<sup>19</sup>Эдь те масторлангонь превейчись – те превтемечи Пазонтъ икеле. Сёрмадовкссонтъ истя ёвтазыгак: «Пазось кундси превейтнень сынсест ёжовчисэст».

<sup>20</sup>Ды лия таркасожак ёвтазь: «Азорось содасынзе превейтнень мелест-арсемаст. Сон неи: сынъ чавот».

<sup>21</sup>Истямо ладсо, кадык кияк а шны прынзо ломантнень эйсэ! Эдь весемесь тынк:

<sup>22</sup>Паволгак, Аполлоскак, Кефаяк; те масторлангоськак, эрямоськак, куломаськак; неенсеськак ды сыцяськак. Те весе тынк,

<sup>23</sup>тынь жо – Христосонь, а Христос – Пазонтъ.

## **1-е Коринфянам 4**

### **Минь – Христосонь апостолт**

<sup>1</sup>Истямо ладсо, кадык ловить минек Христосонь кемевикс важокс, конатненень максозь пачтямс Пазонь салавачитнень.



<sup>2</sup>Сетнень пельде, конатнень максозь истямо покш тев, вешеве ансяк кемевиксчи.

<sup>3</sup>Монь допрок а кавтолдовты се, бути карматадо монь судямо тынь эли ломанень кодамояк лия суд. Мон монськак а судян эсь прям.

<sup>4</sup>Монь оймеёжом ванькс, ансяк те а невти монь чумовтомочим. Монь судиям вейке – Азорось.

<sup>5</sup>Секскак, киньгак илядо чумондо шкадо икеле, зярс а сы Азорось. Сон таргасы валдос весементь, мезесь ней кекшезь чоподасо, ды ливтьсынзе лангс седеень салава мельтнень-бажамотнень. Ды сестэ эрвантень тевензэ кисэ максови шнамо Пазонтъ пельде.

<sup>6</sup>Тыненк, кемиця ялгат, мон весе тень ёвтния эсень ды Аполлосонь ланга, кадык тонадовлиде тынь, минек лангс ванозь, апак превейгале теемс ансяк сень, мезе сёрмадозь. Сестэ тынь а карматадо каштангалезь ловомо вейкенъ лиядонть вадрякс.

<sup>7</sup>Эдь кие тонь явинзеть лиятнеде? Мезе тонь ули истямот, мезесь бу аволь уле максозь тетъ Пазонтъ пельде казнекс? Ды бути тонеть весемесь максозь казнекс, сестэ мекс прят верьга кандат, буто тень весе теик тонсь?

<sup>8</sup>Нама, тынк уш эрва мезенк ули! Тынь уш сюпавтадо! Тынь уш инязортадо – а вана минь аволь истят. Паро, бути тынь алкуксккак теевлиде инязорокс, сестэ миньгак тынк марто улевлинек инязорокс!

<sup>9</sup>Эдь кода монень маряви: Пазось теимизь минек, апостолтнэнь, меельцедеяк меельцекс, теке ломанть, конат судязь куломас весень сельме икеле. Минь теевинек ваномма таркакс весе мирэнтень-масторонтень – ангелтнэненъгак, ломантнененъгак.

<sup>10</sup>Минь Христосонь кисэ превтеметь, тынь жо пек превейть Христоснэнь кемемасонтъ! Минь лавшот, тынь жо виевть! Тынк пек ловить, минек жо мезекскак а путыть!

<sup>11</sup>Течинь чис минь печтятано вачочи ды симемань само, минь нулавтано, минек нарьгить, минь свал якатано таркадо таркас.

<sup>12</sup>Минь кшинек кисэ эсь кедьсэнек важдотяно псилгадомазонок. Зярдэ минек сёвныть – минь ялатеке чанстятано-баславатано сынст. Минек эйсэ пансить – минь цидярдтано.

<sup>13</sup>Минек лангс кенгелить – минь ёвтатано каршост паро валт. Минек течис ловить масторлангонь шукшпяркс, ломаньлувонь ёртовт сорокс.

<sup>14</sup>Мон весе тень сёрмадан аволь визьксчамас тынк совавторга, мекевланк, превс тынк путомга, кода эсь вечкевикс эйкакшон.

<sup>15</sup>Кадык тынк превс путыцянк Христоснэнь кемемасонтъ мик тёжадожк ламо, тетянк жо ансяк вейке! Те мон кандыя тенк Кенярксов кулянтъ ды тень вельде мон чачтыдизь тынк Христос Иисуснэнь кемицякс.

<sup>16</sup>Секскак энядан тенк: тееде весемесэ монь ладсо, кода мон теян Христос ладсо.

<sup>17</sup>Те тувталонтъ кувалма мон кучия тыненк Тимофеень, кона Азоронтень кемеманзо кувалма монь вечкевикс ды кемевикс цёрам. Сон ледстясынзе мелезэнк сеть превспутоматнень, конатнень коряс мон молян Христос марто эсь эрямосон ды конатнес мон тонавтан эрва косо, весе кемикуротнесэ.

<sup>18</sup>Тынк ютксо улить истят ломанть, конат кармасть покшкавтнеме ды арсема: мон, паряк, тыненк уш а сан.

<sup>19</sup>Ялатеке мон сан ды вельть куро, бути тенень ули Азоронтъ мелезэ, ды ванса неть покшкавтницятнень виест, аволь валост.

<sup>20</sup>Эдь Пазонтъ Инязорксчизэ неяви вийсэ-тевсэ, аволь валсо.

<sup>21</sup>Кодамо тынк меленк? Кода монень самс тыненк? Локшо марто эли вечкема ды лембе седей марто?

## 1-е Коринфянам 5

### Павол суди усксеема-ускурямо тевтнень

<sup>1</sup>Алкукс, молитъ кортамот: тынк ютксо эрсить истят ускурямонь-усксеемань тевть, кодат эзь марсее мик виде Пазонь асодыцятнень ютксожк. Вейке цёра тынк ютксто эри-ашти эсензэ тетянзо од нинзэ марто.

<sup>2</sup>А вана тынь яла покшкавтнетядо?! Арази тень коряс тыненк аволь эряво авардемс-мелявтомс ды панемс юткстонк те ломаненть, кона тейсь истямо амазы тев?

<sup>3</sup>Кадык мон монсь аволь тынк марто, ойдем ялатеке мартонк. Прок ютксонк улица, мон минек Иисус Азоронтъ лемсэ уш судия те ломаненть, кона тейсь истямо амазы тев.

<sup>4</sup>Зярдэ тынь пурнавтадо вейсэ минек Иисус Христос Азоронтъ лемсэ ды монь оймесь ды минек Иисус Христос Азоронтъ виеськак улить мартонк,

<sup>5</sup>сестэ максома те ломаненть Сатанантень: кадык ёмавтови сонзэ рунгозо, а вана сонзэ оймезэ идеви Иисус Христос Азоронтъ судонь чистэ.

<sup>6</sup>А эряви тенк шнамс пря! Арази тынь а содасынк те валмеревксэнтъ: «Аволь ламо чапавтомась сыржавтсы весе чапаксонть?»

<sup>7</sup>Истя, ваньксстэ коцькеринк эйстэнк пежетень ташто чапавтоманть, сестэ тынь теетядо од ванькс ламбамо чапаксокс. Истямокс тынь уш ультядождк, секс мекс минек Инечинь Вирезэсь, Сонсь Христос, уш печкезь минек кисэ.

<sup>8</sup>Секскак карматано Инечинть тешкстамо ламбамсто панезь сюкоро марто – ванькс седей ды видечи марто, аволь ташто чапавтомасо сыржавтозь кши марто – пежеть ды кеж марто.

<sup>9</sup>Мон уш сёрмасо сёрмадынъ тенк: илядо вейсэнъгале усксевицятнень-ускурицятнень марто.

<sup>10</sup>Тень мон сёрмадынъ аволь неень масторлангонъ весе истямо ломантнень коряс, конат усксевицят-ускурицят, вардонъ сельметь, нельгицят-салыцят, аволь алкуксонъ пазнэнь суюконицят. Бути сынст марто а вастневемс, сестэ тыненк саволь допрок кадомс те масторлангонть.

<sup>11</sup>Мон кортан вана мезде: илядо вейсэнъгале сетнень марто, кие ловови кемицякс, ансяк сонсь, ялатеке, усксевиця-ускуриця, вардонъ сельме, аволь алкуксонъ пазнэнь суюкониця, кенгелиця-нарьгиця, винадо симиця, нельгиця-салыця. Истятнэнь марто ве столь экшс ярсамояк илядо оза!

<sup>12-13</sup>Нама, те аволь монъ тевесь судямс сетненьгак, конат аволь кемикурот. Сынст карми судямо Пазось. Тыненккак эряви судямс сетнень, конат эсенк кемикурот. Сёрмадовкссо як ёвтазь: «Панинк юткстонк апаро ломанень».

## 1-е Коринфянам 6

### Христиантнэнь ютксо пелькстамотнеде

<sup>1</sup>Зярдэ киньгак тынк ютксто ули пелькстамонъ тевезэ кемиця ялганзо марто, кода сестэ сонензэ а визькс пшкадемс судиянень, кона а кеми Пазнэнь? Мекс сон те тевенть а максы Пазнэнь кемиця ломанень судс?

<sup>2</sup>Арази тынь а содатадо: Пазонъ ломантне кармить судямо весе мирэнтъ-масторонть? Ды бути тынь карматадо судямо мирэнтъ-масторонть, арази сестэ а юксневить тыненк вишкине пелькстамотне?

<sup>3</sup>Арази тынь а содатадо: минь карматано судямо мик ангелтнэньгак? Арази сестэ миненек седеяк парсте а юксневить эрямо-аштема тевтне?

<sup>4</sup>Ды зярдэ тынк лисить пелькстамот эрямо-аштема тевтнень коряс, кода эно тынь судицякс путтадо ломанть, конатнень допрок а лови кемикурось?

<sup>5</sup>Кода тенк а визькс! Арази тынк арась вейкеяк превей ломаненк, конанень юксневельть кемицятнень ютксо пелькстамотне?

<sup>6</sup>А тынк ютксо жо, мекевланк, кемиця ялга тарги кемиця ялганзо судс, натой Пазнэнь акемиця судия икелев!

<sup>7</sup>Ансяк уш секе, вейкенк-вейкенк марто судямось, канды тыненк покш зьян. Паряк, седе паро улевель кадовомс тыненк авидестэ покордазекс? Паряк, седе паро улевель кадовомс манязекс-салазекс?

<sup>8</sup>А вана тынь тынсь, мекевланк, покордатадо ды манчетядо-салатадо. Ды кинь? Мик эсь кемиця ялганк!

<sup>9</sup>Арази тынь а содатадо: апаро ломантне а совавить Пазонть Инязорксчинтень. Илядо ильведсте эсь прянк! Сеть, кить усксевить-ускурить, эли сюконить аволь алкуксонь пазнэнь, эли кить авидечисэть мирде-ни икеле, истя жо цёра цёра марто удсицятне,

<sup>10</sup>салыцятне, вардонь сельметне, симицятне, кенгелицятне-нарьгицятне, нельгицятне, а совавить Пазонть Инязорксчинтень.

<sup>11</sup>Тынк ютксожак ульнесть истят! Ансяк ней тынь шлязь-нардазь, тынь алтазь Пазонтень, тынь ловозь чумовтомокс Иисус Христос Азоронть вельде ды минек Пазонть Оймеялтсо!

### **Рунгосонккак важодеде Пазонтень**

<sup>12</sup>Тынь кортатадо: «Монень весе меревеи». Нама, ансяк аволь весе моли лезэкс. «Монень весе меревеи». Нама, ансяк мезеньгак азорксчи алов мон а максса прям.

<sup>13</sup>Тынь истя жо кортатадо: “Ярсамопелесь пекенть туртов ды пекесь ярсамопеленть туртов”. Пазось жо ёмавтсы кода пекенть, истя ярсамопелентькак. А вана рунгось Азоронть туртов, аволь усксевемань-ускурамонь туртов, ды Азорось максы весементь рунгонть туртов.

<sup>14</sup>Пазось вельмевтизе Азоронть кулозьстэ, ды Сон минеккак вельмевтьсамизь Эсь вийсэнзэ.

<sup>15</sup>Нать тынь а содатадо: тынк рунгонк – Христосонь рунгонь пелькст. Арази мон сайсынь ды тейсынь Христосонь рунгонь пелькстнэнь усксевиця авань рунгонь пельксэкс? Зярдояк!

<sup>16</sup>Паряк, тынь а содатадо: се, кие сьолмави усксевицянтъ марто, тееви сонзэ марто вейке рунгокс. Эдь Сёрмадовкссо ёвтазь: «Нетъ кавтотне теевить вейке рунгокс».

<sup>17</sup>Се жо, кие сьолмави Азоронтъ марто, тееви Сонзэ марто вейке оймеялтокс.

<sup>18</sup>Оргодеде усксевемадонть-ускурямодонть! Кодамо пежеть ломанесь илязо тее, те пежетесь а токши ломанентъ весе рунгонзо. А усксевицясь-ускурицясь теи пежеть весе рунгонзо каршо!

<sup>19</sup>Арази тынь а содатадо: тынк рунгось – Пазонь кудо, косо эри тынк эйсэ улиця Иневанькс Оймеялтось, кона максозь тенк Пазонтъ пельде. Ней тынь уш аволь эсенк,

<sup>20</sup>эдь Пазось тынк рамидизь покш питнеде. Секскак шнадо Пазонтъ эсь рунгосонккак, оймесэнккак, эдь сынъ – Пазонтъ!

## **1-е Коринфянам 7**

### **Урьвакстомадо-венчамодо**

<sup>1</sup>Ней мон тынк сёрманк каршо ёвтан вана мезе: нама, цёрантень паро а урьвакстомс.

<sup>2</sup>Усксевема-ускурямо тевс а прамонтъ кувалт, седе паро ули эрьва цёрантень эрямс эсензэ нинзэ марто, ды эрьва авантень – эсензэ мирдензэ марто.

<sup>3</sup>Ды кадык мирдесь топавты мирдень паро тевензэ нинзэ коряс, ды истя жо нись – мирдензэ коряс.

<sup>4</sup>Аволь нись азор эсь рунгонзо лангсо, а уш мирдесь, ды истя жо мирдесккак аволь азор эсь рунгонзо лангсо, а уш нись.

<sup>5</sup>Илядо кадно вейкенк-вейкенк ёжо вачнеманть, бути ансяк зярскак, вейсэнъ меленк коряс, постс ды озномас прянь максомга, мейле таго уледе вейсэ. Лиякс, Сатанась совавттадызь пежетесь, бути а саты виенк кирдемс эсь прянк.

<sup>6</sup>Тень мон кортан тенк кода превспутома, аволь кода кармавтома.

<sup>7</sup>Нама, монь мелем: эрявольть весе ломантне истя, кода мон. Ансяк эрванть Пазонть пельде эсензэ казнезэ: вейкенть вейке, омбоценть лия.

<sup>8</sup>Апак урвакстозтненень-венчазтненень ды дова аватненень мон кортан: седе паро эрямс тенст монь ладсо ськамоост.

<sup>9</sup>А вана бути эсь прянк тенк а кирдевить, сестэ урвакстодо-венчадо. Те ули потмо мелень толсо паломадонть седе паро.

<sup>10</sup>Урвакстомасо-венчамосо сьулмавозтненень мон кармавтан Азоронть пельде, аволь уш монсь: нись илязо яво мирдензэ эйстэ.

<sup>11</sup>Бути сон яви, кадык сестэ эри ськамонзо эли лади мирдензэ марто. Мирдеськак илязо яво нинзэ эйстэ.

<sup>12</sup>Лиятненень кортан монсь, аволь Азорось: бути кемиця цёранть низэ акемиця ды нинть ули мелезэ эрямс сонзэ марто, сестэ мирдесь илязо яво эйстэнзэ.

<sup>13</sup>Ды бути кемиця аванть мирдезэ акемиця ды сонзэ мелезэ эрямс те нинть марто, сестэ аваськак илязо яво эйстэнзэ.

<sup>14</sup>Эдь акемиця мирдесь, кона сьулмави кемиця ни марто, алтави Пазонтень, ды акемиця ниськак, кона сьулмави кемиця мирде марто, алтави Пазонтень. Лиякс, сынст эйкакштнэ улевельть аванькст, а вана истя сыньгак алтавить Пазонтень.

<sup>15</sup>Бути жо акемиця мирденть эли нинть мелезэ явомс, сестэ кадык яви. Истямо тевсэнтъ кемиця мирдентень эли нинтень а эряви кадовомс мартонзо. Тень лангс апак вано, Азорось ялатеке тердимизь минек эрямс ладязь.

<sup>16</sup>Арази тонеть содави, кемиця ни, паряк идесак мирдеть? Ды тонетькак, кемиця мирде, арази содави, паряк идесак нить?

### Кадоводо истямокс, кодамокс тердидизь Пазось

<sup>17</sup>Эрвась кадык эри седе товгак се уцясканть коряс, конань явизе-аравтызе тензэ Азорось, ды кадык ули истямокс, кодамокс тердизе сонзэ Пазось. Тень мон кармавтан весе кемикуротненень.

<sup>18</sup>Кинь Пазось тердизе керявтозь – се кадык а терявты полавтомскекшемс керявтоманть. Кинь Пазось тердизе апак керявто – се кадык а теи керявтовтома.

<sup>19</sup>Пазонтень ялатеке: керявтозь ломанесь эли апак керявто. Сехте эрвиксэсь – те Пазонь кармавтовкстнень топавтомась.

<sup>20</sup>Кадык эрвась кадови се уцяскасонтъ, конаньсэ Пазось тердизе.

<sup>21</sup>Тон урекс ульнить, зярдэ тердинзеть Пазось? Кадык те тонь а талновты. Ды бути лисеват оляс, сестэ тень пек парсте нолдык тевс, лиссть.

<sup>22</sup>Эдь урентъ, конань Азорось тердизе, Сон олякстомтызе. Истя жо олячисэ тердесезь ней ули Христосонь урекс.

<sup>23</sup>Христос рамидизь тынк покш питнеде, секскак илядо тееве ломанень урекс!

<sup>24</sup>Кемиця ялгат, кинь кодамокс тердизе Пазось, кадык истямокс кадовияк Пазонтъ икеле.

### Апак урвакстозтнеде-венчазтнеде ды доватнеде

<sup>25</sup>Апак урвакстозтнень-венчазтнень коряс монь арась кармавтомам Азоронтъ пельде. Мон ёвтаса ансяк эсь мелем кода ломань, конанень Азоронтъ пельде максозь чансть улемс Сонензэ кемевиксэкс.

<sup>26</sup>Монь арсемга, неень стака шкатнень кисэ, конат кармасть ушодовомо, седе паро эрвантень кадовомс истямокс, кодамокс сон ули.

<sup>27</sup>Бути тон сьулмазят ни марто – сестэ иляк сезе те сьулмавксонтъ. Ды бути тон апак сьулма – сестэ ни иля вешне.



<sup>28</sup>А бути тон урвакстат, теньсэ пежеть а тейт. Ды бути тейтереськак лиси мирденень, теньсэяк пежеть а теи. Монь мелем жо ванстомс тынк сеть стакачитнеде, конатне вастневить урвакстозь эрямосонть.

<sup>29</sup>Кемиця ялгат! Мон кортан вана мезде: шкась кадови допрок аламо. Секс сетне, кинь улить нист, кадык седе тов эреть теке нивтеме.

<sup>30</sup>Сетне, кить авардить, кадык теке а авардитькак. Сетне, конат кенярдкшныть, кадык теке а кенярдкшнытькак. Сетне, конатне рамсить, кадык эреть кода сетне, конатненень а кирдеви-максови рамазесь.

<sup>31</sup>Ды сетне, конат сайт лезэ те масторлангонь тевтнестэ, кадык а вайть эйзэст пильгстэ пряс. Эдь неень кондямо масторлангось курок допрок ёми.

<sup>32</sup>Монь мелем: стяко тынь аволиде тално-мелявто. Апак урвакстозесь мелявты Азоронь тевтнеде, седе, кода савтомс Азоронтень.

<sup>33</sup>Урвакстозесь мелявты эрямо-аштема тевтнеде, седе, кода савтомс нинстэнь. Ули авейкетъксчи мирдень кедьсэнтъ ды тейтерентъ ютксо:

<sup>34</sup>аволь мирдень кедьсэсь эли тейтересь мелявты Азоронь тевтнеде, седе, кода рунгонть ды ойментъ алтамс ансяк Пазонтень. А мирде экшсэсь мелявты эрямо-аштема тевтнеде, седе, кода савтомс мирденстэнь.

<sup>35</sup>Весе тень мон кортан тыненк лездамга, аволь эсь мельган тынк пикссэ ускомга. Монь мелем: свал эрявлиде тынь паро койсэ ды весе эсь прянк, мезе лангскак апак вано, максовлинк Азоронтень важдемас.

<sup>36</sup>Бути цёрась лови: сон чиязь тейтерензэ коряс теи аволь истя, кода эряволь, ды бути сонзэ а саты виезэ кирдемс потмо мелень паломанзо ды сон лови: эряви тензэ урвакстомс, сестэ кадык теи сень, мезес терди седеезэ-мелезэ. Пежеть теньсэ а ули – кадык урвакстыть.

<sup>37</sup>Мекевланк, бути сон кеместэ кирди эсь арсеманзо, киненьгак а кавтолдовтови, ды кирдевить тензэ весе потмо мелензэ, ды кеместэ седейсэнзэ сась мельс ванстомс чиязенть тейтерьксчинзэ, – сон парсте теи.

<sup>38</sup>Мезе тень эйстэ лиси? Се, кие максы мирденень тейтерензэ, теи парсте, се жо, кона а максы тейтерензэ, теи седеяк парсте.

<sup>39</sup>Нись сьулмазь Койсэнтъ, зярс эри сонзэ мирдезэ. Бути мирдесь кулы, сестэ сон олячисэ лисемс лия мирденень, кинень мелезэ, ансяк те улезэ Азоронтъ мелензэ коряскак.

<sup>40</sup>Нама, те авась карми улеме седе уцяскав, бути кадови съкамонзо. Те мон истя арсян, ды ялатеке кеман: монъ эйсэяк ули Пазонь Оймеялт.

## 1-е Коринфянам 8

### Аволь алкуксонь пазнэнь алтазь сывелесь

<sup>1</sup>Ней карман кортамо сывельденть, кона алтазь авиде пазтнэненъ. Нама, “минек весень ули содамочинек тень кувалма”. Ансяк истямо содамочись чачты прянь верьга кандома, вечкемась жо кемексты-касты.

<sup>2</sup>Бути кияк лови: сон уш мезе-бути соды, се зярс а соды истя, кода тензэ эряволь содамс.

<sup>3</sup>А вана кие вечксы Пазонтъ, сенень максозь содамочи Сонзэ пельде.

<sup>4</sup>Ней мон кортан авиде пазнэнь алтазь сывельденть ярсамодо. Минь содатано: масторлангсонть арасть лия пазт, ули ансяк вейке Паз.

<sup>5</sup>Ды бути улитькак истят, конатненень мерить “пазт”, менель лангсо эли мода лангсо, – ды истят “пазтнэде” кода “азортнэдеяк” ламо, –

<sup>6</sup>минек ялатеке ансяк вейке Пазонок, Тетясь, весемень ушодыцясь-теицясь, конань туртов миньгак эрятано. Азороноккак вейке, Иисус Христос, конань вельде теезь весемесь, ды конань вельде миньгак эрятано.

<sup>7</sup>Ансяк аволь весень ули истямо содамочист. Конат-конат оймеежосост те шкас суюконить авиде пазтнэненъ, натой нейгак, зярдо ярсыть истямо сывельдентъ, арсить: сон, келя, алкукскак алтазь пазтнэненъ. Истямо арсема марто ярсамось теи аваньксэкс сынст кавтолдыця оймеежост.

<sup>8</sup>Ярсамопелесь, ялатеке, минек а малавгавтсамизь Пазонтень. Кодамояк лезэ миненек а ули, бути ярстано, ды мезеяк а ёмавттаном, бути а ярстано.

<sup>9</sup>Ансяк ванодо: те тынк олячись илязо тееве пупордямокс сетненень, конатненъ кемемаст лавшо.

<sup>10</sup>Эдь бути кавтолдыця оймеежо мартось нетянзат тонь, конань ули содамочизэ, столь эхшсэ авиде пазнэнь озкскудосо, сестэ арази а саи сон мель ярсамс се сывельдентъ, кона алтазь авиде пазтнэненъ?

<sup>11</sup>Ды истя тонь содамочисэть ёмавтовом те лавшо кемиця ялгась, конань кисэ кулось Христос!

<sup>12</sup>Зярдо тынь истямо ладсо тейтядо пежеть эсь кемиця ялганк каршо ды кандтадо сэредькс сынст кавтолдыця оймеежонтень, сестэ тынь тейтядо пежеть Христосонь каршояк.

<sup>13</sup>Ды секскак, бути ярсамопелесь карми улеме монь кемиця ялганть туртов пежетьс прамо тувталокс, сестэ уш мон зярдояк а карман ярсамо сывельде, ансяк а правтомс монь кемиця ялганть пежетьс!

## **1-е Коринфянам 9**

### **Паволонь арсеманзо апостолтнэнь эряmodo-аштемадо**

<sup>1</sup>Арази мон аволь олячисан? Арази мон аволь апостолан? Арази мон эзия нее Иисус Христосонь, минек Азоронтъ? Арази аволь мон эсь важомемасон тынк ветидизь Азоронтень?

<sup>2</sup>Лиятненень мон, паряк, аволь апостолан, а тыненк – мон алкуксонь апостол. Эдь монь апостолксчинь кемекстамо тешксэсь – те тынь, Азоронтъ марто тынк эрямось.

<sup>3</sup>Вана мезть мон ёвтан эсь прям идеманть кисэ сетненень, кить монь кевкстнить-чумондыть:

<sup>4</sup>Арази минек арась олянок ярсамс ды симемс эсь важдеманок вийсэ?

<sup>5</sup>Арази арась олянок сайнемс мартонок якамо нинть теке кемиця сазоронть, кода тейнить лия апостолтнэ, Азоронть братнэяк ды Кефа.

<sup>6</sup>Эли ансяк миненек Варнава марто эряви эстенек, кедьсэ важдезь, трямс прянок?

<sup>7</sup>Кодамо сиведезь ушман тюри эсензэ ярмакто? Кодамо сокиця-видиця озавты винаумарькс пире, ды а карми ярсамо неть винаумартнеде? Кодамо ревень-сеянь ваньця а ярсы те стаданть ловсодо?

<sup>8</sup>Мон тесэ кортан аволь ансяк ломанень эрямосто саезь невтевкс марто. Арази аволь текеде корты Коеськак?

<sup>9</sup>Моисеень Койсэнтъ сёрмадозь: «Иляк пекста пивсыця буканть кургонзо». Арази теньсэ Пазось букадонть мелявты?

<sup>10</sup>Арази тень сон кортась аволь минек кисэ! Нама, те истя минек кисэ сёрмадозь. Сокицяськак кадык соки, пивсыцяськак кадык пивсы, сюронь эсь таликанзо лангс кемезь.

<sup>11</sup>Кенярков кулянтъ вельде минь видинек тынк юткс оймеялтонь видьметь. Арази те вельть ламо, бути учотано эстенек пурнамс пельденк эрямонь кирдема лезкс?

<sup>12</sup>Бути лиятненень максозь оля саемс пельденк лезкс, сестэ миненек сон максозь седеяк икеле. Минь ялатеке те азорксчинть зярдояк тевс эзинек нолдтне. Мекевланк, минь анокт кандомс весемень: ансяк мезесэяк а пирямс Христосто Кенярков кулянь пачтямонть.

<sup>13</sup>Арази тынь а содатадо: Пазонь кудосо важдиця поптнэ андыть пряст Пазонь кудонть эйстэ? Зярко сынь путыть алтаренть лангс казнеть-анокст, сестэяк ули оляст саемс талика путозенть эйстэ.

<sup>14</sup>Азорось истя жо аравтызе: кить ёвтнить Кенярксов кулянтъ, тень эйсэ эрясткак.

<sup>15</sup>Ансяк мон зярдояк те олянтъ тевс эзия нолдтне. Ды нейгак сёрмадан аволь эстенъ вешеманъ кисэ. Кадык мон седе курок кулан! Ансяк киненьгак а саеви эйтэнь те монъ прянь шнамо тувталось!

<sup>16</sup>Эдь бути мон ёвтнян Кенярксов кулянтъ, теньсэ мон прям шнамо а карман. Те тевентъ топавтомо монъ кармавтымим Пазось! Ризкс ули тень, бути а карман те кулянтъ ёвтнеме!

<sup>17</sup>Бути эсь мелем коряс теевлинь тень, сестэ бу кемевлинь питнень пандома лангскак. А бути теян тевем аволь эсь мелем коряс, ялатеке мон топавтан монень максозь тевентъ.

<sup>18</sup>Сестэ мейсэ ашти монень питнень пандомась? Сеньсэ: мон ёвтнян Христосто Кенярксов кулянтъ питневтеме, ды а нолдтнян тевс эсь олям, кона монень максови, кода Кенярксов кулянь пачтицяненъ.

<sup>19</sup>Куш мон олячисан ды киненьгак аволь уре, мон ялатеке весенень теевинъ урекс – Христоснэнь седе ламо ломантнень ветямга.

<sup>20</sup>Еврейтненень мон ульнинъ еврееень кондямокс – сынст эсень мельга ветямга. Коень топавтыцятненень мон ульнинъ Коень топавтыцянь кондямокс – эсень мельга Коень топавтыцятнень ветямга.

<sup>21</sup>Истя жо сетненень, конатне а содасызь Коентъ, монгак ульнинъ Коень а содыцянь кондямокс – эсень мельга Коень асодыцятнень ветямга. Ансяк монсь ялатеке содаса Пазонъ Коентъ, секс мекс мон Христосонъ Коентъ ало.

<sup>22</sup>Кемемасо лавшотненень монгак ульнинъ лавшокс – эсень мельга лавшотнень ветямга. Весенень мон ульнинъ весемекс вана мекс: эрва кодамо ладсо куш зярыя ломанень идемга.

<sup>23</sup>Весе тень мон теян Кенярксов кулянтъ ламонень пачтямонзо кисэ ды эстенъгак саемс сонзэ чанстентъ-баславамонтъ.

<sup>24</sup>Тынь содатадо: чиёмань пелькстамотнесэ ламо чийницят, ансяк вейкенень максови казне. Секскак, истя тыньгак чиёде пек эрзасто, казнень саемга!

<sup>25</sup>Весе чийницятне-пелькстыцятне пек кеместэ анокстыть тенень пряст. Сынь тень теить курок пужиця-наксадыця каштазонть саеманзо кисэ. Минь жо тень тейтяно зярдояк а пужиця-наксадыця каштазонть саемга.

<sup>26</sup>Секс мон чиянгатк пенть неезь! Ды зярко мокшнасо тюрянгак, аволь чаво коштонть чаван!

<sup>27</sup>Мон эрва кода кемелгавтан эсь рунгом, теян сонзэ весемесэ мелем кунсолыцякс сень кисэ: Пазось илямам ёрто ве ёнов монь, кие ёвтни лиятненень Кенярксов кулянтъ.

## 1-е Коринфянам 10

### Илядо сюконя аволь алкуксонь пазтнэненъ

<sup>1</sup>Монь мелем, кемиця ялгат, ледстямс тынк мельс вана мезе: весе минек покштятненъ ветнесь-ванстсь пелень палмань, ды весе ютасть Якстере иневедентъ трокс\*.

<sup>2</sup>Те пельсэнтъ ды иневедьсэнтъ весе сынъ нававтозельть Моисей мельга молицякс.

<sup>3</sup>Весе сынъ ярасать вейке ды секе жо менелень ярамопельдентъ,

<sup>4</sup>ды весе сынъ симсть вейке ды теке жо менелень симемапельдентъ. Сынь симсть менелень кевпандосто, кона мольсь мартост. Те кевпандось жо ульнесь Сонсь Христос.

<sup>5</sup>Ды ялатеке ламотне эйстэст эзизь савто Пазонтень, ды сынъ пракшность-кулсестъ чаво модас.

<sup>6</sup>Весе те теевсь миненек невтемакс: эрگا, а карматано бажамо зыянонь тееме, кода бажастъ сетне!

<sup>7</sup>Илядо суюкня аволь алкуксонь пазтнэнень, кода конат-конат эйтэст. Эдь Сёрмадовкссо ёвтазь: «Ломантне озасть ярсамо-симеме, ды мейле эсест теевть пазтнэнъ лемс тейсть амазы киштнемкат-морсемкат».

<sup>8</sup>А карматано ускурямо-усксевеме, кода конат-конат эйтэст. Сынъ кармасть ускурямо-усксевеме – ды вейке чис ёмасть-прасть комськолмово тѣжат.

<sup>9</sup>А карматано снартнеме-варчавтнеме Христосонь, кода снартнестъ-варчавтнестъ Сонзэ конат-конат эйтэст. Секскак сынъ кулость-ёмасть гуень пупамодо.

<sup>10</sup>Илядо пеняця-шално, кода пеняцясть-шалность конат-конат эйтэст – ды сынст куловтынзе ёмавтыця ангел.

<sup>11</sup>Весе те теевсь мартост лиятненень невтемакс ды сёрмадозь минек тонавтомга-ванстомга, эдь минь эрятано пингетнень прыдовома шкасто.

<sup>12</sup>Секскак, кие арси, сон кеместэ ашти, кадык ваны, кода а прамс.

<sup>13</sup>Стакачинь снартнематне-варчавтнематне, конатне савкшныть тенк печтямс – те ансяк ломанень эрямонь-аштемань снартнемат. Пазось ялатеке кемевикс, ды Сон а нолды истят снартнемат, конат улевельть аволь тынк виенк коряс. Теке марто эрва снартнемастонть Сон невти лисема ки ды вийгак максы сонзэ изнямга.

<sup>14</sup>Вана мекс, монь вечкевикс ялган, оргодеде аволь алкуксонь пазнэнъ суюкнямодо!

<sup>15</sup>Мон карман кортамо мартонк, кода превей ломань марто. Тынсь арсинк монь валон.

<sup>16</sup>Чанстямонь кечесь, конань кисэ минь ёвтатано суюкпря Пазонтень, вейсэндиди минек весень Христосонь верентень. Ды кшиськак, конань минь синдтяно, сэвемстэнзэ вейсэндиди минек весень Христосонь рунгонтень.

<sup>17</sup>Те кшись вейке, ды истя жо весе миньгак, куш минь ламонек, ультяно вейке рунгокс секс, мекс весе явтано вейке ды теке жо кшинть.

<sup>18</sup>Варштадоjak израилень раськенть лангс! Сеть, конат ярсить аноксокс кандозденть, вейсэндявить теньсэ Пазонь алтарентень.

<sup>19</sup>Сестэ мезень коряс эно мон кортан? Арази авиде пазнэнь кандозенть ули кодамо-бути смустезэ эли сонсь авиде пазоськак невти мезе-бути алкуксонь?

<sup>20</sup>Нама, аволь! Мон кортан вана мезде: зярдо виде Пазонь асодыцятне кандыть анокс алтарь лангс, сынь кандыть сонзэ идемевстненень, аволь Пазонтень. А вана монь арась мелем вейсэндямс тынк идемевстненень марто.

<sup>21</sup>Тынь а симевтядо ве шкасто Азоронть кечестэ ды истя жо идемевсень кечестэяк! Истя жо тынь ве шкасто а улевтядо Азоронть столь экшсэ ды идемевсень столь экшсэяк.

<sup>22</sup>Эли минек меленек ацирьгавтнемс теньсэ Азоронть? Арази минь Сондензэ виевть?

#### **Тееде весементь Пазонть шнамга**

<sup>23</sup>Тынь кортатадо: «Монень весе меревил!» Нама, ансяк аволь весе моли лезэкс. «Монень весе меревил!» Нама, ансяк аволь весе касты-кемексты.

<sup>24</sup>Кадык кияк а вешни эстензэ лезэ, кадык мелявты лиянтъ кисэ ды теи тензэ паро!

<sup>25</sup>Весенть эйстэ, мезе рамсетядо сывелень микшнициянь кедьстэ, ярсадо апак кевкстне ды оймеёжонь апак талновто.

<sup>26</sup>Эдь Сёрмадовкссо ёвтазь: «Модась ды весе, мезе сонзэ лангсо, Азоронть».

<sup>27</sup>Бути кияк акемицятненень эйстэ тердтядызь тынк ярсамо ды тынь сайтядо мель модемс, сестэ весементь эйстэ, мезе икеленк путыть, ярсадо апак кевкстне ды оймеёжонь апак талновто.



<sup>28</sup>А бути кияк тенк мери: «Те сывелесь авиде пазнэнь аноксокс кандозенть эйстэ», – сестэ илядо ярса те сывельденть – се ломаненть кисэ, кие ёвтась, ды оймеёжонтъ кисэ, эдь «модась ды весе, мезе сонзэ лангсо, Азоронтъ».

<sup>29</sup>Мон ней кортан те лия ломаненть оймеёжодонтъ, аволь тынк оймеёжодонтъ. Нама, мон а максса лия ломаненть оймеёжонтень пирямс монь олячинть.

<sup>30</sup>Бути мон ёвтан сукпря Пазонтень ярсамопеленть кисэ, сестэ а эряви монь пазямс-кортавомс, мезенть кисэ монсь ёвтан сукпря.

<sup>31</sup>Истя вана, ярстадоjak, симтядоjak – весе, мезе тынь тейтядо, тееде Пазонтъ шнамга.

<sup>32</sup>Эрjado истя: илядо уле пупордямо кевекс еврейтнененьгак, лия раськетнененьгак ды Пазонтъ кемикуронтеньгак.

<sup>33</sup>Тееде монь ладсо: мон бажан весенень савтомс весемесэ ды, сынст идемга, вешнян лезэ весе ломантненень, аволь эстенъ.

## 1-е Коринфянам 11

### Пазнэнь озномсто прянь ветямодо

<sup>1</sup>Тееде монь ладсо, кода монгак теян Христос ладсо.

<sup>2</sup>Мон тынк шнан, кемиця ялгат, секс, мекс тынь свал мельсэнк кирдтядо весе монь тевень-валон ды видестэ топавтjado весе се тонавтоматненень, конатненень мон максынь тенк.

<sup>3</sup>Монь мелем ней ёвтамс тенк: эрва цёра ломанентень прявтось – Христос, нинтень прявтось – мирде, Христоснэнь прявтось – Пазось.

<sup>4</sup>Эрва цёра ломанесь, кона озны эли пазмарицякс корты прянь вельтязь, теньсэ вети визьксчамас эсь прявтонзо.

<sup>5</sup>Ды эрва аваськак, кона озны эли пазмарицякс корты прянь апак вельтя, вети визьксчамас эсь прявтонзо. Сон мейсэяк а явови брезь пря аванть эйстэ.

<sup>6</sup>Истямо ладсо, бути авась а кандтни прянь вельтямо паця, сестэ кадык черензэяк нарасынзе. Ды бути авантень амазы улемс наразекс эли брезекс, сестэ кадык вельтясы прянзо.

<sup>7</sup>Цёрантень а эряви вельтямс прянзо, секс мекс сон невти Пазонь чачонтъ ды Сонзэ инексчинтъ, авась жо невти цёрантъ инексчинзэ.

<sup>8</sup>Эдь аволь цёрась теезь авантъ эйтэ, мекевланк, авась цёрантъ эйтэ.

<sup>9</sup>Ды аволь цёрась ульнесь теезь авантъ туртов, мекевланк, авась – цёрантъ туртов.

<sup>10</sup>Секскак авантень эряви вельтямс прянзо вана мекс: те ули мирдень азорксчи ало аштемань тешкс, ды ангелтнэнень тешкс.

<sup>11</sup>Азоронтъ икеле, ялатеке, аваськак мезекскак а ашти цёравтомо ды цёраськак – ававтомо.

<sup>12</sup>Куш авась теезель цёрантъ эйтэ, истя жо эрьва цёраськак чачи авантъ эйтэ. Ды сынъ кавонест, кода весемесь, лисить Пазонтъ эйтэ.

<sup>13</sup>Арседеяк тынсь, мазы-амазы авантень озномс Пазонтень прянь апак вельтя?

<sup>14</sup>Эдь сонсь Пазонь теевть лувоськак тынк тонавты: цёрантень кувака чертне – визьксчи,

<sup>15</sup>авантень жо кувака чертне – ине мазычи. Сынъ сонензэ максозь, кода вельтямо паця.

<sup>16</sup>Бути киньгак ули мелезэ мартон теде пелькстамс, сенень мерян: те кевкстемантъ коряс лия койть-кирдат арасть минеккак ды Пазонь весе кемикуротнесэяк.

#### **Азоронтъ лемс ярсамонь колсематне**

<sup>17</sup>Максан тенк лия превспутоматкак. Ансяк ней а шнатадызь тынк промксонк ютавтомаст кисэ: сынъ тыненк лезэнтъ таркас кандыть седе ламо зыян.

<sup>18</sup>Васняк, мон маринь: тынк кемикуронь промкстнэсэ эрсить явновомат, ды аламодо кемангак тенень.

<sup>19</sup>Нама, авейкеть мельтненень тынк ютксо эрвияк улемс. Истя тыненк седе неяви, кить ютксонк кемевикст.

<sup>20</sup>Зярдю тынь пурнавтадо весе кемикуронек, те, нама, аволь Азоронть лемс ярсамо.

<sup>21</sup>Эдь эрвась эйстэнк ярсамсто уварды эсь ярсамодонзо, вейкенк-вейкенк апак учо. Секс вейкесь кадови вачодо, омбоцесь туй иредьстэ.

<sup>22</sup>Арази тынк арась эсь кудонк, косо ярсавлиде ды симевлиде? Мекс тынь безардтядо Пазонь кемикуронть ды покордатадо арасьчисэтненень? Мезе тень лангс ёвтамс тенк? Шнамс? Арась, тень кисэ мон тынк а шнатадызь!

#### **Кода видестэ ютавомс Азоронть лемс ярсамонть**

<sup>23</sup>Монень максозь Сонсензэ Азоронть пельде се, мезес мон ней тынккак тонаван: Иисус Азорось се вестэнтъ, зярдю миезель, сайсь кши,

<sup>24</sup>ёвтась Пазонтень сюкпря, синтризе ды мерсь: «Саинк ды ярсадо, те Монь рунгом, кона тынк кисэ синтревви. Истя тейнеде мелезэнк Монь ледстнемга».

<sup>25</sup>Ярсамодо мейле Сон истя жо саизе кечентъ ды мерсь: «Те кечесь – Пазонтъ марто од вейсэнълув, кона кемекстави Монь верьсэ. Эрваксть, зярдю карматадо эйстэнзэ симеме, тееде тень мелезэнк Монь ледстнемга».

<sup>26</sup>Истя, эрваксть, зярдю тынь ярстадо те кшидентъ ды симтядо те кечестэнтъ, тынь пачтятадо куля Азоронть куломадо – семс, зярс Сон таго а сы.

<sup>27</sup>Истя, эрвась, кие ярсы Азоронть кшиде ды сими Сонзэ кечестэнтъ эсь прянь ветязь а истя, кода эряви, се теи чумо Азоронть рунгонзо ды верензэ каршо.

<sup>28</sup>Секскак кадык эрва ломанесь сонсь васня эсь прянзо варчавтнесы, ды ансяк мейле ярсы те кшиденть ды сими те кечестэнтъ.

<sup>29</sup>Эдь кие ярсы ды сими Азоронть рунгонзо апак лово-чарькоде, се тень эйсэ тарги эсь прянзо лангс чумондома.

<sup>30</sup>Вана мекс тынк ютксо ламо лавшот ды сэредицят, ды кулостькак уш аволь аламо.

<sup>31</sup>Бути минь минсь, васняк, варчавтневлинек-онкстневлинек эсь прянок, сестэ Азорось минек аволимизь чумондо.

<sup>32</sup>Бути Азорось минек ялатеке чумонды, теньсэ Сон путы минек виде ки лангс. Теньсэ Сон вансты минек меельце судонтъ эйтэ весе масторлангонть марто.

<sup>33</sup>Истя, кемиця ялган, зярдэ вейсэ пурнавтадо Азоронть лемс ярсамос, учодо вейкенк-вейкенк.

<sup>34</sup>Бути кие вачо, кадык икелевгак ярсы кудосо. А эряви теемс тынк промкстнэнь эстенк чумондомакс. Весе лия тевтнеде максан превспутомат сестэ, зярдэ мон сан тыненк.

## 1-е Коринфянам 12

### Иневанькс Оймеялтонь казнетне

<sup>1</sup>Ней, кемиця ялгат, монь мелем максомс тыненк виде чарькодема Иневанькс Оймеялтонь казнетнеде.

<sup>2</sup>Тынь тынсь содатадо, зярдэ ульниде виде Пазонь а содыцяс, сестэ теке кодамо-бути акирдевиця вий ветнесь эйсэнк аволь алкуксонь вайгельтеме пазтнэненъ.

<sup>3</sup>Секскак, монь мелем парсте чарькодстемс тенк вана мезентъ: бути ломанентъ вети Пазонь Оймеялтось, сестэ сон зярдояк а мери: «Ульть сюдозь Иисус!» Ды ломанесь мери Иисуснэнь «Азоро» ансяк сестэ, зярдэ сонзэ вети Иневанькс Оймеялтось.

<sup>4</sup>Улить чанстень эрва кодамо казнетъ, ансяк весе сынъ – теке жо Оймаелтонть пельде.

<sup>5</sup>Улить эрва кодамо важоматкак, ансяк весе сынъ – теке жо Азоронть.

<sup>6</sup>Улить Пазонь виень эрва кодат невтема тевтькак, ансяк весе кемицятнень вельде весементъ теи-невти теке жо Пазось.

<sup>7</sup>Весень лезэс Пазось эрванть эйсэ Оймаелтонть яволявты аволь вейкетъстэ.

<sup>8</sup>Вейкентень Оймаелтось максы превейчинь валт; омбоцентень теке жо Оймаелтось максы содамочинь валт;

<sup>9</sup>колмоцентень теке жо Оймаелтось максы кемема. Кинень-бути теке жо Оймаелтось максы сэредицянь шумбралгавтомань казнетъ;

<sup>10</sup>лиянень – тамашань-дивань теема вий; лиянень – пазмарицякс кортамонь казне; лиянень – оймаелтнэнь явома. Кинень-бути максови асодавикс кельсэ кортамонь казне, а вана лиянень – неть кельтнень смустест панжомма.

<sup>11</sup>Весе тень теи вейке ды теке жо Оймаелтось: эрвантень максы-яви башка казне, кода Сонзэ мелезэ.

#### **Вейке рунгонть ламо пельксэнзэ**

<sup>12</sup>Христос, кода ломанень рунгоськак, ашти зярыя башка пельксстэ. Куш рунгось теезь ламо пельксстэ, сон ялатеке вейке.

<sup>13</sup>Истямо ладсо, весе минь: еврееькак ды лия раськенсеськак, уреськак ды олясоськак, – нававтозь вейке Оймаелтсо улемс вейке рунгокс. Ды весе минь симдезь вейке ды теке жо Оймаелттонть.

<sup>14</sup>Эдь рунгоськак ашти ламо пельксстэ, аволь ансяк вейкестэ.

<sup>15</sup>Бути пильгесь меревель: «Мон аволь кедь, ды секс мон аволь те рунгонть пельксэзэ», арази сон сестэ а карми улеме рунгонь пельксэкс?

<sup>16</sup>Бути пилеськак меревель: «Мон аволь сельме, ды секс мон аволь те рунгонть пельксээ», арази сон сестэ а карми улеме рунгонь пельксэкс?

<sup>17</sup>Бути весе рунгось аштевель вейке сельместэ, кода сестэ сон маряволь? А бути весе рунгось – пиле, кода сестэ сонензэ чинесь-танстесь содаволь?

<sup>18</sup>Пазось жо, эсь мелензэ коряс, аравтнинзе рунгосонть весе пелькстнэнь таркаваст.

<sup>19</sup>Ды бути весе аштевель ансяк вейке пельксстэ, сестэ косо улевель рунгось?

<sup>20</sup>Ансяк ней лисни истя: пелькстнэде ламо, а рунгось – вейке.

<sup>21</sup>Секскак, сельмесь а меревеи кедентень: «Тон монень а эриват!» Ды пряськак а меревеи пильгетненень: «Тынь монень а эривтадо!»

<sup>22</sup>Мекевланк, сеть рунгонь пелькстнэ, конатне миненек неявить-марявить седе лавшокс, сынъ седеяк эривикст.

<sup>23</sup>Ды сеть пелькстнэ, конатне миненек неявить-марявить аволь питнеекс, сынст минъ седеяк парсте тапарятано-вельтятано.

<sup>24</sup>Ды амазы таркань пелькстнэнь оршавтано-кекшнетяно седеяк вадрясто, мезенть а эриви теемс мазытнень марто. Сонсь Пазось сюлминзе рунгонь пелькстнэнь эсь ютковаст истя: Сон макссь седе покш питне сеть пелькстнэненень, конатне миненек марявить седе аволь питнеекс.

<sup>25</sup>Пазось истя теизе вана мекс: илязо уле рунгосонть явновома-пелькстамо, мекевланк, весе пелькстнэ вейкетъстэ мелявтовольть вейкест-вейкест эйстэ.

<sup>26</sup>Бути пишти-майси вейке пелькс, сестэ мартонзо пиштить-майсить весе лия пелькстнэяк. Бути шнави вейке пельксэсь, сестэ мартонзо кецнить весе лия пелькстнэяк.

<sup>27</sup>Весе тынь вейсэ – Христосонь рунго. Эрвась эйтэнк Сонзэ рунгонзо пелькс.

<sup>28</sup>Кемикуросонзо Пазось эрванть путызе эсь тарказонзо: васенце таркасонть – апостолтнэ, омбоцесэнтъ – пазмарицятне, колмоцесэнтъ – тонавтыцятне. Мейле молить сеть, кинень максозь вий тейнемс диват-тамашат, седе тов сетне, кинь ули шумбралгавтомань казнезэ, лезксэнь максомань, ветицякс улемань эли асодавикс кельсэ кортамонь казнест.

<sup>29</sup>Арази весе апостолт? Весе пазмарицят? Весе тонавтыцят? Весе тейнить тамашат?

<sup>30</sup>Арази весень шумбралгавтомань казнест? Весе кортыть асодавикс кельсэ? Эли весень ули казнест панжомс неть кельтнень смустест?

<sup>31</sup>Тынь пек бажадо чанстенъ сехте покш казнетненень! Ды ней мон невтса тенк сехте паро кинть.

## 1-е Коринфянам 13

### Вечкема

<sup>1</sup>Бути мон кортавлинь ломанень ды мик ангелэнь кельтнесэяк, а вана вечкемам а ули, сестэ мон ансяк кода гайгиця баяга эли жойниця горнипов.

<sup>2</sup>Ды бути монъ улевель пазмарицякс кортамонь казнем, ды мон чарькодевлинь весе салавачитнень ды монъ улевель содамочим весемедентъ, ды бути монъ улевель истямо кемемам, конанень пандтнэяк таркастост сыргавтовольть, – а вана вечкемам а ули, сестэ мон мезекскак а аштян.

<sup>3</sup>Ды бути мон явшевлия весе ули-паром кажовнень-пурныцяненень, ды мик эсь рунгомгак максовлия пултамс, а вана вечкемам а ули, сестэ весе те кодамояк лезэ монень а максы.

<sup>4</sup>Вечкемась – кувать цидярдыця, паронь арсиця, сельмень а сявадыця, прянь а шныця, а каштангалиця,

<sup>5</sup>а аксунгалиця, эсензэ туртов лезэнь а вешница, а ацирьгалиця, кежень а кирдиця.

<sup>6</sup>Вечкемась а кенярдокшны беряненень, сон кенярдокшны видечинтень.

<sup>7</sup>Сон весементь кирди, свал кеми, эрва тевсэ нежеди Пазонтъ лангс, весементь канды-цидлярды.

<sup>8</sup>Вечкемась зярдож а ёми. Пазмарицякс кортамось прядови, асодавикс кельтнесэ кортамоськак лотки, содамочиськак ёми-прядови.

<sup>9</sup>Эдь минек содамочись – ансяк пелькстнэде, асатыкс марто, ды пазмарицякс минек кортамоськак – истя жо асатыкс марто.

<sup>10</sup>Зярдо жо сы асатыкстэмесь, сестэ весе асатыкс мартось ёми-прядови.

<sup>11</sup>Зярдо мон ульнинь пиже эйкакшокс, сестэ кортамонгак, арсемангак ды меленьгак ульнестъ пиже эйкакшонь. Ней, зярдо мон уш покш цёран, кадья весе сень, мезе ульнестъ эйкакшонь.

<sup>12</sup>Ней минь нетяно ансяк теке потмура зеркалань пачк сулей, а вана сестэ карматано нееме чамадо чамас. Ней монь содамочись – ансяк башка пелькст, сестэ мон карман содамо истя жо парсте-домкасто, кода Пазось содасамам монь.

<sup>13</sup>Лисни, свал улить неть колмотне: кемемась, седейнежедьксэсь, вечкемась. Ансяк сынст ютксто сехте ине – вечкемась.

## **1-е Коринфянам 14**

### **Пазмарицякс кортамонь ды асодавикс кельсэ кортамонь казнетъ**

<sup>1</sup>Истямо ладсо, сехте пек терявтодо вечкемантень. Истя жо пек бажадо Оймеялтонь казнетнененьгак, васенцекс – пазмарицякс кортамонтень.

<sup>2</sup>Кие корты асодавикс кельсэ, се корты Пазонтень, аволь ломантненень, секс мекс сонзэ кияк а чарькодъсы. Сон корты салавачить Пазонь Оймеялтонть ветямонзо коряс.



<sup>3</sup>А се, кие корты пазмарицякс, пшкади ломантненень ды кемексты-касты сынст, максы тенст вий ды важдамо-оймамо.

<sup>4</sup>Кие корты асодавикс кельсэ, се кемексты-касты эсь прянзо. А кие корты пазмарицякс, се кемексты-касты кемикуронтъ.

<sup>5</sup>Паро, бути тынь весе кортавлиде истямо кельсэ, а вана седеяк паро, бути тынь кортавлиде пазмарицякс! Пазмарицякс кортыцясь седе питней асодавикс кельсэ кортыцядонть. Бути сон теке марто панжсы истямо кельсэ ёвтазентъ смустензэ кемикуронтъ кемекстамга-кастомга, сестэ питнест вейкетъ.

<sup>6</sup>Кемиця ялгат, арсинк тень: бути мон савлинь тыненк ды кармавлинь кортамо ансяк асодавикс кельсэ, сестэ кодамо улевель тыненк тень эйстэ лезэсь? Мон жо эзинь пачтя тенк Пазонтъ пельде чартть-неявкст, содамочить, пазмарицякс кортамо эли тонавтома.

<sup>7</sup>Истя жо эрси оймевтеме седямопельтненень мартояк. Невтемакс, кода содамс, мезе седяви-налксеви флейтасонтъ эли арфасонтъ, бути гайтне а явовить?

<sup>8</sup>Бути ушмонь торамоськак максы амарявикс-ачарькодевикс гайть, кие сестэ карми анокстамо тюремантень?

<sup>9</sup>Истя тынк мартояк: бути карматадо кортамо ачарькодевикс валт асодавикс кельсэ, кода сестэ ломантненень чарькодемс, мезе тынь ёвтыде? Тынь жо нолдтнетядо валонк варма мельга!

<sup>10</sup>Нама, масторлангсонть пек ламо кельть, ды вейкеяк сынст эйстэ арась смустеме.

<sup>11</sup>А бути мон а содаса кортыцянтъ келензэ, сестэ мон карман уleme сонензэ лия масторонь ломанекс, ды сонгак монень – лия масторонь ломанекс.

<sup>12</sup>Истя тынк мартояк: зярдю тынь бажатадо Оймеялтонь казнетненень, сестэ вешнеде седе ламо сетнеде, конатне лездыть кемикуронть кемекстамонтень-кастомантень.

<sup>13</sup>Секскак, кие корты асодавикс кельсэ, кадык сон озны сынст смустест панжомань казненть кисэяк.

<sup>14</sup>Эдь бути мон ознан истямо кельсэ, сестэ озны монь оймеялтось, а превень чатьмонить.

<sup>15</sup>Кода эно улемс? Карман озномо истя, кода монь терди Оймеялтось, ды истя жо превсэяк карман озномо! Карман Пазонтъ моравтомо оймеялтсо ды истя жо превсэяк карман моравтомонзо!

<sup>16</sup>Эдь бути тон ёвтат сукпря Пазонтень ансяк оймеялтсо, кода сестэ асодыця ломанесь тонь сукпрянтъ каршо мери «Алкукс истя!», зярдю сон а чарькоди, мезде тон кортат?

<sup>17</sup>Тон вельть мазыйстэ ёвтат сукпрат Пазонтень, ансяк лиянтень тень эйстэ кодамояк лезэ арась.

<sup>18</sup>Сукпря Пазонтень, мон тынденк веседе ламо кортан асодавикс кельсэ.

<sup>19</sup>Ялатеке кемикуронь промкссо мон лован седе парокс ёвтамс вете чарькодевикс валт лиятненьгак тонавтомаст кисэ, асодавикс келень кемень тёжат валтнэнь таркас!

<sup>20</sup>Кемиця ялгат, илядо уле превень коряс эйкакшокс. Берянентъ содамонь коряс уледе вишкинекс, а вана превень коряс – касозь-виензазь ломанекс.

<sup>21</sup>Койсэнтъ сёрмадозь Азоронтъ валонзо: «Лия кельсэ ды омбо масторонь ломанень валсо Мон карман кортамо те раськентень, ды сестэяк сынъ Монь а кунсолосамизь».

<sup>22</sup>Лисни: асодавикс кельтне – те невтема тешкс сетненень, кить а кемить, аволь кемицятненень. А вана пазмарицякс кортамось максови кемицятненень, аволь сетненень, кить а кемить.

<sup>23</sup>Эдь бути пурнави весе кемикурось, косо эрьвась карми кортамо асодавикс кельсэ, ды тозонь сыть асодыцят эли акемицят, мезе сынъ сестэ мерить? Сынъ мерить: тынь превстэ лисиде!

<sup>24</sup>Бути жо весе кортыть пазмарицякс ды тов сы акемиця эли асодыця, сестэ сон эрьванть пельде марясы сень, мезесь лангс ливти сонзэ пежетензэ ды чумонды эйсэнзэ.

<sup>25</sup>Истя таргавить лангс седеензэ салавань арсематне. Сестэ сон пры кумажа лангс, суюкони Пазонтень ды верьга вайгельть яволявты: «Алкукс, тынк ютксо Пазось!»

#### **Кемикуронь промксонь ветямонь лув-лад**

<sup>26</sup>Мезе эно тень эйстэ лисни, кемиця ялгат? Зярдо тынь пурнавтадо вейс, сестэ кадык эрьванть ули мезезяк лиятнень туртов: моро, тонавтома, Пазонтъ максовт чартъ-неявкс, асодавикс кельсэ кортамо эли кельтнень смустест панжомо. Весе те лездазо кемикуронь кемекстамонтень-кастомантень.

<sup>27</sup>Бути кортыть асодавикс кельсэ, кадык кортыть ансяк кавто ломанть эли колмодо аволь седе ламо, ды кортаст вейке-вейке мельга, ды кияк панжозо кортамонь смустенть.

<sup>28</sup>Бути жо арась смустень панжиця, кадык сестэ кельсэ кортыцясь чатьмони промксонтъ ды корты ансяк эськанзо ды Пазонтъ туртов.

<sup>29</sup>Пазмарицятнень эйстэяк кадык кортыть кавто эли колмо, лиятне жо кадык ванкшныть сынст валост.

<sup>30</sup>Ды бути киненьгак перька аштицятнестэ максови Пазонтъ пельде чартъ-неявкс, сестэ кадык васенце кортыцясь чатьмонезеви.

<sup>31</sup>Тыненк весенень максови вий кортамс пазмарицякс вейке-вейке мельга – весень мезескак тонавтомга ды весень кемекстамга.

<sup>32</sup>Пазмарицятненень эряви оймеялтонть казнензэ кирдемс эсест кедь ало.

<sup>33</sup>Эдь Пазось – сэтъмелувонь-ладямонь Паз, аволь тапамонь-човорямонь. Кода тейнить Пазонь ломантне весе кемикурогнесэ,

<sup>34</sup>Истя улезэ тынк промкссожак: аватненень эряви аштемс чатьмонезь. Кадык сынъ сэтъмествэ кунсолыть ды а кортнить-кевкстнить, кода ёвтазь Моисеень Койсэнтъ.

<sup>35</sup>Бути сынст ули мелест мезежак кевкстемс, кадык кудосо тень кевкстьсызь эсь мирдест кедьствэ. Авантень кортамс промкссо амазы, а лади.

<sup>36</sup>Паряк, тынь арсетядо: Пазонь валось лиссь тынк пельде? Эли сась ансяк тыненк?

<sup>37</sup>Бути кие лови прянзо пазмарицякс эли Оймеялтонъ казне марто ломанекс, сестэ сон кадык соды: те, мезе мон сёрмадан тенк, кармавтовкст Азоронтъ пельде.

<sup>38</sup>Кие а чарькоди, се кадык а чарькодияк.

<sup>39</sup>Истя, кемиця ялган, пек бажадо пазмарицякс кортамонь казнентень, ды илядо карда асодавикс кельсэ кортамодояк.

<sup>40</sup>Ансяк весемесь улезэ теезь паро койсэ ды лув-лад марто.

## **1-е Коринфянам 15**

### **Кулозьствэ Христосонь вельмемась**

<sup>1</sup>Кемиця ялгат! Ней ледстяса мелезэнк Кенярков кулянтъ, конань мон тыненк пачтия ды конань тынь саинк эсь седеезэнк ды конань эйсэ ней кеместэ аштетядо.

<sup>2</sup>Сонзэ вельде тынь ультядожак идезь, бути кирдьсынк сонзэ допрок истямокс, кодамокс мон сонзэ тыненк пачтия. Лиякс, тынк кемемас самось ули стяконь.

<sup>3</sup>Истя, васенцекс, мон ёвтыя тенк сень, мезесь монень эстенъгак максозель: Христос кулось минек пежетнень кисэ, кода ёвтазель Сёрмадовкстнэсэ.

<sup>4</sup>Сон ульнесь калмазь ды колмоце чистэ вельмевтезь, кода ёвтазель Сёрмадовкстнэсэ.

<sup>5</sup>Сон невтизе Эсь прязно Кефанень, мейле кемгавтово апостолтнэненъ.

<sup>6</sup>Мейле Сон невтизе прязно ве шкасто вете сядодо ламо мельганзо молицятненень. Конат-конат ютксост уш кулость, а седе ламотне эрить течинь чис.

<sup>7</sup>Мейле Сон невтизе прязно Яковнень, седе мейле весе лия апостолтнэненъ.

<sup>8</sup>Сехте меельцекс Сон невтизе прязно моненьгак, а шкастонзо чачозь эйкакш ёнов молицянтень.

<sup>9</sup>Эдь мон весе апостолтнэнь эйстэ сехте вишкинян, ды мон а маштован апостолонь лементь кандыцякс вана мекс: мон пансинь Пазонь Кемикуронтъ.

<sup>10</sup>Пазонь максовт чанстентъ коряс жо мон истяман, кодаман ней. Ды монень Сонзэ максовт чанстесь эзь ульне стякокс. Мекевланк, мон лия апостолтнэнь коряс вельть седе пек важодинь. Тень теизе Пазонь чанстесь, кона макссъ монень вий, аволь монсь.

<sup>11</sup>Секскак ялатеке, кие тенк пачтизе Кулянтъ: мон эли сынъ. Те се кулясь, конань весе минь пачтятано, ды се, конанень тынь кармиде кемеме.

### Кулозьстэ вельмемась

<sup>12</sup>Истя, Христос кулозьстэ вельмевтезь, кода минь Сондензэ пачтятано. Мекс сестэ конат-конат эйстэнк кортыть, келя, арась кулозьстэ вельмема?

<sup>13</sup>Бути арась кулозьстэ вельмема, сестэ Христоскак кулозьстэ апак вельмевте.

<sup>14</sup>А бути Христос кулозьстэ апак вельмевте, сестэ миненеккак а мезекс пачтямс Кулянтъ ды тыненккак а мезекс кемемс Христоснэнь.

<sup>15</sup>Ды сестэ минь ультяно мик кенгелиця яволявтыцякс Пазонтъ каршо. Эдь минь яволявтано: Пазось кулозьстэ вельмевтизе Христосонь. Тень жо Сон эзизе тее, бути арась кулозьстэ вельмема.

<sup>16</sup>Эдь бути арась кулозьстэ вельмема, сестэ Христоскак апак вельмевте.

<sup>17</sup>Ды бути Христос кулозьстэ апак вельмевте, сестэ тынк кемемась лезэвтеме ды тынь икеле ладсо аштетьдо эсенк пежетенк потсо.

<sup>18</sup>Тень коряс истя жо лисни: Христоснэнь сеть кемицятне, конат кулость, ёмасть пингеде пингес.

<sup>19</sup>Ды бути минек седейнежедьксэсь Христос лангс маштови ансяк те эрямонтень, сестэ минь масторлангсонть сехте седей сэредстиця ломанть.

<sup>20</sup>А вана ней Христос алкуксккак кулозьстэ вельмевтезь – ды те ушодкс лия кулозтнень вельмемантень.

<sup>21</sup>Эдь кода куломась ушодовсь вейке ломань вельде, истя кулозьстэ вельмемаськак ушодовсь вейке Ломань вельде.

<sup>22</sup>Ды кода весе минь кулотано Адамонь кувалт, самай истя жо эрямос вельмевтезьгак ультяно Христосонь кувалт.

<sup>23</sup>Ансяк эрвась вельмевтеви эсь шкастонзо-порастонзо: васняк Христос, мейле, зярдо Сон сы, сеть, конат Христосонь.

<sup>24</sup>Мейле сы песь. Христос изнясынзе весе чопода оймеялтонь прявтнэнь, азорксчитнень ды кармавтыця вийтнень ды макссы инязоркчинть Тетя Пазонтень.

<sup>25</sup>Эдь Христоснэнь аравтозь улемс инязорокс семс, зярс Пазось а путсынзе весе душмантнэнь Сонзэ пильге алов.

<sup>26</sup>Кода меельце душман, изнязь ули куломась.

<sup>27</sup>Сёрмадовкссо ёвтазь: «Пазось весемень максызе-путызе Сонзэ пильге алов». Куш сёрмадозьгак: «весемесь Сонзэ пильге ало», нама, те ёвтазь аволь Пазонтъ коряс, кие Сонсь весемень максызе Христосонь кедь алов.

<sup>28</sup>Зярдо Пазось весемень максы Сонзэ кедь алов, сестэ Пазонь Цёраськак максы Эсь пряно Тетянтъ кедь алов, кона максокшнызе весемень Сонзэ кедь алов. Истя Пазось карми улеме весемекс ды весемесэ.

<sup>29</sup>Эно мезес бажить сеть ломантне, конат наваvтыть-лемдить эсь пряст кулозтнень кисэ? Бути кулозтне зярдояк а улить вельмевтезь, сестэ мекс сынст кисэ наваvтыть пряст?

<sup>30</sup>Мекс сестэ миненеккак эрьва чистэ тонгомс прянок пелемачис?

<sup>31</sup>А мон, кемиця ялган, алкукскаяк, эрьва чистэ ванан куломанть сельмс! Истя жо алкукс мон шнан эсь прям тынк эйсэ минек Христос Иисус Азоронтъ икеле!

<sup>32</sup>Ды бути мон арсевлинь ансяк ломанень вановтонь коряс, сестэ мезекс эрявсь монень тюремс Эфессэ идем ракшатнень марто? Кодамо монень тень эйстэ лезэсь? Бути кулозтне а вельмить, сестэ «эрьга карматано ярсамо ды симеме, ялатеке ванды кулотано!»

<sup>33</sup>Илядо ильведстеве! «Берянь ялгатне коласызь мик сехте паро обуцянтъкак».

<sup>34</sup>Совадо валдо превс, лоткадо пежетень теемадо! Эдь тынк ютксо улить истят, конат тунь а содасызь Пазонтъ. Кода тенк а визькс!

### **Менель лангонь од рунгось**

<sup>35</sup>Кияк, паряк, кевксти: «Кода кулозтне вельмить? Кодамо сестэ ули сынст рунгост?»

<sup>36</sup>Превтеме! Видьмесь, конань видят, а сыргози од эрямос, бути сон васняк а кулы.

<sup>37</sup>Тон жо а видят недькснэк-мезнек сюрот-тикшеть, конат мейле касовольть. Аволь, видят ансяк вейке видьмине, товзюронь эли лиянь-мезень.

<sup>38</sup>А уш Пазось максы тензэ недькс Эсь мелензэ коряс; те недьксэсь эрва видьменть эсензэ.

<sup>39</sup>Аволь весе лексицятнень-эрицятнень рунгост вейкеть: ломаненть эсензэ, ракшанть-скотинанть эсензэ, нармуненть эсензэ, калонтькак эсензэ.

<sup>40</sup>Улить менель лангонь рунгот ды мода лангонь рунгот. Менель лангонь рунготнень эсест мазычист, мода лангонсетненькак эсест.

<sup>41</sup>Чинть мазычизэ – вейке, ковонть ды тештетнень – лия. Мик тештетнеяк явовить эсь мазычисэст вейкест-вейкест эйстэ.

<sup>42</sup>Истя жо ули кулозтнень вельмемстэяк: видеви ёмиця-наксадыця рунго – вельми пингеде пингес эриця рунго.

<sup>43</sup>Видеви амазый – вельми мазый; видеви лавшо – вельми вийсэ пештязь.

<sup>44</sup>Видеви мода лангонь рунго – вельми оймеялтонь рунго. Бути ули мода лангонь рунго, сестэ, нама, ули оймеялтонь рунгояк.

<sup>45</sup>Эдь Сёрмадовкссо ёвтазь истя: «Васенце ломанесь Адам кармась улеме эриця оймекс». А вана меельце Адамось\* ули эрямонь максыця оймеялтокс.

<sup>46</sup>Мода лангонь рунгось ульнесь оймеялтонседенть икеле: васняк сась мода лангонсесь, ансяк мейле оймеялтонсесь.

<sup>47</sup>Васенце ломанесь ульнесь мода лангсто, теезь мода пульстэ, омбоце ломанесь, Азорось, – менель лангсто.



<sup>48</sup>Кодамо ульнесь мода пульстэсь, истят весе мода пульстэтнеяк. Кодамо менель лангстось, истят улить весе менель лангстотнеяк.

<sup>49</sup>Ды сень ладсо, кода минь ней мольтяно мода пульстэ теезь ломаненть ёнов, истя жо самай карматано молеме менелень ломаненть ёновгак.

<sup>50</sup>Монь мелем, кемиця ялгат, ёвтамс тыненк: минек сывелень-верень рунгось а совави Пазонтъ Инязорксчинтень. Истя жо кулыцясь-ёмицясь кодаяк а тееви акулыцякс-аёмицякс.

<sup>51</sup>Кунсолодо, мон панжса тенк салавачинть: аволь весе минь кулотано, ансяк весе полавтовтано –

<sup>52</sup>апак учо, вейке липкестэ, зярдэ зэрьксты меельце торамонь гайтесь. Сон гайгсты – ды кулозтне вельмевтевить акулыцякс-аёмицякс, а вана минь, эрицятне, полавтовтано.

<sup>53</sup>Эдь те минек ёмиця рунгонтень эряви теевемс аёмицякс, ды те кулыця рунгонтеньгак эряви велявтомс акулыцякс.

<sup>54</sup>Ды зярдэ те ёмицясь тееви аёмицякс ды те кулыцясь велявты акулыцякс, сестэ топавтовить Сёрмадовкссо ёвтазь Пазонь валтнэ: «Куломась изнязь! Сонзэ нилизе изнямось!»

<sup>55</sup>Кулома, косо тонь пупамо сардось? Тоначи, косо тонь изнямось?»

<sup>56</sup>Куломань пупамо сардось – те пежетесь. А пежетенть виезэ – Коенть эйсэ.

<sup>57</sup>Сюкпря Пазонтень, Сон кази миненек изнямо минек Иисус Христос Азоронтъ вельде!

<sup>58</sup>Вана мекс, монь вечкевикс кемиця ялган, аштеде кеместэ ды илядо шатавтово. Весе седейсэнк свал важодеде Азоронь тевсэнтъ, эдь тынь содатадо: тынк важомемась Азоронтъ икеле стяко а ёми.

## 1-е Коринфянам 16

### Ярмаконь пурнамось Ерусалимень кемицятнень туртов

<sup>1</sup>Ней сёрмадан Пазонь ломантнень туртов ярмаконь пурнамодо: мезе мон кармавтынть теемс Галатиянь кемикуротнесэ, текень тееде тыньгак.

<sup>2</sup>Кадык эрвась тынк эйстэ недлячистэнтъ кудосонзо путы башка зяро ярмакт, зяро мери сонзэ уличизэ, ды ванстсынзе. Ды зярдодон тыненк сан, сестэ уш сынст пурнамс а эряви.

<sup>3</sup>А вана зярдодон тыненк пачкодян, сестэ кучсынть эсенк кочкавт ломантнень кемекстамо сёрма марто Ерусалимев тынк ярмактнень пачтямо.

<sup>4</sup>Бути жо тень кувалма моненьгак эряви тов модемс, сестэ минь мольтяно вейсэ.

### Якамонь кувалт Паволонь мелензэ-превензэ

<sup>5</sup>Мон сан тенк сестэ, зярдодон ютаса Македониянтъ, эдь мон пурнан якамо Македониява.

<sup>6</sup>Тынк кедьсэ мон зяркак эрян, паряк, телентькак мик ютавтса. Ансяк мейле тынь монь пурнасамизь тов, ков мон молян.

<sup>7</sup>А ней монь арась мелем совамс тыненк ансяк варштамо, ваксканк ютамсто. Мекевланк, мон кеман улемс мартонк седе куватьс, бути мери Азорось.

<sup>8</sup>Тесэ, Эфессэ, мон улян Ведьгеменце чинь покшчинть самс.

<sup>9</sup>Эдь монь икеле тесэ келейстэ панжовсть кенкштне покш ды лакиця важдемас, куш каршо молицятнедеяк ламо.

<sup>10</sup>Бути сы тыненк Тимофей, ванодо сестэ: кадык сон, тынк кедьсэ улемстэ, мездеяк а пели. Эдь сон, кода монгак, теи Азоронтъ тевензэ.

<sup>11</sup>Кадык кияк а ваны лангозонзо безардезь! Ансяк мейле, паронь арсежь, пурнынк сонзэ ки лангс, кадык мекев сы монень. Мон учан сонзэ тесэ кемиця ялгатнень марто.

<sup>12</sup>Аполлос кемиця ялганть икеле мон пек энядынь: саволь сон тыненк лия кемицятненъ марто, ансяк сонзэ ней арасель истямо мелезэ. Сон сы, зярдо карми улеме ён шказо.

### **Меельце превспутомат ды сюкпрат**

<sup>13</sup>Илядо удо, кеместэ аштеде кемемасонк, уледе апелицят ды виевть!

<sup>14</sup>Тееде весементъ вечкема марто!

<sup>15</sup>Тынь весе содасынк Стефанасонъ кудораськентъ-семиянтъ, конат васенцекс теевсть христианокс Акайясо ды максызь эсь прят Пазонъ ломантненень важомас. Секс энядан икеленк, кемиця ялгат:

<sup>16</sup>тыньгак кунсолодо истят прявтиэнь ды весе сетненьгак, конат истя жо важдить мартост покш мелень путозь.

<sup>17</sup>Мон кенярдан Стефанасонъ, Фортунатонъ ды Акаикень тей самозост. Сынь монень максызь сень, мезе тень эзь сатно тынстеманк.

<sup>18</sup>Сынь оймавтызь кода тынк, истя монъ ойментькак. Ловодо истят ломантненъ!

<sup>19</sup>Асиянь кемикуротнеяк кучить тыненк сюкпрат! Истя жо Акила Прискилла марто ды кемикурось, кона пурнавкшны сынст кудосо, кучить тенк христианонъ седейшкаванъ сюкпрат!

<sup>20</sup>Весе тесэнь кемиця ялгатне кучить тенк сюкпрат. Шумбракстнеде вейкенк-вейкенк марто Пазонъ ломанень паламосо.

<sup>21</sup>А вана ней мон сёрмадан эсь кедьсэнь: сюкпря Паволонъ пельде.

<sup>22</sup>Кие а вечксы Азоронтъ – улезэ сюдозь! Маран ата! – Сак, минек Азорось!

<sup>23</sup>Иисус Христос Азоронтъ чанстесь улезэ тынк марто!

<sup>24</sup>Ды мон вечктядызь тынк весень, кие Христос Иисусонъ. Аминь.

## Коринф Ошонь Кемикуронтень Паволонь Омбоце Сёрмазо

### 2-е Коринфянам 1

<sup>1</sup>Павол, кона Пазонтъ мелензэ коряс аравтозь Иисус Христосонь апостолокс, ды Тимофей кемиця ялгась кучить шумбрактнемат Пазонь кемикуронтень Коринф ошсо, истя жо Пазонь весе ломантненень, конат эрить Акайянтъ келес.

<sup>2</sup>Чансть ды седейоймамо тенк Пазонтъ, минек Тетянтъ, пельде ды Иисус Христос Азоронтъ пельде.

#### Пазось лездыця ды оймавтыця

<sup>3</sup>Улезэ шназь-чанстязь минек Иисус Христос Азоронтъ Тетязо ды Пазозо! Сон – седеймариця Тетя ды свал минек оймавтыця-кемекстыця Паз.

<sup>4</sup>Сон минек оймавты-кемексты эрва кодамо стакачисэнек. Сестэ минеккак саты виенек оймавтомс-кемекстамс эрва кодамо стакачитнес понгозтнень секе оймавтоманть эйсэ, конаньсэ Сон кемексты минек.

<sup>5</sup>Кода Христосонь кисэ стака пиштематне-майсематне певтеме прыть минек лангс, истя жо Христос вельде Пазось певтеме оймавты-кемексты минек.

<sup>6</sup>Зярдо минь кирдяно стакачить, те улиак тынк оймавтоманк ды идеманк кисэ. Те лезды тенк цидярдозь кирдемс сеть майсематнень, конатнень кирдяно миньгак.

<sup>7</sup>Минь кемтяно: тынь весементъ цидярдсынк. Ды зярдо Пазось оймавты-кемексты минек, сестэ те оймавтомась ули миненек тынк оймавтоманк ды идеманк кисэ. Минь содатано: кода тыненккак максови эсенк таликанк минек пиштеманть эйстэ, истя жо Пазось максы тыненк оймавтомань-кемекстамонь таликанккак.

<sup>8</sup>Минек меленек, кемиця ялгат, ёвтнемс тенк сеть стакачитнеде, конат пракшность минек лангс Асия ёнкссо. Те ульнестъ истят стакат, истят

акирдевикс пиштемат, конатнень кувалт минь эзинек кемаяк кадовомс эрицякс.

<sup>9</sup>Миненек марявсь: минь уш судязтяно куломас. Истя лиссь сень кисэ: а кадомс миненек кодамояк кемема-нежедема эсь лангозонок, кадык жо минек нежедемась ули ансяк Пазонтъ лангс, кона мик кулозьстэяк вельмевти.

<sup>10</sup>Те Сон менстимизь минек истя малав сазь куломадонть! Ды икелепелевгак Сон менстьсамизь. Минь Сонзэ лангс кемтяно: нама, таго менстьсамизь,

<sup>11</sup>бути тыньгак тенень карматадо лездамо эсь озномасонк. Сестэ кепети Пазонтень сюкпря, конань ёвтасызь ламот ине чанстензэ кисэ, конань Сон кази миненек ламо озноманк каршо!

#### **Паволонь Коринфев самозо кувать кирдевсь**

<sup>12</sup>Минь шнатано прянок вана мейсэ: свал эрва косо ды седе пек тынк ютксо минь эринек оймень ды седеень панжозь, кода тукшны Пазонтъ мельс. Теде корты минек ванькс оймеёжоськак. Прянь ветямосонок минь нежединек Пазонь чанстентъ лангс, аволь ломанень превейчинть лангс.

<sup>13</sup>Минь сёрмадтанояк тыненк эсь сёрмасонок ансяк сень, мезесь тенк ловнови ды чарькодеви. Мон кеман: тынь педес пес чарькодъсамизь минек,

<sup>14</sup>кода уш аламодо нейгак чарькодимизь. Сестэ минек Иисус Азоронтъ само чистэнтъ тынь карматадо прянк шнамо минек эйсэ, кода миньгак шнатано прянок тынк эйсэ.

<sup>15</sup>Тенень кемезь, мон сайнинь мель содавтомс тынк васенцекек ды кандомс тенк кавксть чансть.

<sup>16</sup>Мон арсинь тынк содавтомс Македонияв модемстэ, а вана мейле Македониясто велявтомсто таго совамс тенк, ды сестэ тынь пурнавлимизь-сэрнявлимизь Иудеяв.

<sup>17</sup>Зярдю мон сынъ истямо мельс, арази теньсэ мон невтия эсь валом лангсо аволь свал аштемам? Арази мон ветян эсь прям кода те масторлангонь ломань? Арази ули обуцям-коем теке жо шкастонтъ меремс «эно, эно» ды «арась, арась»?

<sup>18</sup>Сонсь кемевикс Пазось неи: монъ валоськак истя жо кемевикс, ды зярдояк мон эзинь ёвтне «энояк» ды «араськак».

<sup>19</sup>Эдь Пазонь Цёраськак, Иисус Христос, зярдояк а ёвтни «энояк» ды «араськак». Сонзэ эйсэ ансяк «эно»! Сондензэ тыненк пачтинек минь: Силуан, Тимофей ды мон.

<sup>20</sup>Кадык Пазонь алтамотнеде ламо, Христос эрвантъ эйстэст кемекстызе «эно» валсонть! Вана мекс миньгак Сонзэ кувалт Пазонь шнамга ёвтатано: «Виде, истя ули!»

<sup>21</sup>Те Сонсь Пазось кемексты минек ды тынк Христос Вадевтентъ\* марто вейсэндямосонтъ. Те Сон минеккак вадимизь-кочкимизь.

<sup>22</sup>Сон тешкстымизь минек Эсь тешкссэнзэ, лиякс, кучизе минек седейтнес Эсь Оймеялтонзо, кода кемекстамо.

<sup>23</sup>Пазось Сонсь неи-соды, ды пежетъкстан-божан эсь эрямосонгак: мон те шкас эзинь велявто Коринфев ансяк тынк ванстоманк кисэ.

<sup>24</sup>Нама, минек арась меленек саемс тынк кемемантъ эсь кеденек алов. Минь содатано: тынь а кавтолдтадо кемемантъ коряс. Минь ансяк лездатано тенк муемс эстенк кеняркс.

## 2-е Коринфянам 2

<sup>1</sup>Тень кувалт мон сынъ мельс: кадык те монъ самось тыненк таго а канды ризкс.

<sup>2</sup>Эдь бути мон кандан тенк ризкс, сестэ кие монъ кенярдовтсамам? Ансяк сеть, конатненень мон кандынь ризкс.

<sup>3</sup>Ды вана мекс мон сёрмадыя тыненк се сёрмантъ: монъ арась мелем самс тыненк ды коламс ёжомарямом самай сеть ломантненень кисэ,

конатненень эряволь монь кенярдовтомс. Мон кеман: монь кенярксось – те весенень тыненккак кеняркс.

<sup>4</sup>Мон сёрмадыя се сёрманть ине мелявксонь кувалт, покш седейсэредькс ды ламо сельведь марто. Монь арасель мелем кандомс тыненк ризкс. Мекевланк, мелем ульнесь максомс тенк чарькодема, кода мон тынк пек вечктядызь.

#### **Пежетевень чумонь нолдамо**

<sup>5</sup>Ды бути кияк кандсь ризкс, сестэ сон аволь ансяк монень кандызе, весе тыненккак, кадык аламошка, арась мелем тень покшолгавтнемс.

<sup>6</sup>Се ломанентень уш саты чумонзо се пандомась, конань сон кирдизе-кандызе ламонь тынк пельде.

<sup>7</sup>Ней тыненк, мекевланк, седе паро нолдамс чумонзо ды оймавтомс-кемекстамс сонзэ: илязо чаво прят-пильгть покш ризксэнтэ эйстэ.

<sup>8</sup>Секскак, инесъкеть, вешан пельденк: одс невтинк тензэ эсенк вечкеманк!

<sup>9</sup>Эдь се сёрманть мон сёрмадыя тенк варчавтнеманк кисэ. Мон ульнесь мелем содамс: весемесэ тынь кунсолыцят эли аволь.

<sup>10</sup>А вана кинь чумонзо тынь нолдасынк, сень чумонзо монгак нолдаса. Эдь зярдо мон нолдыя се чумонтэ – бути алкукс ульнесь мезе нолдамс, – мон нолдыя Христосонь чачонзо икеле тыненк паронь теемань кисэ,

<sup>11</sup>аволимизь изня-маня Сатанась. Эдь минь содасынек сонзэ ёжов мелензэ-тевензэ!

#### **Павол Трояда ошсо**

<sup>12</sup>Зярдо мон сын Троядав Христосто Кенярксов кулянтэ пачтямо, сестэ мон неинь: Азорось монень тосо келес панжизе важдодема кенкшентэ.

<sup>13</sup>Ялатеке монь ойдем ульнесь а таркасонзо: тосто мон эзия муе Титэнь, монь ялганть. Секс мон простишь кемицятненень марто ды туинь Македония ёнксов.

### Христос вельде изнямо

<sup>14</sup>Сюкпря Пазонтень, кона свал вети минек Христос марто изнямонь кияванть. Сон эрва кува сра TNI минек вельде Эсензэ эйтэ содамочинть, прок качадыця тантей чине ялткенть!

<sup>15</sup>Минь ультянояк Христосонь тантей чине зэхелесь, кона кепети-моли Пазонтень. Те ялткесь качады-сравтневи кода идемань ки ланга ютыцятненень ютковааяк, истя жо ёмамонь ки лангсотненень ютковааяк.

<sup>16</sup>Вееенстнэнень, куломань киява молицятненень, минь – куломань чине, кона вети куломас, лиятненень минь – эрямонь тантей чине, кона максы эрямо. Ды кие маштови истямо покш тевень теицякс?!

<sup>17</sup>Эдь минь аволь истят, конат микшнить Пазонь валонть эсест лезэс, кода тейнить ламот. Мекевланк, минь Пазонь кучовт ды ванькс седейсэ пачтятано сонзэ Пазонтень сельмензэ икеле Христосонь вийсэ.

## 2-е Коринфянам 3

### Од вейсэнълувонь вожотне

<sup>1</sup>Арази миненек эряви таго тынк икеле шнамс эсь прянок? Эли жо эрявить миненеккак, кода кой-кона лиятненень, кемевтиця сёрмат тынк туртов эли тынк пельде? Нама, аволь.

<sup>2</sup>Минек кемевтиця сёрмась – те тынь тынсь! Сон сёрмадозь минек седейтнес, сон весенень содавикс ды эрвантень ловновикс.

<sup>3</sup>Парсте неяви: тынь ультядоаяк се сёрмась, конань сёрмадызе Христос минек важдеманть вельде. Сон сёрмадозь эриця Пазонтень Оймаелтсо, аволь черниласо, ды ломантненень седейс, аволь кевень лаз лангс.

<sup>4</sup>Минь истя кортатано вана мекс: минек ули Пазонтень лангс кемемачинек, конань максызе тенек Христос.

<sup>5</sup>Мон а кортаң, буто минь минсь мезекс-бути маштовтано ды миненек эстенек мезе-бути тееви. Арась, минек маштомачись максозь Пазонтень пельде.



<sup>6</sup>Те Сон теимизь минек маштовиксэкс, улемс од вейсэнълувонь важодицякс. Те вейсэнълувонть юрсо ашти Оймеялтось, аволь сёрмадозь Коесь. Эдь Коесь канды кулома, Оймеялтось жо кази эрямо.

<sup>7</sup>Уш Коень коряс важдемаськак, кона канды кулома ды конань кармавтокстнэ сёрмадозельть кевень лаз лангс, сияждсь покш иневалдосо. Куш те иневалдось ульнесь прядовиця-ёмиця, ялатеке израилень ломантне эзь ваново Моисеень сияждыця чаманзо лангс.

<sup>8</sup>Сестэ седеяк покш иневалдосо сияжды Оймеялтонь коряс важдемась!

<sup>9</sup>Ды бути натой Коень коряс важдемась, кона вети судямос, сияждсь истямо иневалдосо, сестэ ламодо седе покш иневалдосо сияжды се важдемась, кона вети Пазонтъ икеле чумосто лисемас!

<sup>10</sup>Сонзэ иневалдось истямо аёвтавикс покш, мик вакссонзо чополгады се, мезесь икеле ульнесь пек сияждыцякс.

<sup>11</sup>Эдь бути уш прядовицясь-ёмицясь сияждсь иневалдосо, сестэ ламодо седе пек сияжды зярдоак апрядовицясь-аёмицясь!

<sup>12</sup>Зярдо минек ули истямо кеме седейнежедьксэнек, сестэ минь кортатанояк апак кекше ды апак пеле.

<sup>13</sup>Минь а тейтяно Моисей ладсо, кона вельтямосо кекшнесь эсь сияждыця чаманзо секс: аволизь нее Израилень ломантне прядовиця-ёмиця сияждоманть пензэ.

<sup>14</sup>Ялатеке сынст превест-седеест кевензельть. Секскак течинь чис те вельтямось ашти лангсост Коенть ловноманть кунсолостомсто, ды сон саеви ансяк Христос вельде.

<sup>15</sup>Истя, нейгак, Моисеень Коенть ловномсто, те вельтямось ашти сынст седеест лангсо.

<sup>16</sup>Ансяк зярдо ломанесь велявты Азоронтень, сестэ те вельтямось саеви-ёртови лангстонзо.

<sup>17</sup>Азорось – те Оймеялт, ды косо Азоронтъ Оймеялтось, тосо олячи.

<sup>18</sup>Истя, весе минь, конат чамань апак кекше вантано Азоронть иневалдонь сияждоманть лангс, кода зеркалань пачк, ультяно лиякстомтозь. Ультяно теезь Сонзэ ёнов молицякс ды сияждыцякс яла седеяк пек цивтёрдыця валдосо. Тень теи Азорось, кона Оймеялт.

## 2-е Коринфянам 4

### Сёвонень кедьгесэ сюпавчи

<sup>1</sup>Эсь седеймарямонзо кувалт Пазось максызе миненек истямо важодема теветь, ды секскак минь а нолдтнетяно прянок.

<sup>2</sup>Мекевланк, минь допрок ёртынек-кадынек весе салавань-визьксэнь тевтнень. Минь киньгак а манчетяно ды а колатано Пазонь валонть. Мекевланк, минь апак кекше ёвтнетяно видечинть ды Пазонть сельмензэ икеле аравттано эсь прянок эрва ломанень оймеёжонь судс.

<sup>3</sup>Бути Кенярксов кулясь, конань минь ёвтнетяно, киненьгак кекшезь вельтямосо, сон кекшезь ансяк сетненень, конат ютыть ёмамонь киява.

<sup>4</sup>Неень масторлангонь “пазось”, Сатанась, сокоргавтынзе неть акемицятнень превест. Секс сын а неить, кодамо иневалдо тенст сияжды Кенярксов кулястонть, косо ёвтневи Христосонь инексчиденть. А Христос – анеявикс Пазонть чачозо.

<sup>5</sup>Эдь минь ёвтнетяно аволь эсенек эйстэ, а вана Христос Иисусто: Сон – Азорось, ды минь – тынк важот Иисусонь кисэ.

<sup>6</sup>Сонсь Пазось, кона мерсь: «Чоподастонть сияждозо валдо», самай теке Пазось валдомтынзе минек седеенек. Истямо ладсо миненек максозь содамс Пазонть иневалдонзо, кона сияжды Иисус Христосонь чамастонть.

<sup>7</sup>Ды истямо питней сюпавчись ванстови минек эйсэ теке порксавиця сёвонень кедьгесэ. Истя неяви: те аонкставикс виесь лиси Пазонть эйстэ, аволь минек эйстэ.

<sup>8</sup>Минек лепштить эрва ёндо, ды ялатеке минь ужос-уголс апак пане. Кой-зярдо минь пракшнотано кавтолдомас-талномас, ансяк зярдож а пракшнотано прянь-пильгень чавомас.

<sup>9</sup>Минек мельга пансить, ды ялатеке Пазось минек эзимизь кадо. Минек правтымизь пильге лангсто, ансяк минь апак куловто-ёмавто.

<sup>10</sup>Минь свал кандтнетяно эсь рунгосонок Иисус Азоронтъ куломанзо сень кисэ: кадык Иисусонь эрямоськак минек рунготнесэ ули невтезь.

<sup>11</sup>Эрямонок перть Иисусонь кисэ куломась свал чары минек перька вана мекс: кадык Иисусонь эрямоськак минек кулыця рунготнесэ ули невтезь.

<sup>12</sup>Лисни, минек эйсэ эсь тевензэ теи куломась, а вана тынк эйсэ – эрямось.

<sup>13</sup>Минек эйсэ ули кемемань секе оймеялтось, кона ульнесь сень эйсэяк, кие Псалтирьсэ ёвтась: «Мон кеман, ды секс кортангак». Минь истя жо кемтяно, ды секс кортатанояк.

<sup>14</sup>Минь содатано: се Пазось, кона кулозьстэ вельмевтизе Иисус Азоронтъ, нама, минеккак вельмевтьсамизь Иисусонь вельде ды стявтсамизь Сонсензэ икелев тынк марто вейсэ.

<sup>15</sup>Ды весе те тееви тынк кисэ: зярдо Пазонь чанстесь пачкоди яла седе ламонь седейс, сестэ ломантнень пельде кармить чадозь чадомо сюкпрянь ёвтамот Пазонтъ шнамос-инексчис.

#### **Паз лангс кемезь эрямо**

<sup>16</sup>Тень кувалт минь а нолдтнетяно прянок. Бути минек ушо ёнксось сырелгады-калады, минек потмо ёнксось ялатеке одкстоми эрва чистэ.

<sup>17</sup>Эдь минек неень стакачитне шождынеть ды нурькинеть, ды сынь кандыть тенек покштояк покш, аонкставикс, пингедэ пингень инексчи, конась кодаяк а вейкетстави неть стакачитнень марто.

<sup>18</sup>Истямо ладсо, минь кайсетяно сельменек анеявиксэнтъ лангс, аволь неявиксэнтъ лангс, секс мекс неявиксэсь эри-ашти ансяк нурькине шкас, а вана анеявиксэсь – пингеде пингес.

## 2-е Коринфянам 5

<sup>1</sup>Минь содатано: зярдо кизэнь те кудынесь, косо минь ней эрятано – минек мода лангонь рунгось -, ули калавтозь, сестэ минек учи Пазонь анокставт эрямо тарканок менель лангсо. Те – пингеде пингень, аволь кедьсэ теевть кудо.

<sup>2</sup>Зярс минь теске, минь укстнетяно-кувсетяно се шканть учомасо, зярдо минь оршавтано менелень кудонок вельтявксонтъ!

<sup>3</sup>Ансяк зярдо минь оршавтано сонзэ эйсэ, сестэ уш а карматано улеме штапокс.

<sup>4</sup>Зярс эрятано эсенек кизэнь кудынесэнтъ, минь стакасто укстнетяно-кувсетяно вана мекс: минек арась меленек каямс лангстонок мода лангонь рунгонтъ. Мекевланк, меленек теске оршавомс менеленсесэнтъ, ды сестэ пингеде пингень эрямось лиякстомтовлизе-вельтявлизе минек кульця рунгонтъ.

<sup>5</sup>Вана самай тень туртов Сонсь Пазось анокстымизь минек, ды тень кемекстамга максызе тенек Эсь Оймеялтонзо.

<sup>6</sup>Секскак минь свал оймазь ды а пелицят, куш содатано: зярс минь эрятано эсь рунгосонок, – минь кудовтомот, аволь Азоронтъ кедьсэ.

<sup>7</sup>Эдь ней минь эрятано кемемань коряс, аволь неемань коряс.

<sup>8</sup>Истя, минь оймазь ды а пелицят, куш минек меленек седе курокук лисемс рунгостонтъ ды туемс Азоронтень, эсенек кудов.

<sup>9</sup>Секскак, минек сехте покш меленек савтомс Сонензэ, сень лангс апак вано, “кудосо” минь уш эли аволь.

<sup>10</sup>Эдь весенень миненек сави аштемс Христосонь судонть икеле, ды эрвантень максови весе сень кисэ, мезе сон тейсь рунгосо эрямстонзо: паро эли берянь.

**Пазонть марто ладямос-ялгакчис тердема**

<sup>11</sup>Минь содатано, мезе истямо Азоронть мельде пелемась, ды секс бажатано тенень кемевтемс лиятненьгак. Пазось, нама, минек парсте содасамизь, ды мон кеман: тыньгак эсь оймеёжосонк минек содасамизь.

<sup>12</sup>Минь а снартнетяно таго шнамс эсь прянок тынк икеле. Мекевланк, минь макстано тыненк тувтал каштангалемс минек эйсэ. Сестэ тынк ули мезе ёвтамс сетненень, кить каштангалить ломанень чачосколчисэ, аволь сеньсэ, мезесь седейсэ.

<sup>13</sup>Бути минь ветятано эсь прянок превстэ лисезь ломань ладсо, тень тейтяно Пазонть кисэ. Бути минь эсь превсэнек, истятано тынк кисэ.

<sup>14</sup>Эдь Христосонь вечкемась а кады миненек кочксема. Минь сынек истямо мельс-арсемас: вейке Ломань кулось весень кисэ, лисни – кулость весе.

<sup>15</sup>Ды Христос кулось весень кисэ вана мекс: сетне, кить эрить, лоткавольть эсест туртов эряmodo, ды кармавольть эрямо ансяк Сень туртов, кие сынст кисэ кулось ды вельмесь.

<sup>16</sup>Истямо ладсо, те шкастонть саезь минь уш киньгак а онкстнетяно ломанень вановтонь коряс. Бути икеле минь Христосоньгак чарькодилинек ломанень вановтонь коряс – ней уш Сонзэ содасынек аволь истя.

<sup>17</sup>Кие сьолмазь Христос марто, се – Пазонь од теевкс. Весе таштось ютась-тусь, ды, вантая, сась одось!

<sup>18</sup>Весе тень теизе Пазось, кона Иисус Христос вельде ладимизь минек Эсь мартонзо ды макссь миненек важодема тев – ладявтомс мартонзо лиятненьгак.

<sup>19</sup>Лиякс: Пазось Сонсь Христос вельде ладизе Эсь мартонзо весе масторлангонть. Сон эзинзе чумондо ломантнень сынст чумост-тапавксост кисэ ды кармавтсь миненек пачтямс кулянтъ Сонзэ марто ладямодо.

<sup>20</sup>Истя, минь – Христосонь пельде кучовт, ды Пазось Сонсь минек вельде корты-энялды тыненк. Христосонь лемсэ вештяно: «Мереде тынк ладямс Пазонтъ марто!»

<sup>21</sup>Христосонь, конань арасельть пежетензэ, Пазось теизе аноксокс минек пежетенек кисэ. Тень кувалт минь Христос вельде ловозтяно чумовтомокс Пазонтъ икеле.

## **2-е Коринфянам 6**

<sup>1</sup>Секскак, кода Пазонтъ марто важдицят, энялдтано тыненк: Пазонь чанстентъ, кона тыненк максозь, илинк кадо стяконь тевекс!

<sup>2</sup>Эдь Пазось корты: «Паро шкасто Мон маритинь тонь, идема чистэ Мон лездынъ тетъ!» Ды вана ней – те паро шкась, вантая, ней – идема чись!

### **Павол лангс празь стакачитне**

<sup>3</sup>Минек арась меленек улемс киненьгак пупордямо кевекс: кияк мейсэяк аволимизь мурне-покорда важдеманок кисэ.

<sup>4</sup>Мекевланк, кода Пазонь алкуксонь важдицят, минь весемесэ аштетяно вадря невтевксэкс: цидярдозь кандтано пиштемат, кажот, стакачить.

<sup>5</sup>Минь кирдинек чавомат, пекстамо кудот, абунгалицянь нарьгамот, стака важдемань шкат, апак удо ветъ, вачочить.

<sup>6</sup>Минь важдтяно Пазонтень ваньксчисэ, содамочисэ, куватень кирдемасо, парочисэ, Иневанькс Оймеялтсо, алкуксонь вечкемасо,

<sup>7</sup>видечинь валсо, Пазонь вийсэ. Минек тюремань кедьёнксонок – Пазонь мелентъ топавтома, конань вийсэ каявкшнотано ды пряноккак вансттано.

<sup>8</sup>Минек эйсэ ловить ды сёвныть, лангозонок кенгелить ды шнытькак эйсэнек. Минек неить манчицякс, ансяк минь ёвтнетяно видечи.

<sup>9</sup>Ловить минек асодавиксэкс, ансяк минь содавикст весенень. Минь эль кулотано, ансяк ванодоя, минь эрятано! Минек муцить, ансяк минь апак машто.

<sup>10</sup>Минь ризнэтяно, ды ялатеке свал кенярдтано. Куш минсь кажовт, ялатеке ламонь сюпавкс тейтяно. Минек мезенеккак арась, ансяк, ялатеке, минек эрва мезенек ули.

<sup>11</sup>Коринфень вечкевикс ялгат! Минь кортынек тыненк седейшкава. Минь вечкезь саидизь-совавтыдизь тынк эсь седеезэнек.

<sup>12</sup>Те тынь сайтядо минек эйстэ эсь седеенк, аволь минь.

<sup>13</sup>Мон кортан тенк, кода эсь эйкакшон туртов. Теде каршонок истя жо: саимизь-совавтомизь минеккак эсь седеезэнк!

#### Кемицятне – те Пазонь кудо

<sup>14</sup>Илядо терявтояк кильдемс прянк вейке ашкос Христоснэнь акемицятнень марто! Арази ули видечинь ломаненть вейсэнть тевезэ койтементь марто? Арази мезеяк вейкетсти валдонть ды чоподанть?

<sup>15</sup>Пракшныть-а пракшныть ве мельс Христос ды Велиар\*? Эли ули-арась вейсэндямо кемицянтъ акемиця марто?

<sup>16</sup>Кода вейсэндямс Пазонь кудонть аволь алкуксонь пазтнэнь марто? Эдь тынь – эриця Пазонть кудозо! Сонсь Пазось ёвтась: «Мон озан эрямо сынст кедьс, Мон карман якамо мартост. Мон улян сынст Пазокс, ды сынъ улиць Монь ломанекс».

<sup>17</sup>Секскак Азорось таго корты: «Кадынк сынст ды яводо эйстэст, илядо токше аваньксэнтъ, – ды Мон сайтядызь тынк Эстенъ.

<sup>18</sup>Мон карман улеме тенк Тетякс, ды тынь ультядо Монь тиринь цёракс ды тейтерекс. Истя корты Весемькирдиця Азорось».

## 2-е Коринфянам 7

<sup>1</sup>Вечкевикс ялган, ванодо, кодат алтамот максозь миненек. Секс, эрьга ванськавтовано весемеденть, мезесь нулгодьксэкс теи рунгонтъ ды ойментъ, ды, Паздонть пелезь-талнозь, алтасынек Сонензэ весе эсь эрямонок!

### Кемикурось канды кеняркс Паволнэнь

<sup>2</sup>Вечкезь саимизь-совавтомизь минек эсь седеезэнк! Минь киненьгак эзинек тее берянь, киненьгак эзинек кандо зыян, кинь пельдеяк эзинек сьупалгадо.

<sup>3</sup>Тень мон кортан аволь тынк судямонк-корямонк кисэ. Кода мон уш икелеяк тыненк кортынъ: тынь свал минек седейсэ, ды минь тынк марто вейсэ эрямосояк ды куломасояк.

<sup>4</sup>Мон тыненк кортан панжадо седейсэ, лангозонк пек кемезь! Мон тынк эйсэ пек каштангалян! Тынь монень оймавтыцят-кемекстыцят, ды кенярксось пешти монь, весе минек стакачитнень лангс апак вано.

<sup>5</sup>Македонияв самодо мейлеяк миненек ялатеке арасель кодамояк оймамо. Эрьва ёндо минек лепштясть веенст стакачить: перьканок сёвномат-пелькстамот, седейсэнек пелема.

<sup>6</sup>Ансяк Пазось, нолдазь прятнень нежесь ды кемекстыцясь, оймавтымизь-кемекстымизь минеккак Титэнь самосонтъ.

<sup>7</sup>Сонзэ самодонтъ башка, минек оймавтымизь-кемекстымизь ёвтнемазо седе, кода тынь сонзэ кемекстынк. Сон истя жо ёвтнесь миненек, кодамо тынк покш меленк неемс монь, кода пек ризнэтядо ды кода кеместэ аштетядо монь кисэ. Те монь седеяк пек кенярдовтымим!

<sup>8</sup>Секскак, бути мон эсь сёрмасон кандыньгак тыненк ризкс, ней уш тень кисэ а янксян. Зярдодон неия: се сёрмась, кадык аволь куватьс, ялатеке кандсь тенк ризкс, сестэ мик янксиньгак, –

<sup>9</sup>ансяк ней кенярдан. Кенярдан аволь тенк ризксэнь кандомантень, а вана сенень: те ризксэсь ветидизь пежетте велявтомас. Тень кондямо



ризксэсь – Пазонть пельде. Истя минь тыненк кодамояк зыян эзинек кандо.

<sup>10</sup>Пазонть пельде седей ризксэсь вети пежетте велявтомас, кона канды идема, мезень кисэ а эряви янксемс. Маторлангонь тееть ризксэсь, мекевланк, канды кулома.

<sup>11</sup>Ванодоя, мезе тейсь тынк марто Пазонть пельде ризксэсь! Зяро кармась улеме оймень путоманк, зяро чумосто лисемань меленк! Истя жо зяро сыргозсь эйсэнк ацирьгадома, пелема-талнома, курокто вастовомань мельть, видестэ теемань мельть ды чумонь пандомань мельть сенень, кие тейсь берянь тев! Весе теньсэ тынь невтинк эсь чумовтомочинк те тевсэнтъ.

<sup>12</sup>Эдь мон сёрмадыя се сёрманть аволь сень кисэ, кие тейсь берянь тев, аволь сень кисэяк, кинь покордызь. Мон тень сёрмадыя сень кувалма: невтемс тенк Пазонть сельмензэ икеле, кода виевстэ минь путтано тыненк эсь ойменек-седеенек!

<sup>13</sup>Те минек пек оймавтымизь-кемекстымизь – тынк оймавтомась-кемекстамось. Ды те зярс а весе! Теде пек минек кецявтымизь Титэнь кеняркось. Эдь весе тынь сайнк сонзэ оймензэ лангсто кевентъ.

<sup>14</sup>Мон шныдизь тынк сонзэ икеле, ды монень эзь саво кисэнк якстерьгалемс! Весе се вадрясь, мезе минь Титэнь кортакшнынек тынденк, ульсь алкуксокс, истя жо весемесь сеяк, мезе минь кортынек тыненк.

<sup>15</sup>Титэнь седеезэ яла пештяви тыненк седеяк покш вечкемасо, зярдю мелезэнзэ леди, кода тынь топавтыде сонзэ превспутоманзо, кода вастынк сонзэ пелема ды талнома марто.

<sup>16</sup>Мон кенярдан: весемесэ монь ули покш кемемам нежедемс тынк лангс!

## 2-е Коринфянам 8

### Лезкс Ерусалимень кемицятнень туртов

<sup>1</sup>Кемиця ялгат, минек меленек ёвтамс тенк седе, кода сюпавсто Пазось казинзе Эсь чанстьсэнзэ Македониянь кемикуротнень.

<sup>2</sup>Куш сынст варчавтнестъ-снартнестъ ламо стакачить, ялатеке сынст кенярксост валозь валовсь чудикерькссэ. Эсест покш арасьчист лангскак апак вано, сынъ пурнасть лиятнень лезэс пек сюпав-важов казне!

<sup>3</sup>Мон яволявтан-кемекстан: сынъ макссть эсь виест коряс ды мик эсь вийдесткак ламо. Эсь мелест коряс,

<sup>4</sup>сынъ пек энялдсть максомс тенст кеняркс: лездамс вейсэ лиятнень марто Пазонь ломантненень Ерусалимсэ.

<sup>5</sup>Те ульнесь пек ламо сень коряс, мезде минь арсинек! Васняк сынъ максызь эсь пряст Азоронтень, ды мейле, Пазонтъ мелензэ коряс, истя жо максызь эсь пряст миненеккак.

<sup>6</sup>Секс минь энялдынек Титнэнь прядомс тынк кедьсэяк се кенярдовтыця теветнь, конанень сон уш путсь ушодкс.

<sup>7</sup>Тынь весемесэ вельть сюпавт: кемемасо, мазы кельвалсо, содамочисэ, виде мельсэ-бажамосо, миненек вечкемасонк. Секскак те лездамонь теусэнтъкак истя жо уледе сюпав-важов максыцякс.

<sup>8</sup>Монь арась мелем вийсэ кармавтомс тынк тень тееме. А вана зярдо мон ёвтнян тыненк лиятнень седеень паломадост, теньсэ мон варчавтнян-снартнян тынк вечкемань алкуксчинть.

<sup>9</sup>Тынь уш содатадо, кодамо покш минек Иисус Христос Азоронтъ чанстезэ: куш Сон ульнесь сюпав, тынк кисэ теевсь кажовкс, истя Эсь кажовчисэнзэ теемс тынк сюпавокс.

<sup>10</sup>Вана тенк монь превспутомам те лездамонь теветнь коряс: тыненк улелель седе паро нейке прядомс сонзэ, конанень путыде ушодкс мелят. Эдь тынь те теветнь аволь ансяк васенцекс ушодынк, истя жо васенцекс арсинккак.

<sup>11</sup>Истямо ладсо, ней теветь прядомстояк невтеде секе жо анокчинть, конань невтинк сонзэ арсемстэ! Максодо-путодо эсь виенк коряс!

<sup>12</sup>Ды бути тынк ули анокчинк максомс, сестэ Пазось паро мельсэ сайсы тынк казненк. Эдь Пазось учи сень, мезенк ули, аволь сень, мезенк арась.

<sup>13</sup>Монь арась мелем саемс стака канстонть лиятнень лангсто ды путомс тынк лангс. Мекевланк, улезэ истямо лезксэнь максомась карадокаршонь.

<sup>14</sup>Ней тынь эсь сюпав уличисэнк шождалгавтсынк сынст арасьчинть. Зярдэ тынк ули арасьчи, сестэ сын топавтсызь сонзэ эсь сюпав уличисэст. Истя ули вейкетьксчи.

<sup>15</sup>Теде кортави Пазонь пельде Сёрмадовкссонтькак: «Сень, кие пурнась ламо, арасель лиядксозо, ды сеяк, кие пурнась аламо, эзь сода арасьчи».

#### Тит ды килангонь ялганзо

<sup>16</sup>Сюкпря Пазонтень, кие кирвазтизе Титэнь седейс тынк кисэ секе жо бажамонть, кона палы минек седейсэяк!

<sup>17</sup>Сон кецязь кецясь минек энялдомантень ды сыргияк тенк эсь мелензэ-олянзо коряс, аволь ансяк минек вешеманок кувалт.

<sup>18</sup>Сонзэ марто минь кучтано вейке кемиця цёра, конань весе кемикуротне пек шныть Кенярксов кулянтъ пачтямонзо кисэ.

<sup>19</sup>Теде башка, кемикуротне кочкизь сонзэ молемс минек марто те вечкемань казненть пачтямо, зярс минь те тевсэнтъ важдотяно Азоронтъ шнамонзо кисэ ды эсенек лездамонь меленек невтеманзо кисэ.

<sup>20</sup>Минь бажатано киненьгак а максомс тувтал чумондомс минек сень кисэ, кода ды мезе тейтяно истямо покш казезь ярмактнень марто.

<sup>21</sup>Минь терявттаном весементь теомс парсте ломантнень икелеяк, аволь ансяк Азоронт сельмензэ икеле.

<sup>22</sup>Неть кавтотнень марто минь кучтано таго вейке кемиця ялганок. Минь а весть ванкшнынек сонзэ мельга ды неинек сонзэ седеень паломанзо эрва кодамо темень теомстэ. Ней сонзэ седеяк покш мелезэ-бажамозо лездамс тыненк, секс мекс сон домкасто кеми лангозонк.

<sup>23</sup>Титэнь коряс ёвтан вана мезе: сон монь ялгам ды мартон важодиця тыненк лездамсто. Лия кавто кемиця ялгатне – кемикуротнень кучовт, кандыть Христоснэнь шнамо.

<sup>24</sup>Секс ней теусэ невтинк тенст эсь вечкеманк! Кадык весе кемикуротне кармить содамо: минь аволь стяко шнатано прянок тынк эйсэ!

## 2-е Коринфянам 9

### Коринф ошсо лезксэкс ярмаконь пурнамо

<sup>1</sup>Ерусалимсэ Пазонь ломантнень лездамодонт монень сёрмадомскак тыненк а эряви.

<sup>2</sup>Мон содаса тынк анокчинк те пурнамонтень ды мон тынк шныдизь Македониянь кемицятнень икеле ды ёвтынть тенст: «Акайя ёнксонь кемицятне уш мелят анокстызь прят лезксэнь максомантень». Тынк истямо покш мелень паломась ламотнень сынст юткстояк сыржавтынзе те теветень.

<sup>3</sup>Ней мон ялатеке кучан тенк неть кемиця ялгатнень сень кисэ: илязо лисе стякокс монь тынк шнамось те теветень коряс. Кода мон уш сынест кортакшнынь, ней тыненк эряви улемс анококс эсь лезксэнт марто.

<sup>4</sup>Бути мейле монь марто сыть тыненк македониянсетне, ды тынь – аволь анокт, сестэ уш ули тенек визьксчама истямо покш кемемачисэ прянь шнамонт кисэ! Тынк визькстэнт мон уш а кортангак!

<sup>5</sup>Секскак мон ловия эрвиксэкс эстеденек икеле кучомс тенк неть кемиця ялгатнень, конатне икелевгак анокстасызь казненць, конань

тынь алтынк. Сестэ сон алкукс ули максозь паро мельсэ, аволь минек ёндо кармавтомань коряс.

<sup>6</sup>Кирдеде мельсэнк: кие видьмень ванстозь види, се аламо пурныйк, а вана кие сюпавсто-важовсто види, сюпавсто пурныйк.

<sup>7</sup>Кадык эрьвась эйстэнк максы зяро, зняро мери седеезэ, апак нусмакале ды апак кармавто, эдь Пазось вечки кеняркс марто максыця.

<sup>8</sup>Ды Пазонтъ ули виезэ тыненк каземс ланга чудицякс эрьва кодамо чансть. Сестэ тынк свал ды эрьва мейсэ карми улеме весе эрявиксэнк, кода эсенк туртов, истя жо ланга чудицякс саты виенк эрьва паро тевскак.

<sup>9</sup>Кода ёвтазь Сёрмадовкссо: «Сон сюпавсто явши кажовтненень, ды сонзэ паро тевтне а стувтовить пингеде пингес».

<sup>10</sup>Пазось, кона максы видьметь видицяненень ды анды кшисэ ломантненень, тыненккак максы видьметь, кастсынзе сынст ды ламолгавтсы паро тевень тееманк.

<sup>11</sup>Истя, тынь весемесэ карматадо улеме сюпалгавтозь, ды сестэ тынк свал карми улеме весеменк, мейсэ сюпавсто-важовсто лездамс лиятненень. Секс ламот кармить ёвтамо сукпря Пазонтень тынк казнетненень кисэ, конатне максовить минек вельде.

<sup>12</sup>Эдь лезксэсь, конань тынь макстадо, аволь ансяк шождалгавтсы Пазонь ломантненень арасьчист, истя жо сонзэ кисэ Пазонтень валозь валови сукпрянь чудикерькс.

<sup>13</sup>Те важдемасонтъ тынь тевс нолдтнетядо эсенк кемеманк ды невтядо, кода тынь максынк прянк Христосто Кенярксов кулянтень. Сестэ тынк казнетень саицятне шнасызь Пазонтъ тень кисэ ды сень кисэяк, кода сюпавсто тынь явтадо эсь парочистэнк сыненсткак ды весе лиятнененьгак.

<sup>14</sup>Тенде башка сынъ кармить озномо тынк кисэ ды бажамо весе седейсэст неемс тынк, секс мекс Пазось казидизь тынк Эсензэ аонкставикс чанстьсэ.

<sup>15</sup>Сюкпря Пазонтень валсо аёвтавикс Сонзэ казненъ кисэ!

## 2-е Коринфянам 10

### Павол иди эсь важоманзо

<sup>1</sup>Мон, Павол, кона тынк ютксо улемстэ вельть пелицян, ансяк зярдо тынденк васолан, допрок а пелицян, – кода кортыть кой-кить, – монсь ней пшкадян тенк Христосонь сэтьмечисэ ды чевтечисэ.

<sup>2</sup>Энялдан тенк: зярдо таго сан тыненк, илямизь кармавто монь уleme истямо апелицякс ды калгодокс. Кемеде тень, мон эрсян истямокс сетнень марто, кить чумондыть, келя, минь эрятано те масторлангонь ломантнень ладсо.

<sup>3</sup>Куш минь эрятанояк те масторлангсонть, ялатеке минь тюряно аволь сонзэ ломантнень ладсо.

<sup>4</sup>Минек тюреманы кедьёнкстнэ аволь ломанень пельде. Сынъ Пазонтъ пельде, ды сынст ули виест яжамс душманонь сехте кемекстазь кекшема таркатнень. Минь калавтано ломанень превень арсевкстнэнь-кодавкстнэнь

<sup>5</sup>ды эрва кодамо покшкавтнеманть, кона а нолды ломантнень Пазонтъ содамо. Сайтяно полонс-пленис ломантнень весе арсевксэст, ды тейтяно эйсэст Христоснэнь кунсолыцякс.

<sup>6</sup>Ды зярдо Христосонь кедь алов тынк прянк максомась ули прядозь педес, сестэ минь ультяно анокт пандомс чумонзо эрванть, кие а кунсолы.

<sup>7</sup>Ванодояк, мезе тынк сельме икеле! Бути кияк кеместэ арси: сон Христосонь, сестэ кадык арсезеви седеяк: миньгак Христосонь истя жо, кода сон.

<sup>8</sup>Бути мон мик аламодо седе пек прям шнан минсенек азорксчисэнтъ, монень а визькс. Те азорксчинтъ миненек максызе Азорось тынк кастоманк-кемекстамонк кисэ, аволь яжамонк-калавтоманк кисэ!

<sup>9</sup>Кадык а арсить монъ эйстэ, келя, мон ансяк тандавтиян тынк эсень сёрмасон.

<sup>10</sup>Конат-конат кортыть: «Паволонъ сёрманзо виевть ды кеметь, а вана сонсь ютксонок улемстэ неяви лавшокс ды кортыяк каназа кельсэ!»

<sup>11</sup>Кадык неть кортыцятне кирдить мельсэст: минь ультяно истят жо тынк ютксо тевтнесэяк, кодатано тынк эйстэ васоло сёрмадозь сёрматнесэ.

<sup>12</sup>Минек арась смелчинек арамс сетнень юткс ды вейкетстямс прянок сетнень марто, конат сынсь шныть эсь пряст. Вай, кодат сынъ чаволат! Сынъ онкстыть пряст эсест онкссо ды вейкетститъ пряст ансяк эсест марто!

<sup>13</sup>Минь, мекевланк, а карматано эсь прянок шнамо седе пек сень эйстэ, мезе тенек онкстазь-явозь Пазонтъ пельде, ды те минек важомемасонтъ ультядо тыньгак.

<sup>14</sup>Зярс тынь аштетядо миненек онкстазь-явозь таркасонть, секс минь тынк ютксо важомемасонок а печтнетяно сонзэ трокс. Эдь те минь васенцекс сынек тынк видьскак Христосто Кенярксов кулянтъ пачтямо.

<sup>15</sup>Минь а шнатано прянок миненек онкстаздентъ седе пек эли лиянь важомемасо. Мекевланк, минек ули седейнежедьксэнек: тынк кемемантъ касоманзо марто седе пек келейгали минек важомемась тынк ютксо – нама, миненек онкстаздентъ-явоздентъ аволь седе ламо.

<sup>16</sup>Сестэ минь тутано Кенярксов кулянтъ пачтямо лия таркава, тынденк седе васов, ды а карматано прянок шнамо се важомемасонтъ, конань теизь лиятне сыненст онкстазь-явозь таркасонть.

<sup>17</sup>Кода ёвтазь Сёрмадовкссо: «Кинь ули мелезэ шнамс эсь прянзо, кадык шнасы Азоронть эйсэ!»

<sup>18</sup>Эдь кемевикс ансяк се, кинь Азорось шны, аволь се, кие сонсь эсь прянзо шны.

## 2-е Коринфянам 11

### Павол ды кенгелиця апостолтнэ

<sup>1</sup>Вай, кирдевлинкак тынь монь кором, куш натой мон аламодо чаулан! Энялдан тенк, кирдинк эно!

<sup>2</sup>Эдь мон мелявтозь ванстан эйсэнк Пазонь покш мелявкс марто. Мон тынк ладидизь максомс вейке Мирденень – Христоснэнь, конанень монь мелем ванстомс тынк кода ванькс, чумос апак совавто тейтерь.

<sup>3</sup>Мон ялатеке пелян: тынкак превенк-арсеманк салавить-колавить Христоснэнь седейшкавань вечкеманть эйтэ – истя, кода гуесь эсь ёжовчисэнзэ манизе Евань.

<sup>4</sup>Эдь тынь парсте кирдядо сетнень корост, кить сыть ды ёвтнить тенк аволь се Иисустонтъ, конадо минь тыненк ёвтниек. Сынь максыть тенк допрок аволь се Оймеялтонть, кона уш тынк эйсэ, ды допрок аволь се Кенярксов кулянтъ, конань минь тыненк пачтинек!

<sup>5</sup>Мон, ялатеке, а лован эсь прям мейсэяк седе берянекс неть “покш апостолтнэнь” коряс.

<sup>6</sup>Паряк, монь аволь сырнень келем, ансяк монь содамочинь домкат. Эряви ёвтамс, весемесэ тынь минек парсте содасамизь.

<sup>7</sup>Мон эзинь веше кедьстэнк питнень пандома, зярдо пачтинь тенк Пазонь пельде Кенярксов кулянтъ. Тынк кепедеманк кисэ мон алкиньгавтыя эсь прям. Арази мон теньсэ теинь пежеть?

<sup>8</sup>Эряви меремс, мон салынь лия кемикуротнень: тыненк важдемань-лездамонь кисэ мон саинь ярмакт сынст пельде. Зярдо мон ульнинь



тынк кедьсэ, мон араселинь киненьгак стака канстокс, куш арасьчимгак ульнесь.

<sup>9</sup>Весе эрявиксэнтъ монень макссть кемиця ялгатне, конат састъ Македониясто. Мон зярдояк араселинь ды икелепелевгак а улян тыненк стака канстокс!

<sup>10</sup>Ды теньсэ мон каштангалян! Божан-пежетькстан Христосонь видечисэнтъ, конась эри монь седейсэ: весе Акайянтъ келес мон киненьгак а лоткавтован те прянь шнамондоть!

<sup>11</sup>Мекс эно монь арась мелем улемс тенк канстокс? Паряк, мон тынк а вечктядызь? Мекевланк, Пазось соды, кода мон тынк пек вечктядызь! Мон седе товгак карман тейнеме истя, кода тейнинь.

<sup>12</sup>Теньсэ мон сайса-нелъгса прянь шнамо тувталост сетнень, конат покшкавтнезь кортыть, келя сынъ теить Пазонь теветъ истя жо, кода миньгак.

<sup>13</sup>Нетъ ломантне – кенгели апостолт, манчиця важодицят, конатне ансяк невтить эсь пряст Христосонь апостолокс.

<sup>14</sup>Ды те аволь кодамояк дивсема. Эдь сонсь Сатанаськак невтнекшнесы прянзо валдонь ангелэкс.

<sup>15</sup>Истямо ладсо, тененьгак а мезть дивсемс, зярдэ сонзэ важонзояк невтить эсь пряст видечинтень важодицякс. Сынст песь, ялатеке, ули истямо: максозь ули тенст эсь чумост кисэ.

#### **Паволонь майсеманзо**

<sup>16</sup>Таго кортан тенк: илядо лово монь превтемекс-чавокс! Ды бути ловтадомяк монь превтемекс, сестэ максодо монень зярскак улемс истямокс ды моненьгак аламонь-аламонь шнамс прям.

<sup>17</sup>Се, мезе мон ней тыненк ёвтан, нама, аволь Азоронтъ мелензэ коряс. Монь кортан алкуксккак теке превстэ лисезь ломань, бути истямо покш кемема марто шнан эсень прям.

<sup>18</sup>Зярс ламот шныть пряст те масторлангонь ломантнень ладсо, сестэ монгак шнаса прям.

<sup>19</sup>Тынь тынсь ловтадо прянк пек превеекс, секскак паро мельсэ кирдтядо превтеметнень корост!

<sup>20</sup>Тынь кирдтядо сетнень корост, кие саи эйсэнк урекс кедензэ алов, тарги-нельги пельденк, покорды эйсэнк, покшкавтни прянзо тынк икеле, ды кие кавани эйсэнк чама ланга.

<sup>21</sup>Эсень визьксчис ёвтан: минек эзь сато виенек истя тейнемс тынк марто! Ней мон тень кортан превстэ лисезь ладсо: сень эйсэ, мейсэ лиятнень ули смелчист шнамс пряст, моньгак ули смелчим шнамс прям.

<sup>22</sup>Сынь еврейть? Монгак! Сынь Израилень ломанть? Монгак! Сынь Авраамонь раськенъ поладыцят? Монгак!

<sup>23</sup>Сынь Христоснэнь важодицят? Паряк, мон уш допрок превстэ лисинь ды ялатеке ёвтан: мон сындест пек Сонензэ важдян! Мон сындест пек ламо вий путынь Сонензэ важдемантень, сындест ламоксть ульнинь пекстамо кудосо, сындест ламоксть чавозян, сындест сеedyстэ ульнинь кулома лангсо.

<sup>24</sup>Еврейтне ветексть керимизь локшонь колоньгемень вейксэ вачкодъксэ,

<sup>25</sup>рименсетне колмоксть чавимизь палкасо. Весть ульнинь чавозь кевсэ, колмоксть ваякшнынь венчсэ, чи ды ве ютавтынь азаргалиця иневедьсэ.

<sup>26</sup>Эсень ламо якамон перть мон ульнинь пелемачисэ лейс ваямодо, салыцядо-нельгицядо, пелемачисэ эсь раськенсетнеде ды лия раськенсетнедеяк. Ульнинь пелемачисэ ошсо, ломантеме таркасо ды иневедьсэ. Истя жо пелемачисэ ульнинь кемицякс прянь невтицятнеде.

<sup>27</sup>Мон кирдинь стакасто важдема ды сизема, апак удо ламо веть, вачочи ды симемань само. Сеедстэ ютавтынь чить апак ярса, якшамосо ды штапочисэ.

<sup>28</sup>Весе тенде башка, монень эрва чистэ сакшность ломанть, ды савсь тень мелявтомс весе кемикуротнеде.

<sup>29</sup>Бути кие лавшо, сестэ монгак мартонзо лавшан. Мон пиян-палан эрванть кисэ, кинь совавтсызь пежетьс.

<sup>30</sup>Бути монень сави шнамс прям, сестэ мон прям шнаса эсь лавшочисэнь.

<sup>31</sup>Улезэ шназь-чанстызь пингде пингес минек Иисус Христос Азоронть Тетязо ды Пазозо! Сон соды: мон тесэ а кенгелян.

<sup>32</sup>Зярдэ мон ульнинь Дамаск ошсо, сестэ Арета инязоронть тевень ветицязо кундыксэлимим монь ды кармавтокшнось ванстомс ошонь ортатнень. А монь вальминева нолдымизь кептересэ ошонь пиравксонть кувалт, ды истя мон оргодевинь сонзэ кедь алдо.

## 2-е Коринфянам 12

### Паволнэнь панжозь чартне ды неявкстнэ

<sup>1</sup>Арась монень кодамояк лезэ прянь шнамонтэ эйстэ. Ней карман ёвтнеме неявкстнэде ды панжозь чартнеде, конатнень максынзеневтинзе монень Азорось.

<sup>2</sup>Мон содан Христоснэнь вейке кемиця, кона кемнилее иеде теде икеле кандозель-кепедезель колмоце менеленть лангс. А содан, кода сон тосо ульнесь, рунгосо эли аволь рунгосо, тень эйстэ соды ансяк Пазось.

<sup>3</sup>Мон содаса те ломаненть, сон жо кандозель-кепедезель райс. Ансяк а содан, кода, рунгосонзо эли аволь рунгосо, соды ансяк Пазось.

<sup>4</sup>Тосо сон марясь истят валт, конатнень ломаннень а ёвтавить ды а мереви ёвтнемскак.

<sup>5</sup>Вана те ломаньсэнтъ шнаса прям, эсь прям шнамо мейсэяк а карман, эсь лавшочидень башка.

<sup>6</sup>Бути мон шнавлияяк прям, сестэ аволинь уле превтемекс, эдь мон ёвтан ансяк ванькс видечи. Ялатеке тень а тейса: кадык кияк а арси монь кувалма седе ламо, мезе сон неи монь эйсэ ды мари монь пельде.

<sup>7</sup>Нама, Пазось максынзе монень а эрсиця ине неявкстнэнь. Ды секс, прям верьга а кандомга, Сон пезнавтсь монь рунгос сардо\* – Сатанань ангел, кона монь сорновтни-чави, илязан кандо верьга прям.

<sup>8</sup>Мон колмоксть энялдынъ-ознынъ Азоронтень таргамс эйстэнь те сардонть.

<sup>9</sup>Сестэ Сон монь каршо ёвтась: «Тонеть саты Монь чанстесь. Монь виесь седе пек неяви лавшочинть эйсэ». Секскак мон истямо кеняркс марто шнан прям эсь лавшочисэнь: свал улезэ-эрязо эйсэнь Христосонь виесь.

<sup>10</sup>Секс монь мелем витеви лавшочисэяк, покордамосоаяк, стакачисэяк, пансемасоаяк, лепштямосоаяк, конатне монень максовить Христосонь кисэ. Эдь зярдэ мон лавшан, сестэ виеван.

#### **Павол кода апостол Коринфень ломантненень**

<sup>11</sup>Ней мон эсь прям шнамосо пачкодинъ допрок превстэ лисемас! Тынь монь тенень кармавтымизь! Те тыненк эряволь монь шнамс! Эдь мон кодаяк аволь седе берянян неть “покш апостолтнэде”, куш мон сыненст улянгак чаво таркакс.

<sup>12</sup>Мон покш цидярдома марто тейнинъ тынк ютксо ламо диванъ чартть, тамашат ды виев тевть, конат невтить монь алкуксонь апостолокс улемам.

<sup>13</sup>Мезе жо тыненк арасель максозь лия кемикуротненъ коряс? Паряк, ансяк се: мон араселинь тыненк стака канстокс. Нолдынк, инеськетъ, тень кисэ монь чумом!

<sup>14</sup>Ванодоя, мон пурнан тыненк уш колмоцеде, ды нейгак стака канстокс мон тенк а улян. Монень эрявтадо тынсь, аволь тынк ярмаконк! Эдь

аволь эйкакштнэнень эряви таштамс тетяст-аваст туртов, мекевланк, тетятненень-аватненень – эйкакшост туртов.

<sup>15</sup>Тынк кисэ мон кецязь максса весементь, мезем ули, натой эсь прямгак. Бути мон тынк вечктядызь истя пек, мекс сестэ тынь монь вечксамизь аволь истя пек?

<sup>16</sup>Истя тынь кортатадо: мон тыненк араселинь стака канстокс. Паряк, кой-кить ялатеке кортыть: моң, келя, эсь ёжовчисэнь, манязь саидизь тынк эсь кедень алов?

<sup>17</sup>Арази мон эстенъ саинь лезэ се ломантненъ вельде, конатненъ тыненк кучнынъ?

<sup>18</sup>Мон энялдынъ Титнэнь молемс тыненк ды мартонзо саемс се лия кемиця ялганть. Паряк, Тит сайсь пельденк кодамояк лезэ? Арази минъ сонзэ марто эсь тевенек теинек аволь вейке мельсэ-превсэ? Арази якатано аволь вейке киява?

<sup>19</sup>Тынь, паряк, яла арсетядояк: минъ те сёрмасонть тынк икеле ансяк идетьяно прянок? Арась! Минъ кортатано, кода Христосонъ важот, Пазонть сельмензэ икеле. Ды весе, мезе минъ тейтяно, – те ансяк тынк кастоманк-кемекстамонк кисэ, монъ вечкевиксэнъ.

<sup>20</sup>Тыненк самсто пелян неемс тынк аволь истямокс, кодамокс мелем неемс. Ды, паряк, тыньгак монъ несамизь аволь истямокс, кодамокс меленк неемс монъ. Истя жо пелян вастомс тынк ютксо сёвномат-пелькстамот, сельмень сявадома, кежть, эсь прянь вечкема, кенгелемат, тошксемат-кортавтомат, верьга прянь кандома, лувтомочи.

<sup>21</sup>Мон пелян, зярдэ таго сан тыненк, Пазом илязамам покорда тынк кисэ. Пелян, сестэ сави монень авардемс тынк эйстэ ламонь кисэ – сетненъ кисэ, кить икелеяк совсестъ пежетьс ды нейгак эзть велявто истямо пежетест эйстэ: аванкс бажамодост, усксевемадост-ускурямодост ды лия визьксэнь тевдест.

## 2-е Коринфянам 13

### Меельце превспутомат ды шумбракстнемат

<sup>1</sup>Ней мон сан тыненк колмоцеде. Те виде-паро истя, кода ёвтазь Сёрмадовкссо: «Эрьва чумондомась кемекстави кавто эли колмо неицянь-содыцянь валсо».

<sup>2</sup>Зярдю мон ульнинь тынк кедьсэ омбоцеде, сестэ уш кортынь сетненень, кить яла тейнить пежеть. А вана ней, васолдо тынк эйстэ, таго икелепелев сёрмадан тенст ды весе лиятнененьгак: колмоцеде самсто киньгак жалямо а карман!

<sup>3</sup>Сестэ тынь, вешеманк коряс, эсь сельмесэнк несынк: монь вельде корты Христос. Сонзэ тевензэ эрямосонк допрок аволь лавшот, Сон яволятсы тынк ютксо Эсь виензэ!

<sup>4</sup>Нама, Сонзэ вачкодизь крест лангс, зярдю ульнесь лавшо, ней жо Сон эри Пазонтъ вийсэ. Христос ладсо миньгак истя жо лавшот, ансяк ней Сонзэ марто миньгак эрятано Пазонтъ вийсэ, конань тынсь карматадо нееме ды марямо!

<sup>5</sup>Кевкстинк эсь прянк: тынь алкукс кемицят? Варчавтнинк-ванкшнынк эсь прянк. Арази тынь а содатадо: тынк эйсэ эри Иисус Христос? Бути Сон арась эйсэнк, сестэ а кирдеви тенк варчавтнемась.

<sup>6</sup>Мон кеман-нежедян тынк чарькодеманк лангс: минь сеть, конатненень кирдеви варчавтнемась.

<sup>7</sup>Ялатеке минь ознотано Пазонтень: тынь аволиде тее мезеяк берянь. Минь истя ознотано аволь сень кисэ: невтемс эсь прянок варчавтнематненень кирдицякс, а сень кисэ: теевлиде тынь паро – кадык мик тыненк неяви: миненек эзь кирдеве варчавтнемась.

<sup>8</sup>Эдь миненек мезеяк а тееви видечинть каршо, ансяк видечинть кисэ.

<sup>9</sup>Минь кенярдтано, зярдю минь лавшотано, тынь вана виевтядо. Секскак минь ознотано тынк эрямонк вадрялгавтоманть кисэ.

<sup>10</sup>Сёрмадан теде васолдо вана мекс: зярдо сан тыненк, илязан уле мартонк калгодокс-кежеекс. Эдь Азорось максызе монень нолдамс тевс азорксчинть тынк кастоманк-кемекстамонк кисэ, аволь яжамонк-калавтоманк кисэ.

<sup>11</sup>Кемиця ялган, меельцекс ёвтан: кенярдкшнодо, бажадо эрямонк вадрялгавтомантень. Топавтодо сень, мезе мон вешинь пельденк, весемесэ уледе ве мельсэ, эрядо ладязь. Сестэ Пазось, вечкемань ды седейоймамонь лисьмапрясь, ули тынк марто.

<sup>12</sup>Шумбракстнеде вейкенк-вейкенк марто Пазонь ломанень паламосо. Пазонь весе ломантне кучить тенк сукпрат!

<sup>13</sup>Минек Иисус Христос Азоронть чанстесь, Тетя Пазонть вечкемась ды Иневанькс Оймеялтонть вельде вейсэндямось улест весе тынк марто! Аминь.

## Галатиянь Кемикуротненень Паволонь Сёрмазо

### К Галатам 1

<sup>1</sup>Мон, Павол, кона кармась улеме апостолокс аволь ломантненень пельде эли кодамояк ломанень вельде, а вана Иисус Христосонь ды Тетя Пазонтъ пельде, кона вельмевтизе Иисусонь кулозьстэ, –

<sup>2</sup>кучан шумбракстнемат Галатиянь кемикуротненень, – мон ды весе кемиця ялгатне, конат тесэ мартон.

<sup>3</sup>Арсян тенк чансть ды седейоймамо минек Тетя Пазонтъ пельде ды Иисус Христос Азоронтъ пельде.

<sup>4</sup>Сон максызе Эсь прянзо минек пежетненень кисэ: истя идемс минек те неень зыянов шканть эйстэ. Теньсэ Сон топавтызе минек Тетя Пазонтъ мелензэ.

<sup>5</sup>Улезэ шназь Пазось пингде пингес! Аминь.

### Лия Евангелия арась

<sup>6</sup>Мон дивсян сенень, кода курок тынь велявтыде Пазонтъ эйстэ, кона тердидизь тынк Христосонь седеймарямосонтъ, ды кармиде молеме допрок лия смустень кулянтъ мельга.

<sup>7</sup>Арась кодамояк лия кенярксов куля! Ансяк улить истят ломанть, конат тынк чаракавтыть-тапить ды снартыть коламс Христосто Кенярксов кулянтъ смустензэ.

<sup>8</sup>Бути кияк карми пачтямо тыненк аволь се Кенярксов кулянтъ, конань минь икеле пачтинек тенк, – улиндерян натой те монсь эли менельстэ ангел – улезэ сон сюдозь!

<sup>9</sup>Кода икеле кортынек, нейгак таго кортан тыненк: бути кияк карми тенк пачтямо аволь се Кенярксов кулянтъ, конань тынь уш сайнк эсь седеезэнк, улезэ сон сюдозь!

<sup>10</sup>Кинь пельде мон ней вешнян паро мельть: ломантненень эли Пазонтъ пельде? Паряк, тынь арсетядо: мон бажан савтомс ломантненень? Бути



мон нейгак бажавлинь савтомс ломантненень, сестэ аволинь уле Христосонь важокс.

#### Паволонь апостолокс теевемась

<sup>11</sup>Яволявтан тенк, кемиця ялгат: Кенярксов кулясь, конань мон пачтян, аволь ломанень пельде.

<sup>12</sup>Моненьгак сон ульнесь максозь аволь ломантненень пельде, ды кияк сонензэ монь эзимим тонавто. Те Кулянтъ максызе монень Сонсь Иисус Христос, зярдо невтизе тень Эсь прянзо чартьсэ-неявкссо.

<sup>13</sup>Тынь, нама, марсиде монь эрямодон-аштемадон, зярдо мон ульнинь евреень кемемасо. Сестэ мон пек кежейстэ пансинь Пазонь Кемикуронтъ ды снартнинь допрок калавтомс-яжамс сонзэ.

<sup>14</sup>Евреень кемемасонтъ мон ульнинь монь иень ялгатненень коряс раськенъ ломантненень ютксо сехте икеле. Истямо ладсо вельть эрязкалезь ванстынь-топавтынъ койтненень, конатненень миненек кадызь покштятне.

<sup>15</sup>Ансяк Пазось, кона кочкимим монь чачомадон икеле ды тердимим Эсь чанстензэ коряс Тензэ важдеме, сайсь мель

<sup>16</sup>панжомс монень ды монь вельде Эсь Цёранзо сень кисэ: пачтявлия мон Сонзэ эйстэ Кенярксов кулянтъ лия раськетненень. Сестэ мон эзинь карма кевкстнеме превть ве ломанень пельдеяк.

<sup>17</sup>Ды мон эзинь моле Ерусалимев вастовомо сетненъ марто, конат теевсть апостолокс мондень икеле. Мекевланк, сеске туинь Аравияв, косто мейле мекев велявтынъ Дамаск ошов.

<sup>18</sup>Мейле, колмо иень ютазь, якинъ Ерусалимев вастовомо Петра марто ды ульнинь кедьсэнзэ ансяк кеветеешка чи.

<sup>19</sup>Лия апостолтнэде киньгак эзинь нее, минек Азоронтъ Яков браттонзо башка.

<sup>20</sup>Пежетъкстан-божан Пазонтъ икеле: мезде тыненк сёрмадан, те виде, аволь кенгелямо.

<sup>21</sup>Теде мейле мон туинь Сирия ды Киликия ёнксов.

<sup>22</sup>Христосонь кемикуротне, конат Иудеясо, монь а содылимизь.

<sup>23</sup>Сынъ мондень ансяк марсестъ: «Се, кона икеле пансесь эйсэнек, ней пачти се кемемантъ, конань сон икеле калавтсь-яжась!»

<sup>24</sup>Ды сынъ шнасть Пазонтъ монь кисэ.

## К Галатам 2

### Павол вастови лия апостолтнэнь марто

<sup>1</sup>Мейле, кемнилее иень ютазь, мон таго якинъ Ерусалимев Варнава марто ды Титэньгак сайния мартон.

<sup>2</sup>Сонсь Пазось мерсь монень чартензэ-неявксонзо вельде модемс тов. Ды тосо мон ёвтнинь сыненст те Кенярков кулядонть, конань пачтян лия раськетнень туртов. Башка вастовкшнынъ ды кортынъ сехте содавикс прявтнэнь марто. Мон истя теинь сень кисэ: илязо ёма стяко икелень ды неень монь важдемась.

<sup>3</sup>Ды вана: сынъ натой эзть кармавто теемс киськепень керявтомаяк Титнэнь, кона ульнесь мартон, куш сон – грек.

<sup>4</sup>Минек юткс салава совасть кемицякс прянь невтицят. Сынъ яксестъ-ванстнестъ минек мельга ды се олячинть мельга, кона миненек максозь Христос Иисусонь пельде. Сынст ульнесь мелест мекев велявтомс минек Моисеень Коентъ урекчис.

<sup>5</sup>Сынст вешематненень минь прянок эзинек максо ве липкескак сень кисэ: ванстомс тынк туртов Кенярков кулянтъ видечинзэ.

<sup>6</sup>А вана кемикуронь прявтнэ, конатне лововсть содавиксэкс – кить сынъ истят ды мезекс ульнестъ, монень ялатеке, эдь Пазонтъ икеле весе ломантне вейкетъ – сынъ, нетъ содавикстнэ, мезеяк лия монь пельде эзть вешне.

<sup>7</sup>Мекевланк, сын парсте несть: монень максозь Кенярксов кулянтъ пачтямс лия раськетнень туртов истя жо, кода Петранень – еврейтнень туртов.

<sup>8</sup>Се, Конась Эсь вийсэнзэ теизе Петрань еврейтнень туртов апостолокс, моньгак теимим лия раськетнень туртов апостолокс.

<sup>9</sup>Яков, Кефа ды Иоанн, конатнень ловсть кемикуронь юрокс-нежекс, чарькодизь теवंть, кона монень максозь Пазонтъ чанстензэ коряс. Сестэ сын максызь монень ды Варнаванень эсь кедест кода вейсэнъ теवंть теема тешкс. Минь прынек ве мельс: миненек молема лия раськетненень, сынест – еврейтненень.

<sup>10</sup>Сынъ энялдсть минек икеле ансяк вейкеде: а стувтнемс Ерусалимень кемикуронь кажовтненень лездамодо, мезентъ мон свал покш виень путозь топавтангак.

### Павол мурни Петрань

<sup>11</sup>Зярдэ Петра сась Антиокияв, сестэ мон видьстэ кортынъ сонзэ каршо, секс мекс сон прянзо ветясь а видестэ.

<sup>12</sup>Тевесь сеньсэ: Ерусалимстэ Яковонь ломантнень самодо икеле Петра ярснесь-симнесь лия раськенъ кемицятнень марто вейсэ. Зярдэ жо сеть састэ Антиокияв, сестэ Петра потась лия раськенъ кемицятнень эйстэ ды явсь. Сон пелезевсь керявтомань кисэ аштицятнеде.

<sup>13</sup>Петра мельга истя жо кавто чачосотнень ладсо кармасть ветямо прят лия еврейтнеяк. Сынст кувалма мик Варнаваяк тусь виде ки лангсто.

<sup>14</sup>Мон неинь: сынъ молить аволь виде киява, пурдасть Кенярксов кулянтъ видечинзэ эйстэ. Секс мон весе кемицятнень марямга меринь Петранень: «Бути тон, еврей, эрят кода лия раськенъ ломань, аволь еврей ладсо, сестэ мекс тон лия раськенсетнень кармавтат эрямо еврей ладсо?»

### Ансяк Христоснэнь кемемась максы чумовтомочи

<sup>15</sup>Минь – чачомань коряс еврейть, аволь “лия раськенъ пежетев ломанть”, кода тенст мерить.

<sup>16</sup>Ялатеке минь содатано: ломанесь ловови Пазонть икеле чумовтомокс ансяк Иисус Христоснэнь кемеманть вельде, аволь Моисеень Коень топавтоманть вельде. Секс миньгак кемезевинек Христос Иисуснэнь: теевемс чумовтомокс Христоснэнь кемеманть вельде, аволь Коень топавтоманть вельде. Эдь Коень топавтоманть вельде вейкеяк ломань Пазонть икеле чумовтомокс а ловови.

<sup>17</sup>Минь бажатано теевемс Пазонть икеле чумовтомокс Христос марто вейсэндямонть кувалт. А вана бути теке марто неяви: миньгак, еврейтне, истят жо пежетевть, – арази сестэ те невти: Христос лезды кастомс пежетенть? Кодаяк аволь!

<sup>18</sup>Ансяк бути мон карман одс стявтомо сень, мезенть калавтыя икеле, сестэ теньсэ невтьса: мон – Коень каладыця.

<sup>19</sup>Коесь ялатеке монь куловтымим, ды секс мон ней Коень туртов кулозьян, Пазонть туртов эрямга. Мон теке крест лангс вачкодезян Христос марто.

<sup>20</sup>Лисни: монь эйсэ ней эри Христос, уш аволь монсь. Зярс мон эрян мода лангонь рунгсонть, мон эрян Пазонь Цёранть кемеманть вельде. Сон вечксамам монь ды максызе Эсь прянзо монь кисэ.

<sup>21</sup>Мон а ёртса Пазонь чанстенть. Эдь бути Коень топавтоманть вельде тееват чумовтомокс, сестэ Христос кулось стяко!

## К Галатам 3

### Кой ды кемема

<sup>1</sup>Галатиянь превтеме ломанть! Кие тынк сельмедидизь – а кунсолломс видечинть? Мон жо тынк сельменк икеле вельть чарькодевиксстэ невтия, кода Иисус Христос теке тынк кедьсэ кулось крест лангсо!

- <sup>2</sup>Ансяк вейкеде ули мелем кевкстемс тынк: Мезень кувалт максозель тенк Пазонь Оймеялтось? Коенть топавтоманзо кувалт эли Христосто кулянть марямонзо кувалт ды тензэ кемеманть кувалт?
- <sup>3</sup>Кода эно тынь теевиде истямо превтемекс! Тынь ушодынк Оймеялтонть вийсэ. Арази ней бажатадо прядомс эсенк вийсэ?!
- <sup>4</sup>Арази весе, мезенть трокс печтиде, ютась стяко? Тенень мон а кеман!
- <sup>5</sup>Пазось кази тыненк Оймеялт ды теи ютксонк дивань тевть. Арази Сон тень теи секс, мекс тынь топавттадо Моисеень Коень вешематнень? Арази аволь секс, мекс тынь маринк Христосто кулянть ды кемезевиде тензэ?
- <sup>6</sup>Авраамдо, кезэрень ине тетядонок, Сёрмадовкссо ёвтазь: «Сон кемезевсь Пазонтень, ды тень кисэ Пазось ловизе сонзэ чумовтомокс».
- <sup>7</sup>Секскак чарькодеде: Авраамонь алкуксонь эйкакшокс улить сеть, конат кемить.
- <sup>8</sup>Сёрмадовксошь уш икелев ёвтызе: Пазось ловсынзе весе раськенъ ломантнень чумовтомокс кемеманъ кувалт. Сон васенцеде ёвтызе Кенярксов кулянтъ Авраамнень: «Тонъ вельде весе раськетненень максови чанстямо-баславамо».
- <sup>9</sup>Лисни, Пазось чансти-баслави весень, кие кеми-нежеди лангозонзо, кода Сон икеле чанстизе-баславизе кемиця Авраамоньгак.
- <sup>10</sup>А вана сетне, кить нежедить Коень топавтоманть лангс, эрить-аштить сюдома ало. Эдь Сёрмадовкссонть кортави: «Сюдозь эрьвась, кие а топавты весе сень, мезе сёрмадозь Коень книгасонть».
- <sup>11</sup>Коенть топавтома вельде кияк а ловови чумовтомокс Пазонтъ икеле. Те парсте неяви Сёрмадовксонь валтнэстэ: «Ломанесь, кона кемеманъ кисэ ловозь чумовтомокс, карми эрямо».

<sup>12</sup>Коенть юрсо ашти, нама, аволь кемемась. Мекевланк, Койденть ёвтазь истя: «Ансяк се, кие топавты Коень весе вешематнень, сонзэ вельде карми эрямо».

<sup>13</sup>Ней жо Христос идимизь-менстимизь олячис Коень сюдоманть алдо. Сон саизе Эсь лангозонзо минек таркас те сюдоманть. Теде ёвтазь Сёрмадовкссонтъ: «Сюдозь эрвась, кие понгавтозь чувтос».

<sup>14</sup>Христос теизе тень вана мекс: Авраамнень алтазь чанстямось-баславамось максоволь-сравтневель Христос Иисус вельде лия раськетнень лангаяк, ды Пазонь алтавт Оймеялтось максоволь миненеккак Христоснэнь кемеманок вельде.

### **Алтамо ды Кой**

<sup>15</sup>Кемиця ялгат! Невтевксэкс сайтяно эрямонь-аштемань истямо тев. Бути ломанесь тейсь ладямодо кемекстазь конёв, сестэ те конёвось киненьгак а ёртови-а полавтови ды лия мезеяк тозонь уш а путови.

<sup>16</sup>Пазось жо макссь алтамот Авраамнень ды сонзэ буень-раськенъ поладыцянтень. Сёрмадовксонъ те таркасонть ёвтазь аволь “буень поладыцянтенень”, кода ламонень, а вана “тонь буень поладыцянтень”, кода вейкенень, те – Христоснэнь.

<sup>17</sup>Теньсэ монь мелем ёвтамс: Коесь, кона лиссь нилесядт колоньгемень иеде мейле, а полавтсы Христосто вейсэнълувонтъ-ладямонтъ, конань Пазось кемекстызе икеле. Истямо ладсо Коесь а ёртсы-а ёмавтсы Пазонь максовт алтамонтъ.

<sup>18</sup>Бути Пазонь казнесь максоволь Коенть коряс, сестэ сон а саевель алтамонь коряс. Авраамнень жо Пазось максызе Эсь казнензэ алтамонзо коряс!

### **Мезекс эряви Коесь?**

<sup>19</sup>Мезекс сестэ эряви Коесь? Сон путозь мейле, ломантнень пежетест невтемга, ды вийсэнзэ ульнесь се шкас, зярс эзь са Авраамонь буень поладыцясь, конанень максозель алтамось. Коесь максозель-

аравтозель ангелтнэнь вельде, мейле Моисей, Пазонть ды ломантнень ютксо тевень якавтыцясь, максызе сонзэ ломантненень.

<sup>20</sup>Тевень якавтыцясь эрявкшны ансяк сестэ, зярдэ улить вейсэнълувонь-ладямонь кавто теицят. Пазось жо – ськамонзо!

<sup>21</sup>Арази сестэ Коесь ашти Пазонь алтамотнень каршо? Кодаяк аволь! Бути ломантненень максозь улевель истямо кой, кона казевель эрямо, сестэ Пазонть икеле чумовтомочись максоволь весенень, нама, те коенть топавтоманзо кисэ.

<sup>22</sup>Сёрмадовксось яволявты: весе ломантне аштить ваязь пежеть потс. Секс казнесь, кона ульнесь алтазь ансяк кемеманть коряс, максови Иисус Христоснэнь кемицятненень.

<sup>23</sup>Кемеманть самодо икеле минь ульнинек пекстазь Коенть ванстоманзо алов се шкас, зярс эзь яволявтово-панжово те сыця кемемась.

<sup>24</sup>Истямо ладсо Коесь ульнесь минек трицякс-кастыцякс Христосонь самс: кемеманть коряс миненек чумовтомокс теевемга.

<sup>25</sup>Ней уш сась кемемась, ды минь лисинек трицянтъ-кастыцянтъ кедензэ алдо.

### **Тынь Пазонь эйкакшт – аволь уреть**

<sup>26</sup>Христос Иисуснэнь кемеманть коряс тынь весе теевиде Пазонь эйкакшокс.

<sup>27</sup>Эдь весе тынь, кить нававтызь-лемдизь пряст, теньсэ вейсэндявиде Христос марто, теке оршавиде Христоссо.

<sup>28</sup>Ней уш ялатеке, улят тон еврей эли лия раськенъ ломань, уре эли олячисэ, цёра эли ава. Весе тынь ней вейкетъ, вейсэндязь Христос Иисус вельде.

<sup>29</sup>Бути тынь Христосонь, сестэ тынь Авраамонь буень-раськень поладыцяно, ды тыненк максови се, мезенть Пазось алтызе Авраамнень.

#### **К Галатам 4**

<sup>1</sup>Мон тесэ кортан вана мезде: зярс эйкакш пингесэ се, конань кедьс мейле максови тетяно уличись, сон мейсэяк а явови уренть эйстэ, кадык сон – весементь лангсо азор.

<sup>2</sup>Сон ашти мельганзо якицятнень ды кудоветицятнень кедь ало тетяно аравтовт шканть самс.

<sup>3</sup>Истя жо миньгак, зярдэ ульнинек “эйкакш пингесэ”, ульнинек урекчисэ те мирэнтъ-масторонтъ ветиця вийтнень ало.

<sup>4</sup>Ансяк зярдэ топодсь аравтозь шкась, сестэ Пазось кучизе миненек Эсь вейкине тиринь Цёранзо. Сон чачсь ломанекс авань пельде ды эрясь Коенть ало сень кисэ:

<sup>5</sup>идемс-менстемс минек Коенть алдо олячис ды теемс минек Пазонь эйкакшокс.

<sup>6</sup>Ней уш тыньгак ультядо Пазонь эйкакшокс. Тень невтеманзо кисэ Пазось кучизе весень тынк седейс Эсь Цёранзо Оймеялтонть, конась тердевети Пазонтъ: «Абба! Тетяй!»

<sup>7</sup>Истямо ладсо, ней тон эйкакш, уш аволь уре. Бути тон эйкакшат, сестэ Иисус Христосонь кувалт тонеть максови уличиськак, конань Пазось алтызе-аравтызе Эсь эйкакшонзо туртов.

#### **Павол талны-мелявты галатиянсетнень кисэ**

<sup>8</sup>Икеле, зярдэ тынь а содылинк Пазонтъ, ульниде урекчисэ сеть вийтнень ало, конат допрок аволь алкуксонь пазт.

<sup>9</sup>Ансяк ней тынь домкасто содасынк Пазонтъ, эли видестэ ёвтамс, Пазось кармась тынк содамонк. Мекс сестэ, эно, тынь таго велявттадо



мирэнь-масторонь неть лавшо, лезэвтеме вийтненень! Арази тынк меленк мекев совамс сынст алов урексчис?

<sup>10</sup>Тынь мик яла ловтадо-тешкстатадо кодат-бути чить, ковт, шкат ды иеть!

<sup>11</sup>Мон талнан кисэнк ды пелян: арази монь важомемась тынк туртов тусь варма мельга?

<sup>12</sup>Энялдан икеленк, кемиця ялган, уледе истямокс, кодаман мон! Монгак теевинь истямокс, кодат тынь. Тынь монень эзиде тее мезеяк берянь.

<sup>13</sup>Тынь жо содатадо: мон васенцеде Кенярков кулянтъ пачтия тенк секс, мекс ульнинь сэредицякс.

<sup>14</sup>Кадык сестэ монь сэредемась ульнесь монень стака канстокс, тынь ялатеке эзиде безарде-нулгоде эйтэнь. Мекевланк, седейшкава вастымизь монь, теке Пазонь ангелэнтъ, теке Эсензэ Христос Иисусонь.

<sup>15</sup>Ков ёмась ней тынк икелень кецямось-уцяскась! Мон апак кавтолдо яволявтан тынденк: икеле тынь эсь сельменккак таргавлинк ды максовлинк монень, бути тынк сатоволь виенк!

<sup>16</sup>Арази мон ней теевинь тынк икеле душманокс сень кувалма, мекс кортан тенк видечи?

<sup>17</sup>Лиятне, нама, свал мелявтыть тынк кисэ, ансяк тень сынъ теить аволь паронь арсезь. Сынст мелест явомс тынк монь эйтэ ды теемс тынк эсест кисэ чинек-венек мелявтыцякс.

<sup>18</sup>Свал вадря се, зярдю кияк мелявты кисэнк паронь арсезь. Кадык истя ули свал, аволь ансяк сестэ, зярдю мон тынк ютксо.

<sup>19</sup>Вечкевикс эйденъ! Мон одс майсезь чачтан эйсэнк, зярс а теевтядо Христосонь кондямокс.

<sup>20</sup>Вай, бути мон ней улевлинъ тынк ютксо! Сестэ тынк марто кортамсто полавтовлия вайгелем. Ней жо превс тень а саеви, мезе теемс мартонк.

## Агарь ды Сарра

<sup>21</sup>Сетне тынк эйтэ, конатнень мелест эрямс Коенть ало, ёвтадо монень: арази тынь а чарькодтядо, мезе корты Коесь?

<sup>22</sup>Эдь Койсэнтъ сёрмадозь: Авраамонь ульнестъ кавто цёранзо, вейкесь уре авань пельде, омбоцесь – олячисэ эриця нинзэ пельде.

<sup>23</sup>Уре авань цёрась чачсь истя, кода свал чачить весе эйкакштнэ, а вана олячисэ авань цёрась чачсь Пазонтъ алтамонзо коряс.

<sup>24</sup>Те ёвтамонтъ ули кекшезь смустезэ: неть кавто аватне аштить кавто вейсэнълувонь-ладямонь невтемакс. Васенце авась Агарь, конань эйкакштнэ чачить урекчис, невти се вейсэнълувонтъ, кона ульнесь теезь-кемекстазь Синай пандонтъ лангсо.

<sup>25</sup>Агарь вейкетстяви Синай пандонтъ марто, кона Аравиясо. Сон истя жо невти неень шкань Ерусалиментъ, кона эсь эйкакшонзо марто эри-ашти урекчисэ.

<sup>26</sup>Весе минек аванок жо – те менель лангонь Ерусалимесь, кона олячисэ, аволь уре.

<sup>27</sup>Сёрмадовкссоjak сондензэ ёвтазь: «Кенярдкшноk, эйкакштомо ды ачачтница ава! Эрьгелезь сеерек ды кецнек, чачтома пиштемань-майсемань асодыця! Эдь мирдевтементъ ламо эйкакшонзо, мик седе ламо мирде мартонтъ коряс».

<sup>28</sup>Минь, кемиця ялган, – истят эйкакшт, конат чачозь алтамонь коряс, Исак ладсо.

<sup>29</sup>Сестэ ульнесь истя: ломанень вийсэ чачозь эйкакшошь пансесь Пазонь Оймеялтонь вийсэ чачозентъ. Истя моли нейгак.

<sup>30</sup>Мезе эно корты Сёрмадовксошь? «Паник уре аванть цёранзо марто! Уре авань цёрантень мезеяк а ули максозь. Тетянтъ ули-парозо кадови ансяк олячисэ аванть цёранзо туртов».

<sup>31</sup>Секскак, кемиця ялган, вана истя: минь олячисэ авань эйкакшт, аволь уре авань!

## К Галатам 5

### Христианонь олячись

<sup>1</sup>Христос олякстомтымизь минек олячис. Истя, аштеде кеместэ ды илинк тонговто прянк мекев урексчинть ашкос!

<sup>2</sup>Кунсолодоя! Мон, Павол, яволявтан тенк: бути тынь теевтядо эстенк киськепень керявтома, сестэ Христосонь эйстэ кодамояк лезэ тенк а ули.

<sup>3</sup>Мон таго кортан-кармавтан тенк: эрвантень, кие теевти керявтома, эряви топавтомс Коень весе вешематнень.

<sup>4</sup>Тынь, кить терявтыть теевемс Пазонтъ икеле чумовтомокс Коентъ топавтома вельде, керявиде-явиде Христосонь эйстэ ды прыде-туиде Пазонь чанстентъ эйстэ.

<sup>5</sup>Минек жо ули седейнежедьксэнек: Пазось ловсамизь чумовтомокс кемеманок кисэ, ды тень минь кемезь учотано Оймеялтонть вийсэ.

<sup>6</sup>Зярдо ломанесь эри Христос Иисус марто вейсэндязь, сестэ ялатеке: керявтозь сон эли апак керявто. Эрявиксэсь тесэ – ансяк кемемась, конась невтеви вечкемасо.

<sup>7</sup>Тынь уш истя парсте молиде икелев! Кие эно стясь тынк кинть лангс ды теидизь видечинть а кунсолыцякс?

<sup>8</sup>Истямо мельс тынк путыдизь, нама, аволь тынк тердиця Пазось.

<sup>9</sup>Кода кортави: аламошка оргатне сыргавтсызь весе чапаксонть.

<sup>10</sup>Азоронтъ лангс нежедезь мон, ялатеке, кеман тенк: тынь лиякс а карматадо арсеме. А вана сенень, кона тынк кавтолдовты, кие сон илязо уле, максови Пазонтъ пельде чумонь пандома.

<sup>11</sup>Кемиця ялган! Бути мон алкукс икеле ладсо кортавлинь: керявтомась эряви, – сестэ мезень кисэ монь яла пансить? Бути те улевель истя, сестэ Христосонь крёстось уш аволь уле пупордямо кевекс.

<sup>12</sup>Вай, пек вадря улевель, бути сеть, конат тынк кавтолдовтыть-чаракавтыть киськепень керявтоманть коряс, допрок пичкавтовлизь эсь пряст!

<sup>13</sup>Тынк жо, кемиця ялган, Пазось тердидизь олячис. Ансяк те олячинть илинк тее эсенк пежетев обуцянь мельтнень топавтомакс. Мекевланк, вечкезь важодеде вейкенк-вейкенк туртов.

<sup>14</sup>Эдь Коень весе вешематне кирдевить неть валтнэсэ: «Вечкть малавиксэть кода эсь пряст».

<sup>15</sup>Бути истя тынь вейкенк-вейкенк портядо ды сэвтядо, сестэ, ванодо, вейкенк-вейкенк допрок аволиде маштне.

#### **Пазонь Оймеялтошь ды ломантнень пежетев обуцясь**

<sup>16</sup>Мон вана мезде кортан: свал эрядо Пазонь Оймеялтонть ветямонзо-мереманзо коряс, ды сестэ тынь а карматадо топавтомо пежетев обуцянк мелензэ.

<sup>17</sup>Се, мезе мелезэ теемс тынк пежетев обуцянтъ, моли Оймеялтонть каршо. Се жо, мезе мелезэ теемс Оймеялтонть, моли тынк пежетев обуцянтъ каршо. Сынъ свал тюрить карадо-каршо. Тень кувалт тыненк а тееви истя, кода эряволь теемс меленк коряс.

<sup>18</sup>Бути тынк вети Оймеялтошь, сестэ Коенть арась азорксчизэ тынк лангсо.

<sup>19</sup>Ломанень пежетев обуцянтъ тевензэ весень сельме икеле: те – мирде эли ни икеле авидечи, усксевемат-ускурямот, аванькс бажамот, визьксэнь тевть,

<sup>20</sup>аволь алкуксонь пазнэнь сюконямо, мунымо-орожиямо, ятокс улема, сёвномат, вардонь сельмексчи, кеж, кенгелямот-покордамот, пелькстамот-спорямот, явномат,

<sup>21</sup>кежень кирдема, маштомат, симнемат, азаргалемат ды лият нетнень кондят минеть-сюнот. Мон икелеяк тенк кортынъ ды нейгак таго кортан: кияк истя теицятнень эйстэ а совави Пазонтъ Инязорксчинтень.

<sup>22</sup>А вана Оймеялтось чачты-касты вечкема, кеняркс, седейоймамо, цидярдома, парочи, чевте седей, кемевиксчи,

<sup>23</sup>сэтьмечи, прянь кирдема. Нетнень каршо кодамояк кой а моли.

<sup>24</sup>Сеть, конат Христосонь ломанть, крёст лангс вачкодизь эсест пежетев обуцят весе эсь визьксэнь мелест ды бажамост марто.

<sup>25</sup>Бути минь эрятано Оймеялтонть вельде, сестэ миненек эряви теемскак Оймеялтонть ветямонзо коряс.

<sup>26</sup>Секскак а карматано эсь прянь покшкавтнеме, вейке-вейкень ацирьгавтнеме, вейке-вейкень лангс сельмень сьвадстома.

## К Галатам 6

### Лездадо вейкенк-вейкенк туртов

<sup>1</sup>Кемиця ялгат! Бути кияк сови пежетьс, сестэ тынь, кить эрить Оймеялтонть ветямонзо коряс, аравтынк сонзэ виде ки лангс. Ансяк тень эряви теемс чевтьстэ ды сэтьместэ. Теке шкастонть ванодо эсенк мельгаяк, тынськак аволиде маняво пежетьс.

<sup>2</sup>Лездадо вейкенк-вейкенк туртов кандомс эсь канстонзо-ашконзо, истя тынь топавтсынк Христосонь коенть.

<sup>3</sup>Бути ломанесь, кона мезекскак а ашти, сонсь эсь прянзо покшкавтни, сестэ сон ансяк манчи эсь прянзо.

<sup>4</sup>Кадык эрьвась видестэ ваны эсь тевензэ лангс. Сестэ сонензэ шнави прязо эсь тевсэнзэ, лиятнень лангс апак вано.

<sup>5</sup>Эдь эрьванть ули эсь канстозо-сталмозо.

<sup>6</sup>Се, конань тонавтыть Пазонь валонтень, кадык максы весе эсь ули-паронзо эйстэ тонавтыцянзо туртовгак.

<sup>7</sup>Илядо ильведевкшне-манявкшно: Пазонть зярдояк а манясак. Эдь мезе видят, секень нуют.

<sup>8</sup>Се, кие топавты эсензэ пежетев обуцянь мельтнень, моли истямо ломань ёнов, кона види берянь паксяс ды нуи эйстэнзэ кулома-ёмамо. Се жо, кие топавты Оймеялтонь мельтнень, моли истямо ломань ёнов, кона види вадря паксяс ды нуи эйстэнзэ пингеде пингень эрямо.

<sup>9</sup>Секскак паронь теемстэ а макссынек прянок сиземантень. Сестэ, бути а потатано те тевстэнтъ, эсь шкастонзо нутано паро суро.

<sup>10</sup>Истямо ладсо, зярс шкась ён, карматано тееме вадря весенень, ды кемиця ялгатнень туртов седеяк ламо.

#### Меельце вал

<sup>11</sup>Ней мон сёрмадан те пельксэнтъ эсь кедьсэнь. Несынк, кодамо покш буквасо!

<sup>12</sup>А вана сеть, кить кармавтыть тынк тееме киськепень керявтома, бажить савтомс ломантненень. Сынь тень теить ансяк вана мекс: пелить Христосонь крёстонтъ кисэ пансематнеде.

<sup>13</sup>Мик сетнеяк, кить теевтить керявтома, ялатеке а топавтыть Коентъ. Тынк жо сынь арсить керявтомс ды шнамс эсест пряст тынк рунгонтъ эйсэ.

<sup>14</sup>Неезэ Пазось, монь арась мелем шнамс прям мейсэяк, минек Иисус Христос Азоронтъ крёстонтъ башка. Сонзэ вельде монень маряви теке крёст лангс вачкодезь-кулозь те мирэсь-масторось, ды монгак теке вачкодезян-кулозян те мирэнтень-масторонтень.

<sup>15</sup>Эдь Христос Иисус марто вейсэндязь эрямосонтъ ялатеке, керявтозь ломанесь эли апак керявто. Эрявиксэсь ансяк – улемс Пазонь од теевксэкс.

<sup>16</sup>Улезэ седейоймамо ды седеймарямо весенень, кить эрить те ветямовалонтъ коряс, ды Пазонь алкуксонь Израилентень!

<sup>17</sup>Кадык седе товгак кияк а канды-а теи монень сэредькст, секс мекс мон эсь рунгом лангсо Иисус Азоронть кисэ кандтнян тешкстнэнь-аржотнень.

<sup>18</sup>Кемиця ялган, минек Иисус Христос Азоронть чанстесь улезэ тынк марто! Аминь.



## Эфес Ошонь Кемикуронтень Паволонь Сёрмазо

### К Ефесянам 1

<sup>1</sup>Павол, Пазонтъ мелензэ коряс Иисус Христосонь апостолось, кучи шумбракстнемат Пазонь ломантненень, конат эрить Эфессэ ды ванстыть Христос Иисуснэнь кемемачист.

<sup>2</sup>Улезэ тенк чансть ды седейоймамо Пазонтъ, минек Тетянтъ пельде, ды Иисус Христос Азоронтъ пельде!

#### **Иисус Христос вельде казезь Пазонь чанстямотне-баславамотне**

<sup>3</sup>Улезэ шназь-чанстязь минек Иисус Христос Азоронтъ Пазозо ды Тетязо! Сон менель лангсто чанстимизь-баславимизь минек оймеялтонь весе чанстямотнесэ. Тень Сон теизе Христос марто минек вейсэндямонтъ вельде.

<sup>4</sup>Мирэнтъ-масторонтъ теемадо икеле Пазось кочкимизь минек Христос марто вейсэндямонтъ вельде. Истя минь ультяно Сонензэ алтазекс ды асатыкстэмекс-ачумондовицякс Сонзэ икеле вечкемасо.

<sup>5</sup>Сон истя жо, уш икеле, аравтымизь минек улемс Сонзэ эйкакшокс Иисус Христос вельде. Вана истямо Сонзэ паро мелезэ ды арсемазо.

<sup>6</sup>Эрьга, шнасынек Сонзэ ине чанстензэ-седеймарямонзо кисэ, конатнесэ Сон сюпавсто казимизь вечкевикс Цёранзо вельде!

<sup>7</sup>Христосонь верентъ вельде, Сонзэ марто вейсэндямонтъ вельде, минь идезь-рамазь олячис, лиякс, нолдазь пежетенек. Истямо певтеме покш Сонзэ чанстесь!

<sup>8</sup>Те чанстентъ Пазось валызе минек лангс чудикерькссэ эрьва кодамо превейчисэ ды содамочисэ.

<sup>9</sup>Сон панжизе миненек Эсь салавань арсеманзо, конань Сон Эсензэ паро мелентъ коряс уш икелев путызе-ладизе топавтомс Христос вельде.



<sup>10</sup>Те арсемась, конань Пазось карми топавтомо, зярдю сы шкась, вана кодамо: вейсэндямс весеметь, мезе ули моданть лангсо ды менелеть лангсо, ды максомс Христосонь кедь алов.

<sup>11</sup>Христос вельде миненек максозь уцяска улемс Пазонь кочкавт ломанекс. Те уш икелев ульнесь аравтозь миненек Пазонть арсеманзо коряс, кие весеметь топавты Эсензэ мелензэ ды путоманзо коряс.

<sup>12</sup>Секс миненек, кить васенцекс кармасть нежедеме Христос лангс, эряви эрямс Пазонь инексчинть шнамонзо кисэ.

<sup>13</sup>Тыньгак маринк видечинь валонть, Кенярков кулянтъ, конань вельде тынь идезядо. Ней тынь кемтядо Христоснэнь, ды Сонзэ вельде Пазось максызе тыненк Эсь тешксэнзэ, алтазь Иневанькс Оймеялтонть.

<sup>14</sup>Те Оймеялтошь ашти минек туртов алтазь уцясканть кемекстамокс. Оймеялтошь истя жо кемевти: Пазось олякстомтсынзе Эсь ломанензэ, Сонзэ инексчинть шнамонзо кисэ.

#### Паволонь озномазо

<sup>15</sup>Вана секс монгак, зярдю маринь Иисус Азоронтень тынк кемемадонк ды Пазонь весе ломантнень вечкемадонк,

<sup>16</sup>апак лотксе ёвтян сукпря Пазонтень тынк кисэ, мельс ледстян тынк эсень озноматнесэ.

<sup>17</sup>Кадык минек Иисус Христос Азоронтъ Пазось, инексчинь Тетясь, кази тыненк превс совавтыця Оймеялт, конась панжсы тенк, кода содамс-чарькодемс Сонзэ.

<sup>18</sup>Кадык Пазось валдомтсынзе седеенк сельмензэ. Сестэ тынь несынк, кодамо седеень нежедемас Сон тынк тердидизь, кодамо сүпав ды мазый се алтазь уцяскась, конань тынь явсынк Сонзэ ломантнень марто,

<sup>19</sup>ды кодамо аонкставиця покш Сонзэ виесь, кона максозь миненек, Христоснэнь кемицятненень. Вана те – се ине виесь,

<sup>20</sup>конань вельде Пазось кулозьстэ вельмевтизе Христосонь ды озавтызе Сонзэ менель лангсо Эсь вить кедензэ ёнов.

<sup>21</sup>Тосо Сон ашти седеяк сэрейстэ весе прявтнэде ды азоркчитнеде, вийтнеде ды ветицятнеде. Сонзэ лемезяк сэрейде сэрей весе ёвтавиця лемтнеде, аволь ансяк неень шкане, истя жо сыця шкастояк.

<sup>22</sup>Ды Пазось весеменьтэ путызе Христосонь пильге алов ды аравтызе Сонзэ, весемень лангсо Азоронтэ, Кемикуронтэ прякс.

<sup>23</sup>Кемикурось жо – Христосонь рунгозо ды Сонзэ пешксечизэ, кие Эсензэ эйсэ пешти весень ды весеменьтэ.

## К Ефесянам 2

### Куломасто эрямос

<sup>1</sup>Тынь икеле ульниде кулозь эсь зыянов тевенк ды пежетенк кувалт,

<sup>2</sup>конатнень потсо тынь зярдэ-бути эриде те пингентэ берянь койтнень коряс. Сестэ тынь ульниде коштсо улица апаро оймеялтнэнь прявтост кедь ало, се оймеялтонть, кона нейгак теи эсь тевензэ Пазонь акунсолыцятнень эйсэ.

<sup>3</sup>Сынст ютксо весе миньгак истя жо эринек колазь обуцянок мельтнень коряс, топавтынек эсенек рунгонь ды превень бажамотнень. Секс миньгак те обуцянок кисэ, весе лиятнень ладсо, ульнинек Пазонь кежентэ ало.

<sup>4</sup>А вана Пазонтэ седеймарямозо сюпав ды вечкемазо, конань Сон панжизе-путызе миненек, ине!

<sup>5</sup>Секс Сон теимизь минек, зыянов тевенек кувалт кулозтнень, эрицякс Христос марто вейсэ. Сонзэ чанстензэ коряс тыньгак идезтядо!

<sup>6</sup>Христос Иисус марто вейсэ Сон вельмевтимизь минек ды озавтымизь минеккак Сонзэ марто вейсэ менель лангс.

<sup>7</sup>Истя Сон невтизе весе сыця пингень ломантненень Эсь чанстензэ аонкставиця сюпавчинть се ине парочисэнтъ, конань Сон максызе миненек Христос Иисус вельде.

<sup>8</sup>Сонзэ чанстензэ коряс, кемеманк вельде, тынь идезтядо! Тень теинк аволь тынь, те – Пазонь казне!

<sup>9</sup>Те идемась аволь тевень кисэ, секскак кияк теньсэ илязо шна эсь прянзо!

<sup>10</sup>Эдь миньгак Пазонь теевкст. Сон теимизь минек Христос Иисус марто вейсэндямонтъ вельде паро тевс, конатненень Сон уш икеле анокстынзе миненек топавтомс.

### **Христос сюлми-вейсэндиди весе кемицятненень**

<sup>11</sup>Тынь чачомань коряс лия раськень ломанть. Тынк ловильть “апак керявтокс” сетне, конатненень мерить “керявтозь” рунгосост кедьсэ теезь киськепень керявтомань коряс. Секс кирдеде мельсэнк, кодамокс тынь ульниде икеле.

<sup>12</sup>Се шкастонть тынь ульниде Христостомо, явозелиде Израилень раськентъ эйстэ. Вейсэнълувтне, конатненень юрс путозь Пазонь алтамотне, тынк лангс а сравтневильть. Тынь эриде те масторлангсонть седейнежедькстэме ды Пазтомо.

<sup>13</sup>А вана ней, Христос Иисус марто вейсэндямонтъ кувалма, тынк, конат зярдо-бути ульниде Пазонтъ эйстэ васоло, Христос Эсь верензэ вельде малавгавтыдизь.

<sup>14</sup>Эдь те Христос – минек ладицянок. Сон сюлминзе еврейтненень ды лия раськенсетненень вейке раськес.

<sup>15</sup>Эсь куломасонзо Сон калавтызе минек эйсэ явиця пирявксонтъ, лиякс, ятксчинть. Сон ёртызе Коентъ весе кармавтовоксонзо ды аравтовксонзо марто, ды Эсензэ марто вейсэндямонтъ вельде кавтосто тейсь вейке од ломань. Истямо ладсо Сон сюлмизе-кемекстызе ладямонтъ.

<sup>16</sup>Крёст лангсо куломанзо вельде Сон ёмавтызе яткчинть. Истя Сон ладинзе сынст кавонест Пазонть марто ды эсь ютковаст ды теинзе вейке рунгокс.

<sup>17</sup>Христос сась ды пачтась Кенярков куля ладямодонть тыненккак, конат эрясть Пазонть эйстэ васоло, ды сетнененьгак, конат маласонзольть.

<sup>18</sup>Вана истя Христос весенек туртов, еврейтнень ды лия раськетнень туртов, панжизе кинть Тетянтень вейке теке жо Оймеялтонть вельде.

<sup>19</sup>Лисни: тынь ультядо уш аволь лия масторонь ломанть ды аволь ве ёндонь савкст. Ней тынь совавтозядо Пазонь раськенть юткс ды ультядо Пазонь кудораськенть ломанекс.

<sup>20</sup>Тынь путозядо апостолтнэнь ды пазмарицятнень кудюоронть лангсо, косо ужонь-уголонь кирдиця юр кевекс ашти Сонсь Иисус Христос.

<sup>21</sup>Сон кирди-сюлми весе пелькстнэнь кудонть эйсэ, конась касы-кепети ды тееви Азоронтень алтазь кудокс.

<sup>22</sup>Сонзэ марто вейсэндямонть вельде тыньгак лиятнень марто кастадо-кепедевтядо истямо кудокс, косо Пазось карми эрямо Иневанькс Оймеялтонзо вельде.

### **К Ефесянам 3**

#### **Лия раськетнень ютксо Паволонь важодемазо**

<sup>1</sup>Ды секскак мон, Павол, – Иисус Христосонь кисэ тюрьмасо аштицясь, тыненк, лия раськенсетненень, паронь теемга.

<sup>2</sup>Тынь, паряк, мариде седе, кодамо покш чансть макссь монень Пазось тыненк паронь кандомга: те топавтомс Сонзэ мелензэ-арсеманзо.

<sup>3</sup>Монень чарть-неявкс вельде ульнесь панжозь те салавачись, конадо мон нурькинетэ тесэ сёрмадокшнынъ икеле.

<sup>4</sup>Истя, тень ловномсто тынськак несынк, кода домкасто мон чарькодъса Христосонь салавачинть.

<sup>5</sup>Седикелень ломантненень апаколь максо содамс те салавачинть, а вана ней Пазонь Оймайтось сонзэ панжизе Пазонь кочкавт апостолтнэненень ды пазмарицятненень.

<sup>6</sup>Те салавачись вана мейсэ: ней Кенярков кулянтъ вельде лия раськетнененьгак, кода еврейтненень, максовить Пазонь весе чанстямотне-баславамотне. Истя сынъгак теевить вейкине рунгонь пельксэкс, ды сынст лангаяк сравтневи Пазонь алтамось Христос Иисус вельде.

<sup>7</sup>Те Кенярков кулянтъ важокс мон теевинь Пазонтъ чанстенъ казнензэ кувалма, конань Сон монень максызе монь эйсэ важодиця виензэ вельде.

<sup>8</sup>Монень, Пазонь весе ломантненень ютксто допрок мезекскак а аштицянтенъ, ульнесь максозь те чанстесь – пачтямс лия раськетненень Кенярков кулянтъ Христосонь аёвтавишка сюпавчидентъ.

<sup>9</sup>Монень истя жо эряви весенень невтемс, кода карми топавтовомо те салавань арсемась, конась кезэренъ пингетненъ перть кекшезель Пазонтъ эйсэ, конась весементъ теизе Иисус Христос вельде.

<sup>10</sup>Истямо ладсо, Пазонтъ превейчись весе ламо ёнксонзо марто ней Кемикуронтъ вельде панжови менель лангонь прявтнэненъ ды азоркситненень.

<sup>11</sup>Пазось тень теизе пингетнеде икелень арсеманзо-мелензэ коряс, конань Сон топавтызе минек Христос Иисус Азоронтъ вельде.

<sup>12</sup>Христос марто вейсэндязь ды Сонзэ эйс кемезь, миненек панжовсь кись Пазонтень: секс минь апак пеле ды седейнежедькс марто пшкадтяно Тензэ.

<sup>13</sup>Тень кувалт мон энялдан икеленк: кадык тынк кисэ монь пиштематне-майсематне а правтадызь пильге лангсто, эдь неть пиштематне ветить тынк ине парос.

#### **Ознома Христосонь вечкеманзо чарькодемадо**

<sup>14</sup>Ды секскак мон пульзян минек Иисус Христос Азоронть Тетянзо икелев,

<sup>15</sup>кона ашти алкуксонь тетякс, эрямонь лисьмапрыхс весе раськетненень-буетненень менель лангсоjak ды мода лангсоjak.

<sup>16</sup>Вешан пельдензэ, кадык Сон Эсь Оймайлтсонзо, сюпав инексчинзэ коряс, кемекстасы-виевгавтсы тынк оймаёжонк.

<sup>17</sup>Кадык Христос свал эри тынк седейсэ кемеманк вельде,

<sup>18</sup>ды кадык вечкемась ули эрямонк корёнокс ды юрокс. Сестэ тынк карми улеме сатышка виенк, Пазонь весе лия ломантненень марто вейсэ, превс саемс Христосонь вечкеманть кувалмонзо ды келензэ, сэрэнзэ ды домкачинзэ,

<sup>19</sup>ды чарькодемс те вечкеманть, кона пек седе сэрей весе минек чарькодемадонть. Сестэ Пазось пештясы тынк эрямонк весе Эсь пешксечисэнзэ.

<sup>20</sup>Пазонтень, минек эйсэ важодиця виензэ вельде, тееви ламодояк ламо весе сень коряс, мезе минь вештяно эли мик арсетяно!

<sup>21</sup>Улезэ Тензэ шнамо раськеде раськес ды пингеде пингес Кемикуронть вельде, Христос Иисус марто вейсэндямонок вельде! Аминь.

## **К Ефесянам 4**

### **Христосонь Кемикуронть вейсэнксчизэ**

<sup>1</sup>Тень кувалт мон, кона пекстазь тюрьмасо Азоронть кисэ, энялдан тенк: эрядо се сэрей тердеманть алкуксонь питнензэ содазь, конасонть тынк тердидизь Пазось.

- <sup>2</sup>Свал уледе сэтъметъ, чевте седейть ды цидярдыцят. Вечкезь кирдеде вейкенк-вейкенк коронзо.
- <sup>3</sup>Весе вийсэнк бажадо ванстомс Оймеялтонъ максовт вейсэнъксчинть ды кемекстадо сонзэ ладямонъ сјулмавкссо.
- <sup>4</sup>Ули ансяк вейкине Рунго ды вейкине Оймеялт, истя жо вейкине седеень нежедемаськак, конанень тынк тердидизь Пазось.
- <sup>5</sup>Азорось вейкине, кемемась вейкине, нававтораськак вейкине.
- <sup>6</sup>Ули ансяк вейкине Паз, весень Тетя, кона весень лангсо покш, важоди весень вельде ды весень эйсэ.
- <sup>7</sup>Весенень жо миненек, эрвантень башка, максозь чанстень казне, конанъ Христос сјупавсто кази Эсь онксонзо коряс.
- <sup>8</sup>Секскак Пазонъ Сёрмадовкссонть ёвтазь: «Сон кепедевсь верев, ветинзе мартонзо полонсотнень, Сон макссь казнеть ломантненень».
- <sup>9</sup>“Кепедевсь” валось тесэ невти вана мезе: Сон икеле валгонеськак мода потс, тоначис.
- <sup>10</sup>Лисни: алов валгицясь Секе, кона кепедевсь весе менельтнедеяк верев, весементъ Эсензэ эйсэ пештямга.
- <sup>11</sup>Те Христос казизе-аравтызе, кинень улемс апостолокс, кинень пазмарицякс, кинень Кенярков кулянъ пачтицякс, кинень кемикуронъ ветиякс-ваныцякс ды тонавтыцякс.
- <sup>12</sup>Тень Сон теизе вана мекс: анокстамс Пазонъ весе ломантнень важдема теветень, Христосонъ рунгонть эли Кемикуронтъ кастомантень-кемекстамонтень.
- <sup>13</sup>Истя минь весе пачкодтяно вейсэнъксчис кемемасо ды Пазонъ Цёранть чарькодемасо. Сестэ минь теевтяно вийс совазекс, Христосонъ кондямо ломанекс, конатнень эрямост карми улеме пряс пештязь Сонзэ эйсэ.

<sup>14</sup>Сестэ минь уш а карматано уleme пиже эйкакшокс, конатнень ведьвелявкс ладсо тарги-уски ды варма ладсо канды эсь мельганзо эрва кодамо тонавтома, ды конатнень ёжов ломантне ёроковсто манчить-ильведстить.

<sup>15</sup>Мекевланк, карматано эрямо видечинь ды вечкемань коряс. Сестэ минь карматано весемесэ яла седе пек вейсэндявомо-совавомо Христоснень. Сон Пря ды

<sup>16</sup>вейсэнди весе рунгонть, кона эзнензэ-санонзо вельде кеместэ сьулмазь вейс. Зярдэ эрва пельксэсь топавты эсензэ теვენзэ, сестэ весе рунгось касы ды кепети-кемексты вечкеманть вельде.

### **Христос марто од эрямо**

<sup>17</sup>Истямо ладсо, вана мезть мон кортан, вана мезе лангсо Азоронть лемсэ аштян-кирдеван: уш илядо ветя прянк Пазонь а содыцятнень ладсо, конатнень превест-арсемаст чавот-стякот.

<sup>18</sup>Сынст превест чополгавтозь, арась мелест содамс Пазонть. Сынь допрок кевензавтызь седеест, секскак васолот Пазонь максовт эрямодонть.

<sup>19</sup>Сынст оймест теевсть ёжовтомокс, сынь каизь прят рунгонь визькс мельтнень топавтомас ды кодаяк а пештевить эрва кодамо аваньксэнтъ теемадо.

<sup>20</sup>А вана тыненк максозель допрок аволь тень кондямо тонавтома Христосто.

<sup>21</sup>Видечись – Сонзэ эйсэ. Тынь, нама, марсиде Сондензэ ды тынк тонавтыдизь, кода Сонзэ ломанть.

<sup>22</sup>Тынк тонавтсть ёртомс икелень эрямо лувонть, конасонть эрясь тынк эйсэ ташто ломанесь, кона колызе-ёмавтызе эсь прянзо манчиця визькс мелень бажамотнесэ.

<sup>23</sup>Одкстомодо эсь мельсэнк-превсэнк ды оймесэнк.



<sup>24</sup>Оршаводо-вельтяводо од эрямонь лувсо, теке од ломаньсэ, кона теезь Пазонть кондямокс ды кона эри алкуксонь видечисэ ды Пазонть туртов алтазь эрямосо.

<sup>25</sup>Секскак, лоткадо кенгелемадо ды эрьвась кортадо видечи вейкенк-вейкенк туртов, эдь весе минь – вейкине рунгонь пелькст.

<sup>26</sup>Натой, кежиявтомстояк илинк совавтне прянк пежетьс. Кадык тынк кежтне мадить-оймить чивалгомадо икеле.

<sup>27</sup>Илядо кадо варине Идемевсентень!

<sup>28</sup>Кие икеле салась, се кадык лотки саламодо ды лезэвстэ важдезэ: кадык эсь кедьсэнзэ теи тевензэ, ды улезэ сонзэ мезе максомс сененьгак, кие арасьчисэ.

<sup>29</sup>Илязо лисе тынк кургосто кодаможк зыянов вал, ансяк вадря валт, конат лезэвть кемемань касомантень ды кандыть паро кунсолыцятненень.

<sup>30</sup>Илядо ризнэвте Пазонь Иневанькс Оймеялтонть, конаньсэ тынь тешкстазтядо олячис идема-менстема чинтень.

<sup>31</sup>Допрок кадынк эрьва кодамо ацирьгалеманть, кеженть, абунгалеманть, пижнеманть ды сядломанть-покордамонтень лия зыянонтень марто вейсэ.

<sup>32</sup>Уледе вейкенк-вейкенк туртов вадрякс, седеймарицякс, простнеде-нолдтнеде вейке вейкенень чумонк, кода Пазоськак нолдынзе тынк пежетенк Христосонь кувалт.

## **К Ефесянам 5**

<sup>1</sup>Истя, эсь эрямосонк бажадо молемс Пазонть ёнов, эдь тынь Сонзэ вечкема эйкакшонзо.

<sup>2</sup>Эрядо вечкемасо истя, кода Христос вечксамизь минек ды максызе кисэнек Эсь прянзо, Пазонтень казнекс ды аноксокс, кона тантейстэ качадыця ялткенень кондямо ды Тензэ мельстуиця.

<sup>3</sup>Тынк эйстэ иляст уле кортамот истят тевтнеде кода ускурямо, эрва кодамо аванксчи ды вардонь сельмечи. Сыненст арась тарка Пазонь ломантнень ютксо.

<sup>4</sup>Истя жо иляст уле ютксонк амазый визькс кортамот, чаво валт, аванкс пеедькшнемат. Те тыненк а лади! Мекевланк, ёвтадо сюкпрат Пазонтень.

<sup>5</sup>Содадо: вейкеяк ускурицянтъ, аванксчисэ эрицянтъ ды эрва мезе мельга правгыцянтъ, кона мейсэяк а явови аволь алкуксонь пазнэнь сюконицядо, арась тарказо-таликазо Христосонь ды Пазонтъ Инязорксчисэнтъ.

### **Эрядо валдосо!**

<sup>6</sup>Киненьгак илинк максо прянк манямс чаво валсо! Эдь весе тень кисэ Пазонь кежесь стардсынзе сетнень, конат а кунсолыть Сонзэ.

<sup>7</sup>Илязо уле тынк мезенккак вейсэнь сынст марто!

<sup>8</sup>Зярд-бути тынь ульниде чоподасо, ней жо, зярд тынь Азоронтъ марто, валдосотадо. Эрядо истя, кода эрви эрямс валдонсетненень.

<sup>9</sup>Оймеялтось чачты-канды эрва кодамо вадряксчи, видечи ды алкуксчи.

<sup>10</sup>Бажадо содамс-чарькодемс, мезе тукшны Пазонтъ мельс.

<sup>11</sup>Илядо совсе чоподань тевс, конат а чачтыть-кандыть кодамояк лезэ. Мекевланк, истят тевтнень ливтеде лангс.

<sup>12</sup>Тевтнеде, конатнень сынъ тейнить салава, натой, кортамскак визькс.

<sup>13</sup>Зярд валдось ливтьсынзе лангс весе тевтнень, сестэ панжови сынст алкуксонь смустест. А вана весе, кона ливтеви лангс, се уш ули валдосо.

<sup>14</sup>Секскак кортави: «Сыргозть, улыця! Вельмек кулозьстэ – ды Христос валдомтанзат тонь!»

<sup>15</sup>Истямо ладсо, ванодо штистэ эсь прянк ветямонзо мельга! Эрядо превей ломань ладсо, аволь превтеме ломанькс.

<sup>16</sup>Бажадо парсте нолдамс тевс эрьва ён шканть, секс мекс ней шкась зыянов.

<sup>17</sup>Илядо уле лангапревекс, маштодо чарькодеме, мейсэ Азоронть мелезэ.

<sup>18</sup>Ды пек илядо симе винадо, сонзэ эйстэ лиснить ансяк визьксэнь тевть-мельть. Мекевланк, пештяводо Пазонь Оймеялтсо!

<sup>19</sup>Вейкенк-вейкенк марто кортнеде псалмань, шнамо моронь ды Оймеялтонь максовт моронь валсо. Моравтодо ды шнадо Азоронть весе седейсэнк.

<sup>20</sup>Свал ды весементь кисэ ёвтадо сукпря Тетя Пазонтень, минек Иисус Христос Азоронть кисэ.

#### **Нинть мирде марто эрямодост**

<sup>21</sup>Максодо прянк вейкенк-вейкенк кедь алов – тень тееде Пазонь мелензэ ванозь.

<sup>22</sup>Тынь, нитне, максынк прянк мирденк кедь алов, кода Азоронть кедь алов,

<sup>23</sup>секс мекс мирдесь – нинть прязо, кода Христоскак Кемикуронть прязо. Сон Сонсь Эсь Кемикуронзо, лиякс рунгонзо, Идиця.

<sup>24</sup>Ды кода Кемикурось максы прязо Христосонь кедь алов, истя жо нитнененьгак весемесэ эряви максомс пряст эсь мирдест кедь алов.

<sup>25</sup>Мирдеть, вечкеде нинк истя жо, кода Христоскак вечксы Кемикуронть ды максызе сонзэ кисэ Эсь прязо,

<sup>26</sup>Пазонтень Кемикуронть алтамга. Иисус ваньскавтызе сонзэ ведьсэ шлязь, вал вельде, сень кисэ:

<sup>27</sup>Стявтомс сонзэ весе мазычисэнзэ Эсь икелензэ. Илязо уле Кемикуронтъ эйсэ кодамояк петнявкске, сормсевкске эли лия кодамояк колавкс, лиякс меремс, улезэ сон Пазонтень алтазь ды асатыкстэме.

<sup>28</sup>Истямо ладсо, мирдентеньгак эряви вечкемс эсь нинзэ, кода эсензэ рунгонзо. Кие вечксы нинзэ, се вечксы эсь прязояк.

<sup>29</sup>Зярдояк арасель ломань, кона аволизе вечке эсь рунгонзо. Эрьвась анды-симди сонзэ ды мелявты кисэнзэ, кода Азороськак мелявты Эсь Кемикуронзо кисэ,

<sup>30</sup>Эсь рунгонзо кисэ, конань пельксэкс минь ультянояк, Сонзэ рунгонзо ды ловажанзо пелькст.

<sup>31</sup>Кода сёрмадозь: «Секскак цёрась кадсынзе тетянзо-аванзо, сюлмави нинзэ марто, ды сынъ кавонест теевить вейке рунгокс».

<sup>32</sup>Тесэ кекшезь ине салавачись: мон ней кортан Христосонь ды Кемикуронтъ ютксо сюлмавомадонть.

<sup>33</sup>Нетъ валтнэ истя жо кандовить тыненккак весенень: эрьва мирдентень эряви вечкемс эсь нинзэ, кода эсь прязо. Ды нинтеньгак эряви ваномс мирдензэ меленть.

## К Ефесянам 6

### Эйкакшт ды тетят-ават

<sup>1</sup>Эйкакшт, кунсолодо тетянк-аванк, кода Азоронтъ мельга молицят, эдь те – виде.

<sup>2</sup>«Ловт ломанькс тетятъ-авать», – вана те васенце истямо кармавтовоксось, конань мельга моли алтамо:

<sup>3</sup>«Сестэ карми уleme тонеть паро, ды кармат кувать эрямо моданть лангсо».

<sup>4</sup>Тыньгак, тетят, илядо ацирьгавтне, илядо савтне кежест эсь эйкакшонк! Кастодо, трядо ды превс путодо сынст Азоронтъ мелензэ коряс.

### Уреть ды азорот

<sup>5</sup>Уреть, ванькс седейсэ, мелень ванозь ды талнозь кунсолодо масторлангонь азоронк, кода Христосонь.

<sup>6</sup>Истя тееде аволь невтемань кисэ ды аволь ансяк сельме икельга ломаннень савтомань кисэ. А вана кода Христосонь уреть весе седейсэнк топавтодо Пазонь меленть.

<sup>7</sup>Важодеде покш мельсэ эсенк азоронк туртов, кода тынь важодевлиде Паз Азоронтень, аволь ломаннень.

<sup>8</sup>Содадо: Азорось казтядызь эрва паро тевенть кисэ, кие сонзэ аволизе тее, уре эли олячисэ ломань.

<sup>9</sup>Тыньгак, азорот, эсь уренк марто тейнеде истя жо парсте, илядо сынст тандавтне. Кирдеде мельсэнк: менель лангсо тынккак ды сынсткак вейкине Азоронк, конась весень лови вейкетькс.

### Тюреде зыянонь каршо!

<sup>10</sup>Ды меельцекс, кемиця ялган: кемекстадо прянк Азоронть марто вейсэндямосонть, Сонзэ вийсэнть, альмесэнтъ.

<sup>11</sup>Оршынк ды сайнк кедезэнк Пазонь казевть тюрема весе кедьёнкстнэнь, сестэ тынь кеместэ карматадо аштеме Идемевсентъ ёжов арсематнень каршо.

<sup>12</sup>Эдь минь тюртяно аволь ломантнень каршо, мекевланк, оймеялтонь апаро прявтнэнь ды азорксчитнень каршо, те чопода пингень ветицятнень ды менелень зыянов вийтнень каршо.

<sup>13</sup>Секскак сайнк Пазонь казевть тюрема весе кедьёнкстнэнь вана мекс: сатозо виенк раужо чистэнтъ аштемс сынст каршо, педэ пес ютамс тюреманть ды цидярдомс.

<sup>14</sup>Вана истя, аштеде апак шата, карксаводо видечисэ, теке каркссо, ды оршаводо чумовтомочисэ, теке кшнинь панарсо.

<sup>15</sup>Кадык тынк карсемапелекс карми улеме анокчинк пачтямс ладямодо Кенярксов кулянтъ.

<sup>16</sup>Свал кирдеде кемемантъ, теке ванстома лазонтъ, конань эйсэ тынь мадстьсынк Апаронтъ весе палыця налтонзо.

<sup>17</sup>Истя жо сайнк идемантъ, теке шлёмонтъ, ды Оймеялтонъ максовт торонтъ, лиякс, Пазонъ Валонтъ.

<sup>18</sup>Тень тееде эрва кодамо озномасо ды энялдомасо. Свал ознодо, кода тынк терди-кармавты Оймеялтошь. Секскак уледе эрзат ды апак лотксе энялдодо Пазонъ весе ломантнень кисэ.

<sup>19</sup>Монь коряскак ознодо: кадык Пазось максы монень эрвикс валт эрваксть, зярдо мон ушодан кортамо. Ознодо: кадык мон апак пеле панжовлия Кенярксов кулянтъ салавачинзэ.

<sup>20</sup>Те Кулянтъ кисэ мон улян Христосонь кучовтокс, натой, кшнинь рисьмесэ кершазьгак. Ознодо: кадык мон ёвтневлия сонзэ апак пеле, кода монень эрвияк.

### Сюкпрянь ёвтамот

<sup>21</sup>Ули меленк содамс, кода мон эрян ды кода марян эсь прям? Весе тень ёвтнесы тенк Тикик. Сон монь вечкевикс кемиця ялгам ды Азоронтень кемевикс важодиця.

<sup>22</sup>Мон кучса сонзэ тыненк самай те тевентъ марто: ёвтнемс минек тевтнеде ды оймавтомс-кемекстамс седеенк.

<sup>23</sup>Тетя Пазось ды Иисус Христос Азорось максост тыненк, кемиця ялгат, седейоймамо ды вечкема кемема марто!

<sup>24</sup>Улезэ чанстесь весеме марто, кить свал палыця вечкемасо вечксызь минек Иисус Христос Азоронтъ! Аминь.

## Филиппа Ошонь Кемикуронтень Паволонь Сёрмазо

### К Филиппийцам 1

<sup>1</sup>Павол ды Тимофей, Христос Иисусонь вожотне, кучить шумбракстнемат Пазонь весе ломантненень, конат вейсэндязь Христос Иисус марто ды эрять Филиппасо, кемикуронь ветицятненень ды кемикуронь лездыцятненень.

<sup>2</sup>Улезэ тенк чансть ды седейоймамо Пазонтъ, минек Тетянтъ, ды Иисус Христос Азоронтъ пельде.

#### Паволонь озномазо

<sup>3</sup>Мон ёвтан тынк кисэ сюкпря монь Пазонтень эрваксть, зярд ледстнян эйсэнк.

<sup>4</sup>Ды свал, зярд мон ознан весень тынк кисэ, мон ознан кеняркс марто,

<sup>5</sup>секс мекс тынь кармиде лездемо монень пачтямс Кенярксов кулянтъ васенце чистэнтъ саезь ды течинь чис.

<sup>6</sup>Монь ули покш кемемачим: Пазось, кие ушодызе тыньсэнк Эсь паро теვენзэ, прядсы сонзэ Христос Иисусонь само чинтень.

<sup>7</sup>Монь ули паро тувталом истя арсемс весе тынк эйтэ, секс мекс тынь свал аштетядо монь седейсэ! Тынь ульниде мартон монь чанстев важдемасонтъ, конась тень максозь Пазонтъ пельде, – аволь ансяк ней, зярд мон пекстязян тюрьмас, сестэяк, зярд мон кеместэ ванстынь ды апак кавтолдо невтинь Кенярксов кулянтъ видечинзэ.

<sup>8</sup>Пазось тень неи-соды, кодамо монь покш мелем неемс тынк ды кодамо пси вечкемасо Иисус Христос ладсо палы монь седеем тыненк.

<sup>9</sup>Мон ознан вана мезень кисэ: кадык тынк вечкемась касы яла седе покшто ды покшто, кадык максы тенк алкуксонь содамочить ды эрва мезде домка чарькодемат,

<sup>10</sup>ды истя жо колчи кочксемс сень, мезесь алкукс сехте вадря. Ды сестэ тынь Христосонь само чинтень карматадо уleme ванькст ды ачумондовицят

<sup>11</sup>ды кандтадо ламо паро нуевкс-раштавкс, конась тееви Иисус Христосонь вийсэ Пазонтъ шнамос ды инексчис.

### **Монь эрямонтъ смустезэ – те Христос**

<sup>12</sup>Кемиця ялган, монь мелем, содавлиде тынь вана мезде: весе, мезе монь марто лиссь, натой лездась Кенярксов кулянь эрва ков пачкодемантень.

<sup>13</sup>Истямо ладсо, Римень инязоронь кудонь ванстыцятне ды истя жо весе лиятнеяк кармасть парсте содамо: мон пекстазян Христоснэнь важдеманть кисэ.

<sup>14</sup>Ды те монь пекстамось кемекстынзе пек ламот кемиця ялгатнень Азоронтъ лангс седейнежедьксэст ды сыремтинзе сынст седеяк смелстэ ды апак пеле пачтямс Пазонь валонтъ.

<sup>15</sup>Нама, конат-конат пачтить Христосто кулянтъ сельмень сявадомаст кувалт ды пелькстамонь мелест кувалт, а вана лиятне теить тень седейшкава.

<sup>16</sup>Васенцетне пачтить Христосто кулянтъ эсест лезэс, аволь седейшкава, ды теньсэ сынъ арсить седеяк стакалгавтомс монь, пекстазентъ, мелявксонзо.

<sup>17</sup>Омбонстнэ истя теить вечкеманть кувалт. Сынъ содыть: Пазось монь путымим Кенярксов кулянтъ ванстома.

<sup>18</sup>Монень те ялатеке! Кода авольть пачтя Христосто кулянтъ, кекшезь арсема марто эли ванькс седейстэ, мон ялатеке кенярдан тенень! Ды седе товгак карман кенярдомо!

<sup>19</sup>Мон содан: тынк озноманк коряс ды Иисус Христосонь Оймоялтонть лездамонзо вельде монь нолдасамизь оляс.



<sup>20</sup>Мон пек учан ды кеман: монень а сави якстерьгалемс визьксэнтэ эйтэ. Мекевланк, мон нейгак, кода свал, карман пачтямо Кулянтэ смелстэ ды Христосонь шнамо-инелгавтнеме весемесэ, эрямосон эли куломасон.

<sup>21</sup>Эдь монень эрямость – те Христос, ды куломаськак – изнямо.

<sup>22</sup>А бути эрямо шкастон ули вием седе тов лезэвстэ важомемс, сестэ а содан, мезе тень кочкамс.

<sup>23</sup>Сезневан кавто ёнов: ули мелем туемс те масторлангстонть ды улемс Христос марто, эдь те улевель пек седе паро!

<sup>24</sup>А вана кадовомс монень эрямо – те седе эрявикс тыненк.

<sup>25</sup>Мон теньсэ пек кемекставинь. Секскак ней содан: кадован эрямо, карман уleme весеменк марто ды лездан тенк кастомс-домкалгавтомс Пазонтень кемеманк ды се кенярксонтэ, конань сон канды.

<sup>26</sup>Ды зярдо мон таго сан тенк, сестэ тынк, Христос Иисус марто вейсэндязь эрямосонк, кармить уleme седеяк ламо тувталонк каштангалемс монь эйсэ.

<sup>27</sup>Уледе эсь эрямо лувсонк Христосто Кенярксов кулянтэ сэрейчинзэ аштицякс! Сень лангс апак вано, саван мон тенк эли а саван, ялатеке мон неевлинь-марявлинь ды содавлинэ эйтэнк: тынь аштетядо лавтовдо лавтовс ды весе вейсэ тюртядо-важодтядо се кемемантэ кисэ, конань юрокс ашти Кенярксов кулясь.

<sup>28</sup>Ды киненьгак каршо молицятнень эйтэ илинк максо эсь прянк тандавтнемс. Истямо тынк смелчись ули сынест ёмамонь тешксэкс, тыненк жо – идемань тешксэкс, кона сы Пазонтэ пельде.

<sup>29</sup>Эдь тыненк максозь чанстэ аволь ансяк кемемс Христоснэнь, а вана натой кисэнзэ пиштемскак.

<sup>30</sup>Эдь истя тыньгак ветятадо секе жо важоманть-тюреманть, конань зярдо-бути мон ветинь тынк сельменк икеле. Кода тынь марятадо, мон ветян сонзэ нейгак.

## К Филиппийцам 2

### Уледе Христосонь кондямокс!

<sup>1</sup>Бути Христос марто вейсэндямось максы тенк вий, бути Сонзэ вечкемась кенярдовты-оймавты тынк, бути тынк ули вейсэнгалема Пазонь Оймеялтонть марто, бути тынь путтадо седеймарямо ды мелявкс вейкенк-вейкенк туртов,

<sup>2</sup>сестэ монь кенярксом пештинк пряс сеньсэ: улезэ ютксонк вейке мель. Вейкетьстэ вечкеде вейкенк-вейкенк эйсэ, вейсэндядо оймесэнк-седейсэнк, ды бажамонк-арсеманк улест вейкеть.

<sup>3</sup>Мезеяк илядо тейне эсь меленк витеманзо кисэ ды прянк невтеманзо кисэ. Мекевланк, апак покшкавтне ловодо лиянтэ эстеденк вадрякс.

<sup>4</sup>Кадык эрьвась эйстэнк мелявты аволь ансяк эсь прядонзо, истя жо лиятнедеяк.

<sup>5</sup>Кадык тынк меленк-арсеманк вейкенк-вейкенк туртов кармить улеме Христос Иисусонь кондят:

<sup>6</sup> Сонзэ свал ульнесь Пазонь чачозо, ансяк Сон вийсэ эзь кирде Пазонть марто Эсензэ вейкетьксчинть.

<sup>7</sup>Мекевланк, Сон Эсь мелензэ коряс кадызе весементь, теевсь урень кондямокс ды чачсь ломанекс. Сон весемесэ ульнесь ломань ёнов молицьякс.

<sup>8</sup>Сон вишкиньгавтызе-алкиньгавтызе Эсь прянзо ды ульнесь кунсолыцякс куломазонзо – натой крёст лангсо куломазонзо.

<sup>9</sup>Тень кисэ Пазось кепедизе Сонзэ весемеде сзрейстэ ды казсь Тензэ лем, конась весе лемтнеде ине.

<sup>10</sup>Секс Иисусонь лементь инексчинзэ икелев весе прыть кумажа лангс менель лангсоjak, масторлангсоjak ды мода потсоjak,

<sup>11</sup>ды эрва келесь ёвты: Иисус Христос – Азоро. Те весе – Тетя Пазонтъ шнамос.

### **Уледе весенень сияждыця тештекс!**

<sup>12</sup>Истя, монь вечкевиксэнъ, тынь свал ульниде монь кунсолыцят, зярдо ульнинь мартонк. А вана ней, зярдо мон мартонк арасян, уледе седеяк кунсолыцякс! Пазонь мельде пелезь ды талнозь тееде весементь эсенк идеманк кисэ,

<sup>13</sup>секс мекс тынк эйсэ важоди Сонсь Пазось, кона Эсь паро арсеманзо коряс сыргозти тынк мельтнень ды тевтнень.

<sup>14</sup>Весементь тееде эсь юткованк апак пелькста ды апак кавтолдо.

<sup>15</sup>Сестэ тынь ульядо ачумондовицякс ды ваньксэкс, Пазонь асатыкстэме эйкакшокс, конат эрить неень пингень колазь ды пежетев ломантнень ютксо. Сияждодо сынст ютксо истя, кода менель лангсо тештетне!

<sup>16</sup>Истямо ладсо, кандодо эрямонь максыця Кулянтъ! Ды сестэ, Христосонь само чистэнтъ, мон шнаса прям тынк эйсэ: аволь стяко мон чийя монень онкстазь кинтъ, аволь стяко маштыя вием те важдемасонтъ!

<sup>17</sup>А вана бути монень сави максомс мик эрямомгак, кода топавтома се аноксонть ды важдеманть, конань Пазонтень теи тынк кемемась, сестэяк мон карман кенярдомо ды карман кенярдомо тынк марто вейсэ!

<sup>18</sup>Кенярдкшнодо тыньгак, кенярдкшнодо монь марто вейсэ!

### **Тимофейде ды Эпафродиттэ**

<sup>19</sup>Монь ули седейнежедьксэм: бути тень мери Иисус Азорось, паряк, курок кучса тенк Тимофеень. Сестэ моньгак ойми-кенярдъ седеем, зярдо марян, кода молить тынк тевенк.

<sup>20</sup>Эдь монь арась лия, Тимофеень кондямо, ве мельсэ арсиця ломанем, кона седейшкава мелявтоволь тынк кисэ.

<sup>21</sup>Весе лиятне вешнить ансяк эсест туртов, ды аволь сень, кода важдемс Иисус Христоснэнь.

<sup>22</sup>Тынь тынсь содатадо, кодамо кемевиксэкс невтизе прянзо те ломанесь: сон Кенярксов кулянтъ кисэ важдось мартон, кода цёра тетянзо марто.

<sup>23</sup>Истя, монь ули седейнежедьксэм: кучса сонзэ сеске жо, зярдо ансяк карман содамо, мезе лиси монь тевтнень марто.

<sup>24</sup>Истямо ладсо, мон домкасто кеман: бути тень мери Азорось, куронок монськак сан тенк.

<sup>25</sup>Мон ловия эрвиксэкс кучомс тыненк мекев минек кемиця ялганть Эпафродитэнь. Сон монь марто важдицям ды вейсэнть тевенек кисэ аштиця ялгам, конань тынь кучокшнынк монень лездыцякс, зярдо те монень эривкшнось.

<sup>26</sup>А ней тынь мариде сонзэ сэредемадо. Секс сон пек ризны-тошнакали тынк кисэ, тарка-эзем эстензэ а мукшны.

<sup>27</sup>Те виде, сон кармась сэредеме ды цють эзь куло. А вана Пазось путсь тензэ седеймарямо ды аволь ансяк сонензэ, нама, моненькак. Эдь Сонзэ арасель мелезэ седеяк стакалгавтомс монь ризксэнтъ-мелявксонтъ.

<sup>28</sup>Секскак мон кучса Эпафродитэнь тыненк мекев ды пек куроноксто! Тень кувалт тыненккак карми улеме кеняркс, зярдо таго сонзэ несынк, ды моненькак машты вейке ризксэм.

<sup>29</sup>Истя, инеськетъ, вастынк сонзэ кенярдозь, кода Азоронтень кемиця. Ловодо истят ломантнень.

<sup>30</sup>Сон Христосонь тевентъ кисэ ульнесь кулома лангсо. Сон эзь пеле путомс эсь эрямонзо монень лездамонтъ кисэ, кона тыненк эзь максово монень.

## К Филиппийцам 3

### Чумовтомочи Пазонтъ икеле

<sup>1</sup>Меельце пелев, монь кемиця ялган, кенярдкшнодо, эдь тынь эрятадо Азоронтъ марто вейсэндязь! Монень текень жо зярыяксть сёрмадомс тенк а стака, а вана тынк те идетьядызь ламо зыянтнэде.

<sup>2</sup>Вансто до прянк апаро важдицятнеде, неть кискатнеде-пинетнеде, цёрань киськепень колсицятнеде-керсицятнеде!

<sup>3</sup>Алкуксонь керявтозтне – те минь, секс мекс минь важдтяно-сюконятано Пазонтень оймеялтсо. Минь кенярдозь каштангалетяно Христос Иисус марто вейсэндямосонтъ ды допрок а неждтяно неявикс койтнень-кирдатнень лангс.

<sup>4</sup>Монь, нама, улевель тувталом нежедемс мик неявиксэнтъ лангскак. Бути кияк лия арси: сонзэ ули тувталозо нежедемс неявиксэнтъ лангс, сестэ монь седеяк ламо тувталон арсемс истя!

<sup>5</sup>Мон керявтозян кавксоце чистэ, чачозян Израилень раськесэ, Вениаминэнь буесэ, верень коряс ванькс еврей. Евреень Коентъ топавтомань коряс мон ульнинь фарисей,

<sup>6</sup>важдема бажамом коряс – Кемикуронтъ пансиця-калавтыця. Коень максовт чумовтомочим коряс мон ульнинь асатыкстэмекс.

<sup>7</sup>Ансяк весе сень, мезентъ мон икеле неинь эсень изнявксокс, мон ней лован ёмавксокс – Христосонь кисэ.

<sup>8</sup>Алкуксккак, мон лован ёмавксокс весементъ, секс мекс мезеяк арась истямо, конась улевель Христос Иисусонь, монь Азоронтъ, чарькодемадонзо питней. Сонзэ кисэ мон ёмавтыя весементъ ды весе тень мон ёртыя шукшпряс сень кисэ: саемс эстенъ алкуксонь сюпавчинть, лиякс, Христос марто вейсэндямонтъ.

<sup>9</sup>Сестэ весе кармить содамо: мон Сонзэ ломанян. Истя монь карми улеме чумовтомочим, ансяк уш аволь се, конась саеви эсеть вийсэ, Коентъ топавтома вельде. Аволь, монь ули чумовтомочим Христоснэнь

кемеманть вельде, чумовтомочим, конань максы Пазось те кемеманть кисэ.

<sup>10</sup>Монь мелем вейке: домкасто содамс-чарькодемс Иисус Христосонь ды се виенть, кона Сонзэ вельмевтизе кулозьстэ. Истя жо мелем явомс Сонзэ майсематнень-пиштематнень ды теевемс Сонзэ кондямокс мартонзо вейсэ куломасонть.

<sup>11</sup>Сестэ карми улеме седейнежедьксэм: паряк монгак пачкодян кулозьстэ вельмемантень.

<sup>12</sup>Истя мон кортан аволь секс, буто мон уш пачкодинь пентень эли теевинь асатыкстэмекс. Мон ялатеке икелев панян прям те казнить эстенъ изнямонзо-саеманзо кисэ, секс мекс Христос Иисус монь уш изнимим-саимим Эстензэ.

<sup>13</sup>Нама, кемиця ялгат, мон а лован, келя мон уш изния-саия те казнить. Мелем ансяк вейке: стувтомс сень, мезесь кадови удалов, ды весе вийсэ бажамс сенень, мезесь ашти икеле.

<sup>14</sup>Мон налтокс ливтязь ливтян казнить мельга. Те казнесь – од эрямось, конанень Пазось минек тердимизь Христос Иисус вельде.

<sup>15</sup>Лисни: весень минек, конат виевть эсь кемемасост, арсематнеяк ды мельтнеяк улест истят! А вана бути мейсэяк меленк аволь вейкетъ минек марто, Пазось тыненк панжсы теньгак.

<sup>16</sup>Эрьяга, карматано седе товгак истя арсеме ды шаштомо те кияванть, конань ланга минь ютынек те шкаскак.

<sup>17</sup>Кемиця ялгат! Уледе весе монь ладсо теицякс! Ванодо сетнень лангс, конат теить минек максовт невтевксэнтъ коряс.

<sup>18</sup>Эдь ламотне, конатнеде мон уш ламоксть кортакшнынъ ды нейгак натой сельведь марто таго кортан, эрить, кода Христосонь крёстонть душмант.

<sup>19</sup>Сынст пест – кулома-ёмамо, сынст пазост – пекест, сынъ пряст шныть сеньсэ, мезде эряволь визделгалемс, сынъ арсить ансяк те масторлангонть тевтнеде.

<sup>20</sup>А вана минек тиринь масторонок – менель лангсо, тосто минь пек учотано минек Иисус Христос Азоронть кода Идицянтъ.

<sup>21</sup>Сон Эсь вийсэнзэ полавтсынзе-лиякстомтсынзе минек кулыця лавшо рунготнень ды тейсынзе сынст Эсензэ пингеде пингес а кулыця рунгонть кондымокс. Те виентъ вельде Сонензэ кедь алов саеви весемесь.

## **К Филиппийцам 4**

### **Павол максы превспутомат**

<sup>1</sup>Секскак, вечкевикс кемиця ялган, кеместэ аштеде Азоронть марто вейсэндязь! Тынь монь кенярксом ды каштанчим, монь свал покш мелем неемс тынк, вечкевиксэнъ!

<sup>2</sup>Мон энялдан Эводиянень ды Синтикиянень: эрядо апак пелькста, Азоронть марто вейсэндязь!

<sup>3</sup>Истя жо, тонетькак энялдан, мартон алкуксонь важодиця, инеськетъ, лздак неть кавто аватненень. Сынъ тюрсть-важодсть Кенярксов кулянтъ кисэ монь ды Клемент марто вейсэ ды лия важодиця ялган марто. Весень сынст лемест сёрмадозь эрямонь книгасонть.

<sup>4</sup>Кенярдкшнодо свал, эдь тынь эрятадо Азоронть марто вейсэндязь. Ды таго кортан: кенярдкшнодо!

<sup>5</sup>Кадык весе несызь тынк лембе седеенк. Азорось уш маласо!

<sup>6</sup>Мезень кисяк илядо мелявто! Мекевланк, эрва кодамо тевсэ панжинк эсенк вешеманк Пазонтень ознозь, энялдозь ды сукпрянь ёвтазь.

<sup>7</sup>Ды сестэ Пазонь максовт седейоймамось, кона ломанень превс саевицядонть пек седе сэрей, вантсынзе тынк седеенк ды арсеманк Христос Иисус марто вейсэндязь.

<sup>8</sup>Ды окойники, кемиця ялган, инеськетъ, свал арседе седе, мезесь алкуксонь, мезесь паронь аштиця, мезесь виде, мезесь ванькс, мезесь вечкевикс, мельс туиця, – арседе весе вадрядонть ды шнавицядонть.

<sup>9</sup>Тееде сень, мезенть тонавтнинк, мезенть саинк, мезенть маринк ды неинк монь пельде, ды сестэ Пазось, седейоймамонь лисьмапрясь, карми улеме мартонк.

### **Павол ёвты сюкпрат лезксэнтъ кисэ**

<sup>10</sup>Азоронть марто вейсэндязь эрямосонть мон седейшкава кенярдан вана мезень кисэ: окойники, тынк таго кармась улеме виенк мелявтомс монь кисэ. Нама, тынк свал ульнесь меленк мелявтомс мондень, ансяк икеле арасель истямо ён шканк тень ютавтомс тевс.

<sup>11</sup>Тень эйстэ мон кортан аволь арасьчим коряс. Аволь, мон тонадынь сатстомо сень, мезем ули.

<sup>12</sup>Мон содаса арасьчинтькак ды уличинтькак. Эрва кода ды эрва ладсо мон тонадынь эрямо, вачокс ды пешксекс, кажовчисэ ды уличисэ.

<sup>13</sup>Те весемесь монень кирдеви Иисус Христос вельде, кона максы тень вий.

<sup>14</sup>Ды ялатеке тынь парсте теиде, зярдю явинк мартон монь стакачитнень.

<sup>15</sup>Тынсь, филиппансетне, содатадо: Македониясто монь туемадо мейле, зярдю ушодовсь Кенярксов кулянтень важомедам, ансяк тынк кемикурось кучнесь свал монень лезкс ярмаксо.

<sup>16</sup>Тынь аволь вестъ кучниде Фессалоникавгак монень лезкс, кона монень пек эрявкшнось.



<sup>17</sup>Тень мон кортан аволь сень кисэ, буюто мон бажан вешемс пельденк казнеть. Мон бажан вана мезес: кадык тынк лездамось канды тенк седе покш касовкс-раштавкс.

<sup>18</sup>Ней монень максозь весе, ды монь ули мик пек седе ламо сень коряс, мезе эряви. Эпафродит монень максызе весе, мезе тынь монень кучиде, ды ней монь ули весе эрявиксэсь. Тынк казнесь теке “тантей чинесэ сувтамо”, “анокс, кона Пазонтень вечкевикс ды мельс туиця”.

<sup>19</sup>Ды кадык монь Пазось, Эсензэ ине сюпавчинзэ коряс, Христос Иисус вельде педе пес топавтсынзе весе тынк арасьчинк.

<sup>20</sup>Шнамо Пазонтень, минек Тетянтень, пингеде пингес! Аминь.

#### **Сёрмань меельце валтнэ**

<sup>21</sup>Ёвтадо шумбракстнемат Пазонь весе ломантненень, Христос Иисус марто вейсэндязтненень. Кучить тенк шумбракстнемат кемиця ялгатне, конат тесэ монь марто.

<sup>22</sup>Пазонь весе ломантне кучить тенк шумбракстнемат, ды седе пек сетне, конат важдить Римень кесарень кудосонть.

<sup>23</sup>Минек Иисус Христос Азоронть чанстесь улезэ весеменк тынк марто! Аминь.

## Колосса Ошонь Кемикуронтень Паволонь Сёрмазо

### К Колоссянам 1

<sup>1</sup>Павол, Пазонь мелень коряс Иисус Христосонь апостолось, ды Тимофей, кемиця ялганок, кучить шумбрактнемат

<sup>2</sup>Пазонь ломантненень, Христос Иисус марто вейсэндязь кемевикс ялгатненень, конат эрить Колосса ошсо.

#### Павол ёвты сукпря Пазонтень

<sup>3</sup>Улезэ тенк чансть ды седейоймамо Пазонтень, минек Тетянтень, пельде, ды Иисус Христос Азоронтень пельде! Тынк кисэ эсь озномасонок минь свал ёвтатано сукпря минек Иисус Христос Азоронтень Пазонстэнь ды Тетянстэнь.

<sup>4</sup>Эдь минь маринек Христос Иисуснэнь тынк кемемадонк ды Пазонь весе ломантненень туртов вечкемадонк.

<sup>5</sup>Те кемемантень ды вечкемантень чачты се седейнежедьксэсь, конань топавтомазо учи тынк менель лангсо. Те седейнежедьксэнтень эйстэ тынь мариде уш сестэ, зярдэ тыненк васенцеде пачкодсь видечинь валось – Кенярксов кулясь.

<sup>6</sup>Те кулясь чачты-канды паро раштавокс ды срали весе масторлангонтень келес. Тынк ютксомяк сон срали се чистэнтень саезь, зярдэ тынь маринк сонзэ ды кармиде содамо Пазонь чанстэнтень истямокс, кодамокс сон алкукс улияк.

<sup>7</sup>Тынь те кулянтень маринк Эпафрасонь пельде. Сон – мартонок вейсэнть темень теиця ды вечкевикс ялганок, кона кемевиксстэ важоди Христоснэнь, тыненк паронь кандомга.

<sup>8</sup>Сон ёвтнесь тенекек вечкемадонтень, конань тыненк казизе Оймеялтось.

#### Кемикуронтень кисэ Паволонь озномазо

<sup>9</sup>Вана мекс минь апак лотксе ознотано кисэнк се чистэнтень саезь, зярдэ маринек тынк эйстэ. Минь Пазонтень пельде вештяно: максоволь Сон тенк Эсь Оймеялтсонзо сүпавсто-важовсто покш превейчи ды

чарькодема, ды тень вельде кармавлиде домкасто содамо Пазонть мелензэ-арсеманзо.

<sup>10</sup>Сестэ тынь эсь эрямосонк кармавлиде инелгавтомо Пазонть, весемесэ кандовлиде Сонензэ мельспаро, тейневлиде эрьва кодат паро тевть ды яла касовлиде Пазонть содамочисэнк.

<sup>11</sup>Сонзэ инексчинь аонкставиця альмесь кадык кемекстатадызь тынк ды максы тенк вий печтямс стакачитнень ды цидярдомс. Кенярдозь

<sup>12</sup>ёвтадо сюкпря Пазонтень ды Тетянтень, кона тердимизь минек саемс алтазь казнить: улезэ тарканок-таликанок Сонзэ ломантнень ютксо Валдонть Инязоркчисэнтъ.

<sup>13</sup>Сон менстимизь минек чоподанть азорксчинзэ алдо ды ветимизь-совавтымизь Эсь вечкевикс Цёранзо Инязорксчинтень.

<sup>14</sup>Христосонь кувалт миненек максозь идема-менстема Сонзэ верензэ вельде, лиякс меремс, пежетень нолдамо.

#### **Христосонь чачозо ды важодемазо**

<sup>15</sup>Христос – анеявикс Пазонть неявикс чачозо. Сон – Васень Цёра, кона весе теевксэнтъ лангсо сехте покш.

<sup>16</sup>Эдь Сонзэ вийсэ Пазось теизе весементъ менель лангсоjak, мода лангсоjak, неявиксэнтъкак ды анеявиксэнтъкак: вийтнень ды ветицятнень, прявтнэнь ды азорксчитнень. Весемесь теезель Сонзэ вельде ды Сонзэ туртов.

<sup>17</sup>Сон ульнесь уш весемедентъ икеле. Сон весементъ кирди вейсэндязь-сюлмазь ды лувсо-ладсо.

<sup>18</sup>Те Сон – Кемикуронть, лиякс, Эсензэ рунгонть, Прязо. Сон ушодкс, Васень Цёра, кона васенцекус вельмевтезь кулозьстэ, весемесэ васенцекус улемга.

<sup>19</sup>Эдь Тетянтъ ульнесь мелезэ: эряволь-аштевель Цёранзо эйсэ Сонзэ обуцянь весе пешксечись.

<sup>20</sup>Истя жо Тетянтъ ульнесь мелезэ Христос вельде ладямс Эсензэ марто весеметь, ды Сонзэ крѣст лангсо валозь веренть вельде Сон кемекстызе ладямонтъ весеметь марто мода лангсоjak ды менель лангсоjak.

<sup>21</sup>Тыньгак икелень шкасто эсь зыянов тевенк-арсеманк кувалт ульниде Пазонтъ эйтэ васоло ды молиде каршонзо.

<sup>22</sup>Ней, мекевланк, Сон ладидизь тынк Эсензэ марто Христосонь мода лангонь рунгонзо куломанть вельде вана мекс: аравтомс тынк Эсь чачонзо икелев иневаньксэкс, асатыкстэмекс ды чумовтомокс.

<sup>23</sup>Ансяк тыненк, нама, эряви седе товгак кеместэ ды апак кавтолдо аштемс кемемань юронть лангсо. Илядо чиреме-пурда седеень се нежедемастонть, конань казизе тенк Кенярксов кулясь, зярдэ тынь сонзэ маринк. Те кулясь пачтязь масторлангонь весе ломантненень, ды мон, Павол, карминь важодеме сонзэ кандыцякс.

#### **Кемикуросо Паволонь важодемазо**

<sup>24</sup>Ней мон кенярдкшнан тынк кисэ эсень майсематнесэ. Эсь рунгосон мон поладан-пештян педэ пес сень, мезесь зярс а сатны Христосонь пиштематнесэ. Мон пиштян-майсян Сонзэ рунгонть, лиякс, Кемикуронтъ, кисэ.

<sup>25</sup>Мон теевинь Кемикуронь важодицякс Пазонтъ се меленть-арсеманть коряс, конань топавтомась максозь монень. Сон кармавтсь монень пачтямс тыненк педэ пес Пазонь валонтъ.

<sup>26</sup>Пазонь те салавачись ламо пингень перть кекшезель весе ломантнеде. Ней жо Пазось сонзэ яволявтызе-панжизе Эсензэ кочкавтнэнень.

<sup>27</sup>Пазось сайсь мель панжомс сыненст, кодамо ине ды сюпав весе раськетненень туртов анокстазь салавачись. Те салавачись вана мейсэ: Христос эри тынк эйсэ ды секс тынк учи менель лангонь инексчи.

<sup>28</sup>Те Сондензэ минь пачтятано, эрва ломанень превс путтано ды тонавтано, весе эсь превейчинек тевс нолдазь, ды бажатано аравтомс эрванть Пазонть икелев вийс совазекс, Христос Иисус марто вейсэндязекс.

<sup>29</sup>Те бажамонть кисэ мон важдянгак прянь апак вансто ды ветян тюрема Христосонь пельде максовт покш вийсэнь, кона пек важди монь эйсэ.

## **К Колоссянам 2**

<sup>1</sup>Монь мелем: содавлиде тынь, кодамо виев тюрема мон ветян тынк кисэ, ды Лаодикия ошонь кемицятнень кисэ, ды весе лиятнень кисэяк, кить монь сельмсэ эзимизь некшне.

<sup>2</sup>Тень весе мон теян сень кисэ: кемекстамс седеенк, вейсэндямс тынк вечкемань сьулмосо. Сестэ тынь пачкодтядо сехте домка ды питнейдеяк питней чарькодемантень: тынь карматадо содамонзо Пазонь ды Тетянь ды Христосонь салавачинть.

<sup>3</sup>Сонзэ эйсэ, Христосо, кирдевить превейчинь ды содамочинь весе кекшезь сьупавчитне.

<sup>4</sup>Тень мон кортан тыненк вана мекс: кадык кияк а саласынзе тынк превенк кенгелиця соланя кельсэнзэ-валсонзо.

<sup>5</sup>Кадык мон монсь аволь тынк марто, ойдем жо ялатеке мартонк. Ды мон кенярдкшнан, зярдо неян тынк кеме вейсэндямонк ды Христоснэнь покш кемеманк.

### **Христос марто од эрямо**

<sup>6</sup>Секскак, бути тынь саинк эсь седеезэнк Христос Иисусонь кода Азоронть, сестэ эрядояк мартонзо вейсэндязь.

<sup>7</sup>Нолдадо ундокст-корёнт Христос эйс, ды улезэ Сон тенк эрямонь юрокс. Кемекстадо прянк кемемасонть, конанень тынь тонавтозтядо. Бажадо касомс эйсэнзэ, сьукпрянь ёвтазь.

<sup>8</sup>Ванодо, кияк аволидизь тапа кенгелиця философиянь чаво валтнэсэ, конатнень юрсо аштить ломанень путовт койтне-кирдатне ды мирэнтъ-масторонтъ ветиця вийтне, ансяк аволь Христос.

<sup>9</sup>Христос эйсэ, Сонзэ рунгосо, эри-невтеви Пазонь весе пешксечись,

<sup>10</sup>ды Сонзэ марто вейсэндявоманть вельде тыненккак максозь эрямонь пешксечи. Христос – весе прявтнэнь ды азоркчитнень лангсоjak Покш.

<sup>11</sup>Сон тейсь тыненк керявтомаяк, ансяк аволь ломанень кедьсэ теезь киськепень керявтома. Христосонь теевть керявтоманть вельде тынк лангсто каявтозь-ёртозь колазь пежетев обуцянк.

<sup>12</sup>Истя, нававторасонтъ-лемдемасонтъ тынь ульниде теке калмазь Христос марто вейсэ ды вельмевтезьгак Сонзэ марто, секс мекс тынь кемиде Пазонтень, кона Эсь вийсэнзэ вельмевтизе кулозьстэ Христосонь.

<sup>13</sup>Тынь икеле ульниде кулозекс эсенк пежетенк кувалт ды сень кувалт, мекс колазь обуцянк ульнесь теке апак керявто. Ансяк ней Пазось теидизь тынк эрицякс вейсэ Христос марто. Сон нолдынзе-простинзе минек весе пежетенек.

<sup>14</sup>Сон нардынзе минек лангс сёрмадозь долктнень весе сынст вешемаст марто, конат аштеть минек каршо. Крёст лангс вачкодеманть вельде Сон ёртынзе сынст минек кинть лангсто.

<sup>15</sup>Теньсэ Пазось саинзе оймеялтонь весе прявтнэнь ды азоркчитнень виест ды совавтынзе сынст визьксчамас весень икеле, зярдо Сон кецязь изнинзе сынст Эсензэ вельде.

#### **Тынь олякстомтозь ломанень теевть койтнеде-кирдатнеде**

<sup>16</sup>Кадык кияк а суди эйсэнк сень кисэ, мезде тынь ярстадо ды симтядо, ловтадо эли а ловтадо тынь иень покшчитнень, ковонь чачоматнень ды оймсема читнень.

<sup>17</sup>Весе те ансяк сень сулеезэ, мезентень эряви самс, алкуксчись жо – те Христос.

<sup>18</sup>Кадык тынк а судить истят ломантне, конат вечкить невтеме пряст манчемань сэтьмечисэ ды сюконямо ангелтнэнь ды кирдевить-аштить сень лангсо, мезенть сынсь эзизь нее. Стяко сынь покшкавтнить пряст эсь превейчисэст, кона ялатеке ансяк ломанень.

<sup>19</sup>Неть ломантне уш апак сьолма Прянть марто, Христос марто, кона анды-симди весе рунгонть ды вейсэндиди сонзэ сантнэнь ды эзнетнень вельде. Истя весе рунгось касы-кемексты Пазонтъ мелензэ коряс.

<sup>20</sup>Бути тынь кулыде Христос марто ды ней олякстомиде те масторлангонь ветиця вийтнеде, мекс эно тынь яла эрятадо кода сонзэ ломантне? Мекс тынь топавттадо истят кармавтоматнень:

<sup>21</sup>«Иля сае!», «Иля ярса!», «Иля токшеве!»?

<sup>22</sup>Те весе ёми тевс нолдамодо мейле. Неть вешематне – ансяк ломанень теевть кармавтомат ды тонавтомат.

<sup>23</sup>Истят кармавтоматне ансяк неявить превейкс. Сынь ялатеке ветить ломаненть эсензэ теевть сюконямос, манчемань сэтьмечис ды рунгонь муцявтомас. Секс сынь питневтеметь ды допрок а лездыть ломанентень кирдемс-онкстямс эсь колазь обуцянь мельтнень.

## **К Колоссянам 3**

### **Кемицятнень од эрямо**

<sup>1</sup>Истя, бути Пазось тынк вельмевтидизь Христос марто вейсэ, сестэ бажадо сенень, мезе менель лангсо, косо Христос озадо ашти Пазонтъ вить кедензэ ёно.

<sup>2</sup>Арседе менеленседенть, аволь масторлангонседенть.

<sup>3</sup>Эдь тынь кулыде, ды эрямонк Христос марто вейсэ кекшезь-ванстозь Пазонтъ кедьсэ.

<sup>4</sup>Христос – тынк алкуксонь эрямонк. Зярдод Сон сы, сестэ Сонзэ марто тыньгак явсынк Сонзэ инексчинть.

<sup>5</sup>Секскак тыненк эряви куловтомс весе сень, мезесь тынк эйсэ модалангонь обуцянтъ эйстэ: ускурямо, аваньксчи, визькс мельть, зыянов бажамот ды вардонь сельмечи, кона вейкетъ аволь алкуксонь пазнэнь сюконямонть марто.

<sup>6</sup>Весе тень кисэ Пазонть кежесь стардсынзе сетнень, конат а кунсолыть Сонзэ.

<sup>7</sup>Зярдоду-бути тыньгак эриде истя жо, зярдоду ульниде неть пежетнень ало.

<sup>8</sup>А вана ней тыненк эряви ёртомс весе тень: кежентъ, ацирьгалеманть, зыяновчинть! Сялдомат-покордамот ды амазы валт иляст лисне тынк кургсто!

<sup>9</sup>Илядо кенгеле вейкенк-вейкенк туртов, эдь тынь уш каинк-ёртынк эсенк лангсто ташто ломанентъ весе сонзэ лувонзо-коензэ марто.

<sup>10</sup>Тынь оршавиде-вельтявиде од ломаньсэ, кона свал одкстоми, яла седе пек ды пек тееви эсь Теицянзо ёнов молицякс ды малавгады Пазонть алкуксонь чарькодемантень.

<sup>11</sup>Ды тесэ уш весе вейкетъ: арасть греккак, еврейгак, керявтозьягак, апак керявтояк, варваргак, скифкак, уряк, олячисяк. Ули ансяк Христос, Сон – весе ды весесэ!

<sup>12</sup>Тынь Пазонь кочкавт, Сонзэ иневанькс ды вечкевикс ломанензэ. Секс уледе свал седеймарицякс, лиянень паронь теицякс, сэтьмекс, чевте седеекс, куватень кирдицякс-цидьярдыцякс.

<sup>13</sup>Маштодо вейкенк-вейкенк коронь кирдеме ды нолдамо-простямо вейкенк-вейкенк покордамонть. Кода Христос нолдынзе тынк чумонк, истя тыньгак тееде.

<sup>14</sup>Весе неть паро ёнкстнэнь марто сехте пек оршаводо-вельтяводо вечкемасо, кона весементъ сюлми вейс ды теи асатыкстэмекс.



<sup>15</sup>Кадык путы тынк седеенк виде ки лангс Пазонь максовт седейоймамось, конанень Пазось тынк тердидизь кода вейке рунгонь пелькст. Ды свал ёвтадо Тензэ сукпря!

<sup>16</sup>Кадык Христосонь валось эри тынк эйсэ весе эсь сюпавчисэнзэ. Тонавтодо, путодо превс вейкенк-вейкенк эрва кодамо превейчисэ. Седейстэ лисиця сукпрянь ёвтазь, моравтодо Азоронтень псалмат, шнамо морот ды Оймеялтонь максовт морот.

<sup>17</sup>Кадык весе, мезе тынь тейтядо, валсоjak, тевсэjak, тееви Иисус Христос Азоронтъ лемсэ, Сонзэ вельде Пазонтень ды Тетянтень сукпрянь ёвтазь.

### **Превспутомат кудораськень ломантненень**

<sup>18</sup>Нить, максынк прянк мирденк кедь алов, кода лади теемс сетненень, кить кемить Азоронтень.

<sup>19</sup>Мирдеть, вечкеде нинк, илядо уле сыненст казямокс-кежеекс.

<sup>20</sup>Эйкакшт, весемесэ кунсолодо тетянк-аванк, эдь те Азоронтень мельспаро.

<sup>21</sup>Тетят, илядо ацирьгавтне эйкакшонк, те теи сынст пелицякс-нусманякс.

<sup>22</sup>Уреть, кунсолодо весемесэ масторлангонь эсенк азоронк ды тень тееде ванькс седейсэ ды Пазонтъ мельдензэ пелезь, аволь ансяк невтемань кисэ ды аволь ломаннень савтомга.

<sup>23</sup>Весеметь, мезенть тейтядо, тееде покш мелень путозь, кода Азоронтъ туртов, аволь кода ломаннень.

<sup>24</sup>Кирдеде мельсэнк: тынь важдтядо Христос Азоронтень. Истя жо содадо: Сон макссы тенк алтазь казнить, конань анокстызе Эсь ломанензэ туртов.

<sup>25</sup>А вана кие теи зыян, сенень пандовияк истямо жо зыянсо. Азоронтъ икеле весе вейкеть.

## К Колоссянам 4

<sup>1</sup>Азорт, тейнеде уренк марто парсте ды видестэ. Мельсэнк кирдеде: тынккак менель лангсо ули Азоронк.

### Меельце превспутомат

<sup>2</sup>Ознодо цидярдозь, ознома шкастонть уледе эрязат ды ёвтадо сукпря Пазонтень!

<sup>3</sup>Ознодо истя жо минек кисэяк: кадык Пазось панжсы миненек кенкшенть Сонзэ валонть пачтямонтень Христосонь салавачиденть, конань кисэ мон пекстазянгат.

<sup>4</sup>Ознодо: кадык саты вием пачтямс те валонть истя чарькодевиксстэ, кода монень эрвияк теемс!

<sup>5</sup>Ветядо прянк превейстэ акемицятнень марто, нолдадо тевс эрва ён шканть.

<sup>6</sup>Тынк валонк улезэ мельс туиця ды седейс токиця; содадо, мезе ёвтамс эрванть каршо.

<sup>7</sup>Монь эйстэ весементь ёвтнесы тенк Тикик, монь вечкевикс кемиця ялгам, кемевикс важодицясь ды мартонок Азоронтень вейсэнть тевень теицясь.

<sup>8</sup>Мон кучса сонзэ тыненк самай се тевенть марто: содамс тынк тевтнеде ды оймавтомс-кемекстамс седеенк.

<sup>9</sup>Сонзэ марто мон кучса кемевикс ды вечкевикс кемиця ялганть Онесимень, кона тынксетнестэ вейкесь. Сынть ёвтнесызь тыненк весе, мезе тесэ юты.

### Шумбракстнемат

<sup>10</sup>Шумбракстнемат кучить тенк Аристарк, мартон пекстазь ялгам, ды Марк, Варнавань патянзо цёрась. Тыненк уш кучозель сонзэ коряс истямо вешема: бути сон сы тыненк, инеськеть, парсте вастынк сонзэ.

<sup>11</sup>Истя жо кучи шумбракстнемат тенк Иисус, конанень весе мерить Юстус. Еврейтнень ютксто ансяк сынъ важдить мартон вейсэ Пазонь Инязорксчинтень ды аштить монень алкуксонь нежекс.

<sup>12</sup>Шумбракстнемат кучи тынсенк Эпафрас, Иисус Христосонь важо. Сон свал ашти-тюри тынк кисэ ознозь: аштевлиде тынь кеместэ, улевлиде вийс совазь ды улевель тынк эйсэ весе се, мезе тукшны Пазонтъ мельс.

<sup>13</sup>Мон неян-кемекстан сень, кода сон, виень апак вансто, мелявтозь важди тынк туртов ды Лаодикиянь ды Иераполень кемицятнень туртовгак.

<sup>14</sup>Шумбракстнемат тыненк кучить Лука, минек вечкевикс ормаменстицясь, ды Демос.

<sup>15</sup>Ёвтадо шумбракстнемат Лаодикиясо кемиця ялгатненень, истя жо Нимфаннэнь ды кемикуронтень, кона пурнавкшны сонзэ кудосо.

<sup>16</sup>Зярдо те сёрмась ули ловнозь тынк кедьсэ, мейле ловновтынк сонзэ Лаодикиянь кемикурососяк. Тынсь истя жо ловнынк Лаодикияв кучозь монь сёрманть.

<sup>17</sup>Ёвтадо Аркипнень: кадык сон, мезе лангскак апак вано, топавтсы се теветень, кона тензэ максозь Азоронтъ пельде.

<sup>18</sup>Сёрмадан ней эсень кедьсэ: шумбракстнемат Паволонь пельде. Илядо стувтне монь пекстамодонтъ. Пазонь чанстесь улезэ весеменк тынк марто! Аминь.

## Фессалоника Ошонь Кемикуронтень Паволонь Васенце Сёрмазо

### 1-е Фессалоникийцам 1

<sup>1</sup>Павол, Силуан ды Тимофей кучить шумбракстнемат Фессалоника ошонь кемикуронтень, кона эри вейсэндязь Тетя Пазонтъ марто ды Иисус Христос Азоронтъ марто. Улезэ тенк чансть ды седейоймамо Пазонтъ, минек Тетянтъ, пельде ды Иисус Христос Азоронтъ пельде!

#### Фессалоникань кемикуронтъ кемемазо ды эрямозо

<sup>2</sup>Минь свал ёвтатано сукпря Пазонтень весе тынк кисэ ды ледстнетяно эйсэнк минсенек озномасонок.

<sup>3</sup>Пазонтъ ды минек Тетянтъ икеле минь апак лотксе кирдтяно мельсэнек, кода тынк кемеманк чачты тевень теема, кода вечкеманк чачты виевстэ важодема ды кода цидярдозь тынь нежедтядо минек Иисус Христос Азоронтъ лангс.

<sup>4</sup>Пазонтень вечкевикс кемиця ялгат, минь содатано: Пазось кочкидизь тынк.

<sup>5</sup>Эдь минь пачтинек тыненк Кенярксов кулянтъ аволь ансяк валсо, истя жо вийсэяк ды Иневанькс Оймеялтсожак ды домкасто кемезь сонзэ алкуксчинтень. Тынь жо содатадо, кода минь эринек тынк кедьсэ, тыненк паронь теемга.

<sup>6</sup>Ды тынь теевиде минек ды Азоронтъ мельга молицякс, зярдю тынь саинк седеезэнк Кулянтъ стака лепштямотнень ютксо кеняркс марто, конань максызе Иневанькс Оймеялтось.

<sup>7</sup>Истя тынь кармиде улеме невтемакс весе кемицятненень Македониясожак ды Акайясожак.

<sup>8</sup>Тынк пельде Азоронтъ валось сравтневсь-кандтневсь аволь ансяк Македониява ды Акайява. Истя жо Пазонтень тынк кемемадонк кармасть содамо эрва косо, секс миненек мезеяк уш а эряви кортамс теде.

<sup>9</sup>Эдь сынъ сынсь ёвтнить, кода тынь минек вастымизь, кода тынь велявтыде Пазонтень аволь алкуксонь пазтнэнь эйтэ ды кармиде важдеме эриця ды алкуксонь Пазонтень,

<sup>10</sup>ды кода кармиде учомо менельстэ Сонзэ Цёранть, конань Сон вельмевтизе кулозьстэ – Иисусонь, кона менстьсамизь минек сыця кеженть эйтэ.

## 1-е Фессалоникийцам 2

### Фессалоникасо Паволонь важдемазо

<sup>1</sup>Тынь тынсь содатадо, кемиця ялгат, минек самось тыненк эзь ульне стяконь тевекс.

<sup>2</sup>Кода тынь содатадо, тыненк самодо икеле минь Филиппасо кандынек пиштемат ды покордамот. Пазось ялатеке макссь миненек смелчи пачтямс тенк Сонзэ Кенярксов кулянзо, виев каршо молеманть лангс апак вано.

<sup>3</sup>Эдь минек тонавтома валось а кирди кодаткак манчемат, аванькс бажамот ды ёжовчи.

<sup>4</sup>Мекевланк, Пазось минек варчавтнимизь-терявтнимизь ды, лангозонок кемезь, максызе тенек Эсь Кенярксов кулянзо. Секс минь сонзэ пачтятано истя: бажатано туемс ансяк вейкине Пазонтъ мельс, кона варчавтни-терявтни минек седеенек, аволь ломанень мельс.

<sup>5</sup>Кода тынь содатадо, минь зярдояк эзинец савтне киненьгак нильтяня валсо ды минек арасельть салавань бажамоньк эсенек лезэс. Пазось тень неиця-содыця.

<sup>6</sup>Минь эзинец вешне шнамо ломантнень пельде, тынк кедьстэяк ды киньгак лиянь кедьстэяк.

<sup>7</sup>Кода Христосонь апостолт, минек ульнесь виенек вешемс пельденк шнамо. Минь жо, мекевланк, ульнинек ютксонк чевтекс-сэтьмекс, кода

потесэ андыця ава, кона покш мелень путозь яки эсь эйкакшонзо мельга.

<sup>8</sup>Миньгак истя жо седей лембесэ вечкилидизь тынк ды, натой, ульнинек анокт путомс тенк эсь ойменеккак, аволь ансяк максомс Пазонь Евангелиянтъ. Вана кодамо вечкевиксэкс тынь миненек теевиде!

<sup>9</sup>Кемиця ялгат, тынк мельсэ, нама, аштить, минек стакачитне ды пильге лангсто правтыця важомемась. Зярдо минь пачтинек тенк Пазонь Кенярксов кулянтъ, важдинек читькак, ветькак, а улемс киненьгак тынк эйстэ кирьгасо кевекс.

<sup>10</sup>Тынь ды Пазось сень неицятне-содыцятне, кода ваньксстэ, видестэ ды пародо-парсте минь ветинек прянок тынк, кемицятнень, марто.

<sup>11</sup>Теньгак тынь содатадо: минь тейнинек эрванть тынк марто истя, кода тетясь тейни эсь эйкакшонзо марто.

<sup>12</sup>Минь кемекстынек эйсэнк, энялдынек ды кеместэ вешинек пельденк: эрявлиде тынь Пазонтъ мелензэ коряс, кона терди тынк совамо Эсензэ Инязорксчинтень ды явомо инексчинзэ.

#### **Кемицятнень вейсэнь стакачист**

<sup>13</sup>Минь апак лотксе ёвтатано сюкпря Пазонтень сень кисэяк: зярдо тынь саинк седеезэнк Пазонь валонтъ, конань маринк минек пельде, тынь саинк сонзэ аволь кода ломанень вал, а кода Пазонь вал, кона алкукс истямокс уляк ды теи эсь тевензэ тынк эйсэ, конат кемить.

<sup>14</sup>Эдь тынк марто, кемиця ялгат, лиссь теке жо, мезе лиссь Христос Иисуснэнь кемицятнень марто Иудеянь кемикуротнесэ. Тыньгак кирдиде эсенк раськентъ пельде секень, мезентъ тонатне еврейтнень пельде.

<sup>15</sup>Еврейтне маштызь Иисус Азоронтъкак, кода маштнизь Сонзэ пазмарицятнень, ды минеккак пансестъ. Сынь а тукшныть Пазонтъ мельс ды молить весе ломантнень каршо.

<sup>16</sup>Сынь а нолдыть минек лия раськетненень идема кулянтъ пачтямо. Истя сынь пештитъ-ламомлавтыть эсь пежетест. Ней, okayники, Пазонь кежесь уш прась лангозост.

### **Павол бажи неемс Фессалоника ошонь кемикуронтъ**

<sup>17</sup>Кемиця ялгат, зярдю миненек савсь явомс мартонк нурькине шкас – ансяк рунгосо, аволь оймесэ, – минь яла седеяк покш мельсэ бажинек неемс тынк.

<sup>18</sup>Секскак, минек ульнесь меленек самс тыненк, – монь, Паволонь, те мелесь ульнесь аволь вестъ эли кавксть, – ансяк Сатанась пиризе кинек.

<sup>19</sup>Эдь кить улить минек седейнежедьксэкс, минек кенярксокс, минек изнямонь каштазокс, кода аволь тынь. Тынк эйсэ минь карматано шнамо прянок минек Иисус Христос Азоронок икеле, зярдю Сон сы!

<sup>20</sup>Эдь алкуксккак тынь – минек прянь шнамо тарканок ды кенярксонок!

### **1-е Фессалоникийцам 3**

<sup>1</sup>Минек арасель виенек улемс седе тов явозь тынк эйстэ, секскак сынек мельс кадовомс Афинас ськамонок,

<sup>2</sup>а тыненк кучинек Тимофеень, минек кемиця ялганок ды Пазонь важонтъ, кона минек марто теи вейсэнъ тев, пачти Христосто Кенярксов кулянтъ. Сон виевгавттадызь тынк ды кемекстасы кемеманк.

<sup>3</sup>Кадык кияк а кавтолдозеви неть лепштямотнеде. Эдь тынь тынськак содатадо: те минек уцясканок.

<sup>4</sup>Зярдю минь ульнинек тынк кедьсэ, сестэ икелев ёвтакшнынек тенк: минек учить лепштямот-пиштемат. Истя теевськак, кода тынь содатадо.

<sup>5</sup>Секс, зярдю монь маштсь вием кирдемс седе тов, сестэ мон кучия Тимофеень содамс-теемс тынк кемемадонк. Мон пелинь: паряк Снартневтицясь правтыдизь-пурдавтыдизь тынк виде ки лангсто ды минек стака важдемась теевсь стякокс.

## Паро кулят

<sup>6</sup>Ней вана Тимофей ансяк велявтсь тынк кедьстэ миненек ды кандсь тенек паро кулят тынк кемемадонк ды вечкемадонк. Сон ёвтась сендеяк, кода тынь свал ванстадо минденек паро ледстнемат ды палтадо покш мельсэ неемс минек, кода миньгак тынк.

<sup>7</sup>Кемиця ялгат, секскак весе минек стакачитнень ды лепштямотнень ютксо тынк кемемась оймавтымизь-кемекстымизь минек.

<sup>8</sup>Эдь ней минь таго эрятано, бути тынь кеместэ аштетьядо Азоронтъ марто вейсэндязь.

<sup>9</sup>Кода миненек пачтямс валсо седейёжонь сукпря Пазонтень тынк кисэ ды весе се кенярксонтъ кисэ, конаньсэ минь кецнетяно кисэнк минек Пазонтъ икеле?

<sup>10</sup>Минь седейстэ лисиця мельсэ ознотано читькак, ветькак: максоволь тенек Пазось вастовомс мартонк ды топавтомс тынк кемеманть сеньсэ, мезесь а сатны эйсэнзэ.

<sup>11</sup>Кадык Сонсь Пазось, минек Тетясь, ды минек Иисус Христос Азорось панжсызь тенек кинть тыненк.

<sup>12</sup>Кадык Азорось яла покшолгавтсы-ламомгавтсы тынк вечкеманть вейкенк-вейкенк туртов ды весе лиятнененьгак ды тейсы истямо вечкемакс, конаньсэ миньгак вечктядызь тынк.

<sup>13</sup>Ды кадык Азорось кемекстатадызь тынк: улемс тыненк ачумондовицякс ды иневаньксэкс Пазонтъ, минек Тетянтъ, икеле се чистэнтъ, зярдэ минек Иисус Христос Азорось сы весе Эсь ломанензэ марто. Аминь.

## 1-е Фессалоникийцам 4



### Пазонть мелензэ коряс эрямо

<sup>1</sup>Истя, кемиця ялгат, тынь тонадыде минек пельде, кода эрямс ды улемс Пазонтень мельспарокс. Христос Иисусонь лемсэ энялдтано тенк ды тердтяно эйсэнк: бажадо теньсэ касомс седе товгак.

<sup>2</sup>Тынь жо содатадо, кодат кармавтомат минь максынек тенк Иисус Азоронть пельде.

<sup>3</sup>Эдь Пазонь мелесь сеньсэ: алтавлинк тынь эсь прянк Сонензэ ды аволинк кая прянк усксевемас-ускурямос.

<sup>4</sup>Эрвась эйстэнк маштозо саеме эстензэ ни Пазонть мелензэ коряс ды паро койсэ.

<sup>5</sup>Тень илядо тейне визькс мелень топавтомань кисэ, кода тейнить лия раськенсетне, конат а содасызь Пазонть.

<sup>6</sup>Илядо арсеяк неть тевтнесэ покордамс кемиця ялганк-братонк эли саемс пельдензэ эстеть лезэ. Азорось пандсы чумонть весе тень кисэ, кода минь тыненк икеле уш ёвтакшнынек ды ламоксть кеместэ кортакшнынек.

<sup>7</sup>Пазось тердимизь минек эрямс Сонензэ алтазь эрямосо, аволь аваньксчисэ.

<sup>8</sup>Истямо ладсо, кие ёрты-кады неть превспутоматнень, се ёрты аволь ломаненть, а Пазонть, кона макссь миненек Иневанькс Оймеялтонзо.

<sup>9</sup>Кемиця ялганк вечкемадо сёрмадомскак тыненк а эряви, эдь Сонсь Пазось тонавтыдизь тынк вейкенк-вейкенк вечкеме.

<sup>10</sup>Тынь истя тейнетядояк весе кемиця ялганк марто, конат эрить Македониясо. Кемиця ялгат, энялдтано тенк, бажадо касомс теньсэ седе товгак.

<sup>11</sup>Ловодо питнейкс сэтьме эрямонтъ. Кадык эрвась теи эсь тевензэ ды анды прянзо эсензэ кедьсэ важодезь, кода минь тыненк кортнинек-кармавтнинек.

<sup>12</sup>Сестэ акемицятнеяк кармить ловомо тынк ды мейсэяк а карматадо содамо арасьчи.

### **Азоронть самозо**

<sup>13</sup>Кемиця ялгат, монь ули мелем ёвтамс тенк сень, мезе карми улеме кулозтнень марто. Аволиде ризнэ-мелявто, кода лиятне, конатнень арась седейнежедьксэст.

<sup>14</sup>Бути минь кемтяно Иисусонь куломантень ды вельмемантень, сестэ истя жо кемтяно: Пазось эрямос ветясынзе Иисус марто сетнень, кить кулость Сонензэ кемезь.

<sup>15</sup>Эдь тень минь кортатано тыненк Азоронть валсо: минь, Азоронть самс эрицякс тезэнь кадовицятне, ялатеке а икельдясынек кулозтнень.

<sup>16</sup>Зярдю каяты кармавтыця-тердиця серьгедемась ды архангелэнь вайгелесь ды зярдю зэрьксты Пазонь торамось, сестэ Сонсь Азорось валги менельстэ. Ды сеть, конат кулость Христоснэнь кемезь, вельмить васняк.

<sup>17</sup>Седе мейле минь, эрицякс тезэнь кадовозтне, ультяно саезь-салазь пель лангсо мартост вейсэ менелев Азоронть вастомо. Ды истя минь свал карматадо улеме Азоронть марто.

<sup>18</sup>Вана истя, кемекстадо вейкенк-вейкенк эйсэ неть валтнэсэ.

### **1-е Фессалонийцам 5**

#### **Уледе анокт Азоронть самонтень!**

<sup>1</sup>Кемиця ялгат, шкатнень ды аравтозь читнень эйстэ а эряви тыненк сёрмадомскак.

<sup>2</sup>Эдь тынь тынсь пек парсте содатадо: Азоронть чись сы апак учо, салыця ладсо веть.

<sup>3</sup>Зярдю ломантне кармить кортамо: «Эрьва косо сэтъмечи ды лув-лад», сестэ сынст апак учо стардсынзе ёмамось, кода пешксесэ аванть

ушодовкшныть чачтомань майсематне, ды сынь кодаяк уш а оргодевить.

<sup>4</sup>А тынь, кемиця ялгат, аволь чоподачисэ, ды се чись а стардтадызь тынк апак учо, салыця ладсо.

<sup>5</sup>Эдь весе тынь валдонь ды чинь эйкакшт. Минь а ультяно вень ды чоподань эйкакшокс.

<sup>6</sup>Секскак, эрде, а карматано удомо, кода лиятне! Ультяно анокт ды валдо превсэть!

<sup>7</sup>Эдь удыцятне удыть веть, ды винань вечкицятнеяк симить-лекить веть.

<sup>8</sup>Минь, чивалдонь эйкакштнэ, мекевланк, ультяно валдо превсэ, оршасынек кшнинь панарокс кемеманть ды вечкеманть, путсынек прязонок шлёмокс седейнежедьксэнтъ идеманть лангс!

<sup>9</sup>Эдь Пазось аравтсь миненек идема, кона максови тенек Иисус Христос Азоронок вельде, аволь чумонь пандома.

<sup>10</sup>Христос кулось минек кисэ ды секс минь карматано эрямо Сонзэ марто вейсэ, сень лангс апак вано: эрицятано минь эли кулозтяно.

<sup>11</sup>Секскак кемекстадо ды кастодо-кепедеде вейкенк-вейкенк эйсэ, кода тынь тейтядоjak.

#### **Меельце превспутомат ды сюкпрат**

<sup>12</sup>Кемиця ялгат, энялдтано тенк: ловодо сетнень, кить пек ламо важдить тынк ютксо, кить Азоронтъ марто эрямосонк аштить тынк прявтокс ды путыть эйсэнк превс.

<sup>13</sup>Улезэ сыненст тынк ёндо покш мелень путома ды вечкема се теventь кисэ, конань сынь теить. Эрядо вейкенк-вейкенк марто ладязь.

<sup>14</sup>Кемиця ялгат, минь энялдтано тенк: путодо превс нузялдыцятнень, кемекстадо аволь кеме ойметнень, уледе нежекс лавшотненень, весе марто уледе коронь кирдицякс.

- <sup>15</sup>Ванодо: кияк киненьгак кеж илязо пандо кежсэ. Мекевланк, свал бажадо теемс паро вейкенк-вейкенк туртов ды весе лиятнень туртовгак.
- <sup>16</sup>Свал кенярдодо.
- <sup>17</sup>Апак лотксе ознодо.
- <sup>18</sup>Весеметь кисэ ёвтадо сукпря. Те Пазонть мелезэ тыненк, Христос Иисуснэнь кемицятненень.
- <sup>19</sup>Илядо мадсте Пазонь Оймеялтонь толонть,
- <sup>20</sup>илядо лово стякокс пазмарицянь валтнэнь.
- <sup>21</sup>Ялатеке весеметь ванкшнодо эрва ёндо, саеде сень, мезесь паро.
- <sup>22</sup>Кирдеведе ве ёно эрва кодамо зыяндонть.
- <sup>23</sup>Кадык Сонсь Пазось, седейоймамонь лисьмапрясь, тейтядызь тынк педэ пес Эстензэ алтазекс. Ды кадык весе тынк эйсэ: оймеялтонккак, ойменккак ды рунгонккак – ванстови ачумондовиксэкс минек Иисус Христос Азоронть самочис.
- <sup>24</sup>Тынк Тердицясь кемевикс, ды Сон тейсы тень.
- <sup>25</sup>Кемиця ялгат, ознодо минек кисэяк.
- <sup>26</sup>Шумбракстнеде весе кемиця ялгатнень марто Пазонь ломанень паламосо.
- <sup>27</sup>Азоронть лемсэ вешан пельденк: ловнынк те сёрманть весе иневанькс кемиця ялгатненень.
- <sup>28</sup>Минек Иисус Христос Азоронть чанстесь улезэ тынк марто! Аминь.

## Фессалоника Ошонь Кемикуронтень Паволонь Омбоце Сёрмазо

### 2-е Фессалоникийцам 1

<sup>1</sup>Павол, Силуан ды Тимофей кучить шумбракстнемат Фессалоника ошонь кемикуронтень, кона эри вейсэндязь минек Тетя Пазонтъ марто ды Иисус Христос Азоронтъ марто.

<sup>2</sup>Улезэ тенк чансть ды седейоймамо минек Тетя Пазонтъ пельде ды Иисус Христос Азоронтъ пельде!

#### Пазось карми видестэ судямо

<sup>3</sup>Кемиця ялгат, миненек свал эряви ёвтамс сукпря Пазонтень тынк кисэ. Те виде, секс мекс тынк кемемась седе пек касы ды касы, ды тынк вечкемась вейкенк-вейкенк туртов яла покшолгады-ламомлгады.

<sup>4</sup>Секскак минь минськак Пазонь кемикуронтень икеле шнатано прянок тынк эйсэ, цидярдоманк ды кемеманк эйсэ весе пансематнень ды лепштямотнень ютксо, конатнень тыненк савкшны кирдемс.

<sup>5</sup>Те весе невти Пазонь виде судонтъ ды аноксты тынк Сонзэ Инязоркчинзэ туртов, конань кисэ тынь майсетядояк.

<sup>6</sup>Пазось виде: Сон пандсы пиштемасо сетненень, конат тыненк кандыть пиштема.

<sup>7</sup>А вана тыненк, конатне течи кандыть пиштемат, Сон минек марто вейсэ максы оймамо се чистэнтъ, зярдю Иисус Азорось сы менельстэ Эсь виев ангелэнзэ марто

<sup>8</sup>кирвиця тол потсо. Сестэ Сон пандсы чумонтъ сетненень, конатнень арась мелест содамс Пазонтъ ды конатне а кунсолыть-топавтыть Кенярксов кулянтъ минек Иисус Христос Азородонтъ.

<sup>9</sup>Сыненст чумонь пандомакс карми уleme пингедэ пингень ёмамо, лиякс, явома Азоронтъ эйстэ ды Сонзэ виензэ ды сияждыця инексчинзэ эйстэ.

<sup>10</sup>Истя тееви се чистэнтъ, зярдо Сон сы ды ули шназь Эсензэ ломанензэ эйсэ ды инелгавтозь весе сетнень эйсэ, кить кемезевсть Тензэ. Сынст ютксо ультядо тыньгак, конат кемезевсть минек пачтявт кулянтень.

<sup>11</sup>Секскак минь свал ознотано кисэнк: кадык Пазось тейтядызь тынк сатышкасто анокстазекс се эрямонтень, конанень тердидизь. Кадык топавтсынзе Эсь вийсэнзэ весе тынк бажамонк паронтень ды тевенк, конатне невтить кемеманк.

<sup>12</sup>Истя тынь карматадо шнамо минек Иисус Христос Азоронтъ лемензэ, ды Сон карми шнамо тынк. Те тееви минек Пазонтъ ды Иисус Христос Азоронтъ чанстест коряс.

## 2-е Фессалоникийцам 2

### Койтемечинь ломанесь

<sup>1</sup>А вана ней кортатано минек Иисус Христос Азоронтъ самодонзо ды седе, кода минек пурнасамизь Сонензэ. Кемиця ялгат, энъялдтано тенк:

<sup>2</sup>иляст сеске чаракадо превенк ды илядо талакале-тандале кодамояк пазмарицянь валдонть, тонавтомадонть эли сёрмадонть, кона, келя, минек пельде. Сынст эйсэ буто ёвтазь: «Христосонь чись уш сы».

<sup>3</sup>Киненьгак мейсэяк илинк максо прянк ильведстемс-манямс. Эдь те чидентъ икеле карми улеме покш потамо-велявтома Пазонтъ эйстэ ды невьсы прянзо пежетень ломанесь, кона максозь-судязь ёмамос.

<sup>4</sup>Те каршомолицясь путсы-ловсы прянзо сехте покшокс весеме лангсо, конанень мерить паз эли сюконямо тарка. Сон озы Пазонь кудос кода Паз ды яволявтсы эсь прянзо Пазокс.

<sup>5</sup>Паряк тынь эзинк стувто? Мон тыненк кортакшнынъ тень эйстэ уш сестэ, зярдо ульнинъ тынк кедьсэ.

<sup>6</sup>Тынь истя жо содатадо, мезесь кирди койтемечинъ ломанентъ невтемс прянзо шкадонзо икеле.

<sup>7</sup>Эдь койтемечинь виесь уш важоди салава. Ансяк эряви саемс кинзэ лангсто сень, кие кирди сонзэ.

<sup>8</sup>Ды сестэ лиси лангс те койтемечинь ломанесь, конань Иисус Азорось куловтсы Эсензэ кургсто лисиця оймекоштсонзо ды маштсы-ёмавтсы Эсензэ сияждомасонзо се чистэнтъ, зярдо Сон сы.

<sup>9</sup>Койтемечинь ломанентъ самось – те тевесь Сатанантъ. Те самось карми невтевеме эрва кодамо вийсэ ды кенгелиця-ильведстиця тамашасо ды диванъ тевсэ

<sup>10</sup>ды эрва кодамо авидечинь манчемасо. Нетъ манчематнес понгить сеть, конат ютыть ёмамос, секс мекс сыненст эзь вечкеве Пазонтъ видечись, конань вийсэ сынъ улевельтъкак идезь.

<sup>11</sup>Тень кисэ Пазось кучи лангозост манчевеманъ покш вий, ды секс сынъ кармить кемеме кенгелемантень.

<sup>12</sup>Истя кармить улеме судязь весе сетне, кить эзь кеме видечинтень ды кинень вечкевсь авидечись.

#### **Тынь кочказядо идемас**

<sup>13</sup>Азоронтень вечкевикст, кемиця ялгат, миненек свал эряви ёвтамс сюкпря Пазонтень тынк кисэ. Сон тынк ушодкссто саезь кочкидизь пачкодемс идемантень, секс мекс Оймеялтось теи эйсэнк Пазонтень алтазь ломанекс ды секс мекс тынь кемтядо видечинтень.

<sup>14</sup>Тенень Сон тердидизь тынк Кенярксов кулясонть, конань минь пачтинек тыненк. Сестэ тынь явсынк минек Иисус Христос Азоронтъ инексчинзэ.

<sup>15</sup>Истямо ладсо, кемиця ялгат, аштеде-кирдеведе кеместэ се тонавтомасонтъ, конанень минь тынк тонавтыдизь икеленк ёвтазь валсо эли кучозь сёрмасо!

<sup>16</sup>Ды Сонсь Иисус Христос Азоронок ды Пазось, минек Тетянок, кона минек вечксамизь ды кона Эсь чанстензэ кувалт казимизь минек пингеде пингень важдамосо-оймамосо ды паро седейнежедьксэ, –

<sup>17</sup>кадык вайдасызь-оймавтсызь седеенк ды виевгавттадызь тынк эрва кодамо паро тевс-валс.

## 2-е Фессалоникийцам 3

### Павол терди озномо

<sup>1</sup>Ды меельцекс, кемиця ялгат, ознодо минек кисэ. Кадык Азоронтъ валось курокто пачкодевелъ эрва ков ды улевель шназь лиятнень ютксоjak, кода тынк ютксо.

<sup>2</sup>Ознодо сень кисэjak, кадык Пазось ванстсамизь минек апаро ды зьянонь кандыця ломантнеде, эдь аволь весень ули кемемаст.

<sup>3</sup>А вана Азорось кемевикс. Сон виевгавттадызь ды ванстадызь апародонтъ.

<sup>4</sup>Азорось миненек максы кемема тынк лангс: тынь топавттадо ды карматадоjak топавтомо сень, мезе минь тыненк кармавттаном.

<sup>5</sup>Ды кадык Азорось аравтсынзе-ветясынзе тынк седеенк Пазонь вечкемантень ды Христосонь цидярдомантень.

### Превспутомат нузякстнэнь туртов

<sup>6</sup>Кемиця ялгат, Иисус Христос Азоронок лемсэ кармавттаном тенк: кирдеведе ве ёно эрва кемиця ялганть эйстэ, конась эри нузяксто, тевтеме ды а моли минек максовт тонавтоманть мельга.

<sup>7</sup>Тынь тынсь содатадо, кода тыненк эряви теемс минек ладсо. Тынк кедьсэ минь тевтеме эзинек аштекшне.

<sup>8</sup>Кинь кедьсэjak кши сускомне стяко эзинек сэве, мекевланк, важдинек чинек-венек, виень апак жаля, а улемс киненьгак тыненк кирьгасо кевекс.

<sup>9</sup>Куш минек ульнесь азоркчинек вешемс пельденк лезкс, ансяк минь истя ялатеке эзинек тее, эдь минек ульнесь меленек максомс тыненк невтевокс. Кадык эрвась эйстэнк тейневель минек ладсо.



<sup>10</sup>Зярдэ минь ульнинек тынк кедьсэ, сестэ уш минь тыненк кармавтнинек: кинь арась мелезэ важомемс, се кадык а ярсыяк.

<sup>11</sup>Минь теде кортатано вана мекс: минь марятано, тынк улить зярыя ломаненк, конат нузялдыть, важомемскак а важдить, а эсь пряст эцить эрва тевс.

<sup>12</sup>Неть ломантнень минь кармавтано ды тердтяно минек Иисус Христос Азоронть лемсэ сэтьместэ важомеме ды эсест вийсэ пряст трямо.

<sup>13</sup>Тынь жо, кемиця ялгат, паронь теемстэ илядо сода сизема.

<sup>14</sup>Бути кияк а кунсолы сень, мезде минь сёрмадтано те сёрмасонть, сестэ кундынк сонзэ эсенк мельс: илядо пшкале тензэ ды кадык сонензэ карми уleme визькс!

<sup>15</sup>Ялатеке илядо лово сонзэ эсенк ятокс, мекевланк, путодо эйсэнзэ превс кода кемиця ялганк.

#### **Меельце паро мельть-арсемат**

<sup>16</sup>Кадык Сонсь Азорось, седейоймамонь лисьмапрясь, максы тенк седейоймамо, свал ды эрва кода. Улезэ Азорось весеменк тынк марто!

<sup>17</sup>Шумбракстнеманть мон, Павол, сёрмалян тезэнь эсень кедьсэ. Истя тешкстнян эрва сёрмам.

<sup>18</sup>Минек Иисус Христос Азоронть чанстесь улезэ весеменк тынк марто!  
Аминь.

## Тимофейнень Паволонь Васенце Сёрмазо

### 1-е Тимофею 1

<sup>1</sup>Павол, Иисус Христосонь апостолось, конань аравтызе Пазось, минек Идицясь, ды Христос Иисус Азорось, минек седейнежедьксэсь,

<sup>2</sup>кучи шумбракстнемат Тимофейнень, кемемань коряс сонзэ алкуксонь цёрантень. Улезэ теть чансть, седеймарямо ды седейоймамо минек Тетя Пазонтъ пельде ды минек Христос Иисус Азоронтъ пельде!

#### Кармавтомат лия тонавтоматнень коряс

<sup>3</sup>Македонияв туемстэ мон энялдынь теть кадовомс Эфессэ вана мекс: тонеть эрявсь кармавтомс кой-конатненень, иляст пачтне лия тонавтомат,

<sup>4</sup>ды иляст яво мель ёвкстнэнень ды кезэрень шкань покштятненень лемень певтеме кортавтоматненень. Сынъ ветить аэрявикс пелькстамотнес-спорямотнес ды а кандыть кодамояк лезэ Пазонтень кемемань кастомантень.

<sup>5</sup>Те кармавтоманть бажамозо – кирвазтемс вечкема, кона лиси ванькс седейстэ, паро-виде оймеёжосто ды алкуксонь кемемасто.

<sup>6</sup>Кой-конат потастъ-мурдасть весе тень эйстэ ды ваясть стяконь келень-валонь таргсемас.

<sup>7</sup>Сынст мелест улемс Койс тонавтыцякс, ансяк сынъ а чарькодить сень, мезде кортыть, ды сеньгак, мезентъ виевстэ кемекстыть валсост.

<sup>8</sup>Минь содатано: Коесь паро сестэ, бути сонзэ кода эряви нолдасак тевс.

<sup>9</sup>Ды чарькодъсак: Коесь аравтозь-путозь аволь видечисэтненень, мекевланк, Коень колсицятненень, акунсолыцятненень, пазтомотненень ды пежетевтненень. Сон истя жо путозь визькстэметненень ды нарьгицятненень, ломанень ды мик тетянь-авань маштницятненень.

<sup>10</sup>Коесь сёрмадозь ускурицятненень, цёра цёра марто удсицятненень, ломанень салыцятненень, кенгелицятненень ды авидестэ божицятненень-пежетькстыцятненень ды весе сетненень, кить молить шумбра тонавтоманть каршо.

<sup>11</sup>Те тонавтомась кирдеви шназь-чанствязь ды ине Пазонтъ Кенярков кулясонть. Те кулянтъ пачтямонзо Пазось максызе монень.

### **Сюкпря Пазонтень седеймарямонзо кисэ**

<sup>12</sup>Ёвтан сюкпря минек Христос Иисус Азоронтень, кона макссь монень вий. Ёвтан Сонензэ сюкпря секс, мекс Сон ловимим монь кемевиксэкс ды аравтымим Эстензэ важодеме,

<sup>13</sup>монь, кона икеле ульнесь Сонзэ сюдыцякс, пансицякс ды нарьгицякс-покордыцякс. Пазось жо путызе монень седеймарямонзо секс, мекс мон эсень акемемам коряс а содылинь, мезе тейнинь.

<sup>14</sup>Минек Азорось сюпавсто валызе монь лангс Эсь чанстензэ, истя жо макссь монень кемема ды вечкема Христос Иисус вельде.

<sup>15</sup>Нетъ валтнэ видеть ды эрявить путомс седейс: Христос Иисус сась масторлангс идеме пежетевтнень, конатнень ютксо мон сехте пежетевесь.

<sup>16</sup>Ансяк Пазось путызе монень седеймарямонзо вана мекс: Иисус Христос невтевлize васенцекс монь лангсо Эсензэ куватень цидярдоманзо. Монь лангс ванозь, лиятнеяк теде мейле кармавольть кемеме Тензэ ды совавольть пингеде пингень эрямос.

<sup>17</sup>Пингеде пингень Инязоронтень, акулыця, анеявиця, вейкине превейдеяк превей Пазонтень шнамо ды инексчи пингеде пингес! Аминь.

<sup>18</sup>Цёрынем, Тимофей, те кармавтоманть мон максан тонеть пазмарицянь валтнэнь коряс, конат икеле ульнестъ ёвтазь тондетъ: ветяк нетъ валтнэнь лангс нежедезь паро тюрема,

<sup>19</sup>ванстык кемемат ды ванькс оймеёжот. Конат-конат сонзэ ёмавтызь, ды кемемасткак ваясь, кода венч иневедьс.

<sup>20</sup>Истятнэ Гименей Александр марто, конатнень мон максынь Сатананень. Кадык тонадыть ды а кармить Пазонтъ нарьгакшномо-покордакшномо!

## 1-е Тимофею 2

### Кемицянь промкссо озномадо ды прянь ветямодо

<sup>1</sup>Секскак васняк энялдан тетъ вана мезень кувалт: вешематне, озноматне, энялдоматне, сукпрянь ёвтамотне улест ютавтозь-ветязь весе ломантнень кисэ.

<sup>2</sup>Инязортнэнь ды весе прывтнэнь кисэяк эряви озномс. Те максы миненек эрямс сэтъместэ ды ладямосо, Пазонтъ мелензэ ванозь ды парокойсэ.

<sup>3</sup>Те паро ды вечкеви Пазонтень, минек Идицянтень,

<sup>4</sup>конань мелезэ идемс весе ломантнень ды ветямс-пачтямс сынст видечинь чарькодемантень.

<sup>5</sup>Эдь Пазось вейке, ды Пазонтъ ды ломантнень ютксо тевень якавтыцяськак вейке – те ломанесь Христос Иисус,

<sup>6</sup>кона максызе Эсь прянзо весень идемань-рамамонь кисэ. Истя Сон кармась улеме Пазонтъ пельде аравтозь шкасто идемань невтиця тешксэкс.

<sup>7</sup>Тень кисэ Пазось аравтымим монь Сонзэ кулянъ кандыцякс ды апостолокс, лия раськетнень кемемантень ды видечинтень тонавтыцякс. Христос марто вейсэндязь, мон кортан видечи, а кенгелян.

<sup>8</sup>Монь ули мелем: эрва косо озновольть цёратне ды кепсевельть кедест ванькс мель марто, кежтеме ды кавтолдомавтомо.

<sup>9</sup>Аватнень коряскак монь истямо мелем: сыненст эряви оршамс сельмес а каявиця оршамосо ды наряжамс-мазылгавтомс эсь пряст виздезь ды паро коень кирдезь, аволь черькодавкссо, сырнесэ, питней эрьгесэ ды сюпав оршамосо.

<sup>10</sup>Кадык сынь мазылгалить паро тевсэ, кода лади аванень, конат апак кекше невтить эсь пряст Пазнэнь кемицякс.

<sup>11</sup>Кадык авась кунсолы тонавтоманть чатьмонезь, алкуксонь сэтьме лувсо-ладсо.

<sup>12</sup>Мон а мерян аванень тонавтомс ды кирдемс кедензэ ало цёранть. Кадык чатьмони.

<sup>13</sup>Эдь васняк ульнесь теезь Адам, мейле Ева.

<sup>14</sup>Ды ильведстезь-манязь ульнесь аволь Адам, ильведстезь-манязь ульнесь авась, ды истя сон прась пежетьс.

<sup>15</sup>Ялатеке сонгак идезь ули кода эйкакшонь чачтница, бути карми эрямо кемемасо ды вечкемасо ды карми ветямо сэтьме, Пазонтень алтазь эрямо.

### **1-е Тимофею 3**

#### **Кодамокс улема кемикуронь ветицянтень-ваныцянтень**

<sup>1</sup>Нетъ валтнэ видеть: бути кие бажи улемс кемикуронь ветицякс-ваныцякс, се бажи паро тевс.

<sup>2</sup>Кемикуронь ветицянтень-ваныцянтень эряви улемс чумовтомокс, вейке нинь мирдекс, валдо превекс, ванькс мельсэ эрицякс, парсте прянзо ветицякс, видеоймекс, инжень вечкицякс, ёроков тонавтыцякс.

<sup>3</sup>Сон улезэ а симицякс, а тюрицякс, а маштнетицякс, аволь эстензэ лезэнь визькстэме вешницякс, мекевланк, чевте седеекс, лия марто ладицякс, ярмак мельга а правтыцякс.

<sup>4</sup>Сонензэ эряви ветямс эсь кудораськензэ вадрясто ды трымс-кастомс эйкакшонзо кунсолыцякс ды весень ловицякс.

<sup>5</sup>Эдь кие а машты эсь кудораськензэ ветямо, арази се карми улеме Пазонь кемикуронтъ кисэ мелявтыцякс?

<sup>6</sup>Илязо уле сон сетнень ютксто, конат аволь умок кемезевсть Пазонтень. Истямотне шождасто кармить пряст верьга кандомо ды понгить судс Идемевсентъ ладсо.

<sup>7</sup>Сонзэ коряс улест паро кулят эрьва косо, аволь ансяк кемикуросо, ды истямо ладсо сон илязо тееве ломанень кортавтомакс ды илязо понго Идемевсень кедьс-коморс.

#### **Кодамокс улема кемикуронь лездыцятненень**

<sup>8</sup>Кемикуронь лездыцятнеяк улест шнавиця ломанть, аволь кавто чачосот, вина мельга а правтыцят, уличи мельга а пансицят;

<sup>9</sup>ды сыненст ванстома кемемань салавачинть ванькс оймеёжосо.

<sup>10</sup>Васняк сынст истя жо эряви варчавтнемс-терявтнемс ды, бути сынъ ачумондовицят, сестэ кадык важдить.

<sup>11</sup>Истя жо аватнененьгак улема шнавиця ломанекс, лиянь а кортавтыцякс, валдо превекс, весемесэ кемевиксэкс.

<sup>12</sup>Кемикуронь лездыцятне улест вейке нинь мирдекс ды маштоост эсь эйкакшост ды кудораськест парсте ветямо.

<sup>13</sup>Кить парсте важдить, сеть теевить содавиксэкс-лововиксэкс кемикуронтъ ды пештявить Христос Иисуснэнь кемемань покш вийсэнтъ.

#### **Кемемань салавачись**

<sup>14</sup>Тень сёрмадан тонеть истямо кемема марто: куроц тетъ сан.

<sup>15</sup>Ды бути куроц а пачкодян, сестэ тон те сёрмастонть содавлить, кода эряви ветямс прянтъ Пазонь кудосотнень ютксо, эриця Пазонь Кемикуронтъ, кона ули видечинть нежедьксэкс ды куроц.

<sup>16</sup>Нама, минек кемеманть салавачись вельть ине – Пазось сась ломанень рунгосо, Оймеялтось невтизе Сонзэ видечинзэ, ангелтнэ

неизь Сонзэ, раськетненень пачтясть Эйстэнзэ куля, Сонензэ кемезевсть масторлангсонть, ды Сон кепедезель менелень инексчис.

## 1-е Тимофею 4

### Манчиця тонавтомат

<sup>1</sup>Оймеялтось чарькодевиксстэ корты: меельце шкатнестэ кой-кить потыть кемемадонть. Сынъ кармить кунсолосо кенгелиця-манчиця оймеялтиэнъ ды идемевстнень тонавтоматнень.

<sup>2</sup>Нетъ тонавтоматне сыть-кемекставить кавто чачосо кенгелицятнень вельде, конатнень оймеёжост клеймазь-тешкстазь теке сыртезь кшнисэ.

<sup>3</sup>Сынъ а мерить урвакстомс ды ярсамс кой-кона ярсамопельдентъ. Пазось жо теизе сонзэ сень кисэ: кадык сеть, кить кемить ды содасызь видечинть, ярсыть эйстэнзэ сюкпрянь ёвтазь.

<sup>4</sup>Весе, мезентъ теизе Пазось, паро, ды а эряви ёртомс мезеяк, зярдо сон саеви сюкпря марто,

<sup>5</sup>секс мекс сон тееви иневаньксэкс Пазонтъ валсо ды озномасо.

### Христос Иисусонь вадря важо

<sup>6</sup>Зярдо тон максат истят превспутомат кемиця ялгатненень, сестэ улят Иисус Христосонь вадря важокс, кона трызъ-кастозь кемемань валсо ды паро тонавтомасо, конань мельга тон, Тимофей, туйть.

<sup>7</sup>Кирдевь ве ёно пазтомо ды аэрявикс побаскатнеде, ды пек бажак эрямо Пазонтъ мелензэ коряс.

<sup>8</sup>Бажамось рунго виень кемекстамонтень лезэв аламосо, а вана Пазонь мелень коряс эрямось лезэв эрва мейсэ. Сонзэ эйсэ ули алтамо неень ды икелепелень эрямодонтъ.

<sup>9</sup>Нетъ валтнэ видеть ды эрявить путомс седейс.

<sup>10</sup>Секскак минь, сиземань апак сода, важдтяно ды кирдтяно покордамот, эдь минь кемтяно-нежедтяно эриця Пазонть лангс, конась весе ломантнень Идицяст, ды васняк кемицятнень.

<sup>11</sup>Вана тень кармавт ды истя тонавт.

<sup>12</sup>Кадык кияк а ваны лангозот верде секс, мекс тон одат. Тон жо кемицятненень ульть невтевксэкс валсот, прянь ветямосот, вечкемасот, оймеялтсот, кемемасот ды ваньксчисэть.

<sup>13</sup>Монь самс ютавт шкат кемицятненень Пазонь Сёрмадовксонть ловномасо, превс путомасо, тонавтомасо.

<sup>14</sup>Иля стувтне Оймеялтонь казнеденть, конась максозель тонеть пазмарицянь валтнэнь коряс, зярдэ кемикуронь прявтнэ путнизь кедест тонь лангс.

<sup>15</sup>Тейть весементь тень седеень путозь ды покш мельсэ, ды сестэ весе несызь тонь теветь-изнявксот.

<sup>16</sup>Вант эсеть эрямот мельга ды сень мельгаяк, мезес тонавтат. Седе товгак тейть истя, сестэ тон идесыть эсь пряткак ды эсеть кунсолыцятненьгак.

## 1-е Тимофею 5

### Кемикуронь сыре ды од ломантне ды доватне

<sup>1</sup>Сыре цёранть кежевстэ иля мурне, мекевланк, превс путт эйсэнзэ знялдозь-лацезь, теке эсеть тетянь. Тондеть одтнэнь марто кортнек, теке эсеть ялаксот марто.

<sup>2</sup>Сыре аватненень пшкалек теке аватень; сетненень, конат тондеть одт, теке сазоротень, ванькс мельсэ.

<sup>3</sup>Ловт доватнень, конат алкукс съкамост.

<sup>4</sup>Бути жо дованть улить эйкакшонзо эли нуцьканзо, сестэ васняк сыненст эряви невтемс эсест кемемаст тевсэ: кадык сынь тонадыть



мелявтомо эсь кудораськест кисэ ды истя пандомо тетятнень-аватнень туртов эсь долгост, эдь те тукшны Пазонтъ мельс.

<sup>5</sup>Алкуксонь, ськамонзо кадовозь доvasь кеми-нежеди ансяк Пазонтъ лангс, чинек-венек озны ды веши пельдензэ лезкс.

<sup>6</sup>Истямо жо доvasь, кона эри эсь седеензэ-мелензэ витемань-петемань кисэ, уш кулозь ломанень кондямо.

<sup>7</sup>Тень вана кармавт тенст: улезэ сынст эрямост ачумондовиця.

<sup>8</sup>Кие а мелявты роднядонзо-раськедензэ, ды васняк эсь кудосотнеде, се ёртызе-кадызе кемеманть ды теевсь акемицядонтькак берянекс.

<sup>9</sup>Довакс сёрмадома ансяк сетнень, конат кодгемень иеде аволь седе одт ды ульнестъ вейке мирдень никс,

<sup>10</sup>конатнень содасызь эсь паро тевест кувалт, эйкакшонь кастомга-трямга, инжень вастомга, кудозост совиця Пазонь ломантненень пильгень шлямга, стакачис понгозтненень лездамга ды эрва кодамо паро тевс эсь прянь алтамга.

<sup>11</sup>Од доватнень илить сёрмадо. Эдь зярдод сынь одонь ёжомарямотнень коряс сыть мельс лисемс мирденень, сестэ те васолгавты сынст Христосто.

<sup>12</sup>Истя сынст лангс пры чумондома, секс мекс сынь колызь икелень максавт алтамост: улемс видекс ансяк Христоснэнь.

<sup>13</sup>Теке марто сынь теевить важдемань авечкицякс ды тонадыть кудодо кудос якамо. Истя жо сынь теевить лиядо чаво валсо кортыцякс, эцитъ ломань тевс, ды ёвтнить седе, мезде а эряви кортамс.

<sup>14</sup>Секскак монь мелем: кадык од доватне лисить мирденень, чачнить эйкакшт, ветить кудюотконь тевть ды а максыть минек каршо молицятненень тувтал берянь кортамотненень.

<sup>15</sup>Эдь кой-конатне уш пурдасть виде ки лангсто ды тустъ Сатананть мельга.

<sup>16</sup>Бути кемиця братонтъ эли кемиця сазоронтъ улить довакс кадовозь раськензэ, сестэ кадык мелявтыть сынст эйстэ ды а путови те сталмось кемикуронтъ лангс, конанень лездама алкуксонь доватненень.

### Кемикуронь прявтнэ

<sup>17</sup>Сеть кемикуронь прявтнэнь, конат парсте ветить тевест, эряви шнамскак ды парсте тенст пандомскак, васняк сетненень, конат важдить Кенярксов кулянъ пачтямонтъ ды тонавтомантъ коряс.

<sup>18</sup>Эдь Сёрмадовксось корты: «Иляк пекста пивсыця букантъ кургонзо» ды «Важдицянтень пандыть тевензэ кисэ».

<sup>19</sup>Иля кунсоло чумондомантъ кемикуронь прявтонть лангс, бути сонзэ а кемекстасызь кавто эли колмо ломантъ.

<sup>20</sup>Пежетень теиницятнень жо таргак лангс весеме икеле, кадык лиятнеяк пелезевить.

<sup>21</sup>Мон пек энядан тетъ, Тимофей, Пазонтъ ды Иисус Христос Азоронтъ икеле ды Сонзэ кочкавт ангелтнэнь икеле нолдамс тевс неть кармавтоматнень. Ветяк прят вейкетъстэ весеме марто, эрва кодамо тевсэ, кинь лангскак аapak вано.

<sup>22</sup>Иля капша баславамс киньгак кемикуронь прявтокс эли важдицякс сонзэ лангс кедеть путома вельде. Сестэ тон а кармат улеме лия ломанень пежетень теemaso. Ванстык эсь прят ваньксэкс.

<sup>23</sup>Седе тов симть аволь ансяк ведь, симть аламонь-аламонь винаяк пекеть кисэ ды сеedyстэ берянь ёжомарямот кувалткак.

<sup>24</sup>Кой-кинъ пежетест неявить уш нейке, ды сынъ понгить судс икеле, лиятнень жо – панжовить мейле.

<sup>25</sup>Истя эрси паро тевтнень мартаюк: веенстнэ сельме икеле уш нейке, лиятне, конат а неявитькак, ялатеке а кекшевить.

## 1-е Тимофею 6

### Уреть ды сынст азорост

<sup>1</sup>Сеть, конат кандыть урексчинь ашконтъ, кадык невтить эсест азорост туртов седейшкавань ловома. Истя теезь, Пазонтъ лемезэяк ды тонавтомазояк а улить сялдозь-покордазь.

<sup>2</sup>Сеть, кинь азорост кемицят, кадык а ветить эсь пряст мартост мелень апак путо, секс мекс сынь кемиця ялгаст. Мекевланк, кадык важдить тенст седеяк покш мельсэ, эдь азорост – кемиця ломанть, вечкевикст ды паро темень теицят.

### Авиде тонавтома ды алкуксонь сюпавчи

Тенень тонавт ды тердть ломантнень.

<sup>3</sup>Бути кияк тонавты лия тонавтомас ды а моли минек Азоронтъ Иисус Христосонь шумбра валтнэнь мельга ды се тонавтоманть мельга, кона кирди-панжи Пазонтень алкуксонь кемеманть,

<sup>4</sup>се прянь верьга кандыця ды мезеньгак а чарькодиця. Сонензэ педясь валсо пелькстамонь ды тюремань орма. Те вети сельмень сявадомас, сёвномас, покордамос-сялдомас, лиядо апаро мельсэ арсемас,

<sup>5</sup>певтеме пелькстамос-сёвномас ломантнень ютксо, конатнень превест колазь ды конатне ёмавтызь видечинть. Сынь арсить: Пазонтень кемемась-важдемась – те ки, кона ветятанзат сюпавчис. Истятнэде кирдевить ве ёно.

<sup>6</sup>Нама, Пазонтень кемемась-важдемась – те улиак покш сюпавчи сестэ, зярдю ломанентень саты се, мезезэ сонзэ ули.

<sup>7</sup>Эдь минь мезеяк эзинек кандо те мирэнтъ-масторонтъ лангс, ды, нама, мезеяк тестэ мартонок а саевияк.

<sup>8</sup>Бути ули ярсамопеленек ды оршамопеленек – сестэ текеяк кадык саты тенек.

<sup>9</sup>Сеть жо, кить бажить сюпалгадомас, манявить пежетьс, понгонить кундамкас ды ламо превтеме ды зыянов мельтнес, конат таргить-ускить ломаненть кажос ды куломас-ёмамос.

<sup>10</sup>Эдь весе кажотнень-зыянтнэнь юрость – те ярмаконь вечкемась. Улить истят ломанть, конатнень ярмак мельга правтомаст пурдавтынзе кемеманть эйстэ, ды сынсь таргасть лангозост алововикс майсемат-пиштемат.

### Кемеманть кисэ паро тюрема

<sup>11</sup>А вана тон, Пазонь ломань, оргодть тень эйстэ! Бажак видечис, Пазонть мелензэ коряс эрямос, кемемас, вечкемас, цидярдомас, сэтьмечис.

<sup>12</sup>Ветяк кемеманть кисэ паро тюрема, изник эстеть пингеде пингень эрямонть, конанень тон тердезят! Эдь ламотнень икеле тон апак кекше панжик эсеть кемемат.

<sup>13</sup>Пазонть икеле, кона максы эрямо весементень, ды Христос Иисус икеле, кона Понтий Пилат икеле апак кекше панжизе эсь кемеманзо, мон кармаван-энялдан тетъ:

<sup>14</sup>ваньксстэ ды видестэ топавт весементень, мезе мон тетъ кармавтынъ, минек Иисус Христос Азоронть самозонзо.

<sup>15</sup>Аравтозь шкастонзо Сонзэ самонть панжсы-невтьсы тенек Пазось, шназь-чанстязь ды вейкине Виевесь, инязортнэнь Инязорось ды азортнэнь Азорось.

<sup>16</sup>Сон ськамонзо, кие а кулыця. Сон эри истямо валдосо, козонь кияк малавгак а пачкодеви. Сонзэ вейкеяк ломань эзизе нее, ды Сонзэ а кода неемскак. Улезэ Сонензэ шнамо ды пингеде пингень азорксчи! Аминь.

<sup>17</sup>Кармавт сетненень, конат ней сюпавт те масторлангсонть: кадык пряст верьга а кандыть ды а нежедить аволь кемевикс сюпавчист лангс, мекевланк, кадык кемить-нежедить эриця Пазонть лангс, кона сюпавсто максы миненек весементень седеенек витемань кисэ.

<sup>18</sup>Кармавт эйсэст паронь тееме, кадык сюпалгадыть вадря тевсэ. Кадык улить сюпав максыцякс ды анокт явомс лиятненень эсь уличидест.

<sup>19</sup>Истямо ладсо сынъ таштыть эстет сьупавчи – кеме юр сы шкантень,  
ды пачкодить пингеде пингень эрямос.

**Меельце валтнэ Тимофейнень**

<sup>20</sup>Тимофей, ванстык сень, мезесь, лангозот кемезь, тонеть максозь!  
Кирдевить ве ёно пазтомо ды чаво кортамотнеде ды пелькстамотнеде,  
конатнеде авидестэ мерить “содамочи”,

<sup>21</sup>конань мельга молезь, кой-кить уш пурдасть кемеманть ки лангсто.  
Пазонь чанстесь улезэ мартот! Аминь.



## Тимофейнень Паволонь Омбоце Сёрмазо

### 2-е Тимофею 1

<sup>1</sup>Павол, Пазонтъ мелензэ коряс, Иисус Христосонь апостолось, кона кучозь пачтямо алтамонть Христос Иисус марто вейсэндязь эрямодонтъ,

<sup>2</sup>кучи шумбрактнемат Тимофейнень, эсь вечкевикс цёранть туртов. Улезэ тетъ чансть, седеймарямо ды седейоймамо Тетя Пазонтъ пельде ды минек Христос Иисус Азоронтъ пельде!

#### Сюкпрат Пазонтень

<sup>3</sup>Мон ёвтан сюкпря Пазонтень, конанень эсень покштятнень-бабатнень ладсо важдян ванькс оймеёжосо ды ледстнян тонь мельс эсень озноматнесэ свал, читькак, ветькак.

<sup>4</sup>Зярдо мелезэнь ледить тонь сельведтне, мон пек бажан неемс тонь, секс мекс сестэ карман кенярдомо весе оймесэнь.

<sup>5</sup>Мон ёвтан сюкпря Пазонтень, зярдо монь мельс сы тонь седейшкавань ванькс кемемат, конась васня ульнесь тонь Лоида бабать ды Эвнике авать седейсэ. Мон кеман: нама, сон эри тонь эйсэяк.

#### Тонавтомань шумбра валтнэ

<sup>6</sup>Секскак мон ледстнян мелезэть: кода вельмевтить-паловтыть толонтъ, истя тонгак вельмевть-паловт эсеть эйсэ Пазонь казненъ толонтъ. Те казнесь ульнесь максозь тонеть сестэ, зярдо мон путынь кедень тонь лангс.

<sup>7</sup>Эдь Пазось казсь миненек оймеялт, кона максы тенек вий, вечкема ды ванькс превть-мельть, аволь пелема.

<sup>8</sup>Секскак, иля визде ёвтнемеде-яволявтнемеде кулянтъ минек Иисус Христос Азородонтъ ды иля визделгале монденьгак, кона пекстазь Сонзэ кисэ. Мекевланк, тонеть максозь Пазонь вийсэнтъ, пиштть-майсек монь марто Христосто Кенярксов кулянтъ кисэ.

<sup>9</sup>Пазось идимизь минек ды тердимизь улемс Сонензэ алтазь ломанекс. Сон тень теизе Эсь мелензэ-арсеманзо ды чанстензэ коряс, аволь минек тевенек коряс. Те чанстесь максозь миненек Христос Иисусонь вельде пингетнень ушодомадо икеле.

<sup>10</sup>Ды ней сон теевсь неявиксэкс минек Идицянтъ Иисус Христосонь самонзо вельде. Христос ёмавтызе-изнизе куломанть, ды Кенярков кулянтъ вельде невтизе-панжизе миненек эрямонтъ ды акулманть.

<sup>11</sup>Те Кулянтъ пачтицякс, апостолокс ды тонавтыцякс лия раськетнень туртов Пазось аравтымим монь!

<sup>12</sup>Вана те тувталось, конань кувалт мон кирдян истят майсемат. Ансяк мон а виздян. Эдь мон содан, кинень кемезевинь, ды кеместэ содан: Сонзэ ули виезэ меельце чинть видьс ванстомс сень, мезентъ Сон, лангозон кемезь, максызе монень.

<sup>13</sup>Кадык сеть шумбра валтнэ, конатнень тон марить монь пельде, кармить улеме тонеть тонавтомакс-невтемакс. Ды эряк кемемасо ды вечкемасо, Христос Иисус марто вейсэндязь.

<sup>14</sup>Минек эйсэ эриця Иневанькс Оймеялтонть вельде ванстык весе се паронть, мезесь, лангозот кемезь, тонеть максозь.

<sup>15</sup>Тон содат: Асиясо весе велявтсть-тусть монь эйстэ, сынст ютксо Фигел марто Гермогент.

<sup>16</sup>Кадык Азорось невьсы Эсь седеймарямонзо Онесифоронь кудораськенстэнь. Онесифор сеedyстэ шождалгавтнесь монь ойментъ ды эзь визделгале тюрьмасо монь улемадонть.

<sup>17</sup>Зярдэ жо сон сакшнось Римев, сестэ пек вешнесь монь эйсэ ды муимим.

<sup>18</sup>Кадык Азорось макссы тензэ Эсь седеймарямонзо меельце чистэнтъ. Ды кода ламо сон лездась монень Эфессэ, тень тон содат весемеде парсте!

## 2-е Тимофею 2

### Кенярков кулянтъ кисэ тюрема ды пиштема

<sup>1</sup>Истя, цёрынем, кемекстык прят Пазонь чанстьсэнтъ, кона максозь тенек Христос Иисус марто вейсэндямонтъ вельде.

<sup>2</sup>Ды сень, мезентъ тон марик монь пельде ламо кунсолыцятнень пингестэ, ёвтник-максык кемевикс ломантненень, конатне маштыть лиятненьгак тонавтомо.

<sup>3</sup>Пиштть-майсек мартонок тонгак, кода Иисус Христосонь кемевикс солдат-ушман.

<sup>4</sup>Кодамояк ушман а сюлми эсь прянзо кудюютконь эрямо-аштема тевсэ, эдь сон бажи туемс мельс сенень, конась сиведизе сонзэ ушманокс.

<sup>5</sup>Ды кодамояк чийница спортсменнэнь а максови изницянь каштаз, бути сон а карми чийнеме путозь койтнень коряс.

<sup>6</sup>Истя сокицянтень-видицянтень, кона важоди псилгадомазонзо, васенцекс эряви максомс таликанзо чачозентъ-касозентъ эйстэ.

<sup>7</sup>Арсек седе, мезде мон кортан. Кадык Азорось лезды тетъ чарькодемс весементъ.

<sup>8</sup>Кирдть мельсэть Иисус Христос Азоронтъ, кона лиссь-чачсь Давидэнь юрсто ды ульнесь вельмевтезь кулозьстэ. Истя ёвтни Кенярков кулясь, конань мон пачтян.

<sup>9</sup>Те кулянтъ кисэ мон пиштянгат, мик пекстазян-тертязан, теке зыянонь теиця. Ансяк Пазонь валось мейсэяк а тертяви.

<sup>10</sup>Секскак мон кирдян-кандан весементъ Пазонь кочкавтнэнь кисэ. Кадык сыненсткак максови Христос Иисус марто вейсэндямонтъ эйсэ идема ды теке марто пингеде пингень инексчи.

<sup>11</sup>Видеть нетъ валтнэ: Бути минь кулынек Христос марто, сестэ эрямояк карматано Сонзэ марто.



<sup>12</sup>Бути кирдяно майсемат, сестэ вейсэ мартонзо инязороккак ультяно. Бути минь Сонзэ эйстэ каясынек прянок, сестэ Сонгак минек эйстэ каясы прянзо.

<sup>13</sup>Бути минь а кемевикст, Сон ялатеке кадови кемевиксэкс, эдь Сон Эсензэ эйстэ зярдояк прянзо а каясы.

#### Пазонь кемевикс важо

<sup>14</sup>Ледстнек весенень тень ды Азоронть икеле вешть пельдест, кадык а пелькстыть-спорить стяконь валтнэнь коряс. Тень эйстэ кодамояк лезэ арась, ды кунсолыцятненень сон канды ансяк зыян.

<sup>15</sup>Пек бажак улемс Пазонть икеле Сонензэ кемевиксэкс ды истямо важодицякс, конанень амежень кисэ визделгалемс ды конась видестэ тонавты Пазонь видечинь валонть.

<sup>16</sup>Кирдевьт ве ёно Пазонть мельс а туиця чаво валтнэде-кельтнеде. Эдь сынст сравтницяст яла седе васов ды васов туить Пазонть эйстэ.

<sup>17</sup>Ды сынст валтнэ сралить рак орманть ладсо. Нетнень ютксо Гименейгак Филет марто,

<sup>18</sup>конат пурдасть видечинть ки лангсто ды кортыть: кулозьстэ вельмемась уш ульнесь-ютась. Истя сынь колыть-калавтыть конань-конань кемемаст.

<sup>19</sup>А вана Пазонь путовт юрось ашти кеместэ, ды сонзэ лангсо сёрмадозь: «Азорось содасынзе Эсензэтнень» ды «Эрьвась, кие ёвтни Азоронть лемензэ, туезэ ве ёнов авидечинть эйстэ!»

<sup>20</sup>Нама, покш кудосо улить аволь ансяк сырнень ды сиянь кедьгеть, истя жо чувтонь ды сёвонень кедьгетькак. Веенстнэ, питнейтне, сайневить покш тевс, омбонстнэ, аволь питнейтне, эрьва чинь тевс.

<sup>21</sup>Се, кие ванськавтсы прянзо беряненць-зыяновонть эйстэ, карми уleme кода питней кедьге. Сон алтазь Пазонтень, лезэв эсь Азоронстэнь ды анок эрьва кодамо паро тевс.

<sup>22</sup>Од ломанень лакиця ёжомарямотнеде тук-оргодть ве ёнов ды бажак видечис, кемемас, вечкемас, седейоймамос вейсэ весе сетнень марто, конат ванькс седейсэ тердить лездыцякс Азоронть.

<sup>23</sup>Кирдевь ве ёно превтеме ды чаво пелькстамотнеде-спорямотнеде. Тон жо содат, сынъ чачтыть-кастыть сёвномат.

<sup>24</sup>Пазонь важонтень а лади сёвномс. Мекевланк, сонензэ улема весень марто чевте седейкс, маштома тонавтомо ды весеметь кирдеме-кандомо,

<sup>25</sup>сэтьместэ-чевтестэ путома превс каршо молицятнень. Сестэ Пазось, паряк, максы тенст янксема-велявтома ды видечинть чарькодема.

<sup>26</sup>Ды истямо ладсо сынъ сыть ёжос ды оргодить-менить Идемевсень кундамкастонть, ков сон саинзе сынст эсь мелензэ топавтомо.

## 2-е Тимофею 3

### Меельце стака шкатне

<sup>1</sup>Содак тень: меельце читнестэ сыть стака шкат.

<sup>2</sup>Ломантне кармить вечкеме ансяк эсь пряст ды ярмакт, кармить каштангалеме ды прянь верьга кандомо, сынъ валсо покордыцят, тетянь-авань акунсолыцят, вадрянъ асодыцят, сынст оймесэст арась кодамояк Пазонь паро. Сынъ авечкицят,

<sup>3</sup>аладицят, ломань лангс кортыцят-кенгелицят, ацирьгалицят, кежейть-казямот, паронь асодыцят,

<sup>4</sup>лиянь мицият, визькстэметь, пряст покшкавтницият. Сынъ седе пек вечксызь тантей шожда эрямонтъ, аволь Пазонтъ.

<sup>5</sup>Эсь пряст сынъ невтить Пазнэнь кемицякс, ансяк эсь потмоваст кемемань виенть мезекскак а ловить. Истятнэде кирдевь ве ёно.

<sup>6</sup>Нетъ ломантнень ютксо сетнеяк, конат эцитъ кудос ды манчить лавшо аватнень, конатнень лангсо уш аштить ламо пежетть ды конатнень эрва ёнга ветнить-таргсить визькс мелень вешемаст.

<sup>7</sup>Нетъ аватне свал бажить од тонавтомантень, ансяк кодаяк а пачкодить видечинь чарькодемантень.

<sup>8</sup>Кода Яннес ды Ямбрес стясть Моисеень каршо, истя жо молитъ видечинть каршо нетъ кенгелиця тонавтыцятне, конатнень превест колазь ды кемемаст аволь алкуксонь.

<sup>9</sup>Ансяк сынъ аламо кенерить тееме: сынст превтемечись лиси лангс весень икеле, кода теевсь сеть кавтотнень мартояк.

### **Тимофейнень Паволонь кармавтомазо**

<sup>10</sup>Тон жо молитъ монь мельга тонавтомасо, эрямосо, бажамосо, кемемасо, куватень кирдемасо, вечкемасо, цидярдомасо ды

<sup>11</sup>истят пансематнесэ ды пиштематнесэ, конатне пракшность монь лангс Антиокиясо, Икониясо ды Листрасо. Весе нетъ пансематнень мон кирдинь ды весеметнень эйстэ Азорось монь идимим!

<sup>12</sup>Ды весень, кинь мелезэ эрямс видестэ Пазонтъ икеле Христос Иисус марто вейсэндязь, учить пансемат.

<sup>13</sup>Ансяк апаро ломантне ды манчицятне яла кармить тееме седе покш ды покш зыян, кармить виде ки лангсто пурдавтомо лиятнень ды эсь прясткак.

<sup>14</sup>Тон жо кирдевить сень эйсэ, мезес тонавтозят ды мезентъ кеместэ содат. Тон, нама, содат, кить тонь тонавтыцятне.

<sup>15</sup>Эйкакш пингестэ тон уш содат Пазонь Сёрмадовкстнэнь, конатнень ули виест максомс тетъ превейчи, конась ветятанзат тонь идемас Христос Иисуснэнь кемеманть вельде.

<sup>16</sup>Весе Сёрмадовкстнэ чачтозь Пазонтъ Оймеялтонзо вельде ды лезэвть. Сынъ тонавтыть минек, ливтитъ лангс пежетенек, аравтыть виде ки лангс ды путыть превс, кода эрямс Пазонь мелентъ коряс.

<sup>17</sup>Истямо ладсо Пазонь ломанесь ули анокстазь эрьва ёндо ды карми улеме анок эрьва кодамо паро тевс.

## 2-е Тимофею 4

### Тонавт видечис!

<sup>1</sup>Пазонтъ ды минек Иисус Христос Азоронтъ сельме икеле, кона карми судямо эрицятнень ды кулозтнень, кеместэ вешан пельдеть Сонзэ самонзо ды Инязорксчинзэ вельде:

<sup>2</sup>пачтяк Кенярксов кулянтъ! Ультъ анок те тевентень ён ды аволь ён шкастояк. Ливть лангс, мурнек-кардак ды кемекстак. Весе тень тейть цидярдозь, кода паро тонавтыця.

<sup>3</sup>Эдь сы шка, зярдэ ломантне потыть шумбра тонавтомадонть, ды вешнить эсь мелест коряс истят тонавтыця, конат кармить ёвтнеме тенст ансяк сень, мезенть сынъ сынсь бажить марямс.

<sup>4</sup>Сынъ потомдсызь пилест видечинтень, велявтыть эйстэнзэ ды кармить кунсолосо ломанень ёвтнемат-побаскат.

<sup>5</sup>Тон жо свал ультъ валдо превсэ, кандт стакачитнень, тейть эсь теветь: пачтяк Кенярксов кулянтъ, пародояк парсте топавт эсь важдемат.

<sup>6</sup>А вана монь эрямось – те уш кода алтарь лангсо путозь анокс, ды сась шам туемс те эрямостонтъ.

<sup>7</sup>Мон парсте ютавтъя тюреманть, мон чиия весе кинть, мон ванстыя кемеманть.

<sup>8</sup>Ды ней монь учи изницянь казне, видечинь каштаз, конань макссы монень Азорось, виде Судиясь, меельце чистэнтъ. Ды Сон макссы сонзэ весенень, кие вечкема марто учи Сонзэ самонтъ, аволь ансяк монень.

### Паволонь превспутоматне ды знялдоматне

<sup>9</sup>Бажак самс монень седе курок!

<sup>10</sup>Эдь Демас монь кадымим. Сонзэ седеентень вечкевсь неень пингень эрямось, ды сон тусь Фессалоникав. Креск тусь Галатияв, Тит – Далматияв. Монь марто кадовсь Лука съкамонзо.

<sup>11</sup>Саик мартот Марконь, секс мекс сон монень паро лездыця важодема тевсэнъ.

<sup>12</sup>Тикикень мон кучия Эфесэв.

<sup>13</sup>Зярдо сат, саик мартот плащом, мон сонзэ кадья Карпань кедьс Трoадасо, ды туить книгатнень, васняк, пергаментэнсетнень.

<sup>14</sup>Александр, кузнецесь, тейсь монень ламо зыян. Кадык Азорось максы тензэ тевензэ коряс!

<sup>15</sup>Тонгак ванстт прят сонзэ эйстэ. Эдь сон пек виевстэ мольсь минек валтнэнь каршо.

<sup>16</sup>Зярдо монень васенцеде савсь ёвтамс эсень кисэ идема вал, сестэ монень кияк лездамо эзь са, весе монь кадымизь. Илязо ловово те тенст чумокс!

<sup>17</sup>Ансяк Азорось аштесь монь кисэ. Те Сон макссь монень вий сень кисэ: парсте топавтовлия мон Кенярксов кулянь пачтямонтъ ды марявлизь сонзэ весе лия раськетне. Истя мон идевинь левень кургсто.

<sup>18</sup>Азорось седе товгак идесамам монь эрва кодамо зыяндо ды совавтсамам шумбрас-парсте Эсензэ менелень Инязорксчинтень. Шнамо Тензэ пингде пингес! Аминь.

#### **Меельце мельть-арсемат**

<sup>19</sup>Ёвтак шумбракстнемат Прискилланень ды Акиланень ды истя жо Онисифоронь кудораськенстэнь!

<sup>20</sup>Эраст кадовсь Коринфс, Трофимень мон кадья сэредеманзо кувалт Милетс.

<sup>21</sup>Бажак пачкодемс телень самс. Тонеть кучить шумбракстнемат Эвбул, Пуд, Лин, Клавдия ды весе кемиця ялгатне.

<sup>22</sup>Иисус Христос Азорось улезэ тонь марто! Пазонь чанстесь улезэ мартонк! Аминь.

## Титнэнь Паволонь Сёрмазо

### К Титу 1

<sup>1</sup>Мон – Павол, Пазонь важо, Иисус Христосонь апостол. Мон кучозян лездамо Пазонь кочкавтнэненень седе домкасто кемемс Азоронтень ды чарькодемс видечинть. Те видечись вети сынст Пазонь мелень топавтомантень

<sup>2</sup>ды максы сыненст седейнежедькс пингеде пингень эрямонтъ лангс. Те эрямонтъ алтызе миненек менелень-масторонь теемадо икеле Пазось, кона зярдояк а кенгели.

<sup>3</sup>Путозь шкасто Сон яволявтызе Эсь валонзо те Кенярксов кулясонть, конань пачтямось максозель монень Пазонтъ, минек Идицянтъ, кармавтоксонзо коряс.

<sup>4</sup>Мон сёрмасон шумбракстнян тонь, Тит, ды эйсэть лован вейсэнъ кемеманок кувалт эсень алкуксонь цёракс. Чансть тетъ, седеймарямо ды седейоймамо Тетя Пазонтъ пельде ды Иисус Христос Азоронтъ, минек Идицянтъ, пельде!

#### Кодамокс улема кемикуронь прявтнэненъ

<sup>5</sup>Мон кадытинъ тонъ Крит лангс вана кодамо тувталонь кувалма: тонеть эряви прядомс сень, мезесь апак прядо, ды путомс эрьва ошс кемикуронь прявт, кода мон кармавтынъ тонеть.

<sup>6</sup>Кемикуронь прявтокс путома истямо ломань, кона мейсэяк а чумондови, вансты видечи нинзэ икеле ды конань эйкакшонзо Пазнэнь кемицят ды а чумондовить визькстэме эрямосо ды а кунсолomaso.

<sup>7</sup>Эдь эрьва кемикуронь ветицясь улезэ мейсэяк а чумондовицякс, кода се, конань аравтызе Пазось Эсензэ кудоветицякс. Сон илязо уле каштангалицякс ды сеске кежс совицякс, илязо уле симемас ды тюремас правтыцякс, ярмаконь апештевиця таштыцякс.

<sup>8</sup>Мекевланк, сон улезэ инжень вастыцякс, паронь вечкицякс, ванькс мельсэ эрицякс ды виде тевень теицякс, Пазонь мелень ваньцякс ды эсь прянь кирдеме маштыцякс.

<sup>9</sup>Сонензэ эряви улемс кеместэ сьолмавозь кемевикс кулянтъ марто, конанень сон ульнесь тонавтозь. Сестэ сонзэ ули виезэ виде тонавтомасо виевгавтомс лия кемицятнень ды лангс таргамс каршо молицятнень.

### Критэнь кемикуронь тевтне

<sup>10</sup>Эдь улить ламо ломанть, – сеедьстэ нававтозь еврейтнень ютксто, – конат киньгак а кунсолыть, лабордыть аэрявикс тевде ды теньсэ пурдавтыть виде кистэ лиятнень.

<sup>11</sup>Сынст кургост эряви пекстамс. Эдь сынъ талновтыть целанек кудораськетъ, зярдэ тонавтыть сенень, мезес а эряви. Те нулгодькс тевентъ сынъ теить ярмаконь таштамонтъ кисэ.

<sup>12</sup>Критэнь эрицятнестэ вейкесь, конань сынъ ловить превей тонавтыцякс, мерсь: «Критэнь эрицясь свал кенгелиця, кежей ракша, нузякс ды отьма пеке».

<sup>13</sup>Ды неть валтнэ видеть. Секскак сынст казямосто таргить лангс: кадык ули шумбра сынст кемемаст,

<sup>14</sup>кадык лоткить молеме еврейтнень ёвксост мельга ды видечистэ потазь ломантнень кармавтовоксост мельга.

<sup>15</sup>Ванькстнэнь туртов весемесь ванькс. Сетнень туртов, конат сынсь аванькст ды акемицят, мезеяк ванькс арась. Истятнэнь мелесткак ды оймеёжосткак теевсть аваньксэкс.

<sup>16</sup>Сынъ валсо кортыть, келя, Пазонтъ содасызь, ансяк эсест тевсэ явить Пазонтъ эйстэ. Сынъ нулгодькст, Пазонтъ каршо молицят, кодамояк паро тевс амаштовикст.

## К Титу 2

### Кода видестэ эрямс Пазонтень кемицятненень

- <sup>1</sup>Тон жо кортак седе, мезесь ве мельс пры виде тонавтоманть марто.
- <sup>2</sup>Тонавт сыре цёратнень улемс валдо превсэ арсицякс, эсь прянь питнень содыцякс, ванькс мельсэ эрицякс, шумбракс кемемасо, вечкемасо, цидярдомасо.
- <sup>3</sup>Сыре аватненьгак тонавт эрямо прок Пазонтъ сельмензэ икеле: сынъ иляст уле лия ломанде апаро кулянь нолдыцякс, вина мельга правтыцякс. Мекевланк, кадык сынъ тонавтыть лиятнень паронтень.
- <sup>4</sup>Кадык сынъ од аватнень кармавтыть эсест мирдест ды эйкакшост вечкеме,
- <sup>5</sup>ванькс мельсэ ды ваньксчисэ эрямо, эсь кудо юронь вадрясто ванстомо ды эсест мирдень кунсолосо. Ды сестэ Пазонь валось а ули покордазь.
- <sup>6</sup>Истя жо од цёратненьгак путыть превс ванькс мельсэ эрямо.
- <sup>7</sup>Весемесэ невть-ветяк эсь прят парсте, ды сестэ лия цёратнеяк кармить ветямо прят тонь ладсо. Тонавт седейстэ лисиця валсо, эсь питнень содазь ды аёмиця-арыця тонавтомасо.
- <sup>8</sup>Тонь кортамось улезэ видекс, мейсэяк а чумондовицякс. Сестэ минек каршо молицятненень а ёвтави эйстэнек мезеяк берянь, ды сынъ кармить уleme визделгавтозь.
- <sup>9</sup>Кадык уретне улить эсест азорост кунсолюцякс, весемесэ сынст мелест ваныцякс. Сынъ иляст ёвта каршо вал эсест азорост туртов
- <sup>10</sup>ды иляст сёпо ярмакт сынст эйстэ. Мекевланк, уретне улест свал азорост туртов весемесэ допрок парокс ды кемевиксэкс. Истя сынъ эсест эрва кодамо тевсэ мазылгавтсызь Паздонть, минек Идицядонть, тонавтоманть.

### Пазонь чанстесь весе ломантнень идемаст туртов

- <sup>11</sup>Пазонь чанстесь, кона канды идема, панжовсь весе ломантненень.



<sup>12</sup>Те чанстесь тонавты минек кадомс пазтомо эрямонтъ, пежетев мельтнень-бажамотнень ды тень таркас эрямс неень эрямосонтъ ванькс мельсэ, видечисэ ды Пазонь мелень ванозь.

<sup>13</sup>Истя минь седейнежедькс марто учотано те уцяскав чинть, зярдю минек ине Пазось, Иисус Христос, минек Идицясь, панжсы Эсензэ сияждыця инексчинзэ.

<sup>14</sup>Сон максызе Эсь прынзо минек кисэ: идемс-менстемс минек эрва кодамо зыяндю, ванськавтомс пежетнеде ды теемс минек ансяк Эсензэ раськекс, конась оймень путозь бажи паронь тееме.

<sup>15</sup>Вана истя тонавт, кемекстак ды лангс таргак кемицятнень весе тонь азорксчинть вийсэ, ды киненьгак иля мере ваномс лангозот верде алов.

## К Титу 3

### Кемемась ды эрямость

<sup>1</sup>Свал ледстнек Критэнь кемицятненень: кадык сынъ кунсолыть масторонь прявтнэнь ды ветицятнень, топавтыть сынст мелест ды улить анокок эрва кодамо паро темень тееме.

<sup>2</sup>Истя жо кадык сынъ киньгак а сёвныть-пазить, киньгак марто а пелькстыть. Мекевланк, улест сынъ сэтъме лувсо эрицякс ды свал чевте седеекс весе ломантнень икеле.

<sup>3</sup>Эдь минськак зярдю-бути ульнинек а чарькодицякс, а кунсолыцякс ды манязекс, эрва кодамо пежетев мельтнень-бажамотнень урекс. Минь ютавтнинек эсь эрямонок зыянсо ды сельмень сявадомасо, ульнинек нулгодьксэкс ды кирдинек кеж вейкенек-вейкенек лангс.

<sup>4</sup>Ансяк зярдю Пазось, минек Идицясь, панжизе Эсензэ седеень парочинзэ ды ломантнень вечкеманзо,

<sup>5</sup>Сон идимизь минек. Пазось тень теизе аволь минек паро тевтнень коряс, – ансяк Эсензэ седеймарямонтъ коряс. Пазось идимизь оймень

шлямосо, конасонть минь одс чачинек, ды Иневанькс Оймеялтонть одкстомтомасо.

<sup>6</sup>Те Оймеялтонть Сон сюпавсто валызе минек лангс Иисус Христосонь, минек Идицянтъ, вельде.

<sup>7</sup>Теньсэ Пазось Эсензэ чанстензэ кувалт ловимизь минек чумовтомокс. Секс ули ней седейнежедьксэнек: миненек максови пингедэ пингень эрямость.

<sup>8</sup>Нетъ валтнэ видеть. Монь ули мелем: кеместэ тешкстак нетъ тонавтоматнень кунсолыщятнень превс-мельс. Кадык сеть, конат совасть кемемас Пазонтень, оймень путозь кармить бажамо паронь тееме. Те вадря ды канды весе ломантненень лезэ.

<sup>9</sup>Иля совсе превтеме пелькстамос, раськеде-буеде кортавтомас ды Моисеень Койде сёвномас-тюремас, эдь сынъ киненьгак а кандыть лезэ ды овсе а эрявить.

<sup>10</sup>Кемикуронь калавтыцянтъ кардык вестъ, кавксть, мейле иля тее мартонзо кодаткак вейсэнь тевть.

<sup>11</sup>Эдь тон содат: истямо ломанесь пурдась виде ки лангсто ды арась пежетень ки лангс. Теньсэ сон сонсь эсь прянзо судизе.

#### **Превспутомат ды прядомань валт**

<sup>12</sup>Зярдон мон кучса тонеть Артемань эли Тикикень, нейке капшак самс монень Никополев, эдь мон саинь мель печтямс телентъ тосо.

<sup>13</sup>Эрьва кода лездак коень тонавтыця Зенаснэнь ды Аполлоснэнь пурнамс-сэрнямс ки лангов. Кадык сынст а ули мезеньгак арасьчист мастор ланга якамстост.

<sup>14</sup>Минек Критэнь ломантнеяк тонадост паронь тееме, лия ломантнень арасьчидест мелявтозь, ды сестэ сынст эрямост а ули лезэвтеме.

<sup>15</sup>Весе, кить тесэ монь марто, кучить теть шумбрактнемат.  
Шумбрактнить весе минек вечкевикс оятнень вейсэнь кемеманок  
кувалт. Пазонь чанстесь улезэ весеменк тынк марто! Аминь.



## Филемоннэнь Паволонь Сёрмазо

### К Филимону 1

<sup>1</sup>Мон, Павол, кона ашти пекстазь Иисус Христосонь кисэ, ды Тимофей, кемиця ялгась, кучтано шумбракстнемат минек марто вейсэнь тевсэ важодицянтень, вечкевикс Филемоннэнь,

<sup>2</sup>ды кемицянь куронтень, кона пурнавкшны тонь кудосо, истя жо Апфиянень, вечкевикс кемиця сазоронтень, ды вейсэнь тевень теиця минек Аркип ялгантень.

<sup>3</sup>Улезэ тенк чансть ды седейоймамо Пазонтъ, минек Тетянтъ, пельде ды Иисус Христос Азоронтъ пельде!

#### Филемононь вечкемазо ды кемемазо

<sup>4</sup>Мон ёвтан сукпря эсень Пазонтень свал, зярдэ эсь озномасон ледстнян мельс тонь,

<sup>5</sup>секс мекс мон маринь тонь кемемадот Иисус Азоронтень ды вечкемадот Пазонь весе ломантненень.

<sup>6</sup>Ды мон ознан: кадык минек вейсэнь кемеманок лезды тонеть седе домкасто содамс-чарькодемс весе се паронтъ, конась тыненк максозь Христос Иисус марто вейсэндямонтъ вельде.

<sup>7</sup>Тонь вечкемась, кемиця ялгам, монь пек кенярдовтымим ды ладсимим-кемекстымим, секс мекс тонь вельде Пазонь ломантненень седеест оймасть-виензасть.

#### Павол энялды Онесимень кисэ

<sup>8</sup>Христос марто вейсэндямонтъ кувалт монь ули вием кармавтомс тонь тееме сень, мезе эряви.

<sup>9</sup>Ансяк мон ялатеке лован седе парокс пшкадемс тетъ энялдома марто, секс мекс вечктян тонь. Те мон, Павол, уш сыре ломанян ды ней Иисус Христосонь кисэ пекстазян,

<sup>10</sup>энялдан тонеть Онесимень кисэ, кона теевсь Пазнэнь кемицякс монь вельде ды истя жо монень цёракс тесэ, пекстамо кудосо.

<sup>11</sup>Зярд-бути сон ульнесь тонеть лезэвтемекс, а вана ней сон кармась улеме лезэвекс тонетькак ды моненьгак. Мон кучса сонзэ мекев.

<sup>12</sup>Тон жо вастык сонзэ кода монь седейбельксэм.

<sup>13</sup>Монь ульнесь пек покш мелем кадомс сонзэ эсень марто: тонь таркас сон лездаволь монень тесэ, косо мон пекстазян Кенярксов кулянтъ пачтямонзо кисэ.

<sup>14</sup>Ансяк монь арасель мелем теемс мезеяк тонь апак кевкстне. Кадык тонь паро тевесь ули теезь эсеть мелеть коряс, аволь вийсэ кармавтомань коряс.

<sup>15</sup>Паряк, Онесим секскак ульнесь явозь тонь эйстэ зярыя шкас: улемс тензэ тонь марто теде мейле пингеде пингес.

<sup>16</sup>Ней сон уш ули аволь кода уре, а урентъ коряс ламодо седе питней, кода вечкевикс кемиця ялга. Сон монень пек вечкевикс, кодамо жо сестэ вечкевиксэкс сон карми улеме тонеть, кода ломань ды кода Азоронтень кемиця ялгат!

<sup>17</sup>Истямо ладсо, бути тон ловат монь вейсэнь тевень теиця ялгакс, сестэ вастык Онесимень истя, кода вастовлимик монь.

<sup>18</sup>Ды бути сон тонь икеле тейсь кодамояк чумо эли ули тетъ кодамояк долкозо, сестэ тень ловик монь лангс.

<sup>19</sup>Вана мон, Павол, сёрмадан эсь кедьсэнь: мон тень пандса тонеть. Мон уш а кортан седе: тонгак монь икеле долксат мик эсь прясот.

<sup>20</sup>Истя, кемиця ялгам, ней максык монень те лезксэнтъ Азоронтъ кисэ. Кенярдовтык-оймавтык монь седеем кода Азоронтень кемиця ялга!

<sup>21</sup>Мон сёрмадан тетъ, секс мекс кеман: тон монь кунсолосамак. Содан, тон теят, натой, седеяк пек ламо монь вешеманть коряс.

<sup>22</sup>Теде башка, анокстак монень лоткамо тарка. Мон кеман: Пазось тынк озноманк кисэ макссамам-казьсамам монь тыненк.

**Меельце паро мельтне-арсематне**

<sup>23</sup>Тонеть кучить шумбрактнемат Эпафрас, ялгам, кона монь марто пекстазь Христос Иисусонь кисэ,

<sup>24</sup>истя жо Марк, Аристарк, Демас ды Лука, монь марто вейсэнть тевсэ важдиця ялгатне.

<sup>25</sup>Минек Иисус Христос Азоронть чанстесь улезэ мартонк! Аминь.



## Еврейтненень Сёрмась

### К Евреям 1

<sup>1</sup>Пазось кезэрень пингене ламоксть ды эрва кодамо ладсо кортнесь минек покштятненень пазмарицятненень вельде.

<sup>2</sup>Неть меельце шкатнестэ Сон кортась миненек Эсь Цёранзо вельде, конань кедьс Сон макссы весементь ды конань вельде теинзьяк менельтненень-мастортнэнь.

<sup>3</sup>Цёрась невти Пазонь иневалдонть сияждомаanzo, Сонзэ алкуксонь чачонзо ды кирди-вети весементь Эсензэ виев валсонзо. Ломантненень пежетест Эсензэ вельде ванськавтомадо мейле Сон озась лововикс таркас сехте верце менельсэнтэ Инепазонть вить кедензэ пелев.

#### Пазонь Цёрась ангелтнэде ине

<sup>4</sup>Истя Сон кармась улеме ангелтнэде седе сэрейкс, кода Сонензэ Пазонь максовт лемеськак седе ине сынст лемтнеде.

<sup>5</sup>Эдь киненьгак ангелтнэнь эйстэ Пазось зярдояк истя эзь ёвта: «Тон Монь Цёрам, течи Мон чачтытинь Тонь» ды истьяк: «Мон улян Сонензэ Тетякс, ды Сон ули Монень Цёракс».

<sup>6</sup>Ды таго Эсь Васень Цёранзо масторонть лангс кучомсто Пазось ёвтась: «Кадык Пазонь весе ангелтнэ сюконить Тензэ».

<sup>7</sup>Ангелтнэде Пазось ёвтась: «Сон тейсынзе Эсь ангелэнзэ вармань кондымокс, ды Эсь важонзо толгелень кондымокс».

<sup>8</sup>А вана Цёранстэнь Сон корты истя: «Паз! Тонь инязоронь таркась ули пингеде пингень, ды Тон ветят Эсь ломанеть видечинь коряс.

<sup>9</sup>Тон свал вечкилить видестэ теема ды а вечкилить койтемечи. Ды секс Пазось, Тонь Пазось, кочкинзеть-ваднинзеть Тонь кецямонь елейсэ мартот улицятнеде седе пек».

<sup>10</sup>Ды таго Пазось мерсь: «Тон, Азорось, васняк путыть юр модантень, теить Эсь кедьсэть менельтненень.

<sup>11</sup>Нетне весе ёмить, ансяк Тон кадоват; весе сынъ таштомгадыть оршамопель ладсо.

<sup>12</sup>Тон сынст тапардасыть ланга оршамо ладсо, ды сынъ полавтовить. Ансяк Тон вана зярдояк а полавтоват, ды Тонъ иетненень а ули пе».

<sup>13</sup>Киненьгак ангелтнэнь эйтэ Пазось зярдояк эзь мере: «Озак Монь вить кедь ёнов, зярс Мон а тейсынъ Тонъ душманот пильгеть путома таркак».

<sup>14</sup>Кить эно истят неть ангелтнэ? Сынъ – оймеялтт, конат важдить Пазонтень, ды конатнень Пазось кучи лездамо сетненень, кинень максови идема.

## **К Евреям 2**

### **Идемадо куля**

<sup>1</sup>Вана мекс миненек эряви седеяк кеместэ кирдедемс сень эйсэ, мезенть маринек: аволинек туеве ве ёнов виде кинть лангсто.

<sup>2</sup>Уш ангелтнэньгак вельде ёвтазь кулясь ульнесь кемевиксэкс, ды эрвась, кие потась эйтэнзэ эли эзь кунсоло сонзэ, таргась эсь лангозонзо чумонь виде пандома.

<sup>3</sup>Кода эно минь оргодтяно чумонь пандомадонть, бути минь допрок мельс а сайтяно те ине идеманть, конадо васенцекс ёвтась сонсь Азорось? Ды сеть, конат маризь те кулянтъ, кемекстызь сонзэ алкукчинзэ ды пачтизь миненек.

<sup>4</sup>Сонсь Пазоськак кемекстызе сынст кулянтъ диванъ тешкссэ, тамашасо ды эрва кодамо виев тевсэ, ды истя жо Иневанькс Оймеялтонь казнесэ, конатнень Сон Эсь мелензэ коряс явшинзе ломантненень.

### **Иисус – идемас Ветиця**

<sup>5</sup>Сыця шкань од мирэнтъ-масторонтъ, конадо минь тесэ кортатано, Пазось максызе аволь ангелтнэнь азоркчист алов.



<sup>6</sup>Мекевланк, кода кие-бути косо-бути ёвтась: «Пазом, кие истямо ломанесь! Ялатеке Тон кирдят сонзэ мельсэть. Кие истямо ломанень эйдесь! Ялатеке Тон сонзэ кисэ мелявтат.

<sup>7</sup>Нурькине шкас Тон теик сонзэ ангелтнэде вишкинекс, а вана мейле пудык прызонзо инекчинь ды шнамонь каштазонть ды пудык сонзэ прывтокс Эсеть теевть тевтнень лангсо,

<sup>8</sup>Тон весемень максык-пудык сонзэ пильге алов!» Пазось максызе весемень сонзэ кедь алов, ды мезеяк эзь кадо сонзэ азорксчивтеме. Ялатеке зярс миненек а неяви, буто весемесь сонзэ кедь ало.

<sup>9</sup>Ансяк ней минек икеле Иисус, кона нурькине шкас ульнесь теезь ангелтнэде вишкинекс. Ней жо минь Сонзэ несынекс инекчинь ды шнамонь каштазсо ламо пиштеманзо ды майсезь куломанзо кисэ. Эдь Пазонть чанстев арсеманзо-мелензэ коряс Иисуснень савсь куломс эрва ломанень кисэ.

<sup>10</sup>Истя эрявсь улемскак: Пазонть, весемень теицянтъ ды кирдицянтъ, ульнесь мелезэ теемс ламотнень Эсензэ эйкакшокс ды ветямс-пачтямс Эсь инексчизэнзэ. Тень кисэ Сонензэ эрявсь пиштема вельде теемс педэ пес вийс совазекс-анокстазекс Сень, кие вети сынст идемас.

<sup>11</sup>Эдь Се, кона теи ломантнень иневаньксэкс, ды сеть, конат теевить иневаньксэкс, – сынъ весе вейке Тетянь эйкакшт. Секскак Иисус а визди ловомс сынст Эсензэ ялаксокс-сазорокс. Сон корты Пазонтень:

<sup>12</sup> «Мон карман ёвтнеме Тонь эйстэ Монь ялакстнэненъ-сазортнэненъ ды моразь шнамот сынст промкссо».

<sup>13</sup>Ды таго Сон корты: «Мон карман кемеме-нежедеме Пазонть лангс». Ды таго: «Тесэ аштетяно Мон ды эйкакштнэ, конатнень Монень максынзе Пазось».

<sup>14</sup>Нетъ эйкакштнэ, кода Сон тенст мери, аштить сывельстэ ды верьстэ, секс Иисускак истя жо теевсь сынст кондымокс, ломанекс. Истямо

ладсо Сон Эсензэ куломанть вельде изнизе сень, конань ули куломанть лангсо азорксчизэ, лиякс меремс, Идемевсенть.

<sup>15</sup>Теньсэ Сон олякстомтынзе весе сетнень, кить ульнесть куломадо пелемань урексчисэ эрямост перть.

<sup>16</sup>Нама, Сон сайсь Эсензэ лангс мелявкс Авраамонь пельде чачозтнеде-касозтнеде, аволь ангелтнэде.

<sup>17</sup>Секскак Иисуснэнь эрявсь теевемс весеме ёндо Эсензэ ялакстнэнь-сазортнэнь кондямокс. Ансяк истя Сон кармась улеме седеймарицякс ды Пазонть икеле кемевикс Попонь прявтокс ды максызе прянзо ломантнень пежетест нолдамоост кисэ.

<sup>18</sup>Эдь Сон Сонсь кирдсь пиштемаст ды ульнесь снартневтезь-варчавтнезь, секс Сонзэ ули виезэ лездамс сетнененьгак, конат понгонить варчавтнемас.

## К Евреям 3

### Иисус Моисейде ине

<sup>1</sup>Секскак, кемиця ялгат, Пазонь ломанть, конатненень минек марто вейсэ максозь менельстэ Пазонть пельде тердема, кирдеде превсэнк-седейсэнк Иисус Христосонь, конань минь весень икеле ловтано Пазонь кучовтокс ды Попонь прявтокс.

<sup>2</sup>Сон кемевикс Пазонтень, кие Сонзэ аравтызе те важдемантень, кода Моисейгак «ульнесь кемевикс важдицякс Пазонь кудонь весе тевтнесэ».

<sup>3</sup>Ансяк Иисус ловови Моисеень коряс седе инекс истя жо, кода кудонь теицяськак ули седе лововиксэкс сонзэ теевть кудонтъ коряс.

<sup>4</sup>Нама, эрьва кудонтъ ули эсензэ теицязо, Пазось жо весементь теиця.

<sup>5</sup>Моисей ульнесь кемевикс важдицякс Пазонь кудонь весе тевтнесэ, ялатеке ансяк кода важо. Сон ульнесь ломантненень сень невтицякс, мезе Пазось ёвтыль икелепелев.

<sup>6</sup>А вана Христос ули кемевиксэкс кода Пазонть Цёразо, Сонзэ весе кудонзо тевтнень ветиця. Сонзэ кудось – те минь, бути, нама, кеместэ педес ванстсынек смелчинть ды кенярдозь шнатано прянок эсь седейнежедькссэнек.

### Пазонь оймамо тарка

<sup>7</sup>Секскак, кода корты Иневанькс Оймеялтось Сёрмадовкссо: «Бути течи тынь марясынк Пазонть вайгелензэ,

<sup>8</sup>сестэ илинк калгодкстомто седеенк, кода тынк покштянк кепедевкшнесть Пазонть каршо снартнема-варчавтнема читнестэ чаво модасо.

<sup>9</sup>Тосо сынь налкставтнесть ды варчавтнесть Монь, ды несть сень, мезе Мон тенст теинь ниленьгемень иень перть.

<sup>10</sup>Секскак Мон пек кежиявтынть неть ломантнень лангс ды меринь: “Сынст седеест свал саезь Монь эйстэ, ды арась мелест ютамс Монь кияванть.”

<sup>11</sup>Секскак Мон кежень пачк божинь-пежетькстынь: “Сынь зярдояк а совавить Монь оймамо таркас!”»

<sup>12</sup>Ванодо, кемиця ялгат, киньгак эйстэнк илязо уле апаро ды акемиця седеезэ, кона тынк потавтовлидизь эриця Пазонть эйстэ.

<sup>13</sup>Мекевланк, вейкенк-вейкенк путодо превс эрьва чистэ, зярс мереве ёвтнемс Сёрмадовксонь “течи” валонть, кадык киньгак эйстэнк а калгодкстоми седеезэ, пежетьсэ манявозь.

<sup>14</sup>Эдь минь вейсэндязтяно Христос марто, бути ансяк педес пес кеместэ ванстсынек се кемемачинть, кона минек ульнесь ушодома шкастонть.

<sup>15</sup>Сёрмадовкссо ёвтазь истя: «Бути течи тынь марясынк Пазонть вайгелензэ, сестэ илинк калгодкстомто седеенк, кода тынк покштянк кепедевкшнесть Пазонть каршо».

<sup>16</sup>Эдь кой-конат Пазонь вайгелень марицятнестэ кепедевсть Сонзэ каршо, ялатеке аволь весе, конатнень Моисей ливтинзе Египетстэ.

<sup>17</sup>Кинь лангс эно кежиявтнесь Пазось ниленьгемень иень перть? Нама, сетнень лангс, конат тейсть пежетть ды конатнень ловажаст кадовсть чаво модас.

<sup>18</sup>Кинень эно Пазось божась-пежетькстась: сынъ зярдояк а совавить Сонзэ оймамо таркас? Нама, сетненень, кить ульнест а кунсолыцят.

<sup>19</sup>Истя, минь нетяно, мекс сынъ эзь соваво Сонзэ оймамо таркас – те акемемаст кувалма.

#### **К Евреям 4**

<sup>1</sup>Пазонь алтамонть, Сонзэ оймамо таркас совамонть, зярс нейгак ули виезэ. Секс миненек эряви пштистэ ваномс: илязо лисе истя, кияк эйстэнк кадови ве ёнов те оймамо таркадонть.

<sup>2</sup>Эдь минеккак, кода сеть кезэрень ломантненень, ульнесь ёвтнесь те Кенярков кулясь. Ялатеке марязь валось сыненст лезэ эзь кандо, секс мекс сынъ кемезь эзизь сае сонзэ эсь седеезэст.

<sup>3</sup>Минь вана, конат кемезевинек, соватано те оймамо тарканть, конадо Пазось ёвтась: «Истя Мон кежень пачк божинь-пежетькстынь: “Сынъ зярдояк а совавить Монь оймамо таркас”». Сон ёвтызе тень, куш менельтнень-мастортнэнь теемасто саезь Сонзэ тевензэ ульнест прядозь.

<sup>4</sup>Сёрмадовксонь вейке таркасо сисемеце чинть коряс ёвтазь истя: «Ды сисемеце чистэнтъ Пазось оймесь весе Эсь тевензэ прядомадо мейле».

<sup>5</sup>Ды теке самай Сёрмадовксонть Сон таго корты: «Сынъ зярдояк а совавить Монь оймамо таркас».

<sup>6</sup>Лисни, сетне, конатненень Кенярков кулясь ульнесь пачтязь васенцекс, эзь соваво тов эсест акунсоломаст кисэ. Ансяк кой-кить совавить Сонзэ оймамо тарканть.

<sup>7</sup>Секс Пазось аравтсь лия чи, конанень Сон мери “течи”. Ламо шкань ютазь Пазось кортась теде Давид вельде, кода тесэ ёвтазель уш икеле: «Бути течи тынь марясынк Пазонтъ вайгелензэ, сестэ илинк калгодкстомто седеенк».

<sup>8</sup>Бути Иисус Навин ветявлинзе эсь ломанензэ Пазонь оймамо таркантень, сестэ теде мейле Пазось аволь карма кортамо лия чиде.

<sup>9</sup>Лисни истя: кода Пазоськак оймсесь сисемеце чистэнтъ, истя жо Пазонь ломантненьгак зярс учи оймсема.

<sup>10</sup>Эдь кие сови Сонзэ оймамо таркантень, се эсь прядозь тевдензэ мейле оймси истя жо, кода Пазоськак оймсесь весе тевензэ прядомадо мейле.

<sup>11</sup>Секскак карматано весе вийсэнек бажамо совамс те оймамо таркантень. Илязо кадово ве ёнов кияк секс, мекс сон тусь кезэренсетнень мельга акунсолomanь киява.

<sup>12</sup>Пазонь валось эриця ды пек виев, ды сон кавто ёндо човазь тородо седе пшти: сон сови минек эйс домкасто, натой яви ойментъ ды оймеялтонть, эзнетнень ды ловажань удементъ ды суди седеень арсематнень ды мельтнень.

<sup>13</sup>Мезеяк а кекшеви Пазонтъ эйтэ, весе Сонзэ теевксэсь штадо ды панжадо Сонзэ сельмензэ икеле. Те Сонзэ икеле миненек сави кирдемс вал.

### **Иисус – минек ине Попонь прявтонок**

<sup>14</sup>Истя, карматано кеместэ кирдеведе эсенек кемемасонтъ, конадо минь апак кекше кортатано, секс мекс минек ули ине Попонь прявтонок, кона кепететсь менелень пачк сехте верев: те Иисус, Пазонь Цёрась.

<sup>15</sup>Эдь минек Попонь прявтонок аволь истямо, кона а машты путомо седейёжо минек лавшочинтень. Арась, Сон снартневтезель-варчавтнезель минек ладсо весемесэ, ансяк ялатеке кадовсь пежеттеме.

<sup>16</sup>Секскак апак пеле карматано сакшномо чанстенъ максыця Пазонтъ икелев. Тосо минъ мутано седеймарямо ды чансть, конат лездыть тенек сестэ, зярдо те эряви.

## К Евреям 5

### Аронь ды Христосонь попоксчись

<sup>1</sup>Попонь эрва прывтось кочкави ломантнень ютксто ды аравтови ломантнень кисэ Пазонтень важоме: кандтнеме казнетъ ды анокст пежетест нолдамонь кисэ.

<sup>2</sup>Сон машты чевте седейсэ чарькодеме виде кистэ кадовозтнень ды асодыцятнень, секс мекс сон сонськак, кода весе, лавшо ломань.

<sup>3</sup>Лавшочинзэ кувалма сонензэ эряви кандтнемс анокст кода лиятнень пежетест кисэ, истя жо эсь пежетензэ кисэяк.

<sup>4</sup>Киненьгак эсензэ мелензэ коряс а саеви истямо сэрей важомемась. Попонь прывтокс ломанесь ары ансяк Пазонтъ тердеманзо коряс, кода ульнесь тердезь Аронгак.

<sup>5</sup>Истя Христоскак аволь Сонсь Эстензэ саизе инексчинть улемс Попонь прывтокс, мекевланк, Сонзэ те таркантень кепедизе Се, кие мерсь: «Тон Монь Цёрам, течи Мон чачтытинь Тонь».

<sup>6</sup>Ды таго Сёрмадовксонтъ лия таркасо Пазось корты: «Тон улят попокс пингеде пингес Мелькиседекенъ попокс аравтоманть ладсо».

<sup>7</sup>Мода лангсо эрямстонзо Иисус рангозь ды сельведь марто энялдозь ознось Сенень, кинь ули виезэ идемс Сонзэ куломадо. Ды Сон ульнесь марязь Пазонь мелентъ домка ловоманзо кисэ.

<sup>8</sup>Куш Сон ульнесь Пазонь Цёракс, ялатеке Сон тонадсь кунсолосо Эсь пиштеманзо вельде.

<sup>9</sup>Зярдо Сонсь кармась уleme педe пес вийс совазекс-анокстазекс, сестэ Сон теевсь пингеде пингень идемань лисьмапяркс весе сетненень, кить кунсолыть Сонзэ.

<sup>10</sup>Ды Пазось яволявтызе Сонзэ улемс Попонь прявтокс Мелькиседек ладсо.

### Илядо лотка кемемадо!

<sup>11</sup>Минек ули ламо мезде кортамс мартонк тень коряс, ансяк стака тень тыненк ёвтамс, секс мекс тынь теевиде мельтеме кунсолицякс.

<sup>12</sup>Эдь тыненк уш умок сась шка улемс лиянь тонавтыцякс, а вана тыненк эстенк таго эряви тонавтыця, кие тынк тонавтовлидизь Пазонь валонть васенце чарькодематненень. Тыненк одс эряви ловсо, аволь калгодо ярсамопель.

<sup>13</sup>Эрвась, кинь андыть ловсодо, сон теке пиже эйкакш, ды секс а чарькодъсы, мезесь виде, мезесь аволь.

<sup>14</sup>Мекевланк, калгодо ярсамопелесь максови вийс совазтненень, конатне, эрямонть содазь, ёжомарямост вельде тонадсть явомо паронть зыянонтъ эйстэ.

### К Евреям 6

<sup>1</sup>Секс а карматано аштеме Христосто тонавтомань ушодкстнэнь лангсо, ютатано седе тов, домка чарькодематненень! Миненек а эряви одс путнемс тонавтомань юр неть тевтнеде: куломас ветия тевтненень кадома, Пазонтень кемема

<sup>2</sup>ды тонавтома эрва кодамо нававтомадо, кемиця лангс кедень путомадо, кулозьстэ вельмемадо ды пингеде пингень судто.

<sup>3</sup>Эрѳга, сыргатано седе тов, ды истя минь арсетяно теемеяк, бути тенень карми уleme Пазонтъ мелезэ.

<sup>4</sup>Эдь кодаяк а путовить мекев янксема-видькстамо ки лангс сетне, кить тусть-потасть кемеманть эйстэ. Сынь уш весть ульнестъ валдочисэ, варчнизь менелень казненъ танстентъ, ды минек марто вейсэ максозель сыненсткак Иневанькс Оймеялт.

<sup>5</sup>Сынь варчнизь Пазонь паро валонть танстензэ ды Пазонть икелепелень инязорксчинть виензэ.

<sup>6</sup>А вана мейле сынь тусть-потасть ве ёнов кемеманть эйстэ! Ней уш сынь кодаяк мекев а велявтовить янксема-видькстамо ки лангс, секс мекс сынь эсест оймесэст одс вачкодить крёст лангс Пазонь Цёранть ды весень сельме икеле сёвныть-позорить Эйсэнзэ.

<sup>7</sup>Паксясь, кона ламоксть валнови ды симдеви пиземень ведьсэ, максы ламо суро сенень, кие сонзэ мельга яки, ды чанстяви Пазонть пельде.

<sup>8</sup>Мекевланк, паксясь, кона касты пупиця тикше ды кирмалавт, мезекскак амаштовикс. Сон маласо Пазонь сюдоманть, ды, окойники, сонзэ пултасы тол.

<sup>9</sup>Вечкевикс ялган, куш минь истя кортатанояк, ялатеке виевстэ кемтяно: тынк тевенк ютыть седе парсте, ды тынк икелепелев учи идема.

<sup>10</sup>Эдь Пазось авиде а эрси. Сон а стувтсы тынк важомеманк ды вечкемань тевенк, конань тынь невтинк Сонензэ, зярдо лездыде ды лездатадо Сонзэ ломантненень.

<sup>11</sup>Минек меленек: невтевлиде тынь истямо покш важомемань мель пензэ самс, зярс а топавтови тынк седейнежедьксэнк.

<sup>12</sup>Минек бажамонок: илядо уле нузяксокс, мекевланк, тееде сетнень ладсо, конатненень эсь кемемаст ды цидярдомаст кисэ максови се, мезенть алтызе Пазось.

#### **Пазонь алтамось кемевикс**

<sup>13</sup>Зярдо Пазось макссь алтамо Авраамнень, Сон кемекстызе алтамонть Эсь прясонзо божазь-пежетькстазь, секс мекс арасель кияк Сондензэ ине, конань лемсэ Сон пежетькставоль.

<sup>14</sup>Сон мерсь: «Алкукс-алкукс, Мон сүпавсто тонь чанстятан, ды пек ламолгавтсынть тонь эйкакшот-нуцькат».



<sup>15</sup>Ды истя Авраамнень кувать цидярдоманзо кисэ максозель Пазонь алтавоксоь.

<sup>16</sup>Ломантне свал пежетькстыть эстедест покшонть лемсэ, ды те пежетькстамось кемексты ёвтазенть ды путы пе весе спорямотненень-пелькстамотненень.

<sup>17</sup>Вана мекс Пазоськак Эсь алтамонзо кемекстызе пежетькстамосо. Теньсэ Сонзэ ульнесь мелезэ седеяк чарькодевиксстэ невтемс сетненень, кинень максозь алтамось: Сонзэ мелезэ зярдояк а полавтневи.

<sup>18</sup>Ды ней минек улить неть кавто аполавтневиця тевтне, Пазонь пежетькстамось ды алтамось, конатнесэ Пазось кодаяк зярдояк а кенгели. Сынь аштить миненек, конат састь идема мельга Сонзэ кедь алов, ине кемексчинь лисьмапьякс. Истя жо сынь лездыть тенек виевстэ кирдеземс се седейнежедьксэнтъ, кона минек икеле.

<sup>19</sup>Те седейнежедьксэсь минек ойментень теке якорь, виев ды кемевикс сьулмамонок, кона сови менельсэ Пазонь кудонтъ потс, коцтонь пирявксонтъ удалов.

<sup>20</sup>Миненек лездамга, тов, минденек икеле, совась Иисус, кинь невтицянок, зярдэ Сон кармась улема Попонь прявтокс пингде пингес, Мелькиседек ладсо.

## К Евреям 7

### Мелькиседек – инязор ды поп

<sup>1</sup>Мелькиседек ульнесь Салим ошонь инязор ды Верепазонь поп. Сон вастызе Авраамонь, зярдэ се велявтыль ниле инязортнэнь изнямодо мейле, ды чанстизе-баславизе сонзэ.

<sup>2</sup>Авраам максызе тензэ тюремстэ весе саезенть кеменце пельксэнтъ. Васенцекс Мелькиседек ульнесь “видечинь инязор”. Те сонзэ лементь смустезэ. Теде башка сон ульнесь Салимень инязорокс, лиякс, “сэтьмечинь инязорокс”.

<sup>3</sup>Мезеяк апак сёрмадо сонзэ тетядонзо, авадонзо, раськень лувдонзо, кияк а соды сонзэ чачомадонзо, куломадонзо. Сон невтезь Пазонь Цёранть кондямокс: кадови попокс пингеде пингес.

<sup>4</sup>Арседея, кодамо сон ине! Сонензэ мик Авраам, минек ине покштысь, максызе тюремстэ саезенть сехте паро кеменце пельксэнтъ.

<sup>5</sup>Левинсетнень, конатненень максови попоксчи, ули кармавтоксо: Моисеень Коень коряс мереве сыненст пурнамс кеменце пелькс израилень ломантнень пельде, лиякс эсест братост пельде, куш сетне истят жо Авраамонь буень поладыцят.

<sup>6</sup>Мелькиседек жо, куш эзь лисеяк Левинь раськестэ, саизе Авраамонь кедьстэ кеменце пельксэнтъ ды чанстизе-баславизе сонзэ, конанень уш максозельть Пазонь алтамотне.

<sup>7</sup>Нама, весе минь содатано: чанстицясь седе ине чанстявицянтъ коряс.

<sup>8</sup>Поптнэ пурныть кеменце пельксэнтъ, куш сынъ ансяк кулыця ломанть, а вана Мелькиседек, кона саизе Авраамонь кедьстэ кеменце пельксэнтъ, эри свал, те кемекстазь Сёрмадовкссо.

<sup>9</sup>Лиякс ёвтамс истя: сонсь Левияк, конань раськень поладыцянзо пурныть кеменце пельксэнтъ, пандызе кеменце пельксэнтъ Авраам вельде.

<sup>10</sup>Эдь Леви сестэ эзь чачокшнояк ды ансяк ульнесь ине покштынзо эйсэ, зярдод Мелькиседек вастызе Авраамонь.

<sup>11</sup>Бути левинсетнень попоксчись ветяволь асатыкстэмечис – эдь Коесь ульнесь максозь израилень ломантненень те попоксчинть вельде – сестэ мекс жо эрявсь лия поп, кона аравтозь Мелькиседек ладсо, аволь Арон ладсо?

<sup>12</sup>Эдь попоксчинь полавтомась веши, нама, коентъ полавтомаяк.

<sup>13</sup>Ды минек Азорось, киде тесэ кортави, лиссь лия раськестэ, аволь левинсестэнтъ, ды кияк Сонзэ раськестэнтъ алтарь икеле попокс эзь важдекшне.

<sup>14</sup>Весе содыть, минек Азорось лиссь Иудань раськестэ, а вана Моисей мезеяк эзь ёвта те раськентъ попоксчидензэ.

#### Лия, Мелькиседекень кондямо поп

<sup>15</sup>Весе те тееви седеяк неявиксэкс, зярдэ яволявтсы прянзо лия поп, кона Мелькиседекень кондямо.

<sup>16</sup>Сон путозь попокс акулыця-аёмиця эрямонтъ вийсэ, аволь се коентъ кармавтокстнэнь кувалт, конась максы попоксчинтъ ломанень раськень коряс.

<sup>17</sup>Вана кода те кемекстазь Сёрмадовкссонтъ: «Тон улят попокс пингедэ пингес Мелькиседек ладсо».

<sup>18</sup>Истямо ладсо, ташто кармавтоксошь полавтови, секс мекс сон лавшоль ды лезэвтемель.

<sup>19</sup>Эдь Моисеень Коентень мезеяк эзь теевкшне асатыкстэмекс. Сонзэ таркас ней миненек максови седе паро седейнежедькс, конань вельде минь малавгадтано Пазонтень.

<sup>20</sup>Тедэ башка, те од попоксчись кемекстазель Пазонь пежетькстамосо!

<sup>21</sup>Эдь икелень поптнэ аравтовильть апак пежетькста, а вана Иисус пежетькстамо марто, секс мекс Сонензэ Пазось ёвтась: «Азорось пежетькстась ды а янксезеви: “Тон улят попокс пингедэ пингес Мелькиседек ладсо”».

<sup>22</sup>Истямо ладсо, пежетькстамось невти, зяродо седе паро се вейсэнълувось, конань кемекстыцякс кармась улеме Иисус.

<sup>23</sup>Икелень поптнэде ульнестъ ламо, секс мекс куломась сезнесь сынст важдемантъ ды тарказост сыльть яла лият ды лият.

<sup>24</sup>Иисус жо карми эрямо пингеде пингес, ды Сонзэ попоксчиськак лиянень киненьгак а максови.

<sup>25</sup>Секскак Сонзэ ули виезэ педе пес ды пингеде пингес идемс сетнень, конат сыть Пазонтень Сонзэ вельде. Эдь Сон эри свал ды озны-энялды сынст кисэ.

<sup>26</sup>Алкукс истямо Попонь прявтось миненек эрявськак: иневанькс, чумовтомо, асатыкстэме, пежетевтнень эйстэ явозь ды менельде сэрейстэ кепедезь.

<sup>27</sup>Сонензэ а эряви, кода се лия попонь прявтнэненень, кандтнемс Пазонтень эрва чистэ анокст васня Эсь пежетензэ кисэ, мейле ломантнень пежетест кисэ. Иисус максызе Эсь прянзо аноксокс весть ды свалшкас.

<sup>28</sup>Моисеень Коесь аравты попонь прявтокс асатыкс марто ломанть. Валось жо, конань пежетькстамо марто ёвтызе Пазось Койденть мейле, аравтызе Сонзэ Цёранзо асатыкстэме Попонь прявтокс пингеде пингес.

## К Евреям 8

### Иисус – од вейсэньювонь Попонь прявт

<sup>1</sup>Ней минь пачкодинек те кортамосонтъ сехте эрявиксэнтень: минек ули истямо Попонь прявтонок, кона озадо ашти менельсэ Инепазонтъ инязоронь тарканть вить кедь ёно.

<sup>2</sup>Сон важоди Попонь прявтокс ознома кудосо, Пазонь алкуксонь коцткудосо, конань стявтызе Сонсь Азорось, аволь ломань.

<sup>3</sup>Эрва попонь прявтось путови Пазонтень казненъ ды аноксонь кандтнеме. Секскак минек Попонь прявтонтьгак истя жо эрявсь мезе-бути кандомс аноксокс.

<sup>4</sup>Бути Иисус улевель мода лангсо, сестэ Сон аволь уле кодамояк попокс, секс мекс тесэ уш улить истят попт, конатне кандтнить казнетъ Моисеень Коень вешематнень коряс.

<sup>5</sup>Ялатеке сынст важомемась – те ансяк менеленсенть ёнов молиця, сонзэ сулеезэ. Истя жо Моисейненьгак, зярдо сон пурнась тееме Пазонь коцткудонтъ, Пазось мерсь: «Вант, теик весементь сень ладсо, кона невтезель тетъ пандо прясо».

<sup>6</sup>А вана ней Иисуснэнь максозь попокс важомеда, кона пек седе покш мода лангонь поптнэнь важомедадост. Истя жо Сонзэ кемекставт вейсэньюловоськак икеленседенть седе паро, секс мекс сонзэ юрс путозь Пазонь максавт седе паро алтамот.

<sup>7</sup>Бути васенце вейсэньюловось улевель асатыкстэмекс, сестэ уш лиясь аволь эряво.

<sup>8</sup>Секс Пазось Сёрмадовкссо Эсь ломанензэ кори истя: «Вана сыть чить, – корты Азорось, – зярдо Мон ладян-теян од вейсэньюлов Израилень ломантнень ды Иудань ломантнень марто.

<sup>9</sup>Те вейсэньюловось карми улеме аволь истямо, конань Мон теекшния покштыст марто се чистэнтъ, зярдо Мон саинь сынст кедте ды ливтинь Египетэнь масторсто. Ансяк сын эзть топавто Монь вейсэньюловонтъ ды секс Монгак велявтынъ сынст эйстэ, – корты Азорось.

<sup>10</sup>Вана кодамо вейсэньюлов Мон теян Израилень ломантнень марто неть читнеде мейле, – корты Азорось, – Мон путсынъ Эсень койтнень сынст пря потмозост ды сёрмадсынъ сынст седеезэст. Мон карман улеме сынненст Пазокс, а вана сынъ – Монь раськекс.

<sup>11</sup>Сестэ уш кияк а карми тонавтомо эсь малавиксэнзэ эли лелянзо-ялаксонзо истямо валсо: “Содык-чарькодик Азоронтъ”. Эдь сынъ весе кармить Монь содамо, вишкинестэ саезь сехте покшос-инес.

<sup>12</sup>Мон нолдасынъ сынст авидечист, уш зярдо як а ледстысынъ мелезэнь сынст пежетест ды койтемечист».

<sup>13</sup>Зярдо Пазось кортась “од вейсэньюловдонтъ”, сестэ Сон невтсь васенце вейсэньюловонтъ ташточинзэ. Ансяк весе, мезесь таштоми ды сыреди, пек курокто ёми.

## К Евреям 9

### Пазнэнь озномась ташто вейсэнълувонть коряс

<sup>1</sup>Васенце вейсэнълувонть, нама, ульнесть эсензэ аравтовксонзо Пазнэнь озноманть коряс, ды ульнесь мода лангонь ознома кудозояк.

<sup>2</sup>Ульнесь стявтозь ознома коцткудо, конань васенце пельксэнтень ульнесть лампа ды столь ды сонзэ лангсо Пазонть икелев путозь кшить, ды мерильть те пельксэнтень “иневанькс”.

<sup>3</sup>Коцткудонть лия пельксэсь явозель васенценть эйстэ коцтонь омбоце пирявкссо ды лемезэль “сехте иневанькс”.

<sup>4</sup>Тосо ульнесть ладанонь сувтамо сырнень алтарь ды вейсэнълувонь горобия, кона весеме ёндо оложазель сырнесэ. Горобиянтъ эйсэ кирдевсть манна марто сырнень кедьге, истя жо Арононь мандозо-палказо, кона нолдакшнось пургондакст, ды кевень кавто лазнэть, конатнень лангсо сёрмадозельть Пазонь кармавтовкстнэ.

<sup>5</sup>Горобиянтъ лангсольть херувимть-ангелт, конатне ульнесть Пазонть инекчинзэ невтицяк. Сынст сёлмост келейгавтозь пежетень нолдамо тарканть велькссэ. Весе тень эйстэ миненек ней а эряви кортамс эрьва ёндо.

<sup>6</sup>Вана истя весемесь ульнесь теезь ознома коцткудосонть. Поптнэ эрьва чистэ совсить васенце пельксэнтень ютавтомо эсь важодема-ознома тевест.

<sup>7</sup>А вана омбоце пельксэнтень ансяк весть иезэнзэ совси съкамонзо попонь прявтось ды свал верь марто. Те веренть сон кандсы эсензэ кисэ ды ломантнень пежетест кисэ, конатнень теизь чоподачист кувалт.

<sup>8</sup>Истямо ладсо Иневанькс Оймеялтось теньсэ невти: зярс ашти стайсэнзэ ташто масторлангонь ознома коцткудось, сестэ а ули панжозь кись алкуксонь менелень ознома кудонтень.

<sup>9</sup>Те весе кода тешкс, кона невти неень шканть лангс. Лисни: казнетъ ды анокст кандтнить Пазонтень, ансяк сынст вельде а тееви ваньксэкс-асатыкстэмекс сень оймеёжозо, кие озны-сюкони Пазонтень.

<sup>10</sup>Эдь сынст юрсо аштить аравтовкст ярсамодо, симемадо ды эрва кодамо ладсо шлякшномадо. Весе нетъ ансяк ушо ёнксонъ койть-кирдат, конатнень виест ансяк од лувонь-ладонь теема шкас.

#### **Пазнэнь озномась од вейсэнълувонть коряс**

<sup>11</sup>Ней вана сась Христос, Попонь прявтось, конань вельде карми улеме максозь миненек Пазонь весе парось. Сон ютась седе ине ды седе асатыкстэме ознома коцткудованть, кона теезь аволь ломанень кедьсэ, лиякс, аволь те масторлангонть теевкс.

<sup>12</sup>Сон совась сехте иневанькс пельксэнтень аволь сеянь эли букань верь вельде. Мекевланк, Сон совась тозонь Эсензэ верензэ вельде, вестъ ды свалшкас ды кандсь ломантненень пингедэ пингень идема-менстема!

<sup>13</sup>Бути уш сеянь ды букань вересь эли ведрекшень куловось пургсемстэ ванськавтить аванькстнэнь ды максыть ансяк ушо ёнксонъ ваньксчи коень-кирдань топавтомас,

<sup>14</sup>сестэ зяроксть седе пек виев Христосонъ вересь! Иневанькс Оймеялтонть вельде Сон максызе Эсь ванькстэяк ванькс прянзо Пазонтень аноксокс. Сонзэ верезэ ванськавтсы минек оймеёжонть куломань кандыця тевтнеде ды тейсамизь маштовиксэкс эриця ды алкуксонъ Пазонтень важодемас.

<sup>15</sup>Истя Христос ули од вейсэнълувонть кемекстыцякс. Сонзэ куломась ульсь идема-рамамо питнекс, кона олякстомты ташто вейсэнълувонть шкасто теезь пежетнеде. Секс Пазонь тердевтненень максови Сонзэ алтавт пингедэ пингес чанстязь парочи.

<sup>16</sup>Вейсэнълувось – кода уличинь коряс кармавтома, кона свал веши кармавтыцянтъ куломанзо кемекстамо.

<sup>17</sup>Эдь уличинь коряс кармавтомась сови вийс ансяк кармавтыцянтъ куломадо мейле. Сонзэ зярдояк арась виезэ, бути кармавтыцясь эриця.

<sup>18</sup>Секс васенце вейсэнълувоськак кемекстазель ансяк верь вельде.

<sup>19</sup>Истя, васенцекс Моисей яволявтынзе весе ломантненень Коень весе кармавтовкстнэнь. Мейле сон сайсь букань ды сеянь верь, човоринзе ведь марто ды якстере понасо сьулмазь иссопоть тарадсо пурксизе кода Коень книганть сонсензэ, истя жо весе ломантнененьгак.

<sup>20</sup>Сон мерсь: «Те вересь кемексты вейсэнълувонть, конань Пазось мерсь тенк топавтомс».

<sup>21</sup>Моисей истя жо пурксизе верьсэнтъ Пазнэнь ознома коцкудонтъ ды весе сень, мезесь ютавтневиль тевс Пазонтень озномсто.

<sup>22</sup>Истямо ладсо, Коень коряс малав весемесь ванськавтови верь вельде, ды верень апак вало а эрси чумонь нолдамо.

#### **Христосонь аноксось нарды-саи ломантненень пежетест**

<sup>23</sup>Вана истя эрясь ванськавтовомс менеленсэнтъ ёнов молицятненень. Сынсь жо, менеленсетне, вешить сехте паро анокссо ванськавтома.

<sup>24</sup>Христоскак эзь сова ломанень кедьсэ теезь ознома кудонтень, кона ансяк моли алкуксонсэнтъ ёнов. Сон совась менелентъ сонсензэ эйс, косо ней стясь Пазонтъ чаманзо икелев озномо минек кисэ.

<sup>25</sup>Сон истя жо а кандтни Эсь прянзо аноксокс ламоксть, кода эрва попоть прявтось совси иезэнзэ вестъ сехте иневанькс пельксэнтень, ды свал ракшань верь марто.

<sup>26</sup>Бути Христос теевель сынст ладсо, сестэ Сонензэ ламоксть саволь пиштемс-куломс менельтненень-мастортнэнь теевема шкастонть саезь. Мекевланк, ней, пингетненень прядовома малав, Сон сась вестъ ды максызе аноксокс Эсь прянзо пежетентъ ёмавтоманзо кисэ.

<sup>27</sup>Эрва ломанентень сави куломс вестъ, ды мейле стямс Пазонь судонтъ икелев.



<sup>28</sup>Истя жо Христоскак весть максызе прянзо аноксокс, весе ломантнень пежетест нардамонь-саемань кисэ. Сон, нама, сы омбоцеде – идеме сетнень, кить учить Сонзэ самонть, Сон сы аволь уш пежетте ванськавтомань кисэ.

## К Евреям 10

### Христосонь аноксонть вельде минь малавгадтано Пазонтень

<sup>1</sup>Моисеень Коесь ульнесь Пазонь ансяк весе се паронть сулеекс, кона учось ломантнень икелепелев, аволь алкуксонь те паронть чачокс. Секскак Коентень зярдояк а теевить асатыкстэмекс сеть, кить сакшныть Пазонтень ды иеде иес свал кандтнить некеть жо анокстнэнь.

<sup>2</sup>Бути улевельть теезь асатыкстэмекс, сестэ аноксонь кандтнемась прядоволь. Пазнэнь сюконицятне сестэ улевельть ванськавтозь весть ды свалшкас ды уш авольть маря чумо эсест пежетест кисэ.

<sup>3</sup>Ней, мекевланк, анокстнэ иеде иес ледстнить пежетнеде.

<sup>4</sup>Эдь букань ды сеянь верентень кодаяк а шлявить-нардавить ломанень пежетне.

<sup>5</sup>Секскак Христос масторонть лангс самсто корты Пазонтень: «Тонь арасель мелеть саемс казнеть ды анокст, а вана рунго Тон Монень анокстыть.

<sup>6</sup>Тонь мельс а тукшныльть ракшань пултамотнеяк, пежетень кисэ анокстнэяк.

<sup>7</sup>Сестэ Мон меринь: «Вана Мон, Мон сынъ – кода Монь эйстэ книгань тапаркссонть сёрмадозьгак – Тонь мелеть, Пазом, топавтомо»».

<sup>8</sup>Васенцекс Христос ёвтакшнось: «аноксткак, казнетькак, ракшань пултамоткак, пежетень кисэ аноксткак Тонеть а эрявить ды а вечкевить». Сон истя ёвтась, куш весе неть анокстнэ кандтневитькак Коенть коряс.

<sup>9</sup>Мейле Сон поладсь: «Вана Моң, Мон сынъ Тонь мелеть, Пазом, топавтомо». Истя Христос полавтызе аноксонь кандтнема ташто лувонть од лувсонть.

<sup>10</sup>Истямо ладсо Сон топавтызе Пазонь меленть. Теньсэ минь допрок ванськавтозтяно ды алтазтяно Пазонтень Иисус Христосонь рунгонть вельде, конань Сон максызе аноксокс весть ды свалшкас.

<sup>11</sup>Эрва попось чистэ чис ютавты эсь важомеманзо ды ламоксть кандтни некеть жо анокстнэнь, конатнень арась виест нардамс-саемс ломаненть пежетензэ.

<sup>12</sup>А вана Христос кандсь вейкине анокс пежетнень кисэ ды пингеде пингес озась Пазонтъ вить кедензэ ёнов.

<sup>13</sup>Ней Сон учи сень, зярс Пазось а тейсынзе Сонзэ душманонзо пильгензэ путома таркакс.

<sup>14</sup>Вейке аноксонть вельде Сон теинзе пингеде пингес асатыкстэмекс сетнень, конатне ванськавтовить ды алтавить Пазонтень.

<sup>15</sup>Тень кемексты миненек Иневанькс Оймеялтоськак. Васняк Сон ёвтась:

<sup>16</sup> «Вана кодамо вейсэнлув Мон теян мартост неть читнеде мейле, – корты Азорось, – Мон путсынъ Эсень койтнень сынст седеезэст ды сёрмадсынъ сынст пря потмозост».

<sup>17</sup>Ды мейле Сон полады: «Мон уш зярдояк а ледстясынъ мелезэнь сынст пежетест ды койтемечист».

<sup>18</sup>Зярдэ пежетне нолдазь, сестэ уш а эряви сынст кисэ кандтнемс анокст.

#### **Малавагодо Пазонтень!**

<sup>19</sup>Истя вана, кемиця ялган, Иисус Христосонь веренть вельде миненек келейстэ панжозь кенкшесь апак пеле совамс сехте иневаньксэнтень, од ды эрямонь максыця киява.

- <sup>20</sup>Сон панжизе миненек те кинть, кона юты коцтонь пирявксонть пачк, лиякс меремс – Сонзэ рунгонть пачк.
- <sup>21</sup>Минек ули ине Попонок, кона ашти Пазонть весе кудонзо тевтнень ветицякс.
- <sup>22</sup>Секскак, эрде, сатано Пазонтень панжадо седейсэ, пештязь покш кемемасо, ванськавтозь седейсэ, чумовтомо оймеёжосо, ды ванькс ведьсэ шлязь рунгосо.
- <sup>23</sup>Карматано апак кавтолдо кирдеведе се седейнежедькссэнтъ, конадо апак кекше ёвтетяно. Эдь Пазось, кона максызе алтамонть, кемевикс.
- <sup>24</sup>Карматано мелявтомо вейкенек-вейкенек кисэ, кирвазтеме эрванть эйсэ вечкема, кона невтеви паро тевень теemasо.
- <sup>25</sup>А карматано кадномо эсенек кемикуронь промксонок, кода кой-кить тейнить. Мекевланк, карматано кемекстамо вейкенек-вейкенек эйсэ седеяк пек, секс мекс тынсь нетядо: Азоронть само чись яла малавгады.
- <sup>26</sup>Бути жо минь, конат кармасть содамо видечинть, чарькодезьгак яла тейнетяно пежетть, сестэ минек пежетне а нардавить-саевить уш кодамояк анокссо.
- <sup>27</sup>Сестэ миненек кадови ансяк пелезь учомс Пазонь судонть ды гайница толонть, кона нильсынзе каршонзо молицятнень.
- <sup>28</sup>Бути кияк коласы Моисеень Коентъ, се куловтови апак жаля, зярдю кавто эли колмо ломанть кемекстасызь сонзэ чумонзо.
- <sup>29</sup>Арседея, зяроксть седе стакасто сестэ чумондови се, кие чалгси Пазонь Цёранть пильгензэ алов, кие а лови иневаньксэкс се вейсэньювонь верентъ, конаньсэ сонсь ванськавтозь-алтазь Пазонтень, ды кие покорды чанстенъ Оймеялтонть!
- <sup>30</sup>Минь жо содасынек Сень, кие мерсь: «Кежень пандомась Монь кедьсэ. Мон пандсаяк, корты Азорось». Ды таго: «Азорось карми судямо Эсь раськензэ».

<sup>31</sup>Кодамо покштояк покш тандавкс понгомс эриця Пазонть кедьс!

<sup>32</sup>Ледстинк мелезэнк сеть икелень читнень, зярд Пазонь валдось тынк валдомтыдизь, сестэ тынь кирдиде ламо пиштемат ды цидярдьде стака тюремасо.

<sup>33</sup>Лиясто тынсенккак весеме икеле покордасть-корясть ды муцясть, ды лиясто тынь вейсэндявилиде сетнень марто, кинь истямоль жо уцяскаст.

<sup>34</sup>Тынь пиштиде вейсэ монь, тюрьмас пекстазенть, марто. Тынь кецязь вастынк мик сеньгак, зярд нельгенеть-сайнеть тынк ули-паронк. Тынь содылиде: тынк ули менель лангсо вельть седе вадря ули-паронк, кона пингеде пингень.

<sup>35</sup>Истя, илинк кадно-ёрто эсенк смелчинк, эдь тень кисэ тынь ультядо сюпавсто-важовсто казезь.

<sup>36</sup>Тыненк эряви кирдема ды цидярдома, Пазонть мелензэ топавтоманть кисэ. Сестэ уш тыненк максови се, мезенть Сон алтызе.

<sup>37</sup>Эдь Сёрмадовкссояк кортави истя: «Шкась кадовсь аламо, пек аламо, ды Се, кинень эряви самс, сы, шканть а таргасы.

<sup>38</sup>Ломанесь, кона кемемань кисэ ловозь чумовтомокс, карми эрямо, а бути сон велявты кемемасто, сестэ Монь седеем саеви эйстэнзэ».

<sup>39</sup>Минь жо аволь сетнень ютксто, кить велявтыть кемемастост ды ёмить, мекевланк, минь вансттано кемеманок ды ультяно идезь.

## К Евреям 11

### Кемема

<sup>1</sup>Кемемась – те кеместэ нежедема сень лангс, мезенть седейсэнек учотано, сень неемазо, мезесь ней а неяви.

<sup>2</sup>Кемеманть вельде кезэрень ломантне савтыльть Пазонтень.

<sup>3</sup>Кемеманть вельде миненек чарькодеви: менельтне-мастортнэ ульнестъ теезь Пазонтъ валонзо вельде, ды истямо ладсо весе неявиक्सэсь теезь анеявиксэнтъ эйтэ.

<sup>4</sup>Эсь кемеманзо коряс Авель кандсь Пазонтень Каинэнь аноксто седе паро анокс. Сон те кемеманть вельде савтызе Пазонтень кода видечисэ ломань. Пазось саинзе казнензэ ды теньсэ кемекстызе сонзэ видечинзэ. Те кемеманть вельде Авель нейгак корты, куш сонсь умок кулось.

<sup>5</sup>Эсь кемеманзо коряс Енок ульнесь саезь те масторлангстонть куломань апак сода. «Сон костояк эзь муеве, секс мекс сонзэ саизе Эстензэ Пазось». Те масторлангстонть саемадонзо икеле, – кода кортави-кемекстави эйтэнзэ –, сон савтыль Пазонтень.

<sup>6</sup>Кемемавтомо киненьгак кодаяк а савтови Пазонтень. Эдь эрвантень, кие сы Тензэ, эряви кемемс: Пазось эри ды казьсынзе сетнень, кить Сонзэ вешнить.

<sup>7</sup>Кемеманзо коряс Ной кунсолызе Пазонтъ икелев ёвтамонзо-панжоманзо седе, мезесь ульнесь зярс анеявиксэкс. Пазонтъ мелензэ ванозь, сон тейсь иневенч ды идизе эсь кудораськензэ. Эсь кемемасонзо сон невтизе-судизе те мирэнтъ-масторонтъ пежетевчинзэ ды максозель тензэ чумовтомочи кемеманть коряс.

<sup>8</sup>Кемеманзо коряс Авраам кунсолызе Пазонь тердеманть туемс се модантень, конань тензэ алтызе максомс Пазось. Сон тусь, куш сонськак эзь сода, ков моли.

<sup>9</sup>Эсь кемеманзо коряс сон озась эрямо алтазь моданть лангс кода лия масторонь ломань. Тосо сон эрясь коцткудосо Исак ды Яков марто, конатненень мейле истя жо максозель се, мезентъ алтызе Пазось.

<sup>10</sup>Авраам учось истямо ош, кона ули путозь кеме юр лангс, ды конань архитекторокс ды теицякс ули Сонсь Пазось.

<sup>11</sup>Кемеманзо коряс Сарраненьгак, кона ульнесь ачачтница, максозель чачтома вий, куш сон уш сырельгак. Эдь Сарра ловсь: Пазось, алтамонь максыцясь, топавтсы Эсь валонзо.

<sup>12</sup>Ды секс вейке сыре, кулома лангсо аштиця ломаньстэ чачтсть истя ламо эйкакшт-нуцькат, кода менелень тештне ды иневедь чирень алововикс чуварось.

<sup>13</sup>Те кемеманть марто весе неть ломантне кулостькак. Сыненст эзь ульне максозь се, мезенть алтызе Пазось, ансяк неизь сонзэ васолдо ды кенярдкшность тензэ. Эсест эйстэ сынь кортасть: сынь ансяк таркадо таркас якицят-пакицят ды ве ёндонь ломанть моданть лангсо.

<sup>14</sup>Эдь сеть, конат истя кортыть, теньсэ невтить: сынь эсь тиринь масторонь вешницят.

<sup>15</sup>Бути сынст прят потсо улевель се масторось, конань кадызь, сестэ сынст, нама, сатоволь виест велявтомс мекев.

<sup>16</sup>Арась, сынь бажасть седе паро масторонтень, лиякс меремс, менеленсентень. Секс Пазось а визделгали эйстэст ды мери тенст ловомс Сонзэ эсест Пазокс. Сон сыненст ошкак уш анокстась.

<sup>17</sup>Кемеманзо коряс Авраам максызе Исак цёранзо аноксокс, зярдю Пазось варчавтнесь сонзэ. Сон ульнесь анок кандомс аноксокс эсензэ вейкине цёранзо, конадонтъ Пазось уш максызе тензэ Эсь алтамонзо

<sup>18</sup>ды икелев ёвтакшнось: «Тонь раськесь туи-рашты Исаконь пельде».

<sup>19</sup>Эдь Авраам арсизе-ловизе: Пазонтъ ули виезэ, натой, кулозьстэяк вельмевтемс. Ды Исак велявтозельгак тензэ мекев теке кулозьстэ.

<sup>20</sup>Кемеманзо коряс Исак чанстинзе-баславинзе Яковонь ды Исавонь, икелепелень эрямодост арсезь.

<sup>21</sup>Кемеманзо коряс Яков куломстонзо чанстинзе-баславинзе Иосифень кавонест цёратнень, ды, эсь палканзо лангс нежедезь, сюконясь Пазонтень.

<sup>22</sup>Кемеманзо коряс Иосиф, кулома лангсо улезь, ёвтась Израилень ломантнень Египетстэ лисемадост ды кармавтсь, мезе эряви теемс сонзэ ловажатнень марто.

<sup>23</sup>Эсь кемемаст коряс Моисеень тетянзо-аванзо кекшнесть эйсэнзэ колмо ковт чачомадонзо мейле. Сынъ несть: эйдесь вельть мазый, ды эзь пеле инязоронь кармавтовксонть коламодо.

<sup>24</sup>Эсь кемеманзо коряс Моисеень, зярдонь сон кайсь-кепететсь, арасель уш мелезэ кандтнемс фараононь тейтеренть цёранзо лементь.

<sup>25</sup>Сон кочкизе эсь мельсэнзэ Пазонь раськенть марто вейсэнъ пиштеманть, аволь нурыка шкас пежетьсэ седей витеманть-петеманть.

<sup>26</sup>Сон сельмензэ кайсесь казненть лангс, кона учось сонзэ икелепелев, ды секскак ловсь покордамонть Пазонь кучовт Идицянтъ кисэ Египетэнь сюпавчитнеде седе питнейкс.

<sup>27</sup>Кемеманзо коряс Моисей кадызе Египетэнтъ, инязоронть кежтнеде апак пеле. Сон теке эсь икелензэ несъ анейвиця Пазонтъ ды секс цидярдызе весементь.

<sup>28</sup>Кемеманзо коряс сон аравтызе-ютавтызе еврееень Инечинть. Сон кармавтсь ваднемс верьсэ кенкштнень палмантнень ды пайметнень сень кисэ: куловтниця ангелэсь аволинзе маштне израиленсетнень васень цёра эйкакштнэнь.

<sup>29</sup>Кемемаст коряс израиленсетне печтизь Якстере иневеденть теке коське таркава. Зярдонь текень жо теиксэлизь египетэнсетне, сеть весе ваясть.

<sup>30</sup>Кемеманть вельде прась-каладсь Ерихононь ош пирявксось сисем чить перьканзо якамодо мейле.

<sup>31</sup>Кемеманзо коряс Рахав, усксевиця авась, эзь ульне маштозь Пазонтъ каршо молицятнень марто вейсэ, эдь сон израилень салава кевкстницятнень-киведицятнень вастынзе кода эсь ялганзо.

<sup>32</sup>Мезе жо монень ёвтнемс седе тов? Шкам арась ёвтнемс Гедеондо, Варакто, Самсондо ды Евтайде, Давидтэ, Самуилдэ ды пазмарицятнеде.

<sup>33</sup>Кемемаст вельде сынъ изнясть раськеть-масторт, кемекстастъ видечисэ эрямонтъ, сайсть сень, мезе алтась Пазось. Сынъ пекстнестъ-сёлгонестъ левтнень кургост,

<sup>34</sup>мадстнестъ виев толт, идевкшнестъ пшти тородо. Сынъ ульнестъ лавшот, – теевсть виевекс, кемельть тюремасо, тапсильть ятонь ушмот.

<sup>35</sup>Ульнестъ ават, конатненень кулозь родняст-раськест максозельть мекев вельмевтезь. Лиятне жо эзизь сае олячинть, муцязь кулость, эдь сынст ульнестъ мелест пачкодемс седе паро вельмемантень.

<sup>36</sup>Лиятненень савсь кирдемс нарьгамот ды локшосо керямот, натой кшнинь терть ды пекстамо кудот.

<sup>37</sup>Сынст чавность кевсэ, пилясть эйсэст чачков, муцясть, кулсестъ тородо. Сынъ яксестъ-азгондсть ревень ды сеянь кедень оршамосо, кирдсть покш арасьчи, пансемат, муцямот.

<sup>38</sup>Нетъ ломантне ульнестъ вельть парт те масторлангонтень, яксестъ-азгондсть чаво модава ды пандо ланга, эрясть кевботмарга ды мода лазовкскса.

<sup>39</sup>Весе сынъ кемемаст вельде савтыльть Пазонтень, ды ялатеке сынъ эзть пачкоде алтазентень,

<sup>40</sup>секс мекс Пазось арсесь минек туртов мезе-бути вельть седе паро. Сонзэ бажамозо ульнестъ истямо: пачкодевельть нетъ ломантне асатыкстэмечис ансяк минек марто вейсэ.

## К Евреям 12

### Пазось, кода тетя, тонавты эйсэнек

<sup>1</sup>Ванодоя, минек перька аштить вельть ламо ломанть, конат невтизь уш эсь кемемаст. Секс, эрде, ёртсынек миньгак весе сень, мезесь пири



кинек, шождасто педиця пежетентькак, ды карматано цидярдозь чиеме-пелькстамо минек икелев аравтозь кинть ланга.

<sup>2</sup>Сельмень апак сае карматано свал ваномо Иисус лангс. Сон минек кемеманть лисьмапрясь ды топавтыцясь. Сон сыця кенярксонть кисэ цидярдызе-пиштизе крёст лангсо куломанть, покордамонть лангс апак вано, ды ней озась Пазонть вить кедензэ ёнов.

<sup>3</sup>Эдь арседея, зяро Эсь лангсонзо нарьгамот-кежть Сон кирдсь пежетев ломантнень пельде! Те лезды тыненк а прамс пильге лангсто ды а лавшомгадомс оймесэнк.

<sup>4</sup>Тыненк зярс эзь савкшно валомс веренк пежетенть каршо тюремстэнк.

<sup>5</sup>Арази тынь стувтынк неть оймавтыця-кемекстыця валтнэнь, конат ёвтазь Сёрмадовкссо тыненк, кода эйкакшонзо туртов: «Цёрам, иля вано шождасто Азоронь тонавтоманзо-мурнеманзо лангс ды иля лавшомгале, зяро Сон тарги лангс тонь теветь.

<sup>6</sup>Эдь Пазось тонавты-мурни сень, кинь Сон вечки; Сон чави эрва эйкакшонть, конань саи Эсензэкс».

<sup>7</sup>Бути тыненк эряви кандомс-цидырдомс варчавтнемань тонавтомат-мурнемат, сестэ Пазось тейни мартонк, кода Эсь эйкакшонзо марто. Арази эрси истямо эйкакш, конань тетязо аволизе тонавто-мурне?

<sup>8</sup>Бути тынк а тонавтыть-мурнить, кода тейнить весе эйкакштнэнь марто, сестэ тынь муевкстадо, аволь алкуксонь эйкакштадо.

<sup>9</sup>Зяро минек масторлангонь тетянок тонавтсть-мурнесть эйсэнек – минь сынст кунсолынек. Сестэ зяроксть седе пек миненек эряви максомс прянок менель лангонь Тетянок кедензэ алов, конань кунсоломась канды эрямо!

<sup>10</sup>Минек масторлангонь тетянок тонавтсть-мурнесть эйсэнек нурька шкас ды эсест чарькодемаст коряс. Ансяк Пазось тень теи минек лезэс: Сонзэ мелезэ максомс миненеккак талика Эсензэ иневаньксчиденть.

<sup>11</sup>Эрва тонавтомась-мурнемась ней маряви ризксэкс, аволь кенярксокс. Ансяк мейле сон чачты-канды видечинь ды седейоймамонь сюпав нуевкс сетнень эрямосо, конат путозь виде ки лангс те тонавтоманть-мурнеманть вельде.

<sup>12</sup>Секскак, кемекстынк-витинк новолезь кеденк ды сорныця кумажанк!

<sup>13</sup>Якадо валаня виде киява вана мекс: чамордыцянтъ пильгезэ илязо лисе эзнестэ, мекевланк, таго теевезэ шумбракс.

### **Илинк ёрто Пазонь чанстенть**

<sup>14</sup>Бажадо эрямс весе марто ладязь ды истя жо Пазонтень алтазь эрямосо, конавтомо кияк а несы Азоронтъ.

<sup>15</sup>Ванодо, кияк аволизе кадо-ёрто Пазонь чанстенть. Аволь касо-келейгадо тынк ютксо кодамояк сэпей ундокс-корён, кона кандоволь зьян, ды конаньсэ ламотне теевельть аваньксэкс.

<sup>16</sup>Истя жо илязо уле ютксонк, Исавонь кондымо, ускуриця эли Пазонтъ эйтэ васоло аштиця ломань. Сон весть ярсамонь кисэ миизе-максызе эсь тарканзо улемс тетянзо васенце цёракс.

<sup>17</sup>Эдь тынь содатадо, кода теде мейле сонзэ ульнесь покш мелезэ саемс чанстямо-баславамо тетянзо пельде, ды сон ульнесь панезь! Мекев велявтомань ки арасель, куш Исав вешсь тень сельведь марто.

<sup>18</sup>Тынь пачкодиде аволь се пандонтень, конась токави кедьсэ ды палы гувныця толсо, аволь чоподантень, аволь сумборя пелентень ды даволонтень.

<sup>19</sup>Тынь сыде аволь торамонь зэркстамонтень ды аволь зэрница вайгелентень. Те вайгеленть марицятне энялдсть: лоткаволь сон кортамодо сынст марто.

<sup>20</sup>Эдь сыненст марявсь акирдевиксэкс се, мезесь ульнесь кармавтозь: «Бути, натой, ракшаяк токави те пандонтень, сестэ сонзэ эряви чавомс кевсэ эли ледемс налсо».

<sup>21</sup>Те неявиксэсь-марявиксэсь ульнесь истямо покш тандавксокс, мик Моисейгак ёвтась: «Мон сорнан пелемадонть».

<sup>22</sup>Мекевланк, тынь пачкодиде Сион пандонтень ды менелень Ерусалиментень, эриця Пазонь ошонтень, ды тѣжат-тѣжат ангелтнэнень,

<sup>23</sup>конат пурнавсть кенярджшномо. Тынь сыде Пазонь васень чачовтнэнь, Сонзэ кочкавтонь вейсэндявксонтень, конатнень лемест сѣрмадозь менельсэ. Тынь пачкодиде Пазонтень, весень судиянтень, ды асатыкстэмекс теевезь видечисэ ломанень ойметненень.

<sup>24</sup>Тынь сыде Иисуснэнь, од вейсэньлувонь кемекстыцянтень, ды Сонзэ пурксемань верентень, конась алты-ёвты Авелень верденть седе паронть.

<sup>25</sup>Истямо ладсо, ванодо, илядо велявто тыненк Кортыцядонть. Сетькак, конат эзизь кунсоло мода лангсо Пазонь мелень пачтицянтъ, эзь кадово чумонь апак пандо. Седеяк покш чумонь пандома учи минек, бути велявтано Сень эйстэ, кона корты менельстэ.

<sup>26</sup>Сестэ Сонзэ вайгелезэ сорновтызе моданть. Ней Сон Сѣрмадовкссо макссь истямо алтамо: «Мон таго вестъ сорновтса моданть, ды аволь ансяк моданть, мик менелентькак».

<sup>27</sup>Валтнэ “таго вестъ” невтить: весе теезесь ули сорновтозь ды полавтозь, ды кадови ансяк се, мезесь а чатавтови-а сорновтови.

<sup>28</sup>А вана миненек максови асорновтовиця-ачатавтовиця инязорксчинь мастор. Секскак ёвтатано сукпря Пазонтень ды карматано ваходеме-сюконямо Тензэ домка ловома марто ды мелензэ ванозь, кода Сонензэ вечкеви.

<sup>29</sup>Эдь минек Пазось – те весемень пултыця тол.

## К Евреям 13

### Пазонть мелензэ коряс эрямо

- <sup>1</sup>Свал вечкеде вейкенк-вейкенк лелянь-сазоронь вечкемасо.
- <sup>2</sup>Уледе инжень вастыцякс. Истя теестэ зярья ломанть апак сода вастнесть натой ангелт эсест кедьсэ.
- <sup>3</sup>Илядо стувтне пекстазтнень эйсэ, буто тынськак мартост аштетядо пекстазь. Кирдеде мельсэнк пиштицятнень, буто тыньгак майсетядо сынст ладсо.
- <sup>4</sup>Урьвакстомань сюлмавксось улезэ лововиксэкс весеме ютксо. Мирдентень ды нинтень эряви улемс видечисэ вейкест-вейкест икеле. Пазось чумондсынзе сетнень, кить усксевичь ды ускурить.
- <sup>5</sup>Илядо бажа ярмак мельга. Кадык саты тенк се, мезенк ули. Эдь Сонсь Пазось мерсь: «Мон зярдояк а кадтан, зярдояк эйстэть а туян».
- <sup>6</sup>Секскак минь апак пеле кортатано: «Азорось свал сы монень лездамо, секс мон мездеяк а пелян. Мезе теи монень ломанесь?»

### Пазонтень мельстуиця анокст

- <sup>7</sup>Ледстнеде мелезэнк эсенк ветицянк, конат пачтясть тенк Пазонь валонть. Мельсэнк кирдеде сень, кода сынь эрясть ды прядызь эсь эрямо кист, ды тееде сынст кемемаст коряс.
- <sup>8</sup>Иисус Христос свал теке жо: исяккак, течияк ды пингедэ пингескак.
- <sup>9</sup>Кадык тынк а пурдавтыть виде ки лангсто эрва кодамо каршо молиця тонавтомат. Паро, зярдэ тынк седеенк кемекставить Пазонь чанстьсэ, аволь кодаткак койтнесэ-кирдатнесэ ярсамопелень коряс. Неть койтнень топавтомат эйстэ киненьгак лезэ арасель.
- <sup>10</sup>Минек ули эсенек алтаренек. Сонзэ лангсо аштиця анокстонть а мереви ярснемс ташто ознома коцткудосонть сюконицятненень-важодицятненень.

<sup>11</sup>Тынь содатадо: ракшатнень верест попонь прявтось совавтолилинзе аноксокс пежетень нолдамонь кисэ ознома кудонь сехте иневанькс пельксэнтень, а вана рунгост пултнилинзе эрямо таркаст эйстэ ве ёно.

<sup>12</sup>Иисускак пиштсь-майсесь оштонть ве ёно сень кисэ: Эсензэ верьсэнтъ ванськавомс ломантнень ды алтамс сынст Пазонтень.

<sup>13</sup>Эрґа, листяно Тензэ ошонтъ ушов ды явсынек вейсэ Сонзэ покордамонтъ.

<sup>14</sup>Эдь минек арась тесэ свалшкань ошонок, мекевланк, минь вешнетяно се ошонтъ, конанень эряви улемс.

<sup>15</sup>Истя, карматано Иисус вельде апак лотксе шнамо Пазонтъ. Те Сонензэ минек аноксонок: минек ёвтавт валтнэ, конат инекс теить Сонзэ лементъ.

<sup>16</sup>Истя жо илядо стувтне теемс паро ды максомс лиянень сень эйстэ, мезенк ули, эдь истят анокстнэ вечкевить Пазонтень.

<sup>17</sup>Кунсолодо ветиянк, моледе превспутомаст мельга. Эдь сынъ апак лотксе мелявтыть тынк ойменк кисэ, секс мекс сыненст Пазонтъ икеле эряви кирдемс вал эсь важомемаст кисэ. Кадык сынъ теить эсь тевест кеняркс марто, апак уктне-вайктне, лиякс те а ули тыненк лезэкс.

<sup>18</sup>Свал ознодо минек кисэ. Минь кемтяно: минек оймеёжонок ванькст, эдь минь весемесэ бажатано ветямс эсь прянок парсте.

<sup>19</sup>Мон энялдан тенк седе пек озномс вана мезень кисэ: велявтомс монень седе курок тыненк.

#### **Ознома ды меельце валтнэ**

<sup>20</sup>Пазось, седейоймамонь лисьмапрясь, вельмевтизе кулозьстэ минек Иисус Азоронтъ, Эсь ревензэ ине Ваньцянтъ, кона Сонсензэ верентъ вельде кемекстызе пингедэ пингень вейсэнълувонтъ.

<sup>21</sup>Мон ознан: кадык Пазось анокстатадызь тынк эрґва паро тевентень Сонзэ мелензэ топавтоманть кисэ. Ды кадык Сон теи Иисус Христос

вельде тынк эйсэ сень, мезесь тукшны мелезэнзэ. Улезэ Христоснэнь инексчи пингеде пингес! Аминь.

<sup>22</sup>Энялдан тенк, кемиця ялгат, кунсолынк цидярдозь весе неть кемекстыця валтнэнь, конатнень мон максынь тенк те нурькине сёрмасонтъ.

<sup>23</sup>Пачтян тенк куля: минек кемиця ялганок Тимофеень нолдызь пекстамо кудосто. Бути сон курок сы монень, сестэ мон сонзэ марто сан тынк содавтомо.

<sup>24</sup>Ёвтадо монь пельде сукпря весе тынк ветицятненень ды Пазонь весе ломантненень. Сукпрат кучить тенк Италиянь кемиця ломантне.

<sup>25</sup>Пазонь чанстесь улезэ весеменк марто! Аминь.

## Апокалипсис Эли Иоаннэнь Панжозь Неявкс

### Откровение 1

<sup>1</sup>Те книгась – Иисус Христоснэнь панжозь неявкс, конань максызе Тензэ Пазось: невтемс Эсензэ вожотненень, мезе куроцсто топавтови. Тень Христос ангелэнзэ вельде пачтизе Эсензэ Иоанн вожонтень.

<sup>2</sup>Иоанн ёвтнизе весемень, мезе несъ. Те – Пазонь максовт куля ды видечи, конань панжизе сонэнзэ Иисус Христос.

<sup>3</sup>Уцяскав се, кона ловны те книганть, уцяскавт сетнеяк, конат кунсолыть неть валтнэнь ды эрять те книгань валтнэнь коряс, конат ёвтнить неень шкадонть ды сыця шкадонть. Эдь сынст топавтома шкась эль сы.

#### Христос кучи вал сисем кемикуротненень

<sup>4</sup>Иоанн сёрмады сисем кемикуротненень, конат эрять Римень Асиясо. Улезэ тенк чансть ды седейоймамо Пазонть пельде, кона свал ули, ульнесь ды карми улеме, ды сисем оймеялтнэнь пельде, конат аштить Пазонть инязоронь озамо тарканть икеле,

<sup>5</sup>ды Иисус Христосонь, кемевикс яволявтыцянзо пельде. Сон васенце, кие вельмесь кулозьстэ, ды Сон ашти Азорокс мода лангонь инязортнэнь лангсо! Сон вечксамизь минек ды Эсь верьсэнзэ ваньскавтымизь эсенек пежетнестэ.

<sup>6</sup>Сон теимизь минек инязорокс ды Пазонтень, Эсензэ Тетянстэнь, важодиця попокс. Шнамо ды вий Тензэ пингеде пингес! Аминь, истя улияк!

<sup>7</sup>Ванодо: Сон сы менелень пельсэ копачазь, ды весе ломантне несызь Сонзэ, несызь сетнеяк, конат Сонзэ лазызь. Ды весе масторлангонь раськетне кармить лайшеме-авардеме кисэнзэ. Истя улияк! Аминь.

<sup>8</sup>«Мон – Альфа ды Омега\*, Ушодкс ды Прядовкс», – корты Азорось, Весеменькирдицясь, кона свал ули, ульнесь ды карми улеме.

### Иоанн неи вельмезь Иисус Христосонь

<sup>9</sup>Мон, Иоанн, кемемасо тынк ялганк, яван мартонк Иисус Христосонь пиштеманть, инязорксчинть ды цидярдоманть. Мон ульнинь Патмос усия лангсо, козо панекшнимизь сень кис, мекс мон пачтинь Пазонь валонть ды ёвтинь Иисус Христосто.

<sup>10</sup>Недлечистэ, Азоронть чистэ, Пазонь Оймеялтось саимим Эсь виензэ алов, ды мон маринь, кода монь удало гайгезевсь прок покш торамонь вайгель, кона кортась: «Мон Альфа ды Омега, Васенцесь ды Меельцесь».

<sup>11</sup>«Сёрмадык книгас весе, мезе неят, ды кучик Асиясо эриця кемикуротненень сисем оштнэва: Эфесэв, Смирнав, Пергамов, Тиатирав, Сардисэв, Филадельфияв ды Лаодикияв».

<sup>12</sup>Сестэ мон велявтынть ды варштынть удалов, кинь вайгелесь корты монь марто, ды неинь сисем сырнень лампат.

<sup>13</sup>Сисем лампатнень ютксто мон неия Ломантнень Цёранть кондямонть. Сон оршазель кувака оршамосо, мештезэ карксазель сырнень карксамосо.

<sup>14</sup>Сонзэ прячерензэ ульнесть ашот, кода ашо пона, прок лов. Сельмензэ цивтёрдсть прок палыця толт.

<sup>15</sup>Пильгензэ ульнесть прок каштомсо ванськавтозь сияждыця бронза, вайгелезэ ведьпрамонь увномань кондямоль.

<sup>16</sup>Вить кедьсэнзэ Сон кирдсь сисем тештть, кургстонзо лисиль кавто пельга пшти торо, ды Сонзэ чамазо сияждсь чи куншкань чипай ладсо.

<sup>17</sup>Сонзэ неезь, мон прынь, прок кулозь, пильгезэнзэ. Сон путызе вить кедензэ прям лангс ды мерсь: «Иля пеле. Мон – Васенцесь ды Меельцесь».

<sup>18</sup>Мон – Эрямонь лисьмапря. Мон ульнинь кулозь, ней жо, вант, Мон эрян ды карман эрямо пингеде пингес, аминь. Монь кедьсэ куломань ды тоначинь панжоматне.



<sup>19</sup>Секс сёрмадык, мезе тон неят, мезе ней ули ды мезе карми улеме теде мейле.

<sup>20</sup>Ней Мон панжса тонеть салавачинть: кодамо смусть невтить сисем тештне, конатнень тон неят Монь вить кедьсэ, ды сисем сырнень лампатне. Неть сисем тештне – те сисем кемикуротнень ангелэст, а сисем лампатне, конатнень тон неить, – сисем кемикуротне».

## Откровение 2

### Христос кучи вал Эфесэнь кемикуронтень

<sup>1</sup>Мейле Сон поладсь: «Сёрмадт Эфесэнь кемикуронь ангелэнтень истя: “Вана мезть корты Се, кона кирди вить кедьсэнзэ сисем тештть ды яки сисем сырнень лампатнень юткова:

<sup>2</sup>Мон содасынь весе тынк тевенк, тынк стака важдеманк ды цидярдоманк. Содаса сеньгак, кода тынь нулгодтядо апаро ойме ломанде. Тынь снартниде-варчавтниде сетнень, конат ансяк невтить эсь прят апостолокс, ды чарькодиде: сынь кенгелицят.

<sup>3</sup>Мон содан: тынк ули цидярдоманк, тынь ламо пиштиде-майсиде Монь лемем кисэ ды ялатеке эзиде сизе.

<sup>4</sup>Ансяк вана мезе а тукшны Монь мельс тынк эйсэ: тынь ней Монь вечксамизь аволь уш истя, кода васняк.

<sup>5</sup>Ледстинк, кодат ульниде прамодонк икеле. Кадынк пежетенк ды тейнеде таго истят тевть, конатнень тейниде васняк. Бути жо а кадсынк пежетенк, сестэ Мон курок сан тыненк ды шаштса таркастонзо тынк лампанк.

<sup>6</sup>Ансяк вейкесэ тынь тейтядо видестэ: а вечксынк николаитнэнь\* тевест, конатнень Монгак а вечксынь.

<sup>7</sup>Кинь улить пилензэ, кунсолозо, мезде корты Пазонь Оймеялтось кемикуротненень! Кие изни, сенень Мон мерян ярсамс умарде эрямо чувтостонтъ, кона касы Пазонь пиресэнтъ”».

### Христос кучи вал Смирнань кемикуронтень

<sup>8</sup>«Сёрмадт Смирнань кемикуронь ангелэнтень истя: “Вана мезть корты Васенцесь ды Меельцесь, конась кулось ды таго велявтсь эрямонтень.

<sup>9</sup>Мон содан тевденк, тынк пиштемадонк-майсемадонк ды тынк арасьчиденк – алкуксокс тынь сюпавтадо! Содан седеяк, кода тынк сяддыть-покордыть сеть, конат эсь пряст ловить Пазонь ломанекс, ансяк сынъ а истят. Алкуксокс сынъ – Сатанань промксстонть.

<sup>10</sup>Илядо пеле неть пиштематнеде, конат савить тыненк кирдемс. Кунсолодо! Идемевсесь зярыятнень тынк эйстэ озавтсынзе пекстамо кудос, ды кемень чис тынь понгтадо снартнемас-варчавтнемас. Ансяк илинк кадо кемеманк, бути сави тенк мик куломс, ды кода изницяненъ, казян тенк эрямонь каштаз.

<sup>11</sup>Кинь улить пилензэ, кунсолозо, мезде корты Пазонь Оймеялтось кемикуротненень! Кие изни, сенень омбоце куломась\* зыян а теи”».

### Христос кучи вал Пергамонь кемикуронтень

<sup>12</sup>«Сёрмадт Пергамонь кемикуронь ангелэнтень истя:“Вана мезть корты Се, конань торозо кавто пельга пшти:

<sup>13</sup>Мон содан тевденк: тынь эрятадо тосо, косо Сатананть инязоронь озамо тарказо. Ды тедеяк содан: тынь а стувттадо Монь лементь ды эзинк кадо Монень кемеманть сестэяк, зярдю Антипа, Монь кемевикс яволявтыцясь, куловтозель тынк ошсо, косо эри Сатанась.

<sup>14</sup>Ансяк кой-кодат тынк тевенк а тукшныть Монь мельс: ютксонк улить истят, конат эрить Валаамонь тонавтоманзо коряс. Валаам жо тонавтызе Валаконь, кода Израилень эрицятнень совавтомс пежетьс: ярсамс сывельденть, кона алтазь аволь алкуксонь пазтнэнень, ды эрямс ускурязь.

<sup>15</sup>Истя жо тынк ютксоjak улить истят ломанть, конат эрить николаитнень тонавтомаст коряс, конадонтъ Мон нулгодян.

<sup>16</sup>Кадынк пежетенк! Бути тынь а кадсынк пежетенк, Мон куроцсто сан тенк, ушодан тюрема ды чавносынъ сынст кургстон лисиця торосонть.

<sup>17</sup>Кинь улить пилензэ, кунсолосо, мезде корты Пазонь Оймеялтось кемикуротненень! Кие изни, сенень Мон казын ярсамс кекшезь манна ды максан ашо кев, конань лангсо сёрмадозь од лем. Те лементь кияк а содасы сенде башка, конанень максозь кевесь”».

### **Христос кучи вал Тиатирань кемикуронтень**

<sup>18</sup>«Сёрмадт Тиатирань кемикуронь ангелэнтень истя: “Вана мезть корты Пазонь Цёрась, конань сельмензэ палыця толонь кондят ды конань пильгензэ прок сияждыця бронза:

<sup>19</sup>Мон содасынь весе тынк тевенк, вечкеманк ды кемеманк, важдеманк ды цидярдоманк. Ды содан: тынь ней тейтядо икелень коряс седе ламо тевть.

<sup>20</sup>Ансяк вана аламошка Монь мельс а тукшны тынк эйсэ: тынь кирдтядо Иезавель аванть коронзо. Сон невти эсь прянзо пазмарицякс ды эсензэ тонавтомасонть манчи Монь важотненень. Секскак сынъ эрить ускурязь ды ярсыть сывельде, кона алтазь аволь алкуксонь пазтнэнень.

<sup>21</sup>Мон максынъ тензэ шка кадомс пежетензэ, ансяк сонзэ арась мелезэ кадомс ускурямосо эрямонтъ.

<sup>22</sup>Кунсолодо! Мон каяса те аванть ормань тарка лангс. Сеть ломантненень, конат мартонзо сюлмавозь ускурямонь тевсэ, кармавтсынъ пек пиштеме, бути а кадсызь пежетев киява молемаст.

<sup>23</sup>Мон маштнесынъ куломань ормасо сонзэ мельга молицятненень. Сестэ весе кемикуротне кармить содамо: Мон – се, кие содасынзе ломантненень кекшезь арсемаст-мелест. Мон эрвантень эйстэнк максан тевензэ коряс.

<sup>24</sup>Лиятне жо тынк эйстэ, конат эрить Тиатирасо, эзть туге те зыянов тонавтоманть мельга. Тынь эзинк соавто превс-седейс, кода кортыть,

Сатананть домка салавачинзэ. Тыненк ули мелем пачтямс: тынк лангс Мон а карман путомо лия кармавтомат.

<sup>25</sup>Ансяк сень, мезенк ули, кеместэ кирдинк Монь самс.

<sup>26</sup>Кие изни, кие пингень прядовомас топавты Монь мелем, сенень максан азорксчи лия раськень ломантнень лангсо.

<sup>27</sup>Сон карми кирдеме-ветямо сынст кшнинь мандосо ды поркснесынзе сынст пельксэнь пелькс прок сёвонень чакшт. Истямо азорксчись Монень максозь Тетянь пельде.

<sup>28</sup>Теде башка, Мон максан сонензэ валскень зоря теште.

<sup>29</sup>Кинь улить пилензэ, кунсолосо, мезде корты Пазонь Оймеялтось кемикуротненень!”»

### **Откровение 3**

#### **Христос кучи вал Сардисэнь кемикуронтень**

<sup>1</sup>«Сёрмадт Сардисэнь кемикуронь ангелэнтень истя: “Вана мезть корты тенк Се, конась кедьсэнзэ кирди Пазонь сисем оймеялтт ды сисем тештть. Мон содасынь весе тынк теვენк, содан: тынк ловить эрицякс, алкукс жо – тынь кулозтядо.

<sup>2</sup>Сыргозде ды кемекстадо сень, мезесь зярс эйсэнк овсе эзь куло. Ансяк вана мезенть Мон редия: Монь Пазонтъ икеле тынк теვენк аволь весеме ёндо вадрят.

<sup>3</sup>Кирдеде мельсэнк тонавтоманть, кона максозель тенк ды конадонтъ тынь марсиде. Эрядо те тонавтоманть коряс ды кадынк пежетенк! Бути тынь а сыргозтядо, Мон сан тыненк апак учо, прок салыця, ды тынь содамоаяк а карматадо, зярдю Мон сан тыненк.

<sup>4</sup>Ялатеке Сардиссэ тынк улить таго-зяро ломаненк, конат эзизь рудазкавто эсест оршамопелест. Сынть кармить якамо Монь марто вейсэ, оршазь ашосо. Те сынест максозь видечисэ эрямоост кисэ.

<sup>5</sup>Кие изни, се карми оршазь ашо оршамопельсэ. Ды Мон а нардаса сонзэ лементь эрямо книгастонтъ ды апак сёпо ёвтаса сонзэ Эсень ломанекс Монь Тетянтъ ды Сонзэ ангелтнэнь икеле.

<sup>6</sup>Кинь улить пилензэ, кунсолосо, мезде корты Пазонь Оймеялтось кемикуротненень!”»

### **Христос кучи вал Филадельфиянь кемикуронтень**

<sup>7</sup>«Сёрмадт Филадельфиянь кемикуронь ангелэнтень истя: “Вана мезть корты Иневаньксэсь ды Видесь, кинь кедьсэ Давидэнь панжомась. Зярдо Сон панжи – киненьгак а пекстави, зярдо Сон пексты – киненьгак а панжови.

<sup>8</sup>Мон содасынь весе тынк тевенк. Ванодо, Мон панжинь икеленк кенкш, конань пекстамс киньгак а саты виезэ. Кадык виенк аламо, тынь ялатеке эриде Монь валом коряс ды эзинк кадо Монсь кемеманть.

<sup>9</sup>Кунсолодо! Мон максан тенк Сатананть промксстонтъ сетнень, конат кортыть ды невтить эсь пряст евреекс, ансяк алкуксокс сынъ а истят, сынъ – кенгелицят. Вансынк, Мон кармавтсынъ сынст самс ды сюконямс пильгезэнк. Ды сынъ чарькодъсызь, кода Мон тынк вечктядызь.

<sup>10</sup>Тынь кеместэ ванстынк Монь валонтъ ды цидярдыде. Секс Монгак карман тынк ванстома пиштемань шкастонтъ, конась шашты весе масторонтъ лангс ды карми пиштевтеме мода лангонь весе эрицятнень.

<sup>11</sup>Мон сан курок. Кеместэ кирдинк сень, мезенк ули. Кияк илязо нельге тынк кедьстэ изницянь каштазонк.

<sup>12</sup>Кие изни, сень мон тейса Монь Пазонь кудосо мазы кевень палманекс, ды сон кадовияк тозо пингеде пингес. Мон сёрмадса сонзэ лангс Монь Пазонь лементь ды Монь Пазонь ошонь лементь, од Ерусалиментъ, кона карми валгомо менельстэ Монь Пазонтъ пельде, ды Монсень од лемем.

<sup>13</sup>Кинь улить пилензэ, кунсолосо, мезде корты Пазонь Оймеялтось кемикуротненень”».

**Христос кучи вал Лаодикиянь кемикуронтень**

<sup>14</sup>«Сёрмадт Лаодикиянь кемикуронь ангелэнтень истя: “Вана мезть корты Аминь, кемевикс ды виде яволявтыцясь, конань вельде Пазось теизе весементь.

<sup>15</sup>Мон содасынь весе тынк тевенк: тынь а кельметь, а псить. Мон неиксэлидизь тынк эли псикс эли кельмекс!

<sup>16</sup>Тынь жо ансяк лембинеть, а пситькак, а кельметькак, ды секс Мон прок уксновкст ёрттадызь тынк Эсень кургсто.

<sup>17</sup>Тынь кортатадо: “Минь сюпавтано, сюпалгадынек, ды мезеяк миненек а эряви”. Нать тынь а чарькодтядо, кодат тынь пайстомот: тынь пиштякат, кажовт, сокорт ды штапот.

<sup>18</sup>Секскак Мон путтадызь тынк превс: рамадо Монь кедьстэ толсо ванськавтозь сырне сюпалгадоманк кисэ. Рамадо ашо оршамопельтькак эсенк лангс оршамс ды кекшемс визькстэме штапочинк. Рамадо сельмень ваднемапельгак ды ваднинк сельменк сокорчинк ютавтоманть кисэ.

<sup>19</sup>Мон таргаса лангс ды илейсэ тонавтса эрванть, конань вечкса. Секскак уледе эрзакс ды кадынк пежетенк!

<sup>20</sup>Кунсолодо! Мон аштян кенкш лангсо ды вачкоян. Бути кие марясы Монь вайгеленть ды панжсы кенкшенть, сестэ Мон сован кудозонзо ды озан мартонзо ярсамо, ды сонгак ярсы Монь марто вейсэ.

<sup>21</sup>Кие изни, сенень Мон мерян озамс мартон Монь инязоронь озамо таркантень, кода Монгак изнинь ды теде мейле озынь Тетянь марто Сонзэ инязоронь озамо таркантень.

<sup>22</sup>Кинь улить пилензэ, кунсолосо, мезде корты Пазонь Оймеялтось кемикуротненень”».

## Откровение 4

### Иоанн неи менель

<sup>1</sup>Теде мейле мон варштынъ ды неинъ эсень икельде менельс панжозъ кенкш! Ды маринъ вайгель, кона икелеяк кортась монъ марто ды гайгсь теке торамо. Сон мерсь: «Кепедевть тей! Мон невьса тетъ, мезе топавтови теде мейле».

<sup>2</sup>Пазонъ Оймеялтось нейке саимим монъ Эсензэ виентъ алов. Ды мон неинъ менельсэ инязоронъ озамо тарка, косо озадолъ Та-кие.

<sup>3</sup>Озадо аштицясь сияждсь яшманъ ды сардоликенъ питней кевтненъ ладсо. Инязоронъ озамо таркантъ перька ульнесъ пиземе чирьке ды цивтёрдсь изумруд ладсо.

<sup>4</sup>Озамо таркантъ перька ульнесъ лия комснилее инязоронъ озамо таркат, ды эрвасонтъ озадолъ сыре атя. Оршамопелест ульнесъ ашот, пряваст – инязоронъ сырненъ каштазт.

<sup>5</sup>Инызоронъ озамо таркантъ эйтэ неавсть ёндолонъ кивчкаемат, марявсть сееремат ды пурьгиненъ зэртть. Озамо таркантъ икеле палсть толонъ сисем пусмот – Пазонъ сисем оймеялтт.

<sup>6</sup>Озамо таркантъ каршо ульнесъ таго-мезе иневедень кондямо, кона цивтёрдсь пачк неиця сулика ды хрусталь ладсо. Инязоронъ озамо таркантъ перька, сонзэ ёжова, стядо аштеть ниле таго-мезть ракшанъ-ломанень кондят: сынст рунгост икельгаяк ды удалгаяк вельтязельть ламо сельмесэ.

<sup>7</sup>Васенцесь ульнесъ левень кондямо, омбоцесь – од буканъ кондямо, колмоцентъ чачозо мольсь ломанень чама ёнов, нилецесь мольсь ливтни куцькан ёнов.

<sup>8</sup>Нилетнестэ эрвантъ рунгозо вельтязель сельмесэ мик сёлмо алгаяк. Сёлмост жо ульнесъ котонь-котонь. Чинек-венек сынъ апак лотксе яла моравтыть: «Иневанькс, иневанькс, иневанькс Азоро Пазось, Весемькирдицясь, кона свал ульнесъ, ули ды карми улеме!»

<sup>9</sup>Ды эрваксть, зярдю неть ракшань-ломанень кондятнэ ёвтнить инексчинь, шнамонь ды сюкпрянь валт инязоронь озамо таркасо Озадонтень, пингеде пингес Эрицянтень,

<sup>10</sup>комснилее сыре атятне прыть инязоронь озамо таркасо Озадонтень икелев ды сюкомякшныть пингеде пингес Эрицянтень. Сынть путыть эсест инязоронь каштазост озамо тарканть икелев ды сеерить:

<sup>11</sup> «Азоро! Сэрейчить-покшчить коряс Тонеть максови весе инексчись, шнамось ды кирдемавиесь! Эдь Тон теик весементь, ды Тонь мелеть коряс эри весемесь ды теезельгак весемесь Тонь мелеть коряс».

## Откровение 5

### Вирез ды пекстазь книга

<sup>1</sup>Сестэ мон неинь инязоронь таркасо Озадонтень вить кедьстэ тапарксонь кондямо книга. Сон сёрмадозель кавто пельга ды пекстазель сисем пекстамо тешкссэ.

<sup>2</sup>Ды мон неинь пек виев ангел, кона кевкстнесь верьга вайгельть: «Кинень сэрейчинзэ-покшчинзэ коряс яжавить пекстамо тешкстнэ ды панжови книгась?»

<sup>3</sup>Ансяк арасель вейкеяк истямо, менель лангсоаяк, мода лангсоаяк, мода потсоаяк, кие панжовлизе книганть ды варштаволь эйзэнзэ.

<sup>4</sup>Сестэ мон ниреждезь карминь авардеме, мекс эзь муеве кияк, кона сэрейчинзэ-покшчинзэ коряс панжовлизе книганть ды варштаволь эйзэнзэ.

<sup>5</sup>Сестэ сыре атятнестэ вейкесь пшкадсь монень: «Иля аварде. Кунсолук, изнясь Иудань буестэ-раськестэ Левесь, Давидэнь юрсто-корёнсто Лисевксэсь! Сонензэ яжавить сисем пекстамо тешкстнэ ды панжови книгась».

<sup>6</sup>Ды инязоронь озамо тарканть икельде, ниле ракшань-ломанень кондямотнень куншкасто, сыре атятнень ютксто, мон неия стядо аштиця Вирезэнтень, конань рунгонзо лангсо неявсть печкемань аржот.



Сонзэ ульнесть сисем сюронзо ды сисем сельмензэ. Неть сельметне – Пазонь сисем оймеялтт, конат кучозь весе масторланганть.

<sup>7</sup>Вирезэсь шаштсь инязоронь таркасо Озадо аштицянтень ды саизе Сонзэ вить кедьстэнзэ конёв тапарксонть.

<sup>8</sup>Зярдо Сон саизе книганть, ниле ракшань-ломанень кондытнэ ды комснилее сыре атятне прасть кумажа лангс Вирезэнтъ икелев. Эрванть кедьсэ ульнесть кайга ды сырнень ваканнэ, конась пештязель ладансо – Пазонь ломантнень озномасо.

<sup>9</sup>Ды сынъ серьгедсть од шнамо моро: «Тонеть сэрейчить-покшчить коряс саеви книгась ды панжовить пекстамо тешкстнэ. Эдь Тон печкезелить ды Эсеть верьсэнтъ рамить-идить Пазонть туртов ломантнень эрва буестэ, раськестэ, масторсто ды кельстэ.

<sup>10</sup>Тон теимизь минек инязорокс ды минек Пазонтень важодиця попокс, ды минь карматано улеме масторлангсо прявтокс».

<sup>11</sup>Сестэ мон варштынъ ды маринь ангелэнь вайгельть. Ангелтнэде ульнесть ламодояк-ламо, тѣжат ды тѣжанъ тѣжат! Сынъ пурнавсть инязоронь озамо тарканть перька, ниле ракшань-ломанень кондымотнень ды сыре атятнень перька.

<sup>12</sup>Сынъ морасть виев вайгельсэ: «Вирезэнтень, конань печкизь, сэрейчинзэ-покшчинзэ коряс максови вий, сюпавчи, ине превть ды нарде! Шнамо, инексчи ды чанстямо-баславамо Тензэ!»

<sup>13</sup>Сестэ мон таго маринь, кода весе Пазонь кедьсэ теезесь менель лангсо ды мода лангсо, мода потсо ды иневедьсэ, весемесь, мезесь эйсэст, морась: «Инязоронь таркасо Озадонтень ды Вирезэнтень улезэ чанстямо-баславамо, шнамо ды азорксчи пингеде пингес!»

<sup>14</sup>Ниле ракшань-ломанень кондымотне мерсть: «Аминь, улезэ истя!» Ды комснилее сыре атятне прасть кумажа лангс ды кармасть сюконякшномо пингеде пингес Эрицянтень.

## Откровение 6

### Вирезэсь панжи книгань пекстамо тешкстнэнь

<sup>1</sup>Мон неия, кода Вирезэсь панжизе сисемтнень эйстэ васенце пекстамо тешксэнтъ, ды мария, кода вейке ракшань-ломанень кондямось прок пурьгинень вайгельсэ рангстась: «Сак ды вант!»

<sup>2</sup>Мон варштынъ ды неинь эсень икельде ашо лишме. Лишментъ лангсо ульнесь та-кие ласте, кедьсэнзэ налчирьке. Сонензэ макссть инязоронь каштаз, ды сон, кода изниця, сыргась од изнямотнес.

<sup>3</sup>Вирезэсь панжизе омбоце пекстамо тешксэнтъ, ды мон мария, кода омбоце ракшань-ломанень кондямось мерсь: «Сак!»

<sup>4</sup>Ды сестэ лиссь толонь кондямо якстере лишме. Сонзэ лангсо ластентень Пазось макссь вий нельгемс мода лангонь сэтъмелувонтъ ды кармавтомс ломантнень маштнеме вейкест-вейкест. Сонензэ макссть покш торо.

<sup>5</sup>Зярдэ Вирезэсь панжизе колмоце пекстамо тешксэнтъ, мон мария, кода колмоце ракшань-ломанень кондямось мерсь: «Сак!» Мон варштынъ ды неинь эсень икельде раужо лишме, конань лангсо ластесь кирдсь кедьсэнзэ онкст.

<sup>6</sup>Ды мон маринь таго-мезе ломанень вайгель ёнов молиця, кона каятотсь ниле ракшань-ломанень кондямотнень ютксто. Вайгелесь мерсь: «Товзюронь вейке онксонтъ питнезэ ули вейке динар\*, шужонь колмо онкстнэнь\* кисэ – истя жо вейке динар. Ансяк ойумарькстнэнь ды винаумарькстнэнь илить колсе!»

<sup>7</sup>Зярдэ Вирезэсь панжизе нилеце пекстамо тешксэнтъ, мон мария, кода нилеце ракшань-ломанень кондямось мерсь: «Сак!»

<sup>8</sup>Мон варштынъ ды неинь эсень икельде ловтаня лишме. Сонзэ лангсо ластентъ лемезэ ульнесь Кулома, мельганзо мольсь Тоначись. Сонензэ Пазось макссь азоркчи модантъ нилеце пельксэнзэ лангсо маштнемс

ломантнень торосо, вачочисэ, куломань ормасо ды идем ракшань вийсэ.

<sup>9</sup>Зярдэ Вирезэсь панжизе ветеце пекстамо тешксэнтъ, алтарентъ алдо мон неинь сетнень оймест, конат маштозельть Пазонь валонтъ пачтямонтъ ды кемемадост ёвтамонтъ кисэ.

<sup>10</sup>Сынь рангсть верьга вайгельть: «Иневанькс ды Виде! Весемень Азоро! Мекс Тон те шкас а судят мода лангонь эрицятнень ды а пандат тенст кеж минек валозь верентъ кисэ?»

<sup>11</sup>Сестэ кулозтнень эйстэ эрьвантень Пазонтъ пельде макссть ашо оршамопель ды мерсть оймамс аволь куватьс. Сыненст эрявсь учомс се шкас, зярс а пурнави эрявикс ламочи сынст марто Пазонтень важодиця кемиця ялгатнеде, конат истя жо улить маштозь.

<sup>12</sup>Вирезэсь панжизе котоце пекстамо тешксэнтъ. Ды мон неия, кода виевстэ соракадсь модась, чипаесь раужкадсь прок ризнэмань оршамопель, ковось теевсь верень кондямокс.

<sup>13</sup>Менелень тештнеяк прастъ мода лангс, кода пракшныть чувто прясто пиже инжир умартне виев даволонь шкасто.

<sup>14</sup>Менелесь ёматотсь, прок тапардавсь килей керень тапарксокс; весе пандотне ды усиятне сыргстасть таркастост.

<sup>15</sup>Те шкане мода лангонь инязортнэ, чинязтнэ ды ушмонь ветицятне, сюпавтне ды виевтне, – весе лия ломантнеяк: уретнеяк ды олячисэтнеяк кекшнестъ кевботмарга ды пандтнэнь лазкстнэва.

<sup>16</sup>Сынь эняддсть пандотненень ды пандокарязтнэненень: «Пракшнодо минек лангс ды кекшимизь инязоронь таркасо Озадо аштицянтъ вановтонзо эйстэ ды Вирезэнтъ кежень пандоманзо эйстэ!»

<sup>17</sup>Эдь сась Сонзэ кежень пандомань тандавтыця чись, ды арази кияк сонзэ каршо аштеви!»

## Откровение 7

### Пазонь ломанень промкс

<sup>1</sup>Тезде мейле мон неинь ниле ангелт, конат стядо аштеть модань ниле ёнкстнэва. Сынь кирдсть модань ниле варматнень ды эзьт максо тенст пувамс моданть лангс, иневеденть лангс ды кодамояк чувто лангскак.

<sup>2</sup>Ды мон неинь лия ангел, кона кепедевсь чилисема пельде ды конань кедьсэ ульнесь эриця Пазонть тешкстамопель. Ангелэсь виев вайгельсэ серьгедсь ниле ангелтнэнень, конатненень мерезель теемс зыян модантень ды иневедентень:

<sup>3</sup>«Илядо тее зыян модантень, иневедентень ды чувтнэненьгак, зярс минь а тешкстасынек минек Пазонть весе важотнень коняст тешкстамосо!»

<sup>4</sup>Ды мон маринь, зярот ульнесть тешкстазь Пазонь тешкстамосо. Тешкстатнеде ульнесть сядо ниленьгемень ниле тёжат Израилень весе буетнестэ-раськетнестэ.

<sup>5</sup>Тешкстатнеде ульнесть кемгавтово тёжат эрва буенть ютксто: Иудань, Рувинэнь, Гадонь,

<sup>6</sup>Асирэнь, Нафталинь, Манассень,

<sup>7</sup>Симеононь, Левинь, Исаскаронь,

<sup>8</sup>Завулононь, Иосифень ды Вениаминэнь буенть ютксто.

<sup>9</sup>Мейле мон неинь покштояк покш промкс. Тосо ульнесть ламодояк ламо ломанть – сынь киненьгак эзьт ловново. Сынст ютксо ульнесть эрва кодамо буень, раськенень, масторонь ды эрва кодамо келень ломанть. Сынь аштеть инязоронь озамо тарканть ды Вирезэнтъ икеле, оршазельть ашо оршамосо, ды кедьсэст кирдсть пальмань тарадт.

<sup>10</sup>Сынь покш вайгельсэ сеересть: «Минек Пазонть кедьсэ, кона озадо ашти инязоронь озамо таркасо, ды Вирезэнтъ кедьсэ минек идеманок!»

<sup>11</sup>Ды весе ангелтнэ, конат стядо аштеть инязоронь озамо тарканть перька, сыре атятнень ды ниле ракшань-ломанень кондытнэнь перька,

прасть инязоронь озамо тарканть икелев ды шнасть Пазонть инексчинзэ.

<sup>12</sup> «Аминь, улезэ истя! – кортасть сынъ. – Чанстямо-баславамо ды инексчи, ине превть ды сукпря, шнамо, вий ды нарде улезэ минек Пазонтень пингеде пингес! Аминь».

<sup>13</sup> Сыре атятнестэ вейкесь кевкстимим монь: «Кить неть ашо оршамосо оршазь ломантне ды косто сынъ састь?»

<sup>14</sup> Тень каршо мон меринь: «Мон а содан. Теде тон содат, покштяй». Сон кортась монень: «Нетне сеть, конат печтясть ине пиштемань шка. Сынъ муськизь-ванськавтызь эсест оршамопелест ды ашолгавтызь Вирезэнь верьсэнтъ.

<sup>15</sup> Секскак сынъ Пазонь инязоронь озамо тарканть икеле ды чинек-венек важдить Тензэ Сонзэ кудосо. Инязоронь таркасо Озадось карми эрямо ютксост ды карми ванстома сынст.

<sup>16</sup> Ды ней сынст зярдоак а стардсынзе вачочись ды симемань самось. Сынст а пултасынзе чипаесь, а чентясынзе псись.

<sup>17</sup> Эдь Вирезэсь инязоронь озамо тарканть куншкасто карми ваномо сынст мельга ды ветясынзе лисьмапратнес, конатнестэ чуди эрямо ведь. Ды Пазось нардасы сынст сельместэст эрва сельведьэргинентъ».

## Откровение 8

### Вирезэсь панжи сисемеце пекстамо тешксэнтъ

<sup>1</sup> Зярдо Вирезэсь панжизе сисемеце пекстамо тешксэнтъ, менельсэнтъ весемесь каштмольсь. Истямо каштмолемась таргавсь пельчасошкань перть.

<sup>2</sup> Теде мейле мон неинь Пазонть икеле стядо аштиця сисем ине ангелт. Эрвантень макссть торамо.

<sup>3</sup> Сась лия ангел, кона кедьсэнзэ кирдсь сырнень сувтамо кедьге, ды стясь алтарентъ вакс. Ангелэнтень макссть ламо сувтамопель путомс

Пазонь весе ломантнень озномаст марто сырнень алтаренть лангс, кона инязоронь озамо тарканть икелель.

<sup>4</sup>Истя Пазонь ломантнень озномаст марто ангелэнтъ кедьстэ кепедевсь Пазонтъ икелев тантейстэ качадыця ладанонь качамо.

<sup>5</sup>Ангелэсь саизе сувтамо кедьгентъ, пештизе сонзэ алтаренть лангсто саезь толсо ды ёртызе мода лангс. Сестэ марявсть пурьгинень зэртъ, сееремат, неавсть ёндолонь кивчкаемат ды кепедевсь модань сорнома.

### **Кото торамонь зэртъ**

<sup>6</sup>Сисем ангелтнэ, конат кирдсть сисем торамотнень, анокстасть эйсэст зэрнеме.

<sup>7</sup>Зэрнезевсь васенце ангелэнтъ торамось. Верде ёртозельть цярахман ды тол, верь марто човор, конат прастъ моданть лангс. Ды палсь моданть колмотькс пельксээ, палсть чувтнэнь колмотькс пельксэст, ды палсь те таркастонть весе пиже тикшесь.

<sup>8</sup>Зэрнезевсь омбоце ангелэнтъ торамось, ды теке покштояк покш пандошка тол ёртозель иневедьс. Иневедентъ колмотькс пельксээ теевсь верекс,

<sup>9</sup>кулось иневедень эрицянтнень колмотькс пельксэст ды каладсть иневедень венчтнень колмотькс пельксэст.

<sup>10</sup>Зэрнезевсь колмоце ангелэнтъ торамось. Менельстэ прась толонь пусмокс пальця покштояк покш теште. Сон прась весе лейтнень ды лисьмапратнень колмотькс пельксэст лангс.

<sup>11</sup>Те тештентъ лемезэ Нартемкс. Ды весе ведтнень колмотькс пельксэст теевсть сэпейкс, прок нартемкс, ды ламо ломанть кулость те ведтентъ, эдь те сэпей ведесь теевсь куловтыцякс.

<sup>12</sup>Зэрнезевсь нилеце ангелэнтъ торамось, ды колазель чипаентъ колмотькс пельксээ, ковонтъ колмотькс пельксээ, тештнень колмотькс пельксэст. Сынст колмотькс пельксэст чополгадсть, чинть ды вентъ колмотькс пельксэст теевсть валдовтомокс.

<sup>13</sup>Мон неия ды мария, кода менель ёжова ливтиця лия ангелэсь сеересь виев вайгельсэ: «Зыян! Зыян! Зыян мода лангонь эрицятненень кадовикс торамотненень эйстэ, конатнесэ куроок зэрнезевить колмо кадовикс ангелтнэ!»

## Откровение 9

<sup>1</sup>Зэрнезевсь ветеце ангелэнтэ торамось, ды мон неия менельстэ мода лангс празь тештентэ. Сонензэ макссть тоначинь потмакстомо отьманть эйстэ панжома.

<sup>2</sup>Тештесэ панжизе потмакстомо отьманть, ды тосто кармасть лисеме тусто качамо, прок покштояк покш каштомосто. Те качамодонть чипаесэ ды коштоьскак чополгадсть.

<sup>3</sup>Ды качамоостонтэ моданть лангс лиссть пек ламо тастат. Сыненст макссть истямо жо пупамовий, кодамо ули мода лангсо сялгопуло шанжавтнэнь.

<sup>4</sup>Тастатненень кармавтозель а тееме зыян модалангонь тикшетнененьгак, кодаткак пиже лисевкстнэнененьгак ды чувтнэнененьгак, ансяк сеть ломантненень, конатненень конясо арасель Пазонтэ тешксээ.

<sup>5</sup>Тастатненень эзть мере маштнеме неть ломантненень, кармавтозель ансяк пиштемемест сынст вете ковонь перть. Те пиштемась ульнесэ истямо, кода сялгопуло шанжавдо пиштемась, зярдэ сон пупасы ломанентэ.

<sup>6</sup>Се шкастонтэ ломантне кармить вешнеме куломанть, ансяк а мусызь сонзэ. Сынть тердить куломанть, ансяк куломась оргоди эйстэст.

<sup>7</sup>Тастатне неявсть прок тюремас анокстазь лишметэ, прываст – прок сырненень каштазт, сынст чачост – ломанентэ кондямот,

<sup>8</sup>черест кувакат, кода аватненень, пеест прок левень.

<sup>9</sup>Лангсост ульнестъ прок кшнистэ теезь панарт. Сынст сёлмонь либордомань увтост ульнесь истямо зэртекс, теке кильдезь ушмокрадзтнэс, ламо лишметь ардыть тюремас.

<sup>10</sup>Сынст пулост ды сялгост, кода сялгопуло шанжавтнэнь, ды пулозост путозель вий тейнемс зыян ломантненень вете ковонь перть.

<sup>11</sup>Сынст лангсо инязорокс ульнесь потмакстома отьмань ангелэсь, конань лемезэ еврееень кельсэ Абаддон, грекень кельсэ – Аполлион\*.

<sup>12</sup>Васенце зыянось ютась. Ды вана сонзэ мельга ютыть таго кавто лия зыянт.

<sup>13</sup>Зэрнезевсь котоце ангелэнтъ торамось. Мон маринь вайгель, кона лиссь ниле сюротнестэ, конат теезельть Пазонтъ икеле аштиця сырнень алтарентъ ниле ужотнева.

<sup>14</sup>Вайгелесь кармавтсь ангелэнтень, кона зэрнесь торамосо: «Юкснить сеть ниле ангелтнэнь, конат сьулмсезь ине Эвфрат леентъ чиресэ!»

<sup>15</sup>Ды неть ниле ангелтнэнь юкснизь. Сынст кирдекшнизь анококс те часонтень, чинтень, ковонтень ды иентень, – куловтомс весе масторлангонь ломантненень колмотькс пельксэст.

<sup>16</sup>Тосо ульнестъ кавто сядт миллионт ласте тюриця ушмант. Мон монсь маринь сынст ламочидест.

<sup>17</sup>Вана кодамокс мон неинь эсень неякссо лишметненень ды сынст лангсо ластетненень. Сынст кшнинь панарост ульнестъ толонь якстереть, чопода сэнтъ ды палыкандалонь ожот. Лишметненень пряст мольсть левень пря ёнов; кургстост лисиль тол, качамо ды лакиця палыкандал.

<sup>18</sup>Ды неть колмо маштнама вийтнесэ: толсонть, качамосонтъ ды палыкандалсонть, конат лиссть лишметненень кургсто, куловтозель весе ломаньлувонтъ колмотькс пельксэзэ.



<sup>19</sup>Эдь лишметнень виест ульнесь кургсост ды пулосост: сынст пулотне ульнесть пря марто, прок гуйть, ды неть прятнесэ сын пупсильть ломантнень.

<sup>20</sup>Кадовикс ломантне, конатнень эзизь куловто неть маштнама вийтне, эзть янксезеве эсест кедьсэ теезь пазост кисэ. Сынэ эзть лотка сюконякшномадо идемевстненень ды сырнестэ, сиясто, бронзасто, кевстэ ды чувтосто теезь чопачатненень, конат а маштыть неемеяк, марямояк, якамояк.

<sup>21</sup>Неть ломантне эзизь кадо ломанень куловтомань, мунямось, ускурямонь-усксевемань ды саламонь тевтнень.

## Откровение 10

### Ангел ды тапарксонь кондямо книга

<sup>1</sup>Ды таго мон неинь виевдеяк виев ангел, кона валгиль менельстэ. Сон оршазель пельсэ, прянзо вельксэ ульнесь пиземе чирьке, чамазо цивтёрдсь прок чипай, пильгензэ ульнесть теке толонь палманть.

<sup>2</sup>Сон кирдсь кедьсэнзэ тапарксонь кондямо теткезь книга. Сон вить пильгсэнзэ чалгась иневеденть лангс, кершсэнтъ – моданть лангс

<sup>3</sup>ды виев вайгельсэ серьгедсь истя, кода урны левесь! Зярдо сон серьгедсь, сестэ зэрнезь кортазевсть сисем пурьгинень вайгельть.

<sup>4</sup>Зярдо сисем пурьгинетне прядызь эсест вайгельсэ кортамо, мон сёрмадыксэлия кортамо, ансяк маринь менельстэ гайгиця вайгель, кона кортась: «Кекшик сень, мезде кортасть сисем пурьгинетне. Тень иляк сёрмадо!»

<sup>5</sup>Ды сестэ ангелэсь, конань мон неия иневедь лангсо ды мода лангсо аштемстэ, кепедизе кедензэ менелентень

<sup>6</sup>ды божась-пежетькстась пингеде пингень Эрицянтъ эйсэ, кие теизе менеленть, моданть, иневеденть ды весементь, мезесь сынст эйсэ. Ангелэсь яволявтсь: «Шкась прядовсь!»

<sup>7</sup>Секскак, сеть читнестэ, зярдо зэрнезеве сисемеце ангелэнтъ торамозо, топавтови Пазонь салавань арсемась, кода Сон алтаськак Эсензэ вагонзо, пазмарицянзо туртов».

<sup>8</sup>Ды таго кортазевсь монь марто вайгелесь, конань мон мария менельстэ: «Азё, саик тетъкезь тапарксентъ иневедь ды мода лангсо стядо аштиця ангелэнтъ кедьстэ».

<sup>9</sup>Мон молинь ангелэнтъ малас ды энялгадынь максомс монень те тапарксентъ. Сон тень каршо мерсь: «Саик ды сэвик сонзэ. Пекесэть карми улеме сонзэ эйстэ сэпе, кургсот – медень ламбамо».

<sup>10</sup>Мон саия ангелэнтъ кедьстэ те тапарксентъ ды сэвия сонзэ. Кургсон сон марявсь медень ламбамокс, а зярдо нилия сонзэ, пекем кармась пурдамо сэпедентъ.

<sup>11</sup>Монень ёвтазель: «Гонеть таго эряви пачтямс Пазонть арсеманзо-мелензэ ламо раськеде, буеде, кельтнеде ды инязортнеде».

## Откровение 11

### Пазонь кулянь кавто неицят-яволявтыцят

<sup>1</sup>Ды вана Пазонть пельде монень макссть мандонь кондямо онкстнемапель\* ды мерсть: «Азё онкстник Пазонь кудонтъ ды алтарентъ, ловныть тосонь озныцятнень».

<sup>2</sup>Ансяк онкстнемстэ Пазонь кудонтъ ушо пирявкс потмонтъ кадык, иляк лово, эдь сон максозь Пазонь а содыця раськетненень. Сынъ кармить кирдеме Пазонь иневанькс ошонтъ эсест пильгест ало ниленьгемень кавто ковт.

<sup>3</sup>Мон кучан ризнэмань оршамопельсэ оршазь кавто неицят-яволявтыцят, ды сынъ кармить пачтямо Монь валонтъ неть тѣжа кавтосядт кодгемень читнень перть».

<sup>4</sup>Неть неицятне-яволявтыцятне – прок кавто ойумарькст, кавто лампадкат, конат аштитъ весе мода лангонь Пазонть икеле.

<sup>5</sup>Бути кие снарты теемс сыненст зыян, кургстост лиси тол ды пултасынзе зыянонь теицятнень. Истя кулы эрьвась, кие снарты теемс сыненст зыян.

<sup>6</sup>Сынст ули виест пекстамс менеленть: пиземе а туи моданть лангс се шканть перть, зярс сынъ кармить пачтямо Пазонь валонть. Теде башка, сынст ули виест теемс веденть верекс ды кучомс моданть лангс эрьва кодамо зыян, зяроксть ули мелест.

<sup>7</sup>Ды зярдю неть кавто неицятне-яволявтыцятне прядсызь Пазонь валонь пачтямо тевенть, тоначинь потмакстомо отьмастонть лисиця идем ракшась каяви лангост, изнясынзе ды маштнесынзе сынст.

<sup>8</sup>Сон кадсынзе сынст рунгост усксевеме се ине ошонтъ кужова, косо ульнесь крѣст лангс вачкодезь минек Азорось. Те ошонтень оймеялтонь смустень коряс мерить Содом эли Египет.

<sup>9</sup>Колмо пель марто чить весе масторлангонь ломантне, раськетне, эрьва кодамо кельсэ кортыця буетне кармить ваномо сынст кулозь рунгост лангс ды а мерить сынст калмамо.

<sup>10</sup>Мода лангонь эрицятне кецить неть кавтотнень куломаст кувалт, тейнить эстет кенярдома чить, казнить вейкест-вейкест туртов казнеть, эдь неть Пазонь валонть кавто пачтицятне вельть пиштевтсть мода лангонь эрицятнень.

<sup>11</sup>Колмо пель марто чинь ютазь, совась неицятнес-яволявтыцятнес Пазонь кучовт эрямонь оймеялт, ды сынъ стясть пильге лангс. Кить тень неизь, пек тандадсть.

<sup>12</sup>Кавто неицятне-яволявтыцятне марясть менельстэ виев вайгель, конась сеересь тенст: «Кепедеведе тей!» Ды ятост сельме икеле сынъ пель лангсо кепедевсть менелев.

<sup>13</sup>Се шкастонть сыргась модань виев сорнома, ды каладсь ошонтъ кеменце пельксээ. Сисем тѣжат ломанть маштовсть те модань

сорномадонть. Кадовикстнэ жо тандадсть ды шнасть менелень Пазонть инексчинзэ.

<sup>14</sup>Ютась омбоце зыянось. Ды вана капши колмоце зыянось!

#### **Сисемеце торамонь зэртъ**

<sup>15</sup>Зэрнезевсь сисемеце ангелэнтъ торамось, ды менельстэнтъ каятотсть ламо виев вайгельть, конат сеереть: «Ней минек Азоронок ды Сонзэ кучовт Идицясь саизь весе масторлангонть Эсест Инязорксчист алов! Пазось карми ветямо те Инязорксчинть пингедэ пингес!»

<sup>16</sup>Пазонть икеле инязоронь озамо таркатнесэ аштиця комснилее сыре атятне прасть Пазонть икелев, кармасть сюконякшномо

<sup>17</sup>ды сеереть: «Сюкпря Теть, Азоро Пазось, Весемькирдиця, Се, кие ули, ульнесь ды карми улеме! Эдь Тон нолдык тевс Эсеть ине виеть ды саик Эсеть кедьс Инязорксчинть!

<sup>18</sup>Азаргадсть виде Пазонь а содыцятне, ды секскак сась Тонь кежентъ шкась. Сась шкась судямс кулозтнень ды пандомс питне Тонь важот, пазмарицят туртов ды весе Тонь ломанеть туртов, Тонь мелень ваньцятнень туртов: кода вишкинетненень, истя инетнененьгак! Сась шкась куловтомс-ёмавтомс сетнень, конат куловтыть-ёмавтыть мода лангонь эрицятнень».

<sup>19</sup>Менельсэ панжовсь Пазонь кудось, ды тосто кармасть неявомо Пазонть вейсэнълувонь горобиясь. Ды неявсть ёндолонь кивчкаемат, марявсть сееремат, пурьгинень зэртъ, кепедевсь модань сорнома ды сыргась виев цярахман.

## **Откровение 12**

### **Тейтеръава ды инегуй**

<sup>1</sup>Ды неявсь менель лангсо ине дивань тешкс: чипайсэ оршазь тейтеръава. Сонзэ пильгензэ ало ульнесь ковось, прясонзо кемгавтово тештестэ каштаз.

<sup>2</sup>Тейтеръавась пешксесэль, ды сась уш чачтома шказо: сон пек майсесь ды пижнесь чачтомань сэредькстэнтъ.

<sup>3</sup>Ды вана лиссь менель лангс лия тешкс: покштояк покш якстере инегуй, сисем пря ды кемень суро марто. Эрьва прянтъ лангсо ульнесь инязоронь каштазке.

<sup>4</sup>Инегуесь пулосонзо тенсезь тенсинзе весе менелень тештнень колмотькс пельксэст ды ёртынзе сынст мода лангс. Сон стясь чачтыцянтъ икелев ды учось эйдентъ чачоманзо: эдь ульнесь покш мелезэ сеске сэвемс эйдентъ.

<sup>5</sup>Авась чачтась эйде, цёрыне, конась карми весе раськетнень кирдемеветямо кшнинь мандосо. Эйкакшось нейке каподезель Пазонтень, ды Сонзэ инязоронь озамо таркантень.

<sup>6</sup>Сонсь авась оргодсь чаво мода лангов, козо Пазось анокстакшнось тензэ эрямо тарка. Тосо кармить мельганзо якамо тёжа кавтосядт кодгемень чинь перть.

<sup>7</sup>Те шкастонтъ менельсэ ушодовсь тюрема: Михаил ды сонзэ ангелтнэ тюрсть инегуентъ каршо, кона эсь ангелэнзэ марто тюрсь сынст каршо.

<sup>8</sup>Ды инегуесь ульнесь изнязь, ды сон ангелэнзэ марто ёмавтызе эсь тарканзо менель лангсо.

<sup>9</sup>Те покштояк покш инегуесь, кезэренъ гуесь, конанень мерить Идемевсь эли Сатана, весе ломаньлувонь манчицясь, ульнесь ёртозь мода лангс весе ангелэнзэ марто.

<sup>10</sup>Ды мон маринь менельстэ виев вайгель, кона кортась: «Окойники сась Пазонь пельде идемась! Ней Сон нолдызе тевс Эсь Инязоркчинь виензэ! Ды Сонзэ кучовт Идицянтъ ули азорксчизэ! Эдь минек кемиця ялгатнень чумондыцясь, кона чинек-венек сынст чумондсь Пазонок икеле, ней ёртозь менельстэ.

<sup>11</sup>Вирезэнь верьсэнтъ ды Пазонь валонь пачтямосонтъ минек кемиця ялгатне изнизь инегуентъ. Сынъ эзть пеле куломадо, ды ульнестъ анокт максомс эсь эрямосткак.

<sup>12</sup>Секскак кенярдт, менель ды весе тонь эрицятне! А мода масторонь ды иневедень эрицятненень – зыян! Эдь тыненк валгсь Идемевсесь, пештызь ине кежсэ, эдь сон соды: сонзэ шказо эль прядови!»

<sup>13</sup>Зярдэ инегуесь неIZE эсь прянзо мода лангс ёртозекс, сон напустясь аванть мельга, кона чачтызе цёрынентъ.

<sup>14</sup>Авантень макссть ине куцьканонь кавто сёлмот ливтямс чаво модасо аноктазъ таркантень, ков а пачкодеви гуесь ды косо кармить аванть мельга якамо колмо пель марто иеть.

<sup>15</sup>Гуесь киргакстсь кургстонзо аванть мельга чадыведень лей сонзэ саламга-ёмавтомга.

<sup>16</sup>Ансяк модась лездась авантень: сон панжинзе турванзо ды симизе леентъ, конань киргакстызе кургстонзо инегуесь.

<sup>17</sup>Инегуесь азаргадсь аванть лангс ды тусь тюреме сонзэ лия эйкакштнэнь каршо, конат топавтыть Пазонь кармавтовкстнэнь ды Иисус Христосонь виде тонавтоманть.

## Откровение 13

### Кавто идем ракшат

<sup>1</sup>Ды мон арынъ иневедь чирес ды неия, кода иневедьстэнтъ лиссь идем ракша\*. Сон ульнесь кемень суро марто ды сисем пря марто. Сонзэ эрьва сюронтъ лангсо ульнесь инязоронь каштазке, ды эрьва прясонзо сёрмадозель Пазонь покордыця лем.

<sup>2</sup>Идем ракшась, конань мон неия, мольсь леопард ёнов, пильгензэ ульнестъ теке овтонь, кургозо – теке левень. Инегуесь максызе сонензэ эсь виензэ, инязоронь озамо тарканзо ды ине азорксчинзэ.

<sup>3</sup>Идем ракшанть вейке прясонзо неявсь куломас пачтиця томбавкс, ансяк куломань те томбавксось пичкакшнось. Модань весе эрицятне абунгадозь тусть те идем ракшанть мельга. Весе ломантне сюконясть инегуентень секс, мекс сон максызе идем ракшантень эсь азорксчинзэ.

<sup>4</sup>Сынь сюконясть идем ракшантеньгак ды кортасть: «Кияк а арави сэрцек те идем ракшанть марто! Кияк а тюрьгадови сонзэ марто!»

<sup>5</sup>Идем ракшантень максозель кортамс каштансто ды Пазонь покордыця валсо. Теде башка, Пазонть пельде максозель тензэ улемс азорокс ниленьгемень кавто ковонь перть.

<sup>6</sup>Ды идем ракшанть кургсто кармасть лисеме сядома-покордамо валт Пазонть кувалма. Сон ёвтнесь нулгодькс валт Пазонь лемденть, Сонзэ эрямо таркадонть ды менельсэ весе эрицятнеде.

<sup>7</sup>Истя жо сонензэ максозель вий тюрьгадомс Пазонь ломантнень марто ды изнямс сынст. Ды максозель сонензэ азорксчи весе буетнень, раськетнень, мастортнень ды кельтнень лангсо.

<sup>8</sup>Сонензэ кармить сюконямо мода лангонь весе сеть эрицятне, конатнень лемест апак сёрмадо эрямо книгантень. Те книгась Вирезэнтъ кедьсэ, кона печкезель менелень-масторонь теевемадо икеле.

<sup>9</sup>«Кинь улить пилензэ – кунсолозо!»

<sup>10</sup> Кие саи полонс, се сонськак понги полонс. Кие торосо чавны-маштни, се сонськак ули маштозь торосо. Неть валтнэсэ Пазонь ломантне тердевить цидярдомас ды кемевиксчис».

<sup>11</sup>Мейле мон неинь омбоце идем ракша, кона лиссь мода потсто. Сонзэ ульнесть кавто сюронзо, прок реве левксэнь, ансяк кортась сон инегуй ладсо.

<sup>12</sup>Васенце идем ракшанть икеле сон нолды тевс васенце идем ракшанть весе азорксчинзэ. Сон кармавты мода лангсо эрицятнень суюконямо васенце идем ракшантень, конань куломань аржось пичкакшнось.

<sup>13</sup>Омбоце идем ракшась тейни ине тамашат: ломантнень сельмест икеле натой правты мода лангс менельстэ тол.

<sup>14</sup>Нетъ дивань тешкстнэнь вельде, конатнень максозель тейнемс те сюромартонтень, васенце идем ракшанть кармавтоманзо коряс, сон вети мода лангонь весе эрицятнень манчемас. Сон кармавты сынст теемс васенце идем ракшанть, торонь томбавкс мартонть ды таго вельмезенть, чопачанзо.

<sup>15</sup>Сюромартонтень максозель азорксчи оймивтомс васенце идем ракшань чопачанть: чопачась натой кортазевсь ды ульнесь виезэ маштнемс эрванть, кона эзь суюконякшно тензэ.

<sup>16</sup>Те омбоце идем ракшась вийсэ кармавты весень: инетнень ды вишкинетнень, суюпавтнэнь ды кажовтнень, уретнень ды олячисэтнень, – путомс тешкс вить кедезэст эли конязост.

<sup>17</sup>Ды киненьгак ломантнень эйстэ а мереве рамсемедеяк, микшнемедеяк, бути арась лангсонзо тешкс, кона невти идем ракшанть лемензэ эли сонзэ лементь невтиця цисланзо\*.

<sup>18</sup>Тень чарькодемс эряви превень домкачи. Превей ломанесь кадык ловсы идем ракшанть цисланзо. Те цислась кодамо-бути ломанень, ды се цислась – котосядт кодгемень кото.

## Откровение 14

### Вирезэсь ды Сонзэ ломанензэ

<sup>1</sup>Ды мон неия: вана Вирезэсь стядо ашти Сион пандо прясо ды Сонзэ марто сеть сядо ниленьгемень ниле тёжат ломантне, конатнень конясост сёрмадозь Сонзэ Тетянзо лемесь.



<sup>2</sup>Ды мон маринь менельстэ вайгель, кона ведьпрамонь увноманть кондямоль, пурьгинень ине зэртенть кондямоль. Те вайгелесь марявсь прок кайгасо седицянь седямокс.

<sup>3</sup>Сядо ниленьгемень ниле тѣжатне морасть од шнамо моро инязоронь озамо тарканть икеле, ниле ракшань-ломанень кондытнэнь ды сыре атятнень икеле. Те шнамо моронть кияк эзь машто морамонзо, неть ломантнеде башка, конат рамазь-идезь мода лангсто.

<sup>4</sup>Неть сеть, конат эзть удсе ава марто ды ванстызь эсест ваньксчист. Неть сеть, конат свал молить Вирезэнтъ мельга, ков Сон илязо моле. Сынст рамизь-идизь весе ломантнень ютксто ды васенце казнекс алтызь Пазонтень ды Вирезэнтень.

<sup>5</sup>Сынст кургсто зярдояк эзть лисне кенгелемат, ды сынъ свал ульнестъ асатыкстэметъ, колавкстомот Пазонь инязоронь озамо тарканть икеле.

#### Колмо ангелт

<sup>6</sup>Мон таго неинь менель ёжова ливтиця ангел. Сон кандсь пингеде пингень Кенярксов куля, конань сон яволявтывзе мода лангонь эрицятненень, эрва буентень, раськентень, масторонтень ды эрва кодамо кельсэ кортыця ломантненень.

<sup>7</sup>Сон виев вайгельсэ сеересь: «Пеледе Пазонь мельдентъ ды шнадо Сонзэ инекчинзэ! Эдь сась те шкась, зярдо Пазось суди масторлангонь эрицятнень! Сюконядо менелень, модань, иневедень ды лисьмапрянь Теицянть!»

<sup>8</sup>Те ангелэнтъ мельга ливтясь омбоце ангел ды яволявтсь: «Лондадсь, лондадсь ине Вавилон ошось! Эсь ускурямосонзо сон симдинзе весе раськетнень Пазонь инекежень винадонть».

<sup>9</sup>Мельгаст ливтясь колмоце ангел ды виев вайгельсэ сеересь: «Бути кить сюконить идем ракшанть ды сонзэ чопачанть ды путнить эсест коняс эли кедьс идем ракшанть тешксэнтъ,

<sup>10</sup>сетнеяк кармить симеме Пазонь ацирьгадомань виев, ведь марто апак човоря винадо. Те винанть Пазось Сонсь каизе Эсензэ инекежень вина кечентень. Сетнень пиштейвтьсызь толсо ды лакиця палыкандалсо Пазонь ангелтнэнь ды Вирезэнтъ икеле.

<sup>11</sup>Сынст пиштейвтиця толонь качамось карми кепетеме верев пингедэ пингес. Кить сюконить идем ракшантень ды сонзэ чопачантень, ды кить кандтнить идем ракшанть лемензэ тешксэнтъ, сынст а ули оймамоост читькак, ветькак.

<sup>12</sup>Теньсэ Пазонь ломантне, конат топавтыть Пазонь кармавтокстнэнь ды кемемасо молить Иисус мельга, тердевить цидярдомас».

<sup>13</sup>Мейле мон маринь менельстэ вайгель, кона мерсь монень: «Сёрмадт: Кодат уцяскавт те чистэнтъ саезь сеть, конат кулыть Азоронтень кемезь!» «Алкукскаяк уцяскавт! – корты Пазонь Оймеялтось, – кадык сынъ оймаить эсест стака важодемадост, эдь паро тевест молить мельгаст».

### Ине нуема

<sup>14</sup>Теде мейле мон варштынъ ды неинъ ашо пель, конанъ лангсо ашти озадо кие-бути Ломантнень Цёранть кондямо. Сонзэ прясо ульнесь сырнестэ теезь инязоронь каштаз, ды кедьсэнзэ пшти тарваз.

<sup>15</sup>Таго вейке ангел лиссь Пазонь кудосто ды виев вайгельсэ сеересь пель лангсо Озадонтень: «Саик эсеть тарвазот ды нуйть! Нуема шкась сась – масторлангонь сюрось кенерсь!»

<sup>16</sup>Сестэ пель лангсо Озадо аштицясь ёртызе тарвазонзо моданть лангс, ды кенерезь сюрось нуевсь.

<sup>17</sup>Вана лия ангел лиссь менелень Пазонь кудостонтъ, сонзэ кедьсэяк ульнесь пшти тарваз.

<sup>18</sup>Ды лия ангел, кона ульнесь прявтокс толонтъ лангсо, лиссь алтарентъ вакссто. Сон виев вайгельсэ серьгедсь пшти тарваз марто ангелэнтень:

«Кучить эсеть пшти тарвазот ды пурныть винаумарень цюцькатнень винаумарькстнэстэ, эдь цюцькатне кенерсть».

<sup>19</sup>Ангелэсь ёртызе тарвазонзо моданть лангс, керсинзе винаумарькстнэстэ цюцькатнень ды ёртынзе сынст Пазонь инекежень винань теема покш тарканть.

<sup>20</sup>Ды винаумарень цюцькатне ульнесть тапсезь винань теема таркасонть ош ушосо. Ды вересь чадсь винань теема таркань чиренть велькска ды кепедевсь натой кильдезь лишмень панстнэненъ, ды валовсь малав колмосядт вайгельбень келес.

## Откровение 15

### Сисем ангелт, сисем зыянонь кандыцят

<sup>1</sup>Мейле мон неинь менельстэ таго вейке ине ды абунгавтыця тешкс: сисем ангелт, конат кандсть сисем зыянт. Неть зыянтнэ – меельцеть, эдь сынст эйстэ топавтови Пазонь инекежесь.

<sup>2</sup>Ды мон неинь прок тол марто човорязь суликань кондымо иневедь. Те иневеденть чиресэ аштеть идем ракшань изницятне, конат эзь сюконякшно сонзэ чопачанть ды эзь сова те тешксэнтэ алов, кона невтсь сонзэ лемень цисланть. Сынъ кирдсть кедьсэст Пазонь максовт кайгат ды

<sup>3</sup>морасть Моисеень, Пазнэнь важодицянь ды Вирезэнь шнамо морост: «Инеть ды абунгавтыцят Тонь теветь, Азоро Паз, Весемькирдиця! Видеть ды алкукст Тонь кить-ялот, Пазонь ломантнень Инязоро!

<sup>4</sup>Кие а пелезеви Тонь эйстэ, Азоро?! Кие а шнасы Тонь лементь инекчинзэ?! Эдь ансяк Тон съкамот иневаньксат! Весе масторлангонь раськетне сыть ды прыть Тонь икелев кумажа лангс! Эдь Тонь виде тевтне ней кармасть неявомо!»

<sup>5</sup>Тедэ мейле мон неинь, кода панжовсь менельсэ иневанькстэяк иневанькс таркась Пазонь кудосо,

<sup>6</sup>ды тосто лиссть сисем зыянонь кандыця ангелт. Ангелтнэ оршазельть ванькс ды цитница лияназонь оршамосо ды карксазельть мештева сырнень каркссо.

<sup>7</sup>Мейле ниле ракшань-ломанень кондытнэстэ вейкесь венстясь эрва ангелэнтень сырнень вакан, пештязь пингеде пингес эриця Пазонть инекежсэ.

<sup>8</sup>Ды Пазонь кудосо иневанькстэяк иневанькс таркась пешкедсь качамосо Пазонь инексчиденть ды вийденть. Секскак кияк эзь соваво Пазонь кудонтень се шкас, зярс эзь топавтово сисем ангелэнь кандовт сисем зыянтнэ.

## Откровение 16

### Пазонь инекежсэ пештязь сисем вакант

<sup>1</sup>Мон маринь Пазонь кудосто гайгиця виев вайгель, кона кортась сисем ангелтнэненя: «Азёдо ды валынк мода лангс Пазонь инекеженя сисем вакантнэнь!»

<sup>2</sup>Лиссь васенце ангелэсь ды валызе эсь ваканонзо мода лангс. Нулгодькс ды пиштевитиця сыявкст лиссть сеть ломантнень лангс, конат тешкстазельть идем ракшанть тешкссэ ды сюконякшность сонзэ чопачантень.

<sup>3</sup>Омбоце ангелэсь валызе эсь ваканонзо иневедь лангс. Ведесь теевсь прок кулозень верекс, ды иневедень эрицятне весе кулость.

<sup>4</sup>Колмоце ангелэсь валызе эсь ваканонзо лейтнес ды лисьмапратнес, ды сынйгак теевсь верекс.

<sup>5</sup>Ды мон маринь, кода ведень ангелэсь кортась Пазонтень: «Нетя Тонь кеженя пандоматне, конатнень Тон кучить, видеть! Виде Тон, Азоро, кона свал ули ды ульнесь, ды иневаньксат секс, мекс истя судят!»

<sup>6</sup>Сынь валсть Тонь ломантнень ды пазмарицятнень верест. Секскак Тон сынст симдить верде. Тевест коряс тенст истя эрвияк!»

<sup>7</sup>Ды мон маринь алтарьстэ лисиця лия вайгель: «Алкукс истя, Азоро Пазось, Весемькирдиця! Алкукст ды видеть Тонь кежень пандоматне!»

<sup>8</sup>Нилеце ангелэсь валызе эсь ваканонзо чинть лангс, ды чинтень максозель вий эсензэ толонь псисэнтъ пултамс ломантнень.

<sup>9</sup>Ломантне пицевсть те виев псидентъ ды сюдостъ-покордасть Пазонтъ, конань ульнесь кирдемавиезэ неть зыянтнэнь лангсо. Ялатеке сынъ эзизь кадо пежетест ды эзть шна Пазонтъ инексчинзэ.

<sup>10</sup>Ветеце ангелэсь валызе эсь ваканонзо идем ракшань инязоронь озамо тарканть лангс, ды сонзэ инязорксчинь масторозо копачавсь чоподачисэ. Неть пиштематнеде ломантне порсть эсь келест

<sup>11</sup>ды ялатеке сюдостъ-покордасть менелень Пазонтъ эсест сыявксост ды майсемаст кис. Ансяк сынъ ялатеке эзизь кадо пежетев киява молемаст.

<sup>12</sup>Вана котоце ангелэсь валызе эсь ваканонзо ине Эвфрат леентень, ды коськсь леентъ ведесь. Истя панжовсь кись чилисема ёндонь инязортнэненъ.

<sup>13</sup>Ды мон неинь ватракш ёнов молиця колмо аванькс оймеялтт, конат лиссть инегуентъ, идем ракшанть ды кенгелиця пазмарицянтъ кургосто.

<sup>14</sup>Нетъ ульнестъ идемевсень оймеялтт, тамашань тейницят. Сынъ сыргастъ пурнамо весе масторлангонь инязортнэнь тюремас. Те тюремась ули Весемькирдиця Пазонтъ ине судямо чистэнтъ.

<sup>15</sup>Иисус Христос корты: «Кунсолодо! Мон сан апак учо, прок салыця. Уцяскав се, кона а улы ды аноксты эсензэ оршамонзо. Сон а карми якамо штапо, ды сонензэ а сави визделгалемс весень сельме икеле!»

<sup>16</sup>Ды сон пурнынзе инязортнэнь се таркантень, конанень еврееень кельсэ мерить Армагеддон.\*

<sup>17</sup>Сисемеце ангелэсь валызе эсь ваканонзо коштс. Менелень Пазонь кудостонтъ, инязоронь озамо таркантъ лангсто, каятотсь виев вайгель: «Топавтовсь!»

<sup>18</sup>Ды неявиць ёндолонь кивчкаемат, марявсть сееремат, пурьгинень зэртъ ды кепететсь модань покш сорнома. Истямо покштояк покш модань сорнома арасель се шкастонть саезь, зярдю ломанесь кармась эрямо мода лангсо!

<sup>19</sup>Модань сорномадонть ине ошось лазовсь колмо пельксэв. Ды весе масторлангонь раськетненьгак ошост лондадсть. Пазонть мельс ледсь Вавилон ине ошось, ды Вавилоннэнь савсь симемс Пазонь ацирьгадомань ды инекежень винадо пештязь кечентъ потмаксос.

<sup>20</sup>Ды иневедень весе усиятне ёмасть, ды пандтнэяк а мукшновить.

<sup>21</sup>Менельстэ прась ломантнень лангс виев цярахман, ды эрьва цярахман эрьгентъ сталмозо – ниле пондт\*. Ломантне сюдость-покордасть Пазонть зыянонтъ кисэ, конань теизе цярахманось, эдь те зыянось ульнесь покштояк покш!

## Откровение 17

### Идем ракша лангсо ласте аштиця авась

<sup>1</sup>Вана сась монь малас вейкесь сисем ангелтнэстэ, конатнень ульнестъ сисем ваканост, ды кортазевсь монь марто: «Сак малав, мон невтса тонеть, кодамо чумонь пандома учи содавикс усксевиця аванть, кона эри-ашти ламо лейтнень чирева.

<sup>2</sup>Сонзэ марто ускурясть масторлангонь инязортнэ, ды сонзэ ускурямонь винадонть симсть иредемезэст мода лангонь эрицятне».

<sup>3</sup>Мейле Пазонь Оймеялтось саимим Эсь виензэ алов, ды ангелэсь пачтимим чаво модас. Тосо мон неинь ава, кона ласте аштесь валдо якстере идем ракша лангсо. Идем ракшанть весе рунгозо сёрмалезель Пазонь покордыця лемтнесэ. Ракшанть ульнестъ сисем прынзо ды кемень сюронзо.

<sup>4</sup>Авась оршазель чопода якстере ды валдо якстере оршамосо, сонзэ лангсо цивтёрдсть сырнеть, питней кевнеть ды ведьэрьгинеть. Кедьсэнзэ сон кирдсь сырнень кече, кона пештязель сонзэ ускурямонь нулгодькссэ ды аванькссэ.

<sup>5</sup>Конясонзо сёрмадозель лемезэ, конасонть кекшезь смустесь: “Ине Вавилон, весе масторлангонь ускурицятнень ды нулгодькстнэнь аваст”.

<sup>6</sup>Ды мон неия: авась иредезель Пазонь ломантнень, Иисуснэнь кемемаст кисэ маштнезтнень, вердест. Сонзэ неезь, мон абунгадынъ дивамодонть.

<sup>7</sup>Ангелэсь кевкстимим: «Мекс тон абунгадыть? Мон панжса тонеть аванть ды сисем прясо ды кемень сюросо идем ракшанть, конань лангсо авась, салавачист.

<sup>8</sup>Идем ракшась, конань тон неик, зярд-бути ульнесь, ней жо сон арась. Сон таго лиси тоначинь потмакстомо отьмастонть, ды курокто стардсы сонзэ куломась-ёмамось. Мода лангонь эрицятне, конатнень лемест менелень-масторонъ теевемадо икеле апак сёрмадо эрямо книганть, абунгадыть, зярд несозь те идем ракшанть, кона ульнесь, ней арась ды таго карми улеме.

<sup>9</sup>Тень чарькодемс эряви превень домкачи. Сисем прятне – те сисем шушмот, конатнень лангсо озадо ашти те авась.

<sup>10</sup>Теде башка, неть прятне – сисем инязорт: сисемтнестэ вететне умок кулость, котоцесь нейгак инязор. Сисемецесь те шкас эзь са, ды зярд сы, тензэ пек а куватьс улемс инязорокс.

<sup>11</sup>Идем ракшась жо, конась зярд-бути ульнесь ды ней арась, те сонсь кавсоце инязорось ды теке марто сеть сисемтнень ютксто вейкесь, ды курокто стардсы сонзэ куломась-ёмамось.

<sup>12</sup>Кемень сюротне, конатнень тон неить, – те лия кемень инязорт, конат те шкас эзть оза инязоронь таркас. Сыненст максови инязорксчись идем ракшанть марто вейсэ вейке часос.

<sup>13</sup>Весе кементнень вейке бажамост, ды эсест виест ды азорксчист сынь макссызь идем ракшантень.

<sup>14</sup>Сынь ды идем ракшась сыржавтыть тюрема Вирезэнтъ каршо. Ансяк Вирезэсь изнясынзе сынст, эдь Сон азортнэнь Азорось ды инязортнэнь Инязорось. Ды Сонзэ марто молить Сонзэ тердевть, кочкавт ды кемевикс ломанензэ».

<sup>15</sup>Ангелэсь поладсь седе тов: «Лейтне, конатнень тон несыть ды конатнень чирева эри-ашти ускуриця авась, те ломанть ды раськетъ, буеть ды кельть.

<sup>16</sup>Нетъ кемень сюротне, конатнень тон неить, ды идем ракшась кежейгадыть те ускуриця аванть лангс ды сезнесызь оршамонзо, кадсызь сонзэ кепе-штапо. Сынь азарьстэ порьсызь сонзэ рунгонзо ды пултасызь толсо.

<sup>17</sup>Эдь Пазось путсь инязортнэнь седейтнес бажамо топавтомс Сонзэ арсеманзо. Секскак сынь, эсь ютковаст ве мельс празь, макссызь эсест инязорксчист идем ракшантень се шкас, зярс а топавтовить Пазонь валтнэ.

<sup>18</sup>Те авась, конань тон неик, ине ош, кона ашти инязоравакс весе масторлангонь инязортнэнь лангсо».

## Откровение 18

### Вавилонось лондадсь!

<sup>1</sup>Мейле мон неия, кода менельстэ валги лия ангел. Сонзэ ульнесь покш азорксчизэ, ды модась валдомгадсь сонзэ иневалдонь сияждомасонтъ.

<sup>2</sup>Сон серьгедсь виев вайгельсэ: «Лондадсь, лондадсь Вавилонось, оштнэнь ютксто ине ошось! Сон теевсь эрямо таркакс идемевстненень



ды эрва кодамо аванькс оймеялтнэнень, пизэкс эрва кодамо аванькс ды нулгодькс нармунтненень.

<sup>3</sup>Эсензэ ускурямосонзо сон симдинзе Пазонь инекеженъ винадонть весе раськетненъ. Масторлангонъ инязортнэ ускурясть сонзэ марто, ды мода лангонъ микшнициятне-рамсициятне ламолгавтсть эсест сюпавчист сонзэ апештявица бажамотненъ кувалт».

<sup>4</sup>Ды мон маринъ менельстэ лия вайгель. Сон кортась: «Монъ раськем, кадык Вавилононть! Иля вадневе сонзэ пежетнесэ. Сестэ сонзэ лангс кучозь чумонъ пандоматне а прыть тонъ лангс.

<sup>5</sup>Эдь сонзэ пежетненъ пандось эль токи менельс, ды Пазонтъ мельс ледсть весе сонзэ зыянов тевензэ.

<sup>6</sup>Тейнеде те авантень истямо зыян, кодамо сон тейнесъ лиятненень, ды пандодо тензэ кавксть седе ламо весе сонзэ тевтненъ кисэ. Секе кечентень, конасонтъ сон анокстакшнось симемапель лиятненъ туртов, каядо эстензэ кавксть седе виев вина!

<sup>7</sup>Зяро сон каштангалесь ды эрясь певтеме сюпав эрямосо, зняро жо максодо тензэ пиштемат ды ризнэмаат! Эдь сон эсь пачканзо корты: «Мон аштян инязоронъ озамо таркасо теке инязорава! Мон аволь дова, ды ризксэсь зярдояк а пры монъ лангс!»

<sup>8</sup>Вана мекс апак учо ве чистэ прыть лангозонзо весе апаратне: куломанъ ормась, малавиксэнъ куломась ды вачочись. Ды сонзэ пултасызь толсо, эдь Азоро Пазось, кона сонзэ судизе, виевдеяк виев».

<sup>9</sup>Ды весе масторлангонъ инязортнэ, конат певтеме сюпав эрямосо эрясть сонзэ марто ускурязь, кармить авардеме ды лайшеме сонзэ кисэ, зярдо несызь качамонтъ толбандястонтъ, косо сонзэ пултыть.

<sup>10</sup>Ве пеле аштезь ды тандадозь сонзэ пиштематнеде, сынъ кармить кортамо: «Вай! Вай! кодамо покш зыянось тонеть, Вавилон, ине ды виев ош! Апак учо, сельгень прамс, стардынзеть чумонъ пандомась!»

<sup>11</sup>Ды масторлангонь микшниціятнеяк-рамсиціятнеяк авардить ды лайшить сонзэ кисэ, эдь ней кияк а рамси сынст микшнемапелест, конатнень ютксо

<sup>12</sup>сырне, сия, питней кевнеть, ведьэрьгинеть, човине лияназонь ды парсеень коцт, чопода якстере ды валдо якстере коцт, тантейстэ качадыця чувтт; слононь ловажасто, питней чувтосто, бронзасто, кшнистэ ды мраморсто теезь эрьва кодат теевкст;

<sup>13</sup>корица, лият тантей чинень нолдыцят, ладан\* ды мира ды фимиам, вина, ойумарень ой, почт ды товзюро; скалт, реветь, лишметь, крандазт, уреть ды ломанень ойметь.

<sup>14</sup>Микшниціятне-рамсиціятне лажныть: «Вай! ёмась весе ули-парось, конанень пек бажась тонь оймесь! Весе тонь сюпавчись ды сияждомась кадыдизь тонь, ды сынст зярдоак а велявтсыть!»

<sup>15</sup>Микшниціятне-рамсиціятне, конат микшнеть те весементь ды сюпалгадсть Вавилон ошонть кувалт, кармить аштеме ве пеле, сонзэ пиштематнеде тандадозь, ды авардемань ды лайшемань пачк кармить кортамо:

<sup>16</sup> «Вай! кодамо покш зыянось тонеть, ине ош! Тон ульнить оршазь човине лияназонь, чопода якстере ды валдо якстере коцтсо, мазылгавтозь цивтёрдыця сырнесэ, питней кевнесэ ды ведьэрьгинесэ!

<sup>17</sup>Ды весе те тонь сюпавчись апак учо, сельгень прамс, ёмась-арась!»  
Иневенчень весе ветіцятне ды иневедьга уиціятне, иневенчсэ весе важдиціятне ды иневедьлангонь микшниціятне аштеть ве пеле.

<sup>18</sup>Зярдо неизь сонзэ палома качамонтъ, сынъ мезе вий сеерестъ: «Зярдоак арасель истямо ош, кона араволь сэрцек те ине ошонть ваксс!»

<sup>19</sup>Ризксэнь невтемга сынъ почолеть прят пульсэ, авардемань ды лайшемань пачк сеерестъ: «Вай! Вай! кодамо покш зыянось тонеть, ине ош! Весе, кинь улить иневедьсэ иневенчест, сюпалгадсть сонзэ

сюпавчинть кувалт. Ды вана апак учо, сельгень прамс, сон теевсь чаво таркак!»

<sup>20</sup>«А вана тон, менель, кенярдт сонзэ лондадоманть кувалт! Кенярдодо, Пазонь весе ломантне, апостолтнэ ды пазмарицятне! Эдь весе те беряненць кисэ, конань тейнизе тынк туртов те ошось, истя жо судизе Пазось!»

<sup>21</sup>Мейле пек виев ангелэсь кепедсь ведьгевень покш яжамо кевень покшолмасо кев, ёртызе сонзэ иневедьс ды мерсь: «Истямо вийсэ Пазось вырновттанзат, Вавилон, ине ош! Ды тон зярдояк уш а кармат улеме!

<sup>22</sup>А кармить уш гайгеме тонь эйсэ седямонь ды морамонь вайгельть, кияк уш а марясынзе арфань, нудеень ды торамонь вайгельтнень. А кармить улеме эйсэть пенчень-ваканонь, чакшонь-пачалгонь теицяткак. Ведьгевень яжамо кевень увтонтькак кияк уш а марясы.

<sup>23</sup>Лампа валдонтькак тоньсэть кияк уш а несы; урвакстыця ды венчиця од ломантнень вайгелест кияк уш а марясынзе. Тонь микшницятне-рамсицятне ульнесть масторлангонь чирязокс, ды эсеть мунямот-орожиямот вельде тон манчить весе масторлангонь раськетнень!»

<sup>24</sup>Истя Пазось пандызе Вавилононтень чумонзо: сонзэ кедензэ ваднезь куловтозь пазмарицятнень ды Пазонь ломантнень верьсэ. Сон чумо масторлангонь весе куломатнесэ!

## Откровение 19

### Менель лангсо кеняркс Вавилононь лондадоманть кувалма

<sup>1</sup>Тезде мейле мон маринь менельстэ ламо ломанень вайгелень кондымо покш увт. Вайгельтне морасть: «Аллилуя\*! Идемась, шнамось ды виесь – минек Пазонтъ кедьсэ!

<sup>2</sup>Сонзэ кежень пандоматне алкукст ды видеть. Сон судизе ине ускуриця аванть, кона наксавтызе весе моданть эсензэ ускурямосонтъ. Эсензэ важотнень верест валоманть кисэ Пазось пандызе те аванть чумонзо».

<sup>3</sup>Ды таго марязевсть вайгельть: «Аллилуя! Палыця ошонтъ качамось кепедеви пингеде пингес!»

<sup>4</sup>Комснилее сыре атятне ды ниле ракшань-ломанень кондямотне прасть инязоронь озамо таркасо аштиця Пазонтъ икелев, шнасть Сонзэ инексчинзэ ды кортасть: «Аминь, истя улезэ! Аллилуя!»

<sup>5</sup>Мейле инязоронь озамо тарканть ёндо марятотсь кортыця вайгель: «Пазонь весе важотне, Пазонь мелень ваныцятне, инетнеяк, вишкинетнеяк, шнадо минек Пазонтъ!»

### **Вирезэнтъ урвакстома чизэ**

<sup>6</sup>Мейле мон маринь теке ламо ломанень вайгельть, теке ведьпрамонь кондымо увт, теке виев пурьгинень кондымо зэртъ: «Аллилуя! Минек Азоро Пазось, Весемькирдицясь, саизе Эсензэ кедьс инязорксчинть!»

<sup>7</sup>Кенярдтано, кецятано ды шнатано Сонзэ инексчинзэ, эдь течи сась Вирезэнтъ урвакстома шкась! Ды одирьвазояк анокстызе прынзо:

<sup>8</sup>сон оршазь ванькс ды сияждыця оршамопельсэ, кона теезь човине лияназонь коцтсто». Те човине лияназонь коцтось – Пазонь ломантнень виде тевест.

<sup>9</sup>Мейле ангелэсь кармавтсь монень: «Сёрмадт: уцяскавт сеть, конат тердезь Вирезэнь урвакстома чинь каванямонтень!» Ды седе тов сон поладсь: «Нетъ вана Пазонь виде валтнэ».

<sup>10</sup>Мон пульзинь ангелэнтъ пильгезэнзэ ды сюкониксэлинь тензэ, ансяк сон мерсь монень: «Вант, истя иля тейне! Мон Пазнэнь истямо жо важдоциян, кодамат тонгак ды кемиця тонь ялгатне, конат ёвтнить Иисусто! Пазонтень сюкомяк! Содак: Иисусто ёвтницятнесэ важди теке жо Оймаелтось, кона максы вий пазмарицятнененьгак».

### **Ашо лишме лангсо ласте аштицясь**

<sup>11</sup>Теде мейле мон неия панжозь менелентъ ды вана тосо ашо лишме ды лангсонзо ласте аштиця. Ласте аштицянтень мерить Кемевикс ды Виде. Сон видекойсэ суди ломантнень ды тюрияк душманонзо каршо.

<sup>12</sup>Сонзэ сельмензэ палыця толонь кондят, ды прясонзо инязоронь ламо каштазт, лангсонзо сёрмадозь лемезэ, конань кияк а содасы Эстедензэ башка.

<sup>13</sup>Ланга оршамозо артозь верьсэ, ды Ластентень мерить Пазонь Вал.

<sup>14</sup>Сонзэ мельга мольсть ласте ашо лишме лангсо менелень ушмотне. Сынь оршазельть ашо, ванькс, човине лияназонь оршамосо.

<sup>15</sup>Кургстонзо лисиль пшти торо, конаньсэ Сон пандсы кеженть весе раськетненень, ды карми кирдеме-ветямо сынст кшнинь мандосо. Винаумарень матрамо таркасонть пильгесэ лепшти Сон винаумартнестэ Весеменькирдиця Пазонь ацирьгадомань ды кежень пандомань вина.

<sup>16</sup>Оршамопельганзо, пукшо видьганзо, сёрмадозь лемезэ: “Инязортнэнь Инязорось ды азортнэнь Азорось”.

<sup>17</sup>Мейле мон неинь чинть лангсо стядо аштиця ангел, кона виев вайгельсэ сеересь менель ёжова ливтниця весе нармунтненень: «Садо, пурнаводо вейс Пазонь анокставт покш каванямонтень!»

<sup>18</sup>Садо ярсамо кулозь инязортнэнь, ушмантнэнь ды сынст прявтнэнь, лишметненень ды ластетненень сывельдест; весе ломантненень: олячисэтненень ды уретненень, вишкинетненень ды инетненень сывельдест».

<sup>19</sup>Ды мон неинь: идем ракшась, весе масторлангонь инязортнэ ды сынст ушмот пурнавсть вейс. Сынь сырмиксэльть тюреме ашо лишме лангсо Ластенть ды Сонзэ ушмонтъ каршо.

<sup>20</sup>Ансяк идем ракшась кундазель, мартонзо кенгелиця пазмарицяськак, кона тейнесь сонзэ икеле тамашат, ды сынст вельде ветясь манчемас сетненень, конат путсть эстест идем ракшань тешксэнтъ ды суюконякшность сонзэ чопачантень. Сынь кавонест живстэ ёртозельть кирвитолсо ды палыкандалсо палыця эрькентень.

<sup>21</sup>Ятонь ушмотнестэ кадовикстнэ маштнезельть Ластенть кургсто лисиця торосонть, ды весе нармунтне пештизь пекест сынст сывельдест.

## Откровение 20

### Христосонь Инязорксчись тѣжа иень перть

<sup>1</sup>Сестэ мон неинь менельстэ валгиця ангел, конань кедьсэ ульнесь тоначинь потмакстомо отьманть эйстэ панжома ды кшнинь покш терть.

<sup>2</sup>Сон кундызе инегуенть ды сьулмсизе-тертизе сонзэ тѣжа иес. Те инегуесь – кезэрень гуй, лиякс меремс, Идемевсесь эли Сатанась.

<sup>3</sup>Мейле ангелэсь ёртызе инегуенть потмакстомо отьманть, панжомасо пекстызе отьмань кенкшенть ды путсь лангозонзо пекстамо тешкс: илязо ветне инегуесь манчемас весе раськетнень, зярс а ютыть тѣжа иетне. Те шканть ютазь, сонзэ эряви нолдамс олячис, ансяк а куватьс.

<sup>4</sup>Вана мон неинь инязоронь озамо таркат, конатнес озасть сеть, кинень максозель судямонь-ветямонь кирдемавий. Истя жо мон неинь сетнень оймест, конатнень керсизь пряст Иисусто ёвтнеманть кисэ ды Пазонь валонть пачтямонзо кисэ. Сынъ эзь сьуконя идем ракшанть эли сонзэ чопачанть ды эзь путо конязост, кедезэст идем ракшанть тешксэнзэ. Ней сынъ велявтсть эрямос ды ульнесть инязорокс Христос марто тѣжа иеть.

<sup>5</sup>Те васенце вельмема. Кадовикс кулозтне жо эзь велявто эрямос, зярс эзь юта тѣжа иетне.

<sup>6</sup>Уцяскавт сетне, кинень максови эрямось васенце вельмема шкане! Сынъ, алкуккак, Пазонь ломанть! Сынст лангсо омбоце куломанть виезэ арась. Сынъ кармить важдеме Пазонь ды Христосонь попокс ды кармить улеме инязорокс Христос марто вейсэ тѣжа иень перть.

### Сатанась ули изнязь

<sup>7</sup>Зярдю прядовить тѣжа иетне, Сатананть нолдасызь пекстамо кудостонзо. Сон таго туи манчеме масторлангонь ниле ёнкстнѣва эриця раськетнень, конатненень мерить Гог ды Магог. Сон сынст весень пурнасынзе тюремас. Неть ломантнень ламочист прок иневедь чиресэ чувар.

<sup>8</sup>Ды сынъ срадыть весе моданть ланга ды эрѣва ёндю пирясызь Пазонь ломантнень эрямо-аштема таркаст, лиякс меремс, Пазонь вечкевикс ошонть.

<sup>9</sup>Апак учо менельстѣ Пазонть пельде пры тол ды пултасынзе ятонь ушмотнень.

<sup>10</sup>Сестѣ Идемевсесь, кона манчесь масторлангонь раськетнень, ули ёртозь кирвитолсо ды палыкандалсо палыця эрькентень, косо идем ракшаськак ды кенгелиця пазмарицяськак. Тосо сынст кармить пиштевтеме чинек-венек ды пингеде пингес.

### Пазось суди кулозтнень

<sup>11</sup>Вана мон неия инязоронь пек покш ашо озамо тарканть ды сонзѣ лангсо Озадо аштицянтъ. Сонзѣ вановтонть эйстѣ оргодсть ды допрок ёмасть модась ды менелесь.

<sup>12</sup>Мон неинь кулозтнень – инетнень ды вишкинетнень – Пазонть икеле стядо аштицякс. Панжозельть книгат, мейле панжозель эрямо книгаськак. Ды кулозтнень судясть тевест коряс, кода сѣрмадозель неть книгатнесѣ.

<sup>13</sup>Сестѣ иневедесь максынзе эсензѣ кулозтнень; Куломась ды Тоначись максызь эсест кулозтнень; ды сынст эйстѣ эръванть судясть тевензѣ коряс.

<sup>14</sup>Мейле Куломанть ды Тоначинть ёртызь кирвитолонь эрькентень. Те улияк омбоце куломась.

<sup>15</sup>Кие апак сёрмадоль эрямо книгантень, сень ёртызь кирвитолонь эрькентень.

## Откровение 21

### Од менель ды од мода

<sup>1</sup>Вана мон неия од менеленть ды од моданть. Эдь васень менелесь ды васень модась допрок ёмасть, ды иневедеськак ёмась-арась.

<sup>2</sup>Ды мон, Иоанн, неия Пазонь иневанькс ошонтъ, од Ерусалиментъ. Сон валгиль менельстэ Пазонтъ пельде, оршазь теке одирьва, кона учни эсь мирдензэ.

<sup>3</sup>Ды мон маринь виев вайгель менельстэ: «Ванодо, Пазонтъ эрямо тарказо ней ломантнень ютксо! Пазось ней свал карми эрямо сынст марто, ды неть ломантне теевить Сонзэ раськекс. Сонсь Пазось карми улеме мартост, сынст Пазокс.

<sup>4</sup>Сон нардасы сынст сельместэст эрьва сельведнентъ. Куломась а ули, ды а кармить улеме ризнэмаяк, авардемаяк, пиштемаяк, эдь весе таштось ёмась-арась пингеде пингес».

<sup>5</sup>Инязоронь озамо таркасо Аштицясь мерсь: «Вана, мон тейса весементь одокс». Ды поладсь: «Сёрмадык, эдь неть валтнэ видеть ды кемевикст».

<sup>6</sup>Сон таго мерсь монень: «Весемесь топавтовсь! Мон – Альфа ды Омега, Ушодксось ды Прядовксось. Сенень, кинь сы симемазо, Мон стякодо максан симемс эрямо ведень лисьмапрястонтъ.

<sup>7</sup>Кие изни, сенень Мон максса казнекс весе тень. Мон улян тензэ Пазокс, сон Монень – эйкакшокс.

<sup>8</sup>Вана мезе ули лиятнень марто: пелицятнень ды кемемань кадыцятнень, нулгодькс тевень тейницятнень ды ломанень маштницятнень, ускурицятнень, муницятнень-орожииятнень ды аволь алкуксонь пазнэнь сюконицятнень, ды весе кенгелицятнень



ёртсызь чумост кис кирвитолсо ды палыкандалсо палыця эрькентень, кона уляк омбоце куломакс».

### Од Ерусалим

<sup>9</sup>Мейле вейкесь неть сисем ангелтнэстэ, конат кандсть сисем вакант, пештязь меельце сисем зыянтнэсэ, сась монень ды кортазевсь: «Сак малав, мон невтса теть Вирезэнь одирванть-нинть».

<sup>10</sup>Ды Пазонь Оймаялтошь саимим Эсь виензэ алов ды ангелэсь пачтимим монь покштояк покш ды сэрей пандо пряс. Тосто сон невтисе монень ине ошонтъ, Пазонь иневанькс Ерусалиментъ, кона валгиль менельстэ Пазонтъ пельде.

<sup>11</sup>Сон сияждсь Пазонь иневалдосонтъ, ды сонзэ сияждомась мольсь питнейдеяк питней кевень цивтёрдома ёнов, пачкнеиця кристалень кондямо яшма ёнов.

<sup>12</sup>Ошось пирязель кемгавтово орта марто сэрей ошпирявкссо. Ортатнень вакссо аштеть кемгавтово ванстыця ангелт. Ортатнень лангсо сёрмадозельть Израилень кемгавтово буетнень лемест, эрва ортасонтъ – вейке лем.

<sup>13</sup>Колмо ортатне вансть чилисемав, колмотне – пелеве ёнов, колмотне – обед ёнов, колмотне – чивалгома ёнов.

<sup>14</sup>Ошпирявксошь аштеть кемгавтово кевень юрт лангсо. Эрва кевентъ лангсо сёрмадозельть Вирезэнтъ кемгавтово апостолтнэнь лемтнестэ вейкесь.

<sup>15</sup>Ангелэсь, кона кортась монь марто, кирдсь кедьсэнзэ сырнень онкстнемапель\*, конасонтъ сон пурнась онкстнеме ошонтъ, ортатнень ды ошпирявксонтъ.

<sup>16</sup>Ошось ульнесь квадратонь кондямо: кувалмозо истямо жо, кодамо келезэ. Ангелэсь онкстнизе ошонтъ онкстнемапельсэнзэ. Ошонтъ кувалмозо кемгавтово тэжат стадият\*, келезэ ды сэррезэ кувалмонтъ марто вейкетъ.

<sup>17</sup>Сон онкстнизе ошпирявксонтькак: эйсэнзэ ульнесть сядо ниленьгемень ниле кенереть ломанень онкстнемапелень коряс; те онкстнемапельсэнтэ онкстнесь ангелэськак.

<sup>18</sup>Ошпирявксось теезель яшмань питней кевстэ, сонсь ошось теезель ванькс сырнестэ, теке пачкнеиця суликасто.

<sup>19</sup>Ошпирявксонь юртнэ мазылгавтнезельть эрва кодамо питней кевсэ. Васенце юрт кевесь ульнесь яшма, омбоцесь – сапфир, колмоцесь – калцедон, нилецесь – изумруд,

<sup>20</sup>ветецесь – сардоникс, котоцесь – сердолик, сисемецесь – кризолит, кавксоцесь – берил, вейксэцесь – топаз, кеменцесь – кризопраз, кевейкеецесь – бирюза, кемгавтовоцесь – аметист.

<sup>21</sup>Кемгавтово ортатне теезельть кемгавтово ведьэргестэ: эрва ортась ульнесь вейке ведьэргестэ. Ошонь прявтульцясь теезель ванькс сырнестэ, теке пачкнеиця суликасто.

<sup>22</sup>А вана Пазонь кудо Мон эзинь нее ошстонть. Пазонь кудось тосо – те Сонсь Весеменькирдиця Азоро Пазось ды Вирезэсь.

<sup>23</sup>Ошонтэ валдомтсь Пазонь сияждыця иневалдось, ды сонзэ лампазо – Вирезэсь. Секскак лия валдовтомапель, кода чись ды ковось, ошонтэ туртов эзь эряво.

<sup>24</sup>Ошонь сияждыця валдосонтэ кармить эрямо весе масторлангонь идезь раськетне, мода лангонь весе инязортнэ кандсызь тозонь эсест сюпавчист ды инексчист.

<sup>25</sup>Чинь чоп ошонь ортатне кармить улеме панжозь. Сынь а кармить пекстневеме зярдояк, эдь ве тосо а эрси ды а улияк.

<sup>26</sup>Ды раськетне кандсызь сонзэ эйс весе эсест сюпавчист ды инексчист.

<sup>27</sup>Зярдояк а совави те ошонтень кодамояк аванькс, а совави кияк, кие теи нулгодькс тевть ды кенгели. Совавить ансяк сетне, конатнень лемест сёрмадозь Вирезэнтэ эрямо книгантень.

## Откровение 22

### Эрямо ведень лей

<sup>1</sup>Мейле ангелэсь невтизе монень эрямо ведень ванькс леенть, кона цивтёрдсь прок пачкнеиця кристаль ды чудсь Пазонтъ ды Вирезэнтъ инязоронь озамо тарканть алдо.

<sup>2</sup>Ошультянтъ куншкава, ды леенть кавто чирева кассь эрямо чувтось. Сон максы умартъ кемгавтовоксть иезэнзэ, эрва ковсто, ды сонзэ лопатнеде шумбралгавтовить весе масторлангонь раськетне.

<sup>3</sup>Кодамомяк сюдозь тев тесэ уш а ули. Те ошсонть карми аштеме Пазонтъ ды Вирезэнтъ инязоронь озамо таркась, ды весе Пазонь важотне кармить важдеме Тензэ.

<sup>4</sup>Сынь несызь Пазонтъ чаманзо, ды Пазонь лемесь карми улеме сёрмадозь сынст коняваст.

<sup>5</sup>Тосо а карми улеме ве, ды сыненст а карми эрявомо лампань валдомяк, чивалдомяк, эдь сыненст валдокс карми улеме Азоро Пазось. Ды сынь кармить улеме инязорокс пингеде пингес.

### Иисус Азорось куроок сы

<sup>6</sup>Ней ангелэсь мерсь монень: «Нетъ весе валтнэ видеть ды кемевикст. Ды Азоро Пазось, кона максы Эсензэ Оймеялтонзо пазмарицятненень, кучизе ангелэнзэ невтемс Эсензэ важотненень сень, мезесь курооксто топавтови».

<sup>7</sup>«Кунсолодо, Мон куроок сан!» – корты Иисус. «Уцяскав се, кие эри те книгань валтнэнь коряс, конат ёвтнить неень шкадонть ды сыця шкадонть».

<sup>8</sup>Мон, Иоанн, весементъ тень мария ды неия. Тень марямодо ды неемадо мейле мон пульзинь ангелэнтъ пильгс, кона невтизе монень весементъ, ды сюкониксэлинь тензэ.

<sup>9</sup>Ансяк ангелэсь мерсь монень: «Вант, истя иля тейне! Мон Пазнэнь истямо жо важдицянь, кодамат тонгак, ды пазмарицятнеяк, тонь

кемиця ялгатне, ды весе лиятнеяк, конат эрить те книгань валтнэнь коряс. Пазонтень суюкомяк!»

<sup>10</sup>Ды сон таго корты монень: «Илить сёпо те книганть валонзо, конат ёвтнить неень шкадонть ды сыця шкадонть. Эдь сынст топавтома шкаст эль сы!»

<sup>11</sup>Те шканть самс берянь ломанесь седе товгак тейнезэ зыян, нулгодьксэсь тейнезэ седеяк нулгодькс тевть; паро ломанесь седе товгак тейнезэ паро тевть, ды се, кона иневанькс, седеяк теевезэ иневаньксэкс».

<sup>12</sup>«Мон курок сан! –, корты Иисус, – ды весе беряненъ ды паронь пандомась карми уleme Монъ марто. Самсто эрвантень Мон пандса тевензэ коряс.

<sup>13</sup>Мон – Альфа ды Омега, Васенцесь ды Меельцесь, Ушодкось ды Прядовкось».

<sup>14</sup>Уцяскавт сетне, кить топавтыть Сонзэ кармавтокстнэнь! Сыненст мереве совсемс ортатнева ошонтень ды ярсамс эрямо чувтонть умардензэ.

<sup>15</sup>Ош ушос кадовить кискатне, мунициптне-орожициятне, ускурициятне, ломанень маштницятне, аволь алкуксонь пазнэнь суюконициятне ды весе сетне, кить вечкить кенгелемат ды сынсь кенгелить.

<sup>16</sup>«Мон, Иисус, кучия кемикуротнева Эсень ангелэм яволявтомс тынк туртов те видечинть. Мон – Давид инязоронь буень поладыксээ, Давидэнь юрсто-корёнсто Лисевкс ды валдо теште, валскень зоря теште».

<sup>17</sup>Пазонь Оймаялтось ды одирьваськак кортыть Иисуснэнь: «Сак!» Ды сеяк, кие мари, мерезэ: «Сак!» Ды кинь сась симемазо, сазо! Ды кинь ули мелезэ, саезэ эрямо веденть стякодо!

### Меельце валт

<sup>18</sup>Мон, Иоанн, кеместэ кармавтан эрвантень, кие мари те книганть валонзо, конат ёвтнить неень шкадонть ды сыця шкадонть: бути кияк путы эсензэ валт неть валтнэс, сенень Пазось путы неть зыянтнэнь, конатнеде сёрмадозь те книгасонть.

<sup>19</sup>Ды бути кияк ёрты кодаткак валт те книгастонть, кона ёвтни неень шкадонть ды сыця шкадонть, се ломанень Пазось ёртсы эрямо книгастонть, а соватсы Эсензэ иневанькс ошонтень ды мезеяк а максы тензэ сень эйстэ, мезде сёрмадозь те книгасонть.

<sup>20</sup>Се, кие ёвты-яволявты весе теде, корты: «Содадо, Мон курок сан!»  
Аминь, улезэ истя! Сак, Иисус Азоро!

<sup>21</sup>Минек Иисус Христос Азоронть чанстесь улезэ весеменк тынк марто!  
Аминь.

## Esclarecimento

Trata-se de iniciativa particular, com os seguintes objetivos: (i) colaborar para divulgação dos diversos textos bíblicos disponíveis, e, (ii) facilitar o acesso a esses textos, inclusive por meio de download.

Todo esforço em tornar a Palavra de Deus acessível a todos, em quaisquer localidades e falantes das mais diversas línguas, precisa ser um objetivo de todos os que são guiados pelo Espírito Santo. Ele inspirou o profeta Jeremias a dizer “não ensinará jamais cada um ao seu próximo, nem cada um ao seu irmão, dizendo: Conhece ao SENHOR, porque todos me conhecerão, desde o menor até ao maior deles, diz o SENHOR” (Jer. 31:34).

Jesus, também, falou assim: “e será pregado este evangelho do reino por todo o mundo, para testemunho a todas as nações” (Mat. 24:14).

Muitas organizações foram constituídas com o propósito de fazer a Bíblia disponível nas diversas línguas. Não é uma tarefa simples. Anos de trabalho, dedicação e entrega são necessários para esta tão extraordinária missão.

O texto deste trabalho está disponível na internet, em páginas eletrônicas de organizações que produzem ou divulgam bíblias, sem acréscimos de notas ou comentários. Assim, reconhecendo e respeitando os direitos que possuem sobre seus trabalhos, incumbe a todos os que amam a Palavra de Deus, o esforço em contribuir para amplificar sua divulgação.

Se possível, faça download do texto, para que sejamos, também, guardiões da Bíblia, e, com isso, preservando-a para as futuras gerações.

Divulga a Palavra de Deus, ela mostra o Caminho e permite a todos, que se conheça Sua vontade, em todos os lugares e épocas.

Marcel da Glória Pereira  
2022, Vitória/ES - Brasil